


Jayats nanderac wüx  
miteatiiüts  
Jesucristo



New Testament in Huave, San Mateo Del Mar (MX:huv:Huave, San  
Mateo Del Mar)

# Jayats nanderac wü<sub>x</sub> miteatiüts Jesucristo

## New Testament in Huave, San Mateo Del Mar (MX:huv:Huave, San Mateo Del Mar)

copyright © 2009 Wycliffe Bible Translators, Inc.

Language: Huave, San Mateo Del Mar

Translation by: Wycliffe Bible Translators, Inc.

Huave

huv

Mexico

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### The New Testament

in Ikoots (Huave), San Mateo Del Mar

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source files dated 29 Jan 2022

03b08bf3-6708-5491-84af-10b8e34eb51c

## Contents

SAN MATEO . . . . .	1
SAN MARCOS . . . . .	44
SAN LUCAS . . . . .	72
SAN JUAN . . . . .	118
HECHOS . . . . .	151
ROMANOS . . . . .	195
1 CORINTIOS . . . . .	214
2 CORINTIOS . . . . .	233
GÁLATAS . . . . .	245
EFESIOS . . . . .	252
FILIPENSES . . . . .	259
COLOSENSES . . . . .	264
1 TESALONICENSES . . . . .	268
2 TESALONICENSES . . . . .	272
1 TIMOTEO . . . . .	274
2 TIMOTEO . . . . .	280
TITO . . . . .	284
FILEMN . . . . .	287
HEBREOS . . . . .	288
SANTIAGO . . . . .	302
1 PEDRO . . . . .	307
2 PEDRO . . . . .	313
1 JUAN . . . . .	317
2 JUAN . . . . .	322
3 JUAN . . . . .	323
JUDAS . . . . .	324
APOCALIPSIS . . . . .	326

**Najneaj nanderac leaw  
tapiüng  
SAN MATEO  
wüx Teat Cristo**

*Acualajtsüw mixejchiw mixeech Jesu-  
cristo*

*(Lc. 3:23-38)*

<sup>1</sup> Aaga nawiiḡ cam apiüḡ wüx acuala-  
jtsüw mixejchiw mixeech Teat Jesucristo.  
Nop mixeech nej aag ayaj nenüt David aaga  
natang nenajiüt; aaga David quiaj Abraham  
mixeech nej.

<sup>2</sup> Aaga Abraham quiaj tacualüw a Isaac,  
Isaac tacualüw a Jacob, Jacob tacualüw a  
Judá, y alacas micoy nej michiiḡ nej.

<sup>3</sup> Judá tacualüw a Fares, at a Zara, Tamar  
mimümüw nejiv. Fares tacualüw a Esrom,  
Esrom tacualüw a Aram.

<sup>4</sup> Condom Aram tacualüw a Aminadab,  
Aminadab tacualüw a Naasón, Naasón  
tacualüw a Salmón.

<sup>5</sup> Salmón tacualüw a Booz, mimüm Booz  
aag ayaj Rahab. Booz tacualüw a Obed,  
mimüm Obed aag ayaj Rut. Obed tacualüw  
a Isái.

<sup>6</sup> Isái tacualüw a David, áḡ tarang mi-  
natang nenajiüt. David tacualüw a Salomón,  
acual aweaag mintaj a Urías.

<sup>7</sup> Salomón tacualüw a Roboam, Roboam  
tacualüw a Abías, Abías tacualüw a Asa.

<sup>8</sup> Asa tacualüw a Josafat, Josafat tacualüw  
a Joram, Joram tacualüw a Uzías.

<sup>9</sup> Uzías tacualüw a Jotam, Jotam tacualüw  
a Acaz, Acaz tacualüw a Ezequías.

<sup>10</sup> Ezequías tacualüw a Manasés, Manasés  
tacualüw a Amón, Amón tacualüw a Josías.

<sup>11</sup> Josías tacualüw a Jeconías y alacas  
micual nej. Aag ayaj wüx nüt ndeajtoj  
maquiiürajpüw nipilan judío andüyw tiül  
iüt Babilonia.

<sup>12</sup> Wüx landoj aqiiiübaranüw andüyw Ba-  
bilonia, Jeconías tacualüw a Salatiel, con-  
dom Salatiel tacualüw a Zorobabel.

<sup>13</sup> Zorobabel tacualüw a Abiud, Abiud  
tacualüw a Eliaquim, Eliaquim tacualüw a  
Azor.

<sup>14</sup> Azor tacualüw a Sadoc, Sadoc tacualüw  
a Aquim, Aquim tacualüw a Eliud.

<sup>15</sup> Eliud tacualüw a Eleazar, Eleazar  
tacualüw a Matán, Matán tacualüw a Jacob.

<sup>16</sup> Jacob tacualüw a José minoj María.  
Aaga María quiaj tacual Teat Jesús nasoic a  
Cristo.

<sup>17</sup> Atquiaj tajlüy gajpopeic (14)  
nacualaran ajan wüx Abraham matüch a  
David. At tajlüy algajpopeic nacualaran  
ajan wüx David matüch wüx taquiiürajpüw  
nipilan judío andüyw tiül Babilonia. Nde wüx

tajlüyw tiül Babilonia wüx tatüch wijquiam  
Teat Cristo tajlüy algajpopeic nacualaran.

*Wüx wijquiat Teat Jesucristo  
(Lc. 2:1-7)*

<sup>18</sup> Wüx wijquiat Teat Jesucristo atcüy  
tajlüy: María mimüm nej altiüt mipoch  
aweaaḡ José. Pero naleaing nganaw  
mequiiübajey, María tajtjür teomeaats nej  
nop nine; tüüch nej aag ayaj Nangaj Espiritu  
ocueaj Teat Dios.

<sup>19</sup> Aaga José minench nej a María nop nej  
nerang najneaj. Xeyay andiüm minüx nej,  
áḡ ngo mandiüm majüiüquich lacual man-  
guayeran; tandiüm macueat atánan quiaj.

<sup>20</sup> Naleaing José xeyay tamb wüx  
omeaats. Ndoj, wüx tameay, quiaj taüm  
majaw nop áḡel ocueaj Teat Dios. Tasaj  
nej:

—José acualaats David, nde meyac  
imeaats wüx aaga naél quiaj, iqiiüüb  
marang mintaj a María, cos aaga nine  
apmawiquiach quiaj Nangaj Espiritu ocueaj  
Teat Dios neech nej.

<sup>21</sup> Nej apmawiquiach nop nine nench  
apmeaach manüt Jesús, cos nej apmawün  
asoet minipilan nej —aj nej.

<sup>22</sup> Atquiaj tajlüy meáwan atnej lamapiüḡ  
nop ndeaaḡ andeaaḡ Teat Dios, cos tapiüḡ:

<sup>23</sup> Nop leawa naleaing nüx nej apmecal  
mawiquiach nop nine nench.

Aaga nine quiaj apmasoic Emanuel, ajow.  
Aaga poch Emanuel quiaj, apiüḡ: Dios al-  
maquiiüb icoots.

<sup>24</sup> Ndoj quiaj tapac ameay a José. Condom  
tarang atnej tasaj nej aaga áḡel; taquiiüb a  
María marang mintaj nej.

<sup>25</sup> Naleaing nómban ngo majlüy aweaaḡ,  
tacüliw wijquiam micual a María. Aaga nine  
tüünd manüt JESS.

## 2

*Tapeayiw mondüyw wüx ocas*

<sup>1</sup> Teat Jesús wijquiat tiül cambaj Belén  
tiül iüt Judea wüx Herodes tarang minatang  
nenajiüt tiül aaga iüt quiaj. Tajlüy acas  
monxey mondüyw wüx ocas tambüw andüyw  
Jerusalén imiüntüw nonüt iüt.

<sup>2</sup> Tatüniw manguaiyiw:

—¿Nguiane almajlüy aaga nine wijquian  
leaw apmarang minatang nenajiüt tiül nip-  
ilan israele? Cos jayats majüic miocas  
nej; tajawasan wüx saliiunan nonüt tiül  
xeiütan. Nganüy sajngoton naquiejliün xe-  
cosan teombas aaga nine —awüw.

<sup>3</sup> Wüx tanguaiy aag ayaj a Rey Herodes,  
ngo majneaj mayaag, aton meáwan  
moncül Jerusalén lango majawüw cuane  
apmarangüw.

<sup>4</sup> Quiaj tatün mapeayiw meáwan mon-  
tangtang miteaats, aton meáwan mondüyw  
wüx aaga poch tüünd Moisés ocueaj nipilan

judío. Tatún manguiyai nguiane netam wi-jquiam a Cristo.

<sup>5</sup> Quiaj tasajüw nej:

—Tiül cambaj Belén tiül iüt Judea, cos atquiaj tapiüng tanomb nop nendeac andeac Teat Dios wüx tapiüng:

<sup>6</sup> Cambaj Belén tiül iüt Judá,

masey nine cambaj ic ajüic, naleaing xeyay nertam;

cos naw tiül ige apmaw nop apmatüch marang natang nenajiüt,

nej apmambeol xecambaj Israel—ajüw nej.

<sup>7</sup> Ndoj aaga Herodes quiaj tapaj ajcüwa mondüy, axotúyan tatún manguiyai nejw naleaing naleaing cuane minüt amelich majawüw aaga ocas.

<sup>8</sup> Condom tasaj nejw mambüw Belén, tapiüng:

—Nganüy quiüran, nguineayantanej itüniün menguiayüün wüx a nine. Wüx lamexoman, ndoj tewiünan mesajan xic, quiaj sanamb a xique aton naquieel xecos teomas nej—aw.

<sup>9</sup> Wüx landoj masaj nejw a Herodes, quiaj tambüw. Aaga ocas leawa tajawüw wüx aliw nonüt tiül miütüw nejw tamb ombas nej. Tayac nejw alareng niüng ajlüy a nine; quiaj tacúlan cawüx, ngo majüy.

<sup>10</sup> Nejw wüx tajawüw aag ayaj xeyay tapac omeajtsüw.

<sup>11</sup> Almajmeliw tiül iüm, quiaj majawüw a nine almaquiüüb mimüm nej. Tajmiücüw tiüt maquiejliw micosüw nejw manguejriw omalüw niüng ajlüy aaga nine. Condom taleajquiw iqialalayej mawüniw müjchwiw oro, pom, at najmboc angan soex nasoiç mirra.

<sup>12</sup> Condom wüx tameayiw, quiaj taümiw majawüw asaj nejw Teat Dios nde mandilileaw majawüw a Herodes. Quiaj tandilileaw tiül miütüw nejw, ambüw tiül alinots tiüüd.

#### *Tecuiürrüw andüy Egipto*

<sup>13</sup> Wüx laambüw a mondüy wüx ocas, quiaj José taüm majaw nop ángel tasaj nej:

—Witiür, quiür, iquiüüb mintaj, iquiüjpan a nine, icuiürran indüyüün tiül iüt Egipto. Icülünan quiaj, nde mewiünan leaw sasaj icon, cos alinoic nüt Herodes apmayamb a nine mambiy—aw.

<sup>14</sup> Wüx tapac ameay a José, quiaj tax-aiñguiw a nine, taquiüjpüw mamb andüy Egipto aaga ongwiiüts quiaj.

<sup>15</sup> Tacüliwan quiaj. Tiünüw mandilileaw wüx landeow Herodes. Quiaj tajlüy atnej lamapiüng Teat Dios wüx tapiüng nop nendeac andeac nej, cos tapiüng: “Imiün Egipto tatüniüws xecual mandilil”, aw.

*Herodes tapiüng mambiyaranüw namix nine*

<sup>16</sup> Wüx aliün mapac a Herodes, tajaw lamawajchaw nej ajcüwa mondüy wüx ocas, xeyay tajcüy. Tapiüng mambiyaranüw meáwan namix nine monench naw wüx iüm mineat, ndoj wüx naliw, meáwan monlüy tiül Belén, at tiül namix cambaj monlüy quiájan. Cos landoj matün manguiyai ajcüwa mondüy, ngüt tajawüw aaga ocas.

<sup>17</sup> Atquiaj tajlüy leaw lamapiüng nomb Teat Dios masaj Jeremías aaga nendeac andeac nej, wüx tapiüng:

<sup>18</sup> Apmanguiyaran tiül cambaj Ramá,

xeyay monpaj, xeyay monjiünts;

cos Raquel xeyay ajiünts wüx micual nej.

Nejinguind ngondom müüch nej majneaj omeats,

cos lango majlüyiw a namix nine.

<sup>19</sup> Condom wüx landeow Herodes, quiaj teümeay a José tiül Egipto, taüm majaw nop ángel tasaj nej:

<sup>20</sup> —Nganüy quiür, iquiüüb a nine at mimüm nej, indililean indüyüün tiül miütan Israel, cos landeowüw mondiüm mambiyaw a nine—aj nej.

<sup>21</sup> Quiaj tamb andüy tiül miüt Israel, taquiüüb a nine, at mimüm nej.

<sup>22</sup> Wüx José tanguiyai Arquelao lamayar minajiüt miteat nej Herodes tiül Judea, quiaj timbol mambüw quiaj. Taüm majaw tasoic mambüw andüyiw tiül iüt Galilea.

<sup>23</sup> Wüx tatüchwiw tiül miütüw nejw, quiaj tambüw macüliw tiül noic cambaj nenüt Nazaret. Atquiaj tajlüy cos lamapiüngüw tanomb mondeac andeac Teat Dios. Tapiüngüw Jesús apmasoiç Nazareno cos naw quiaj.

### 3

#### *Juan Bautista taquiaach tiül wajchiüc (Mr. 1:1-8; Lc. 3:1-9, 15-17; Jn. 1:19-28)*

<sup>1</sup> Wüx aaga nüt quiaj, Juan, aaga neech yow nipilan, tamb mandeac andeac Teat Dios tiül iüt Judea niüng ngo majlüy cambaj.

<sup>2</sup> Quiaj taquiaach nipilan, tapiüng:

—Ich leaam imeajtsan mecueatiün leaw ngo majneaj irangan, cos aaga nüt wüx Teat Dios apmajlüy wüx micambaj nej laliüc matüch—aw.

<sup>3</sup> Cos aaga Juan quiaj, tandeac wüx nej Isaías, aaga nendeac andeac Teat Dios, wüx tapiüng:

Apmanguiyaran aljane tengual andeac tiül wajchiüc:

“Itajcan majneaj mitiüüd a Teat Naxey; ileainguijchan a tiüüd cos nej aliüc.”

<sup>4</sup> Aaga Juan quiaj asooig apix nej najüyeran miyeed camello, aóel teomeats nej taag. Tatsamb mow, tanganeow micün xiül.

<sup>5</sup> Tambüw manguiyaiw aquiaach nej nipilan monaw tiül cambaj Jerusalén, monaw

tiül iüt Judea, at monaw tiül namix nine cambaj monlüy mbeay lam Jordán.

<sup>6</sup> Wüx tapiüngüw lango mandüümüw marangüw aaga ngo majneaj tarangüw, quiaj Juan tüüch nejw yow tiül lam Jordán.

<sup>7</sup> Wüx Juan tajaw lapeayiw quiaj xeyay fariseos at saduceos mayariw yow aton, quiaj tasaj nejw:

—¿Jowa icona ponong ndiüc, jane nesaj icon mercuiürran meriowan tiül aaga xeyay ngo majneaj aliüc miün apmajlüye?

<sup>8</sup> Sitiül naleaing laleaaw imeajtsan nguineay temerangan, ijüiquichan nómban irangan najneaj.

<sup>9</sup> Nde merangrangayon wüx mepiüangan tiülan icona: “Abraham xeteatiün”; cos xique sasaj icon Teat Dios alndom müüch majlüy micual Abraham masey a piedra quiaj, ndot mandüüm.

<sup>10</sup> Nganüy üech alwüx apmandooig miox-ijchaw xiül; atquiaj meáwan xiül leaw ngo mayac najneaj aóng nej, apndojquiüm majlos tiül biümb.

<sup>11</sup> Xique süüch icon yow jane naleaing lamacueat arang ngo majneaj. Pero aliüc miün nop andüüban xic miün, nej xeyay netam ajlüy, ngo mat xic. Xique sayaag nicua-jind xic niüing ajlüy nej; sayaag ngo natüch nandaand tiüt apaj nej. Nej apmüüch icon mejüran Nangaj Espiritu ocueaj Teat Dios. Apmawün wüx imbasan meáwan ngo majneaj atnej biümb ambel nendaajndeaj.

<sup>12</sup> Aag ayaj atnej arang nop nerang najiüt, cos alteowix nej minipüch nej, apmaxaing osaab trigo matendeay, condom apmaxaing mayac tiül troj. Ndoj aaga opang trigo apmambelich tiül biümb ngondom xejquem —aw.

*Wüx tayar yow Teat Jesús  
(Mr. 1:9-11; Lc. 3:21-22)*

<sup>13</sup> Teat Jesús imiün Galilea tamb majaw a Juan mbeay lam Jordán, müüch nej yow.

<sup>14</sup> Juan ngo mandüüm, tapiüng:

—Ngwüy Teat, ique netam meach xic yow; ¿neol tewiün mejaw xic nüüch ic yowa? —aw.

<sup>15</sup> Quiaj Teat Jesús tasaj nej:

—Nganüy netam merang, cos netam marangar leaw lamapiüng Teat Dios —aw.

Quiaj lango mapiüng nicuajind a Juan.

<sup>16</sup> Wüx landoj ayar yow Teat Jesús, almaw tiül yow, quiaj tajaw lejquiat a cielo, tiün Nangaj Espiritu ocueaj Teat Dios imiün tiül cielo atnej noic palom andüy wüx ombas nej.

<sup>17</sup> Condom tanguiyaran noic nanderac imiün cielo, apiüng:

—Aag ayaj xecual xowüy sandiüm, apac ximeaats najaw —aw.

## 4

*Tandiüm mayac nej wüx naél a nimeech  
(Mr. 1:12-13; Lc. 4:1-13)*

<sup>1</sup> Condom Nangaj Espiritu ocueaj Teat Dios taquiiüb mamb Teat Jesús andüy tiül wajchiüc müüch mayac nej wüx naél minatang nimeech.

<sup>2</sup> Teat Jesús tafünd ngo met ic miow (40) nüt, ic miow ongwiiüts, condom xeyay tind üt.

<sup>3</sup> Quiaj tapeay niüing ajlüy nej nimeech, tandiüm mayac nej wüx naél, tasaj:

—Sitiül naleaing ique Micual Dios ic, isaj aaga piedra quiaj marang pan —aj nej.

<sup>4</sup> Quiaj Teat Jesús tasaj nej:

—Tiül Mipoch Teat Dios apiüng: “Ngome áagan nüeteran ipacüy nipilan, leaw nem-beat aag ayaj meáwan poch andeac Teat Dios” —aj.

<sup>5</sup> Condom quiaj minatang nimeech taquiiüb nej mamb andüy tiül nangaj cambaj Jerusalén, mayac wüx omal nadam nangaj iüm.

<sup>6</sup> Quiaj tasaj nej:

—Sitiül ique Micual Dios ic, ijchic tiüt cos ajlüy tiül Mipoch Teat Dios, apiüng: Teat Dios apmüüch mamb miángeles nej mambeolüw ic.

Apmangochiw ic naag owixaw nejw ngana maleamb ileaj piedra, aw —aj nej minatang nimeech.

<sup>7</sup> Quiaj Teat Jesús tasaj nej:

—Aton ajlüy tiül Mipoch Teat Dios, apiüng: “Nde mendüüm mitsoj leaw apiüng Teat Naxey Midios” —aj nej.

<sup>8</sup> Aaga minatang nimeech taquiiüb nej mamb alinomb. Nganüy taquiiüb nej andüy wüx nop najal oleaj tiüc. Quiaj tüüch nej majaw meáwan cambaj leaw ajlüy wüx iüt at meáwan leaw najneaj almajiürüw.

<sup>9</sup> Quiaj tasaj Teat Jesús:

—Meáwan aag ayaj sanüüch ic meneay sitiül ique apmequieel micos tiximbas meyar sandeac —aj nej.

<sup>10</sup> Quiaj tasaj nej Teat Jesús:

—Iriow ningüy niüing sajlüy, Satanás, cos tiül Mipoch Teat Dios apiüng: “Áagan Teat Dios netam mequieel micos teombas nej meyar andeac” —aj nej.

<sup>11</sup> Quiaj taw minatang nimeech. Condom tapeayiw miángeles Teat Dios mambeolüw Teat Jesús.

*Teat Jesús tamelich aquiaach tiül Galilea  
(Mr. 1:14-15; Lc. 4:14-15)*

<sup>12</sup> Wüx Teat Jesús tanguiyay Juan lajmel tiül manchiüc, quiaj tandilil andüy tiül iüt Galilea.

<sup>13</sup> Nej taton ngome tacül tiül Nazaret, tamb macül tiül Capernaum, noic cambaj mbeay nadam yow nenüt Galilea, tiül miüütüw Zabulón y Neftalí, monlüy tanomb.

<sup>14</sup> Atquiaj tajlüy atnej tanomb tapiüng Isaias nendeac andeac Teat Dios, cos tapiüng:

<sup>15</sup> Icona monaw tiül miüütüw Zabulon y Nef-talí,

najlüyiw mbeay tiüüd amb mbeay ndec, nonüt necamb lam Jordán;

aag ayaj tiül iüt Galilea, niüng xeyay acüliw nipilan ngame judío.

<sup>16</sup> Ajcüwa nipilan quiaj arangüw ngo ma-  
-neaj,

ajlüyiw atnej majlüyiw tiül pojniün, nejiw apmajawüw noic nadam ran.

Leaw ajlüyiw tiül xeyay pojniün, apmachech nejiw a ran quiaj.

<sup>17</sup> Ajan quiaj tapots maquiaach nejiw Teat Jesús, tapiüng:

—Icuaeatiün aaga ngo majneaj irangan, cos Teat Dios laliüc miün majlüy wüx micambaj nej —aw.

*Teat Jesús arriüüd apiquiw mondóc*  
(Mr. 1:16-20; Lc. 5:1-11)

<sup>18</sup> Noic nüt wüx Teat Jesús tamong amb mbeay aaga nadam yow nenüt Galilea, quiaj tajaw ijpüw monxey nop necual nejiw, nop Simón nasoiç Pedro, alinop Andrés michüig nej. Nejiw tengual andocoj cos mondóc nejiw.

<sup>19</sup> Quiaj tasaj nejiw Teat Jesús:

—Macaron tabaats, sanaquiaach icon nguineay alndom meyamban nipilan mesajan mayariw sandeac. Langome apmeyeramban cüet mendocon, apmeyeramban nipilan —aj nejiw.

<sup>20</sup> Tacueatiüwan quiaj mindocoj nejiw, tandüjpiw mamb Teat Jesús.

<sup>21</sup> Condom quiríwan iün majüyiw, quiaj Teat Jesús taxom alijpüw, nop necual nejiw, nop Jacobo, alinop Juan, micual nejiw Zebedeo. Aliw tiül müx maquiüjpüw miteatiw nejiw, tengual axequiw ndoc. Quiaj tasaj nejiw Teat Jesús mambüw maquiüjpüw.

<sup>22</sup> Nejiw tacueatiüwan tiül müx miteatiw nejiw, tambüw mandüjpiw Teat Jesús.

*Teat Jesús taquiaach xeyay nipilan*  
(Lc. 6:17-19)

<sup>23</sup> Teat Jesús tajüy meáwan tiül iüt Galilea. Taquiaach tiül meáwan sinagoga ocueajiw a nipilan quiaj. Tandeac nguineay apmajlüy wüx Teat Dios apmajlüy wüx micambaj nej. Aton tamongoch iün andeowüw cuajantanej monandew leaw axom nejiw nipilan tiül ajcüwa cambaj quiaj.

<sup>24</sup> Wüx tanguiayaran tiül iüt Siria meáwan leawa nej arang, quiaj taquiüjpüw niüng ajlüy nej xeyay moniün andeow. Altiün xeyay teamamongochiw, lamix omeajtsüw; altiül nechach, üüch nejiw michachiw nimeech; altiül ndron ombas, nawaag owix oleaj. Teat Jesús tüüch majneaj meáwan.

<sup>25</sup> Quiaj tandüjpiw nej xeyay nipilan monaw Galilea, monaw Decápolis, monaw Jerusalén, monaw Judea, monaw nonüt necamb lam Jordán.

## 5

*Teat Jesús taquiaach nipilan wüx tiüc*

<sup>1</sup> Wüx Teat Jesús tajaw xeyay nipilan lapeayiw niüng ajlüy, quiaj tajtep andüy wüx noic tiüc chetet. Tapeayiw niüng ajlüy nej minipilan nej.

<sup>2</sup> Quiaj tapots maquiaach nejiw Teat Jesús, tapiüng:

*Jane xeyay apac omeaats*  
(Lc. 6:20-23)

<sup>3</sup> —Najneajay ajlüyiw leaw ayaag netam nejiw Nangaj Espiritu ocueaj Teat Dios, cos apmajlüyiw tiül micambaj Teat Dios.

<sup>4</sup> 'Najneajay ajlüyiw leaw amix omeajtsüw nğanüy, cos apmüjndiw mapac omeajtsüw alinoic nüt.

<sup>5</sup> 'Najneajay ajlüyiw leaw ngo meran-grangayej; nejiw apmüjndiw a iüt cam leaw tasoiquiw apmüjndiw.

<sup>6</sup> 'Najneajay ajlüyiw leaw xowüy andiümüw marangüw leaw andiüm Teat Dios, nej apmambeol nejiw.

<sup>7</sup> 'Najneajay ajlüyiw leaw ajiürüw lasta nop alinop, cos aton Teat Dios apmajür nejiw lasta.

<sup>8</sup> 'Najneajay ajlüyiw leaw nómban lamawüniw wüx omeajtsüw ngo majneaj; nejiw alinoic nüt apmajlüyiw niüng ajlüy Teat Dios.

<sup>9</sup> 'Najneajay ajlüyiw leaw monyamb majlüy monajneaj, ngo majlüy moncüy, nejiw apmasoiquiw micual nejiw Teat Dios.

<sup>10</sup> 'Najneajay ajlüyiw leaw amongochiw ngo majneaj masey arangüw najneaj; nejiw apmajlüyiw tiül micambaj Teat Dios tiül cielo.

<sup>11</sup> 'Najneajay ijlüyiün wüx itsojaranan memongochiün ngo majneaj. Aton awüniüwan wüx omeajtsüw mandeacüw wüx imbasan xeyay ngo majneaj cos iyariün sandeac.

<sup>12</sup> Tanomb atquiaj tamongochiw ajcüwa mondeac andeac Teat Dios. Nğanüy icona, ich mapac imeajtsan xeyay cos ajlüy noic najneajay tiül cielo leaw apmeajndiün.

*At icon quiniüc, at icon ran*  
(Mr. 9:50; Lc. 14:34-35)

<sup>13</sup> Icona ijlüyiün wüx a iüt cam at icon najneaj quiniüc najtix. Pero sitiül quiniüc mamong ajtix, ¿nguineay alndom majtix alinomba? Lango metam, netam majwich ninguiün macuüch nej tiüt nipilan.

<sup>14</sup> Icona ningüy wüx aaga iüt cam ijlüyiün at icon ran. Ajawaats sitiül noic cambaj ajlüy wüx tiüc ngondom mexotüy.

<sup>15</sup> Ngondom mechen nots candeal condom cas tepal omal tiül nop xor. Ngwüy, netam meyac cawüx marraj meáwan leaw almajlüy tiül iüm.

<sup>16</sup> Atquiaj icona aton, irangan najneaj tiül nipilan para mejlüyüün atnej aaga ran quiaj; cos wüx nipilan apmajawüw irangan najneaj, nejw aton apmarangüw leaw andiüm Teat Dios najlüy tiül cielo.

*Teat Jesús aquiaach wüx aaga poch tüünd Moisés*

<sup>17</sup> Nde mepiüangan xique xiün nandrooch aaga poch leawa tüünd Moisés, tengwüy leaw tandeacüw mondeac andeac Teat Dios. Ngwüy, xique ngo niün nandrooch nicuajind. Xique xiün najüiquich wüx nguineay ajlüy, narang atnej apiüng.

<sup>18</sup> Naleaing sasaj icon, wüxan almajlüy a cielo maquiüüb a iüt, nómban ngome apmamong masey noic nine punto, noic nine letra tiül aaga poch leawa tüünd Moisés, cos meáwan leaw Mipoch Teat Dios apiüng netam majlüy.

<sup>19</sup> Atquiaj sitiül aljane mapiüng ngo membeat masey noic nine poch leaw Teat Dios lamapiüng netam marangüch, ndot atquiaj maquiaach wüx nipilan, nej apmajlüy at nej nop chingüy, leaw ngo membeat tiül minipilan Teat Dios. Pero sitiül aljane arang meáwan leaw Teat Dios lamapiüng marangüch, aton maquiaach wüx alinop marang atnej; nej apmarang nop natang tiül cielo niüng apmajlüyiw minipilan Teat Dios.

<sup>20</sup> Sasaj icon netam merangan atnej apiüng Teat Dios, ngo matnej arangüw ajcüwa mondüy wüx aaga poch tüünd Moisés, at leaw arangüw fariseos; cos sitiül ngo merangan atnej netam ngondom mejmeliün tiül micambaj Teat Dios.

*Teat Jesús apiüng wüx moncüy (Lc. 12:57-59)*

<sup>21</sup> Lamenguiayüün nguineay tasoiquiw tanomb mixejchiün, cos tasoiquiw: "Nde membiyan nejinguind, sitiül aljane apmamby alinop netam mangüy aaga nisoet", ajowiw.

<sup>22</sup> Aag ayaj naleaing, xique nganüy sasaj icon, jane ajcüycüy majaw alinop netam mangüy aaga nisoet. Aton jangantanej leaw apmasaj chach aljane, netam mayacüw nej asoet montangtang tiül nadam nangaj iüm. At jangantanej leaw apmapaiich alinop, aag ayaj alndom mamb tiül necoy tiül biümb.

<sup>23</sup> Sitiül leriümb apmeyac erchech, quiaj leaaw imeaats aljane ajcüy majaw ic,

<sup>24</sup> ich majlüy, nde meyac. Quiür indeac anaag aaga najcüy majaw ic quiaj, para majneaj imeajtsan mamong ijcüyüün, cas tendilil meyac erchech.

<sup>25</sup> At sitiül aljane aleaic iriow anaag wüx, andiüm mayac ic teombasüw monajiüt, indeac anaag, ijaw cuane iriowan wüx, ijneajiün wüxan nganaw mepeay anaag teowixaw monajiüt, cos teat xan alndom masaj mimongot nej mayacüw ic tiül manchiüc.

<sup>26</sup> Naleaing sasaj ic, wüx lerpeay tiül manchiüc langondom meriow najen, apmeriow wüx lamembich mengüy leaw apmatüniw icueaj.

*Aquiaach wüx monjiür najtaj, monjiür naxey*

<sup>27</sup> Lamenguiayüün nguineay tasoiquiw tanomb, cos asoiquiw: "Nde mejiüran minajtan, nde mejiüran minaxeyiün", ajowiw.

<sup>28</sup> Aag ayaj naleaing. Pero nganüy xique sasaj icon jangantanej leaw apmajaw nop najtaj mandüümdiüm, aag ayaj atanej lamarang aweaag nisoet.

<sup>29</sup> Sitiül miác iniüüg laliüc mayac ic wüx merang ngo majneaj, isoond, ndoj telox ninguiün; cos más najneaj masey noic iniüüg, ngome atnej mejlos tiül xeyay necoy tiül biümb.

<sup>30</sup> At sitiül miác iwix apmayac ic wüx merang ngo majneaj, ich ndojquiüm majlos ninguiün; cos más najneaj masey nots iwix, ngome atnej mejlos tiül xeyay necoy tiül biümb.

*Teat Jesús aquiaach wüx moncueateay (Mt. 19:9; Mr. 10:11-12; Lc. 16:18)*

<sup>31</sup> Aton tanomb tasoiquiw: "Jangantanej macueat mintaj nej, netam marang noic nawiiig mecueatayej", ajowiw.

<sup>32</sup> Nganüy xique sasaj icon sitiül nop naxey macueat mintaj nej, acueátan, ngome nejjiür naxey a najtaj; nej a naxey quiaj ajiür nisoet, cos tengual mayac wüx majjiür naxey mintaj nej. Aton jane apmaquiüüb aaga najcueat najtaj quiaj, apmajjiür nisoet, cos apmajlüy atnej minajtaj nej.

*Aquiaach wüx monwaiich monpaj minüt Teat Dios*

<sup>33</sup> Aton lamenguiayüün nguineay tasoiquiw tanomb mixejchiün: "Nde aleaic mendeacan mepajan minüt Teat Dios sitiül ndoj ngo merangan leaw lamepiüangan apmerangan", ajowiw.

<sup>34</sup> Aag ayaj naleaing. Pero nganüy xique sasaj icon nde mendeacan aleaic mepajan wüx minüt cielo cos aag ayaj niüng chetej Teat Dios.

<sup>35</sup> Nde mepajan wüx minüt iüt, cos aag ayaj niüng acuüüch oleaj Teat Dios. Aton nde mepajan wüx minüt Jerusalén cos aag ayaj micambaj aaga Teat natang tiül meáwan monajiüt.

<sup>36</sup> Aton nde mepajan wüx imalan, cos cuane icon, ngondom meajchiün mambeer



masey nots miondeats imalan, aton ngon-dom meajchiün marang ngweal.

<sup>37</sup> Xique sasaj icon netam mendeacan "naleaing" sitiül naleaing, at netam mepiüangan "ngo maleaing" sitiül ngwüy. Cos sitiül apmepajan minüt aljane, aag ayaj ngo majneaj, ocueaj nimeech.

*Wüx monpalüch ombas*  
(Lc. 6:29-30)

<sup>38</sup> 'Lamenguiayiün nguineay tasoiquiw tanomb, cos atcüy tasoiquiw: "Jangantanej macuiaach onüüg alinop, atanej netam macuijchich onüüg nej. Aton jangantanej leaw apmapol olüic alinop, atanej netam napolich olüic nej", aw.

<sup>39</sup> Pero xique sasaj icon, nde mepalüchiün ombas leawa nerang ngo majneaj wüx imbasan. Ingow aag ayaj sitiül aljane lamaleamb imbeay, iich maleamb ic alinots.

<sup>40</sup> At sitiül aljane andiüm mayac ic tiül moncüy, mandiüm manood tarrang micamix, iich alinoic majoy aton.

<sup>41</sup> Sitiül aljane müüch ic memal tiüt alngün naüm, nde mepiüng wüx masey memal alatownej.

<sup>42</sup> Sitiül aljane apmatün icueaj alcuane, iich leaw alndom. Aton sitiül aljane andiüm majüch ic, iich sitiül alndom.

*Ijüür lasta leaw ajcüy majaw ic*  
(Lc. 6:27-28; 32-36)

<sup>43</sup> 'Aton lamenguiayiün nguineay tasoiquiw nomb, cos asoiquiw: "Netam mejiüran lasta alinop, pero leaw ajcüy majaw icon ijcüyiün mejawan aton", ajowiw.

<sup>44</sup> Pero xique sasaj icon netam mejiüran lasta moncüy majaw icon. Indeacan najneaj wüx ombas leaw apaich icon; irangan najneaj wüx ombasüw leaw ngo mind majaw icon. Itüniün Teat Dios mambeol nejw leaw arangüw wüx imbasan ngo majneaj.

<sup>45</sup> Atquiaj apmajüic icona micual icon Teat Dios najlüy tiül cielo. Cos Teat Dios tengual müüch majntsop a nüt marraj meáwan nipilan; aton üüch majoet nguiajantanej masey niüng ajlüy nerang najneaj, masey niüng ajlüy nerang ngo majneaj.

<sup>46</sup> Sitiül icona apmejiüran lasta áagan a nipilan leaw andiümüw icon, ¿cuane najneaj aag ayaja? ¿Neol ngwüy atquiaj arangüw ajcüwa monsap mitomiün cambaja, ajcüwa monrang xeyay ngo majneaja?

<sup>47</sup> Sitiül áagan micoj michiig ertepeay anaag, ¿cuane alwüx ajneaj irangana? ¿Neol ngwüy, atquiaj aton arangüw nipilan leaw ngo mayamb Teat Dios?

<sup>48</sup> Icona netam merangan leaw najneaj, palan, atnej arang Miteatiüts Dios najlüy tiül cielo, cos nej nerang najneaj, palan.

## 6

*Nguineay netam marangüch najneaj*

<sup>1</sup> 'Leaw najneaj irangan, nde meran-grangayon wüx; cos sitiül irangan najneaj majaw icon nipilan, Miteatiüts Dios najlüy tiül cielo ngome apmüüch icon mejiüran leawa nej andiüm müüch.

<sup>2</sup> Icona wüx imbeolan aljane leaw ngo majiür, nde mendeacndeacan wüx manguiay nipilan matnej arangüw mon-rangrangüy tiül sinagogas, at tiül calle aton. Cos nejw arangüw malombaranüw wüx. Naleaing sasaj icon, nejw landoj lamajiürüw leaw ayambüw wüx aaga alomboochayej quiaj.

<sup>3</sup> Icona wüx aleaic meajchiün aljane leaw ngo majiür, ijchan nejinguind ngo majaw, masey miquiamb iwix ngo majaw leaw arang miác iwix.

<sup>4</sup> Ijchan leaw indiüman, nejinguind ngo majaw. Quiaj Miteatiüts Dios apmüüch icon xeyay monajneaj majawüw nipilan, cos nej ajaw masey ixotüyan terang.

*Nguineay netam matajcüch orar mesaj Teat Dios*

(Lc. 11:2-4)

<sup>5</sup> 'Wüx aleaic apmesajan Teat Dios nde merangan matnej arangüw ajcüwa monrángan ayamb Teat Dios, cos nejw xowüy andiümüw mapajüw minüt Teat Dios tiül sinagoga lombojówan. At ambüw mapajüw minüt Teat Dios niüng tengual among monjüy, majaw nejw nipilan. Naleaing sasaj icon áagan ayaj apmaxomüw wüx aaga alomboochayej quiaj.

<sup>6</sup> Pero xique sasaj icon, wüx apmetajcan orar ijmelüin tiül iüm, ipalan imbiüman, indeacan mequiüjpan, cos nej alniüng ijlüyiün; néjan quiaj apmanguiai. Alinoic nüt ap-meajndiün leaw itüniün.

<sup>7</sup> 'Wüx apmetajcan orar mesajan Teat Dios nde mepiüngpiüngánan matnej arangüw nipilan leaw ngo mayariw andeac Teat Dios, cos nejw apiüngwü wüx apmandeacndeacüw xeyay, Teat Dios apmanguiai.

<sup>8</sup> Icona nde merangan atnej arangüw nejw, cos Teat Dios lamajaw cuane netam icon wüxan nganaw metüniün.

<sup>9</sup> Icona wüx apmesajan Teat Dios, atcüy ipiüangan: Xeteatiün Dios najlüy tiül cielo, ique nangaj minüt.

<sup>10</sup> Sandiüman mejlüy wüx meáwan nipilan nguiajantanej almajlüyiw.

Atnej iyambüch ningüin tiül nangaj cielo, atquiaj aton netam meyambüch ningüy wüx aaga iüt cam, marangüch leaw ique indiüm.

<sup>11</sup> Teat, iich xicon nüeteran nganüy nüt cam, atnej ique ijaw netam.

12 Iwün wüx imeaats aaga ngo majneaj tarangasan Teat, cos xicona aton lanawüniün wüx ximeajtsan aaga ngo majneaj nipilan arangüw wüx ximbasan.

13 Imbeol xicon nde narangan ngo majneaj Teat.

Iwün ningüiün meáwan ngo majneaj, nde matüch xicon nimeech.

Cos ique natang nenajiüt wüx meáwan cambajiüt; ique alndom merang cuajantanej.

Ique najneajay ijlüw meáwan nüt, ngo majiür ümb. Amén.

14 'Sitiül icona iwüniün wüx imeajtsan leaw ngo majneaj arangüch wüx imbasan, Miteatiüts Dios najlüw tiül cielo atquiaj apmarang wüx imbasan aton.

15 Pero sitiül icona ngo mewüniün wüx imeajtsan leaw ngo majneaj arangüch wüx imbasan, átan quiaj Miteatiüts Dios ngome apmawün wüx omeaats isoetiün leaw ijiüran.

*Teat Jesús aquiaach wüx moniünd lop*

16 'Wüx icona iündan lop para manguiay icon Teat Dios, nde merangan atnej xowüy amix imeajtsan atnej arangüw monrangrangü, cos nejiw arangüw atnej niün andeowüw para majaw nejiw nipilan mapiüngüw nejiw tengual aiündüw. Naleaing sasaj icon nejiw áagan ayaj apmaxomüw wüx aag arangüw atquiaj quiaj.

17 Pero icona wüx apmeiündan metajcan orar, ertaagayon majneaj, ijonchiün imalan najneaj, ipejiün iniüjcan aton.

18 Atquiaj nipilan ngome apmateotsüw wüx sitiül icona tengual iündan manguiay icon Teat Dios. Meáwan leawa tengual merangan masey ixotayon, Teat Dios ajaw, ndoj nej apmüch icon xeyay monajneaj majaw icon nipilan.

*Iyacan tiül cielo leaw nembeatmbeat*

*(Lc. 12:33-34)*

19 'At aton sasaj icon nde mendiümdümanan cuajantanej nembeatmbeat ningüw wüx iüt, cos alndom majtep miüt pandiüm. Cuajantanej leaw ijiüran alndom memoen, aton need alndom majmel maneed.

20 Ngwüy icona irangan leaw andiüm Miteatiüts Dios cos aag ayaj atnej mejiüran xeyay nembeatmbeat tiül cielo niüng nicuajind ngondom majtep miüt, ngondom memoen, ngondom majteor.

21 Cos niüng ijiüran cuajantanej nembeatmbeat, quiaj iyacan imeajtsan aton.

*Ran ocueajaran*

*(Lc. 11:34-36)*

22 'Oniügaran aag ayaj nerraj icoots. Sitiül iyacan iniüjcan wüx mejawan najneaj, apmambeol icon merangan najneaj. Wüx

icona irangan najneaj aag ayaj atnej mejlüyiün tiül ran.

23 Pero sitiül icona indiüman meyacan iniüjcan wüx mejawan leaw ngo majneaj, quiaj apmerangan xeyay ngo majneaj; aag ayaj atnej ijlüyiün tiül pojniün. Sitiül icona irangan ngo majneaj, andüy quiaj apmexeyay ngo majneaj temerangan quiaj.

*Wüx Teat Dios, at wüx tomiün*

*(Lc. 16:13)*

24 'Nejinguind ngondom marang minajiüt ijpüw monxey nóiquian, cos ndot apmandiüm marang leaw apiüng nop, ngome apmarang leaw apiüng alinop. Tengwüy xeyay mandiüm mandüüb nop, quiaj ngome apmarang leaw apiüng alinop. Atquiaj ajlüw, nómban ngondom mendiüüb Teat Dios sitiül meyac imeaats wüx mendiümdüw tomiün.

*Teat Dios iüch meáwan leawa tengual atam*

*(Lc. 12:22-31)*

25 'Xique sasaj icon nde mamb wüx imeajtsan mepiügan cuane apmeatiün, cuane apmenganewan, at wüx ipixan mepiügan cuane apmesoijqüiün. ¿Neol ngwa, icona alwüx itaman ngo matnej nüeteran; aton micuerpojan alwüx atam ngo matnej napixeran?

26 Ijawan guineay ajlüyiw a quiec, nejiw ngo mepiürüw maxainguw omeaats corrül, ngo mapalüw leaw apmüetiün alinoic nüt; cos Miteatiüts Dios najlüw tiül cielo awiül nejiw. ¿Neol, ngome alwüx imbeatiün a icona ngo mat nejiw a quieque?

27 ¿Ngwüy jane tiül icona cos xowüy amb wüx omeaats alcuane, alndom matang wüx alpinawan metro?

28 ¿Neol tapots amb imeajtsan wüx ipixana? Ijawan guineay ajlüy a mbaj tiül xiül. Nejiw atangüw ngo marangüw najiüt nicuajind, ngo mendileaw aton.

29 Nganüy sasaj icon, aaga minatang nenajiüt nenüt Salomón najlüy tanomb, masey tajiür xeyay najneajay apix nej cos nej tajiür xeyay tomiün, ngo matüch matnej ajneajiw ajcüwa mbaj.

30 Sitiül Teat Dios ayac aaga mbaj soex najlüy tiül xiül leaw nganüy almajlüy, oxep lamarang asap andaab pow, cuane wüx ngo müch icon meáwan leawa netam. ¿Neol ngo meyacan imeajtsan wüx neje?

31 Icona nde meycan imeajtsan wüx mepiügan: "¿Cuane apmetiüts manganeowaats, cuane apmasoijqüiüts?" merawan.

32 Cos nipilan leaw ngo mayambüw Teat Dios, xeyay ayacüw omeajtsüw wüx aag ayaj. Miteatiüts Dios najlüy tiül cielo, nej alwüx; nej ajaw meáwan leaw tengual atam icon.

<sup>33</sup> Netam meyamban ombas mejlüyüün tiül minipilan Teat Dios, merangan meáwan leawa nej andiüm. Quiaj apmüüch icon meáwan leawa netam.

<sup>34</sup> Atquiaj icona nde mamb wüx imeajtsan mepiüngan cuane apmajlüy oxep, cos aaga oxep quiaj apmaquiüüb miün alinoic cuane mamb wüx imeajtsan. Meáwan nüt ajlüy palpáwüx naél.

## 7

### *Nde meyacan asoet alinop* (Lc. 6:37-38, 41-42)

<sup>1</sup> 'Nde meyambyamban asoet alinop, quiaj nejingüind ngome apmayamb isoetiün.

<sup>2</sup> Cos atnej icona iyacan asoet alinop, atnej apmajmel isoetiün. Atnej icona irangan wüx alinop, atnej apmarangüch wüx imbasan aton.

<sup>3</sup> ¿Neol nguineay ixom mejaw a najmel altiül oniüüg alinop, nganüy a ique ngo mexom mejaw aaga xiül alatsam tiül iniüüga?

<sup>4</sup> ¿Cuane wüx alndom mesaj alinop: "Chiün nawün aaga najmel altiül iniüüg quiaj", meraj, sitiül nganaw mewün a xiül alatsam tiül iniüüga?

<sup>5</sup> ¡Ndeac mbeay! Sasaj ic menguiay, iwün ombas aaga xiül alatsam tiül iniüüg quiaj, ndoj quiaj apmejaw najneaj para alndom mewün aaga najmel altiül oniüüg alinop.

<sup>6</sup> 'Nde meajchiün a pet leaw nangaj cos alndom najchic matsamb machiüt icon tiüt. Aton nde meloxiün nembatmeat perlas teombas sow, cos alndom macuüüchcuüüch tiüt. Aag ayaj atnej mewijchan meajchiün pet leaw xeyay nembat. Cos sitiül pet ngo majaw jane ic, alndom matsamb iwix, masey tendiüm meach leaw najneaj. Tengwüy apmarangüw atnej arang sow, cos sow apmacuüüchcuüüch tiüt leaw ngo mandiüm müet, masey xeyay najneaj üünd.

### *Sitiül apmetüniün apmeajndiün* (Lc. 11:9-13, 6:31)

<sup>7</sup> 'Sitiül apmetüniün apmeajndiün; sitiül apmeyamban apmexoman; sitiül apmerndeacan apmengocharanan.

<sup>8</sup> Cos jangantanej leaw apmatün apmüünd; leaw apmayamb apmaxom; at leaw apmendeac apmangocharan.

<sup>9</sup> ¿Ngwüy aljane tiül icona sitiül micual nej matün pan, ingow üüch pan apmüüch noic piedra?

<sup>10</sup> ¿Jondot matün cüet, ingow üüch cüet apmüüch nop ndiüca?

<sup>11</sup> Sitiül icona nerangan ngo majneaj, ijawan nguineay meajchiün micualan noic najneaj, cuantemas Miteatiüts Dios najlüy tiül cielo apmüüch najneajneaj cuajantanej jane apmatün nej ocueaj.

<sup>12</sup> 'Icona netam merangan wüx alinop atnej temendiüman marangüch najneaj wüx imbasan, cos atquiaj apiüng tiül aaga poch leawa tüünd Moisés. Aton atquiaj ajlüy tiül minawijquiaw mondeac andeac Teat Dios.

### *Indüjpiün narix tiüüd* (Lc. 13:24)

<sup>13</sup> 'Ijmeliün iriümban tiül quicheech puerta niüng ajmeleran. Cos ajlüy alinoic nadam niüng ajmeleran, nadam a tiüüd aton, ambüw tiül ajmeliw xeyay nipilan. Aaga nadam tiüüd quiaj amb andüy tiül castigo.

<sup>14</sup> Aaga alinoic puerta niüng ajmeleran, aag ayaj quicheech, at a tiüüd aton narix. Aag ayaj amb andüy tiül cielo niüng apmamacaran meáwan nüt, pero naleaing napatatey monxom nej.

### *Xiül wüx aong ajaraw sitiül najneaj* (Lc. 6:43-44)

<sup>15</sup> 'Ijawan wüx ajcüwa monwaiich, cos aliücüw mapiüngüw nejw andeacüw andeac Teat Dios. Nejw apmajüic at nejw sap ngome napatüw; naleaing tiül omeajtsüw nejw at nejw napat sampüy.

<sup>16</sup> 'Icona alndom mejawan jane nejw wüx leaw arangüw. ¿Ngwa alndom mepejtiün uvas wüx noic owil sats, ngwa alndom mepejtiün toc wüx patiürra?

<sup>17</sup> Meáwan leaw najneaj xiül aóng najneaj, leaw xiül lango majneaj ngondom mayac najneaj aóng.

<sup>18</sup> Noic owil najneaj xiül ngondom maóng ngo majneaj, at noic owil xiül leaw ngo majneaj, ngondom maóng najneaj.

<sup>19</sup> Leaw xiül ngo mayac najneaj aóng nej, apmandoijquich majlos tiül biümb.

<sup>20</sup> Atnej xiül wüx aóng alndom majaraw sitiül najneaj, atquiaj nipilan aton ajaraw jane nej wüx ajaraw leaw arang.

### *Ngome meáwan nipilan apmamb tiül cielo*

#### (Lc. 13:25-27)

<sup>21</sup> 'Ngome meáwan monpiüng: "Teat Naxey, Teat Naxey", mawüw, apmajmeliw tiül micambaj Teat Dios. Áagan leaw monrang atnej andiüm Xeteat najlüy tiül cielo, nejw apmajmeliw.

<sup>22</sup> Wüx aaga nüt quiaj xeyay nipilan apmasajüw xic: "Teat Naxey, Teat Naxey, taquiaachasan nipilan wüx minüt, aton wüx minüt tawünanas nimeech wüx ombasüw nipilan. At tarngasan xeyay ateócan wüx minüt", apmawüw.

<sup>23</sup> Pero xique quiaj sanasajüw: "Ngo najw jane icon. Iriowan ningüy niüng sajlüy monrang ngo majneaj", sanajüw.

### *Ijpüw monrang iüm* (Lc. 6:47-49; Mr. 1:22)

<sup>24</sup> Jangantanej leaw apmanguiai xepoch cam marang atnej sapiüng, apmajlüy atnej nop naxey nexom omeaats, tawitich ombiüm nej wüx piedra.

<sup>25</sup> Camüm majoet maw nadam lam, mapac nadam iünd, ngo marang nej nicuajind aaga iüm quiaj, cos wüx piedra witiow.

<sup>26</sup> Nganüy jangantanej leaw apmanguiai xepoch cam ndoj ngo marang atnej, apmajlüy atnej nop naxey nechach, tawitich ombiüm nej teomeaats lam tülan wiüü.

<sup>27</sup> Camüm majoet maw nadam lam, mapac nadam iünd, quiaj ajmiüc a iüm. ¡Nómban ndroj ombas! —aw.

<sup>28</sup> Wüx landoj mandeac meáwan aaga poch quiaj Teat Jesús, mbayajow nipilan manguiaiyw leaw landoj mandeac.

<sup>29</sup> Cos taquiaach nejw atnej andeac nop nendüy nejiür nadam najiüt, ngo matnej aquiajchiw mondüy wüx aaga poch tüünd Moisés.

## 8

*Tamongoch napat monandeow nenüt lepra*

(Mr. 1:40-45; Lc. 5:12-16)

<sup>1</sup> Wüx taw tüüt Teat Jesús imiün wüx tüic, tandüjpiw nej xeyay nipilan.

<sup>2</sup> Condom quiaj ajngot majaw nej nop naxey axom nej napat monandeow nasoic lepra atextexichan ombas nej. Quiaj taquieel micos nej tüüt teombas Teat Jesús, tasaj:

—Teat Naxey, sitiül ique indiüm, sawal aldom memongoch iün sandeow —aj.

<sup>3</sup> Quiaj Teat Jesús taxaing owix marreeg, tasaj:

—Xecual sandiüm, sanamongoch iün indeow —aj.

Wüxan ndoj masoic aag ayaj, andüüban ndej minecoy nej aaga niün andeow quiaj.

<sup>4</sup> Condom quiaj tasaj nej Teat Jesús:

—Nde mesaj nejingund, quiür, iich majaw ic miteaats, iyac erchech atnej tapiüng Moisés marangüch. Quiaj apmajawüw ique lerneaj —aj nej.

*Tajneaj nop nerang minajiüt minatang soldado*

(Lc. 7:1-10)

<sup>5</sup> Almajmel tüül cambaj Capernaum Teat Jesús, quiaj tüün majaw nej nop minatang soldado matün nej ocueaj.

<sup>6</sup> Tasaj:

—Teat Naxey, nop nerang xenajiüt alwüx mats saniüng, lamalox nej tüüt noic monandeow. Nómban asol nej, xeyay necoy tengual mamongoch —aw.

<sup>7</sup> Quiaj tapiüng Teat Jesús:

—Saleamb quiaj namongoch iün andeow —aw.

<sup>8</sup> Quiaj tapiüng a natang soldado romano:

—Teat Naxey, cuane xic, xique ngo nembat nicuajind para meamb saniüng. Xique sapiüng teat, mepiüng noic poch, quiaj apmajneaj a nembeol xic.

<sup>9</sup> Cos xique aton sajiür nesaj xic cuane narang, at a xique sajiür xesoldado leaw sasajüw cuane netam marangüw. Sitiül xique sanasaj nop: “Quiür”, naj; nej apmamb. Sitiül sanasaj alinop: “Mac”, naj; nej aliüc. Tengwüy sanasaj nerang xenajiüt: “Irang aag agüy”, naj; nej apmarang —aw.

<sup>10</sup> Wüx tanguiai aag ayaj Teat Jesús mbayaw manguiai, quiaj tasaj leaw almaquiüt, tapiüng:

—Naleaing sasaj icon ngo naxom masey anop tüül nipilan judío leaw ayar sandeac matnej aaga naxey cam.

<sup>11</sup> Aton sasaj icon, alinoic nüt aliüc xeyay palpáwüx nipilan imiün nonüt, imiün noleat, apchetemoj maquiüjpüw teat Abraham, teat Isaac, teat Jacob tüül cielo tüül micambaj Teat Dios.

<sup>12</sup> Pero altiül nipilan judío leaw apiüngüw apmajlüyiw tüül micambaj Teat Dios, apmajlosüw tüül pojniün, quiaj apmajüntsüw, apmenchicnic oliüqiw nejw —aw.

<sup>13</sup> Condom quiaj Teat Jesús tasaj aaga natang soldado:

—Quiür ijtsor, cos teyar sandeac atquiaj apmajlüy —aw.

Aaga nerang minajiüt nej a soldado tüülan aaga ores quiaj tajneaj.

*Wüx tajneaj müm miocuats Pedro*

(Mr. 1:29-31; Lc. 4:38-39)

<sup>14</sup> Condom quiaj tamb Teat Jesús andüy aniüng Pedro. Quiaj tajaw niün andeow najtaj miocuats Pedro, alwüx mats, tengual müch nej nerraar.

<sup>15</sup> Quiaj Teat Jesús tamb marreeg owix aaga najtaj, ajneaj wüx üuch nej nerraar. Quiaj witiüt tarang nej üetiw.

*Teat Jesús tüüch majneaj xeyay moniün andeow*

(Mr. 1:32-34; Lc. 4:40-41)

<sup>16</sup> Wüx langwiüts taquiüjpüw mamb niüng ajlüy Teat Jesús xeyay nipilan leaw alwüx ombasüw nejw nimeech. Quiaj tawün nimeech wüx ombasüw nipilan wüx mipoch nej, at aton tataag majneaj meáwan moniün andeow.

<sup>17</sup> Atquiaj tarang para aldom majlüy atnej tarang nomb tüül minawiig nej teat Isaías, aaga nendeac andeac Teat Dios, cos tapiüng: “Nejayan quiaj tawün iün andeowaats, aton tajoy wüx ombas nej meáwan necoy ocueajiiüts”, aw.

*Leaw tandiüm mandüüb Teat Jesús*

(Lc. 9:57-62)

<sup>18</sup> Wüx tajaw Teat Jesús laxeyay nipilan alniüng ajlüy nej, quiaj tasaj minipilan nej:

—Tabaats amongoots andüy necamb a nadam yow quiaj —aw.

<sup>19</sup> Quiaj ajngot nop naxey nendüy wüx aaga poch tüünd Moisés. Tasaj Teat Jesús:

—Teat Naxey, xique sanandüüb ic mamb leaw niüng apmeamb —aj.

<sup>20</sup> Quiaj tasaj nej Teat Jesús:

—Wiül ajiür ombiüm nej, at a quiec aton; nganüy a Teat Naxey ngo majiür nguiane mapiib omal —aj nej.

<sup>21</sup> Nop minipilan nej tasaj nej:

—Teat, sandiüm nacül leaw ndoj andeow xeteat namiüt; quiaj sanandüüb ic —aw.

<sup>22</sup> Quiaj tasaj nej Teat Jesús:

—Tabar nganüy indüüb xic, icueat, ich majlüy mondeow memiütayej nejeyéjan quiaj —aj nej.

*Teat Jesús talomboch iünd, at omal yow (Mr. 4:35-41; Lc. 8:22-25)*

<sup>23</sup> Condom quiaj tajtep tiül müx Teat Jesús, tambüw maquiüjpüw nej minipilan nej.

<sup>24</sup> Aleambüw tiül ndec, quiaj taw noic nadam iünd, anmachaachaach tiül müx omal yow, pero Teat Jesús almameay.

<sup>25</sup> Quiaj tambüw minipilan nej macpäcüjchiw nej, tasajüw:

—jTeat, imbeol xicon; laliüc tsoyomoots tiüt! —ajüw nej.

<sup>26</sup> Quiaj tasaj nejüw:

—¿Neol termbolana? ¿Neol tapateay iya-can imeajtsan wüx xique? —aj nejüw.

Condom quiaj witiüt. Talic a iünd lombom, at a yow majlüyan. Quiaj lambat.

<sup>27</sup> Ajcüwa monxey mbayatoj, tapiüngüw:

—¿Cuane nipilan nej aaga naxey quiaja? Cos iünd at a yow ayariw nej andeac —awüw.

*Monxey monaw Gadara alwüx ombasüw nimeech*

*(Mr. 5:1-20; Lc. 8:26-39)*

<sup>28</sup> Wüx tajtepiw necamb aaga nadam yow quiaj tiül iüt Gadara, quiaj tajngotoj ijpüw monxey imiünüw tiül niüng amiüraad mondeow. Alwüx ombasüw nimeech, lamüüch nejüw michachiw. Nejüw xowüy lapatüw, nejingüind ngondom mamong amb tiül aaga tiüüd quiaj.

<sup>29</sup> Wüx tajngotoj, tendeacüw napac, tapiüngüw:

—¿Cuane indiüm merang wüx ximbasan a ique Jesús micual Teat Dios? ¿Neol tewiün meaach xicon namongochiün ngo majneaja, sitiül nganaw matüch a nüte? —ajüw nej.

<sup>30</sup> Alquiaj noic ajlüy sow tengual üetiw, miünquiajan tam niüng ajlüyiw nejüw.

<sup>31</sup> Quiaj a nimeech tatüniw nej ocueaj, tasajüw nej:

—Sitiül apmewün xicon, iich xicon namban najmeliün tiül a sow quiün —awüw.

<sup>32</sup> Quiaj tasaj nejüw Teat Jesús:

—Quiüran —aw.

Quiaj tambüw tandüyiw tiül a sow. Almajmeliw tiül, quiaj tecuiürüw a sow, ambüw wüx tiüc tajmiücüw tiül yow, tümb mandeowüw.

<sup>33</sup> Condom ajcüwa monjiür sow mbayajow; quiaj tecuiürüw andüyiw tiül cambaj. Tapots masajüw nipilan cuane tajlüy; at tapiüngüw nguineay tarangüch wüx ombasüw ajcüw leawa üüch nejüw michachiw nimeech.

<sup>34</sup> Quiaj tambüw majawüw Teat Jesús meáwan nipilan imiünüw tiül a cambaj quiaj. Wüx tapeayüw quiaj, tatüniw ocueaj maw quiaj tiül miütüw nejüw.

## 9

*Wüx tajneaj nop ndron ombas (Mr. 2:1-12; Lc. 5:17-26)*

<sup>1</sup> Condom quiaj tandiil alinomb Teat Jesús majtep tiül müx, tamongoj andüyiw necamb, tandüyiw tiül micambaj nej Capernaum.

<sup>2</sup> Almapeayiw quiaj, quiaj taquiüraab niüng ajlüy nej nop naxey ndron ombas, amb wüx mats. Teat Jesús tajaw nguineay ayacüw omeajtsüw wüx nej, quiaj tasaj a niün andeow:

—Ich mapac imeaats, xecual, cos lanawün isoet —aw.

<sup>3</sup> Wüx tanguyaiyw aag ayaj, acas mondüy wüx aaga poch tüünd Moisés tandeacüw nejüwan quiaj, tapiüngüw: “Aaga naxey quiaj xeyay ngo majneaj andeac, cos andeac atnej nej Dios nej”, awüw.

<sup>4</sup> Teat Jesús tajaw cuane tengual mapiüngüw tiül omeajtsüw, quiaj tasaj nejüw:

—¿Neol tendecan atquiaj tiül imeajtsana?

<sup>5</sup> ¿Cuane ngo maél iyajcan nasaj, nasaja: “Isoet lanawün”, ngwüy nasaja: “Witiür, ijüy”, naja?

<sup>6</sup> Nganüy apmewan a Teat Naxey naleaing alndom mawün nisoet ningüy wüx iüt —aw.

Quiaj tasaj a niün andeow:

—Witiür, ixaing mimats, quiür ijtsor —aj.

<sup>7</sup> Quiaj witiüt tajtsor.

<sup>8</sup> Nipilan wüx tajawüw aag ayaj mbayatoj. Tandeacüw xeyay najneaj wüx Teat Dios, cos lamambeol nop nipilan ndoj ombas marang aag ayaj.

*Wüx Teat Jesús tarriiüd Mateo (Mr. 2:13-17; Lc. 5:27-32)*

<sup>9</sup> Almaj quiaj Teat Jesús, quiaj tajaw nop naxey nenüt Mateo, alchetem wüx bang niüng angüyeran mitomiün cambaj. Quiaj tasaj:

—Mac tabar —aj.

Quiaj witiüt a naxey quiaj, tamb maquiüüb nej.

<sup>10</sup> Alinoic nüt Teat Jesús alchetem tiül nden, tengual üetiw maquiüüb minipilan nej. Aliw quiaj xeyay monsap mitomiün cambaj; at aliw quiaj aton xeyay nipilan monrang ngo majneaj. Nóiquian tengual üetiw maquiüüpüw.

<sup>11</sup> Wüx tajawüw aag ayaj a fariseos, quiaj tasajüw minipilan nej Teat Jesús:

—¿Neol minatangan nequiaach icon tapots üet aweaag monsap mitomiün cambaj, at aldemas nipilan leaw ngo mayambüw Teat Dios? —ajüw.

<sup>12</sup> Wüx tanguaiy aag ayaj Teat Jesús, quiaj tasaj nejüw:

—Leaw ayaag najneaj ajlüy ngo metam mayamb nejaw nej, áagan nipilan leaw ayaag niün andeow mbich netam mayamb nejaw nej.

<sup>13</sup> Quiüran iyamban imeajtsan cuane amb apiüng aaga poch cam: “Xique sandiüm merjiürayon lasta, ngome áagan iyacan erchechiün”, aw. Xique ngo niün nayamb leaw ayaag najneaj arang, xique xiün nayamb leaw monrang ngo majneaj, nüüch leam omeajtsüw nguineay tengual marangüw, para marangüw leaw andiüm Teat Dios —aj nejüw Teat Jesús.

*Tatüniw manguaiyiw wüx aiündüch*  
(Mr. 2:18-22; Lc. 5:33-39)

<sup>14</sup> Condom quiaj tapeayiw niüng ajlüy nej minipilan Juan aaga neech yow nipilan, tasajüw nej:

—Teat, xicona saiündan xeyay, at nipilan fariseos aton. Jow nganüy minipilan, ¿neol ngo maiündüwa? —ajüw nej.

<sup>15</sup> Teat Jesús quiaj tasaj nejüw. Tapiüng:

—¿Alndom nop nengoch owixe mamix omeajtsüw miamigo neje sitiül nej alquiaj almaquiüüpüwa? Alinoic nüt wüx lango majlüy a nench, aaga nüt quiaj mbich apmaiündüw.

<sup>16</sup> Nejingüind ngondom macancham tiül noic nguirich napixeran quiripite jayats jael, cos aag ayaj sitiül apmacanchamaran tiül, wüx apstontocom, quiaj apmachiüt alquiriw aaga nguirich jael quiaj.

<sup>17</sup> At aton ngondom mayacaran jayats vin tiül nguirich taag iqial vin, cos sitiül apmajmel tiül, apchiütam a taag, condom quiaj apmajünch tiüt a vin, at a taag aton apndrom ombas. Ngwüy, jayats vin netam majmel tiül jayats taag; quiaj ngome apndrom ombasüw, apmaiücüw noic miün —aw.

*Micual Jairo, at a najtaj nerreeg apix Teat Jesús*  
(Mr. 5:21-43; Lc. 8:40-56)

<sup>18</sup> Teat Jesús tengualeámban mandeac aag ayaj masaj nejüw, quiaj ajngot nop naxey,

natang nenajiüt tiül nipilan judío, maquieel micos nej tiüt teombas nej, tapiüng:

—Teat, xecual les tandeow. Tabar teat, meyac iwix wüx ombas nej mepacüüch —aw.

<sup>19</sup> Quiaj witiüt Teat Jesús, tandüüb mamb a naxey quiaj, at minipilan nej tandüjpiw nej mamb aton.

<sup>20</sup> Quiaj ajngot nop najtaj niün andeow, lamajiür gajpic (12) neat tatow majiür, xeyay atsambiich nej miquiej nej. Quiaj tatüch niüng ajlüy Teat Jesús amb wanopech marreeg apix.

<sup>21</sup> Cos tapiüng tiül omeaats: “Sitiül narreeg masey apix nej, quiaj sanajneaj”, aw.

<sup>22</sup> Teat Jesús ndiliteay majaw, tasaj nej:

—Xecual, ich mapac imeaats, nganüy lerneaj cos teyac imeaats wüx xic —aw.

Quiájan tajneaj a najtaj nómban.

<sup>23</sup> Wüx Teat Jesús tapeay aniüng aaga natang nenajiüt quiaj, tajaw aliw quiaj monind at xeyay nipilan ancayajyaj.

<sup>24</sup> Quiaj tasaj a nipilan:

—Iriowan ningüy, aaga nüx cam ngome landeow, nej almameay —aj nejüw.

Nipilan quiaj titsojow nej.

<sup>25</sup> Wüx laawüw meáwan nipilan, quiaj Teat Jesús tajmel tiül iüm. Condom tasap owix a nüx mawitich. Quiaj witiüt a nüx.

<sup>26</sup> Meáwan cambaj najlüy quiaj tanguaiyiw nguineay lamarang Teat Jesús.

*Teat Jesús tüüch majneaj ipüw somb*

<sup>27</sup> Teat Jesús almaw quiaj, tandüjpiw nej mamb ipüw monxey nesombüw. Tengual apajüw masajüw nej:

—¡Teat naxey micual David, ijiür xicon lasta! —awüw.

<sup>28</sup> Wüx tapeay tiül nden, tapeayiw niüng ajlüy nej ajcüwa monxey nesombüw quiaj. Quiaj Teat Jesús tasaj nejüw:

—¿Ipiüngana naleaing xique alndom narang aag ayaja? —aj nejüw.

Quiaj tapiüngüw:

—Ajaj teat, sapiüangan alndom —awüw.

<sup>29</sup> Quiaj Teat Jesús tayac owix wüx oniüjcüw nejüw, tasaj:

—Sitiül atquiaj iyajcan tiül imeajtsan, atquiaj apmajlüy —aj nejüw.

<sup>30</sup> Quiaj rat oniüjcüw. Condom Teat Jesús tasaj nejüw, tapiüng:

—Ijawan, nde mesajan nejingüind —aj nejüw.

<sup>31</sup> Pero nejüw almawüw quiaj, tapots mandeacndeacüw wüx aag ayaj meáwan tiül aaga iüt quiaj, manguaiyeran nguineay tarang Teat Jesús.

*Teat Jesús tüüch mendeac nop jey*

<sup>32</sup> Almawüw quiaj ajcüwa monxey quiaj, quiaj ajngot maquiüuraab miün nop naxey alwüx ombas nej nimeech, lamüüch nej mejew.

<sup>33</sup> Quiaj Teat Jesús tawün nimeech wüx ombas a naxey quiaj, tajneaj mendeac. Meáwan nipilan mbayatoj majawüw, tapiüngüw:

—Ngomeaag ajlüy tiül micambajaats Israel atquaiy quiaj —awüw.

<sup>34</sup> Pero ajcüwa fariseos tapiüngüw:

—Aaga naxey quiaj alndom mawün nimeech cos minatang nimeech tengual mambeol nej —awüw.

#### *Teat Jesús xeyay ajüür lasta nipilan*

<sup>35</sup> Teat Jesús tajüy tiül meáwan cambaj, tiül rüñch aton, maquiaach nipilan tiül palpáwüx sinagoga. Tandeac xeyay najneaj poch manguiyeran nguineay alndom majlüyeran tiül micambaj Teat Dios. Aton tamongoch palpáwüx monandeow, at meáwan necoy tandendiich.

<sup>36</sup> Wüx tajaw nguineay ajlüyiw meáwan nipilan, tajiür nejw lasta, cos ajcuaeatüwan, ngo majlüyiw nóiquian, at nejw sap ngo majlüy wüx nop nejüür nejw.

<sup>37</sup> Quiaj tasaj minipilan nej, tapiüng:

—Naleaing sasaj icon, najüüt ajlüy xeyay, pero monrang najüüt napateay.

<sup>38</sup> Itüniün ocueaj a teat neneay najüüt müüch miün xeyay monrang najüüt —aj nejw.

## 10

#### *Teat Jesús tarriiüd gajpiüp apóstoles (Mr. 3:13-19; Lc. 6:12-16)*

<sup>1</sup> Condom quiaj Teat Jesús tawün gajpiüp (12) naw tiül minipilan nej, tüüch nejw ndoj ombasüw mawüniw nimeech wüx ombas nipilan, at aton mamongochiw cuajantanej monandeow at necoy.

<sup>2</sup> Ajcüwa gajpiüp (12) apóstoles atcüy minütiw nejw: nop Simón aaga nasoić Pedro, aqiiüüć Andrés michiig nej; alinop Jacobo, at a Juan michiig nej, micual nejw Zebedeo.

<sup>3</sup> Aton Felipe, Bartolomé, Tomás; at Mateo aaga tarang nesap mitomiün cambaj; Jacobo micual Alfeo; Lebeo aaga nasoić Tadeo;

<sup>4</sup> aton Simón naw tiül noic ajlüy nipilan nasoićquiw Cananista; at a Judas Iscariote aton, aaga ndoj tayac Teat Jesús teowixaw monajiüt.

#### *Teat Jesús tüüch mambüw mandeacüw mipoch nej*

(Mr. 6:7-13; Lc. 9:1-6)

<sup>5</sup> Ndoj quiaj Teat Jesús tüüch mambüw ajcüwa gajpiüp (12) minipilan nej, tasaj nejw:

—Nde meamban tiül miütüw nipilan ngome Israel, aton nde mejmeliün tiül nicuajind cambaj tiül iüt Samaria.

<sup>6</sup> Quiüran ombas, imbeolan ajcüwa nipiñan judío, cos nejw ajlüyiw at nejw najcuaeat sap.

<sup>7</sup> Quiüran isajan nipilan laliüc matüch a nüt majlüy wüx micambaj nej Teat Dios.

<sup>8</sup> Aton itajcan majneaj leaw axom nejw napat monandeow nasoić lepra, at cuajantanej monandeow. Ipacüjchiün leaw landeow, iwüniün nimeech wüx ombas leaw alwüx ombas nej nimeech. Xique süüchan icon ndoj imbasan merangan meáwan aag ayaj, ata icona nganüy imbeolan nipilan, nde metüniün nicuajind.

<sup>9</sup> Nde mejoyiün tomiün, nde mejoyiün oro, nde mejoyiün plata, tengwüy bronce.

<sup>10</sup> Nde mejoyiün minchiüjtsan tiül tiüü, aton nde mejoyiün ijquiw camix. Átan nde mesoićquiün napüic, nde mejoyiün ingotan. Cos leaw nerang najüüt netam mawiülaran.

<sup>11</sup> Wüx apmepeayiün tiül noic cambaj, tengwüy tiül noic rüñch, iyamban jane apmexoman quiaj leaw ajneaj omeaats majaw icon. Ixojtan aniüng nej; naw quiaj apmeriowan wüx lamatüch a nüt meriowan.

<sup>12</sup> Wüx apmejmeliün tiül noic nden ertepeayiün, itüniün monapacüy.

<sup>13</sup> Sitiül apac omeajtsüw majawüw icon, itüniün monapacüy; sitiül ndot ngo mandüümüw icon nde metüniün.

<sup>14</sup> Sitiül ngo mandüümüw mangochiw icon, ngo mandüümüw manguiyiw leaw apmesajan, iriowan tiül aaga nden quiaj, tengwüy tiül aaga cambaj quiaj. Itajtan quiaj minajndot ileajiün.

<sup>15</sup> Naleaing sasaj icon, wüx nüt apmajaraw wüx asoeteran, alwüx quiriw apateay ngo majneaj apmamongochiw monaw cambaj Sodoma maquiüüć Gomorra, ngo mat nejw ajcüwa nipilan quiaj.

#### *Apmemongochiün nael*

<sup>16</sup> Nganüy xique süüch icon meamban at icon sap indüyiün tiül tegüy sampüy. Netam mejlüyiün at icon ndiüc leawa necüiür nexotüy, ngo majlüyan ndeaaan. Aton irangan atnej arang palom, cos palom ngo marangüw ngo majneaj wüx ombas alinop.

<sup>17</sup> Ijawan wüx ajcüwa nipilan quiaj, cos apmayacüw icon teombasüw monajiüt, apmawüjchiw icon tiül sinagogas.

<sup>18</sup> Aton apmaquiüjpüw icon teombasüw montangtang monajiüt cos iyariün sandeac. Atquiaj alndom mendeacan xic wüx manguiyiw ajcüwa montangtang monajiüt, at palpáwüx nipilan leaw ngome judío.

<sup>19</sup> Naleaing wüx apmayacüw icon teombasüw monajiüt, nde meyamyamban imeajtsan mepiüñgan cuane apmepiüñgan, nguineay apmendeacan, cos wüx apmerndeacan, quiaj Teat Dios apmüüch icon poch cuane apmepiüñgan.

<sup>20</sup> Cos ngome icona apmerndeacan, Nangaj Miespíritu Miteatiüts Dios apmendeac tiül icon.

<sup>21</sup> 'Nachiigueran apmayac teowixaw monajiüt micoj nej mandeow. At nateateran apmayacüw teowixaw monajiüt micual nej mandeow. Nacualaran aton apmayacüw teowixaw monajiüt miteatiw nejw mandeow.

<sup>22</sup> Meáwan nipilan apmajcüyw majawüw icon cos iyariün sandeac. Jane ngo macueat xic, jane apmaüc wüx mamongoch meáwan aag ayaj leawa ndoj, apmaw wüx.

<sup>23</sup> Wüx ayambüw imbasan tiül noic cambaj alndom mercuiürran indüyiün tiül alinoic cambaj. Naleaing sasaj icon, nganaw membichan mejüyiün tiül meáwan cambaj tiül iüt Israel, quiaj apmandilil Teat Naxey.

<sup>24</sup> 'Nop nequiajchay ngome alwüx ajaw, napateay ajaw; nganüy nequiaach nej alwüx ajaw. Aton nop nerang najiüt ngome alwüx atam, napateay atam; nganüy aaga neneay najiüt alwüx atam.

<sup>25</sup> Nop nequiajchay ich mapac omeaats sitiül lamatüch ajaw nequiaach nej, nde matün wüx alquiriw; at nop nerang najiüt aton netam mapac omeaats sitiül lamüünd marang leawa netam, atnej neneay najiüt, nde mandüüm mamong wüx. Sitiül nateateran tasoic nimeech nej, nenüt Beelzebú, ¿jowa nganüy a micual neje, cuane ngome apmasoiquiwé?

*Ágan Teat Dios netam mermbolan mendüyiün*  
(Lc. 12:2-9)

<sup>26</sup> 'Nde mermbolan mendüyiün ajcüwa nipilan, cos leaw ngo majüic nganüy apmajüic alinoic nüt; aton leaw nganüy ngo majüic alinoic nüt apmajaraw.

<sup>27</sup> Leaw tenguijal nasaj icon nganüy wüx icóotsan quiaj cam, alinoic nüt netam mesajan meáwan nipilan. Leaw tenguijal nandex tiül ilajcan nganüy, alinoic nüt netam mendeacan napac manguiaj meáwan nipilan.

<sup>28</sup> Nde mermbolan mendüyiün leaw alndom mambiy icon, cos espíritu ngon-dom mandeow. Leaw naleaing netam mermbolan mendüyiün, aag ayaj leaw alndom mandrooch imbasan, at miespíritujan tiül biümb.

<sup>29</sup> '¿Neol, ngome noic tomiün ombeat ijquiw nine quiec ajnapa? Naleaing sapiüng ngo majmüic masey noic tiül nejw mandeow sitiül Teat Dios ngo mandüüm.

<sup>30</sup> Aton meáwan miondeats omalaran nateoraw.

<sup>31</sup> Pares sapiüng nde mermbolan cos icona alwüx ermbeatiün ngo mat icon ajcüwa nine quiec quiaj.

*Jane ngo mexotüy wüx ayar andeac Teat Jesús*

(Lc. 12:8-9)

<sup>32</sup> 'Jangantanej leaw ngo mexotüy wüx ayar sandeac masaj nipilan, xique aton sanasaj Xeteat najlüy tiül cielo xenipilan nej.

<sup>33</sup> Aton jangantanej leaw apmarang atnej ngo metam nej xic, ata xique aton sanasaj Xeteat najlüy tiül cielo ngome xenipilan nej.

*Mbjacaw nipilan wüx Teat Jesús*

(Lc. 12:51-53, 14:26-27)

<sup>34</sup> 'Nde mepiüngan xique xiün nüüch majlüy monajneaj wüx aaga iüt cam. Ngwüy, xique ngo niün nayac monajneaj wüx iüt, xique xiün nayac moncüy.

<sup>35</sup> Cos áag tiünas, altiül naxey apmajcüy aweaag miteat nej, ata nüx apmajcüy aweaag mimüm nej; at altiül mintaj nacualaran apmajcüy aweaag mimüm wüw nejw.

<sup>36</sup> Nop naxey tiül nden miün apmajüür moncüy majaw nej.

<sup>37</sup> 'Jane alwüx andüüm miteat nej mimüm nej, pero napateay andüüm xic, aag ayaj ngo membeat marang xenipilan. At aton leaw alwüx andüüm micual nej, napateay andüüm xic, aton ngo membeat marang xenipilan.

<sup>38</sup> At jane ngo mandüüm mamongoch meáwan naél masey mambiyaran wüx cruz cos ayar sandeac, aag ayaj ngo membeat marang xenipilan.

<sup>39</sup> Sitiül aljane ngo mayar sandeac cos imbol mandeow, nej wüx apmandeow apmamongoch xeyay ngo majneaj tiül biümb meáwan nüt. Pero sitiül aljane ngo mapiüng wüx, masey mandeow cos ayar sandeac, nej alinoic nüt apmajlüy xeyay najneaj tiül cielo.

*Leaw apmüünderan*

(Mr. 9:41)

<sup>40</sup> 'Jane apmayar indeacan, sandeac ayar aton. Jane ayar sandeac, ayar andeac neech xic niün.

<sup>41</sup> Jane apmayar andeac nop nendeac andeac Teat Dios cos ajaw Teat Dios neech nej miün, nej apmüünd atnej leaw apmüünd aaga nendeac andeac Teat Dios quiaj. Aton sitiül aljane apmayar andeac nop nerang minajiüt Teat Dios cos ajaw tenguijal marang najneaj, nej aton apmüünd atnej apmüünd aaga nerang minajiüt Teat Dios quiaj.

<sup>42</sup> Aton jangantanej leaw apmüüch masey tegüy yow manganeowüw ajcüwa namix nine quiaj, cos ajaw xenipilan nejw; naleaing sasaj icon, nej ngome apmajnot ocueaj leaw apmüünd —aj nejw Teat Jesús.



## 11

### *Minipilan Juan tambüw majawüw Teat Jesús*

(Lc. 7:18-35)

<sup>1</sup> Wüx Teat Jesús landoj masaj nejiw cuane netam marangüw ajcüwa gajpiüp (12) minipilan nej, quiaj taw quiaj, tamb maquiaach nipilan tiül meáwan cambaj tiül aaga iüt quiaj.

<sup>2</sup> Juan, aaga neech yow nipilan, altiül manchiüc. Wüx tanguiaj nguineay tengual marang Teat Cristo, quiaj tüüch mambüw ijpiüw minipilan nej majawüw Teat Jesús.

<sup>3</sup> Tatüniw nej manguiayiw, tasajüw:

—¿Teat, ique aaga Cristo leaw aliüc miüna, ngwüy netam nacülüün alinopa? —ajüw.

<sup>4</sup> Quiaj Teat Jesús tasaj nejiw:

—Quiüran isajan teat Juan meáwan leawa temejawan at leawa temenguiayüün.

<sup>5</sup> Isajan nguineay larraw oniüjcüw leaw nesomb, leaw necoex lajüy, leaw nexom nej napat monandow nasoiw lepra lajnej, leaw nelaag lamanguiay, at aton leaw tandeow nganüy lapac, at ajcüwa nipilan ngo majiürüw tengual manguiayiw nguineay alndom maw asoetiw nejiw.

<sup>6</sup> Najneajay ajlüy leaw ngo machiw omeaats wüx xique —aj nejiw Teat Jesús.

<sup>7</sup> Wüx laambüw minipilan Juan, quiaj Teat Jesús tapots mandeac masaj nipilan wüx Juan, tapiüng:

—¿Cuane teamban mejawan tiül wächüca? ¿Ngwüy tejawan nots najchowa tengual majowjow nej iünda?

<sup>8</sup> ¿Ngwüy, cuane teamban mejawana? ¿Tejawan nop naxey asoog najneajay apix neje? Icona ijawan leaw asoog najneaj apix nej aag ayaj najlüy aniüng nop natang nenajiüt.

<sup>9</sup> ¿Ngwüy, cuane teamban mejawana? ¿Teamban mejawan nop nendeac andeac Teat Diosa? Ajaj áag, naleaing nej alwüx atam ngo matnej nop nendeac andeac Teat Dios.

<sup>10</sup> Cos wüx aaga Juan quiaj, andeac aaga poch narangüch tiül minawiig Teat Dios, niüng apiüng:

Xecual, sanüüch mamb nop nejoy xepoch mamong ombas, teoj iliüc.

Nej apmataag majneaj mitiüüd apmemong tiül.

<sup>11</sup> Naleaing sasaj icon, tiül meáwan nipilan ngo maw tiül nop majntsop wüx atam ajlüy matnej atam a Juan. Pero naleaing tiül minipilan Teat Dios, leawa chingüy aag ayaj alwüx atam ngo matnej a Juan.

<sup>12</sup> 'Ajan wüx tiün a Juan andüy miün cam, xeyay nipilan tengual apacüw wüx majmeliw tiül micambaj Teat Dios. Pero leaw ngo mimboloj, ajcüw ayaj alndom majmeliw.

<sup>13</sup> Cos meáwan mondeac andeac Teat Dios, at a poch tüünd Moisés tandeacüw wüx leaw aliüc miün apmajlüy aleaw niüng tapeay a Juan.

<sup>14</sup> Nganüy sitiül icona indiüman meyariün, apmejawan nej aaga Juan quiaj tiün atnej Elías leaw lapiürang aliüc.

<sup>15</sup> Netam menguiayüün at mexoman imeajtsan wüx leaw sandeac quiaj.

<sup>16</sup> ¿Cuane at nejiw sanapiüng wüx ajcüwa nipilan monlüy nganüy cama? Cos at nejiw namix monguich montsoj tiül plas, tengual masajüw aqiiüjpiüw nejiw,

<sup>17</sup> apiüngüw: "Xicona tengual saindean pero icona ngo mejüüngan; átan sajiüntsán pero icona ngo merangan amix imeajtsan", awüw.

<sup>18</sup> Cos tiün a Juan, nej nguiaj ngo met ngo manganeow, icona tepiüangan nej alwüx ombas nej nimeech.

<sup>19</sup> Nganüy tiün a Teat Naxey, nej üet aweaag jangantanej, at anganeow aweaag. Icona ipiüangan nej nerrombüy nangüngün; ajlüyay maquiiüb nipilan leaw ngo mayamb Teat Dios, at mongsap mitomiün cambaj. Ali-noic nüt apmajüic sitiül najneaj sandeac, sitiül sajiür fis, at apmajüic sitiül najneaj sarang tengwangwüy —aw.

### *Nipilan nadam omeajtsüw*

(Lc. 10:13-15)

<sup>20</sup> Condom quiaj Teat Jesús tapots mandeac wüx ajcüwa cambaj niüng lamarang xeyay ateócan, cos ajcüwa nipilan quiaj ngo macueatiw marangüw ngo majneaj, ngo mayariw andeac nej. Tapiüng:

<sup>21</sup> —¡Jaa, icona monaw tiül cambaj Corazín! ¡Jaa, icona monaw tiül cambaj Betsaida! Cos jondot tiül cambaj Tiro y Sidón tarangüch meáwan ateócan leaw tarangüch tiül icona, catsats tsotojow tiül ngwiat masoijquiw nambeor apixaw nejiw majüiquichaw leaaw omeajtsüw wüx meáwan ngo majneaj tengual marangüw.

<sup>22</sup> Áag sasaj icon, alinoic nüt wüx apmajaraw wüx asoeteran, napateay quiriw ngo majneaj apmamongochiw monaw Tiro y Sidón, ngo matnej icona.

<sup>23</sup> Ata icona monaw cambaj Capernaum, ¿iyajcan icona apmeamban tiül cielo? ¡Niquimas! Aleáingan apmejlosan tiül aaga xeyay ngo majneaj, tiül mondeow. Cos sitiül ndot tiül cambaj Sodoma marangüch ateócan atnej tarangüch tiül icona, Sodoma aliün majlüy nganüy.

<sup>24</sup> Áag sasaj icon nganüy, alinoic nüt wüx Teat Dios apmajaw wüx asoeteran, napateay quiriw ngo majneaj apmamongochiw nipilan monaw Sodoma, ngo matnej icona —aw.

*Macaron niüng sajlüy, ixojtan*  
(Lc. 10:21-22)

<sup>25</sup> Tiül aaga nüt quiaj Teat Jesús tasaj Teat Dios, tapiüng:

—Xeyay najneajay irang Teat, ique natang nenajiüt tiül cielo at wüx iüt. Cos meáwan leawa lajlüy quiaj, textot ngo meeach majawüw leaw mondüy, leaw monxomxom omeaats. Nganüy lameeach majawüw ajcüwa atnej nine monguich quiaj.

<sup>26</sup> Najneaj Teat, cos atquiaj indiüm —aw.

<sup>27</sup> Condom tapiüng:

—Meáwan cuajantanej leaw almajlüy, xeteat lamayac tiül xiwiw. Nejinguind ngo majaw jane xic, áagan xeteat ajaw. Aton nejinguind ngo majaw jane xeteat, xíquian quiaj sawaw, ata nejüw leawa xique sandiüm nüjchiw majawüw.

<sup>28</sup> Macaron niüng sajlüy leawa laümb apac marang cuajantanej, leaw ajiür xeyay naél. Xique sanüüch maxood.

<sup>29</sup> Iyariün sandeac, irangan leaw sanaquiaach icon, cos xique xeyay ajneaj ximeeats ngo nerangrangüy. Quiaj apmajneaj imeajtsan, apmexojtan.

<sup>30</sup> Cos leawa xique sandiüm merangan, aag ayaj ngo maél; ngome apaxiüm merangan leawa sapiüng —aw.

## 12

*Tajeliw trigo wüx nüt axoodaran*  
(Mr. 2:23-28; Lc. 6:1-5)

<sup>1</sup> Tiül aaga nüt quiaj wüx noic nüt axoodaran, Teat Jesús tamong amb tiül noic corrül. Minipilan nej tind üetiw, quiaj tapots majeliw natang aól trigo matajtüw müetiw.

<sup>2</sup> Ajcüwa fariseos wüx tajawüw aag ayaj, quiaj tasajüw Teat Jesús, tapiüngüw:

—Ijaw minipilan nguineay tengual marangüw wüx nüt axoodaran, aag ayaj ngondom marangüw —ajüw.

<sup>3</sup> Nej tasaj nejüw:

—¿Neol ngomeaag meteowana tiül Mipoch Teat Dios mejawan nguineay tarang mixejchiüts David wüx nej tind üete, at leaw almaquiüjpüw nej atona?

<sup>4</sup> Nejüw tajmeliw tiül nangaj iüm, tüetiw pan leawa najmel marang nichech ocueaj Teat Dios; aag ayaj nejinguind ngondom müet, áagan miteaats alndom müetiw.

<sup>5</sup> ¿Neol ngomeaag meteowan tiül a poch tüünd Moisés nguineay arangüw miteaats tiül nadam nangaj iüma? Cos masey nüt axoodaran nejüw netam marangüw najiüt, aag ayaj ngome nisoet.

<sup>6</sup> Xique sasaj icon nganüy ajlüy ningüy nop alwüx atam, ngo matnej aaga nadam nangaj iüm.

<sup>7</sup> Icona ngo mejawan cuane amb apiüng Mipoch Teat Dios niüng apiüng: “Xique sandiüm mejiürayon lasta, ngome áagan iyacan erchechiün”, aw. Sitiül icona tejawan

aag ayaj, ngome apmeyacan asoet jane ngo marang nicuajind.

<sup>8</sup> Aaga Teat Naxey alwüx atam, ngo matnej aaga nüt axoodaran quiaj —aw Teat Jesús.

*Nop naxey ndron ombas nechey owix*  
(Mr. 3:1-6; Lc. 6:6-11)

<sup>9</sup> Condom Teat Jesús taw quiaj, tamb andüy tiül sinagoga ocueaj nipilan judío.

<sup>10</sup> Alquiaj nop naxey ndron ombas, nechey nots owix. Quiaj tatüniw manguiayiw Teat Jesús, tasajüw:

—¿Alndom mamongocharan iün andeow nipilan wüx nüt axoodarana? —ajüw nej.

Tapiüngüw aag ayaj cos andiümüw maxomüw cuane wüx alndom mayacüw asoet.

<sup>11</sup> Teat Jesús tasaj nejüw:

—Jondot nop tiül icona almajiür nop sap, ndot majmiüc ocueaj nej tiül noic lol wüx nüt axoodaran, ¿quia ngondom majmele maxaingue?

<sup>12</sup> Sitiül sap alndom majwan, jow nipilan, cuane wüx ngondom mambeolaran. ¿Neol ngwa alwüx atama? Naleaing alndom marangüch noic najneaj wüx nüt axoodaran —aj nejüw.

<sup>13</sup> Condom quiaj tasaj aaga ndron ombas quiaj:

—Ileanguiich iwix —aj.

Camüm maleanguiich, lajneaj nómban atanej alinots owix nej.

<sup>14</sup> Quiaj tawüw quiaj ajcüwa fariseos. Tapots mayabüw nguineay alndom mambiyaw Teat Jesús.

*Tanomb tanderac wüx Teat Jesús*

<sup>15</sup> Teat Jesús tajaw nguineay tengual mandiümüw marangüw. Quiaj taw quiaj, tandüjpiw nej mamb xeyay nipilan. Tamongch iün andeow meáwan moniün andeow.

<sup>16</sup> Tasaj nejüw nde majüiquichaw jane nej.

<sup>17</sup> Atquiaj tarang para majlüy atnej lamarang wüx nawiüg tanomb teat Isaías, áag nendeac andeac Teat Dios, cos tapiüng:

<sup>18</sup> Jogüy nerang xenajiüt, áag leawa lanarriüü,

xeyay sajiür nej lasta, nej üüch mapac ximeeats.

Sanayac wüx ombas nej xeespíritu; nej apmasaj palpálwüx nipilan nguineay sandiüm marangüw.

<sup>19</sup> Nej ngome apmajcüy aweaag aljane, ngome apmepaj.

Nejinguind ngome apmanguiay andeac nej tiül calle.

<sup>20</sup> Nej ngome apmapol masey nots tongoy najchow,

ngome apmaxejquen leaw aliün mayac quiriw nasop;

apmacül leaw ajlüy teowix nej micambaj nej.

<sup>21</sup> Nipilan tiül palpálwüx nación apmayacüw omeajtsüw wüx nej.

*Apiüngüw ambeol nej nimeech*  
(Mr. 3:20-30; Lc. 11:14-23; 12:10)

<sup>22</sup> Condom quiaj taquiüraab niüng ajlüy nej nop naxey nesomb, aton nejew, ngondom mendeac, alwüx ombas nej nimeech. Quiaj Teat Jesús tüüch majneaj a naxey quiaj, rat onüüg at tendeaç.

<sup>23</sup> Meáwan nipilan mbayatoj, tapiüngüw: —¿Quia aag ayaj micual mixejchiüüts Davida? —awüw.

<sup>24</sup> Wüx tanguaiyiw aag ayaj ajcüwa fariseos, quiaj tapiüngüw:

—Aaga naxey quiaj awün nimeech cos ambeol nej Beelzebú, aaga minatang nimeech —awüw.

<sup>25</sup> Teat Jesús tajaw nguineay tenguaial mapiüngüw tiül omeajtsüw, quiaj tasaj nej-jiw:

—Meáwan montangtang monajiüt tiül noic iüt, sitiül apmbajcamoj majcüyiw nejeyéjan quiaj, apmendroochayej ombasüw. At meáwan cambaj, tengwüy tiül noic nden, sitiül mbajcamoj ngo majlüyiw nóiquian, ngome apmaiücüw, apndajrriümoj.

<sup>26</sup> Atquiaj aton sitiül nimeech apmawün alinop nimeech wüx ombasaran, ¿nguineay apmajlüyiw? Sitiül ngo majlüyiw nóiquian, ¿nguineay alndom marangüw cuajantanej ngo majneaja?

<sup>27</sup> Sitiül naleaing Beelzebú nembeol xic nawün nimeech, isajan xic, jow minipilanan, ¿jane nembeol nejij mawüniw nimeeche? Nejiw minipilanan apmajüiquichaw ngo maleaing ipüingan.

<sup>28</sup> Pero sitiül Nangaj Espiritu ocueaj Teat Dios nembeol xic nawün nimeech wüx ombas nipilan, naleaing sasaj icon lamatüch icon mejmeliün tiül micambaj Teat Dios.

<sup>29</sup> ¿Cos nguineay alndom aljane majmel aniüng nop napac naxey maneed leaw andiüm, sitiül ngome ombas maóel owix aaga naxey quiaj, cas tawün majoy leaw andiüma?

<sup>30</sup> Jangantanej leaw ngo mandüüb xic, ajcüy majaw xic. Jangantanej leaw ngo mambeol xic wüx leaw teanaxejneng, aag ayaj teamawiich ningüün.

<sup>31</sup> Pares sasaj icon, meáwan nisoet leaw arangüw nipilan, Teat Dios alndom mawün wüx omeaats. At cuajantanej ngo majneaj poch anderac aton alndom mawün wüx omeaats nej. Pero jane apmandeaç ngo majneaj wüx Nangaj Espiritu ocueaj Teat Dios, aag ayaj mbich nómban ngondom mawün wüx omeaats nej Teat Dios.

<sup>32</sup> Jangantanej apmandeaç ngo majneaj poch wüx Teat Naxey, alndom maw aaga nisoet quiaj; pero jane apmandeaç ngo majneaj wüx Nangaj Espiritu ocueaj Teat Dios,

aaga nisoet quiaj mbich ngondom maw wüx ombas nej wüx aliün ningüy wüx aaga iüt cam, at alinoic nüt ngondom.

*Noic owil xiül wüx aong ajaraw*  
(Lc. 6:43-45)

<sup>33</sup> Leaw xiül nüeteran aóng, sitiül najneaj atang, apmayac najneaj aóng. At noic owil xiül sitiül ngo majneaj atang apmayac ngo majneaj aóng aton. Cos noic owil xiül ajüic nguineay ajlüy wüx apmayac aóng nej.

<sup>34</sup> ¿Cuane icona, at icon ndüic! ¿Nguineay alndom mepiügan cuane najneaj, sitiül icona xeyay ngo majneaj irangana? Cos leaw anderac, aag ayaj ajlüy tiül omeaatsaran.

<sup>35</sup> Nop nipilan leaw andeaç najneaj ajüiquich nej xeyay najneaj altiül omeaats. Pero nop nipilan leaw andeaç ngo majneaj, aag ayaj ajüiquich nej xeyay ngo majneaj altiül omeaats.

<sup>36</sup> Xique sasaj icon, alinoic nüt wüx apmajaraw wüx asoeteran, meáwan nipilan apmasajüw Teat Dios neol tapiüngüw meáwan ngo majneaj poch leaw tsajmbiüt ombeayiw mapiüngüw.

<sup>37</sup> Cos wüx mipoch apmajaraw sitiül apmajmel isoet tengwüy apmaw —aj nejijw Teat Jesús.

*Nipilan atüniw ateócan*  
(Mr. 8:12; Lc. 11:29-32)

<sup>38</sup> Altiül fariseos, at mondüy wüx aaga poch tayac Moisés tasajüw Teat Jesús, tapiüngüw:

—Teat, sandiüman najawan merang noic nadam ateócan —awüw.

<sup>39</sup> Quiaj tasaj nejijw Teat Jesús:

—Ajcüwa nipilan monlüy nganüy monrang xeyay ngo majneaj, ngo mandüjpiw Mipoch Teat Dios, andiümüw majawüw ateócan. Naleaing nicuajind ngome apmüjndiw majawüw, áagan ateócan tajlüy wüx Jonás aaga nendeaç andeaç Teat Dios tajlüy nomb.

<sup>40</sup> Cos atnej Jonás tacül teomeaats nadam cüet er nüt er ongwiiüts, atquiaj Teat Naxey aton apmacül tiül loliüt er nüt er ongwiiüts.

<sup>41</sup> Alinoic nüt wüx Teat Dios apmajaw wüx asoeteran, ajcüwa nipilan monaw Ninive leaw tajlüyiw tanomb, apmayacüw isoetiün. Cos ajcüwa nipilan quiaj tayambüw Teat Dios wüx a Jonás tapaj nej ocueajiw. Nganüy ajlüy tiül icona nop alwüx xeyay atam ngo matnej a Jonás.

<sup>42</sup> Nop najtaj najlüy tanomb, natang nena-jiüt nej naw cawac. Aaga najtaj quiaj wüx apmajaraw wüx asoeteran apwitiüm mayac isoetiün; cos nej imiün xeyay miünquiaj tamb manguiy najneajay mipoch aaga minatang nenajiüt nenüt Salomón. Nganüy ajlüy ningüy tiül icona nop alwüx xeyay atam ngo matnej Salomón.

*Wüx nimeech andilil wüx ombasaran*  
(Lc. 11:24-26)

<sup>43</sup> Nop nimeech wüx apmaw wüx ombas aljane, apmajüyjüy tiül wajchiüc mayamb nguiane apmaxood. Wüx lapaxiow ajüyjüy, ngo maxom, quiaj apmapiüng:

<sup>44</sup> “Sanandilil, sandüy tiül niüng tawas”, apmaw. Camüm mapeay quiaj, apmaxom aaga nipilan atnej nop iüm najneajay najjir-imb najmel mimbaj, ngo majlüy tiül nej- jinguid.

<sup>45</sup> Almajaw atquiaj, quiaj apmamb majan alayaifw aqiiüüb nej alwüx apatüw, ngo mat- nej. Quiaj apmambüw andüyiw wüx ombas a nipilan quiaj. Ndojwüx aaga nipilan quiaj xeyay ngo majneaj apmajlüy, ngo matnej tajlüy nomb. Atquiaj apmajlüy wüx ajcüwa nipilan monrang ngo majneaj cam —aj nej- jiw.

*Mimüm Teat Jesús y michiig nej*  
(Mr. 3:31-35; Lc. 8:19-21)

<sup>46</sup> Teat Jesús tealeámban andeac masaj nipilan, quiaj ajngot mimüm nej y michiig nej, pero ngo majmeliw. Tapiüngüw andiümüw mandeacüw maquiüjpüw.

<sup>47</sup> Aljane tasaj nej:  
—Aliw ninguiay mimüm y michiig. Andiümüw mendeacüw chüc mequiüjpüw —ajow.

<sup>48</sup> Quiaj tasaj aaga nesaj nej, tapiüng:  
—¿Jane ipiüng xemüma, jane ipiüng xechi- gue? —aj.

<sup>49</sup> Quiaj tandic owix andüy niüng ajlüyiw minipilan nej, tapiüng:

—Jogüy ajcüw agüy xemüm, xechiig.  
<sup>50</sup> Cos meáwan leawa nerang atnej andiüm Xeteat najlüy tiül cielo, ajcüw ayaj xemüm, xecoj, at xechiig aton —aw.

### 13

*Andeac wüx nop nepiür*  
(Mr. 4:1-9; Lc. 8:4-8)

<sup>1</sup> Tiül aaga nüt quiaj taw tiül iüm Teat Jesús, tamb andüy mbeay nadam yow nenüt Galilea, chetem quiaj.

<sup>2</sup> Canchiütoj niüng ajlüy nej xeyay nipi- lan. Quiaj tajtep tiül nop müx tiül yow, chetem. Ajcüwa nipilan tacülüwan wüx iüt mbeay yow.

<sup>3</sup> Quiaj tapots mandeac masaj nej- jiw xeyay najneaj poch, pero ngome aleaing miün, tapiüng:

—Tajlüy nop naxey tamb apiür.

<sup>4</sup> Wüx tenguiäl mawiich leawa teamapiür, quiaj tajmiüc tigüy mbeay tiüüd, ndoj wüx tajngotoj quiec tambichaw mamileaw.

<sup>5</sup> Tigüy tajmiüc wüx piedra niüng ngo maj- jlüy omeaats iüt. Tajntsop najen.

<sup>6</sup> Wüx tajntsop nüt terraar, quiaj tambel nej. Cos ngo majiür mioxiich nej, quiaj tawaag a nine soex quiaj.

<sup>7</sup> Altigüy tajmiüc tiül sats, condom tajntsop. Naleaing cos sats najen atangüw, áag taxotüw tiüt a nine soex quiaj.

<sup>8</sup> Altigüy tajmiüc tiül najneaj iüt, najnea- jay terangüy. Tigüy napateay taóng, altigüy tayac wüx quiriw, altigüy tayac wüx xeyay aóng.

<sup>9</sup> Netam meajchiün ilajcan, mexoman imeajtsan wüx aaga sandeac quiaj —aw.

*¿Neol, cuane ajpar aaga andeac quiaja?*  
(Mr. 4:10-12; Lc. 8:9-10)

<sup>10</sup> Condom minipilan nej tatüchiw niüng ajlüy nej masajüw:

—Teat, ¿neol tendeac atquiaj, ngome aleáingan mesajüw nipilana? —ajüw nej.

<sup>11</sup> Quiaj Teat Jesús tasaj nej- jiw:

—Icona tenguiäl meajndiün mejawan leaw nomb ngo majüiquicharan, nguineay alndom majmeleran tiül micambaj Teat Dios najlüy tiül cielo. Pero nej- jiw ngome apmasoiquiüw aleaing miün.

<sup>12</sup> Cos sitiül aljane ayac wüx omeaats xepoch, apmüüd manguiay maxom xeyay. Pero sitiül nop ngo mayac wüx omeaats, aaga quiriw anguiay quiaj apndrom omeaats.

<sup>13</sup> Áag tandeacas atquiaj ngome aleáingan, cos saw masey ajawüw ngome apma- jawüw cuane, at masey anguiayiw ngome apmajawüw cuane wüx amb apiüng.

<sup>14</sup> Atquiaj alndom majlüy wüx ombasüw ajcüwa nipilan quiaj, atnej nomb tarang tiül minawiig nej teat Isaías, aaga nendeac andeac Teat Dios, niüng apiüng:

Apmenguiayiün naag ilajcan, pero ngome apmejawan cuane;  
apmejawan naag iniüjcan, pero ngome ap- mejawan cuane wüx andeac.

<sup>15</sup> Cos icona xeyay adam imeajtsan; imontsotsan iniüjcan cos ngo mendiüman mejawan.

Ipalan ilajcan cos ngo mendiüman men- guiaiyiün.

Ngo mendiüman meyacan imeajtsan wüx, mejawan cuane wüx amb apiüng; cos ngo mendiüman meyariün.

Ngo mendiüman namongoch iün indeowan.

<sup>16</sup> Xique sasaj icon, najneajay ijlüyiün, apac imeajtsan cos icona lameajndiün me- jawan, at lameajndiün menguiayiün.

<sup>17</sup> Naleaing sasaj icon, xeyay mondeac andeac Teat Dios at xeyay monyamb Teat Dios tandiümüw majawüw leaw nganüy lamejawan, pero taton ngo majawüw; tandiümüw manguiayiw leaw lamenguiayiün nganüy, pero taton ngo manguiayiw.

*Cuane wüx amb apiüng wüx nepiür*  
(Mr. 4:13-20; Lc. 8:11-15)

<sup>18</sup> Nganüy inguiayiün cuane wüx amb apiüng aaga sandeac wüx nepiür.

<sup>19</sup> Leaw lamanguiay anderac nguineay alndom majmeleran tiül micambaj Teat Dios, ndoj ngo mayac wüx omeaats, andüüban ajngot a nimeech mawün wüx omeaats nej leaw lamanguiay. Aag ayaj ajlüy atnej aaga osaab soex najmiüc mbeay tiüü.

<sup>20</sup> Nganüy aaga osaab soex najmiüc tiül piedra, aag ayaj apiüng wüx nipilan leawa anguiay Mipoch Teat Dios, andüüban mar-ayar, apac omeaats.

<sup>21</sup> Naleaing aaga nipilan quiaj ajlüy atnej nine soex napateay mioxiich nej. Áag ngo maiüc, camüm majlüy quiriw naél ajcan ayar Mipoch Teat Dios; andüüban machiw omeaats.

<sup>22</sup> At aaga osaab soex najmiüc tiül sats, aag ayaj apiüng wüx nipilan leaw anguiay Mipoch Teat Dios, pero xeyay ayac omeaats wüx mandüümdiüm cuajantanej leaw alndom maxom wüx aaga iüt cam. Quiaj lango leam omeaats wüx Mipoch Teat Dios, lango müüch nej marang leaw Teat Dios andiüm. Aag ayaj atnej ngo mayac aóng.

<sup>23</sup> Pero aaga osaab soex leaw napiürüch tiül najneaj iüt, aag ayaj apiüng wüx nipilan leaw anguiay Mipoch Teat Dios, ayac wüx omeaats, condom aaga poch ambeol nej marang leaw andiüm Teat Dios. Aag ayaj atnej mayac xeyay aóng. Altiül taóng napateay, altigüy tayac wüx quiriw, altigüy tayac wüx xeyay aóng —aj nejiw Teat Jesús.

*Ngo majneaj soex ajntsoj tiül trigo*

<sup>24</sup> Átan tandeac Teat Jesús andüy wüx ngo majneaj soex, tapiüng:

—Micambaj Teat Dios najlüy tiül cielo ajlüy atnej tajlüy wüx nop naxey tapiür osaab trigo tiül micorrül nej.

<sup>25</sup> Naleaing aaga ongwiiüts quiaj wüx lameayiw, quiaj tamb nop najcüy majaw aaga neneay iüt quiaj, tapots mawiich tiül aaga iüt quiaj osaab ngo majneaj soex niüng lapiürüch trigo, condom cas tamb.

<sup>26</sup> Camüm matang matüch a nüt maól, quiaj lajüic ajcüwa ngo majneaj soex aliw tiül.

<sup>27</sup> Almajawüw aag ayaj monrang minajiüt aaga neneay corrül, quiaj tambüw masajüw nej: “Teat Xan, ¿neol ngwa, najneaj osaab trigo ipiüre? ¿Jow nganüy, nguia naw tajntsoj ajcüwa ngo majneaj soexe?” ajüw nej.

<sup>28</sup> Quiaj tapiüng aaga neneay corrül: “Nop ajcüy majaw xic nerang aag ayaj”, aw. Quiaj tasajüw nej monrang minajiüt nej: “¿Masey nambana nalojquiün aaga ngo majneaj soexe?” ajüw nej.

<sup>29</sup> Quiaj nej tasaj nejiw: “Ngwüy, ich majlüy, cos sitiül apmelojquiün aaga ngo majneaj soex quiaj, alndom lojquiüm a trigo aton.

<sup>30</sup> Ich majlüy matangüw nóiquian, ndoj apmawüniüts wüx apmacojchich. Cos wüx apmacojchich, xique sanasajüw moncooch maxainguiw ombas aaga ngo majneaj soex, masojnongon noic noic ponong, maoeliw, müjchiw mandaab. Condom cas taxainguiw a trigo mayacüw tiül xetroj, sanajüw” —aw.

*Tandeac wüx osaab mostaza*

(Mr. 4:30-32; Lc. 13:18-19)

<sup>31</sup> Teat Jesús tandeac alinoic andeac andüy wüx mostaza, tapiüng:

—Micambaj Teat Dios najlüy tiül cielo ajlüy atnej osaab mostaza wüx nop naxey tapiür tiül micorrül nej.

<sup>32</sup> Naleaing tiül meáwan osaab soex leaw napiürüch, aaga osaab mostaza quiaj xowüy minine. Ndoj wüx apmatang apmajal oleaj, alwüx ajal oleaj tiül meáwan soex, apmatüch atnej noic owil xiül. Quiec alndom marang ombiüm wüx mipüüg nej —aw.

*Tandeac andüy wüx levadura*

(Lc. 13:20-21)

<sup>33</sup> Átan tandeac alinoic andeac ngome aleáingan, tandeac andüy wüx levadura, tapiüng:

—Micambaj Teat Dios najlüy tiül cielo ajlüy atnej arang levadura. Wüx nop najtaj ayac levadura tiül arej nepeax arin, aaga levadura apmüüch maxip aaga ajtsaj marang pan —aw.

*Teat Jesús ngo mandeac aleáingan*

(Mr. 4:33-34)

<sup>34</sup> Teat Jesús atquiaj tandeac ngome aleáingan masaj nipilan. Nicuajind ngo mandeac aleáingan.

<sup>35</sup> Tandeac atquiaj para majlüy atnej lamapiüng nop nendeac andeac Teat Dios, cos tarang wüx nawiw:

Xique ngome sanandec aleáingan; sanapiüng wüx cuajantanej leaw ngo majaraw nde ajan wüx Teat Dios tarang aaga iüt cam.

*Tapiüng cuane wüx amb apiüng a ngo majneaj soex*

<sup>36</sup> Wüx Teat Jesús landoj andeac masaj nipilan, condom tajmel tiül iüm. Quiaj minipilan nej tambüw masajüw nej:

—Isaj xicon teat, cuane wüx amb apiüng aaga leaw tendec wüx ajcüwa ngo majneaj soex tiül corrül —ajüw nej.

<sup>37</sup> Quiaj tasaj nejiw Teat Jesús:

—Aaga nepiür najneaj osaab soex, aag ayaj Teat Naxey.

<sup>38</sup> Nganüy aaga corrül, aag ayaj andeac wüx a iüt cam. Aaga najneaj osaab soex, aag ayaj apiüng wüx minipilan Teat Dios. Pero aaga osaab ngo majneaj soex quiaj apiüng wüx minipilan nimeech.

<sup>39</sup> Aaga najcüy majaw neneay corrül nepiür ngo majneaj osaab soex, aag ayaj

nejay nimeech. Aaga wüx apxaijnguiam omeaats corrül aag ayaj apiüing wüx alinoic nüt wüx apmümb minüt a iüt cam. At ajcüwa monxaing omeaats corrül, aag ayaj apiüing wüx ángeles.

<sup>40</sup> Atnej tarriüjtüch ajcüwa ngo majneaj soex majwich tiül biümb, atquiaj apmajlüy alinoic nüt wüx apmümb minüt a iüt cam.

<sup>41</sup> Aaga nüt quiaj Teat Naxey apmüüch miün miángeles nej marriüjtüw mawüniw ajcüw leaw monrang ngo majneaj, at leaw monyax wüx alinop marang ngo majneaj, mawüniw tiül minipilan nej.

<sup>42</sup> Apmajlosüw tiül biümb niüing apmajjüntsüw xeyay, apmeporros olüiquiw.

<sup>43</sup> Quiaj ajcüwa monyamb Teat Dios apmajlüyiw najneajay tiül micambaj Teat Dios, ancaltlit at nejiw achech nüt. Netam menguiayüün, mexoman imeajtsan wüx leaw sandeac quiaj.

*Tandeac andüy wüx tomiün naxoraad*

<sup>44</sup> 'Aton micambaj Teat Dios najlüy tiül cielo ajlüy atnej nembeat tomiün naxoraad tiül corrül. Ndoj nop naxey wüx taxom aaga tomiün taton ngo mapiüing, taxot majneaj, apac omeaats, quiaj tamb manüüb meáwan leaw almajiür para alndom mangal aaga iüt quiaj maneay.

*Tandeac andüy wüx noic perla xeyay nembeat*

<sup>45</sup> 'Aton micambaj Teat Dios najlüy tiül cielo ajlüy atnej nop nengalüy neyamb nembeat perla.

<sup>46</sup> Cos wüx apmaxom noic perla leaw xeyay nembeat, quiaj apmamb manüüb meáwan leaw almajiür mangal aaga najneajay perla quiaj.

*Tandeac andüy wüx ndoc*

<sup>47</sup> 'Aton micambaj Teat Dios najlüy tiül cielo ajlüy atnej arang nots chinch wüx ajwich tiül ndec, cos apmasap cuajantanej cüet.

<sup>48</sup> Wüx lachipiw a ndoc, quiaj ajcüwa mondóc apmanotoj andüy wüx iüt. Condom apchetemoj marriüjtüw. Leaw najneaj cüet apmayacüw tiül nchep, leaw ngwüy apmawijchaw ninguiün.

<sup>49</sup> Atquiaj apmajlüy alinoic nüt wüx apmümb minüt a iüt cam. Quiaj ajcüwa ángeles apmawüniw leaw monrang ngo majneaj tiül monrang najneaj.

<sup>50</sup> Leaw monrang ngo majneaj apmajjlosüw tiül biümb niüing apmajjüntsüw xeyay, at apmeporros olüiquiw —aj nejiw Teat Jesús.

*Leaw jayats, aton leaw ajlüyay*

<sup>51</sup> Condom tasaj nejiw Teat Jesús:  
—¿Canüy lamejawan cuane wüx sandeaca? —aj nejiw.  
Quiaj tapiüingüw:

—Lanajawan teat —awüw.

<sup>52</sup> Quiaj tapiüing:

—Nop nendüy wüx aaga poch tüünd Moisés, wüx laquiajchay wüx nguineay alndom majlüyeran tiül micambaj Teat Dios najlüy tiül cielo, ajlüy atnej nop nateateran tiül noic nden. Cos meáwan leaw almajiür tiül nden atam nej, altiül jayats, altiül najlüy tanomb —aw.

*Teat Jesús ngo mandüüram tiül Nazaret*  
(Mr. 6:1-6; Lc. 4:16-30)

<sup>53</sup> Teat Jesús taw quiaj wüx landoj mapiüing wüx meáwan leawa tandeac quiaj.

<sup>54</sup> Tamb andüy tiül micambaj nej. Condom tapots maquiaach nipilan quiaj tiül a sinagoga ocueajiw nejiw. Ajcüwa nipilan wüx tanguaiyiw aag ayaj mbayajow, tapiüingüw:

—¿Nguineay tendüy aaga naxey quiaja? ¿Nguiane aquiajchay ndoj ombas marang ateócan?

<sup>55</sup> ¿Neol ngome nej micual aaga naxey nerang xiüla? Aton ngwa, ¿María minüt mimüm neje? ¿Jow Jacobo, José, Simón, Judas, ngwa michiig neje?

<sup>56</sup> Meáwan michiig montaj nej aliw ningüy maquiüjpaats. ¿Neol, jow nej nguineay ndot ombas meáwan aag ayaja? —awüw.

<sup>57</sup> Pares ngome tayariw nej andeac. Quiaj tasaj nejiw Teat Jesús:

—Nop nendeac andeac Teat Dios ayarich andeac nej nguiajantanej; pero ágan tiül micambaj nej ngo mayarich andeac, at micoj nej michiig nej ngo mayariw nej andeac —aj nejiw.

<sup>58</sup> Áag ngo marang quiaj xeyay cuajantanej ateócan tiül a cambaj quiaj, cos ngo mayariw nej andeac.

## 14

*Wüx tambiyeran Juan Bautista*  
(Mr. 6:14-29; Lc. 9:7-9)

<sup>1</sup> Tiül aaga nüt quiaj, aaga Herodes natang nenajiüt tiül iüt Galilea, tanguaiy nguineay tengual mangar Teat Jesús.

<sup>2</sup> Quiaj tasaj monbeol nej:

—Aag ayaj a Juan neech yow nipilan lapac tiül mondeow. Áag ndot ombas marang cuajantanej —aj nejiw.

<sup>3</sup> Atquiaj tapiüing a Herodes cos alwüx omeaats nej leaw tarang. Nej tüüch mamb ndeaa a Juan, majmel tiül manchiüc, maoelich naag galen. Aag ayaj tarang cos atquiaj tandiüm a Herodías mintaj Felipe, michiig a Herodes.

<sup>4</sup> Cos Juan wüx aliün mapac tasaj a Herodes:

—Ngo majneaj mequiüüb mintaj michiig —aj.

<sup>5</sup> Quiaj a Herodes tandiüm mambiy a Juan, pero naleaing timbol mandüy nipi-lan, cos meáwan nipilan apiüngüw aaga Juan quiaj nop nej nendeac andeac Teat Dios.

<sup>6</sup> Noic nüt aaga Herodes tayac nangos nüt, arang atüch mineat nej. Nop nüx micual aaga Herodías tejiüng niüng ajlüyaran. Aaga Herodes xowüy tajneaj majaw.

<sup>7</sup> Quiaj tapiüej apmüüch aaga nüx quiaj cuajantanej leaw apmatün, aton tapaj minüt midios nej majaraw naleaing apmüüch.

<sup>8</sup> Condom aaga nüx tamb matün manguiay mimüm nej cuane netam matün. Wüx landoj manguiay, quiaj tamb masaj a Herodes:

—Teat, sandiüm membiy aaga Juan neech yow nipilan meeach xic omal nej, amb tiül noic polat —aj.

<sup>9</sup> Masey aaga Herodes tamix omeaats, naleaing cuane apmarang cos lamapaj minüt midios nej, aton nipilan tanguiayiw. Quiaj tapiüng müünd.

<sup>10</sup> Tüüch mamb mandojquich onic a Juan tiül manchiü.

<sup>11</sup> Quiaj tajoyiw omal a Juan amb tiül noic polat, tñjchiw a nüx, ndoj a nüx amongóchan tüüch mimüm nej.

<sup>12</sup> Condom wüx tapeayiw quiaj minipilan Juan, taxainguiw micuerpo nej maquiüppüw mamb mamiütüw. Wüx landoj, quiaj tambüw masajüw Teat Jesús.

*Teat Jesús tüüch üetiw acoquiaw mil monxey*

(Mr. 6:30-44; Lc. 9:10-17; Jn. 6:1-14)

<sup>13</sup> Wüx Teat Jesús tanguiay aag ayaj, taw quiaj, tamb amb tiül müx andüy niüng ngo majlüy nipilan. Wüx tanguiyaran laámb, quiaj tambüw mandüjpiw nej xeyay nipi-lan ambüw wüx iüt imiünüw tiül palpálwüx cambaj.

<sup>14</sup> Wüx Teat Jesús taw tiüt imiün tiül müx, quiaj tajaw lapeayiw quiaj xeyay nipi-lan. Wüx tajaw nejiw, quiaj tajmiüc omal omeaats, condom tamongoch iün andeow xeyay nipilan leaw taquiüraab niüng ajlüy nej.

<sup>15</sup> Wüx langwiiüts, quiaj tasajüw nej minipilan nej:

—Teat, lamitiüt a nüt, aton ngo macüleran ningüy. Isajüw a nipilan quiaj majtsoriw, mambüw mangalüw üetiw tiül rüñch —ajüw nej.

<sup>16</sup> Quiaj tasaj nejiw Teat Jesús:

—Ngo metam mambüw, icona netam meajchiün üetiw —aj nejiw.

<sup>17</sup> Quiaj tapiüngüw:

—¿Cuane sanüjchiün? Cos áagan acoquiaw pan alijpüw nine cüet sajüüran —awüw.

<sup>18</sup> Quiaj tasaj nejiw Teat Jesús:

—Ijamiünan, chiün najaw —aj.

<sup>19</sup> Condom quiaj Teat Jesús tasaj nipilan chetemoj tiüt tiül nine soex. Quiaj tayar aaga acoquiaw pan alijpüw nine cüet, taxaing omal majaw cawüx, tüüch gracias Teat Dios. Wüx tambaag, quiaj texeyay. Condom tüüch minipilan nej majineaw müjchiw meáwan nipilan.

<sup>20</sup> Meáwan nejiw tetiw paxiün. Condom taxainguiw leaw nenaw, chipiüt gajpiüt (12) nchep.

<sup>21</sup> Ajcüwa nipilan leaw tetiw atüch acoquiaw mil monxey, pálwüx montaj at namix monguich aton.

*Teat Jesús tajüy teomal yow*

(Mr. 6:45-52; Jn. 6:16-21)

<sup>22</sup> Condom quiaj Teat Jesús tasaj minipilan nej majtepiw tiül müx mambüw ombas nejiw, nej teoj apmamb, mamongoj andüyiw necamb a nadam yow quiaj. Cos nej apmacül quiaj alquiriw metepeay aweaag nipilan leaw ümb majtsoriw, cas taw quiaj.

<sup>23</sup> Wüx laümb majtsoriw nipilan, quiaj tamb andüy wüx nop tiüc mandeac aweaag Teat Dios. Wüx lapojniow, Teat Jesús aliün quiaj.

<sup>24</sup> Nganüy aaga müx namb lamatüch pinawan aaga nadam yow quiaj, tenguiäl mapijpiüüt nej omal yow, cos xowüy lapac a iünd angochiw.

<sup>25</sup> Condom wüx landüy wüx arraw, quiaj Teat Jesús tamb matüch nejiw, ajüy amb teomal yow atnej majüy wüx iüt.

<sup>26</sup> Wüx tajawüw nej minipilan nej tenguiäl ajüy amb teomal yow, mbayajow tepajüw cos timboloj xeyay, tapiüngüw:

—¡Aag ayaj nembolooch! —awüw.

<sup>27</sup> Teat Jesús tasaj nejiw:

—¡Nde mbayameron, cos xique, ngome aljane! —aj nejiw.

<sup>28</sup> Quiaj tendeac a Pedro masaj nej:

—Teat Naxey, ata naleaing ique, iich xic namb najüy teomal yow aton natüch ic —aj nej.

<sup>29</sup> Quiaj tasaj nej Teat Jesús:

—Mac, teat —aj nej.

Almanguaiy aag ayaj a Pedro ajchíquiän tiüt, tajüy amb teomal yow mamb matüch Teat Jesús.

<sup>30</sup> Naleaing wüx tajaw nguineay apac a iünd, timbol, tanaámb tsoyoj tiüt. Quiaj tepaj:

—¡Teat Naxey, imbeol xic! —aw.

<sup>31</sup> Quiaj Teat Jesús tandic owix nej najéñan masap nej, tapiüng:

—¿Neol techiw imeaatsa; neol nganaw mejaw jane xique? —aw.

<sup>32</sup> Condom wüx tajtepiw tiül müx, quiaj lambat nómban.

<sup>33</sup> Quiaj ajcūw monlūy tiül mūx taquiejliw micosūw nejiw tiüt teombas Teat Jesús, tapiüngūw:

—¡Naleaing, ique Micual Teat Dios!  
—awūw.

*Teat Jesús tüüch majneaj moniün andeow tiül Genesaret*

(Mr. 6:53-56)

<sup>34</sup> Condom andojquíwan a nadam yow, tapeayiw necamb, tiül iüt Genesaret.

<sup>35</sup> Wūx ajcūwa nipilan quiaj tajawūw nejay Teat Jesús napeay, najénan tūjchiw manguiayiw meáwan nipilan tiül a iüt quiaj. Quiaj taquiüjpūw niüng ajlūy nej meáwan moniün andeow.

<sup>36</sup> Tatüniw ocueaj Teat Jesús sitiül alndom müüch nejiw masambūw masey apix nej. Meáwan nejiw leaw tasambūw nej tajneajiw nómban.

## 15

*Leaw üüch majiür nisoet nipilan*

(Mr. 7:1-23)

<sup>1</sup> Noic nüt acas fariseos tambūw majawūw Teat Jesús, maquiüjpūw ajcūw mondūy wūx aaga poch tüünd Moisés, napeayiw imiünūw Jerusalén. Tatüniw manguiayiw nej:

<sup>2</sup> —¿Neol minipilan ngo mandüjpiw leaw tayacūw tanomb mixejchiüts marangüche? ¿Neol wūx üetiw ngo majantsūw owixaw xeyay atnej ajlūyay marangaatsa? —awūw.

<sup>3</sup> Quiaj tasaj nejiw Teat Jesús:

—Jow icona, ¿neol ngo merangan atnej apiüng Teat Diosa? ¿Neol tengowüjchiün para alndom mendüjpiün opech leaw tayacūw mixejchiüna?

<sup>4</sup> Cos Teat Dios tapiüng: “Iyar andeacūw miteat, mimüm, indiümūw”, aw. Aton tapiüng: “Leawa nendeac ngo majneaj wūx ombas miteat nej, mimüm nej, ich mambi-yaran”, aw.

<sup>5</sup> Pero nganūy icona ipiüngan nop naxey alndom masaj miteat nej mimüm nej, mapiüng: “Leawa sajiür langondom nüüch icon, cos meáwan aag ayaj sanüüch Teat Dios”, maj.

<sup>6</sup> Ipiüngan wūx aljane apmapiüng aag ayaj, lango metam mambeol miteat nej mimüm nej. Quiaj temengowüjchiün leaw andiüm Teat Dios para mendüjpiün opech leaw tayacūw mixejchiün.

<sup>7</sup> ¡Ndeac mbeay! Naleaing leaw tarang teat Isaias tiül minawüig nej leaw Teat Dios tasaj nej, cos tandeac wūx icona wūx tapiüng:

<sup>8</sup> Ajcūwa nipilan quiaj apiüngūwan ayariw sandeac, ngome wūx omeajtsūw, ombeayíwan.

<sup>9</sup> Ngo membeat leaw arangūw wūx ayambūw xic,

cos meáwan leaw aquiajchiw, aag ayaj mipochiw nejiw —aj nejiw Teat Jesús.

<sup>10</sup> Condom Teat Jesús tapaj nipilan masaj: —Inguiayüün, iyacan wūx imeajtsan leaw teanasaj icon:

<sup>11</sup> Cuajantanej leaw ajmel tiül ombeayaran müeteran, aag ayaj ngome nisoet; leaw ngo majneaj poch aw teombeayaran aag ayaj mbich nisoet —aj nejiw.

<sup>12</sup> Quiaj tambūw masajūw nej minipilan nej, tapiüngūw:

—¿Tejaw Teat, nguineay tajcüyiw ajcūwa fariseos wūx tanguiayiw indeaca? —ajūw nej.

<sup>13</sup> Nej tasaj nejiw:

—Cuajantanej napiürüch leaw Xeteat naljūy tiül cielo ngo mapiür, apmalojquich nómban.

<sup>14</sup> Ich majlūyiw cos nejiw ajlūyiw atnej arang nop somb wūx teamanetet owix alinop somb. Cos sitiül nop somb apmanetet owix alinop somb, mijpüéj apmajiücüw tiül loliüt —aj nejiw Teat Jesús.

<sup>15</sup> Quiaj tasaj nej a Pedro:

—Teat, isaj xicon cuane wūx amb apiüng aaga tandeac quiaj —aj.

<sup>16</sup> Quiaj tasaj nej Teat Jesús:

—¿Neol, at a icona aton nganaw mejawana cuane amb apiünga?

<sup>17</sup> ¿Ngo mejawan nguineay ajlūy wūx nüeterana? Cos aag ayaj ajmel tiül ombeayaran, among teomeaatsaran, ndoj apmaw.

<sup>18</sup> Nganūy leaw ngo majneaj poch aw teombeayaran, aag ayaj mbich nisoet cos naw wūx omeaatsaran.

<sup>19</sup> Imiün tiül omeaatsaran aw cuajantanej ngo majneaj alwūx omeaatsaran. Aton altiül ambiyaw nipilan. Altiül ajjürūw minaxeyiw nejiw, minajtajūw nejiw, at altiül monūx ajlūyiw maquiüjpūw monench, at monench ajlūyiw maquiüjpūw monūx masey ngo mengoch owixaw. Aton mon-eed, monwaiich, at mondeac ngo majneaj wūx ombas alinop, tengwūy wūx ombas Teat Dios.

<sup>20</sup> Meáwan aag ayaj üüch majiür nisoet nipilan. Nganūy, wūx üeteran masey ngo marangüch aaga leaw ajlūyay merangan wūx ajantsüch owixaran, cos aag ayaj mbich ngome nisoet —aw.

*Nop najtaj Cananea tayamb Teat Jesús*

(Mr. 7:24-30)

<sup>21</sup> Condom Teat Jesús taw quiaj, tamb andūy tiül iüt ocueaj cambaj Tiro maquiüüb Sidón.

<sup>22</sup> Quiaj tajngot majaw nej nop najtaj naw tiül iüt Canaan, nganūy acül tiül aaga iüt quiaj. Tapots apaj, tapiüng:

—¡Teat Naxey, micual David, ich majmiüc imal imeaats mejaw xic! Xecual xeyay ngo majneaj teamamongoch, alwūx ombas nej nop nimeech —aw.



<sup>23</sup> Teat Jesús ngo masaj nej nicuajind. Quiaj tatüchiw nej minipilan nej, tasajüw:

—Teat, isaj ich maw ningüy, cos aliüch almandüüb opechiüüts teapaj —awüw.

<sup>24</sup> Condom quiaj Teat Jesús tapiüng:

—Xique tüjndiüs niün nambeol áagan niplan judío, cos nejiw ajlüyiw at nejiw najcuaeat sap —aw.

<sup>25</sup> Quiaj aaga najtaj tamb taquieel micos nej tüüt, tapiüng:

—Teat Naxey, imbeol xic —aw.

<sup>26</sup> Quiaj tasaj nej Teat Jesús:

—Xenipilan judío ajlüyiw atnej xecual, netam nambeolüw ombas. Sitiül ngo narang atquiaj, sanarang atnej nop naxey anood mipan micual nej müüch nine pet müetiw —aj nej.

<sup>27</sup> Aaga najtaj tasaj nej:

—Teat, naleaing aag ipiüng quiaj, masey apmetiw ombas micual, pero aton masey nine pet alndom mamilmil leaw najmiüch tüüt minaw üet neneay nej —aj nej.

<sup>28</sup> Quiaj tasaj nej Teat Jesús:

—¡Naleaing müm, xeyay iyac imeaats wüx xique! Nganüy apmajlüy atnej indiüm —aj nej.

Quiaj tajneaj micual nej ajan wüx aaga ores quiaj.

*Teat Jesús tüüch majneaj xeyay moniün andeow*

<sup>29</sup> Condom Teat Jesús taw quiaj, tamong amb mbeay nadam yow Galilea, tamb andüy wüx nop tüüch, quiaj chetet.

<sup>30</sup> Tapeayiw niüng ajlüy nej xeyay nipilan, aqiiüjpüw mamb xeyay moniün andeow; altiül necoex, nesomb, nejew, at leaw ndron ombas. Tayacüw tüüt niüng ajlüy Teat Jesús, condom nej meáwan tataag majneaj.

<sup>31</sup> Meáwan nipilan mbyatoj wüx tajawüw landeac leaw nejew, at leaw ndron ombas lajneaj, leaw necoex lajüy, átan leaw nesomb larrow oniüüg. Tandeacüw xeyay najneaj wüx Midios Israel.

*Teat Jesús tüüch üetiw apiquiw mil monxey*

(Mr: 8:1-10)

<sup>32</sup> Condom Teat Jesús tapaj minipilan nej, tasaj:

—Sajiürüw lasta a nipilan cam, cos lamatüch er nüt tatow acüliw ningüy maquiüjpaats, lango majiürüw cuane apmetiw. Aton ngo nandiüm nüjchwi majtsoriw sitiül nganaw metiw, cos alndom masap nejiw lop tüül tüüd —aj.

<sup>33</sup> Quiaj tasajüw nej minipilan nej:

—¿Teat, nguiane alndom naxoman nüeteran ningüy tüül wajchiüch metiw meáwan aaga nipilan quiaja? —ajüw nej.

<sup>34</sup> Quiaj tasaj nejiw Teat Jesús:

—¿Cas pan aliün mejiürana? —aj nejiw. Quiaj tapiüngüw:

—Áagan ayaíw pan alacas nine cüet —awüw.

<sup>35</sup> Quiaj tapiüng Teat Jesús chetemoj tüüt nipilan.

<sup>36</sup> Condom tayar aaga ayaíw pan at a nine cüet; tüüch gracias Teat Dios. Ndoj tambaag müüch minipilan nej majineaw müjchwi meáwan nipilan.

<sup>37</sup> Meáwan nejiw tetiw paxiün. Condom leaw nenaw ocueajiw taxainguiw chipiüt ayaíw nchep.

<sup>38</sup> Leaw monxey tetiw, atüch apiquiw mil, pálwüx montaj, pálwüx namix monguich.

<sup>39</sup> Wüx landoj aag ayaj, quiaj tetepeayoy maquiüjpüw nipilan, condom taw quiaj, amb tüül müx. Tamb andüy tüül iüt Magdala.

## 16

*Atüniw nadam ateócan*

(Mr: 8:11-13; Lc: 12:54-56)

<sup>1</sup> Altiül fariseos y saduceos tambüw majawüw Teat Jesús cos andiümüw masapüw nej wüx naél. Tasajüw marang nadam ateócan majawüw naleaing Teat Dios tüül cielo ambeol nej.

<sup>2</sup> Nej tasaj nejiw:

—Wüx langwiüüts, tenguijal ajmel nüt, icona ipiüngan: “Nganüy apmarang najneaj cos ayac nacants oic”, irawan.

<sup>3</sup> Aton wüx ümb arraw ipiüngan: “Nganüy ngome apmarang najneaj cos xowüy amococ, ayac nacants oic”, irawan. ¡Ndeac mbeay icon! Cos icona ipiüngan ijawan cuajantanej wüx oic, wüx caaw, ¿neol a nganüy ngo mejawan nicuajind wüx meáwan leawa tenguijal ajlüye?

<sup>4</sup> Nipilan monlüy nganüy cam monrang ngo majneaj atüniw ateócan majawüw. Naleaing sasaj icon ngome apmüjndiw majawüw. Apmüjndiw áagan ateócan leaw tajlüy wüx Jonás, aaga nendeac andeac Teat Dios —aj nejiw Teat Jesús.

Ndoj quiaj tacueat nejiw, tamb.

*Leaw aquiajchwi fariseos*

(Mr: 8:14-21)

<sup>5</sup> Wüx tapeayiw necamb aaga nadam yow, quiaj minipilan nej leaad omeajtsüw ngo majoyiw pan.

<sup>6</sup> Condom tasaj nejiw Teat Jesús:

—Inguiayiün, sanasaj icon, netam mejawan wüx aaga levadura ocueaj fariseos y saduceos —aj nejiw.

<sup>7</sup> Quiaj minipilan nej tandeacüw nejeyéjan quiaj, tapiüngüw:

—¿Neol tandeac atquiaja? Aag ayaj tandeac cos ngo majamiünaats pan —awüw.

<sup>8</sup> Teat Jesús tajaw cuane alwüx omeajtsüw. Quiaj tasaj nejiw:

—¿Neol tapots indeacndeacan wüx pan tüülan icona? ¿Neol tapateay iyacan imeajtsan wüx xique?

<sup>9</sup> ¿Neol nganaw mejawan, ngo leaam imeajtsan nguineay tarangas wüx tajineas acoquiaw pan müetiwi acoquiaw mil monxey? Jow leaw tenaw, ¿cas nchep tatücha?

<sup>10</sup> ¿Neol ngo leaam imeajtsana? Jow, wüx tajineas ayaiw pan müetiwi apiquiw mil nipilan, ¿jow leaw tenaw, cas nchep chipiüta?

<sup>11</sup> ¿Neol cuane nerang icon ngondom mejawana? Cos xique ngome teanasaj icon wüx pan wüx tasajas icon mejawan wüx levadura ocueajiw fariseos at saduceos —aj nejiw.

<sup>12</sup> Quiaj tajawüw naleaing ngome teamasaj nejiw majawüw wüx levadura ocueaj pan, asaj nejiw majawüw wüx leaw aquiajchiw ajcüwa fariseos y saduceos.

*Pedro tapiüng Teat Jesús aaga Cristo*  
(Mr. 8:27-30; Lc. 9:18-21)

<sup>13</sup> Wüx tambüw andüyiw tiül iüt ocueaj Cesarea de Filipino, quiaj Teat Jesús tatün manguiay minipilan nej, tasaj:

—¿Cuane apiüngüw nipilan jane nej a Teat Naxey? —aj nejiw.

<sup>14</sup> Quiaj tasajüw nej:

—Altiül apiüngüw nej aaga Juan neech yow nipilan. Altiül apiüngüw aaga Elías, altiül apiüngüw Jeremías, tengwüy alinop nendeac andeac Teat Dios —awüw.

<sup>15</sup> Quiaj Teat Jesús tasaj nejiw:

—Jow icona, ¿jane xic ipiüngana? —aj nejiw.

<sup>16</sup> Quiaj tasaj nej Simón Pedro:

—Ique aaga Cristo leaw tapiürang aliüc, Micual ic Teat Dios almapac —aw.

<sup>17</sup> Quiaj tapiüng Teat Jesús, tasaj Pedro:

—Ich mapac imeaats, Simón micual Jonás, cos aaga poch indeac quiaj ngome aljane tasaj ic, nejay Xetate Dios najlüy tiül cielo tüüch ic mejaw.

<sup>18</sup> Aton xique sasaj ic, ique tenüt Pedro, aag ayaj apiüng wüx nine piedra. Pero wüx aaga nadam piedra cam sanawitich majlüy xeyay xenipilan. Nicuajind ngondom manood nejiw masey nimeech marang leaw andiüm.

<sup>19</sup> Xique sanüüch ic llave meleaag micambaj Teat Dios majmeleran tiül. Leaw apmeoel ningüy wüx iüt apmaoeleran tiül cielo; at leaw apmecheed ningüy wüx iüt apchejtüm tiül cielo aton —aj.

<sup>20</sup> Condom quiaj tasaj minipilan nej:

—Nde mesajan nejingüind xique aaga Cristo leaw lapiürang aliüc —aj nejiw.

*Teat Jesús tapiüng apmambiyaw nej*  
(Mr. 8:31—9:1; Lc. 9:22-27)

<sup>21</sup> Teat Jesús naw wüx aaga nüt quiaj tapots masaj minipilan nej netam mamb Jerusalén. Quiaj apmamongoch xeyay ngo majneaj teowixaw montangtang tiül a nadam nangaj iüm, teowixaw montangtang

miteaats, at mondüy wüx aaga poch tüünd Moisés. Aton netam mandeow mambiyaran, ndoj wüx er nüt apmapac alinomb.

<sup>22</sup> Condom quiaj a Pedro tawün nej ningüiün quiriw, tasaj:

—¡Teat, aag ayaj ngo mandiüm Teat Dios; ique ngondom memongoch aag ayaj! —aj nej.

<sup>23</sup> Teat Jesús ndiliteay majaw a Pedro, tasaj:

—Icuateat xic, nde mendiüm mepal leaw netam narang. Nde mendeac atnej andiüm Satanás. Cos aaga indeac quiaj ocueaj nipilan, ngome ocueaj Teat Dios —aj.

<sup>24</sup> Condom Teat Jesús tasaj minipilan nej, tapiüng:

—Sitiül aljane andiüm mayar sandeac majlüy xenipilan, ich mawün wüx omeaats meáwan naél leaw alndom mamongoch, ich mandüüb wüx leawa sarang masey mamongoch xeyay ngo majneaj, masey mandeow wüx cruz cos andüüb xic.

<sup>25</sup> Sitiül aljane ngo mayar sandeac ajcan imbol mambiyaw nej nipilan, alinoic nüt nej apmamongoch xeyay ngo majneaj. Pero sitiül aljane masey mandeow ajcan andüüb xic ayar sandeac, alinoic nüt najneajay apmajlüy.

<sup>26</sup> ¿Jondot sitiül aljane alndom maneay meáwan cuajantanej leaw ajlüy wüx aaga iüt cam, cuane appar sitiül apndrom ombas lango mamb tiül cielo? ¿Nguineay alndom nop mangüy asoet nej maw wüxe?

<sup>27</sup> Cos alinoic nüt wüx aaga Teat Naxey aliüc alinomb xeyay najneajay apmajlüy, xeyay nelitlit atnej ajlüy Teat Dios, almaquiüjpüw nej a ángeles. Quiaj apmangüy meáwan anopnop wüx leaw tarang.

<sup>28</sup> Naleaing nganüy sasaj icon altiül icona nganaw mandeow, quiaj apmejawan nguineay ajlüy a Teat Naxey wüx apmajlüy wüx micambaj nej —aj nejiw.

## 17

*Tewüineay majawüw nej Teat Jesús*  
(Mr. 9:2-13; Lc. 9:28-36)

<sup>1</sup> Wüx lamatich anafw nüt tatow ndoj mapiüng aag ayaj, quiaj Teat Jesús taquiüüb Pedro, Jacobo, at a Juan michiig Jacobo. Tambüw wüx nop nadam tiüc nejíwan quiaj.

<sup>2</sup> Condom Teat Jesús tewüineay majawüw nej. Quiaj tajawüw teombas nej xowüy lal-itlit atnej achech nüt; apix nej tajlüy rajnüy atnej ran.

<sup>3</sup> Camüm quiaj majawüw mixejchiw nejiw tajlüyiw tanomb, ajcüwa Moisés maquiüüb Elías, tenguiäl andeacüw maquiüjpüw Teat Jesús.

<sup>4</sup> Condom quiaj a Pedro tasaj Teat Jesús:

—Teat, najneajay macüliüts ningüy nóiquian. Sitiül mendiüm sanarangan ningüy arej nden, noic ineay, alinoic aneay teat Moisés, at alinoic aneay teat Elías —aj.

<sup>5</sup> Pedro tealeámban mandeac aag ayaj, quiaj ajngot noic rajnüy oic taxot nejw. Imiün tüül aaga oic quiaj tanguiaiyw noic nanderac, apiüng:

—Aaga ayaj xecual, xeyay sandiüm, apac ximeaats najaw. Inguiayiün meáwan leawa nej asaj icon —aj nejw aaga nendeac quiaj.

<sup>6</sup> Almanguiaiyw aag ayaj minipilan nej, tanaámboj mojojow tüüt mbayatoj xeyay.

<sup>7</sup> Quiaj Teat Jesús tamb marreeg nejw, tapiüng:

—Witiüron, nde mbayameron —aj nejw.

<sup>8</sup> Almamaxingüw omalüw, quiaj majawüw ngo majlüy quiaj nejingüind, áagan Teat Jesús almaquiüjpüw.

<sup>9</sup> Condom wüx teawüw tüüt imiünüw wüx tüüc, quiaj tasaj nejw Teat Jesús:

—Nde mesajan nejingüind wüx aaga leaw Teat Dios tüüch icon mejawan quiaj. Wüx Teat Naxey landoj lapac tüül mondeow, quiaj alndom mendeacan wüx —aj nejw.

<sup>10</sup> Quiaj tatüniw nej manguiaiyw minipilan nej, tasajüw:

—Teat, ¿neol ajcüwa mondüy wüx aaga poch leawa tüünd Moisés apiüngüw netam miün aaga Elías ombas nej, teoj aliüc aaga Cristo? —ajüw nej.

<sup>11</sup> Quiaj tasaj nejw Teat Jesús:

—Naleaing leaw apiüngüw, Elías netam miün ombas masaj nipilan leam omeajtsüw wüx Teat Dios.

<sup>12</sup> Nganüy sasaj icon Elías lafün ningüy. Naleaing ngome tajawüw jane nej. Tarangüw wüx ombas nej cuajantanej ngo majneaj leaw andiümüw. Atquiaj Teat Naxey aton apmamongoch xeyay ngo majneaj teowixaw nejw —aj nejw Teat Jesús.

<sup>13</sup> Quiaj minipilan nej leaad omeajtsüw, teamandeac wüx ombas aaga Juan neech yow nipilan.

*Wüx tajneaj nop alwüx ombas nej nimeech*

(Mr. 9:14-29; Lc. 9:37-43)

<sup>14</sup> Wüx tapeayiw niüng ajlüyiw nipilan, quiaj tajngot nop naxey maquieel micos nej tüüt teombas Teat Jesús, tasaj:

<sup>15</sup> —Teat Naxey, ijüür lasta xecual cos nimeech alox nej tüüt, teamamongoch xeyay ngo majneaj. Nguiay lamalox nej tüül bümb tengwüy tüül yow.

<sup>16</sup> Saquiüb miün nüüch majawüw nej minipilan sitiül alndom matajcüw nej majneaj. Naleaing ngondom ombasüw —aj nej.

<sup>17</sup> Quiaj Teat Jesús tasaj nipilan:

—jJaa, icona nipilan ngo meyariün sandeac, monrang ngo majneaj icon! ¿Cas

nüt ipiüangan sanajlüy ningüy naquiüb icona? ¿Cas nüt ipiüangan sanafüc wüx leaw irangana? Iquiüjpan miün aaga nench najaw —aj nejw.

<sup>18</sup> Condom quiaj talic aaga nimeech najlüy wüx ombas a nench; tasaj macueat. Quiaj tacueat, tajneaj a nench tüülan aaga ores quiaj.

<sup>19</sup> Condom minipilan nej wüx nejüwan quiaj maquiüjpüw nej, quiaj tasajüw:

—¿Neol xicona ngondom nawüniün aaga nimeech quiaja? —ajüw nej.

<sup>20</sup> Quiaj tasaj nejw Teat Jesús:

—Cos ajcan apateay iyacan imeajtsan wüx xique. Naleaing sasaj icon sitiül icona meyacan imeajtsan wüx xic, masey atonej apateay osaab mostaza, apndom mesajan aaga tüüc quiaj: “Iriow ninguiay, quiür indüy ningüiün”, merajan, y aaga tüüc apmaw. Ngo majlüy nicuajind leaw ngondom merangan sitiül naleaing iyacan imeajtsan wüx xique.

<sup>21</sup> Pero aaga nimeech quiaj ngondom maw sitiül ngo matajcüch orar y maiündüch xeyay —aj nejw.

*Teat Jesús tapiüng alinomb apmambiyaw nej*

(Mr. 9:30-32; Lc. 9:43-45)

<sup>22</sup> Wüx tajlüyiw nóiquian tüül iüt Galilea, quiaj Teat Jesús tapots masaj nejw wüx nguineay Teat Naxey apmayacüch teowixaw nipilan,

<sup>23</sup> apmambiyaw nej; ndoj, wüx er nüt apmapac alinomb. Wüx tanguiaiyw aag ayaj tamix omeajtsüw xeyay.

*Tawün tomiün andüy tüül nadam nangaj iüm*

<sup>24</sup> Wüx Teat Jesús tapeay tüül cambaj Capernaum maquiüb minipilan nej, quiaj ajcüwa monxaing tomiün andüy tüül nadam nangaj iüm tambüw majawüw teat Pedro. Tatüniw manguiaiyw nej, tasajüw:

—Jow aaga teat nequiaach icon, ¿ngo mawün tomiüna andüy tüül a nadam nangaj iüm ocueajüütsa? —ajüw nej.

<sup>25</sup> Quiaj teat Pedro tasaj nejw:

—Ajaj awün —aw.

Wüx tajmel tüül iüm a Pedro, andüüb masaj nej Teat Jesús, tapiüng:

—¿Nguineay ipiüng teat Simón? Jow monajiüt tüül noic cambaj, ¿jane ocueaj atüniw tomiüna, micual miütüw nejwe, ngwüy napeay miün nipilana? —aj nej.

<sup>26</sup> Quiaj tapiüng a Pedro:

—Atüniw ocueaj napeay miün nipilan —aw.

Teat Jesús tapiüng:

—Nganüy micual iüt ngo metam mangüy.

<sup>27</sup> Naleaing, pero ngana mandeacndeacüw wüx; quiür mbeay ndec, erlech. Leaw apmelech ombas, apmexom

teombeay nej tomiün. Aag ayaj ngochan meajchiw ajcüwa monsap tomiün, aag ayaj ayacar icore —aj nej Teat Jesús.

## 18

*¿Jane alwüx atam ajlüy?*

(Mr. 9:33-37; Lc. 9:46-48)

<sup>1</sup> Tiül aaga nüt quiaj, tatüniw nej manguiayiw minipilan nej, tasajüw:

—¿Jane alwüx atam ajlüy tiül micambaj Teat Dios najlüy tiül cielo? —ajüw nej.

<sup>2</sup> Quiaj Teat Jesús tapaj miün nop nine, malembech pinawan nejüw.

<sup>3</sup> Condom tapiüng:

—Naleaing sasaj icon sitiül ngo mendüyiün wüx merangan atnej arang nop nine, ngondom mejmeliün tiül micambaj Teat Dios najlüy tiül cielo.

<sup>4</sup> Atquiaj jangantanej leaw apmarang atnej aaga nine cam, ngo merangrangüy nicuajind, aag ayaj alwüx atam ajlüy tiül micambaj Teat Dios najlüy tiül cielo.

<sup>5</sup> Aton jangantanej apmajiür lasta nop nine atnej aaga nine cam, aag ayaj atnej xique tengual majiür xic lasta.

*Nde meyacüchiün wüx ngo majneaj*

(Mr. 9:42-48; Lc. 17:1-2)

<sup>6</sup> 'Jangantanej apmandiüm mayac wüx marang ngo majneaj masey nop tiül ajcüwa namix nine monyar sandeac, najneaj wüxan nganaw marang aaga ngo majneaj quiaj, maelich teonic nej nop cow majlos tiül ndec tsoyom tiüt nómban.

<sup>7</sup> ¡Xeyay ngo majneaj ajlüy wüx iüt, cos ajlüy leaw alndom müüch majmiücaran tiül nisoet! Aag ayaj meáwan nüt ajlüy, pero ¡xeyay ngo majneaj apmamongoch leaw apmayac wüx nisoet alinop!

<sup>8</sup> 'Atquiaj sitiül aljane ayaag owix nej tengwüy oleaj nej andiüm mayac nej wüx marang ngo majneaj, ich mandooig malox ninguiün. Cos más najneaj majmel niüng apmapacaran meáwan nüt masey ngo majiür nots owix tengwüy nots oleaj, cos cuane ambeol nej majlüy palan, ndoj majlos tiül biümb niüng ngondom xejquem nómban.

<sup>9</sup> Aton sitiül aljane ayaag oniiüg nej andiüm majaw leaw ngo majneaj, ich masoond malox ninguiün. Cos najneaj majmel niüng apmapacaran meáwan nüt masey noic oniiüg nej, cos cuane ambeol nej majiür palan oniiüg, ndoj majlos tiül biümb tiül necoy.

*Tandeac wüx ndron sap*

(Lc. 15:3-7)

<sup>10</sup> 'Nde mepiüngan jangantanej tiül ajcüwa namix nine quiaj ngo membeac, cos sasaj icon ajcüwa ángeles tiül cielo leaw tengual mambeol nejüw, meáwan nüt teamajawüw mitey Xeteat Dios najlüy tiül cielo.

<sup>11</sup> Cos Teat Naxey tiün mawün wüx meáwan nipilan leawa landoj apndrom ombasüw.

<sup>12</sup> '¿Cuane ipiüngan? Jondot nop naxey almajiür coic miow (100) sap, camüw ndrot ocueaj nop. ¿Neol ngome apmacueat aaga peic miow gajpoquey (99) quiaja, mamb mayamb aaga nop leaw ndrona?

<sup>13</sup> Sitiül ndot maxom, naleaing sasaj icon apmapac omeaats xeyay majaw aaga axom quiaj, ngo matnej meáwan leaw ngo ndrom.

<sup>14</sup> Atquiaj aton Miteatiüts Dios najlüy tiül cielo ngo mandiüm majaw ndrom ombasüw nop tiül ajcüwa namix nine quiaj.

*Wüx aljane aleaic marang wüx imbas*

(Lc. 17:3)

<sup>15</sup> 'Sitiül aljane aleaic marang wüx imbas, quiür indeac anaag najneaj icónan quiaj, meaach leam omeaats leaw tarang. Sitiül tayar leaw ipiüng, lamembeol, lameaach majneaj omeaats.

<sup>16</sup> Nganüy sitiül ngo mayar leaw isaj, iyamb nop ijpüw mequiüüb, meamban mejawan majlüyiw quiaj manguiayiw.

<sup>17</sup> Sitiül nej ngo mayar leaw isajan, isajan montangtang tiül moncanchiün mandeacüw maquiüjpüw. Ndot átan ngo mayar leaw asajüw nej, iyacan atnej nop ngo mayar andeac Teat Dios, tengwüy atnej nop nesap mitomiün cambaj leaw xeyay ngo majneaj arang.

<sup>18</sup> 'Naleaing sasaj icon, meáwan leaw apmeoeliün wüx aaga iüt cam apmaoelich tiül cielo. Aton meáwan leaw apmechejtüün wüx aaga iüt cam, apmachejtich tiül cielo aton.

<sup>19</sup> 'Sasaj icon alinomb, masey sitiül ijpüw icona ningüw wüx iüt aleaic metüniün, noic nej imeajtsan, Xeteat Dios najlüy tiül cielo apmüüch.

<sup>20</sup> Cos nguiajantanej niüng xenenguejow masey ijpüw arojpw monyar sandeac, xique sajlüy quiaj pinawan nejüw —aj nejüw Teat Jesús.

<sup>21</sup> Condom quiaj teat Pedro tamb matün manguiay Teat Jesús, tasaj:

—Teat, ¿jondot nop aleaic marang wüx ximbas, cos ombas netam nawün wüx ximeaats leawa taranga, leaw atüch ayaíwe? —aj.

<sup>22</sup> Quiaj tasaj nej Teat Jesús:

—Ngo nasaj ic áagan ayaíw; alndom mewün wüx imeaats masey ayaíw ermiow gajpowüw (77) —aj.

*Tandeac andüy wüx nop najon nerang najiüt*

<sup>23</sup> 'Tiül micambaj Teat Dios najlüy tiül cielo ajlüy atnej tarang nop minatang nenajiüt wüx tandiüm majaw nguitow ajüchüw nej anopnopoj mimonbeol nej.

<sup>24</sup> Tapots majaw wüx nguitow ajüch, quiaj apeay quiaj maquiüraab niüng ajlüy nej nop leaw ajüch nej xeyay tomiün.

<sup>25</sup> Aaga naxey quiaj ngondom mangüy leaw ajüch. Quiaj tapiüng aaga minatang nenajiüt majnapüw, majlüyiw ocueaj alinop maquiüüb mintaj nej micual nej. At majnap meáwan leaw almajiürüw para mawün mitomiün nej.

<sup>26</sup> Condom aaga naxey quiaj taquieel micos nej tiüt teoleaj minatang nenajiüt matün ocueaj. Tasaj: "Teat, satün icueaj, ngwa mecül xic alquiripite, ndoj sanangüy meáwan leaw salnajüch ic", aj.

<sup>27</sup> Quiaj aaga natang nenajiüt tajmiüc omal omeaats majaw nej. Tawün wüx omeaats nej nómban leaw lamajüch aaga naxey quiaj, tapiüng tsajmbiüm mamb.

<sup>28</sup> Almajw quiaj aaga naxey nejüchay, quiaj mangoch nop aquiüüb nej arang aweaag najiüt, almajüch nej quiriw tomiün. Quiaj tasap mapats onic, landüy wüx apmambiy. Quiaj tasaj: "Nganüy nganüy ingüy xetomiün", aj.

<sup>29</sup> Quiaj aaga naxey taquieel micos nej tiüt, matün ocueaj, tasaj: "Satün icueaj teat, ngwa mecül xic alquiripite, ndoj sanangüy meáwan leaw sajüch ic", aj.

<sup>30</sup> Aaga naxey quiaj ngome tandiüm macül nej, andüüban tamb mayac tiül manchiüc leaw ambich mangüy mitomiün nej.

<sup>31</sup> Wüx tajawüw aag ayaj alacas monrang najiüt, xeyay ngo majneaj mayajcüw. Quiaj tambüw masajüw aaga minatang nenajiüt manguiay meáwan leaw lamarang aag naxey quiaj.

<sup>32</sup> Quiaj tapaj nej miün alinomb aaga minatang nenajiüt, tasaj nej: "¡Ique nop ic ngo majneaj nerang xenajiüt! Ique meáwan leaw tejüch xic, aag ayaj tawüniüs wüx ximeaats nómban, cos tetün xicueaj.

<sup>33</sup> Jow nganüy ique, ¿neol ngo mejiür lasta alinop atnej tajiüras ic lasta?" aj nej.

<sup>34</sup> Tajcüy xeyay aaga natang nenajiüt, quiaj tüch mamb tiül manchiüc macülan quiaj leaw ambich mangüy meáwan ajüch.

<sup>35</sup> Atquiaj apmarang wüx imbasan Xeteat Dios najlüy tiül cielo sitiül ngo mewüniün wüx imeajtsan meáwan leaw arang wüx imbasan alinop —aj nejw Teat Jesús.

## 19

*Teat Jesús apiüng wüx moncuateay  
(Mr. 10:1-12; Lc. 16:18)*

<sup>1</sup> Condom wüx Teat Jesús landoj masaj nejw meáwan aaga poch quiaj, quiaj taw Galilea tamb andüy tiül iüt Judea, najlüy nonüt necamb lam Jordán.

<sup>2</sup> Tandüjpiw nej mamb xeyay nipilan. Meáwan tamogoch iün andeowüw.

<sup>3</sup> Condom acas fariseos tambüw majawüw Teat Jesús matüntüniw manguiayiw majawüw cuane apmapiüng. Quiaj tasajüw:

—¿Alndom nop naxey macueat mintaj nej cos tarang cuajantanej leawa nej ngo mandüüm? —ajüw nej.

<sup>4</sup> Quiaj tasaj nejw:

—¿Ngomeaag meteowan tiül Mipoch Teat Dios, niüng apiüng nej nerang nipilan, cos apiüng: "Tarang naxey at tarang najtaj"?

<sup>5</sup> Aton tapiüng: "Nop naxey netam macueat miteat nej mimüm nej, maquiüüb mintaj nej. Quiaj apmajlüyiw nóiquian, atnej nop nipilan nejw."

<sup>6</sup> Atquiaj langome apmajlüyiw ijpuéj, apmajlüyiw nop nejw cos noic omeajtsüw. Pares nejinguind ngondom müch mecueatayej leaw Teat Dios lamüch majlüy nóiquian —aj nejw Teat Jesús.

<sup>7</sup> Quiaj tasajüw nej:

—¿Neol a Moisés tapiüng alndom nop naxey macueat mintaj nej sitiül marangüch minawijquaw nejw müjndiw mecueatayej nómban? —ajüw nej.

<sup>8</sup> Quiaj tasaj nejw Teat Jesús:

—Moisés tapiüng alndom mecueatiün mintajan cos tajaw nadam imeajtsan. Naleaing nomb ngome atquiaj ajlüy.

<sup>9</sup> Pero nganüy xique sasaj icon sitiül nop naxey macueat mintaj nej, acueátan, ngome nejüür naxey mintaj nej, condom aaga naxey quiaj apmaquiüüb alinop, nej a naxey quiaj ajüür xeyay nisoet cos lamajiür minajtaj nej. Aton jane apmaquiüüb nop najcueat najtaj ajüür xeyay nisoet cos atnej majiür minajtaj nej aton —aj nejw.

<sup>10</sup> Quiaj tapiüngüw minipilan nej:

—Sitiül atquiaj ajlüy naél wüx aljane macueat mintaj nej, nómban ngo majneaj majiüraran mintajaran —awüw.

<sup>11</sup> Quiaj tasaj nejw Teat Jesús:

—Ngome meáwan nipilan alndom maiücüw wüx aaga ipiüangan quiaj. Áagan leaw Teat Dios lamambeol müch majlüyiw atánan quiaj.

<sup>12</sup> Ajlüy monxey ajüür cuane wüx ngo mengoch owixaw: altiül atquiaj ajlüy nde wijquaw; altiül aljane tarang nej wüx ombas nej; at altiül ngo mengoch owix cos xeyay andiüm marang minajiüt micambaj Teat Dios. Leaw ayaag alndom majlüy atánan quiaj, ngo mengoch owix, pues najneaj —aj nejw.

*Taquiüraab niüng ajlüy Teat Jesús acas namix nine  
(Mr. 10:13-16; Lc. 18:15-17)*

<sup>13</sup> Condom taquiüraab niüng ajlüy nej acas namix nine matepeayiw Teat Jesús, mayac

owix nej wüx omalüw nejw, matün monajneaj ocueaj Teat Dios müüch nejw. Minipilan nej taliqiuaw ajcüw monquiüüb namix nine.

<sup>14</sup> Quiaj Teat Jesús tapiüng:

—Ijchan miünüw a namix nine niüng sajlüy, nde mepalan. Cos ocueajiw nejw micambaj Teat Dios najlüy tiül cielo —aw.

<sup>15</sup> Quiaj tajend omalüw namix nine, ndoj taw quiaj.

*Nop nejiür xeyay, tandeac aweaag Teat Jesús*

(Mr. 10:17-31; Lk. 18:18-30)

<sup>16</sup> Condom tajngot nop majaw Teat Jesús, tatün nej manguiaj, tasaj:

—Teat, sawaw ique najneaj irang. Nganüy isaj xic Teat, ¿cuane najneaj netam naranga para namb tiül cielo nacül quiaj meáwan nute? —aj nej.

<sup>17</sup> Quiaj tasaj nej Teat Jesús:

—¿Neol tepiüng xique nerangas najneaja? Nejingüind nipilan ngo marang najneaj. Áagan Teat Dios arang najneaj. Nganüy sitiül indium meamb tiül cielo, netam merang meáwan leaw tapiüng Teat Dios marangüch —aj.

<sup>18</sup> Quiaj tasaj nej aaga naxey quiaj:

—¿Ngün? —aj.

Teat Jesús tasaj nej:

—Nde membiy nejingüind; nde mejiür pálwüx najtaj; nde merneed; nde mendeac ngo maleaing wüx ombas alinop;

<sup>19</sup> iyar andeac miteat mimüm; aton ijiür lasta alinop atnej ijiürüy lasta iquiáyan quiaj —aj nej Teat Jesús.

<sup>20</sup> Quiaj tasaj nej aaga naxey quiaj:

—Teat, meáwan aag ayaj sayac wüx ximeaats narang nde quich xic. ¿Cuane alinoic netam naranga? —aw.

<sup>21</sup> Quiaj tasaj nej Teat Jesús:

—Sitiül indium merang leaw palan, quiür inüüb meáwan leaw almejiür, condom imbaag ombeat meaac leaw nipilan ngo majiür. Ndoj tewiün mendüüb xic merang xenajiüt. Atquiaj apcanchiüm meáwan nembeatmbeat leaw apmeaand alinoic nüt tiül cielo —aj nej.

<sup>22</sup> Wüx tanguiaj aag ayaj, quiaj tamix omeaats, taw quiaj, cos nej ajür xeyay cuajantanej, ngo mandium mandrooch ombas.

<sup>23</sup> Quiaj Teat Jesús tasaj minipilan nej:

—Naleaing sasaj icon xeyay naél ocueajiw ajcüwa monjiür xeyay cuajantanej majmeliw tiül micambaj Teat Dios.

<sup>24</sup> Sanandüy wüx nasaj icon alinomb, ngo maél mamong tewoil nots ndiüc nop camello, ngo matnej aél ocueaj nop nejiür xeyay, majlüy tiül micambaj Teat Dios —aj nejw Teat Jesús.

<sup>25</sup> Wüx tanguiajw aag ayaj minipilan nej xeyay mbayatoj, tetünayej menguiajyey:

—Sitiül atquiaj ajlüy, ¿jane alndom maw wüx asoet neje? —awüw.

<sup>26</sup> Quiaj Teat Jesús tajaw teombasüw nejw, tapiüng:

—Nipilan ngondom mawün wüx asoet nejingüind; pero Teat Dios ngo maél majaw aag ayaj cos nej alndom marang cuajantanej —aj nejw.

<sup>27</sup> Condom Pedro quiaj tasaj nej:

—Teat, xicona lanacueatiün meáwan leaw tajiürasan para nandüpiün ic. Jow nganüy, ¿cuane sanaxoman wüx? —aj nej.

<sup>28</sup> Quiaj tasaj nejw Teat Jesús:

—Naleaing sasaj icon, alinoic nüt wüx Teat Dios apmüüch marang jayats meáwan cuajantanej leaw ajlüy wüx iüt, wüx Teat Naxey apmasap najneajay niüng chetej marang natang nenajiüt, apmajlüy quiaj gajpiüp (12) niüng chetejow montangtang monajiüt, niüng icona leaw mondüüb xic apchetemeron mejawan wüx asoetiw ajcüwa gajpiüp (12) ajlüy nipilan acualaats Israel.

<sup>29</sup> At aton jangantanej monyar sandeac leaw acueat aniüng nej, acueat miteat nej, mimüm nej, micoj nej, michiig nej, mintaj nej, micual nej, tengwüy macueat miüt nej para mandüüb xic, apmajlüy najneaj. Apmüjndiw xeyay, ngo matnej leaw tacueatiw wüx a iüt cam, aton apmapacüw tiül cielo meáwan nüt.

<sup>30</sup> Naleaing jane ayaag atnej alwüx atam ajlüy nganüy, alinoic nüt apmajlüy chingüy; at jane ayaag chingüy nej nganüy, alinoic nüt apmajlüy natang tiül micambaj Teat Dios —aj nejw Teat Jesús.

## 20

*Andeac andüy wüx monrang najiüt*

<sup>1</sup> Aton tasaj nejw Teat Jesús:

—Cos tiül micambaj Teat Dios najlüy tiül cielo, ajlüy atnej tarang nop nateateran nejiür iüt. Cos nej taw úmban arraw mayamb monrang najiüt macojchiw najün uva.

<sup>2</sup> Wüx taxom monrang najiüt, tasoiquiw apmangüyanüw noic nüt noicnoic tomiün nasoi denaro. Quiaj tüüch mambüw marangüw minajiüt nej.

<sup>3</sup> Condom taw alinomb wüx lapeay pinawan ajüy nüt. Quiaj taxom tiül plas alacas monxey tengual ayambüw najiüt.

<sup>4</sup> Quiaj tasaj nejw: “¿Ngwüy tabaatsa, merangan najiüt tiül xecorrül mecojchiün xeüwa? Ndoj sanangüy icon atnej netam”, aj nejw. Quiaj tambüw.

<sup>5</sup> Camüw taw alinomb aaga neneay najiüt laámb aplembem nüt, at wüx lanchejliow nüt aton. Átan taxom monrang najiüt atnej tiüj quiaj.

<sup>6</sup> Condom taw alinomb lamitiüt nüt, nfüngan taxom alacas aliw tiül plas, ngo

maxomwü najiüt. Quiaj tasaj nejiw: “¿Neol tejlüyüünan ningüy pal nüte; ngo mexoman najiüta?”, aj nejiw.

<sup>7</sup> Quiaj tapiüngüw: “Cos nejingüind ngo miün mayamb xicon”, awüw. Quiaj aaga neneay najiüt tasaj nejiw: “Quiüran irangan najiüt tiül xecorrül aton, ndoj sanangüy icon atnej netam”, aj nejiw.

<sup>8</sup> Wüx laümb tiüt aaga nüt, quiaj aaga neneay najiüt tasaj aaga naxey leaw tayac majlüy wüx majaw monrang najiüt: “Iwüniw tiül najiüt, ingüy minajiütüw nejiw. Ingüy ajan wüx teoj mapeay, ndojwüx leaw mbas mapeay”, aj.

<sup>9</sup> Wüx tapeayiw ajcüw monrang najiüt leaw tajmeliw lamitiüt nüt, tangüyeranüw palan noicnoic denario anopnopoj.

<sup>10</sup> Condom wüx tatüch nejiw leaw mbas majmeliw tiül najiüt, apiüngüw a nejiw apmüjndiw wüx alquiriw; naleaing tüjndiw atöwan nej aton noic denario.

<sup>11</sup> Tayariw, pero naleaing tajcüyiw, tandeacdeacüw wüx ombas aaga neneay najiüt.

<sup>12</sup> Tasajüw: “Ajcüwa teoj majmeliw tiül najiüt, ¿wül arangüw najiüta? Ágan noic ores tarangüw, pero ique tengüy atow nej ingüy xicon. Nganüy xicon tarangasan xeyay najiüt, sandeowan tiül nerraar mbich nüt”, ajüw nej.

<sup>13</sup> Quiaj tapiüngüw aaga neneay najiüt, tasaj nop nerang najiüt: “Amigo, xique ngo narang nicuajind ngo majneay wüx imbasan. ¿Neol ngwa, landoj lamandeacaatsa sanangüy icon noic denario?”

<sup>14</sup> Iyar leaw sangüy ic quiaj, quiür. Xique sandiüm nüüch aaga teoj mapeay atow nej süüch ic.

<sup>15</sup> ¿Neol, ngome alndom narang leawa xic sandiüm wüx xetomiüna? ¿Ngwüy, ngo majnej mejaw xic ajcan sandiüm nambeol nejiw aton?” aj.

<sup>16</sup> Aton tapiüngüw Teat Jesús:  
—Altiül leawa mbas nejiw, apmajlüyiw teoj, at leawa teoj nejiw apmajlüyiw mbas. Cos xeyayiw leaw najpajüw, pero napateayiw leaw narriütjüch —aw.

*Tandüy wüx mapiüngüw apmabiyan*  
(Mr. 10:32-34; Lc. 18:31-34)

<sup>17</sup> Wüx Teat Jesús aliw tiül tiüüd laambüw andüyiw Jerusalén, quiaj tawün nejiw mbiüjlatoj mbeay tiüüd ajcüwa gajpiüp (12) minipilan nej, tasaj:

<sup>18</sup> —Nganüy laambaats andüyiiüts Jerusalén niüng Teat Naxey apmayacüch teowixaw montangtang miteaats at ajcüwa mondiy wüx aaga poch tüünd Moisés. Quiaj apmapiüngüw mandeow.

<sup>19</sup> Aton apmayacüw nej teowixaw napeay miün nipilan, apmitsojow nej, apmawüjchiw, ndoj apmabiyaw wüx cruz.

Pero naleaing wüx er nüt apmapac alinomb —aj nejiw Teat Jesús.

*Leaw tatün mimüm Jacobo y Juan*  
(Mr. 10:35-45)

<sup>20</sup> Condom nop najtaj mimümwüw a Jacobo at a Juan, micual nejiw Zebedeo, tamb nóiquian maquiüjpüw majawüw Teat Jesús. Taquieel tiüt micos nej teombas cos andiüm matün alcuaue.

<sup>21</sup> Quiaj tasaj nej Teat Jesús:

—¿Cuane indüüm, müm? —aj nej.

Quiaj tapiüngüw aaga najtaj:

—Teat, wüx nüt apchetemear merang natang nenajiüt tiül micambaj, ijchaw chetemoj ajcüwa xecual cam aton, nop amb wüx miác iwix alinop amb wüx miquiamb —aw.

<sup>22</sup> Quiaj tasaj nejiw Teat Jesús:

—Ngo mejawan leaw itüniün. ¿Ngwüy alndom memongochiün xeyay necoye atnej xique sanamongoche? ¿Ngwüy alndom mendeowana atnej xique sanandeowa? —aj nejiw.

Quiaj tapiüngüw:

—Alndom —awüw.

<sup>23</sup> Quiaj tasaj nejiw Teat Jesús:

—Naleaing, netam memongochiün xeyay necoy atnej xique sanamongoch, aton apmabiyaranan; pero aaga ipiügan chetemeron wüx xeác y wüx xequiamb, mbich aag ayaj ngome xique alndom nüüch aljane, néjan quiaj Xetate ajlüy wüx müüch leaw lamateots nüüch —aj.

<sup>24</sup> Wüx tanguayiw aag ayaj ajcüw algajpowüw (10) minipilan nej, quiaj tajcüyiw; ngo majneaj majawüw ajcüw alijpüw nechigayej quiaj.

<sup>25</sup> Condom Teat Jesús tapaj masaj nejiw, tapiüngüw:

—Lamejawan nguineay arangüw monajiüt tiül meáwan cambaj, cos arangüw apatüw atnej lamaneayiw nómban meáwan nipilan leaw ajlüyiw wüx; átan minatangüw nejiw ngo majiürüw lasta nejingüind.

<sup>26</sup> Pero tiül icona ngondom merangan atquiaj. Cos jane andiüm marang natang tiül icona netam mambeol icon.

<sup>27</sup> Aton sitiül aljane tiül icona andiüm marang más netam ajlüy, netam marang atnej nop nembeol.

<sup>28</sup> Atquiaj ajlüy wüx a Teat Naxey cos nej ngo miün mambeolaran, nej tiün mambeol meáwan nipilan, at mandeow mangüy asoet xeyay nipilan —aj nejiw.

*Teat Jesús tüüch majneaj ijpüw somb*  
(Mr. 10:46-52; Lc. 18:35-43)

<sup>29</sup> Wüx tawüw tiül cambaj Jericó xeyay nipilan almandüjpüw Teat Jesús.

<sup>30</sup> Aliw quiaj ijpūw monxey nesomb, alchetemoj mbeay tiūd. Wūx tanguiaiyw Teat Jesús namong, quiaj tepajūw, tapiūngūw:

—¡Teat Naxey, micual teat David, ijiūr xicon lasta! —awūw.

<sup>31</sup> Ajcūwa nipilan taliQUIAW nejiw mapalūw ombeayiw, naleaing nejiw tepajūw napac, tapiūngūw:

—¡Teat Naxey, micual teat David, ijiūr xicon lasta! —awūw.

<sup>32</sup> Quiaj lembet Teat Jesús, tapaj ajcūwa somb quiaj, tatūn manguiay nejiw, tapiūng:

—¿Cuane indiuMAN metūniūn wūx xim-basa? —aj nejiw.

<sup>33</sup> Quiaj tasajūw nej:

—Teat, sandiuMAN ram xeniūjcan —ajūw nej.

<sup>34</sup> Quiaj Teat Jesús tajmiūc omal omeaats majaw nejiw, tayac owix wūx oniūjcūw nejiw. Andūūban ajneajiw, nōmban rat oniūjcūw. Condom tambūw mandūpiw Teat Jesús aton.

## 21

*Teat Jesús tajmel tiül Jerusalén*

(Mr. 11:1-11; Lc. 19:28-40; Jn. 12:12-19)

<sup>1</sup> Wūx laliūc matūchiw Jerusalén, tapeayiw tiül cambaj Betfagé niūng ajlūy mitiūc Olivos. Quiaj Teat Jesús tüūch mamb ijpūw minipilan nej.

<sup>2</sup> Tasaj:

—Quiūran tiül aaga cambaj najlūy alareng niūng ajlūyūiūts. Quiaj apmexoman nop bur neōel, almaquiūb nop quicheech bur micual nej. Ichejtūn, iquiūjpan miūn.

<sup>3</sup> Sitiūl aljane aleaic masaj icon, isajan: “Teat Naxey apmetam nej, ndoj apmatsorich ic alinomb”, irajan —aj nejiw Teat Jesús.

<sup>4</sup> Atquiaj tajlūy para majlūy atnej tapiūng nop nendeac andeac Teat Dios, cos tapiūng:

<sup>5</sup> Isajan a cambaj Jerusalén:

“Ijawan, jogūy minatang nenajiūt icueajiūn, aliūc majaw icon,

Nej nōme nerangrangūy, najneaj omeaats; ajtep nop quicheech bur, micual nej nop bur nemalmal naūm”, aw.

<sup>6</sup> Quiaj tambūw minipilan nej. Tarangūw meáwan atnej lamasaj nejiw Teat Jesús.

<sup>7</sup> Taquiūjpūw miūn a bur maquiūb micual nej. Quiaj tapojchiw teopechiw a bur apixaw nejiw. Condom Teat Jesús tajtep chetem wūx.

<sup>8</sup> Meáwan nipilan, tapūjchiw tiūt apixaw nejiw tiül tiūd, altiūl tapoliw omal xiūl may-acūw tiūt tiül tiūd.

<sup>9</sup> Ajcūwa nipilan quiaj teapajūw napac, átan namong ombas, átan aliūc tamiūn, tengual mapiūngūw:

—¡Najneajay arang micual teat David! ¡Nangaj ajlūy aaga niūn, ūūch nej miūn Teat

Dios! ¡Najneajay ajlūy Teat Dios tiül cielo! —awūw.

<sup>10</sup> Condom wūx Teat Jesús tajmel tiül cambaj Jerusalén meáwan nipilan tendec-ndeacūw wūx, tatūniw manguiayiw:

—¿Jane aag ayaja? —awūw.

<sup>11</sup> Altiūl nipilan tapiūngūw:

—Aag ayaj aaga Jesús naw tiül cambaj Nazaret tiül Galilea. Nej nop nendeac andeac Teat Dios —awūw.

*Tawūn tiül a nadam nangaj iūm leaw ngo metam majlūy quiaj*

(Mr. 11:15-19; Lc. 19:45-48; Jn. 2:13-22)

<sup>12</sup> Condom Teat Jesús tajmel tiül aaga nadam nangaj iūm ocueaj Teat Dios. Quiaj tapots mawūn meáwan monūjpeay at mongalūy leaw aliw tiül. Aton tatech ninguiūn mimesiw mongowūūch tomiūn, at mibangūw monūb palom.

<sup>13</sup> Tasaj nejiw:

—Tiül Nangaj Mipoch Teat Dios apiūng: “Saniūng ajlūy niūng apmatajčūch orar”, aw Teat Dios. Pero icona lamerangan aaga nangaj iūm cam atnej niūng axotūy moneed —aj nejiw Teat Jesús.

<sup>14</sup> Tambūw majawūw nej tiül nadam nangaj iūm leaw nesomb at leaw necoex, nej tataag nejiw majneaj.

<sup>15</sup> Ajcūwa montangtang miteaats at mondūy wūx aaga poch tüūd Moisés tajcūyiw wūx tajawūw meáwan najneajay atēōcan leaw teamarang Teat Jesús; at wūx tanguiaiyw nguineay a namix monguich teapajiw tiül nadam nangaj iūm, cos teamapiūngūw: “¡Najneajay arang micual mixejchiūts David!” awūw.

<sup>16</sup> Tasajūw Teat Jesús:

—¿Quia ngo mengulay cuane teamapiūngūw wūx ique ajcūw ayaja? —ajūw nej.

Quiaj tasaj nejiw:

—Ajaj, teananguiay. ¿Jowa icona ngomeaag meteowan tiül Mipoch Teat Dios? niūng apiūng atcūy:

Xique lanayac teombeayiw namix monguich at namix nine aaga poch mapiūngūw najneajay irang —aj nejiw Teat Jesús.

<sup>17</sup> Condom taw quiaj tacueat nejiw, tamb andūy tiül cambaj Betania. Quiaj tacūl aaga ongwūiūts quiaj.

*Teat Jesús talic a toc*

(Mr. 11:12-14, 20-26)

<sup>18</sup> Wūx rat tiūt, quiaj tamb Teat Jesús andūy Jerusalén alinomb. Wūx aleamb tiül tiūd tind ūet.

<sup>19</sup> Tajaw noic owil toc almbeay tiūd. Quiaj tamb majaw, naleaing ngo maxom wūx nicuajind, áagan aōp majlūy wūx. Quiaj Teat Jesús tasaj aaga toc:

—¡Aleaw atogūy ūmb minūt, lango mejjiūr iōng nōmban! —aj.



Quiaj tawaag a toc.

<sup>20</sup> Wüx tajawüw aag ayaj minipilan nej mbayajow. Tasajüw Teat Jesús:

—¿Neol nguineay ajen awaag a toc quiaja? —ajüw.

<sup>21</sup> Quiaj tasaj nejiw Teat Jesús:

—Naleaing sasaj icon, sitiül naleaing iy-acan imeajtsan wüx xique, ngo mechi-wean imeajtsan, alndom merangan cuajan-tanej. Ngome áagan wüx toc quiaj alndom merangan, alndom mesajan aaga tiüc quiaj: “Iriow ningüy, quiür indüy tiül ndec”, merajan, y atquiaj apmajlüy.

<sup>22</sup> Meáwan leaw apmetüniün wüx apmeta-jcan orar, apmeajndiün sitiül ipiüangan tiül imeajtsan alndom majlüy —aj nejiw.

*Tasajüw Teat Jesús nguiane tayar mina-jiüt nej*

(Mr. 11:27-33; Lc. 20:1-8)

<sup>23</sup> Condom Teat Jesús tajmel tiül nadam nangaj iüm. Wüx tenguaial aquiaach nipilan, quiaj tambüw majawüw nej montang-tang miteaats at montangtang monajiüt tiül nipilan israel. Tatüniw nej manguiayiw, tapiüngüw:

—¿Nguiane iyar minajiüt merang aag ayaja? ¿Jane neech ique? —awüw.

<sup>24</sup> Quiaj tasaj nejiw Teat Jesús:

—At a xique aton sanatün nanguiay icon noic poch. Sitiül apmesajan xic, at a xique aton sanasaj icon nguiane nayar xenajiüt narang aag agüy.

<sup>25</sup> Jow a Juan, wüx tüüch yow nipilan, ¿Jane tasaj nej marang aag ayaja? ¿Diosa, ngwüy nipilana? —aj nejiw.

Quiaj tendeadndeadcüw nejeyéjan quiaj, tapiüngüw:

—Sitiül apmapiüngaats Teat Dios neech nej miün, quiaj apmasaj icoots: “¿Neol ngo meyariün andeac neje?” apmaw.

<sup>26</sup> Sitiül apmapiüngaats nipilan, pues imbolaats mandüyüüts cambaj, cos meáwan nipilan apiüngüw aaga Juan quiaj nop nendead andeac Teat Dios nej —awüw.

<sup>27</sup> Áag tasajüw Teat Jesús:

—Ngo najawan —awüw.

Quiaj tasaj nejiw Teat Jesús:

—At a xique aton ngo nasaj icon jane neech xic niün narang leaw teanarang cam —aj nejiw.

*Andeac andüy wüx ijpüw nacualaran*

<sup>28</sup> Aton tasaj nejiw:

—¿Cuane ajiür meyajcan aaga sanandead cama? Tajlüy nop naxey ajiür ijpüw micual nej. Condom tamb matüch niüng ajlüy nop, tasaj: “Nganüy xecual, quiür irang najiüt tiül micorrül xeüva”, aj.

<sup>29</sup> Quiaj tasaj nej micual nej: “Ngo mind”, aw. Ndoj leaad omeaats ngo majneaj arang, quiaj tamb marang najiüt.

<sup>30</sup> Condom aaga naxey tamb majaw alinop micual nej. Tasaj niüangan atnej landoj masaj a nop. Quiaj tapiüng micual nej: “Najneaj teat, sanamb”, aw. Ndoj ngo mamb.

<sup>31</sup> ¿Jow nganüy, ngün tiül nejiw tarang leaw andiüm miteatiw nejiw? —aj nejiw Teat Jesús.

Quiaj tapiüngüw:

—Aaga nasoi ombas —awüw.

Quiaj tasaj nejiw Teat Jesús:

—Naleaing sasaj icon, ajcüwa monsap mitomiün cambaj at monjüyjüy montaj apmajmeliw ombas tiül micambaj Teat Dios, ngo mat icona.

<sup>32</sup> Cos aaga Juan neech yow tiün masaj icon nguineay merangan najneaj, pero icona ngome teyariün andeac nej. Pero altiül ajcüwa monsap mitomiün cambaj, aton altiül monjüyjüy montaj tayariw nej andeac. Icona masey tejawan aag ayaj, ngo leaam imeajtsan mecueatiün irangan ngo majneaj, meyariün andeac nej.

*Andeac andüy wüx ngo majneaj mon-rang najiüt*

(Mr. 12:1-12; Lc. 20:9-19)

<sup>33</sup> Inguiayün alinoic leaw sanasaj icon: Tajlüy nop nateateran tapiür xeyay owil uva tiül micorrül nej, tarang najneaj owil corrül. Condom tarang noic pil tiüt tiül piedra niüng apmacuüücharan najün uva maw miyow nej. Aton tarang nop najal oleaj iüm nasoi torre niüng alndom macüleran cawüx majiürüch a corrül.

’Ndoj tayac teowix nipilan aaga corrül quiaj, cas tamb andüy alinoic iüt.

<sup>34</sup> Wüx lamatüch a nüt mapeederan najün uva, quiaj aaga neneay corrül tüüch mamb acas monbeol nej majawüw monrang najiüt, mayariw leaw netam müünd neneay iüt.

<sup>35</sup> Naleaing ajcüwa monrang najiüt tasapüw ajcüwa monbeol. Nop tatoliw, alinop nómban tambiyaw, alinop taloxiw.

<sup>36</sup> Aaga neneay iüt quiaj tandüy wüx müüch mamb alacas monbeol nej. Atanej tarangüch wüx ombasüw aton.

<sup>37</sup> Ndó’wüx quiaj tüüch mamb micual nej, cos tapiüng: “Netam mayariw andeac xecual”, aw.

<sup>38</sup> Naleaing ajcüwa monrang najiüt, wüx tajawüw micual neneay iüt, quiaj tapiüngüw nejüwan quiaj: “Nej aag ayaj apmeneay aaga corrül cam. Tabaats mambiyaats, ndoj icoots apmaneyüüts a iüt cam”, awüw.

<sup>39</sup> Quiaj tasapüw mawüniw tiül corrül, ndoj tambiyaw nómban.

<sup>40</sup> Jow, wüx apmapeay aaga naxey neneay iüt, ¿cuane apmarang wüx ombasüw ajcüwa monrang najiüt quiaja? —aj nejiw.

<sup>41</sup> Quiaj tapiüngüw:

—Aaga neneay iüt apmambiy ajcüwa ngo majneaj monrang najiüt quiaj, ngome apmajiür nejiw lasta. Condom aaga iüt apmayac teowix alinoic ajlüy monrang najiüt para alndom müjchiw nej leaw netam müünd wüx apmatüch a nüt mapejtich najün uva —awüw.

<sup>42</sup> Condom tasaj nejiw Teat Jesús:

—¿Neol, ngo meteowan nguineay apiüng tiül Mipoch Teat Dios? cos apiüng: Aaga piedra leaw taloxiw ninguiün monrang iüm, nğanüy laifün marang xeyay netam piedra tiül oxing iüm.

Teat Dios nerang aag ayaj, ajawaats aag ayaj xeyay najneaj, aw.

<sup>43</sup> Pares sasaj icon langome apmejlüyiün tiül micambaj Teat Dios. Apmüünd palpälwüx nipilan leaw apmarang atnej andiüm Teat Dios.

<sup>44</sup> Jane apmajmiüc wüx aaga piedra quiaj apmapol nej. Pero sitiül aaga piedra quiaj apmajmiüc wüx ombas aljane, nómban apmacuiaach nej tiüt —aj nejiw.

<sup>45</sup> Ajcüwa montangtang miteaats y fariseos, wüx tanguaiyw leaw teamdeac Teat Jesús, quiaj leaad omeajtsüw aag ayaj andüy wüx ombasüw nejiw amb apiüng.

<sup>46</sup> Quiájan tandiümüw masapüw nej; pero naleaing tímbojoj mandüiyw cambaj, cos meáwan nipilan apiüngüw Teat Jesús nop nej nendeac andeac Teat Dios.

## 22

### *Andeac andüy wüx nop nengoch owix*

<sup>1</sup> Teat Jesús tandüy wüx alinomb masaj nejiw acas poch ngome aleaing miün, tapiüng:

<sup>2</sup> —Tiül micambaj Teat Dios ajlüy atnej arang nop minatang nenajiüt, tayac nangos nüt wüx angoch owix micual nej.

<sup>3</sup> Tüüch mambüw mimonbeol nej majanüw leaw najpajüw niüng aaga nengoch owix. Naleaing ajcüwa najpajüw quiaj, ngo mandiümüw mambüw.

<sup>4</sup> Tandüy wüx müüch mamb alacas mimonbeol nej, tasaj: “Isajan ajcüwa landoj iün majpajüw: Landoj lajlüy leaw apmüeteran, lanambiy xeboy, at leaw naxipxip xenimal. Meáwan lajlüy, isajan miünüw niüng nengoch owix”, aj nejiw.

<sup>5</sup> Ajcüwa iün majpajüw quiaj, ngo mandiümüw. Nop tamb tiül corrül, alinop tamb menüjpeay.

<sup>6</sup> Alacas tasapüw ajcüwa monbeol, quiaj tapots matoliw, ndoj tambiyaw nómban.

<sup>7</sup> Wüx tanguaiy aag ayaj a minatang nenajiüt tajcüy xeyay, tüüch mambüw misoldados nej mandrojchiw ombas ajcüwa ngo majneaj nipilan quiaj, mambel micambajüw nejiw.

<sup>8</sup> Condom quiaj tasaj mimonbeol nej: “Meáwan lajlüy, pero ajcüwa najpajüw ngo metamüw nicuajind.

<sup>9</sup> Nğanüy quiüran meáwan tiül tiüüd, isajan nipilan leaw apmexoman ich miünüw ningüy niüng nengoch owix”, aj nejiw.

<sup>10</sup> Quiaj tambüw tiül tiüüd ajcüwa monbeol quiaj, tapots masojnongoj meáwan nipilan leaw axomüw, masey monrang najneaj, masey monrang ngo majneaj. Condom chipiow a nden niüng nengoch owix.

<sup>11</sup> Condom aaga minatang nenajiüt quiaj tajmel majaw meáwan monlüy quiaj. Quiaj tajaw altiül nop ngo masooig apix nej atnej netam majiür monamb niüng nengoch owix.

<sup>12</sup> Quiaj tasaj: “Amigo, ¿neol nguineay tejmel ningüy sitiül ngo mesooig leaw asoijquiw monamb niüng nengoch owixe?” aj. Aaga naxey quiaj lombójan, ngo mendeac.

<sup>13</sup> Quiaj aaga minatang nenajiüt tasaj mimonbeol nej: “Isapan, itsajcan oleaj owix, iloxiün ninguiün tiül ngo majneaj tiül pojniün niüng ajlüy monjiünts, niüng aporros oliüqueran”, aj nejiw.

<sup>14</sup> Cos xeyay najpajüw, pero napateay nariütüch —aw Teat Jesús.

*¿Netam majwan tomiün andüy tiül Roma?  
(Mr. 12:13-17; Lc. 20:20-26)*

<sup>15</sup> Condom tawüw quiaj ajcüwa fariseos, tapots mandeacndeacüw nguineay alndom masapüw Teat Jesús wüx leaw apmandeac.

<sup>16</sup> Quiaj tujchiw mamb minipilanüw nejiw at alacas minipilan Herodes masajüw Teat Jesús, tapiüngüw:

—Teat, sawawan ique xeyay indium mejaw manderac leaw naleaing, aton iquiaach leaw apiüng Teat Dios atnej netam. Ique ngo mepiüng wüx leaw andeac nipilan. Aton ique ngo meamb wüx mejaw jane netam jane ngwüy.

<sup>17</sup> Sandiüman nanguiaiüün leaw apmepiüng Teat. ¿Naleaingue netam majwan tomiün müünd a minatang nenajiüt nenüt César, ngwüy ngo metama? —ajüw nej.

<sup>18</sup> Naleaing Teat Jesús cos lamajaw neol tatüniw manguiayiw, quiaj tasaj nejiw:

—¡Icona monwüyay arang najneaj! ¿Neol tendiüman mesapan xic wüx leawa sanapiünga?

<sup>19</sup> Chiün najaw aaga tomiün leaw apmüünd minatang nenajiüt —aj nejiw.

Quiaj tujchiw nej majaw noic tomiün nasoc denario.

<sup>20</sup> Almajaw, quiaj tasaj nejiw Teat Jesús:

—¿Jane mitey, jane minüt alwüx a tomiün cama? —aj nejiw.

<sup>21</sup> Quiaj tasajüw nej:

—César —awüw.

Quiaj tasaj nejiw Teat Jesús:

—Ijchan a César leaw ocueaj nej, at aton ijchan Teat Dios leaw ocueaj nej —aj nejiv.

<sup>22</sup> Wüx tanguiayiw aag ayaj mbayajow manguiayiw, acueatiwan nej, tawüw quiaj.

*Wüx apmapacaran tiül mondeow*

(Mr. 12:18-27; Lc. 20:27-40)

<sup>23</sup> Tiülan aaga nüt quiaj tapeayiw majawüw Teat Jesús acas saduceos. Ajcüw ayaj apiüngüw mondeow langome apmapacüw alinomb. Tatüniw manguiayiw:

<sup>24</sup> —Maestro, teat Moisés apiüng sitiül nop naxey mandeow, nganaw majiürüw micualüw nejiv, michiig nej netam mengoch owix aweaag aaga lemben omal najtaj quiaj, majiürüw micualüw nejiv atnej majlüy micual micoj nej.

<sup>25</sup> Atquiaj tajlüy tiül xicona, cos tajlüy ayaíw monxey nop necual nejiv. Aaga natang tiül nacojaran tengoch owix, ndoj tandeow nganaw majiürüw micualüw nejiv. Condom michiig nej tengoch owix aweaag aaga lemben omal quiaj.

<sup>26</sup> Atanej tajlüy wüx michiig nej, tandeow aton. Condom átan amb alinop michiig nej. Atquiaj tengoch owixaw maquiüjpüw aaga najtaj meáwan ajcüwa ayaíw monxey.

<sup>27</sup> Ndóiwüx, nejay a najtaj tandeow.

<sup>28</sup> Jow alinoic nüt wüx apmapacaran tiül mondeow, ¿ngün tiül nejiv ajcüwa ayaíw monxey apmaquiüjpüw aaga najtaj quiaja, cos meáwan tengoch owixaw maquiüjpüw? —ajüw nej.

<sup>29</sup> Quiaj tasaj nejiv Teat Jesús:

—iNgo mejawan cuane teamendeacan quiaj, cos ngo mejawan cuane ajlüy tiül Mipoch Teat Dios; aton ngo mejawan cuane alndom marang Teat Dios!

<sup>30</sup> Cos wüx apmapacaran alinomb ngome apmequiüybajey, cos apmajlüyneran nóiquian atnej ángeles ocueaj Teat Dios najlüyiw tiül cielo.

<sup>31</sup> Nganüy wüx aaga ipiüangan apacaran tiül mondeow, ¿neol, nómban ngomeaag me-teowana nguineay apiüng Teat Dios? Cos apiüng:

<sup>32</sup> “Xique Midios Abraham, Midios Isaac, Midios Jacob, ajcüw tajlüyiw tanomb”, aw. Cos Teat Dios ngome Midiosüw mondeow, nej Midiosüw leaw almapac —aj nejiv Teat Jesús.

<sup>33</sup> Nipilan wüx tanguiayiw aag ayaj mbayajow manguiayiw aquiaach.

*¿Ngün tiül a poch tüünd Moisés alwüx atam?*

(Mr. 12:28-34)

<sup>34</sup> Wüx ajcüwa fariseos tanguiayiw nguineay Teat Jesús lamüüch mapalüw ombeayiw a saduceos, quiaj canchiütoj.

<sup>35</sup> Condom nop tiül nejiv, nop nendüy wüx minawiig Moisés, tatün manguiay Teat Jesús majaw cuane apmapiüng, tasaj:

<sup>36</sup> —Maestro, ¿ngün tiül aaga poch tüünd Moisés más xeyay netam marangüche? —aj.

<sup>37</sup> Quiaj tasaj nej Teat Jesús:

—“Netam mendüüm Teat Dios con imeaats, con miespíritu, con mifis aton.”

<sup>38</sup> Aag ayaj alwüx atam, ombas netam marangüch.

<sup>39</sup> Alinoic andüüban landiüm atnej, apiüng: “Ijiür lasta jangantanej atnej ijiürüy lasta iquiáyan quiaj”.

<sup>40</sup> Naw wüx aaga ijquiw poch andeac Teat Dios quiaj, ajlüy meáwan poch leawa Moisés tayac, at leaw taquiajchiv mondeac andeac Teat Dios —aj nej Teat Jesús.

*¿Jane mixeech a Cristo?*

(Mr. 12:35-37; Lc. 20:41-44)

<sup>41</sup> Wüxan canchiüjow quiaj a fariseos, quiaj tatün manguiay nejiv Teat Jesús.

<sup>42</sup> Tapiüng:

—¿Cuane ipiüangan wüx aaga Cristo, aag lapiürang aliüca? ¿Jane mixeech nej? —aj nejiv.

Quiaj tapiüngüw:

—David —awüw.

<sup>43</sup> Condom Teat Jesús tasaj nejiv:

—Neol, nguineay a David tasaj: “Teat Naxey”, maj, wüx tandeac leaw tasaj nej Nangaj Espiritu ocueaj Teat Dios, cos tapiüng:

<sup>44</sup> Teat Dios tasaj a Teat Naxey, aaga Cristo: “Cheter ningüy amb wüx xeác,

leaw ndoj nayac moncüy majaw ic maquejliw micosüw nejiv tímbar”, aw.

<sup>45</sup> ¿Nguineay alndom mapiürang David mixeech aaga Cristo, sitiül nejay David tasaj: “Teat Naxey”, maja? —aj nejiv Teat Jesús.

<sup>46</sup> Quiaj nejingüind ngondom mangoch nej andeac. Ajan wüx aaga nüt quiaj nejingüind ngome tandüy wüx matün manguiay nej nicuajind.

## 23

*Tandeac wüx fariseos y wüx mondüy wüx a poch tüünd Moisés*

(Mr. 12:38-40; Lc. 11:37-54; 20:45-47)

<sup>1</sup> Condom Teat Jesús tasaj minipilan nej, at altigüy nipilan aton, tapiüng:

<sup>2</sup> —Ajcüwa mondüy wüx aaga poch tüünd Moisés, at ajcüwa fariseos chetetoj niüng chetet a Moisés maquiajchiv wüx leawa nej tapiüng.

<sup>3</sup> Icona netam meyarüün leaw aquiajchiv, netam merangan leaw apiüngüw; pero naleaing, nde merangan atnej arangüw nejiv, cos nejiv aquiajchiv najneaj, pero ngo marangüw atnej.

<sup>4</sup> Nejiv üjchiv nipilan mamalüw leaw xeyay naüm ngondom mamalüw; pero nejiv ngo mandüümüw marrejquiw aag ayaj masey naag nots micual owixaw.

<sup>5</sup> Meáwan leaw arangüw, arangüwan majaw nejiw nipilan. Xeyay andiümw maodeliw teombas omalüw at wüx owixaw nejiw aaga nine iquial acas Mipoch Teat Dios atnej ajlüyay marangüw. Naleaing nejiw xowüy andiümw mayacüw leaw nadamd. Aton apixaw nejiw leaw asoijquiw ajiür najaljal misoots nej ngo matnej leaw asoijquiw meáwan nipilan.

<sup>6</sup> Aton wüx ajlüy monet xowüy ayambüw chetemoj niüng ajlüy natangtang monajiüt. Átan ayambüw chetemoj niüng alndom malombaranüw tiül sinagogas.

<sup>7</sup> Aton xowüy andiümw matepeay nejiw nipilan tiül plas, xowüy andiümw masoiquiw Rabí, Rabí, majowiw.

<sup>8</sup> Icona nde meyamyamban mesoiquiün Rabí, cos meáwan icona ijlüyüin atnej nerchigayon, nercojyayon itowtowiün ijlüyüin. Áagan nop nequiaach icon ajlüy, aag ayaj a Cristo leaw lapiürang aliüc.

<sup>9</sup> Nde mepiüangan wüx nejingüind ningüy wüx a iüt cam: miteatiüts, merawan, cos áagan Teat Dios najlüy tiül cielo alndom mepiüangan wüx miteatiüts.

<sup>10</sup> Nde mendiüman mesoiquiün minatang icon, cos áagan a Cristo leaw lapiürang aliüc, nejay minatangan.

<sup>11</sup> Jane ayamb nguineay mambeol jangantanej tiül icona, aag ayaj ajlüy atnej natang tiül icona.

<sup>12</sup> Cos jane ayaag nej natang, apmüünd marang nop ngo membeat nicuajind; aton jane ayaag nej ngo membeat, nej apmarang natang.

<sup>13</sup> ¡Pobre icona, mondüy wüx aaga poch tüünd Moisés, at aton icona fariseos, ndeac mbeay! ¿Neol ipalan a nipilan, ngo meajchiün majmeliw tiül micambaj Teat Diosa? Icona ngo mendiüman mejlüyiün tiül, aton ngo meajchiün majmeliw leaw andiümw majmeliw.

<sup>14</sup> ¡Pobre icona, mondüy wüx aaga poch tüünd Moisés, at icona fariseos, ndeac mbeay! Cos inoitiün aniüngüw monlemben omal montaj at meáwan almajiürüw; ndoj itajcan orar xeyay para majaw icon nipilan, nguineay alndom mexotan irangan ngo majneaj, aag ayaj imbeayiüman. Cos temerangan atquiaj, apmajmel xeyay isoetiün.

<sup>15</sup> ¡Pobre icona, mondüy wüx a poch tüünd Moisés, at icona fariseos, ndeac mbeay! Cos ijüyüyiün nguajantanej wüx iüt, aton tiül ndec, meyamban nipilan mandüjpiw wüx nguineay irangan. Wüx lamandüjpiw leaw irangan, quiaj lameajchiün marangüw xeyay ngo majneaj, alwüx quiriw ngo matnej leaw irangan.

<sup>16</sup> ¡Pobre icona, at icon somb montiib mitiüd alinop! Neol ipiüangan: “Sitiül aljane

mapaj wüx minüt aaga nadam nangaj iüm cam, aag ayaj ngo membeat; pero jane apmapaj minüt a oro najlüy tiül nadam nangaj iüm, aag ayaj mbich nembeat, netam marang leaw tapiüng”, merawan.

<sup>17</sup> ¡Icona nerchachiün, nersomban! ¿Neol, ngün alwüx atam, aaga oro, ngwüy nadam nangaj iüma, aaga neech marang nangaj a oro?

<sup>18</sup> Aton ipiüangan: “Jangantanej leaw apmapaj minüt aaga artül aag ayaj ngo membeat; pero jane apmapaj minüt nichech najmel wüx artül, aag ayaj mbich nembeat, netam marang leaw tapiüng”, irawan.

<sup>19</sup> ¡Icona nerchachiün, nersomban! ¿Ngün alwüx atama, aaga nichech, ngwüy aaga artül leawa neech mangaj aaga nicheche?

<sup>20</sup> Leaw apaj minüt artül, aton apaj minüt meáwan leaw najmel wüx.

<sup>21</sup> At leaw apaj minüt a nadam nangaj iüm, ngome áagan minüt nadam nangaj iüm quiaj apaj, at apaj Teat Dios aton cos nej acül quiaj.

<sup>22</sup> Aton jane apaj minüt cielo, apaj minüt niüng chetej Teat Dios. Ngome áagan aton apaj minüt Teat Dios cos nej quiaj chetej.

<sup>23</sup> ¡Pobre icona, mondüy wüx a poch tüünd Moisés, at icona fariseos, ndeac mbeay! Icona iyacan diezmo naw tiül ajcüwa najmboc angan soex nenüt menta, inix, comino; pero naleaing icueatiünan ngo merangan leaw alwüx atam naw tiül aaga poch tüünd Moisés. Aag ayaj, merangan leaw najneaj, netam mejüuran lasta jangantanej, aton netam meyacan imeajtsan wüx Teat Dios. Ajcüw ayaj xeyay netam meyacan imeajtsan wüx merangan. Aton ngondom mecueatiün meyacan midiezmojan.

<sup>24</sup> ¡Icona at icon somb montiib mitiüd alinop, cos ilalan leaw apmenganeowan ngana melajan tiül xix, pero ngo meyajcan sitiül melajan tiül nop camello!

<sup>25</sup> ¡Pobre icona mondüy wüx poch tüünd a Moisés, at icona fariseos, ndeac mbeay! Ijantsan ombas a tas, at a polat, pero ngo meyamban imeajtsan nguineay texoman leaw apmeyacan tiül, cos meáwan ixomx-ománan wüx inejtiün. Aton ngondom mersapayon wüx mecueatiün merangan ngo majneaj.

<sup>26</sup> ¡Icona fariseos somb! Netam ombas mejantsan amb tiül a tas at a polat, quiaj mbich apmerixix amb wüx ombasüw.

<sup>27</sup> ¡Pobre icona mondüy wüx poch tüünd a Moisés, at icona fariseos, ndeac mbeay! Cos ijlüyüin at icon mioxiüt mondeow. Ajüic rajnüy ombas; pero amb tiül chipiow olaats, najmboc.

<sup>28</sup> Atquiaj ijlüyüin icona aton, cos ajüic najneaj irangan, pero naleaing irangan majaw icon nipilan. Tiülan icona xeyay

ngo majneaj amb wux imeajtsan, at iran-grangayon wux merangan cuajantanej ngo majneaj.

<sup>29</sup> ¡Pobre icona mondüy wux poch tüünd Moisés, at icona fariseos, ndeac mbeay! Neol a icona itajcan majneaj mioxiütüw ajcüwa mondeac andeac Teat Dios. At in-choman irangan mimhaj nej ajcüwa nine iüm tarangüch wux oxiüt.

<sup>30</sup> Ndoj ipiüangan: “Jondot sitiül xicona sal-najlüyiün wux aaga nüt apacüw xexejchiün, nómnan ngo naquiüjpan wux, wux tambiyaw mondeac andeac Teat Dios”, irawan.

<sup>31</sup> Iconan quiaj tengual mejüiquichan naleaing icona micual icon monbiy mondeac andeac Teat Dios.

<sup>32</sup> ¡Nganüy neol jane nepal icon ngo merangan atnej tarangüw mixejchiün!

<sup>33</sup> ¡At icon ndiüc, micual icon ndiüc! ¿Nguineay apmeriowan wux, ngo meamban tiül biümba?

<sup>34</sup> Nganüy sanüüch miün xeyay mondeac andeac Teat Dios, at mondüy, at monquiaach wux xique. Icona apmem-biyan, altiül apmeyacan wux cruz, altiül apmewüjchiün tiül nangaj iüm. Aton apmeyamban ombasüw tiül tiül cambaj.

<sup>35</sup> Quiaj apmejiüran xeyay isoetiün, meáwan quiej leaw tajüch tiüt naw wux tambiyeran Abel, nop nerang najneaj, ndoj wux a Zacarías micual Berequías, áag tembiyan tiül asapüy nadam nangaj iüm maquiüüb artül.

<sup>36</sup> Naleaing sasaj icon, meáwan aag ayaj apmamb wux imbasan.

*Teat Jesús tajiünts majaw moncüü Jerusalén*

(Lc. 13:34-35)

<sup>37</sup> ¡Jerusalén, monaw tiül cambaj Jerusalén! ¿Neol tengual membiymbiyan ajcüwa mondeac andeac Teat Diosa? ¿Neol teloxiün leawa Teat Dios üüch miün masajüw icon wux neje? ¡Xique xeyay tandiümas naxejneng icon atnej arang noic quit maxejneng micual nej teombas miolümb nej; pero naleaing icona ngo mendüüman!

<sup>38</sup> Nganüy apmejawan nguineay apmacueat aaga nadam nangaj iüm icueajiün.

<sup>39</sup> Cos sasaj icon langome apmexoman mejawan xic. Apmejawan xic alinomb wux apmatüch a nüt, quiaj apmepiüangan: “Najneajay ajlüy aaga üüch nej miün Teat Dios”, apmerawan —aj nejw Teat Jesús.

## 24

*Wux apjarriüm a nadam nangaj iüm*  
(Mr. 13:1-2; Lc. 21:5-6)

<sup>1</sup> Wux Teat Jesús taw tiül a nadam nangaj iüm laámb apmamb, quiaj minipilan nej tapots masajsajüw nej wux najneajay ajlüy

aaga nadam nangaj iüm maquiüüb ajcüwa nadamdand iüm andüüch aweaag nadam nangaj iüm.

<sup>2</sup> Quiaj tasaj nejw Teat Jesús:

—¿Ijawan meáwan aag ayaj? Naleaing sasaj icon, alinoic nüt ngome apmajlüy noic piedra mesapüy maquiüüb alinoic, cos meáwan apmümb majarricharan —aj nejw.

*Wux laliüc ndrom ombas a iüt cam*

(Mr. 13:3-23; Lc. 21:7-24; 17:22-24)

<sup>3</sup> Condom tambüw andüyiw wux mitiüc Olivos. Wux Teat Jesús alchetem, quiaj tattüniw manguiayiw nej minipilan nej wux tajlüyiw nejwian quiaj, tasajüw:

—Teat, sandiüman mesaj xicon, ¿ngow apmajlüy meáwan aag ipiüng quiaja? ¿Cuane apmajüic majaraw wux iliüc alinomb, wux apmümb minüt a iüt cama? —ajw nej.

<sup>4</sup> Quiaj tasaj nejw Teat Jesús:

—Ijawan, nde mawaiich icon nejingüind.

<sup>5</sup> Cos xeyay nipilan aliücüw miün, apmayariw xenüt, apmapiüngüw: “Xique aaga Cristo”, apmawüw; quiaj apmawajchaw xeyay nipilan.

<sup>6</sup> Aton apmenguiayüün apmaderac wux montsoj mapiüngüw lajlüy, tengwüy laliüc majlüy. Masey, nde mbayameron, cos atquiaj netam majlüy; pero nganaw matüch mümb minüt a iüt cam.

<sup>7</sup> Cos monaw tiül noic iüt apmembiyayej maquiüjpw monaw tiül alinoic iüt, at monaw tiül noic cambaj maquiüüb monaw alinoic cambaj. Aton apmajlüy lop, monandeow, at aton apmajlang nadamdand ateam tiül palpálwüch iüt.

<sup>8</sup> Meáwan aag ayaj les tamelich ajlüy xeyay ngo majneaj, xeyay necoy.

<sup>9</sup> ¡Apmayacüw icon teowixaw monajiüt müjchiw icon memongochiün necoy, aton apmembiyaranan. Apmajcüyiw majawüw icon meáwan nipilan ajcan iyariün sandeac.

<sup>10</sup> Wux aaga nüt quiaj xeyay leaw tapiüngüw ayariw sandeac apmacueatiw. Altiül apmajcüyiw majawüw icon, altiül apmayacüw icon teowixaw monajiüt.

<sup>11</sup> Apmajlüy xeyay monwaiich. Apmapiüngüw mondeac andeac Teat Dios nejw. Quiaj apmawajchaw xeyay nipilan.

<sup>12</sup> Cos apmajlüy xeyay ngo majneaj, langome apmajiürüw lasta alinop.

<sup>13</sup> Jane ngo macueat, pero apmafüc wux meáwan aag ayaj leawa ümb mamong, Teat Dios apmawün nej wux.

<sup>14</sup> Aaga najneaj nanderac cam leaw apiüng wux nguineay Teat Dios andiüm meáwan nipilan majlüyiw tiül micambaj nej, netam manguiayiw meáwan palpálwüch nipilan wux iüt. Quiaj ndoj apmümb minüt aaga iüt cam.

<sup>15</sup> Tanomb teat Daniel, nop nendeac andeac Teat Dios, tarang wux nawüig, tapiüng

wüx aaga xeyay ngo majneaj leaw apmüüch ndrom ombas cambaj. Wüx apmejawan aag ayaj lajlüy lapeay tiül aaga nadam nangaj iüm —jane teamateow ich mayamb omeaats majaw cuane wüx apiüng.

<sup>16</sup> Quiaj leaw altiül Judea ich mecuiür andüy tiül tiüc.

<sup>17</sup> Sitiül aaga nüt quiaj aljane ngome altiül iüm, nde majmel mawün leaw ajiür.

<sup>18</sup> Aton sitiül aljane altiül corrül, aton nde mandilil andüy aniüng nej maxaing apix nej.

<sup>19</sup> ¡Pobre nejiw ajcüwa müm montaj leaw alteomeajtsüw micualüw nejiw, at leawa tengual achech micualüw nejiw wüx aaga nüt quiaj!

<sup>20</sup> Itüniün ocueaj Teat Dios nde müüch icon mercuiüran wüx ajlüy naquind, tengwüy wüx nüt axodaran.

<sup>21</sup> Cos apmamongocharan xeyay ngo majneaj, leaw nómban ngomeaag ajaraw nde wüx Teat Dios tarang aaga iüt, aton ngome apmajaraw alinomb.

<sup>22</sup> Wüx aaga nüt quiaj, sitiül Teat Dios apmüüch majlüy aaga ngo majneaj quiaj xeyay nüt, nejingüind ngondom mapac. Naleaing Teat Dios apmandondoch najen aag nüt quiaj, cos xeyay ajiür lasta minipilan nej leawa lamarriiüd.

<sup>23</sup> 'Sitiül aljane apmasaj icon: "Jogüy a Cristo", maw, tengwüy mapiüng: "Joyaj a Cristo", maw, nde meyariün andeac nej.

<sup>24</sup> Cos aliücüw xeyay monwaiich, altiül apmapiüngüw Cristo nejiw, altiül apmapiüngüw mondeac andeac Teat Dios nejiw. Apmarangüw ateócan mambaijchaw nipilan, apmawajchaw xenipilan leaw lanarriiüd jondot alndom.

<sup>25</sup> Nganüy lanasaj icon aag ayaj wüxan nganaw majlüy.

<sup>26</sup> Atquiaj sitiül apmasajüw icon: "Ijawan, alningüiün aaga Cristo tiül wajchiüc", majüw icon, nde meamban mejawan. Tengwüy apmasajüw icon: "Joüün altiül iüm", majüw icon, nde meyariün andeacüw nejiw.

<sup>27</sup> Cos Teat Naxey, wüx aliüc aag ayaj apmajlüy najen, atnej noic ajlip nómban alipich naw nonüt andüy noleat.

<sup>28</sup> Nquiajantanej nüäng ajlüy mondeow, quiaj alponngom potwit.

#### *Wüx apmandilil Teat Naxey*

(Mr. 13:24-37; Lc. 21:25-33; 17:26-30, 34-36)

<sup>29</sup> 'Wüx landoj ajlüy aaga xeyay ngo majneaj quiaj, nüt lango merraj, at a caaw aton; at ocas apmajmiüc imiün tiül cielo. Meáwan leaw ajlüy cawüx apmajüyjüy apmelanglangüy.

<sup>30</sup> Condom apmajaraw tiül cielo aliüc a Teat Naxey. Quiaj apmajüüntsüw meáwan

nipilan wüx a iüt cam; apmajawüw a Teat Naxey laliüc amb tiül oic xeyay najneajy ajlüy, nelitlit. Nop nej minatang nenajiüt.

<sup>31</sup> Quiaj apmasaj ángeles maindeaw trompet napac, masojnongoj meáwan minipilan nej wüx iüt, imiünüw nonüt, noleat, calüy, cawac.

<sup>32</sup> 'Ijawan nguineay arang a toc: Cos wüx latsatsaw mipüüg nej mayac aóp, quiaj ajüic laliüc matüch a nüt merraar.

<sup>33</sup> At icona aton wüx apmejawan lajlüy aag lanasaj icon quiaj, quiaj netam mejawan laliüc matüch a nüt mapeay aaga nüünd miün.

<sup>34</sup> Naleaing sasaj icon meáwan aag ayaj apmajlüy wüxan aliün majlüyiw ajcüwa nipilan quiaj.

<sup>35</sup> Masey a iüt, at a cielo apndrom ombasüw, xepoch nómban ngo ndrom ombas.

<sup>36</sup> 'Wüx aaga nüt, at wüx aaga ores wüx apmajlüy aag ayaj, nejingüind ngo majaw. Ángeles tiül cielo ngo majawüw aton. Néjan quiaj Xeteat Dios ajaw.

<sup>37</sup> 'Wüx aliüc Teat Naxey, apmajlüy atnej tajlüy tanomb wüx almapac Noé.

<sup>38</sup> Cos atnej tajlüy wüx nganaw ndilimeay a iüt cam tiül yow, nipilan ngo mapiüngüw wüx, netiw, nanganeowüw, angoch owixaw atnej mbójan marangüw. Atquiaj tatüch a nüt majmel tiül nadam müx a Noé.

<sup>39</sup> Nejiw ngo meteotsüw nicuajind. Wüx tajngot a napac ijchiür, tajar a yow anmambich mandrooch nej ombasüw meáwan nipilan. Atquiaj apmajlüy aton wüx aliüc Teat Naxey.

<sup>40</sup> Wüx aaga nüt quiaj apmajlüy ijpüw monxey tengual arangüw najiüt tiül corrül. Nop apxaijnguiam, alinop apmacülan.

<sup>41</sup> Aton apmajlüy ijpüw montaj teanchiülüw, nop apxaijnguiam, alinop apmacülan.

<sup>42</sup> 'Icona netam mecüliün ipacüjchiün iniüjcan cos ngo mejawan cojores aliüc a Teat Naxey.

<sup>43</sup> 'Ijawan, jondot nop nateateran majaw cuame ores apmajmel aniüng nej need, ngome apmameay, ngo müüch majmel tiül nden maneed.

<sup>44</sup> Atquiaj icona aton netam mecüliün nej, cos Teat Naxey apmandilil wüx ngome teateatsaran.

#### *Nop nemebol nerang najneaj, alinop nerang ngo majneaj*

(Lc. 12:41-48)

<sup>45</sup> 'Tajlüy nop neneay najiüt tajiür nop nemebol nej, xeyay axom omeaats, najneaj arang. Aaga neneay najiüt tayac teowix nemebol nej aniüng nej majaw nej ocueaj, mawiül monlüy quiaj, müüch nejiw leaw netam; ndoj tamb.

<sup>46</sup> Najneajay apmajlÿy aaga nembeol quiaj wÿx apmandilil aaga neneay najiÿt sitiÿl apmaxom nej teamarang meáwan leaw lamasaj.

<sup>47</sup> Naleaing sasaj icon, aaga neneay najiÿt quiaj ndóiwÿx apmayac teowix aaga nembeol quiaj meáwan leaw almajiÿr majaw nej ocueaj.

<sup>48</sup> Nganÿy sitiÿl ndot aaga nembeol quiaj marang ngo majneaj, mapiÿng neneay najiÿt nequiy apmapeay;

<sup>49</sup> ndoj tapots mawÿÿch aqiuÿjpÿw nej, at ùetùetan, angÿngÿnan maquiiÿb mongÿn.

<sup>50</sup> Ndot tealeámban aag ayaj, quiaj apeay aaga neneay najiÿt wÿx nÿt ngo leaam omeaats a nembeol macÿl nej.

<sup>51</sup> Quiaj apmÿÿch majwÿch mamongoch xeyay necoy, ndoj apmayac maquiiÿb tiÿl ajcÿwa monrang ngo majneaj, niÿng ajlÿy monjiÿnts niÿng apmeporros olùiqueran.

## 25

### *Tandeac andÿy wÿx gajpowÿw monÿx*

<sup>1</sup> Micambaj Teat Dios najlÿy tiÿl cielo apmajlÿy atnej tajlÿy wÿx gajpowÿw monÿx leaw tambÿw mangochiw nengoch owix, ajoyiw candil.

<sup>2</sup> Acoquiaw nejw ajcÿwa monÿx quiaj leaad omeajtsÿw majoyiw leaw netam, alacoquiaw ngo leaam omeajtsÿw nicuajind.

<sup>3</sup> Nejw masey ajoyiw candil, naleaing ngo majoyiw aceite.

<sup>4</sup> Pero ajcÿw leaw leaad omeajtsÿw leaw netam, ngome áagan candil ajoyiw, aton tajoyiw algtegy aceite amb tiÿl limet.

<sup>5</sup> Cos nengoch owix tequiy mapeay, quiaj tind ameyiw, ndoj tameayiw.

<sup>6</sup> Wÿx tatÿch pinawan ongwiiÿts, quiaj tanguaiyw noic nanderac, tapiÿng: “¡Jogÿy lapeay a nengoch owix; witiÿron ingochiÿn!” aw.

<sup>7</sup> Quiaj witiÿtoaj a monÿx macheniw micandileaw nejw.

<sup>8</sup> Ajcÿwa ngo majoyiw leaw netam tasajw aqiuÿjpÿw nejw: “¡Jchan xicon noic pite miaceitejan cos teapiniow xecandilean”, ajÿw.

<sup>9</sup> Ajcÿwa monÿx leawa tajoyiw leaw netam tapiÿngÿw: “Ngwÿy cos condom langome apmatÿch xicueajiÿn, aton ngome apmatÿch icon. Neol ngo meriÿmban niÿng ajnap mengalan”, awÿw.

<sup>10</sup> Ajcÿwa acoquiaw monÿx leaw ngo majoyiw leaw netam, wÿx laambÿw angalÿw aceite, quiaj apeay a nengoch owix. Leaw monÿx tajoyiw leaw netam tajmeliw tiÿl nden maquiiÿjpÿw nengoch owix. Quiaj tapalÿch ombeay nden.

<sup>11</sup> Condom quiaj tapeayiw ajcÿw alacoquiaw monÿx, tapiÿngÿw: “¡Teat, teat, ileaig ombeay nden najmeliÿn!” awÿw.

<sup>12</sup> Quiaj tasoiquiw: “Naleaing sapiÿng, ngo najaw jane icon”, ajowiw —aw Teat Jesús.

<sup>13</sup> Condom Teat Jesús tasaj nejw:

—Icona netam mecÿliÿn ipacÿjchiÿn iniÿjcan, cos ngo mejawan ngÿn nÿt, cuame ores apmandilil a Teat Naxey.

### *Teat Jesús tandeac wÿx tomiÿn*

<sup>14</sup> Micambaj Teat Dios ajlÿy atnej tarang nop naxey, cos wÿx laliÿc mamb tiÿl alanoic iÿt, quiaj tapaj mimonbeol nej, tayac teowixaw mitomiÿn nej.

<sup>15</sup> Nop tiÿl nejw tÿÿch acoquiaw mil tomiÿn, alinop ijquiaw mil, at alinop noic mil. Tÿÿch nejw anopnopoj leaw ajaw alndom maxaing tiÿt marangayej najiÿt naw wÿx aaga tomiÿn quiaj. Condom tamb.

<sup>16</sup> Aaga nembeol leaw tÿÿnd acoquiaw mil tomiÿn tangal cuajantanej manÿÿb. Quiaj taxom wÿx alacoquiaw mil.

<sup>17</sup> Atanquaij tarang alinop leaw tÿÿnd ijquiaw mil; taxom wÿx alijquiaw mil.

<sup>18</sup> Pero nganÿy aaga leaw tÿÿnd noic mil tamb maxot, taood iÿt mamiÿt tiÿl.

<sup>19</sup> Lamajiÿr xeyay nÿt, quiaj tapeay aaga naxey majaw ngomonbeol nej, mateow a tomiÿn majaw nguitow taxomÿw wÿx.

<sup>20</sup> Quiaj tajngot aaga nÿÿnd acoquiaw mil tomiÿn, ajamiÿn wÿx alacoquiaw leaw axom wÿx, tapiÿng: “Teaach xic acoquiaw mil tomiÿn; jogÿy alacoquiaw leawa taxomas wÿx”, aw.

<sup>21</sup> Quiaj tasaj nej aaga naxey: “Najneajay terang teat, cos masey napateay sÿÿch ic, ique teyamb nguineay mexom wÿx alquiriw. Nganÿy sanÿÿch ic mejiÿr nadam najiÿt. Ich mapac imeaats, apmecÿl ningÿy niÿng sacÿl”, aj nej.

<sup>22</sup> Condom tajngot alinop leaw tÿÿnd ijquiaw mil tomiÿn, tapiÿng: “Teat, teaach xic ijquiaw mil. Nganÿy jogÿy mitomiÿn, alwÿx alijquiaw leaw taxomas wÿx”, aw.

<sup>23</sup> Quiaj tasaj nej aaga neneay najiÿt: “Najneajay terang teat, cos masey napateay sÿÿch ic, ique teyamb nguineay mexom wÿx alquiriw. Nganÿy sanÿÿch ic mejiÿr nadam najiÿt. Ich mapac imeaats, apmecÿl ningÿy niÿng sacÿl”, aj nej.

<sup>24</sup> Wÿx tajngot alinop leaw tÿÿnd noic mil, quiaj tapiÿng: “Teat, xique sapiÿng xowÿy apmejcy. Sajaw ique ixang omeaats corrÿl masey ngome iquiy ipiÿr, aton iwit masey ngome iquiy itendey.

<sup>25</sup> Áag timbolas, quiaj tambas naxot mitomiÿn tiÿl loliÿt. Nganÿy jogÿy mitomiÿn, aliÿn majlÿy leaw iney”, aw.

<sup>26</sup> Quiaj tasaj nej aaga neneay najiÿt: “Ique ngo majneaj irang, neranch. Sitiÿl ipiÿng saxaing masey ngome xique sapiÿr, at sawit leaw ngome xique satendey;

<sup>27</sup> neol ngo meajchiw xetomiün leaw ijaw alndom maxomüw wüx alquiriw, condom wüx sanapeay sanayar xetomiün alwüx quiriw”, aj nej.

<sup>28</sup> Condom quiaj tapiüng: “Inojtiün ocueaj a noic mil tomiün quiaj, ijchan leaw ajiür gajpowüw mil.

<sup>29</sup> Cos leaw almajiür apmüünd, ndoj apmajiür xeyay; pero leaw ngo majiür apmajnot ocueaj aaga quiriw leaw ajiür.

<sup>30</sup> Nganüy aaga neánch quiaj, iloxiün ningüün tiül pojniün, niüng apmajiünts, apmenchicnchic olüic”, aj nejw a neneay najiüt.

#### *Wüx apmajaraw wüx asoeteran*

<sup>31</sup> Wüx apmandilil a Teat Naxey, xeyay najneajay apmajlüy; ancalitlit, ayeyiw nej tiüt meáwan miángeles nej. Quiaj apchetem wüx najneajay niüng chetej minatang nena-jiüt.

<sup>32</sup> Condom apcanchiümoj niüng ajlüy nej meáwan nipilan wüx iüt. Quiaj nej apmariüüd nejw atnej arang nop nejür sap, awün pálwüx sap, pálwüx teants.

<sup>33</sup> Ndoj apmayac ajcüwa sap amb wüx miác nej, nganüy a teants amb wüx miqúiamb nej.

<sup>34</sup> Condom aaga minatang nenajiüt apmasaj ajcüw ajlüyiw amb wüx miác nej: “Macaron, cos najneajay lamambeol icon Xeteat. Nganüy ijmelüün tiül aaga najneajay cambaj tarangüch meneayiün wüx Xeteat Dios tarang a iüt cam.

<sup>35</sup> Cos wüx telopas, icona teajchiün xic süet; wüx tind sanganeow yow, icona teajchiün xic yow nanganeeow. Tajlüyüis atnej nop napeay miün nipilan, icona teajchiün xic niüng saxood.

<sup>36</sup> Wüx ngo najiür sapix icona teajchiün xic; tiün sandeow, icona teamban mejawan xic. Tajlüyüis tiül manchiüc icona temongon mejawan xic”, apmaj nejw.

<sup>37</sup> Condom ajcüwa monrang najneaj quiaj apmapiüngüw: “¡Teat! ¿Ngüt sawawan ic iüünd, xicona tüüchasan ic ite? ¿Ngüt tind inganeow yow, xicona tüüchasan ic menganeowa?”

<sup>38</sup> ¿Ngüt sawawan ic ipeay, quiaj tüüchasan ic niüng ixooda? ¿Ngüt ngo mejiür ipix, quiaj tüüchasan ique?”

<sup>39</sup> ¿Aton ngüt sawawan ic niün indeow, aton ngüt ijmel tiül manchiüc, quiaj tambasan najawan ique?” apmawüw.

<sup>40</sup> Quiaj apmasaj nejw aaga minatang monajiüt: “Naleaing sasaj icon, cuajantanej leaw terangan membeolan alinop xenipilan, aag ayaj sayac atnej xique temembeolan”, apmaj nejw.

<sup>41</sup> Condom quiaj apmasaj ajcüwa najlüyiw amb wüx miqúiamb nej: “Iriowan ningüy niüng sajlüy, icona monrang ngo majneaj.

Apmeamban tiül biümb niüng ngondom xejquem, leaw tarangüch niüng apmamb nimeech maquiiüb monbeol nej.

<sup>42</sup> Cos wüx telopas, icona ngo meajchiün xic süet, wüx tind sanganeow yow, icona ngo meajchiün xic yow nanganeeow.

<sup>43</sup> Tajlüyüis atnej nop napeay miün nipilan, icona ngo meajchiün xic niüng saxood. Wüx ngo najiür sapix icona ngo meajchiün xic. Tiün sandeow, aton tajlüyüis tiül manchiüc, icona ngo memongon mejawan xic”, apmaj nejw.

<sup>44</sup> Condom quiaj nejw apmapiüngüw aton: “Teat, ¿ngüt tajawasan ic tengual indeow lop, tind inganeow, ngo nüjchiün ique? ¿Ngüt iyamb niüng ixood xicona ngo nüjchiün ique? ¿Ngüt ngo nüjchiün ic ipixe? ¿Ngüt tiün indeow, teamb tiül manchiüc, xicona ngo nambeolan ique? ¿Ngüt aag ayaja?” apmawüw.

<sup>45</sup> Quiaj apmasaj nejw aaga minatang nenajiüt: “Naleaing sasaj icon, cuajantanej ngo mendiüman merangan para membeolan alinop, masey nop ajüic más ngo metam tiül, pues atnej xique temerangan wüx ximbas”, apmaj nejw.

<sup>46</sup> Ndoj ajcüw ayaj apmambüw tiül castigo meáwan nüt, pero leaw monrang najneaj apmambüw macüliw tiül cielo meáwan nüt —aj nejw Teat Jesús.

## 26

### *Ayambüw cuane wüx masapüw Teat Jesús (Mr. 14:1-2; Lc. 22:1-2; Jn. 11:45-53)*

<sup>1</sup> Wüx Teat Jesús landoj mapiüng meáwan aag ayaj, quiaj tasaj minipilan nej:

<sup>2</sup> —Icona lamejawan aliün ic nüt apmajlüy a nangos nüt pascua. Quiaj a Teat Naxey, apmayacüw nej teowixaw monajiüt mambiyaw nej wüx cruz —aj nejw.

<sup>3</sup> Condom quiaj ajcüwa montangtang miteaats, at mondüy wüx aaga poch tüünd Moisés, aton monajiüt tiül nipilan judío canchiütoj tiül nden aniüng Caifás, aaga minatang miteaats.

<sup>4</sup> Tapots mayambüw nguineay apmawaijchaw para masapüw Teat Jesús mambiyaw.

<sup>5</sup> Ndoj tapiüngüw:

—Ngondom marangaats aag ayaj wüx nangos nüt cos nipilan apmajcüyiw, apmajlüy xeyay monyaingyaing —awüw.

### *Nop najtaj tateng najmboc angan aceite wüx omal Jesús*

(Mr. 14:3-9; Jn. 12:1-8)

<sup>6</sup> Teat Jesús altiül cambaj Betania alaniüng Simón, nop laiün wüx axom nej noic ngo majneaj necoy nasoic lepra.

<sup>7</sup> Quiaj tajngot nop najtaj ajamiün najmboc angan aceite xeyay nembeat, chipiow nop nine iquial narangüch najneaj piedra



nenüt alabastro. Wüx aliw wüx mes tengual üetiwi, quiaj aaga najtaj tateng wüx omal Teat Jesús aaga najmboc angan aceite.

<sup>8</sup> Minipilan nej wüx tajawüw aag ayaj altiül tajcüyiw, tapots mapiüngüw:

—¿Neol tandrooch ombas aaga najmboc angan aceite quiaja?

<sup>9</sup> Cos sitiül majnap apmameat xeyay, mambeolaran nipilan ngo majiür —awüw.

<sup>10</sup> Teat Jesús tayaag leaw teamandeaçüw, quiaj tasaj nejjiw:

—¿Neol tapots mesajsajan a müm najtaj cama? Icuaeitiün; nej lamarang noic xeyay najneaj wüx ximbas.

<sup>11</sup> Cos leaw nipilan ngo majiür aliw ningüy mequiüjpan meáwan nüt, alndom membeolan wüx indiüman; xique ngome meáwan nüt sanajlüy ningüy naquiüüb icon.

<sup>12</sup> Leaw lamarang a müm najtaj quiaj, wüx tateng najmboc angan aceite wüx ximbas, aag ayaj lamarang nómban atnej aparangüch wüx ximbas wüx sanamiüraad.

<sup>13</sup> Naleaing sasaj icon, nguiajantanej wüx aaga iüt cam niüng apmaderac wüx aaga najneajay nanderac nguineay alndom nawün wüx asoeteran, quiaj apmaderac wüx aaga müm najtaj cam nguineay tarang, para leam omeaatsaran wüx nej —aj nejjiw Teat Jesús.

*Judas tapiüng apmayac teowixaw monajiüt a Teat Jesús*

(Mr. 14:10-11; Lc. 22:3-6)

<sup>14</sup> Condom nop nenüt Judas Iscariote, nop naw tiül ajcüwa gajpiüp (12) tamb mandeaç aweaag montangtang miteaats.

<sup>15</sup> Tasaj nejjiw:

—¿Nguitow apmeajchiün xic sitiül ndot nayac tiül iwixan aaga Jesús? —aj nejjiw.

Quiaj tujchiw nej nimiow gajpowüw (30) tomiün plata.

<sup>16</sup> Naw quiaj aaga Judas tapots mayamb nguineay mayac Teat Jesús teowixaw monajiüt.

*Teat Jesús üet aweaag minipilan nej ndójiwüx*

(Mr. 14:12-25; Lc. 22:7-23; Jn. 13:21-30; 1 Co. 11:23-26)

<sup>17</sup> Wüx amelich aaga nangos nüt üeteran pan ngo majmel lewadura, quiaj minipilan Teat Jesús tambüw matüniw manguiaiyiw nej, tasajüw:

—¿Nguiane indiüm teat, namban natajcan majneaj niüng apmetiüüts wüx pascua? —ajüw nej.

<sup>18</sup> Quiaj tasaj nejjiw:

—Quiüran tiül cambaj, indüyiün aniüng nop naxey, isajan: “Teat Xan apiüng: Laliüc mümb xenüt, sandiüm narang nangos nüt pascua iniüng, naquiüüb xenipilan, aw”, irajan —aj nejjiw Teat Jesús.

<sup>19</sup> Minipilan nej tarangüw atnej tasoiquiw, tayambüw meáwan leaw apmüetiwi wüx pascua.

<sup>20</sup> Wüx langwiiüts Teat Jesús chetet wüx mes maquiüüb gajpiüp (12) minipilan nej.

<sup>21</sup> Wüx tengual üetiwi, quiaj tasaj nejjiw:

—Naleaing sasaj icon, nop tiül icona apmayac xic teowixaw monajiüt —aj nejjiw.

<sup>22</sup> Quiaj tamix omeajtsüw xeyay, tapots matüniw manguiaiyiw anopnopo, tapiüngüw:

—¿Jane, ngwüy xique? —awüw.

<sup>23</sup> Quiaj tasaj nejjiw Teat Jesús:

—Nop teasüet anaag nóiquian tiül polat, aag ayaj apmayac xic teowixaw monajiüt.

<sup>24</sup> Teat Naxey apmamongoch atnej apiüng tiül Mipoch Teat Dios; pero xeyay ngo majneaj apmamongoch aaga naxey leaw apmayac teowixaw monajiüt a Teat Naxey. Najneajay sitiül nej ngo wijquiam —aj nejjiw Teat Jesús.

<sup>25</sup> Quiaj tendeaç a Judas, áag teamandiüm mayac nej teowixaw monajiüt, tasaj nej:

—Teat, ¿jane, ngwüy xique? —aw.

Quiaj tasaj nej Teat Jesús:

—Ique lamepiüng —aj.

<sup>26</sup> Tengual ámban üetiwi, quiaj Teat Jesús taxaing a pan, tataag orar, ndoj tambaag, quiaj tüüch nejjiw, tapiüng:

—Ixaingiün itean, cos aag ayaj xecuerpo —aw.

<sup>27</sup> Condom tayar noic vas, tataag orar, ndoj tamongoch manganeowüw, tapiüng:

—Inganeowan.

<sup>28</sup> Cos aag agüy xequeiej, ajüiquich wüx aaga jayats poch leaw lamarang Teat Dios müüch icon; cos xequeiej apmajünch tiüt mawün wüx asoet xeyay nipilan.

<sup>29</sup> Aton sasaj icon xique lango nanganeow miyow uva ningüy; alinoic nüt sananganeow jayats miyow uva nóiquian naquiüüb icon tiül micambaj Teat Dios —aj nejjiw Teat Jesús.

*Pedro apmapiüng ngo majaw jane Teat Jesús*

(Mr. 14:26-31; Lc. 22:31-34; Jn. 13:36-38)

<sup>30</sup> Condom wüx landoj matajçüw cantar noic himno, quiaj tambüw andüyiw wüx mitiüc Olivos.

<sup>31</sup> Quiaj tasaj nejjiw Teat Jesús:

—Meáwan icona apmecuatiün xic aaga ongwiiüts cam, atnej apiüng tiül Mipoch Teat Dios: “Sanambiy aaga nejjiür sap, quiaj apndajrriüm meáwan misap nej.”

<sup>32</sup> Naleaing wüx sanapac tiül mondeow, quiaj sanamb tiül Galilea ombas xic, ndoj iliücan tamiün —aj nejjiw Teat Jesús.

<sup>33</sup> Quiaj tasaj nej a Pedro:

—Teat, masey meáwan macueatiwi ic, xique ngome sanacueat ic —aw.

<sup>34</sup> Quiaj Teat Jesús tasaj nej:

—Naleaing sasaj ic Pedro, aaga ongwiiüts cam wüx nganaw mepaj a gallo, ique lamepiüing arojmbüw ipiüing ngo mejaw jane xic —aj nej.

<sup>35</sup> Quiaj a Pedro tapiüing:

—Teat, xique ngame sanapiüing ngo najaw jane ic masey nandeow noiquian naquiiüb ic —aw.

Atanquiaj tapiüingüw meáwan minipilan nej.

*Teat Jesús ataaq orar tiül Getsemaní*  
(Mr. 14:32-42; Lc. 22:39-46)

<sup>36</sup> Condom Teat Jesús tapeay tiül niüing nasoiç Getsemaní maquiiüb minipilan nej. Tasaj nejijw:

—Cheteron ningüy, cos xique sanamb ninguiün nataag orar —aj nejijw.

<sup>37</sup> Condom taquiiüb mamb a Pedro at alijpüw micual Zebedeo, ndoj tayaag xeyay amix omeaats.

<sup>38</sup> Tasaj nejijw:

—Xowüy amix ximeaats, sayaag atnej teasandeow. Nganüy icüliün xic ningüy, nde memeayiün —aj nejijw.

<sup>39</sup> Condom Teat Jesús tamb quiríwan iün majüy, quiaj mejquiet tiüt, tatün ocueaj Teat Dios, tapiüing:

—Xeteat Dios, sitiül ique indüüm, alndom mewün xic wüx meáwan naél leaw sanamongoch. Naleaing Teat, nde merang leaw xic sandiüm, irang atnej ique indüüm —aw.

<sup>40</sup> Condom tandilil majaw ajcüw arojpw minipilan nej, tajaw lameayiw. Quiaj tasaj a Pedro:

—¿Neol, ngondom mepacana mequiiüpan xic masey noic ores?

<sup>41</sup> Nde memeayiün, itüniün ocueaj Teat Dios, nde matüch icon nimeech. Masey tiül imeajtsan indüüman meyamban Teat Dios, icona ngo meüican wüx —aj nejijw.

<sup>42</sup> Condom tandüy quiaj amb ijmbüw mataag orar masaj Teat Dios, tapiüing:

—Xeteat Dios, sitiül naleaing netam namongoch aaga naél cam, ngondom mamórgan, irang atnej ique indüüm —aw.

<sup>43</sup> Tandilil alinomb niüing ajlüyiw ajcüw arojpw quiaj. Taxom nejijw lameayiw alinomb, cos xeyay ind ameayiw, langondom maleajjqüiw oniüjcw.

<sup>44</sup> Condom tacueat nejijw, tandüy quiaj amb arojmbüw mataag orar, matün ocueaj Teat Dios, tatün atnej landoj matün.

<sup>45</sup> Condom tandüy niüing ajlüy minipilan nej, quiaj tasaj nejijw:

—¿Neol, aliün memeayiüna, tengual ixojtana? Canüy landoj, lamatüch a ores. Apmayacüch a Teat Naxey teowixaw nipilan monrang ngo majneaj.

<sup>46</sup> Witiüron, tabaats, ijawan lapeay aaga apmayac xic teowixaw nipilan —aj nejijw Teat Jesús.

*Aquiüjpüw mamb Teat Jesús*

(Mr. 14:43-50; Lc. 22:47-53; Jn. 18:2-11)

<sup>47</sup> Tengualeámban andeac Teat Jesús, quiaj ajngot a Judas, aaga naw tiül gajpiüp minipilan nej, aquiüüb miün xeyay nipilan, ajamiünw machat, aton xiül. Üüch nejijw miünw montangtang miteaats at montangtang monajiüt tiül nipilan judío.

<sup>48</sup> Aaga Judas lamasaj nejijw nguineay apmajüiquich ngün masapüw. Cos lamapiüing:

—Áag leaw sanacheech mimboy nej, aag ayaj isapan —aw.

<sup>49</sup> Condom wüx tajngot, quiaj tamb majaw Teat Jesús, tasaj:

—Ndic Teat, tamtámban ijlüy teat —aj.

Andüüb macheech mimboy nej.

<sup>50</sup> Quiaj tasaj nej Teat Jesús:

—Amigo, ¿cuane tewiün meranga? —aj.

Quiaj tajngotoj, tajmeliw masapüw nej, taquiüjpüw nej mamb.

<sup>51</sup> Naleaing nop tiül minipilan Teat Jesús tasoond mimachat nej, tandooig nop olaag nembeol minatang miteaats.

<sup>52</sup> Quiaj tasaj nej Teat Jesús:

—Isoc alinomb tiül ombiüm mimachat, teat, cos meáwan jane andiüm matsoj wüx machat, naag machat apmendeowiy.

<sup>53</sup> ¿Neol, cuane ipiüing, ngondom natün ocueaj Xeteat Diosa, miüch miün peic miow mil (80,000) miángeles nej mambeolüw xique?

<sup>54</sup> Pero jondot narang atquiaj, ¿nguineay apmajlüy leaw lamapiüing tiül Mipoch Teat Dios netam majlüy? —aj nej.

<sup>55</sup> Condom quiaj Teat Jesús tasaj ajcüwa nipilan quiaj:

—¿Cuane imbichan machat, ata xiül wüx isapan xique? ¿Jow a xique, need xique? Meáwan nüt tajlüyüis niüing ijlüyüin naquiaach icon tiül a nadam nangaj iüm, pero icona ngo mesapan xic.

<sup>56</sup> Naleaing atcüy netam majlüy, para majlüy atnej nomb tapiüingüw tiül nawiig mondeac andeac Teat Dios —aj nejijw.

Quiajan tacueatiw nej minipilan nej, tecüiürrüw.

*Teat Jesús alniüing ajlüy monajiüt*

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Wüx landoj masapüw Teat Jesús, quiaj taquiüjpüw nej mamb andüy niüing ajlüy Caifás, aaga minatang miteaats, niüing canchiüjow ajcüwa mondüy wüx aaga poch tüünd Moisés, aton ajcüwa montangtang monajiüt tiül nipilan judío.

<sup>58</sup> Pedro tandüüb mamb miünquiájan ajngot, tatüch mbeay minden minatang miteaats. Condom tajmel chetet maquiüjpüw monjiür iüm, mambich majaw nguineay apmajlüy.

<sup>59</sup> Ajcūwa montangtang miteaats, montangtang monajiūt, aton meáwan monajiūt tiül nipilan judío tayambūw jane matepich asoet Teat Jesús masey awaiich, para mūjchiw mamb mandeow.

<sup>60</sup> Pero ngo maxomūw, masey ajlüy xeyay monwaiich wūx nej. Ndójuwūx, tajngotoj ijpūw monwaiich.

<sup>61</sup> Nejiw tapiüngūw:

—Aaga naxey quiaj tapiüng: “Xique alndom najarrich aag nadam nangaj iüm ocueaj Teat Dios, ndoj wūx er nüt alndom nawitich alinomb”, aw —awūw.

<sup>62</sup> Condom aaga minatang miteaats witiūt matün manguiaj Teat Jesús, tasaj:

—¿Neol ngo merndeaca? ¿Cuane teamandeačūw wūx imbas quiaja? —aj.

<sup>63</sup> Teat Jesús ndijchiówan, ngo masaj nej nicuajind. Quiaj a minatang miteaats tasaj nej:

—Por minüt Teat Dios leaw almapac, isaj xicon sitiül naleaing ique aaga Cristo lapiürang aliüc, aag Micual Teat Dios —aj.

<sup>64</sup> Quiaj tasaj nej Teat Jesús:

—Ajaj xique teat, atnej lamepiüng quiaj; y sasaj icon alinoic nüt apmejawan a Teat Naxey alchetem amb wūx miác Teat Dios; aton apmejawan wūx aliüc imiün tiül cielo, amb tiül oic —aj nej.

<sup>65</sup> Quiaj aaga minatang miteaats tachiūt apix nej cos xeyay ajcūy, tapiüng:

—Aaga naxey cam lamandeač ngo majneaj, ayac atnej Dios nej. ¿Cuane tengualeámban macülüüts manguiajiütsa? Icona lamenguiayiün nguineay tandeac xeyay ngo majneaj.

<sup>66</sup> ¿Ngwūy, cuane ajiür meyajcana? —aw.

Quiaj tapiüngūw:

—¡Nej ajiür xeyay nisoet, ich mandeow! —awūw.

<sup>67</sup> Quiaj tapots mateontsūw teombas nej onts ombeayiw nejiw, tatoliw, altiül taleambūw nej.

<sup>68</sup> Tasajūw nej:

—¡Sitiül ique aaga Cristo, isüet jane teamatol ic! —ajūw.

*Pedro apiüng ngo majaw jane Teat Jesús (Mr. 14:66-72; Lc. 22:56-62; Jn. 18:15-18, 25-27)*

<sup>69</sup> Teat Pedro aliün chetem quiaj tiül nden, quiaj ajngot nop nūx nerang najiūt quiaj, tasaj nej:

—Ique aton almequiüüb aaga Jesús naw Galilea —aj nej.

<sup>70</sup> Quiaj a Pedro tawaiich niüng ajlüyaran, tapiüng:

—Ngo najaw cuane ipiüng quiaj —aw.

<sup>71</sup> Pedro wūx laámb apmamong tiül ombeay nden, quiaj majaw nej alinop, aton tasaj monlüy quiaj:

—Aaga naxey quiaj taquiüüb aaga Jesús naw Nazaret —aj.

<sup>72</sup> Quiaj a Pedro tandüy wūx alinomb mawaiich, tapaj minüt Dios, tapiüng:

—¡Deda nej dios, ngo najaw jane aaga naxey quiaj! —aw.

<sup>73</sup> Ajóyan alquiriw ores, quiaj ajcūwa monlüy quiaj tatüchiw a Pedro, tasajūw:

—Naleaing ique aton nop nejiw, cos ajüiquich ic indeac —ajūw.

<sup>74</sup> Quiaj a Pedro tapots mandeač ngo majneaj, tapaniich, tapiüng:

—Sitiül ngo maleaing sandeač, alinoic nüt sanangüy. ¡Naleaing ngo najaw jane aaga naxey temepiüangan quiaj! —aw.

Andüüban tepaj a gallo.

<sup>75</sup> Quiaj a Pedro leaad omeaats leawa lamasaj nej Teat Jesús, cos tasaj nej: “Wūx nganaw mepaj a gallo, ique lamepiüng arojmbūw ipiüng ngo mejaw jane xic”, aj nej. Quiaj taw quiaj a Pedro, tajiünts xeyay.

## 27

*Teat Jesús taquiüraab niüng ajlüy Pilato (Mr. 15:1; Lc. 23:1-2, Jn. 18:28-32)*

<sup>1</sup> Wūx lachiüjmbaw, quiaj canchiütoj alinomb meáwan montangtang miteaats at montangtang monajiūt tiül nipilan judío. Tandeacūw nóiquian nguineay alndom mambyaran Teat Jesús.

<sup>2</sup> Quiaj taquiüjpūw mamb a Teat Jesús neóel, tayacūw teowix Poncio Pilato, aaga natang nenajiūt.

*Judas tembiyay*

<sup>3</sup> Condom a Judas, aaga neyac Teat Jesús teowixaw monajiūt, wūx tajaw Teat Jesús landoj apmandeow, quiaj leaad omeaats ngo majneaj lamarang. Tatsoriich alinomb aaga nimow gajpowūw (30) tomiün plata, tüüch montangtang miteaats at monajiūt.

<sup>4</sup> Tasaj:

—Xique lanarang nadam nisoet, cos lanayac tiül iwixan nop naxey ngo majiür nicuajind nisoet —aw.

Quiaj tasajūw nej:

—Ic coen mejaw, jowa xicona cuane sambichan ic —ajūw nej.

<sup>5</sup> Condom quiaj a Judas tawiich quiaj a tomiün tiül nadam nangaj iüm, taw quiaj, tamb merrondüy onic.

<sup>6</sup> Ajcūwa montangtang miteaats taxainguiw aaga tomiün quiaj, ndoj tapiüngūw:

—Aag agüy ngo majneaj macanchichaats tiül iquial nichech, cos aag agüy ombeat miquiej nop apmandeow —awūw.

<sup>7</sup> Ndoj andeačdeacūw wūx, tapiüngūw con aaga tomiün quiaj apmangalūw noic iüt niüng arangüch xor, niüng alndom mamiüraad napeay miün nipilan.

<sup>8</sup> Naw quiaj, aaga iüt quiaj tanüt miüüt quiej. Nganüy nüt cam aliün manüt atquiaj.

<sup>9</sup> Atquiaj tajlüy para majlüy atnej tapiüng nomb Teat Jeremías, nop nendec andeac Teat Dios, cos nej tapiüng: “Apmayariw aaga nimiow gajpowüw (30) tomiün plata leaw nipilan judío lamayacüw ombeat nej,  
<sup>10</sup> mengalajej noic iüt niüng tarangüch xor, atnej tasaj xic Teat Dios”, aw.

*Teat Jesús alteombas Pilato*  
(Mr. 15:2-5; Lc. 23:3-5; Jn. 18:33-38)

<sup>11</sup> Teat Jesús wüx alteombas Pilato aaga natang nenajiüt, quiaj tatün nej manguiaj: —¿Naleaingue, ique aaga minatang nena-jiüt ocueajiw nipilan israele? —aj.

Quiaj tasaj nej Teat Jesús:  
—Naleaing, atnej ipiüng quiaj —aj nej.

<sup>12</sup> Masey tengual mayacüw nej asoet ajcüwa montangtang miteaats at monajiüt, nej ngo mapiüng nicuajind.

<sup>13</sup> Condom quiaj tasaj nej a Pilato:

—¿Neol, ngo menguiaj leaw tengual mandeacüw wüx imbas quiaja? —aj nej.

<sup>14</sup> Nej Teat Jesús ngo mandeac nicuajind. Quiaj aaga natang nenajiüt quiaj mbayat majaw, lango majaw cuane apmarang.

*Atüniw mandeow Teat Jesús*  
(Mr. 15:6-20; Lc. 23:13-25; Jn. 18:38—19:16)

<sup>15</sup> Wüx aaga nangos nüt quiaj, aaga natang nenajiüt alndom matsambiich nop najlüy tiül manchiüc leaw cambaj apmatün.

<sup>16</sup> Aaga nüt quiaj altiül manchiüc nop naxey xowüy anderac wüx nej, nenüt Barrabás.

<sup>17</sup> Wüx nipilan alcanchiümoj, quiaj tatün manguiaj nejw a Pilato:

—¿Ngün indiüman natsambiich, Barrabása, ngwüy Jesús, aaga nasoiic Cristo? —aj nejw.

<sup>18</sup> Tapiüng aag ayaj cos lamajaw ajcüyíwan majawüw Teat Jesús, áag tayacüw teowix nej.

<sup>19</sup> Wüx Pilato alchetem niüng ajaw wüx asoeteran, quiaj mintaj nej tüüch mamb masoiic: “Nde aleaic merang wüx a naxey nerang najnej quiaj, cos tepood xeyay mbayatos tiül sameay, taümiüs najaw wüx nej”, aw.

<sup>20</sup> Pero naleaing ajcüwa montangtang miteaats, at monajiüt tiül cambaj tapots mawüywüyw nipilan matüniw tsajmbiüm aaga Barrabás, nganüy a Teat Jesús ich mandeow.

<sup>21</sup> Quiaj tatün manguiaj nejw alinomb aaga natang nenajiüt, tasaj nejw:

—¿Ngün tiül ajcüwa ijpüw cam indiüman natsambiiche? —aj nejw.

Quiaj tapiüngüw:

—¡Aaga Barrabás! —awüw.

<sup>22</sup> Condom Pilato tasaj nejw:

—¿Cuane ipiüangan, cuane sanarang wüx aaga Jesús nasoiic Cristo? —aj nejw.

Quiaj tapiüngüw nóiquian:

—¡Ich mandeow wüx cruz! —awüw.

<sup>23</sup> Quiaj tasaj nejw a Pilato:

—¿Mbich cuane nisoet ajiüwe? —aj nejw.

Nejw tayacüw wüx apajüw, tapiüngüw:

—¡Ich mandeow wüx cruz! —awüw.

<sup>24</sup> Pilato wüx tajaw ngodom marang nicuajind, cos nipilan tengual ajcüyw, quiaj tatün mamb mayarich yow. Ndoj tapots müüch majants owix nej niüng ajlüy meáwan nipilan. Tapiüng:

—Aag agüy sarang mejawan, xique ngo najlüy tiül wüx apmajüch tiüt miqüiej aaga naxey nerang najnej cam, ijawan coen ninguiaj icona —aj nejw.

<sup>25</sup> Yajnguiat tiüt a nipilan apajüw, tapiüngüw:

—Xicona masey sanaquiüjpan wüx xecualan sanengüyiün miqüiej nej leaw apmajüch tiüt —awüw.

<sup>26</sup> Quiaj a Pilato tatsambiich a Barrabás, ndoj, wüx landoj ajwüch Teat Jesús, quiaj tayac teowixaw nipilan mandeow wüx cruz.

<sup>27</sup> Condom quiaj misoldados nej taquiüjpüw Teat Jesús andüy tiül noic püjchiün nasoiic pretorio, canchiütoj meáwan soldado, ayeyiw nej tiüt.

<sup>28</sup> Quiaj tasojndiw nej tiül apix, condom tasoijqüiw nej tiül noic najal napixeran morada.

<sup>29</sup> Ndoj tayacüw wüx omal nej noic corona nepeat sats, aton tasocoj tiül miác owix nej nots najchow, aag ayaj nangoraad apiüngüw. Quiaj taquejliw micosüw nejw tiüt teombas nej mitsojow nej. Tapiüngüw:

—¡Najnejay ijlüy, mbich ique minatang nenajiüt ocueajiw nipilan judío! —ajüw nej.

<sup>30</sup> Tapots mateontsüw wüx ombas nej onts ombeayiw nejw, aton tayariw aaga najchow mawüjchiw wüx omal nej.

<sup>31</sup> Wüx lapaxiow mitsojow nej, quiaj tasojndiw nej tiül aaga morada napixeran, ndoj tasoijqüiw nej tiül apix nej. Condom quiaj taquiüjpüw nej mamb mayacüw nej wüx cruz.

*Teat Jesús tajmel wüx cruz*

(Mr. 15:21-32; Lc. 23:26-43; Jn. 19:17-27)

<sup>32</sup> Almawüw quiaj, quiaj mangochiw nop naxey naw Cirene, nenüt Simón. Tasapüw nej mambitic micruz Teat Jesús.

<sup>33</sup> Quiaj tapeayiw tiül niüng nasoiic Gólgota, aag ayaj amb apiüng omal mandeow.

<sup>34</sup> Quiaj tujchiw vin manganeow aolüw tiül nangaag, wüx tapeay teombeay nej taton ngo manganeow.

<sup>35</sup> Wüx landoj mayacüw nej wüx cruz, quiaj tembaagayej wüx apix nej, asüetiw wüx majawüw jane apmajoy. Atquiaj tajlüy atnej tanomb tapiüng nop nendec andeac

Teat Dios wüx tapiüng: “Apmembaagayey wüx sapix, apmasüetiw wüx majawüw jane apmeneay”, aw.

<sup>36</sup> Ndoj tsototójan quiaj majiürüw nej.

<sup>37</sup> Ndoj tayacüw wüx omal cruz acas poch niüng apiüng cuane asoet nej, apiüng: “Aag agüy Jesús, minatang nenajiüt ocueajiw nipilan judío”, aw.

<sup>38</sup> Aton tajmeliw wüx cruz maquiüüb ijpüw moneed, nop amb wüx miác Teat Jesús, alinop amb wüx miquiamb nej.

<sup>39</sup> Leaw tamongoj ambüw quiaj titsojow nej, talanglangüw omalüw müjchwi majüichichaw ajcüyiw.

<sup>40</sup> Tapiüngüw:

—jooow, ngwüy ique nepiüng apmejarrich aaga nadam nangaj iüm, ndoj wüx er nüt apmelomboch alinomb! jNganüy erwüney wüx iquiáyan quiaj; iriow tiüt wüx cruz sitiül ique Micual ic Teat Dios! —awüw.

<sup>41</sup> Átan titsojow nej montangtang miteaats, mondüy wüx aaga poch tüünd Moisés, at ajcüwa fariseos, aton montangtang monajiüt tiül cambaj Israel. Tandeacüw nejeyéjan quiaj, tapiüngüw:

<sup>42</sup> —Nej mbich tawün wüx alinop, nganüy nej ngondom mewüney wüx nejáyan quiaj. Sitiül naleaing nej natang nenajiüt tiül nipilan judío, ich maw tiüt imiün wüx cruz nganüy, mbich apmayariüts andeac nej.

<sup>43</sup> Nej tayac omeaats wüx Teat Dios, ich mawün nej wüx a nganüy sitiül Teat Dios ajüür nej lasta. Cos nej tapiüng: “Micual xic Teat Dios”, aw, —awüw.

<sup>44</sup> Ajcüwa moneed leaw tajlüyiw wüx cruz maquiüjpüw titsojow nej aton.

*Wüx tandeow Teat Jesús*

(Mr. 15:33-41; Lc. 23:44-49; Jn. 19:28-30)

<sup>45</sup> Condom wüx lalembey nüt, quiaj pojniüt wüx iüt tamong lanchejliow nüt.

<sup>46</sup> Wüx nchejliüt nüt quiaj Teat Jesús tepaj napac, tapiüng:

—Eli, Eli, ¿lama sabactani? Aag ayaj apiüng: Xeteat Dios, Xeteat Dios, ¿neol tecueat xic? —aw.

<sup>47</sup> Altiül leaw alquiaj tanguyaiw, tapiüngüw:

—Aaga naxey quiaj tenguiäl mapaj teat Elías —awüw.

<sup>48</sup> Quiaj tamb nop acuiür mayar noic walang sap. Wüx landoj macachiich, masoc tiül vinagre, quiaj tayac wüx omal nots najchow. Condom tayac wüx ombeay Teat Jesús machey.

<sup>49</sup> Alacas tapiüngüw:

—Ich majlüy, cawül majawaats sitiül aliüc a Elías mawün nej wüx —awüw.

<sup>50</sup> Condom Teat Jesús tandüy wüx alinomb mepaj napac, quiaj tandeow.

<sup>51</sup> Quiaj aaga nadam jael nepal teomeaats a nadam nangaj iüm nómban chiütaw

pinawan, naw cawüx andüy tiüt. Nómban ajlang a iüt, at a nadamdand piedra tajpoet.

<sup>52</sup> At xeyay oxiüt aton lejquiat; xeyay monyar andeac Teat Dios tapacüw tiül mondeow.

<sup>53</sup> Tawüw tiül oxiüt, wüx Teat Jesús landoj apac tiül mondeow, quiaj tajmeliw tiül nangaj cambaj Jerusalén. Tajarawüw, tajaw nejiw xeyay nipilan.

<sup>54</sup> Aaga minatang ocueajiw soldados, at leaw almaquiüüb nej majiürüw Teat Jesús, wüx tayajcüw ajlang ateam, at wüx tajawüw meáwan leawa tajlüy, quiaj mabayatoj xeyay, tapiüngüw:

—Naleaing aaga naxey quiaj Micual nej Teat Dios —awüw.

<sup>55</sup> Aton aliw quiaj tigüy müm montaj, müünquiájan alembemoj tenguiäl majawüw. Ajcüw ayaj tandüjpiw müün a Teat Jesús imiünüw Galilea, tambeolüw nej.

<sup>56</sup> Tiül ajcüw ayaj altiül a María Magdalena, María mimüm Jacobo maquiüüb José, at mimümüw micual Zebedeo.

*Tamiüraad Teat Jesús*

(Mr. 15:42-47; Lc. 23:50-56; Jn. 19:38-42)

<sup>57</sup> Wüx langwiüts tiül aaga nüt quiaj, tapeay quiaj nop naxey nejiür xeyay, nenüt José, naw tiül cambaj Arimatea. Nej aton tajlüy tiül minipilan Teat Jesús.

<sup>58</sup> Nej tamb majaw Pilato matün micuerpo Teat Jesús. Quiaj Pilato tapiüng müünd.

<sup>59</sup> Condom quiaj aaga José tamb maxaäng micuerpo Teat Jesús, tawinch tiül noic najneaj püy nerixix.

<sup>60</sup> Ndoj taquiüüb mamb mayac tiül noic jayats oxiüt leaw nej landoj marang tiül otüeng tiüc. Condom quiaj tapal wüx noic nadam piedra, cas tamb.

<sup>61</sup> Aliw quiaj a María Magdalena maquiüüb alinop María, alchetemoj quiaj mbeay oxiüt.

*Tayacüw monjiür oxiüt*

<sup>62</sup> Wüx amatüch nüt axoodaran, aag ayaj amb alinoic nüt ndoj ayambambüw meáwan leaw apmetam nejiw wüx pas-cua, quiaj montangtang miteaats at fariseos tambüw majawüw Pilato.

<sup>63</sup> Tapiüngüw:

—Teat Xan, nganüy les leaad ximeajtsan leaw tapiüng aaga naxey newaiich quiaj. Cos wüx aliün mapac tapiüng nej apmapac tiül mondeow wüx er nüt.

<sup>64</sup> Nganüy teat, sandiüman meaach mamb majiürüch aag oxiüt quiaj leaw among er nüt, ngana majmeliw ongwüüts minipilan nej mawüniw nej, ndoj apmasajüw nipilan: “Nganüy lapac tiül mondeow”, mawüw. Quiaj apmawaijchaw xeyay nipilan más xeyay, ngo matnej wüx aliün mapac —awüw.

<sup>65</sup> Quiaj tasaj nejiw Pilato:

—Joyaj noic ajlŷy soldados, quiŷran ipalan nandand nandand aaga oxiŷt quiaj leaw niŷng alndom —aj nejiw.

<sup>66</sup> Condom quiaj tambŷw mapalŷw nandand a oxiŷt. Tayacŷw noic sello wŷx aaga piedra apal nej, ndoj tacueatiw quiaj soldados majiŷrŷw.

## 28

*Teat Jesŷs tapac tiŷl mondeow*  
(Mr. 16:1-8; Lc. 24:1-12; Jn. 20:1-10)

<sup>1</sup> Wŷx lamong aaga nŷt axoodaran, laraw tiŷt amb alinoic nŷt, aag ayaj amelich seman; quiaj tambŷw majawŷw oxiŷt a Marŷa Magdalena maquiŷiŷb alinop Marŷa.

<sup>2</sup> Condom quiaj tajlang noic nadam ateam, cos nop ángel ocueaj Teat Dios tiŷn imiŷn cielo. Almapeay, quiaj tawŷn a piedra nepal oxiŷt, chetet wŷx.

<sup>3</sup> Ombas nej xowŷy larrow atnej noic najlip, at apix nej rajnŷy atnej nieve.

<sup>4</sup> Ajcŷwa soldados almajawŷw aag ayaj mbayajow, anmambeapmbeap nejiw, tajmiŷcŷw nŷmban atnej landeowŷw.

<sup>5</sup> Quiaj aaga ángel tasaj ajcŷwa montaj:

—Nde mbayameron, cos sawaj icon iwiŷnan meyamban Teat Jesŷs, áag tayacŷw wŷx cruz.

<sup>6</sup> Lango majlŷy ningŷy cos nej lapac tiŷl mondeow atnej lamapiŷng. Macaron ijawan niŷng tapiiberan a Teat Naxey.

<sup>7</sup> Nganŷy quiŷran najenjŷnan, isajan minipilan nej: “Nej lapac tiŷl mondeow, laámb andŷy Galilea ombas nej, quiaj apmexoman”, irajan. Áagan ayaj sajngot nasaj icon —aj nejiw.

<sup>8</sup> Condom ajcŷwa montaj mbayatoj, tawŷw quiaj tiŷl oxiŷt najŷnan; ndoj xeyay tapac omeajtsŷw. Tambŷw acuiŷrrŷw masajŷw minipilan Teat Jesŷs meáwan leaw tasoiquiw.

<sup>9</sup> Aliŷnŷw tiŷl tiŷd, quiaj tangoch nejiw Teat Jesŷs, tatepeay nejiw. Quiaj tambŷw mangochiw, taquiejliw micosŷw nejiw, tapequiequiw nej oleaj.

<sup>10</sup> Quiaj tasaj nejiw:

—Nde mbayameron. Quiŷran isajan xecojow xechijquiaw mambŷw andŷyiw Galilea, quiaj sanexomayon —aj nejiw.

*Leaw tapiŷngŷw monjiŷr oxiŷt*

<sup>11</sup> Ajcŷwa montaj tealeámban aliŷnŷw tiŷl tiŷd, quiaj tawŷw niŷng ajlŷy oxiŷt acas soldados. Tambŷw tiŷl cambaj aton masajŷw ajcŷwa montangtang miteaats meáwan leaw tajlŷy.

<sup>12</sup> Condom ajcŷwa miteaats sonngotoj maquiŷjpŷw montangtang monajiŷt tiŷl judŷos. Wŷx landoj mandeacŷw nguineay apmarangŷw, quiaj tŷjchiw soldados xeyay tomiŷn.

<sup>13</sup> Tasajŷw:

—Atcŷy ipiŷngan: “Aaga Jesŷs, tambŷw mawŷniw nej minipilan nej ongwiiŷts wŷx salnameayiŷn”, irawan.

<sup>14</sup> Sitiŷl ndot aaga natang nenajiŷt apmanguaiy, xicona sanawŷniŷn icon wŷx, quiaj ngome apmemongochiŷn nicuajind naél —ajŷw nejiw.

<sup>15</sup> Condom ajcŷwa soldados, wŷx landoj mayariw a tomiŷn, quiaj tarangŷw atnej tasoiquiw. Meáwan aag ayaj aliŷn manderac wŷx tiŷl nipilan judŷo nganŷy nŷt cam.

*Teat Jesŷs ŷuch minajiŷtŷw minipilan nej*  
(Mr. 16:14-18; Lc. 24:36-49; Jn. 20:19-23)

<sup>16</sup> Ajcŷwa gajpanop (11) minipilan nej tambŷw andŷyiw Galilea wŷx nop tiŷc niŷng lamasaj nejiw Teat Jesŷs.

<sup>17</sup> Wŷx tajawŷw nej taquiejliw micosŷw nejiw teombas nej; pero naleaing altiŷl tachiweaw omeajtsŷw.

<sup>18</sup> Condom Teat Jesŷs tatŷch nejiw, tapiŷng:

—Lanŷnd najlŷy wŷx meáwan leaw almajlŷy ninguiŷn tiŷl cielo, at ningŷy wŷx iŷt.

<sup>19</sup> Nganŷy quiŷran isajan palpálwŷx niplan wŷx aaga iŷt cam mandŷjpiw xic aton. Ijchan mayariw yow wŷx minŷt Teat Dios, wŷx minŷt Micual nej, at wŷx minŷt Nangaj Espŷritu ocueaj Teat Dios.

<sup>20</sup> Iquiajchiŷn mayacŷw wŷx omeajtsŷw marangŷw meáwan leaw lanasaj icon; xique sanaquiŷb icona meáwan nŷt, leaw ŷmb minŷt a iŷt cam —aj nejiw. Amén.

## Najneaj nanderac leaw tapiüng SAN MARCOS wüx Teat Cristo

*Juan Bautista aquiaach tiül wajchiüc  
(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Aaga najneaj nanderac wüx Teat Jesu-  
cristo, aag Micual Teat Dios, tiün majlüy  
atnej larangüch wüx nawüig tanomb.

<sup>2</sup> Tanomb atcüy tarang tiül minawiig nej  
a Isaías, nendec andeac Teat Dios. Tarang  
wüx nawüig leawa Teat Dios tasaj nej,  
tapiüng:

Sanüüch mamb nop naxey nerang xenajiüt  
mamong ombas, ique teoj apmeamb.  
Nej apmamb mataag majneaj a tiüüd niüng  
apmemong.

<sup>3</sup> Apmanguaiyaran andeac nop naxey tiül  
wajchiüc niüng ngo majlüy cambaj.  
Nej apmapiüng:

“Itajcan majneaj a tiüüd, ileainguijchan, cos  
aliüc Miteatiüts”, apmaj nejw.

<sup>4</sup> Condom atquaij tajlüy, tiün a Juan, aaga  
neech yow nipilan. Tamb maquiaach nipi-  
lan niüng ngo majlüy cambaj, masaj leaam  
omeajtsüw wüx asoetiwiw nejw, macueatiw.  
Atquaij alndom maw asoetiwiw, y netam ma-  
yariw yow aton.

<sup>5</sup> Tambüw majawüw nej xeyay nipilan  
monaw tiül meáwan cambaj tiül Judea, at  
monaw Jerusalén aton. Wüx tapiüngüw  
lango mandüümüw marangüw aaga ngo ma-  
jneaj teamarangüw quiaj, y apmacueatiw,  
quiaj Juan tüüch nejw yow tiül lam Jordán.

<sup>6</sup> Aaga Juan quiaj asoig apix nej  
najüyaran miyeed camello, aton aéel  
teomeaats nej taag. Tatsamb mow,  
tanganeow micün xiül.

<sup>7</sup> Condom Juan taquiaach nejw, tapiüng:  
—Aliüc miün andüüban xic apmajlüy  
nop teat naxey natang, xeyay netam ajlüy;  
nganüy xique nicuajind xic teombas nej.  
Sayaag xique ngondom natüch mejquien  
nachede aonts apaj nej.

<sup>8</sup> Xique áagan yow süüch icon, nganüy a  
nej apmüüch icon Nangaj Espiritu ocueaj  
Teat Dios —aj nejw a Juan.

*Tayar yow Teat Jesús  
(Mt. 3:13-17; Lc. 3:21-22)*

<sup>9</sup> Tiülan aaga acas nüt, quiaj tapeay Teat  
Jesús imiün tiül cambaj Nazaret tiül iüt  
Galilea. Quiaj tamb majaw a Juan. Condom  
Juan tüüch nej yow tiül lam Jordán.

<sup>10</sup> Wüx taw tiül yow, quiaj Teat Jesús tajaw  
leajquiat a cielo, tiün Nangaj Espiritu ocueaj  
Teat Dios atnej noic palom andüy wüx om-  
bas nej.

<sup>11</sup> Condom tanguaiyaran noic nanderac  
imiün tiül cielo, tapiüng:

—Naleaing ique sexual ic, sandiüm ic  
xeyay, apac ximeaats najaw ic —aw.

*Nimeech tandiüm mayac wüx naél Teat  
Jesús*

*(Mt. 4:1-11; Lc. 4:1-13)*

<sup>12</sup> Condom aaga Nangaj Espiritu ocueaj  
Teat Dios tüüch mamb Teat Jesús andüy tiül  
wajchiüc.

<sup>13</sup> Teat Jesús tacül quiaj ic miow (40) nüt  
niüng ajlüy cuajantanej napat nimal. Quiaj  
tandiüm mayac nej wüx naél minatang  
nimeech nenüt Satanás. Ndoj ángeles  
tajlüyiw quiaj mambeolüw Teat Jesús.

*Teat Jesús tamelich aquiaach tiül Galilea  
(Mt. 4:12-17; Lc. 4:14-15)*

<sup>14</sup> Condom alinoic nüt wüx monajiüt tay-  
acüw tiül manchiüc a Juan, quiaj tamb Teat  
Jesús andüy tiül Galilea mandeac aaga na-  
jneaj nanderac wüx Teat Dios, mapiüng  
ngüneay apmajlüy wüx Teat Dios apmajlüy  
wüx meáwan cambaj.

<sup>15</sup> Teat Jesús tapiüng:

—Lamatüch a nüt wüx Teat Dios apmajlüy  
wüx meáwan leaw almajlüy. Nganüy ijchan  
imeajtsan, iyariün aaga najneaj nanderac  
wüx Teat Dios —aw.

*Teat Jesús arriüüd apiquiw mondoc  
(Mt. 4:18-22; Lc. 5:1-11)*

<sup>16</sup> Noic nüt wüx Teat Jesús tamong amb  
mbeay aaga nadam yow nenüt Galilea,  
quiaj tajaw Simón maquiüüb Andrés michiig  
nej. Nejw teandocoj cos mondoc nejw.

<sup>17</sup> Quiaj tasaj nejw Teat Jesús:

—Macaron tabaats, sanaquiaach icon  
ngüneay alndom meyamban nipilan  
mesajan mayariw sandeac. Langome ap-  
meyamban cüet mendocon, apmeyamban  
nipilan —aj nejw.

<sup>18</sup> Acueatiwan mindocoj nejw, tandüjpiw  
mamb Teat Jesús.

<sup>19</sup> Condom quiríwan iün majüyiw, quiaj ta-  
jawüw a Jacobo maquiüüb a Juan, micual ne-  
jiw Zebedeo. Nejw aton aliw tiül mimüxiw  
nejw, tenguaij axequiw ndoc.

<sup>20</sup> At aton tapaj nejw miün Teat Jesús.  
Quiaj tacueatiw tiül müx miteatiw nejw  
Zebedeo maquiüüb mimosüw nejw.  
Tambüw maquiüjpw mamb Teat Jesús.

*Nop naxey alwüx ombas nej nimeech  
(Lc. 4:31-37)*

<sup>21</sup> Condom tandüyiw tiül cambaj Caper-  
naum. Quiaj Teat Jesús tajmel tiül a sin-  
agoga maquiaach, cos aaga nüt quiaj nüt  
axoodaran.

<sup>22</sup> Mbayatoj manguaiyiw aquiaach, cos  
taquiaach nejw atnej nop natang nena-  
jiüt nendüy, ngo matnej aquiajchwiw ajcüwa  
mondüy wüx aaga poch tüünd Moisés.

<sup>23</sup> Alquiaj tiül sinagoga nop naxey alwüx ombas nej nimeech, iüch nej michach, tepaj napac.

<sup>24</sup> Tapiüing:

—Jow ique Jesús naw Nazaret, ¿cuane indüüm merang wüx ximbasana? ¿Tewiün mendrooch ximbasana? Xique sawaw jane ic, ique aaga Nangaj Micual Teat Dios —aw.

<sup>25</sup> Quiaj Teat Jesús talic nej, tasaj:

—¡Tapots ipaj, iriow wüx ombas a naxey quiaj! —aj.

<sup>26</sup> Condom aaga nimeech tepaj, tam-beapmbeap a naxey quiaj, ndoj quiaj tacueat nej.

<sup>27</sup> Xeyay mbayatoj nipilan majawüw, tetünayej menguiayayej nejeyéjan quiaj, tapiüingüw:

—¿Cuane aag ayaja? ¿Cuane aaga jayats aquiaach quiaja? ¿Nguineay alndom malic aaga nimeech quiaj maw? ¡Quiaj aaga nimeech tayar andeac nej, taw! —awüw.

<sup>28</sup> Meáwan nipilan monaw tiül palpálwüx cambaj tiül iüt Galilea tandeacndeacüw wüx leaw tarang Teat Jesús.

*Tajneaj müm miocuats Simón Pedro*

(Mt. 8:14-15; Lc. 4:38-39)

<sup>29</sup> Condom Teat Jesús taw tiül a sinagoga, tambüw andüyw aniüingüw Simón maquiüüb Andrés, at a Jacobo maquiüüb a Juan tambüw maquiüüjpüw.

<sup>30</sup> Aaga müm najtaj miocuats Simón niün andeow, alwüx mats, xeyay iüch nej nerraar. Quiaj tasajüw Teat Jesús wüx aaga niün andeow quiaj.

<sup>31</sup> Teat Jesús tamb matüch niüing ajlüy a niün andeow quiaj, tasap owix mawitich; among wüx iün andeow. Condom aaga najtaj quiaj tarang nejüw üetiw.

*Teat Jesús tüüch majneaj xeyay moniün andeow*

(Mt. 8:16-17; Lc. 4:40-41)

<sup>32</sup> Wüx langwiiüts, lajmel nüt, quiaj taquiüüjpüw niüing ajlüy Teat Jesús xeyay moniün andeow, at nipilan alwüx ombasüw nimeech.

<sup>33</sup> Condom meáwan nipilan monaw tiül aaga cambaj quiaj, sonogotoj teombeay iüm niüing ajlüy Teat Jesús.

<sup>34</sup> Nej tamongoch iün andeow xeyay nipilan leaw axom nejüw cuajantanej monandeow. At aton tataag majneaj xeyay nipilan alwüx ombasüw nimeech. Teat Jesús ngome tüüch mendeacüw nimeech wüx nej, cos lamajawüw jane nej.

*Teat Jesús aquiaach tiül Galilea*

(Lc. 4:42-44)

<sup>35</sup> Amb alinoic nüt Teat Jesús witiüt aliün pojniüm. Tamb néjan quiaj andüy tiül wachiüic mataag orar.

<sup>36</sup> Condom Teat Simón y leaw al-maquiüüjpüw tambüw mayambüw nej.

<sup>37</sup> Wüx taxomüw, tasajüw:

—Teat, meáwan nipilan teamayambüw ic —ajüw.

<sup>38</sup> Quiaj tasaj nejüw Teat Jesús:

—Masey, nganüy tabaats tiül meáwan cambaj najlüy ninguiájan naquiaach quiaj aton, cos áag tüünas narang —aj nejüw.

<sup>39</sup> Quiaj tambüw tiül meáwan cambaj tiül iüt Galilea. Teat Jesús tapots aquiaach tiül palpálwüx sinagogas; aton tataag majneaj xeyay nipilan leaw alwüx ombasüw nimeech.

*Tamongoch napat monandeow nenüt lepra*

(Mt. 8:1-4; Lc. 5:12-16)

<sup>40</sup> Condom quiaj tamb majaw nej nop naxey axom nej napat monandeow nasoiic lepra, ngo majiür misüüig, atextexichan ombas nej. Quiaj taquieel micos nej, tasaj Teat Jesús:

—Teat, sitiül ique indüüm sawaw alndom memongoch iün sandeow —aj.

<sup>41</sup> Teat Jesús quiaj tajmiüc omal omeaats, taxaing owix marreeg nej, tasaj:

—Neol ngo nandüüm xecual, sandiüm, sanamongoch iün indeow —aj.

<sup>42</sup> Wüxan ndoj mapiüing aag ayaj Teat Jesús, aaga niün andeow quiaj andüüban ndet minecoy nej, tajneaj nómban.

<sup>43</sup> Condom Teat Jesús tasaj nej acas poch cuane netam marang, ndoj tasaj majtsor. Tapiüing:

<sup>44</sup> —Nde mesaj nejingund nguineay tejneaj. Nganüy quiür, iüch majaw miteaats ique lerjneaj; irang atnej apiüing tiül aaga poch tüünd Moisés. Iyac ichech para majawüw meáwan nipilan ique lerjneaj —aj nej Teat Jesús.

<sup>45</sup> Áwan quiaj a naxey tapots mandeac masaj meáwan nipilan nguineay tajneaj iün andeow. Ndoj quiaj Teat Jesús ngondom majmel tiül ngünantanej cambaj, cos xeyay nipilan teamacüliw nej. At masey nej tacülan tiül wajchiüc, xeyay nipilan tambüw majawüw nej quiaj.

## 2

*Tajneaj nop ndron ombas*

(Mt. 9:1-8; Lc. 5:17-26)

<sup>1</sup> Camüm aw alacas nüt tandilil alinomb Teat Jesús andüy tiül cambaj Capernaum; tanguiayaran al aniüing nej.

<sup>2</sup> Najénan canchiütoj quiaj xeyay nipilan, lango majoy a iüm; at teombeay iüm lapat-sayej quiaj. Teat Jesús tengual maquiaach nejüw wüx Mipoch Teat Dios.

<sup>3</sup> Condom tapeayiw quiaj apiquiw monxey aquüüjpüw mamb nop naxey ndron ombas, ambitiquiaw nej tiüt amb wüx mats.



<sup>4</sup> Pero naleaing ngondom matüchiw Teat Jesús cos laxowüy nipilan. Quiaj tajtepiw cawüx machaijquiw omal iüm alareng niüng ajlüy Teat Jesús, amb tiül tamongochiw mimats nej aaga ndron ombas quiaj.

<sup>5</sup> Wüx Teat Jesús tajaw nejiw naleaing ayariw leawa nej aquiaach, quiaj tasaj aaga ndron ombas:

—Xecual, landoj laáw isoet —aj.

<sup>6</sup> Altsotomoj quiaj acas mondüy wüx aaga poch tüünd Moisés tanomb, tapiüngüw tiülan omeajtsüw nejiw:

<sup>7</sup> “¿Neol tandeac atquiaj aaga naxey quiaja, neol tawaiiche? Cos tandeac atnej Dios nej. ¿Jane alndom mawün nisoete? Néjan quiaj Teat Dios”, awüw.

<sup>8</sup> Teat Jesús tajaw nguineay tengual mateotsüw tiül omeajtsüw nejiw, quiaj tasaj nejiw:

—¿Neol teteotsan atquiaj tiül imeajtsana?

<sup>9</sup> ¿Cuane iyajan ngo maél nasaj aaga naxey cama: “Landoj laáw isoete”, ngwüy nasaja: “Witiür, ixaing mimats, ijüy”, najaj?

<sup>10</sup> Nganüy apmejawan aaga Teat Naxey alndom mawün nisoet ningüy wüx iüt. Ijawan —aj nejiw.

Quiaj tasaj aaga ndron ombas:

<sup>11</sup> —Ique sasaj ic teat, witiür ixaing mimats, quüür ijtsor —aj.

<sup>12</sup> Condom aaga ndron ombas quiaj witiüt, taxaing mimats nej, najénan tamb, teamajawüw nej meáwan nipilan. Mbayajow majawüw, tapiüngüw:

—Teat Dios nerang aag ayaj, nómban ngomeaag majawaats —awüw.

#### *Teat Jesús tapaj Levi*

(Mt. 9:9-13; Lc. 5:27-32)

<sup>13</sup> Teat Jesús tamb alinomb andüy mbeay nadam yow nenüt Galilea. Xeyay nipilan tambüw majawüw nej, quiaj tapots maquiaach nejiw.

<sup>14</sup> Wüx taw quiaj, al mamong niüng angüyaran tomiün ocueaj cambaj, quiaj tajaw a Levi micual Alfeo alchetem quiaj. Tasaj:

—Mac indüüb xic, tabar —aj.

Quiaj witiüt, tamb mandüüb nej mamb.

<sup>15</sup> Noic nüt Teat Jesús alaniüng Levi maquiüüb minipilan nej, teauetiw maquiüjpüw xeyay monsap tomiün ocueaj cambaj. Aliw quiaj xeyay monrang ngo majneaj aton, cos xeyay nipilan almandüjpüw nej.

<sup>16</sup> Condom ajcüwa mondüy wüx aaga poch tüünd Moisés, at ajcüwa fariseos, wüx tajawüw nej teaüet maquiüjpüw a nipilan quiaj, quiaj tasajüw minipilan nej:

—¿Cuane ayaj, neol a Jesús teaüet aweaag, teanganeow aweaag monsap tomiün, at

nipilan monrang ngo majneaj quiaja? —ajüw nejiw.

<sup>17</sup> Wüx Teat Jesús tanguiy aag ayaj, tasaj nejiw:

—Jane ayaag napacüy ngo metam nop nejaw nej; pero jane ayaag niün andeow mbich netam nej. Xique ngo niün nayamb nipilan leawa ayaag najneaj arang; xique tiünas nayamb leaw ayaag ngo majneaj arang, aj nejiw.

#### *Tatiüw nej manguiyiw wüx aiündaran* (Mt. 9:14-17; Lc. 5:33-39)

<sup>18</sup> Noic nüt wüx minipilan Juan maquiüüb minipilan fariseos tengual aiündüw, tapeayiw quiaj acas nipilan matüniw manguiyiw Teat Jesús, tasajüw:

—¿Neol taiündüw minipilan Juan maquiüüb minipilan fariseos? Jow nganüy minipilan, ¿neol ngo maiündüw? —ajüw nej.

<sup>19</sup> Quiaj Teat Jesús tasaj nejiw, tandeac atnej nej nop nengoch owix. Tapiüng:

—¿Alndom miamigos nop nengoch owix maiündüw wüx nej alquiaj maquiüjpüw? Sitiül almaquiüjpüw a nench, ngondom maiündüw.

<sup>20</sup> Alinoic nüt wüx lango majlüy a nench, quiaj mbich apmaiündüw —aj nejiw Teat Jesús.

<sup>21</sup> Aton tasaj nejiw:

—Nejinguind ngondom macancham tiül noic nguirich napixeran quiripite jayats jael, cos sitiül apmacanchamaran tiül, wüx apntsontocom, quiaj apmachiüt a nguirich jael.

<sup>22</sup> At aton nejinguind ngondom mayac jayats vin tiül nguirich taag iqial vin, cos apmajpoet a nguirich iqial vin quiaj, quiaj apndrom ombas a vin, at a taag aton. Aaga jayats vin netam majmel tiül jayats taag —aj nejiw.

#### *Tajeliw trigo wüx nüt axoodaran* (Mt. 12:1-8; Lc. 6:1-5)

<sup>23</sup> Condom wüx noic nüt axoodaran ocueaj judíos, quiaj Teat Jesús tamong tiül noic corrül aqiiüüb minipilan nej. Minipilan nej tajeliw müetiw aong trigo leaw napiürüch quiaj.

<sup>24</sup> Quiaj ajcüwa fariseos tasajüw Teat Jesús: —Ijlaw! ¿Neol arangüw minipilan atquiaj wüx nüt axoodaran leaw ngondom marangüche? —ajüw.

<sup>25</sup> Teat Jesús, quiaj tasaj nejiw:

—¿Neol ngo meteowan nguineay tarang mixejchiüts David wüx nej tind üet, at leaw almaquiüjpüw nej aton?

<sup>26</sup> Cos wüx Abiatar tarang natang miteaats, quiaj David tajmel tiül a nangaj iüm ocueaj Teat Dios, tüet pan leaw najmel marang nichech para Teat Dios. Aag ayaj nejinguind ngondom müet, ágan miteaats

alndom müetiw. Pero nej tüet, átan leaw almaquíüjpüw nej tüetiwan aton —aj nejiw.

<sup>27</sup> At tasaj nejiw:

—Aaga nüt axoodaran quiaj tarangüch mambeol nipilan müüch nejiw maxojtúw noic nüt; ngame nipilan tarangüch mandüjpiw opech aaga nüt quiaj.

<sup>28</sup> Nganüy inguiayüün, aaga Teat Naxey al wüx atam xeyay, ngo matnej aaga nüt axoodaran quiaj —aw Teat Jesús.

### 3

*Naxey ndron ombas, nechey owix*  
(Mt. 12:9-14; Lc. 6:6-11)

<sup>1</sup> Teat Jesús tajmel alinomb tiül a sinagoga. Al quiaj nop naxey ndron ombas, nechey owix.

<sup>2</sup> Ajcüwa fariseos teamacüliw majawüw cuane apmarang Teat Jesús, sitiül nej apmataag majneaj owix a naxey quiaj wüx nüt axoodaran, para mayacüw asoet.

<sup>3</sup> Ndoj Teat Jesús tasaj a naxey nechey owix quiaj:

—Witiür, lemben ningüy pinawan —aj.

<sup>4</sup> Condom tatün manguaiy nejiw:

—¿Cuane ipiüangan, alndom marangüch najneaj wüx nüt axoodaran, ngwüy ngo majneaja? ¿Alndom mawünaran wüx nop, ngwüy apmambiyarana? —aj nejiw.

Nejiw ngo mendeacüw.

<sup>5</sup> Quiaj tajcüy Teat Jesús, tajaw nejiw, tamix omeaats cos arangüw adam omeajtsüw. Ndoj tasaj a naxey quiaj:

—Ileaingüich iwix —aj.

Quiaj aaga naxey taleanguiich owix nej, nómban ajneaj.

<sup>6</sup> Condom quiaj tawüw ajcüwa fariseos najénan mayambüw minipilan Herodes, matüniw manguaiyiw nguineay alndom mambiyaw Teat Jesús.

*Aliw mbeay yow xeyay nipilan*

<sup>7</sup> Teat Jesús taw quiaj maquíümb minipilan nej, andüyiw mbeay aaga nadam yow. Átan tandüjpiw nej xeyay nipilan monaw Galilea, at monaw Judea.

<sup>8</sup> Aton tambüw majawüw nej xeyay nipilan monaw Jerusalén, monaw Idumea, monaw necamb lam Jordán, at monaw tiül ajcüwa cambaj ayey tiüt Tiro y Sidón. Tapeayiw quiaj xeyay nipilan cos tanguiayiw wüx meáwan najneaj leaw arang.

<sup>9</sup> Quiaj Teat Jesús tasaj minipilan nej mayambüw nop müx mayacüw quiaj mbeay yow, para alndom majtep tiül sitiül apmacharrüw nej.

<sup>10</sup> Cos lamamongoch iün andeow xeyay nipilan, áag meáwan moniün andeow tiünüw acharrayej wüx ombas nej, mar-rejquiw.

<sup>11</sup> Wüx tajawüw nej ajcüwa nipilan leaw alwüx ombasüw nimeech, quiaj taquejliw micosüw nejiw teombas nej, tepajüw, tapiüngüw:

—¡Ique Micual Teat Dios ic! —awüw.

<sup>12</sup> Teat Jesús talic nejiw xeyay cos nganaw mandüüm majaraw jane nej.

*Teat Jesús tarriüüd gajpiüp minipilan nej*  
(Mt. 10:1-4; Lc. 6:12-16)

<sup>13</sup> Condom Teat Jesús tamb andüy wüx nop tüüch, tandüjpiw nej mamb xeyay nipilan. Quiaj tasaj nejiw leaw lamandüüm marriüüd mambüw majawüw nej nejiwan quiaj.

<sup>14</sup> Tarriüüd gajpiüp (12) monxey maquíüjpüw nej, müüch nejiw mambüw masajüw nipilan nguineay alndom maw asoetiw nejiw.

<sup>15</sup> Tüüch ndoj ombasüw mamongochiw iün andeow nipilan, at matajcüw majneaj leaw alwüx ombasüw nimeech.

<sup>16</sup> Ajcüwa gajpiüp monxey quiaj tajlüyiw: nop Simón aaga tüünd manüt Pedro.

<sup>17</sup> Átan a Jacobo maquíümb michiig nej Juan, micual nejiw Zebedeo, leaw Teat Jesús tüüch nejiw manütiw Boanerges; aaga poch quiaj amb apiüing: micual atearriür monteoc.

<sup>18</sup> Aton tajlüyiw tiül aaga gajpiüp: Andrés, Felipe, Bartolomé, Mateo, Tomás, Jacobo micual Alfeo, Tadeo, at Simón naw tiül noic ajlüy nipilan nasoiquiw Cananista.

<sup>19</sup> At aton talüy tiül a Judas Iscariote, aaga ndoj tayac teowixaw monajiüt Teat Jesús. Ndoj tajmeliw tiül nop iüm.

*Apiüngüw ambeol nej nimeech*  
(Mt. 12:22-32; Lc. 11:14-23; 12:10)

<sup>20</sup> Quiaj canchiüto alinomb niüing ajlüyiw nejiw xeyay nipilan, ngo müjchiw nejiw metiw.

<sup>21</sup> Wüx tanguiayiw acualaats nej Teat Jesús nguineay teamarang, quiaj tambüw majanüw nej, cos lapiürang nej lamichach.

<sup>22</sup> At aton wüx tapeayiw quiaj mondüy wüx aaga poch tüünd Moisés, imiünüw Jerusalén, tapiüngüw:

—Aaga Jesús quiaj, alwüx ombas nej minatang nimeech nenüt Beelzebú; aaga nimeech quiaj ambeol nej mataag majneaj leaw alwüx ombas nej nimeech —awüw.

<sup>23</sup> Quiaj tapaj nejiw Teat Jesús, tasaj nejiw acas poch, pero ngame aleáingan. Tapiüing:

—¿Nguineay alndom a Satanás mawün nejay a Satanás wüx ombas nipilana?

<sup>24</sup> Jondot monajiüt tiül noic cambaj majcüyiw nejeyéjan quiaj mbajcamoj, aaga cambaj quiaj ngondom majlüy najneaj, apndrom ombas.

<sup>25</sup> At aton sitiül nacualaran tiül noic nden majcüyiw nejeyéjan quiaj, apndajriümoj.

<sup>26</sup> Pero sitiül Satanás ajcüy majaw aquiüb nej, ngo majlüyw nóiquian, quiaj langondom marangüw nicuajind.

<sup>27</sup> Nejingüind ngondom maneed aniüng nop napac naxey sitiül ngome ombas maóel owix, cas tajmel maneed leaw andiüm.

<sup>28</sup> Naleaing sasaj icon, meáwan nisoet leaw arangüw nipilan, Teat Dios alndom mawün wüx omeaats. At cuajantanej ngo majneaj poch andeacüw alndom mawün wüx omeaats aton.

<sup>29</sup> Pero jangantanej leaw apmandeac ngo majneaj wüx Nangaj Espiritu ocueaj Teat Dios, aag ayaj mbich ngondom mawün wüx omeaats nej Teat Dios. Cos aaga nisoet quiaj nómban ngondom maw —aw Teat Jesús.

<sup>30</sup> Atquiaj tasaj nejiw Teat Jesús cos nejiw tapiüngüw alwüx ombas nej nimeech.

*Mimüm Teat Jesús y michiig nej tambüw majawüw nej*

(Mt. 12:46-50; Lc. 8:19-21)

<sup>31</sup> Condom tapeayiw quiaj mimüm Teat Jesús maquiüb michiig nej majawüw nej, pero ngome tajmeliw. Quiaj tapiüngüw mamb majpaj.

<sup>32</sup> Ajcüwa nipilan alchetemoj quiaj ayeyiw nej tiüt, tasajüw nej:

—Joyaj mimüm aquiüb michiig teamayambüw ic —ajüw nej.

<sup>33</sup> Quiaj tasaj nejiw Teat Jesús:

—¿Jane ipiüangan xemüm, jane ipiüangan xechiig? —aj nejiw.

<sup>34</sup> Quiaj taxaing omal majaw leaw alchetemoj quiaj niüng ajlüy nej, tapiüng:

—Icona ijlüyiün atnej xemüm, xechiig.

<sup>35</sup> Cos jangantanej sitiül arang leaw andiüm Teat Dios, aag ayaj sayaag ajlüy atnej xemüm, xechiig aton —aw.

## 4

*Andeac andüy wüx nop nepiür*

(Mt. 13:1-9; Lc. 8:4-8)

<sup>1</sup> Noic nüt Teat Jesús tamelich aquiaach nipilan mbeay nadam yow Galilea. Cos canchiütoj niüng ajlüy nej xeyay nipilan; áag Teat Jesús tajmel tiül yow, tajtep tiül nop müx chetem. Meáwan nipilan tacüliw wüx iüt mbeay yow.

<sup>2</sup> Ndoj quiaj tasaj nejiw acas poch ngome aleáingan, tandeac andüy wüx cuajantanej maquiaach nejiw. Tapiüng:

<sup>3</sup> —Inguiayüün leawa sanandeac: Tajlüy nop naxey tamb apiür.

<sup>4</sup> Wüx teamawiich osaab soex, quiaj tajmiüc tigüy mbeay tiüü. Condom tajngotoj a quiec, tüetiw.

<sup>5</sup> Altigüy tajmiüc tiül piedra niüng ngo majlüy xeyay iüt. Tajntsop najen cos ngo majlüy xeyay iüt.

<sup>6</sup> Wüx tajntsop nüt terraar, quiaj tambel nej. Cos ngo majiür mioxiich nej, quiaj tawaag a nine soex quiaj.

<sup>7</sup> Altigüy tajmiüc tiül sats. Wüx tajntsop, cos sats najen atangüw, quiaj taxotüw tiüt a nine soex quiaj. Atquiaj taton ngondom meongoj.

<sup>8</sup> Altigüy tajmiüc tiül najneaj iüt, tatang najneaj, tayac aóng. Tigüy taóng napateay, altigüy tayac wüx quiriw, altigüy tayac wüx xeyay aóng —aj nejiw Teat Jesús.

<sup>9</sup> Andüüban Teat Jesús tasaj nejiw:

—Netam menguiayüün, mexoman imeajtsan wüx leaw sandeac quiaj —aj nejiw.

*Cuane wüx amb apiüng aaga andeac quiaj*

(Mt. 13:10-17; Lc. 8:9-10)

<sup>10</sup> Wüx lango majlüyiw quiaj xeyay nipilan, quiaj leawa tajlüyiw niüng ajlüy Teat Jesús maquiüjpüw ajcüwa gajpiüp (12) minipilan nej, tatüniw manguiayiw nej cuane wüx amb apiüng aaga andeac quiaj.

<sup>11</sup> Quiaj Teat Jesús tasaj nejiw:

—Icona tengual meajndiün mejawan leawa nomb ngo majüiquicharan, nguineay alndom majmелaran tiül minipilan Teat Dios. Pero pálwüx nipilan ngome apma-soiquiw aleáingan.

<sup>12</sup> Atquiaj sarang para majawüwan, manguiayüwan, pero naleaing ngome apmajawüw cuane wüx amb apiüng. Cos sitiül apmajawüw, alndom mayariw, maw asoetiw nejiw —aj nejiw Teat Jesús.

*Cuane wüx amb apiüng wüx nepiür*

(Mt. 13:18-23; Lc. 8:11-15)

<sup>13</sup> Condom Teat Jesús tatün manguiay nejiw:

—¿Ngo mejawana cuane wüx amb apiüng leawa sandeac quiaja? ¿Nguineay apmejawan meáwan leawa sanandea? —aj nejiw.

<sup>14</sup> Quiaj tapiüng:

—Aaga nepiür quiaj apiüng wüx nop nendead Mipoch Teat Dios.

<sup>15</sup> Ajcüwa osaab soex najmiücüw mbeay tiüü, aag ayaj nipilan leaw asoiquiw wüx Mipoch Teat Dios. Ndoj manguiayiw, andüüban ajngot nimeech mawün wüx omeajtsüw nejiw aaga Mipoch Teat Dios leawa tanguaiyiw.

<sup>16</sup> Aton ajlüy nipilan atnej aaga osaab soex leawa tajmiüc tiül piedra. Cos wüxan asoiquiw wüx Mipoch Teat Dios, apac omeajtsüw ayariw.

<sup>17</sup> Naleaing nejiw, cos ajlüyiw atnej aaga soex najntsop tiül piedra, ngo majiür mioxiich nej; áag ngo maíü. Cos wüx apmajlüy naél, majcüy majaw nejiw nipilan ajcan andüjpiw Mipoch Teat Dios, quiaj machiweaw omeajtsüw.

<sup>18</sup> At aton almajlüy nipilan atnej aaga osaab soex napiürüch tiül sats. Aaga nipilan quiaj anguiayiw Mipoch Teat Dios.

<sup>19</sup> Pero xeyay amb wüx omeajtsüw leaw alndom maxomüw wüx aaga iüt cam. Cos andiümüw majiürüch xeyay tomiün, andiümdüümüwan cuajantanej. Meáwan aag ayaj üüch nejiw ndrom omeajtsüw Mipoch Teat Dios; ngo müüch nejiw marangüw leawa Teat Dios apiüng.

<sup>20</sup> Aton altiül nipilan leaw anguiayiw Mipoch Teat Dios, ayariw mipoch nej, ayacüw wüx omeajtsüw. Nejiw ajlüyiw atnej aaga osaab soex napiürüch tiül najneaj iüt cos teongoj. Tegüy taóng napateay, alegüy tayac wüx quiriw, alegüy tayac wüx xeyay aóng —aw Teat Jesús.

*Tandeac andüy wüx ran*  
(Lc. 8:16-18)

<sup>21</sup> Condom tandeac alinoic tasaj nejiw:

—Sitiül aljane andiüm marraj tiül iüm jondot apmapal omal noic candil tiül nop xor, tengwüy apmayac tiüt teoleaj mats, ¿ngüneay aprram tiül iüma? Cos netam mayacüch cawüx, quiaj apmarraj najneaj tiül iüm.

<sup>22</sup> Atquiaj sasaj icon, cos meáwan leaw ngo majaraw nganüy, naleaing alinoic nüt apmajaraw nguineay. Ngo majlüy noic nanderac mexotüy nganüy leaw ngome apmajüic alinoic nüt —aj nejiw.

<sup>23</sup> Condom tapiüng:

—Meáwan icona lamenguiayiün aaga poch cam, nganüy iyacan wüx imeajtsan —aw.

<sup>24</sup> Aton tasaj nejiw:

—Iyacan wüx imeajtsan xepoch leawa temenguiayiün, iyariün. Cos sitiül apmeyacan wüx imeajtsan leawa lamenguiayiün, teamteáman apmeajndiün mejawan alquiriw.

<sup>25</sup> Cos sitiül aljane apmayar xepoch, nej apmüünd manguiaj alegüy. Pero sitiül ngo mayar xepoch, masey lamanguiaj quiripite apndrom omeaats —aj nejiw.

*Andeac andüy wüx nguineay atang a soex*

<sup>26</sup> Condom Teat Jesús tapiüng:

—Sanasaj icon nguineay arang wüx micambaj nej Teat Dios. Cos ajlüy atnej arang osaab soex lapiürüch.

<sup>27</sup> Quiaj aaga nepiür apmaxood mameay, ndoj apmapac. Atquiaj apmamong acas nüt acas ongwiiüts. Aaga osaab soex napiürüch quiaj apmajntsop, masey aaga nepiür quiaj ngondom majaw nguineay teajntsop, nguineay teatang.

<sup>28</sup> Cos aaga iüt teamatangüch aaga soex quiaj. Apmawün mbas onic nej, ndoj apmaól, ndoj quiaj apmatang osaab nej.

<sup>29</sup> Condom wüx latang, quiaj apmandojquich cos lamatüch a nüt xaijnguiam matajtüch —aj nejiw Teat Jesús.

*Andeac andüy wüx osaab mostaza*  
(Mt. 13:31-32; Lc. 13:18-19)

<sup>30</sup> Aton tasaj nejiw Teat Jesús:

—¿Nguineay alndom nasaj icon cuane atnej ajlüy micambaj Teat Dios, ngwüy cuane wüx alndom tandeac mejawan?

<sup>31</sup> Ajlüy atnej noic nine osaab soex nenüt mostaza. Aag ayaj noic osaab soex leawa napiürüch xowüy minine.

<sup>32</sup> Ndoj apiürüch, apmajntsop, apmarang noic najal oleaj soex, alwüx ajal oleaj tiül meáwan soex. Apmayac nadam mipüüg nej niüng quieic alndom marangüw ombiümüw nejiw maxojtüw —aj nejiw.

*Nguineay taquiaach Teat Jesús*  
(Mt. 13:34-35)

<sup>33</sup> Atquiaj taquiaach nejiw Teat Jesús wüx Mipoch Teat Dios, ngome aleáingan, leaw tayaag alndom manguiaiyiw.

<sup>34</sup> Ngo maquiaach nicuajind aleáingan manguiaiyiw nipilan. Wüx laawüw quiaj nipilan, quiaj tasaj minipilan nej cuane wüx tandeac.

*Teat Jesús talomboch iünd, at omal yow*  
(Mt. 8:23-27; Lc. 8:22-25)

<sup>35</sup> Aaga nüt quiaj wüx langwiiüts, quiaj tasaj minipilan nej:

—Tabaats andüyiiüts necamb aaga nadam yow cam —aj nejiw.

<sup>36</sup> Tacueatiwan quiaj meáwan nipilan. Quiaj tambüw nejiwan quiaj maquiüjpüw Teat Jesús amb tiül aaga müx alchetem tiül. Aton tambüw alacas müx maquiüjpüw nejiw.

<sup>37</sup> Wüx aleambüw tiül najal, quiaj taw noic napac iünd, tayac nadamdám omal yow anmachaachaach tiül müx, tengual chipiow a müx.

<sup>38</sup> Teat Jesús al wil müx almameay, ayac aliig omal. Quiaj tapacüjchwi tiül amey, tasajüw:

—¡Teat! ¿Neol ngo mejaw, laliüc tsoy-omoots tiüt? ¡Apmandeowaats! —ajüw.

<sup>39</sup> Quiaj witiüt Teat Jesús, tasaj a iünd lombom, at a yow majlüyan. Quiaj lombot a iünd, at a yow tajlüyan.

<sup>40</sup> Condom tasaj nejiw:

—¿Neol termbolana, neol ngome teyacan imeajtsan wüx leawa xique alndom naranga? —aj nejiw.

<sup>41</sup> Mbayatoj xeyay, tesajayej nejeyéjan quiaj, tapiüngüw:

—¿Cuaane nej aaga naxey cama? ¿Nguineay alndom mayar nej andeac a iünd at a yow? —awüw.

## 5

*Nop naxey alwüx ombas nej nimeech*  
(Mt. 8:28-34; Lc. 8:26-39)

1 Condom Teat Jesús maquiüb minipilan nej tapeayiw necamb aaga nadam yow quiaj, tiül miütüw monaw Gadara.

2 Almawüw tiüt imiünüw tiül müx, quiaj tapeay niüing ajlüy Teat Jesús nop naxey imiün tiül niüing amiüraad mondeow, alwüx ombas nej nimeech, tüch nej mechach

3 Aaga naxey quiaj acül tiül niüing amiüraad mondeow. Nejingüind ngondom maóel nej, masey naag galen.

4 Cos mbójan maoliw owix nej oleaj nej naag galen. Nej ngo mapiüing wüx, andoingdoog miün, nómban acolot. Nejingüind ngondom masap nej.

5 Aaga naxey quiaj, nüt ongwiiüts apaj tiül tüc, at niüing amiüraad mondeow. Aton achiüt ombas nej naag piedra.

6 Alücan miünquiaj tajaw Teat Jesús, tecuiür tamb mangoch, taquieel micos nej tiüt teomas Teat Jesús.

7 Quiaj tendecapac, tapiüing:  
—¿Cuane indiüm merang wüx ximbas Teat Jesús? Ique Micual Teat Dios najlüy tiül cielo. Satün icueaj wüx minüt Teat Dios, nde merang wüx ximbas nicuajind ngo majneaj —aw.

8 Atquiaj tapiüing cos Teat Jesús lamasaj nej:

—¡Ique nimeech, sasaj ic, iriow wüx ombas a naxey cam, icueat! —aw.

9 Ndoj Teat Jesús tatün manguiaj:  
—¿Cuane minüt? —aj.

Quiaj tapiüing:  
—Legión xenüt cos sajlyüiün xeyay —aw.

10 Quiaj tatün xeyay ocueaj Teat Jesús nde mawün nejw tiül aaga iüt quiaj.

11 Tajlüy quiaj wüx nop tüc noic ajlüy xeyay sow, teaüetiw.

12 Ajcüwa nimeech tatüniw ocueaj Teat Jesús, tapiüingüw:

—Iich xicon namban najmeliün tiül ajcüwa sow quiün —awüw.

13 Quiaj Teat Jesús tasaj nejw mambüw. Tacueatiw a naxey quiaj, tajmeliw tiül sow. Ajcüwa sow ajlüyiw xeyay, atüch ijquiaw mil, tecuiürüw ambüw wüx tüc tajchiquiaw tiüt tajmiücüw tiül aaga nadam yow quiaj, tsoyotoj tiüt, tandeowüw tiül yow.

14 Condom ajcüwa monjiür sow quiaj, tambüw acuiürüw masajüw nipilan tiül cambaj, tiül rüch aton. Quiaj tambüw nipilan majawüw cuane najlüy.

15 Wüx tapeayiw niüing ajlüy Teat Jesús, quiaj tajawüw aaga naxey tajlüy wüx ombas nej xeyay nimeech alchetem quiaj, lamasooig apix nej, lamajiür mifis nej. Mbayatoj xeyay majawüw.

16 Condom nipilan leawa tajawüw aag ayaj, tapots mapiüingüw nguineay tawüw nimeech wüx ombas aaga naxey quiaj, nguineay tandeowüw tiül yow meáwan sow.

17 Ndoj tapots masajüw Teat Jesús maw tiül miütüw nejw.

18 Teat Jesús almajtep tiül müx, laámb apmaw quiaj, quiaj aaga naxey tajlüy wüx ombas nej nimeech tatün ocueaj xeyay sitiül alndom maquiüb nej mamb.

19 Pero Teat Jesús tasaj nej:

—Quiür ijtsor teat, isaj icualaats nguineay tejneaj. Isajüw meáwan aaga najneaj leaw Teat Dios lamarang wüx imbas, nguineay tajiür ic lasta —aj.

20 Quiaj tamb a naxey mandeac, masaj nipilan tiül meáwan cambaj tiül Decápolis. Tasaj nejw nguineay tataag nej majneaj Teat Jesús. Meáwan nipilan mbayatoj manguiayiw.

*Micual Jairo, at aaga najtaj nerreeg apix Teat Jesús*

(Mt. 9:18-26; Lc. 8:40-56)

21 Condom Teat Jesús tandilil alinomb maquiüb minipilan nej, ambüw tiül müx, andüyiw necamb aaga nadam yow quiaj. Almapeayiw necamb, quiájan tacül Teat Jesús mbeay yow, cos tapeayiw niüing ajlüy nej xeyay nipilan.

22 Condom tapeay quiaj nop naxey nenüt Jairo, nop natang nenajiüt tiül a sinagoga; wüx tajaw Teat Jesús, quiaj taquieel micos nej tiüt.

23 Tatün xeyay, tapiüing:

—Teat, xecual nüx laxeyay iün andeow, laliüc mandeow. Mac Teat, tabar meyac iwix wüx ombas nej para majneaj —aw.

24 Quiaj Teat Jesús tamb maquiüb nej. Xeyay nipilan tandüjpiw, lacharrayej wüx ombas nej.

25 Tiül a nipilan quiaj tajlüy nop najtaj lamajiür gajpic (12) neat iün andeow, at-sambiich nej miquieje nej.

26 Lamamongoch xeyay wüx aaga monandeow quiaj. Masey lamong teomas xeyay mondüy, lamandrooch meáwan leaw ajiür, pero ngo mambeol nej nicuajind, teaxeyay marang nej.

27 Aaga najtaj quiaj wüx tanguiaj nguineay andeacüw wüx Teat Jesús, quiaj tamb matüch, amb wanopech Teat Jesús tarreeg apix nej.

28 Atquiaj tarang, cos lamapiüing tiül omeaats nej: “Sitiül narreeg masey apix nej, quiaj sanajneaj”.

29 Andüüban tayaag lajneaj, nómban lamong a monandeow quiaj.

30 Teat Jesús tayaag nej lamataag majneaj aljane, quiaj wantsat majaw tiül nipilan, tatün manguiaj:

—¿Jane tarreeg sapixe? —aw.

<sup>31</sup> Quiaj minipilan nej tasajüw nej:

—¿Neol ngo mejaw Teat, xeyay nipilan teamatechtechiw ic? Neol tepiung: “¿Jane tarreeg xic?” —ajüw.

<sup>32</sup> Teat Jesús tayamb tiül nipilan majaw jane tarreeg nej.

<sup>33</sup> Aaga najtaj mbayat cos tajaw teamayamb nej, tambeapmbeap nej. Pero cos tayaag lajneaj, quiaj tamb maquieel micos nej tiüt teombas Teat Jesús, tasaj nguineay tarang nej.

<sup>34</sup> Quiaj tasaj nej Teat Jesús:

—Xecual, lerjneaj cos teyac imeaats wüx xic. Nganüy quiür, ich mapac imeaats, lerjneaj nómban —aj nej.

<sup>35</sup> Teat Jesús tengualeámban andeac aweaag a najtaj, quiaj tapeayiw masajüw a Jairo, aaga nenajiüt tiül sinagoga, tapiungüw:

—Teat, micual landeow, icueat mesajsaj aaga Teat Naxey quiaj —ajüw.

<sup>36</sup> Naleaing Teat Jesús, masey tanguiaj andeacüw ajcüwa monxey quiaj, nej tasaj aaga nenajiüt:

—Nde mbayamear teat, iyac imeaats wüx xique —aj.

<sup>37</sup> Ndoj ngome tüüch mambüw maquiiüb nejw meáwan minipilan nej, áagan a Pedro maquiiüb Jacobo, at a Juan michiig Jacobo taquiiüb mamb.

<sup>38</sup> Wüx tapeayiw aniüng aaga nenajiüt tiül sinagoga, Teat Jesús tajaw alquiaj xeyay nipilan teajiüntsüw napac, y altiül teapajüw.

<sup>39</sup> Wüx tajmel tiül iüm, quiaj tasaj nejw:

—¿Neol tapots ijiüntsana? Aaga nüx cam ngome landeow, alnameay —aj nejw Teat Jesús.

<sup>40</sup> Quiaj titsojow nej, cos ajawüw naleaing landeow a nüx quiaj. Condom Teat Jesús tawün nejw tiül iüm, taquiiüb áagan miteat nej mimüm nej a nüx, at leaw almaquiiüjpüw nej. Tajmeliw matüchiw niüng ajlüy a nüx.

<sup>41</sup> Quiaj Teat Jesús tasap owix a nüx, tasaj wüx ombeayiw nejw:

—Talita cumi —aj. Aag ayaj amb apiüng: Xecual sasaj ic, witiüw.

<sup>42</sup> Quiaj witiüt a nüx, tajüy. Meáwan nipilan xeyay mbayatoj majawüw. Aaga nüx quiaj lamajiür gajpic (12) mineat nej.

<sup>43</sup> Condom Teat Jesús tasaj nejw nde mandeacüw manguaiyaran leawa tarang. Tasaj nejw aton mayambüw üet a nüx quiaj.

## 6

*Teat Jesús ngo mandüüram tiül Nazaret (Mt. 13:53-58; Lc. 4:16-30)*

<sup>1</sup> Condom Teat Jesús taw quiaj, tandilil alinomb andüy tiül miüt nej, minipilan nej aton tandüjpiw nej.

<sup>2</sup> Wüx tatüch a nüt axoodaran, quiaj tapots aquiaach tiül a sinagoga. Xeyay nipilan wüx tanguiaiyw andeac nej mbayatoj. Tapiungüw:

—¿Nguiaane tequiajchay aaga naxey quiaja? ¿Nguineay tendüye? ¿Nguineay ndot ombas marang cuajantanej ateócan?

<sup>3</sup> ¿Neol ngome nop icoots aaga naxey quiaja? ¿Ngome nej nerang xiül, micual nej María? Aton alningüy tiül micamba-jaats acüliw michiig nej Jacobo, José, Judas, Simón, at michiig monüx nej aton aliw ningüy —awüw.

Taton ngome tandiümüw mayariw andeac nej.

<sup>4</sup> Quiaj Teat Jesús tasaj nejw:

—Xique samongoch atnej amongoch nop nendeac andeac Teat Dios cos ayarich andeac nej nguiajantanej, áagan tiül miüt nej ngo mandüüram. Átan acualaats nej, micoj nej, michiig nej, ngo mayariw nej andeac —aj nejw.

<sup>5</sup> Tiül a cambaj quiaj ngome tarang nadam ateócan. Áagan acas moniün andeow tataag majneaj, tayac owix wüx nejw.

<sup>6</sup> Nej ayaag xeyay ngo majneaj cos ngo mayariw nej andeac. Ndoj taw quiaj, tamb andüy tiül namix nine cambaj quiájan, maquiaach.

*Teat Jesús tüüch mambüw mandeacüw wüx nej*

(Mt. 10:5-15; Lc. 9:1-6)

<sup>7</sup> Condom quiaj tapaj miünüw niüng ajlüy nej ajcüwa gajpiüp (12) minipilan nej. Quiaj tapots masaj nejw mambüw ijüwpüw. Aton tüüch nejw ndoj ombasüw matajcüw majneaj nipilan alwüx ombasüw nimeech.

<sup>8</sup> At aton tasaj nejw nde majoyiw nicuajind tiül tiüüd. Alndom majoyiw áagan notsnots angotoj, mambeol nejw. Ngondom majoyiw nchiüts, pemb, nüeteran; aton tomiün ngondom majoyiw.

<sup>9</sup> Netam masojquiw napüic, pero ngondom majoyiw ijquaiw najal camix.

<sup>10</sup> Aton tasaj nejw:

—Wüx apmepeayiw tiül noic cambaj, apmexoitan quiaj tiülan noic nden. Nde membiülüjchiün niüng ixojtan. Apmeriowan quiaj wüx apmeamban tiül alinoic cambaj.

<sup>11</sup> Sitiül noic cambaj ngo mangochiw icon, ngo mandüümüw manguiaiyw indeacan, icueatiün, iriowan quiaj. Wüx apmeriowan quiaj, itajtan minajndot ileajiün majüic nejw ngo majneaj arangüw cos ngo müjchiw icon mendeacan quiaj xepoch. Naleaing sasaj icon, alinoic nüt wüx Teat Dios apmajaw wüx asoeteran, nejw xeyay ngo majneaj apmamongochiw cos ngo mandüümüw manguiaiyw indeacan. Alwüx apmamongochiw, ngo matnej leaw apmamongochiw nipilan tandeowüw

nomb, ajcūwa monaw tiül cambaj Sodoma maquiiüb Gomorra —aj nejiw Teat Jesús.

<sup>12</sup> Quiaj tawwū ajcūwa gajpiüp minipilan nej, tambwū masajwū nipilan leaam omeatsūw wūx aaga ngo majneaj teamarangwū, macueatiw.

<sup>13</sup> At aton wūx minüt Teat Jesús tatajcwū majneaj nipilan alwūx ombaswū nimeech, üüch nejiw michachiw. At tajendiw aceite wūx omal moniün andeow, quiaj tajneajiw.

*Tambiyaw a Juan Bautista*

(Mt. 14:1-12; Lc. 9:7-9)

<sup>14</sup> Condom aaga rey Herodes tanguaiy nguineay teamarang Teat Jesús, cos meáwan nipilan teamandeacwū wūx nej. Quiaj Herodes tapiüng:

—¿Ngwüy naleaingue, Juan, aaga neech yow nipilan lapac tiül mondeowa? ¿Pares ndot ombas marang xeyay cuajantanej atécán aaga naxey quiaja? —aw.

<sup>15</sup> Altiül tapiüngwū:

—Ngwüy, aag ayaj mixejchiüts Elías, awüw. Altiül tapiüngwū: Aag ayaj alinop nendeac andeac Teat Dios tajlüy tanomb —awüw.

<sup>16</sup> Pero wūx Herodes tanguaiy aaga andeacwū quiaj, tapiüng:

—Ngwüy, aag ayaj sapiüng Juan, aaga tūjchiüs mamb ndojquiüm onic nej, nganüy lapac tiül mondeow —aw a Herodes.

<sup>17</sup> Atquiaj tapiüng Herodes cos alwūx omeaats leawa tarang, cos nej tüüch mamb ndeam a Juan, majmel tiül manchiüc, naoelich naag galen. Aag ayaj tarang Herodes cos atquiaj tandiüm minajtaj nej nenüt Herodías. Aaga Herodías quiaj mintaj Felipe, michiig Herodes, nganüy Herodes lamaquiiüb.

<sup>18</sup> Cos Juan wūx aliün mapac tasaj Herodes:

—Ngo majneaj mequiiüb mintaj michiig —aj.

<sup>19</sup> Quiaj Herodías xeyay tajcüy majaw a Juan. Tandiüm mambiy; pero ngome taxom nguineay marang.

<sup>20</sup> Cos Herodes lamajaw Juan arang leaw andiüm Teat Dios, aton andeac leaw naleaing, pares tembol mandüy, ngo müüch a Herodías marang ngo majneaj wūx ombas a Juan. Herodes masey ngo maxom omeaats wūx leaw tandeac a Juan, nej xeyay tandiüm manguiay.

<sup>21</sup> Noic nüt wūx Herodes tarang noic nangs nüt ajcan lamatüch alinoic mineat nej, quiaj aaga najtaj Herodías taxom nguineay marang. Cos Herodes tapaj meáwan monajjüt, at nipilan monjiür tomiün tiül aaga iüt Galilea, marang noic nadam nangs nüt.

<sup>22</sup> Quiaj tamb nop nūx, micual aaga najtaj Herodías, tajmel niüng ajlüy monet mejiüng.

Herodes y leaw aliw quiaj tandiümwū majawwū ajiüng a nūx quiaj. Condom a rey Herodes tasaj a nūx:

—Itün xicueaj leaw indium, xique sanüüch ic —aj.

<sup>23</sup> Nej tapaj minüt dios mapiüng naleaing apmüüch, ngo mawaiich, tapiüng:

—Cuajantanej apmetün, xique sanüüch ic, masey pinawan leaw alnajiür —aw a Herodes.

<sup>24</sup> Quiaj taw a nūx, tamb matün manguiay mimüm nej. Tasaj:

—Müm, ¿cuane indium mejaw natüna? —aj.

Quiaj mimüm nej tapiüng:

—Itün omal aaga Juan, áag neech yow nipilan —aj.

<sup>25</sup> Andilílan tiüt a nūx, tamb andüy niüng ajlüy Herodes, tapiüng:

—Teat, sandiüm nganüy nganüy meaach xic omal aaga Juan amb tiül noic polat —aj.

<sup>26</sup> Quiaj Herodes tamix omeaats xeyay; pero cos nej lamapaj minüt dios, aton tandeac manguiayiw nipilan. Nganüy netam marang, müüch leaw atün a nūx quiaj.

<sup>27</sup> Najénan tüüch mamb nop soldado, tasaj mandooig onic a Juan majamiün omal.

<sup>28</sup> Quiaj tamb a soldado majaw tiül manchiüc mandooig onic a Juan. Condom tajoy omal a Juan amb tiül noic polat, tüüch a nūx. Quiaj a nūx tamb müüch mimüm nej.

<sup>29</sup> Wūx minipilan Juan tanguaiyiw nej landeow, quiaj tambwū maxainguwiw, tajoyiw mamiütüw. Atquiaj tarang Herodes wūx tambiy aaga Juan.

*Teat Jesús tüüch üetiw acoquiaw mil monxey*

(Mt. 14:13-21; Lc. 9:10-17; Jn. 6:1-14)

<sup>30</sup> Condom wūx tapeayiw ajcūwa gajpiüp (12) monamb ijpüwpwū, tapos masajwū Teat Jesús nguineay tarangwū, nguineay taquiajchiw nipilan.

<sup>31</sup> Quiaj tasaj nejiw Teat Jesús:

—Nganüy macaron, tabaats maxojtaats quiripite niüng ngo majlüy nipilan —aj nejiw.

Cos xeyay nipilan tengual apeayiw quiaj niüng ajlüy nej, pálwüx teawwū. Ngo müjchiw nejiw matüch metiw.

<sup>32</sup> Ndoj quiaj tajtepiw tiül nop müx, tambwū nejwan quiaj, andüyiw niüng ngo majlüy nipilan.

<sup>33</sup> Pero xeyay nipilan tajawwū nejiw ambwū, aton tajawwū jane nejiw; quiaj tambwū acuiürrüw imiünwū tiül micambajwū nejiw. Ombas mapeayiw quiaj, teoj mapeay Teat Jesús.

<sup>34</sup> Wūx Teat Jesús taw tiüt imiün tiül müx maquiiüb minipilan nej, tajaw xeyay nipilan teamacüliw nej. Quiaj tajmiüc omal

omeaats, cos tajaw ajlüyiw atnej tigüy nacueat sap, ngo majlüy wüx nejiür nejiw. Quiaj tapots maquiaach nejiw xeyay cuajantanej.

<sup>35</sup> Wüx langwiiüts laliüc majmel nüt, quiaj minipilan nej tambüw masajüw nej:

—Teat, langwiiüts ¿nguiueay apmarangaats? Cos nejingüind ngo macül ningüy.

<sup>36</sup> Isajüw mambüw tiül cambaj y tiül rüñch mangalüw üetiw, cos ngo majiürüw üetiw nejiw —ajüw nej.

<sup>37</sup> Quiaj Teat Jesús tasaj nejiw:

—Icona iyamban üetiw —aj nejiw.

Quiaj tapiüngüw:

—¿Teat, nguiueay? ¿Ngwüy sanamban nangalan ijquaiw acoic miow (200) denario pan müjchiüts müetiwe? —awüw.

<sup>38</sup> Teat Jesús tasaj nejiw:

—Quiüran ijawan cas pan ijiüran ningüy —aj nejiw.

Wüx tajawüw cas pan ajlüy, quiaj tasajüw nej:

—Ajlüy acoquiaw pan aljpwüw cüet —ajüw.

<sup>39</sup> Quiaj Teat Jesús tasaj nejiw masajüw nipilan chetemoj noicnoic ajlüy tiül nine nateaic soex.

<sup>40</sup> Quiaj chetetoj; al tiül atüch coic miow (100), al tiül ic miow gajpowüw (50) noicnoic ajlüy.

<sup>41</sup> Condom Teat Jesús taxaing aaga acoquiaw pan al jpwüw cüet. Taxaing omal majaw cawüx, tüüch gracias Teat Dios. Condom wüx tambaag aaga pan texeyay. Quiaj tüüch minipilan nej majineaw müjchiw meáwan nipilan. At aaga jpwüw cüet aton tambaag müüch nejiw majineaw.

<sup>42</sup> Condom tatüch müetiw meáwan nipilan paxiünüy üetiw.

<sup>43</sup> Wüx landoj, quiaj taxainguiw leawa minaw a pan, at a cüet, chipiüt gajpiüp (12) nchep.

<sup>44</sup> Ajcüwa tetiw quiaj atüch acoquiaw mil monxey.

*Teat Jesús tajüy teomal yow*  
(Mt. 14:22-27; Jn. 6:16-21)

<sup>45</sup> Quiaj Teat Jesús tasaj minipilan nej majtepiw tiül müx mamongoj andüyiw necamb a nadam yow quiaj. Tasaj nejiw mambüw ombas nejiw mandüyiw tiül cambaj Bet-saida. Cos nej apmacül quiaj leawa ümb majtsor nipilan, quiaj apmaw quiaj.

<sup>46</sup> Wüx laümb majtsor nipilan, quiaj tamb andüy wüx nop tiüc mataag orar, mandeac aweaag Teat Dios.

<sup>47</sup> Wüx lapojniow, aaga müx namb lamatüch pinawan aaga nadam yow quiaj, nganüy Teat Jesús néjan quiaj aliün wüx iüt.

<sup>48</sup> Nej tajaw laümb apacüw majombüw a yow majüyichaw a müx, cos angochiw a iünd. Wüx landüy wüx arraw, quiaj Teat Jesús

tamb matüch nejiw, ajüy amb teomal yow. Tarang atnej apmamóngan.

<sup>49</sup> Wüx tajawüw nop najüy amb teomal yow, quiaj tepajüw:

—¡Aag ayaj nembolooch! —awüw.

<sup>50</sup> Meáwan nejiw tajawüw, xeyay mbayatoj. Quiaj Teat Jesús tasaj nejiw:

—Nde mbayameron, ich mapac imeajt-san cos xique, ngome aljane —aj nejiw.

<sup>51</sup> Condom tajtep tiül müx maquiüüb nejiw; quiaj lomboj a iünd. Mbayatoj majawüw, ndoj tapac omeajtsüw

<sup>52</sup> Nejiw nganaw majawüw nguiueay tarang wüx tüüch mexeyay a pan, aliün mapac omalüw.

*Teat Jesús tüüch majneaj moniün andeow tiül Genesaret*

(Mt. 14:34-36)

<sup>53</sup> Tapeayiw necamb a yow tiül iüt Genesaret. Quiaj tawüw tiüt, taoeliw mimüxiw nejiw mbeay yow.

<sup>54</sup> Wüxan tajtepiw wüx iüt, quiaj nipilan tajawüw nejay Teat Jesús napeay.

<sup>55</sup> Condom quiaj tambüw acuiürrüw masajüw meáwan nipilan tiül aaga iüt quiaj. Quiaj tapots apeayiw nipilan maquiüjpwüw miün moniün andeow amb wüx mats, andüy niüng tanguyaiw alquiaj Teat Jesús.

<sup>56</sup> Nguiajantanej leaw niüng tamb, masey tiül cambaj, masey tiül rüñch, tacüliw nej xeyay nipilan. Tayacüw ajcüwa moniün andeow mbeay plas pinawan cambaj, at tiül tiüüd aton. Tatüniw xeyay ocueaj Teat Jesús sitiül alndom ajcüwa moniün andeow masambüw nej masey apix nej. Meáwan leaw tasambüw nej tajneajiw nómban.

## 7

*Leaw iüch majiür nisoet nipilan*  
(Mt. 15:1-20)

<sup>1</sup> Noic nüt acas fariseos tambüw majawüw Teat Jesús, maquiüjpwüw ajcüwa mondüy wüx aaga poch tüünd Moisés, napeayiw imiünüw Jerusalén.

<sup>2</sup> Quiaj tajawüw altiül minipilan Teat Jesús teaüetiw; pero ngo marangüw atnej ajlüyay marangüw meáwan nipilan judío wüx ajantsüw owixaw. Áag tandeacndeacüw ngo majneaj wüx ombasüw nejiw.

<sup>3</sup> (Cos ajcüwa fariseos at meáwan judíos ajlüyayej wüx marangüw atnej arangüw mixejchiw nejiw, cos ngo metiw sitiül ngo majantsüw owixaw nejiw xeyay atnej apiüngüw netam.)

<sup>4</sup> Wüx nejiw apeayiw ajüyiw tiül plas angalayej, ngondom müetiw nicuajind sitiül ngo majantsüw owixaw atnej apiüngüw netam marangüw. Aton ajtürüw palpáwüx arangüw wüx ajantsüw inganeowayej, xar iüt, xar manchiüc, at mimatsüw nejiw aton.)



<sup>5</sup> Quiaj ajcūwa fariseos at mondūy wūx aaga poch tūünd Moisés, tatūniw manguaiyiw Teat Jesús. Tasajūw:

—¿Neol minipilan ngo mandūjpiw leaw tarangūw mixejchiūtsa? ¿Neol ngo majantsūw owixaw wūx ūetiw atnej ajlūyay marangaatsa? —ajūw.

<sup>6</sup> Quiaj Teat Jesús tasaj nejiw:

—Icona monwaiich, iwūyayon wūx irangan najneaj, naleaing tarang Isaiás tiül minawiig nej aaga poch niüng Teat Dios tapiüng:

Ajcūwa nipilan quiaj apiüngūwan ayariw sandeac, ngome con omeajtsūw, ombeayīwan.

<sup>7</sup> Ngo membeat marangūw atnej arangūw xic casa,

cos meáwan leaw aquiajchiw, aag ayaj mipochīwan nejiw.

<sup>8</sup> Pero icona landroj imeajtsan leaw Teat Dios apiüng netam merangan, cos tengual ipacan wūx leaw ngo metam, leaw mixejchiün tarangūw. Atnej wūx ijantsan ajcūwa xar, tas, at teamendūjpiün cuajantanej leawa tayacūw mixejchiün, aj nejiw Teat Jesús.

<sup>9</sup> Tasaj nejiw aton:

—Icona tewūniün ninguiün meáwan leawa tasaj icon Teat Dios merangan, cas tendūjpiün opech leawa tayacūw mixejchiün.

<sup>10</sup> Teat Moisés tarang tiül minawiig nej, tapiüng: “Iyar andeacūw miteat, mimüm, indiumūw”, aw. Aton tapiüng: “Jane apmapaiich mandeac ngo majneaj wūx ombas miteat nej, mimüm nej, ich mambiyaran”, aw a Moisés.

<sup>11</sup> Pero icona xeyay ngo majneaj irangan, cos ipiüangan aljane alndom masaj miteat nej, mimüm nej, mapiüng: “Leawa alnajiür langondom nūüch icon, cos aag ayaj Corbán”. (Amb apiüng meáwan leaw ajiür lamüüch Teat Dios.)

<sup>12</sup> Wūx apmapiüng aag ayaj, quiaj lango metam mambeol miteat nej mimüm nej cos icona iqiajchiün ombeay.

<sup>13</sup> Wūx irangan aag ayaj, quiaj temewūniün ninguiün Mipoch Teat Dios, teyacan ingow leawa tayacūw mixejchiün marangūch. Ajlūy xeyay cuajantanej atnej aag ayaj leaw icona teyacan marangūch —aj nejiw Teat Jesús.

<sup>14</sup> Quiaj Teat Jesús tapaj nipilan alinomb masaj:

—Inguiayīün, iyacan wūx imeajtsan leaw sanasaj icon.

<sup>15</sup> Cuajantanej leaw alndom müeteran, manganeowaran ngo müüch nop majiür nisoet; pero leawa alwūx omeaats mandeac mbich alndom mayac nej asoet.

<sup>16</sup> Jane andiüm manguaiy, ich manguaiy mayac wūx omeaats —aj nejiw Teat Jesús.

<sup>17</sup> Condom wūx Teat Jesús taw niüng ajlūy meáwan nipilan, quiaj tajmel tiül iüm. Ndoj minipilan nej quiaj tapots matūniw manguaiyiw nej, tasajūw:

—¿Cuane wūx tandeac aaga les ndot mandeac quiaja? —ajūw nej.

<sup>18</sup> Quiaj tasaj nejiw:

—¿Neol, ata icona aton ngo mejawan leawa tandeacas? ¿Neol ngo mejawana, meáwan leaw alndom müeteran ngo müüch majiür nisoet nipilan?

<sup>19</sup> Cos nüeteran andūyan teomeaatsaran apmamb, ndoj apmaw. Aaga nüeteran quiaj ngo müüch majiür nisoet nipilan —aj nejiw Teat Jesús.

Nej tandeac wūx aag ayaj majiüquich meáwan cuajantanej nüeteran alndom müeteran, ngome nisoet.

<sup>20</sup> Aton tapiüng:

—Leawa nop apmandeac wūx omeaats, mbich aag ayaj alndom müüch nej majiür nisoet.

<sup>21</sup> Cos imiün wūx omeaatsaran aw leaw ngo majneaj arangūch. Aag altiül nipilan ajiürūw minajtajūw nejiw, minaxeyiw nejiw, at altiül monench ajlūyiw maquiüjpūw monüx, átan monüx maquiüjpūw monench, at monbiy nipilan aton.

<sup>22</sup> At ajlūy moneed, ajlūy reech, ajlūy monrang xeyay ngo majneaj, at monwaiich, ajlūy monjūyūy, ajlūy mondiüm ocueaj alinop. Aton ajlūy monpaiich, monrangrangūy, ajlūy nerangrang michach.

<sup>23</sup> Meáwan aaga ngo majneaj arangūch quiaj, imiün tiül omeaatsaran. Aag ayaj mbich üüch majiüraran nisoet —aw Teat Jesús.

*Nop najtaj ngome micual iüt tayar andeac Teat Jesús*

(Mt. 15:21-28)

<sup>24</sup> Condom Teat Jesús taw quiaj tamb andūy niüng ajlūy cambaj Tiro y Sidón. Tandūy tiül noic naniüngaran, maxood quiaj, cos nej ngo mandiüm majawūw nej nipilan. Pero naleaing ngondom mexotūy.

<sup>25</sup> Nop najtaj najénan tanguaiy Teat Jesús lapeay quiaj. Aaga najtaj quiaj ajiür nop micual nej nūx, alwūx ombas nej nimeech, üüch nej michach. Quiaj tamb maquieel micos nej tiüt teombas Teat Jesús.

<sup>26</sup> Aaga najtaj quiaj ngome micual iüt Israael, nej nop sirofeniciana. Nej tatün xeyay ocueaj Teat Jesús mamb mawün nimeech wūx ombas micual nej.

<sup>27</sup> Quiaj Teat Jesús tasaj nej:

—Icül, cos ombas netam metiw nacualaran, cos ngo majneaj majnot ūetiw nejiw majlos müjndiw a namix nine pet müetiw —aj nej.

<sup>28</sup> Aaga najtaj tasaj nej:

—Teat, naleaing aag ipiüing quiaj, masey ombas apmetiw a nacualaran, pero aton nine pet alndom mamilmil leawa najmiüc tiüt minaw üet nacualaran —aj nej.

<sup>29</sup> Quiaj tasaj nej Teat Jesús:

—Xecual, najneajay indeac quiaj. Nganüy quiür ijaw micual, cos lanüüch majneaj, lamacueat nej nimeech —aj nej.

<sup>30</sup> Naleaing tasoic, cos wüx tapeay aniüing nej, quiaj tajaw micual nej alpiüüm wüx mats, lajneaj, lamacueat nej nimeech.

*Teat Jesús tüüch majneaj nop nelaag, nejew*

<sup>31</sup> Condom Teat Jesús taw quiaj tiül miüüt monaw Tiro, tamong amb tiül Sidón, at tamong amb tiül miüüt Decápolis, tatüch mbeay aaga nadam yow Galilea.

<sup>32</sup> Taquiüübaran mamb quiaj majaw nej Teat Jesús nop naxey nelaag, aton ngondom mendeac. Quiaj tatüniw oceaj Teat Jesús sitiül alndom mayac owix wüx aaga naxey quiaj müüch majneaj.

<sup>33</sup> Quiaj Teat Jesús tawün ningüün quiuriw aaga naxey quiaj nejeweáagan quiaj. Condom Teat Jesús taxec micual owix nej teolaag a naxey quiaj, ndoj tateonts onts ombeay nej cas tarreeg oniw a naxey quiaj.

<sup>34</sup> Condom quiaj taxaing omal majaw andüy cawüx, tawün miüünd nej, tapiüing:

—¡Efata! —aw. Aaga poch quiaj amb apiüing: ¡Lejquiar!

<sup>35</sup> Quiaj lejquiat olaag a naxey y oniw nej taley, lajneaj. Quiaj tajneaj mendeac.

<sup>36</sup> Ndoj tasaj nejw Teat Jesús nde masajüw nejinguind. Pero masey atquiaj tasoiquiw, nejw xeyay tandeacndeacüw wüx.

<sup>37</sup> Mbayajow wüx, xeyay tapac omeajtsüw majawüw leaw Teat Jesús tarang, tapiüingüw:

—Nej arang cuajantanej najneaj, cos üüch manguiy nelaag nipilan, at üüch mendeac jane ngondom mendeac —awüw.

## 8

*Teat Jesús tüüch üetiw apiquiw mil nipilan (Mt. 15:32-39)*

<sup>1</sup> Tiül aaga nüt quiaj, canchiütoj xeyay nipilan niüing ajlüy nej. Wüx tind üetiw ngo majüürüw cuane apmüetiwi. Quiaj Teat Jesús tapaj minipilan nej, tasaj:

<sup>2</sup> —Sajüürüw lasta ajcüwa nipilan quiaj, cos lamajüür er nüt ajlüyiw ningüy maquiüjpaats, lango majüürüw üetiw.

<sup>3</sup> Sitiül sanasajüw majtsoriw wüxan nganaw metiw, ngondom maiücüw, apmajmiücüw tiül tiüüd cos altiül imiünüw miünquiaj —aj nejw Teat Jesús.

<sup>4</sup> Quiaj tasajüw nej minipilan nej:

—¿Nguineay alndom maxoram cuane apmüetiwi ningüy tiül a wajchiüc cam? Cos ngo macüleran ningüy —ajüw.

<sup>5</sup> Quiaj Teat Jesús tatün manguiy nejw:

—¿Cas pan aliün mejiürana? —aj nejw.

Nejw tapiüingüw:

—Aliünan ayaíw pan —awüw.

<sup>6</sup> Quiaj tasaj ajcüwa nipilan chetemoj tiüt, taxaing aaga ayaíw pan quiaj. Tüüch gracias Teat Dios, cas tambaag a pan, tüüch minipilan nej majineaw.

<sup>7</sup> At aliün majüürüw acas nine cüet aton. Quiaj Teat Jesús tüüch gracias Teat Dios alinomb. Condom tüüch nejw majineaw.

<sup>8</sup> Meáwan nipilan tetiw paxiün. Wüx landoj üetiw, quiaj taxainguw chipiüt ayaíw nchep minaw üetiw.

<sup>9</sup> Ajcüwa monet quiaj tatüch maseyme apiquiw mil nipilan. Wüx landoj üetiw, quiaj Teat Jesús tüüch nejw majtsoriw.

<sup>10</sup> Condom nej tajtep tiül müx maquiüüb minipilan nej. Tambüw andüyiw tiül iüt Dalmanuta.

*Fariseos atüniw nadam ateócan (Mt. 16:1-4; Lc. 12:54-56)*

<sup>11</sup> Wüx tapeayiw quiaj, altiül fariseos tambüw majawüw nej, tasajsajüw cuajantanej, majawüw cuane apmapiüing. Tasajüw:

—Irang noic nadam ateócan najawan, quiaj alndom napiüingan naleaing Teat Dios najlüy tiül cielo teamambeol ic —ajüw.

<sup>12</sup> Quiaj Teat Jesús tamix omeaats, tawün miüünd nej, tapiüing:

—¿Cuane nerang icon? ¿Neol tendiüman mejawan nadam ateócan? Naleaing sasaj icon ngome sanarang nicuajind ateócan mejawan —aw Teat Jesús.

<sup>13</sup> Condom quiaj taw niüing ajlüyiw a nipilan quiaj maquiüüb minipilan nej, tajtepiw tiül müx, tambüw tandüyiw necamb a nadam yow.

*Leaw aquiajchüw fariseos (Mt. 16:5-12)*

<sup>14</sup> Minipilan nej ngo leaam omeajtsüw majoyiw üetiw nejw, áagan noic pan tajüürüw tiül müx.

<sup>15</sup> Quiaj tasaj nejw Teat Jesús:

—Inguiayüün sanasaj icon. Netam mejawan wüx leaw irangan. Nde meyarüün andeacüw Fariseos, at andeac Herodes. Cos aag ayaj arang atnej arang levadura —aj nejw.

<sup>16</sup> Quiaj minipilan nej tandeacüw nejeyéjan quiaj, tapiüingüw:

—¿Neol tandeac atquiaja? ¿Ngwüy ajcan ngo majamiünaats pana? —awüw.

<sup>17</sup> Teat Jesús tajaw cuane teamandeacüw. Quiaj tasaj nejw:

—¿Neol tapots indeacndeacan wüx pana? ¿Neol nganaw mejawana, meycan wüx imeajtsana? ¿Aliün palam imalana?

<sup>18</sup> ¿Neol ngome tejawan con iniüjcan? ¿Neol ngome tenguiayüün con ilajcan? ¿Neol ngo leaam imeajtsan?

<sup>19</sup> Jow, wüx tajineas acoquiaw pan müetiwan acoquiaw mil monxey, jow leaw tenaw, ¿cas nchep techipichana? —aj nejiw Teat Jesús.

Quiaj tapiüngüw:

—Gajpiüp (12) nchep —awüw.

<sup>20</sup> Condom tandüy wüx matün manguiaj, tapiüng:

—Jow wüx tajineas ayaíw pan müetiwan apiquiw mil nipilan, leawa tenaw, ¿cas nchep texaingüüna? —aj nejiw Teat Jesús.

Quiaj tapiüngüw:

—Ayaíw nchep —awüw.

<sup>21</sup> Quiaj Teat Jesús tapiüng:

—¿Neol nganaw mejawana jane xic? —aw.

*Teat Jesús tüüch ram onüüg nop naw Betsaida*

<sup>22</sup> Wüx tapeayiw tiül cambaj Betsaida, quiaj acas nipilan taquiüjpüw mamb niüng ajlüy Teat Jesús nop naxey nesomb. Tasajüw nej mayac owix nej wüx a naxey quiaj para majneaj.

<sup>23</sup> Quiaj Teat Jesús tasap owix a nesomb quiaj, tanetet owix maquiüüb mamb andüy mbeay cambaj. Ndoj tajendjend wüx onüüg a naxey quiaj aonts ombeay nej, tayac owix nej wüx a naxey quiaj. Cas tatün manguiaj sitiül larraw onüüg lamaxom majaw quiripite.

<sup>24</sup> Aaga nesomb quiaj taxaing omal, tapiüng:

—Nganüy saxom najaw quiripite, sawaw nipilan atnej xiül, pero nejiw teajüyw —aj nej.

<sup>25</sup> Condom Teat Jesús tayac owix nej alinomb wüx onüüg a naxey quiaj. Quiaj aaga naxey tajaw teáman, tajneaj onüüg nej, tajaw ranüy masey miünquiaj.

<sup>26</sup> Quiaj tasaj nej Teat Jesús:

—Quiür ijtsor, nde memong iriümb tiül cambaj, nde mesaj nejingüind nguineay tejneaj —aj.

*Pedro tapiüng Teat Jesús aaga Cristo*

(Mt. 16:13-20; Lc. 9:18-21)

<sup>27</sup> Condom quiaj tamb Teat Jesús maquiüüb minipilan nej, tamongoj ambüw tiül namix nine cambaj ocueaj Cesarea de Filipo. Wüx aliw tiül tüüd, quiaj Teat Jesús tasaj minipilan nej:

—¿Jane xic apiüngüw nipilana? —aj nejiw.

<sup>28</sup> Quiaj tasajüw nej:

—Altiül apiüngüw ique aaga Juan lapac alinomb. Altiül apiüngüw ique aaga Elías tajlüy tanomb. Aton altiül apiüngüw ique alinop nendeac andeac Teat Dios —ajüw nej.

<sup>29</sup> Quiaj Teat Jesús tatün manguiaj nejiw:

—Jow icona, ¿cuane ipiüngan, jane xic? —aj nejiw.

Quiaj tapiüng a Pedro:

—Iquiaj aaga Cristo, aaga lapiürang aliüc —aj nej.

<sup>30</sup> Teat Jesús quiaj tasaj nejiw nde masajüw nejingüind jane nej.

*Teat Jesús tapiüng apmambiyaw nej*

(Mt. 16:21-28; Lc. 9:22-27)

<sup>31</sup> Condom quiaj tapots masaj nejiw, tapiüng aaga Teat Naxey netam mamongoch xeyaw ngo majneaj. Ngome apmayariw nej andeac montangtang monajüt, at montangtang miteaats, at mondüy wüx aaga poch leaw tüünd a Moisés aton. Tapiüng alinoic nüt nej apmandeow, apmambiyaw nej ajcüwa nipilan quiaj. Condom wüx er nüt apmapac alinomb.

<sup>32</sup> Tasaj nejiw atquiaj ranüy. Quiaj a Pedro tawün nej ningüün quiriw, tapots malic.

<sup>33</sup> Pero Teat Jesús ndiliteay majaw niüng ajlüy alacas minipilan nej, quiaj talic a Pedro, tasaj:

—¡Cueat xic, nde mendeac atnej andiüm Satanás! Cos aaga indeac quiaj ocueaj nipilan, ngome ocueaj Teat Dios —aj nej Teat Jesús.

<sup>34</sup> Quiaj Teat Jesús tapaj meáwan nipilan miünw canchiümoj maquiüjpüw minipilan nej. Tasaj nejiw:

—Sitiül aljane andiüm mayar sandeac, ich mawün wüx omeaats meáwan naél leaw alndom mamongoch, ich mandüüb wüx leawa sarang, masey mamongoch xeyaw ngo majneaj, masey mandeow wüx cruz ajcan andüüb xic.

<sup>35</sup> Sitiül aljane ngo mayar sandeac cos imbol mambiy nej nipilan, alinoic nüt nej apmamongoch xeyaw ngo majneaj, y ngome apmamb tiül cielo. Pero sitiül aljane masey mandeow ajcan andüüb xic ayar sandeac, nej apmamb tiül cielo alinoic nüt —aj nejiw Teat Jesús.

<sup>36</sup> Aton tapiüng:

—Jondot aljane alndom maneay meáwan cuajantanej leaw ajlüy wüx a lüt cam, ¿cuane ambich sitiül nej ngo mamb tiül cielo?

<sup>37</sup> ¿Mbich nguineay alndom nop nipilan mangüy asoet nej, nguineay alndom maw wüx para ngo mamb tiül aaga xeyaw ngo majneaja?

<sup>38</sup> Sitiül aljane ngo mayar sandeac cos axing wüx xepoch, ngo mind mitsoj nej ajcüwa nipilan monrang xeyaw ngo majneaj, ajcüw mondüüb narangüch dios, pues ata Teat Naxey apmaxing majaw nej wüx apmandilil. Cos aliüc alinomb imiün niüng ajlüy Teat Dios. Apmagüüb miün xeyaw ángeles, xeyaw najneajay apmajlüy —aw Teat Jesús.

## 9

1 Condom tasaj nejiw Teat Jesús:

—Naleaing sasaj icon, altiül icona leaw alningüy nğanüy cam, nğanaw mendeowan apmejawan noic nadam atéocan, apmejawan aliüc Teat Naxey marang natang ne-najiüt tiül micambaj nej —aj nejiw.

*Wüx Teat Jesús tewüney majawüw  
(Mt. 17:1-13; Lc. 9:28-36)*

2 Wüx lamatüch anaíw nüt tatow ndoj mapiüing aag ayaj, quiaj Teat Jesús taquiiüb Pedro, Jacobo, y Juan, tambüw wüx nop nadam tiüc nejiwan quiaj. Condom quiaj Teat Jesús tewüney majawüw nej.

3 Xeyay nelitlit apix nej, rajnüy. Nejinguind wüx a iüt cam ngondom majants noic raan jael müüch merixix matnej.

4 Quiaj tajawüw mixejchiw nejiw tajlüyiw tanomb, aaga Elías maquiüüb Moisés, teandecüw maquiüjpüw Teat Jesús.

5 Condom quiaj Pedro tasaj Teat Jesús:

—Teat, ¡najneajay macüliüts ningüy, marangaats arej nden! Noic ineay, alinoic apmaney teat Moisés, alinoic apmaney teat Elías —aj nej a Pedro.

6 Atquiaj tapiüing a Pedro cos ngo majaw cuane apmandeac, mbayatoj xeyay majawüw.

7 Condom quiaj tajlüy oic cawüx alareng niüing ajlüyiw, tanden nejiw. Imiün tiül aaga oic quiaj tanguiyiw noic nanderac, tapiüing:

—Aaga Teat Naxey quiaj nejay xecual, xeyay sandiüm. Inguiayiün leaw nej apmasaj icon —aj nejiw aaga nendeac quiaj.

8 Wúxan ndoj manguiyiw aaga nanderac quiaj, quiaj tajawüw lango majlüy nejinguind, néjan Teat Jesús almaquiüjpüw.

9 Condom wüx teawüw tiüt imiünüw wüx tiüc, quiaj Teat Jesús tasaj nejiw nde masajüw nejinguind leawa Teat Dios tüüch nejiw majawüw. Leawa ndoj apac tiül mondeow aaga Teat Naxey, quiaj alndom mandeacüw wüx aag ayaj.

10 Atquiaj nejiw ngo masajüw nejinguind, pero tiülan nejiw tetünajey menguiayayej nguineay amb aaga apiüing quiaj wüx tapiüing apmapac tiül mondeow.

11 Condom quiaj tatüniw manguiyiw Teat Jesús, tapiüingüw:

—¿Neol tapiüingüw ajcüw mondüy wüx aaga poch tüünd Moisés netam miün ombas nej aaga Elías, ndoj aliüc aaga Cristo? —awüw.

12 Quiaj tasaj nejiw Teat Jesús:

—Naleaing Elías netam miün ombas nej masaj nipilan leam omeajtsüw wüx Teat Dios. ¿Neol ngo mejawana, nguineay apiüing Teat Dios tiül Mipoch nej wüx Teat Naxey, aaga tüünd miün imiün tiül cielo? Cos

apiüing nej apmamongoch xeyay ngo majneaj, ngome apmayarich andeac nej.

13 Nğanüy sanasaj icon wüx Elías, cos nop atnej Elías tiün. Tarangüw xeyay ngo majneaj wüx ombas nej, tarangüw leawa tandiümüw. Atnej landoj lamapiüing tiül Mipoch Teat Dios wüx nej, atquiaj tajlüy —aj nejiw Teat Jesús.

*Tajneaj nop nench alwüx ombas nej nimeech*

*(Mt. 17:14-21; Lc. 9:37-43)*

14 Wüx tapeyiw niüing ajlüyiw alacas minipilan Teat Jesús, quiaj tajawüw aliw quiaj xeyay nipilan ayey nejiw tiüt. Aton aliw quiaj mondüy wüx aaga poch tüünd a Moisés, tenguijal asajsajayej maquiüjpüw minipilan Teat Jesús.

15 Wüx tajawüw lapeay niüing ajlüyiw nejiw Teat Jesús, mbayatoj majawüw, acuiürüw tambüw mangochiw matepeayiw.

16 Quiaj Teat Jesús tatün manguiay nejiw:

—¿Cuane wüx tenguijal indeacdeacana? —aj nejiw.

17 Quiaj taw nop tiül a nipilan quiaj, tapiüing:

—Teat, jogüy saquiiüb miün nop xecual mejaw, cos alwüx ombas nej nimeech, ngondom mendeac.

18 Wüx apeay mimondeow nej, alox nej tiüt, atepich teombeay nej popox, ancaporros olüic nej. Tenguijal amb arix, lango majiür apac. Landoj nasajüw minipilan sitiül alndom mawüniw wüx ombas xecual aaga nimeech quiaj, pero ngondom ombasüw —aw.

19 Quiaj Teat Jesús tasaj nejiw:

—¡Jaa, icona nipilan! ¿Neol ngo meyariün sandeaca? ¿Cas nüt ipiüingan sanajlüy ningüy naquiiüb icona? ¿Ngow apmeyariün sandeaca? —aj nejiw.

Condom tapiüing:

—Iquiüjpan miün aaga nench quiaj —aj nejiw.

20 Quiaj taquiüjpüw mamb. Wüx aaga nimeech najlüy wüx ombas a nench quiaj tajaw Teat Jesús, quiaj tambeapmbeap a nench napac, tajmiüc ambiümbiüllyü tiüt, tatepich teombeay nej popox.

21 Quiaj Teat Jesús tatün manguiay miteat a nench:

—¿Nde ngüt tapots marang nej atquiaja? —aj.

Quiaj tapiüing a naxey:

—Wüx nine nej.

22 Mbójan malox nej tiül biümb, at tiül yow, andiüm mambiy nej. Ngantüy Teat, sitiül alndom membeol xicon, sitiül majmiüc imal imeaats, Teat, imbeol xicon —aw miteat a nench.

23 Quiaj tasaj nej Teat Jesús:

—¿Neol tepiung sitiül alndom nambeola? Cos jane ayar sandeac, cuajantanej leaw apmatün xicueaj, xique sanarang —aj nej.

<sup>24</sup> Condom quiaj tapiüung miteat a nench: —¡Sayar indeac teat, imbeol xic nde nachiw ximeaats! —aw.

<sup>25</sup> Teat Jesús tajaw teapeayiw xeyay nipilan acuiürrüw sonongomoj niüng ajlüy nej. Quiaj talic a nimeech najlüy wüx ombas a nench. Tasaj:

—Ique nimeech, neech ngo mendeac a nench cam, at neech melaag aton, iriow wüx ombas nej, icueat nómban. ¡Nde mendüy wüx alinomb! —aj nej Teat Jesús.

<sup>26</sup> Quiaj aaga nimeech tepaj, tandüy wüx malanglang alinomb aaga nench. Quiaj taw, tacueat nej. Ndoj aaga nench piüdan tiüt atnej landeow. Xeyay nipilan tapiüngüw landeow.

<sup>27</sup> Teat Jesús tasap owix a nench mawitich. Quiaj witiüt a nench.

<sup>28</sup> Condom wüx Teat Jesús tajmel tiül nop iüm, quiaj minipilan nej tatüniw manguiayiw nej nejüwan quiaj, tasajüw:

—¿Neol xiconan ngondom nawüniün aaga nimeech quiaj? —ajüw.

<sup>29</sup> Quiaj Teat Jesús nejüw:

—Ajcüwa nimeech quiaj ngo mawüw sitiül ngo metüniün ocueaj Teat Dios, meündan lop aton —aj nejüw.

*Teat Jesús alinomb tapiüung apmambiyaw nej*

(Mt. 17:22-23; Lc. 9:43-45)

<sup>30</sup> Condom tawüw quiaj, tajüyiw ambüw tiül iüt Galilea. Pero Teat Jesús ngo mandüüm majaw nejüw nipilan,

<sup>31</sup> cos nej tealeámban maquiaach minipilan nej. Tasaj nejüw nguineay apmarangüch wüx Teat Naxey. Aton tapiüung aljane apmayac nej teowixaw nipilan, apmambiyaw nej, ndoj wüx er nüt apmapac alinomb.

<sup>32</sup> Nejüw ngo majawüw cuane wüx teamasaj nejüw, pero imboloj matüniw manguiayiw.

*¿Jane alwüx atam ajlüy?*

(Mt. 18:1-5; Lc. 9:46-48)

<sup>33</sup> Condom tapeayiw tiül cambaj Capernaum. Wüx aliw tiül iüm, quiaj Teat Jesús tatün manguiyaw nejüw:

—¿Cuane tendeadendeacan wüx aliüüts tiül tiüda? —aj nejüw.

<sup>34</sup> Nejüw ngo mendeacüw, ndijchiüjówan, cos wüx aliw tiül tiüd tandeacüw wüx jane tiül nejüw apmarang natang.

<sup>35</sup> Condom quiaj Teat Jesús chetet, tasaj ajcüwa gajpiüp (12) minipilan nej, tapiüng:

—Sitiül aljane andiüm marang natang, netam marang chingüy tiül meáwan nipilan, marang cuajantanej mambeol meáwan —aj nejüw.

<sup>36</sup> Alquiaj nop nine. Condom Teat Jesús tayac pinawan nejüw a nine. Quiaj taxaing mapeic, tasaj nejüw:

<sup>37</sup> —Sitiül aljane apmajiür lasta masey nop nine atnej aaga nine cam, aag ayaj atnej xique teamajiür lasta. At sitiül aljane ajiür xic lasta, aag ayaj ngome xiquian quiaj ajiür xic lasta, at Xeteat aton, cos nej tüüch xic niün —aj nejüw.

*Jane ngo majcüy majaw icoots, najneaj majaw icoots*

(Mt. 10:42; Lc. 9:49-50)

<sup>38</sup> Condom quiaj tasaj nej a Juan:

—Teat, tajawasan nop naxey tawün nimeech wüx ombas nipilan, apaj wüx minüt. Tapajasan ocueaj cos ngo maquiüüb icoots —aj nej a Juan.

<sup>39</sup> Quiaj tasaj nejüw Teat Jesús:

—Ich majlüy, nde mepalan. Cos nejinguind ngondom marang ateócan wüx xenüt, ndoj andüüban mandeac ngo majneaj wüx ximbas.

<sup>40</sup> Cos sitiül nop ngo majcüy majaw icoots, aag ayaj najneaj majaw icoots.

<sup>41</sup> Sitiül aljane apmüüch icon masey noic pite yow, cos ajaw xenipilan icon, naleaing sasaj icon aag ayaj apmajiür cuane najneaj apmüünd alinoic nüt.

*Ijawan wüx, nde meyacüchiün wüx ngo majneaj*

(Mt. 18:6-9; Lc. 17:1-2)

<sup>42</sup> Sitiül aljane mayac wüx nisoet nop tiül ajcüwa jayats monyar sandeac, najneaj wüxan nganaw marang aaga ngo majneaj quiaj maoolich teonic nej nop cow majlos tiül ndec.

<sup>43</sup> Aton sitiül aljane ayaag owix nej alndom mayac nej tiül nisoet, ich mandooig. Cos más najneaj mapac ningüy masey ngo majiür nots owix nej, ingow ajiür miüjtsüw owix, ndoj alinoic nüt mamb tiül biümb niüng ngondom xejquem, mandaab meáwan nüt.

<sup>44</sup> Cos ninguiün ajcüwa ndiüc apmajlüy wüx ombas nej ngome apmandeowüw, at a biümb ngondom xejquem.

<sup>45</sup> Sitiül aljane ayaag oleaj nej alndom mayac nej tiül nisoet, ich mandooig nots oleaj nej. Cos más najneaj majlüy atquiaj ingow ajiür miüjtsüw oleaj nej, ndoj alinoic nüt mamb tiül biümb niüng ngondom xejquem.

<sup>46</sup> Cos ninguiün ajcüwa ndiüc leaw apmajlüy wüx ombas nej ngome apmandeowüw, at a biümb ngondom xejquem.

<sup>47</sup> At sitiül aljane ayaag oniüüg nej alndom mayac nej tiül nisoet, ich masoond noic oniüüg nej. Cos más najneaj majlüy tiül minipilan Teat Dios noic oniüüg, ingow ajiür ijquyaw oniüüg ndoj majlos tiül biümb;

<sup>48</sup> cos ninguiün tiül a castigo ajcüwa ndiüc apmajlüy wüx ombas nej ngome apmandeowüw, at a biümb ngondom xejquem.

<sup>49</sup> Cos meáwan apmatajcüch majneaj naag biümb, y meáwan nichech apmüünd majtix naag quiniüc.

<sup>50</sup> Najneaj quiniüc aag ayaj najtix; pero jondot lango majtix, ¿cuane ajar? ¿Nguineay apmajtix alinomb? At icona aton netam merangan atnej quiniüc cos üüch maxix nüeteran; irangan najneaj, nde mejcüyiün mejawan nop alinop —aw.

## 10

*Teat Jesús apiüng wüx moncueateay*  
(Mt. 19:1-12; Lc. 16:18)

<sup>1</sup> Condom Teat Jesús taw tiül cambaj Capernaum maquiüüb minipilan nej, tambüw andüyiw tiül iüt Judea. At tambüw aton tiül a iüt nonüt necamb lam Jordán. Sonongotoj quiaj xeyay nipilan majawüw nej. Quiaj taquiaach nejiw atnej mbójan marang.

<sup>2</sup> Ndoj quiaj acas fariseos tambüw majawüw Teat Jesús matüntüniw manguiayiw nej majawüw cuane apmapiüng. Tasajüw sitiül nop naxey alndom macueat mintaj nej nómban.

<sup>3</sup> Quiaj tasaj nejiw Teat Jesús:  
—Jow mixejchiiüts a Moisés, ¿nguineay tapiünga? —aj nejiw.

<sup>4</sup> Quiaj tapiüngüw:  
—Teat Moisés tapiüng nop naxey alndom macueat mintaj nej, pero naleaing netam marangüch minawijquyaw nejiw müjndiw para mecueatayej nómban —awüw.

<sup>5</sup> Quiaj Teat Jesús tasaj nejiw:  
—Teat Moisés tasaj icon merangan atquiaj cos tajaw icona nadam imeajtsan.

<sup>6</sup> Pero tanomb wüx Teat Dios tarang meáwan cuajantanej, “quiaj tarang nipilan nop naxey nop najtaj”.

<sup>7</sup> “Wüx aag ayaj nop naxey apmacueat miteat nej mimüm nej, apmaquiüüb mintaj nej.

<sup>8</sup> Quiaj apmajlüyiw nóiquian, atnej majlüyiw nop nejiw ngome ijpüw, noic omeajtsüw.”

<sup>9</sup> Pares leawa Teat Dios lamüüch mequiüubayej nejinguind ngondom müüch nejiw mecueatayej —aj nejiw Teat Jesús.

<sup>10</sup> Condom wüx tapeayiw tiül nden, quiaj minipilan nej tatüniw manguiayiw nej aton wüx aaga les ndot mandeac quiaj.

<sup>11</sup> Quiaj Teat Jesús tasaj nejiw:  
—Sitiül nop naxey apmacueat mintaj nej, ndoj apmaquiüüb alinop najtaj, aag ayaj lamajiür nisoet, cos atnej lamajiür minajtaj nej.

<sup>12</sup> At sitiül nop najtaj apmacueat minoj nej ndoj apmaquiüüb alinop naxey, nej aton

ajiür nisoet cos ajlüy atnej majiür minaxey nej —aj nejiw.

*Namix nine taquiüübaranüw majawüw Teat Jesús*

(Mt. 19:13-15; Lc. 18:15-17)

<sup>13</sup> Condom taquiüübaran niüng ajlüy nej tegüy namix nine matepeyiw Teat Jesús, majend nej omalüw. Minipilan nej taliquiaw monquiüüb namix nine, ngo mandüümüw.

<sup>14</sup> Pero wüx Teat Jesús tajaw nguineay teamarangüw, quiaj tajcüy, tasaj nejiw:

—Ijchan miünüw a namix nine niüng sajlüy, nde mepalan. Cos sitiül aljane andiüm majmel tiül micambaj Teat Dios netam marang atnej nop nine.

<sup>15</sup> Naleaing sasaj icon sitiül aljane ngo mayar sandeac atnej nop nine ayar cuajantanej masoic, ngondom majmel tiül micambaj Teat Dios —aj nejiw.

<sup>16</sup> Quiaj taxaing mapeic namix nine, tajend omalüw, tasaj nejiw:

—Mambeol icon Teat Dios —aj nejiw Teat Jesús.

*Nop nejüür xeyay tandeac aweaag Teat Jesús*

(Mt. 19:16-30; Lc. 18:18-30)

<sup>17</sup> Wüx Teat Jesús taw quiaj, quiaj ajngot nop naxey acuiür, maquieel micos nej teombas Teat Jesús, tatün manguiay:

—Teat Naxey, sawaw ique najneaj irang. Nganüy isaj xic cuane netam narang, nguineay alndom napac meáwan nüt tiül cielo —aj nej.

<sup>18</sup> Condom Teat Jesús tasaj nej:  
—¿Neol tepiüng xique sarang najneaja? Nejinguind nipilan ngo marang najneaj, néjan quiaj Teat Dios arang najneaj.

<sup>19</sup> Ique lamenguiay leaw apiüng tiül Mipoch Teat Dios niüng apiüng: “Nde mejiür minajtaj, at najtaj nde mejiür naxey; nde membiy nipilan; nde merneed; nde merndeac ngo maleaing; nde mewaiich nejinguind; netam meyar andeac miteat, mimüm” —aj nej Teat Jesús.

<sup>20</sup> Quiaj tasaj nej aaga naxey:  
—Teat, meáwan aag ayaj sayac wüx ximeaats narang nde wüx sarang quich —aj nej.

<sup>21</sup> Quiaj Teat Jesús tajaw nej, tajmiüc omal omeaats, tajiür nej lasta, tasaj:

—Alünan alcuane nganaw merang. Quiür inüüb meáwan leaw almejiür. Condom imbaag ombeat iich nipilan ngo majiür; quiaj apmejlüy najneajay tiül cielo. Ndoj tewiün mendüüb xic, masey mambiyaw ic wüx cruz —aj.

<sup>22</sup> Wüx tanguiy aag ayaj tayaag ngo majneaj, taw quiaj amix omeaats; cos ngo mandüüm mandrooch ombas meáwan leaw almajiür, cos nop nej nejüür xeyay.

<sup>23</sup> Condom Teat Jesús ndiliteay majaw minipilan nej, tasaj nejiw:

—Xowüy laél ocueajiw monjiür xeyay cuajantanej majmeliw tiül micambaj Teat Dios —aw.

<sup>24</sup> Minipilan nej mbayatoj manguiayiw andeac Teat Jesús. Quiaj nej tasaj nejw alinomb:

—Xecualüw, xowüy laél majmeliw tiül micambaj Teat Dios leawa xowüy ayacüw omeajtsüw wüx leaw almajiürüw.

<sup>25</sup> Sapiüng más ngo maél mamong nop camello teowil nots ndiüc, ngo matnej aél ocueaj nop nejür xeyay majmel tiül micambaj Teat Dios —aj nejw.

<sup>26</sup> Wüx tanguiyiw aag ayaj, quiaj mbayatoj xeyay, tetünajey menguiayayej:

—Sitiül atquiaj ajlüy teat, ¿jane alndom maw asoet nej? —awüw.

<sup>27</sup> Quiaj Teat Jesús tajaw nejw, tapiüng:

—Nejinguind nipilan ngondom mawün asoet alinop, néjan Teat Dios alndom marang. Cos Teat Dios alndom marang cuajantanej —aw.

<sup>28</sup> Condom Pedro quiaj tendeac masaj Teat Jesús:

—Teat, xicona lanacueatiün meáwan leawa tajiürasan nandüjpiün ic —aj nej.

<sup>29</sup> Quiaj Teat Jesús tapiüng:

—Naleaing sasaj icon, ngo majlüy nejinguind jane lamacueat aniüng nej, micoj nej, michiig nej, miteat nej, mimüm nej, mintaj nej, micual nej, tengwüy miüt nej, cos áag iün mandüüb xic mandeac xepoch;

<sup>30</sup> jane ngo müünd majiür xeyay ningüy wüxan aliün mapac, apmajiür aniüng nej, micoj nej, michiig nej, mimüm nej, micual nej, átan miüt nej. Masey apmamongoch xeyay moncüy nganüy, cos alinoic nüt apmajlüy najneajay meáwan nüt tiül cielo.

<sup>31</sup> Aton altiül leaw ayaag natang nej nganüy, alinoic nüt apmarang chingüy; at altiül leaw ayaag chingüy nej nganüy, alinoic nüt apmarang natang —aw Teat Jesús.

*Tandüy wüx mapiüng apmambiyaran*  
(Mt. 20:17-19; Lc. 18:31-34)

<sup>32</sup> Wüx aliw tiül tiüd ambüw andüyiw Jerusalén, Teat Jesús ombas nej, almandüjpiw nej minipilan nej mbayajówan, imboloj aton. Quiaj Teat Jesús tawün ningüiün quiriw ajcüwa gajpiüp (12), tapots masaj nejw wüx nguineay apmamongoch.

<sup>33</sup> Tapiüng:

—Inguiayüün, sanasaj icon, nganüy andüyüüts Jerusalén niüng Teat Naxey apmayacüch teowixaw montangtang miteaats maquiüüb mondüy wüx aaga poch tüünd Moisés. Quiaj apmapiüngüw mandeow, apmayacüw nej teowixaw napeay miün nipilan.

<sup>34</sup> Quiaj apmitsojow nej, apmawüjchwiw nej, apmateontsüw onts ombeayiw wüx ombas nej, ndoj apmambiyaw nej. Condom wüx er nüt apmapac alinomb —aw Teat Jesús.

*Leawa tatüniw Jacobo y Juan*  
(Mt. 20:20-28)

<sup>35</sup> Condom Jacobo maquiüüb a Juan, micual nejw Zebedeo, tatüchiw nej masajüw:

—Teat, sandiüman merang leawa sanatüniün icueaj —ajüw.

<sup>36</sup> Quiaj Teat Jesús tatün manguiay nejw:  
—¿Cuane indiüman naranga? —aj nejw.

<sup>37</sup> Tasajüw nej:

—Teat, wüx lacheter merang natang nejajiüt, iich xicon chetenon niüng ijlüy, nop wüx miác, alinop wüx miquiamb —ajüw nej.

<sup>38</sup> Quiaj tasaj nejw Teat Jesús:

—Teat, ngo mejawan cuane teametüniün. ¿Alndom icona memongochiün meáwan naél atnej xique sanamongoche? ¿Alndom icona mendeowan atnej xique sanandeowa? —aj nejw.

<sup>39</sup> Tapiüngüw:

—Alndom —awüw.

Quiaj tasaj nejw Teat Jesús:

—Naleaing, netam memongochiün naél atnej xique sanamongoch, netam memongochiün xeyay ngo majneaj atnej xique.

<sup>40</sup> Pero aaga ipiüangan chetemeron wüx xeác xequiamb, aag ayaj ngondom nütüch icon, cos lajlüy aljane apmüünd aag ayaj —aj nejw.

<sup>41</sup> Wüx tanguiyiw aag ayaj algajpowüw (10) tajcüyiw majawüw Jacobo y Juan.

<sup>42</sup> Quiaj Teat Jesús tapaj nejw miün, tasaj nejw:

—Lamejawan nguineay arangüw monajiüt tiül meáwan cambaj. Cos arangüw apatüw atnej lamaneayiw a nipilan ajlüyiw wüx. At aton montangtang tiül nejw ngo majiürüw lasta nejinguind.

<sup>43</sup> Pero tiül icona ngome apmajlüy atquiaj. Cos jane andiüm majiür nadam najiüt tiül icona netam marang nop nembeol icon.

<sup>44</sup> Sitiül aljane tiül icona andiüm marang natang, netam marang atnej najon mos.

<sup>45</sup> Cos Teat Naxey ngo miün mambeol nej nipilan, nej tiün mambeol nipilan, mandeow para mangüy asoet meáwan nipilan —aj nejw Teat Jesús.

*Teat Jesús tüüch ram onüüg a Bartimeo*  
(Mt. 20:29-34; Lc. 18:35-43)

<sup>46</sup> Condom tapeayiw Jericó. Almawüw tiül aaga cambaj quiaj Teat Jesús maquiüüb minipilan nej maquiüjpiw alegüy niplan, quiaj nop nesomb alchetem mbeay tiüd teatüney, nenüt Bartimeo, micual nej Timeo.

<sup>47</sup> Wüx tanguiy aaga nesomb quiaj Teat Jesús naw tiül cambaj Nazaret, áag namong niüng ajlüy nej. Quiaj tepaj:

—¡Teat Jesús, Micual David, ijiür xic lasta! —aw.

<sup>48</sup> Xeyay nipilan taliqiuaw nej mapal ombeay, pero nej tayac wüx alquiriw apaj:

—¡Teat, Micual David, ich majmiüc imal imeaats mejaw xic! —aw.

<sup>49</sup> Quiaj lembet Teat Jesús, tapiüng:

—Isajan miün ningüy —aw.

Quiaj tambüw masajüw a nesomb:

—Ich mapac imeaats, witiür, teamapaj ic —ajüw.

<sup>50</sup> Quiaj awíchan tiüt apix nej witiówan tiüt tamb matüch niüng ajlüy Teat Jesús.

<sup>51</sup> Condom Teat Jesús tatün manguiy nej:

—¿Teat, cuane indiüm narang wüx im-basa? —aj.

Quiaj tasaj nej aaga nesomb:

—Teat, sandiüm ram xiniüg naxom na-jaw —aj nej.

<sup>52</sup> Quiaj Teat Jesús tasaj nej:

—Nganüy quiür ijtsor, lerjneaj cos teyac imeaats wüx xic —aj nej.

Quiaj rat oniiüg nej, condom tandüüb mamb Teat Jesús tiül tiüüd.

## 11

*Teat Jesús tajmel tiül Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Wüx laliüc mapeayiw tiül Jerusalén, aliw niüng ajlüyiw cambaj Betfagé y Betania, lareng mitiüc Olivos, quiaj Teat Jesús tüüch mamb ipüw minipilan nej,

<sup>2</sup> tasaj:

—Quiüran tiül a nine cambaj quiün. Wüx apmepeayiün quiaj, apmexoman nop quicheech bur netsaag, nganaw müünd memas. Ichejtüün, iquiüjpan miün.

<sup>3</sup> Sitiül aljane matün manguiy icon neol terangan atquiaj, isajan cos Teat Naxey apmetam nej, ndoj apmatsoriich alinomb —aj nejw Teat Jesús.

<sup>4</sup> Quiaj tambüw. Wüx tapeayiw quiaj, taxomüw nop quicheech bur netsaag mbeay nden, tachejtüw.

<sup>5</sup> Altiül nipilan aliw quiaj tapiüngüw:

—¿Cua temerangana? ¿Neol techejtüün a bur quiaja? —awüw.

<sup>6</sup> Condom nejw tapiüngüw atnej landoj masaj nejw Teat Jesús. Quiaj tündiw machejtüw.

<sup>7</sup> Taquiüjpüw mamb a bur niüng ajlüy Teat Jesús. Tapojchiw teopech bur apixaw nejw. Condom quiaj Teat Jesús tajtep chetem wüx.

<sup>8</sup> Xeyay nipilan tapüjchiw tiüt apixaw nejw tiül tiüüd, altiül tapoliw omal xiül mayacüw tiüt aton.

<sup>9</sup> Meáwan monmong ombas átan aliüc tamiün teapajüw napac:

—¡Najneajay! ¡Ich mapac omeajtsaats, cos lapeay nop niün wüx minüt Teat Dios!

<sup>10</sup> ¡Najneajay! ¡Lapeay nop natang nenajiüt marang atnej tarang mixejchiüts David! ¡Najneajay ajlüy Teat Dios! —awüw.

<sup>11</sup> Wüx tatüchiw Jerusalén, quiaj Teat Jesús tajmel tiül aaga nadam nangaj iüm ocueajiw. Wüx landoj majaw meáwan leaw ajlüy quiaj, quiaj taw cos langwiüts. Tamb andüy tiül cambaj Betania, aqiiüüb ajcüwa gajpiüp (12) minipilan nej.

*Teat Jesús talic noic owil toc*

(Mt. 21:18-19)

<sup>12</sup> Aw alinoic nüt tawüw tiül Betania, tandilileaw alinomb andüyiw Jerusalén. Wüx aliw tiül tiüüd, Teat Jesús tind üet.

<sup>13</sup> Miünquiájan tajaw noic owil toc neóp xeyay. Quiaj tamb majaw sitiül neóng, pero ngo maxom nicujind, adpan alwüx, cos ngome nüt ajiür aóng toc.

<sup>14</sup> Condom Teat Jesús talic a toc:

—Nejinguind langome apmüet ióng nómban —aj.

Minipilan nej tanguiyiw aag ayaj.

*Tawün tiül nadam nangaj iüm leaw ngo metam majlüy quiaj*

(Mt. 21:12-17; Lc. 19:45-48; Jn. 2:13-22)

<sup>15</sup> Condom wüx tapeayiw Jerusalén, quiaj Teat Jesús tajmel tiül nadam nangaj iüm mawün quiaj meáwan monüjpeay, mongalüy. Aton tapaag ninguiün mimesiw mongowüüch tomiün, at mibangüw monüüb palom.

<sup>16</sup> Ngo müüch mamong nejinguind monjoy cuajantanej tiül a nadam nangaj iüm.

<sup>17</sup> Condom quiaj tapots maquiaach nejw, tapiüng:

—¿Neol ngo leaam imeajtsan leaw apiüng tiül Mipoch Teat Dios? Apiüng: “Saniüng ajlüy niüng alndom matajcüw orar meáwan nipilan monaw palpálwüx cambaj wüx iüt”. Nganüy icona lameajchiün marang aaga nangaj iüm cam atnej niüng axotayej mon-eed —aw Teat Jesús.

<sup>18</sup> Ajcüwa montangtang miteaats, at mondüy wüx aaga poch tüünd Moisés, wüx tanguiyiw aag ayaj tayambüw nguineay mambiyaw Teat Jesús. Laimboloj mandüyiw, cos meáwan nipilan najneaj majawüw leawa nej teamaquiaach.

<sup>19</sup> Wüx laquinüt, quiaj Teat Jesús taw tiül Jerusalén maquiüüb minipilan nej, tandüyiw Betania alinomb.

*Aaga toc lawaag*

(Mt. 21:20-22)

<sup>20</sup> Amb alinoic nüt wüx lajwic nüt, tamongoj alinomb niüng ajlüy aaga toc. Quiaj tajawüw nómban lawaag naw wüx mioxiich nej.



<sup>21</sup> Pedro quiaj leaad omeaats nguineay Teat Jesús tasaj a toc. Quiaj tapiüng:

—Teat, ijaw a toc quiaj, áag telic, nganüy lawaag —aw.

<sup>22</sup> Condom Teat Jesús tasaj nejiw:

—Iyacan imeajtsan wüx Teat Dios.

<sup>23</sup> Naleaing sasaj icon, jangantanej apmasaj aaga tüc quiaj: “Iriow, indüy tüül ndec”, maj, sitiül nej ngo machiw omeaats, nej mapiüng naleaing apmarangüch leawa atün, quiaj apmarangüch leaw atün.

<sup>24</sup> Nganüy sasaj icon, wüx isajan Teat Dios meáwan leaw itüniün, sitiül ipiüangan naleaing apmeajndiün, atquiaj apmajlüy.

<sup>25</sup> Sitiül iyajcan ijctüyün mejawan aljane, wüx itajcan orar netam mewüniün aag ayaj wüx imeajtsan nómban. Cos sitiül atquiaj apmerangan, Miteatiüts Dios najlüy tüül cielo ngome apmayac wüx omeaats isoetiün.

<sup>26</sup> Pero sitiül icona iyacan wüx imeajtsan jcüyüün, Miteatiüts Dios najlüy tüül cielo, ngome apmawün wüx omeaats isoetiün —aj nejiw Teat Jesús.

*Tasajüw Teat Jesús nguiane ayar minajiüt nej*

(Mt. 21:23-27; Lc. 20:1-8)

<sup>27</sup> Condom tapeayiw alinomb tüül Jerusalén. Wüx Teat Jesús teajüy tüül aaga nadam nangaj iüm, quiaj tüünüw majawüw nej montang miteaats, mondüy wüx aaga poch tüünd Moisés, at montangtang monajiüt.

<sup>28</sup> Tatüniw nej manguiayiw:

—¿Jane tüüch ic mewüün merang leawa lamerang quiaja, nguiane teyar minajiüta? —ajüw nej.

<sup>29</sup> Quiaj tasaj nejiw Teat Jesús:

—Xique aton sanatün nanguiay icon noic poch, sitiül apmesajan xic, quiaj xique aton sanasaj icon jane tüüch xic niün narang leawa teanarang.

<sup>30</sup> Jow, wüx tüüch yow nipilan aaga Juan, ¿jane tüüch nej maranga? ¿Teat Diosa, ngwüy nipilana? Nganüy isajan xic —aj nejiw.

<sup>31</sup> Quiaj tesajsajayej nejeyéjan quiaj, tapiüngüw:

—¿Cuane apmasajaatsa? Cos sitiül apmapiüngaats Teat Dios tüül cielo, quiaj apmasaj icoots: “¿Neol ngo meyariün andeaca?”

<sup>32</sup> Aton sitiül apmasajaats imiün tüül nipilan, meáwan nipilan apmajcüyiw majawüw icoots —awüw.

Imboloj mandüyiw nipilan, cos ajawüw meáwan nipilan apiüngüw aaga Juan nop nej nendeac andeac Teat Dios.

<sup>33</sup> Quiaj tasajüw Teat Jesús:

—Ngo najawan —awüw.

Quiaj Teat Jesús tasaj nejiw:

—Ata xique ngo nasaj icon jane tüüch xic niün narang leaw teanarang —aj nejiw.

## 12

*Teat Jesús andeac andüy wüx ngo moneaj monrang najiüt*

(Mt. 21:33-46; Lc. 20:9-19)

<sup>1</sup> Condom Teat Jesús tapots masaj nejiw, ngome aleaing miün. Tapiüng:

—Tajlüy nop naxey tapiür xeyay owil uva tüül micorrül nej. Tarang najneaj otüeng corrül. Condom taood tüüt tüül piedra marang niüng apmacuüücharan najün uva maw miyow. Aton tarang nop najal oleaj nine iüm nasoic torre niüng alndom macüleran cawüx majiürüch corrül. Ndoj tayac teowix nipilan a corrül quiaj. Condom nej taw, tamb andüy miünquiaj iüt.

<sup>2</sup> Wüx lamatüch a nüt mapeederan aóng uva, quiaj neneay corrül tüüch mamb mimos nej mamb majaw monrang najiüt quiaj, mayar leaw atüch nej neneay corrül.

<sup>3</sup> Nejiw tasapüw a mos quiaj, tatoliw, tujchiw mandilil owíxan.

<sup>4</sup> Condom neneay iüt tandüy wüx müüch mamb alinop mimos nej. Átan taloxiw, talojtiw omal nej, taliQUIAW nej.

<sup>5</sup> Tandüy wüx müüch mamb alinop, aag ayaj mbich tambiyaw. Ndoj tüüch mamb altigüy, átan altiül tatoliw, altiül tambiyaw nómban.

<sup>6</sup> ‘Aag miün micual nej aliün majlüy, leaw xeyay ajiür lasta. Ndojwüx tüüch mamb micual nej. Cos apiüng a nej: “Xecual mbich ngome apmarangüw wüx nicuajind”, aw.

<sup>7</sup> Pero ajcüwa monrang najiüt quiaj wüx tajawüw aliüc aaga micual neneay iüt quiaj, tandeacüw nejeyéjan quiaj, tapiüngüw: “Aag ayaj micual neneay iüt, nej apmeneay a corrül cam. Tabaats mambiyaats, ndoj icoots apmaneyiüts a corrül cam”, awüw.

<sup>8</sup> Quiaj tasapüw mambiyaw. Condom tax-anguiw maloxiw ninguiün.

<sup>9</sup> ‘¿Cuane apmarang aaga naxey neneay iüt quiaja? Apmamb mambiy ajcüwa monrang najiüt quiaj. Condom apmayamb ali-noic ajlüy monrang najiüt, mayac teowixaw aaga corrül.

<sup>10</sup> ‘¿Neol, nganaw meteowan leaw apiüng tüül Mipoch Teat Dios? Apiüng:

Aaga piedra leaw taloxiw ninguiün monrang iüm,

nganüy laiün marang xeyay netam piedra tüül oxing iüm.

<sup>11</sup> Teat Dios nerang aag ayaj, ajawaats aag ayaj xeyay najneaj —aj nejiw Teat Jesús.

<sup>12</sup> Condom ajcüwa monajiüt tandiümüw masapüw Teat Jesús, cos tayajcüw aaga tandeac quiaj tandeac andüy wüx ombasüw.

Pero naleaing cos timbолоj mandüyw nipi-lan, quiaj tacueatiw nej, tawüw quiaj.

*¿Netam majwan tomüün andüy Roma?  
(Mt. 22:15-22; Lc. 20:20-26)*

<sup>13</sup> Condom tujchiw mamb acas fariseos at aton acas minipilan Herodes niüing ajlüy Teat Jesús, mayambüw nguineay masapüw nej wüx aleaic mandeac.

<sup>14</sup> Quiaj tiünüw masajüw nej:

—Teat, sawawan ique indeac naleaing, ngo mewaich, ngo mermbol mendüy nejinguind. At aton ngo mepiüing wüx jane netam, jane ngo metam. Ique iquiaach naleaing wüx Teat Dios. Nganüy isaj xicon, ¿naleaingue netam mangüyaran leaw atün a César, ngwangwüy ngo metama? ¿Mangüyüütsa, ngwüy ngo mangüyüütsa? —ajüw nej.

<sup>15</sup> Pero Teat Jesús lamajaw nguineay min-deac ombeayiw ajcüwa nipilan quiaj, quiaj tasaj nejüw:

—¿Neol tendüüman mejawan majüic cuane sanandea? Ich miün noic tomüün najaw —aj nejüw.

<sup>16</sup> Quiaj tujchiw. Almajaw, quiaj Teat Jesús tatün manguiay nejüw:

—¿Jane mitey alwüx a tomüün cama, jane minüt alwüxe? —aj nejüw.

Quiaj tasajüw nej:

—César —ajüw.

<sup>17</sup> Teat Jesús tasaj nejüw:

—Ijchan a César ocueaj César, aton ijchan Teat Dios ocueaj Teat Dios —aj nejüw.

Quiaj mbayatoj manguiayiw andeac nej.

*Wüx apmapacaran tiül mondeow  
(Mt. 22:23-33; Lc. 20:27-40)*

<sup>18</sup> Condom tapeayiw acas saduceos niüing ajlüy Teat Jesús. Ajcüw ayaj noic ajlüy nipi-lan apiüingüw mondeow langome apmapacüw alinomb. Tatüniw nej manguiayiw:

<sup>19</sup> —Teat, Moisés tarang tiül minawiig nej, tapiüing sitiül nop naxey mandeow, macül mintaj nej lemben omal, pero ngo majiürüw micualüw nejüw, quiaj michiig nej netam mengoch owix aweaag aaga lemben omal quiaj, para alndom majlüy micual micoj nej.

<sup>20</sup> Pues tajlüy ayaüw monxey nop necual nejüw. Aaga natang nacojaran tengoch owix, ndoj tandeow, nganaw majiürüw micualüw nejüw.

<sup>21</sup> Condom quiaj michiig nej tangoch owix aweaag aaga najtaj lemben omal quiaj. Aton tandeow a naxey wüx nganaw majiürüw micualüw nejüw. Atquiaj tajlüy aton amb arojüpüw.

<sup>22</sup> Atquiaj tengoch owixaw maquiüjpüw aaga najtaj quiaj meáwan aaga ayaüw monxey quiaj. Nejinguind tiül nejüw ngo majiürüw micualüw nejüw. Ndójwüx nejay a najtaj tandeow.

<sup>23</sup> ¿Jow wüx apmapacaran alinomb, jane tiül nejüw apmaquiüüb a najtaj quiaja? Cos ajcüwa ayaüw monxey quiaj tengoch owixaw maquiüjpüw —ajüw.

<sup>24</sup> Quiaj tasaj nejüw Teat Jesús:

—Icona ngo mejawan cuane wüx teamendeacan quiaj, cos ngo mejawan cuane ajlüy tiül Mipoch Teat Dios. Aton ngo mejawan cuane alndom marang Teat Dios.

<sup>25</sup> Pues wüx apmapacaran alinomb ngome apmajlüy mongoch owix, cos apmajlüyaran noic miün atnej ajcüw ángel najlüy tiül cielo.

<sup>26</sup> Nganüy aaga itüniün menguiayiw wüx apacaran tiül mondeow, ¿neol ngo mete-owan tiül aaga poch tüünd Moisés nguineay tapiüing Teat Dios wüx tandeac imiün tiül noic owl nine xiül teandaab? Cos tapiüing: “Xique Teat Dios, Midios Abraham, Midios Isaac, at Midios Jacob, ajcüw tajlüyiw tanomb”.

<sup>27</sup> Teat Dios ngome Midiosüw mondeow, nej Midiosüw jane almapac. Icona xeyay ngo mejawan cuane teamepiüingan —aj nejüw Teat Jesús.

*¿Ngün tiül aaga poch tüünd Moisés más xeyay netam?*

*(Mt. 22:34-40)*

<sup>28</sup> Tiün niüing ajlüy nej nop naw tiül ajcüwa mondüy wüx aaga poch tüünd Moisés cos tanguiay wüx teandeacndeacüw. Tajaw Teat Jesús tangoch masaj nejüw najneaj. Quiaj nej aton tatün manguiay noic, tasaj:

—¿Ngün tiül aaga poch tüünd Moisés más xeyay nembeate? —aj nej.

<sup>29</sup> Quiaj Teat Jesús tasaj nej:

—Aaga leaw najntsop wüx atam apiüing: “Inguiayiw cambaj Israel, ágan nop Dios ajlüy aag ayaj Teat Dios Midiosaats.

<sup>30</sup> Netam mendiüman Teat Dios con imeajtsan, con miespiritujan, con mifisan; aton netam mendiüman con meáwan ipacan ijiüuran”, aw. Aag ayaj a poch leaw alwüx atam.

<sup>31</sup> Alinoic aton landiüm matnej, apiüing: “Netam mejiüuran lasta nop alinop atnej ijiürayon lasta icoyónan quiaj”, aw. Ngo majlüy alinoic poch majntsop wüx ajcüw ayaj —aj nej Teat Jesús.

<sup>32</sup> Quiaj aaga naxey nendüy wüx aaga poch tüünd Moisés tasaj nej:

—Teat, naleaing ipiüing. Cos aag ipiüing quiaj naleaing ágan nop Dios almajlüy, ngo majlüy alinop.

<sup>33</sup> At aag ipiüing quiaj nguineay netam mandüümaats Teat Dios con omeajtsaats, con mifisaats, con miespiritujaats, aton con meáwan apacaats ajiüraats. At aton netam majiüraats lasta nop alinop atnej ajiürayoots lasta icoyóotsan quiaj. Meáwan aag ayaj xeyay nembeate ngo matnej meáwan nichech

najmel müünd Teat Dios, ngo matnej meáwan nichech nambelaran wüx artül —aj.

<sup>34</sup> Wüx Teat Jesús tajaw aaga naxey tandeac naleaing najneajay, quiaj tasaj:

—Laliüc metüch mejmel tiül micambaj Teat Dios —aj nej.

Ndoj nejingund ngome aleaic tandiüm matün manguiyaj nej.

*¿Jane mixeech a Cristo?*

(Mt. 22:41-46; Lc. 20:41-44)

<sup>35</sup> Teat Jesús aliün tiül nadam nangaj iüm, tenguiäl aquiaach, tapiüng:

—¿Neol ajcüwa mondüy wüx aaga poch tüünd Moisés tapiüngüw wüx aaga Cristo, David mixeech nej?

<sup>36</sup> Cos aaga Nangaj Espiritu ocueaj Teat Dios tayac wüx omeaats David mapiüng:

Teat Dios tasaj a Teat Naxey: “Cheter ningüy amb wüx xeác leaw ndoj nayac moncüy majaw ic maquiejliw micosüw nejw timbas.”

<sup>37</sup> ¿Nguineay alndom mapiüngüw David mixeech aaga Cristo? Cos nejay David tapiüng “Teat Naxey” —aw Teat Jesús.

Ajcüwa xeyay nipilan leaw tajlüyiw quiaj, tapac omeajstüw manguiyajw aquiaach.

*Jesús andeac wüx ombasüw mondüy wüx poch tüünd Moisés*

(Mt. 23:1-36; Lc. 11:37-54; 20:45-47)

<sup>38</sup> Teat Jesús tasaj nejw tiülan aquiaach, tapiüng:

—Ijawan wüx ajcüwa mondüy wüx aaga poch tüünd Moisés, cos xowüy andiümüw majüyjüyiw tiül cambaj asoiqüiw najal apixaw para matepeayaranüw cos áag teamayambüw.

<sup>39</sup> Aton xowüy andiümüw chetemoj niüng alndom malombaranüw tiül sinagoga. At aton wüx ajlüy monet ayambüw chetemoj niüng ajlüy aaga nerang nangos nüt.

<sup>40</sup> Nejiw anojtiw aniüngüw monlemben omal montaj, ndoj andiümüw maxotüw aaga ngo majneaj arangüw quiaj, atajcüw orar xeyay majaw nejw nipilan, pero ombeayiwan. Nejiw xeyay ngo majneaj apmamongochiw alinoic nüt —aw Teat Jesús.

*Minichech nop lemben omal najtaj*

(Lc. 21:1-4)

<sup>41</sup> Noic nüt Teat Jesús alchetem tiül aaga nadam nangaj iüm niüng ajlüy iguiäl nichech, teamajaw nipilan nguineay teamayacüw tomiün tiül. Tajaw xeyay nipilan monjiür, teamayacüw xeyay tomiün.

<sup>42</sup> Ndoj tapeay quiaj nop lemben omal najtaj ngo majiür, mayac ijquiw nine tomiün ichech nej, aag ayaj ngo membeat.

<sup>43</sup> Quiaj Teat Jesús tapaj minipilan nej masaj:

—Naleaing sasaj icon aaga lemben omal najtaj quiaj alwüx ayac, ngo matnej meáwan leaw lamayacüw ichechiw nejw.

<sup>44</sup> Cos meáwan lamayacüw nenaw ocueajjiw, pero aaga pobre lemben omal najtaj quiaj, lamayac meáwan leaw almajiür, masey ndoj ngo majiür ombeat üt nej —aj nejw Teat Jesús.

## 13

*Apjarriüm a nadam nangaj iüm tiül Jerusalén*

(Mt. 24:1-2; Lc. 21:5-6)

<sup>1</sup> Wüx Teat Jesús taw tiül aaga nadam nangaj iüm, quiaj nop minipilan nej tasaj nej:

—¡Teat, ijaw ajcüwa nadamdandam piedra quiaj! ¡Najneajay tarangüch marang nadamdandam iüm quiaj! —aj nej.

<sup>2</sup> Quiaj Teat Jesús tasaj nej:

—Nganüy teamejaw ajcüwa nadamdandam iüm quiaj, pero alinoic nüt ngome apmajlüy noic piedra wüx alinoic, cos meáwan ayaj apmümb jarriüm —aj nej.

*Wüx laliüc ndrom ombas a iüt cam*

(Mt. 24:3-28; Lc. 21:7-24; 17:22-24)

<sup>3</sup> Ndoj tambüw andüyiw wüx mitiüc Olivos najlüy lareng nadam nangaj iüm. Teat Jesús lachetej; quiaj Pedro, Jacobo, Juan, at Andrés tatüniw manguiyajw nej wüx tajlüyiw nejüwan quiaj, tasajüw:

<sup>4</sup> —Teat, isaj xicon ngow apmajlüy aag ipiüng wüx apjarriüm nadamdandam iüm quiaj. ¿Cuane apmajlüy sanajawan wüx laliüc majlüy meáwan leawa ipiüng quiaja? —ajw nej.

<sup>5</sup> Quiaj tasaj nejw Teat Jesús:

—Ijawan wüx, nde mawaiich icon nejingund.

<sup>6</sup> Cos xeyay nipilan aliücüw miün, apmandeacüw wüx xique, apmapiüngüw: “Xique aaga Cristo”, apmawüw. Quiaj apmawaijchaw xeyay nipilan.

<sup>7</sup> Aton masey wüx apmenguiayiün anderac wüx moncüy, at apmapiüngüw laliüc majlüy monbiyay, nde mbayameron cos atquiaj netam majlüy, pero nganaw mümb minüt a iüt cam.

<sup>8</sup> Cos monaw tiül noic iüt apmembiyayej maquiüjpüw monaw tiül alinoic iüt. At monaw tiül noic cambaj apmembiyayej maquiüjpüw monaw alinoic cambaj. Aton apmajlang nadamdandam ateam nguiajantanej. Apmajlüy xeyay lop, xeyay moncüy. Meáwan aaga ayaj les tamelich ajlüy ngo majneaj, ajlüy necoy.

<sup>9</sup> Icona netam mejawan wüx aag ayaj, cos apmayacüw icon teowixaw monajiüt, apmejwüchiün tiül sinagogas. Aton apmejapan niüng ajlüyiw natang monajiüt cos

iyariün sandeac. Quiaj alndom mesajan nejiw wüx xique manguiayiw aton.

<sup>10</sup> Wüx nğanaw mümb minüt a iüt cam netam masoic meáwan nipilan wüx iüt wüx aaga najneajay nanderac cam, manguiayiw nguineay alndom maw nisoet.

<sup>11</sup> Wüx apmaquiüjpüw icon mayacüw icon teowixaw monajiüt, nde meyamyamban imeajtsan wüx cuane apmepiüangan, cos apmeajndiün leaw apmepiüangan quiajan. Nangaj Espiritu ocueaj Teat Dios apmambeol icon mendeacan.

<sup>12</sup> Nacojaran apmayac teowixaw monajiüt nachiiugeran; at nachiiugeran apmayac teowixaw monajiüt nacojaran mandeow. Aton nateataran apmayac teowixaw monajiüt nacualaran, at nacualaran apmayac teowixaw monajiüt nateataran, namümaran, mandeowüw.

<sup>13</sup> Meáwan nipilan apmajcüyiw majawüw icon ajcan iyariün sandeac. Pero naleaing jane apmaiüc wüx meáwan aag ayaj, apmaw tiül naél.

<sup>14</sup> Tanomb aaga nendeac andeac Teat Dios nenüt Daniel tarang wüx nawiig, tapiüng wüx aaga xeyay ngo majneaj leaw apmüüch ndrom ombas cambaj. Wüx ijawan aag ayaj lajlüy niüng ngo metam majlüy (jane teamateow ich mayamb omeaats majaw cuane wüx apiüng aag ayaj), quiaj jane ajlüy tiül iüt Judea ich mecuiür andüy wüx tiüc.

<sup>15</sup> Tiül aaga nüt quiaj jane ngo majlüy tiül iüm, nde majmel tiül iüm mawün leaw ajjiür quiaj.

<sup>16</sup> Sitiül aljane altiül corrül, aton nde mandilil andüy aniüng nej mayar apix nej.

<sup>17</sup> ¡Apmaél ocueajiw a montaj alteomeajtsüw micualüw nejiw, at leawa nejiür nine teachech wüx aaga nüt quiaj!

<sup>18</sup> Itüniün ocueaj Teat Dios nde müüch icon mercuiüran wüx nüt ajlüy naquind,

<sup>19</sup> Cos aaga nüt quiaj apmamongocharan xeyay ngo majneaj, leawa nómban ngomeaag ajlüy ajan wüx Teat Dios tarang a iüt cam, aton ngome apmajlüy alinomb.

<sup>20</sup> Sitiül Teat Dios ngo mapal aaga ngo majneaj quiaj, nejingüind ngome apmapac. Cos Teat Dios xeyaj ajjiür lasta minipilan nej leaw nej lamarriüü, áag tandondoch najen aaga nüt ajlüy ngo majneaj quiaj.

<sup>21</sup> Sitiül aljane apmasaj icon: “Jogüy a Cristo”, maw; tengwüy mapiüng: “Joyaj a Cristo”, maw, nde meyariün andeac nej.

<sup>22</sup> Cos aliücüw xeyay monwaiich; altiül apmapiüngüw cristo nejiw. Altiül apmapiüngüw mondeac andeac Teat Dios nejiw; apmarangüw ateócan mambaijchaw nipilan, mawaijchaw para mayarich andeacüw nejiw. At altiül minipilan Teat Dios leawa nej lamarriüü apmawaiicharanüw aton sitiül ndot alndom.

<sup>23</sup> Pero ich leaam imeajtsan, xique lanasaj icon nde nğanüy para alndom mejawan nguineay apmajlüy alinoic nüt.

*Wüx aliüc Teat Naxey  
(Mt. 24:29-35, 42-44; Lc. 21:25-36)*

<sup>24</sup> Wüx aaga nüt quiaj, wüx apmamong meáwan aaga xeyay ngo majneaj quiaj, nüt lango merraj átan a caaw lango merraj.

<sup>25</sup> At ocas apmajmiücüw imiün tiül cielo, meáwan leaw almajlüy cawüx apmajlüyü.

<sup>26</sup> Condom quiaj apmajaraw aaga Teat Naxey aliüc amb tiül oic xeyay najneajay ajlüy, nelitlit ombas.

<sup>27</sup> Quiaj apmüüch mambüw miängeles nej macanchichaw meáwan minipilan nej wüx iüt, imiün nonüt, noleat, calüy, cawac.

<sup>28</sup> Inguiayiyün leaw sanasaj icon wüx nguineay arang a toc: Cos wüx latsatsaw mipüüg nej mayac aóp, quiaj ajüic laliüc matüch a nüt arraar.

<sup>29</sup> Atquiaj icona wüx apmejawan lajlüy aaga lanasaj icon quiaj, quiaj apmejawan laliüc matüch a nüt mapeay Teat Naxey.

<sup>30</sup> Naleaing sasaj icon, meáwan aag ayaj apmajlüy wüxan aliün mapac nipilan ningüy wüx iüt.

<sup>31</sup> Masey iüt, at a cielo apndrom ombas, xepoch nómban ngondom ndrom ombas.

<sup>32</sup> Wüx aaga nüt, aaga ores quiaj, nejingüind ngo majaw, at ajcüwa ángel najlüy tiül cielo, at Mical Teat Dios ngo majaw ngow. Néjan quiaj Teat Dios ajaw.

<sup>33</sup> Netam mepacan nde memeyiün, icülüin, itajcan orar cos ngo mejawan ngow apmajlüy aag ayaj.

<sup>34</sup> Cos aag ayaj atnej arang nop naxey wüx amb majlüy miünquiaj. Wüxan nğanaw maw aniüng nej apmapaj miünüw mimos nej, müüch minajiütüw anopnopoj. Aton nejiür ombeay nden apmasaj nde mameay.

<sup>35</sup> At icona, icülüin, nde memeyiün, cos ngo mejawan ngow apmapeay neneay nden; sitiül apmapeay andüy wüx quinüt, sitiül pinawan ongwiütis, sitiül andüy wüx arraw, tengwüy ümb arraw;

<sup>36</sup> nganandot maxom icon almemeayiün wüx nej apmapeay.

<sup>37</sup> Leaw lanasaj icon, aton sasaj meáwan nipilan: Icülüin xic, nde memeyiün —aj nejiw Teat Jesús.

## 14

*Tayambüw nguineay alndom masapüw Teat Jesús*

*(Mt. 26:1-5; Lc. 22:1-2; Jn. 11:45-53)*

<sup>1</sup> Alíünan ic nüt wüx nğanaw matüch nangos nüt pascua wüx üeteran pan ngo majmel levadura. Ajcüwa montangtang miteaats, at mondüy wüx aaga poch tüünd Moisés, tayambüw nguineay mawaijchaw para masapüw Teat Jesús mambiyaw.

<sup>2</sup> Pero tapiüngüw:

—Ngondom marangaats aag ayaj wüx nangos nüt, cos nipilan apmajcüyiw, apmajlüy xeyay monyaingyaying —awüw.

*Nop najtaj tateng najmboc angan aceite wüx omal Teat Jesús*

(Mt. 26:6-13; Jn. 12:1-8)

<sup>3</sup> Wüx Teat Jesús altiül cambaj Betania, teäüetiw al aniüng Simón, aag lafün wüx axom nej noic ngo majneaj necoy nasocic lepra. Quiaj tajngot nop najtaj ajamiün najmboc angan aceite, nenüt nardo nembeat xeyay, chipiow nop nine iquial narangüch atnej limet nenüt alabastro. Quiaj tajmbaj apal, tateng wüx omal Teat Jesús aaga najmboc angan aceite quiaj.

<sup>4</sup> Altiül leaw aliw quiaj tajcüyiw, nejeyéjan quiaj tapiüngüw:

—¿Neol tandrooch ombas aaga najmboc angan aceite quiaja?

<sup>5</sup> Jondot majnap apmambeat arej acocic miow (300) tomiün nenüt denario, mambeolaran nipilan leaw ngo majiür —awüw. Tandeacdeacüw wüx ombas a najtaj.

<sup>6</sup> Quiaj Teat Jesús tasaj nejüw:

—Icuaeüün, ¿neol tapots mesajsajana? Cos nej tarang najneaj wüx ximbas.

<sup>7</sup> Nipilan leaw ngo majiür aliw ningüy mequiüpan, alndom membeolan wüx indiüman; nganüy a xique ngome sanajlüy ningüy naquiüüb icon meáwan nüt.

<sup>8</sup> Aaga najtaj cam lamarang leaw alndom marang; cos wüx nganaw nandeow lamayac aag ayaj wüx ximbas atnej arangüch wüx amiüraad mondeow.

<sup>9</sup> Naleaing sasaj icon, nguiajantanej wüx aaga iüt cam niüng apmänderac xepoch, quiaj apmänderac wüx aaga najtaj cam nguineay tarang, para alndom leam omeaatsaran wüx nej —aj nejüw Teat Jesús.

*Judas apmayac teowixaw monajiüt a Teat Jesús*

(Mt. 26:14-16; Lc. 22:3-6)

<sup>10</sup> Condom Judas Iscariote, nop tiül ajcüwa gajpiüp (12) minipilan Teat Jesús, tamb majaw ajcüw montangtang miteaats mandeacüw nguineay apmayac Teat Jesús teowixaw nejüw.

<sup>11</sup> Camüm manguiyaw aag ayaj, quiaj tapac omeajtsüw, tasajüw apmüjchüw nej tomiün. Quiaj tapots mayamb nguineay alndom mayac teowixaw nejüw.

*Teat Jesús ndójwüx üet aweaag minipilan nej*

(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup> Wüx lamatüch aaga nangos nüt wüx üeteran pan ngo majmel levadura, wüx ambiyaran sap marang nichech wüx pascua,

quiaj minipilan Teat Jesús tatüniw manguiyiw nej:

—¿Nguiane indiüm, Teat, namban natajcan majneaj niüng apmatsambaats a sap wüx pascua? —ajüw nej.

<sup>13</sup> Quiaj Teat Jesús tüüch mambüw ijpüw minipilan nej, tasaj:

—Quiüran tiül cambaj. Quiaj apmexoman nop naxey ajoy nop ngan yow, indüjpiün mamb.

<sup>14</sup> Niüng apmajmel a naxey, quiaj apmesajan neneay iüm: “Atcüy apiüng Teat Naxey: ¿Nguiane ajlüy niüng sanetiün wüx pascua naquiüüb xenipilana?” apmerajan.

<sup>15</sup> Quiaj apmatiih icuaejiün noic nadam teomeaats iüm cawüx amb ijpüw iüm, latajcüch majneaj. Andüy quiaj apmeyacan üetiüts —aj nejüw Teat Jesús.

<sup>16</sup> Quiaj tambüw ijpüw. Wüx tapeayiw tiül cambaj Jerusalén, quiaj taxomüw meáwan atnej Teat Jesús lamasaj nejüw. Quiaj tayacüw leawa apmüetiw wüx nangos nüt pascua.

<sup>17</sup> Wüx langwiiüts, quiaj tapeay Teat Jesús maquiüüb gajpiüp (12) minipilan nej.

<sup>18</sup> Wüx alchetemoj teaüetiw, quiaj tapiüng Teat Jesús:

—Naleaing sasaj icon, nop tiül icona leawa teasüet anaag apmayac xic teowixaw monajiüt —aw.

<sup>19</sup> Quiaj tamix omeajtsüw, tatüniw manguiyiw Teat Jesús anopnopo. Nop tapiüng:

—¿Jane, ngwa xique? —aw.

Alinop tapiüng:

—¿Ngwa xique? —aw.

<sup>20</sup> Quiaj tasaj nejüw Teat Jesús:

—Aag ayaj nop naw tiül aaga gajpiüp ijlüyiün, áag tenguiäl macheniiüts pan tiül polat nóiquian maquiüjpaats.

<sup>21</sup> Naleaing Teat Naxey apmamongoch atnej apiüng tiül Mipoch Teat Dios, ipero aaga naxey apmeyac nej teowixaw monajiüt xeyay ngo majneaj apmamongoch, más najneaj ngo wijquiaam! —aj nejüw.

<sup>22</sup> Wüx tenguiäléamban üetiw, quiaj Teat Jesús taxaing a pan, tüüch gracias Teat Dios, ndoj tambaag müüch nejüw, tapiüng:

—Ixainguiün itean, cos aag agüy xecuerpo —aw.

<sup>23</sup> Condom tachipich noic vas miyow uva, tüüch gracias Teat Dios. Ndoj tüüch nejüw manganeowüw.

<sup>24</sup> Tapiüng:

—Aag agüy xequeiej, ajüiquich wüx aaga jayats poch lamayac Teat Dios, cos xequeiej apmajüch tiüt mawün wüx asoet xeyay nipilan.

<sup>25</sup> Naleaing sasaj icon xique lango nanga-neow miyow uva; pero alinoic nüt sananga-neow jayats miyow uva tiül micambaj Teat Dios —aw Teat Jesús.

*Pedro apmapiüing ngo majaw jane Teat Jesús*

(Mt. 26:30-35; Lc. 22:31-34; Jn. 13:36-38)

<sup>26</sup> Wüx landoj matajcwü cantar noic himno, quiaj tambwü andüyiw wüx mitiüc Olivos.

<sup>27</sup> Almambwü, quiaj Teat Jesús tasaj nejiw: —Meáwan icona apmecueatiün xic aaga ongwüüts cam, atnej apiüing tiül Mípoch Teat Dios: “Sanambiy a nejiür sap, quiaj apndajrriüm meáwan misap nej”, aw.

<sup>28</sup> Wüx sanapac tiül mondeow, quiaj sanamb tiül Galílea ombas xic, teoj icon —aj nejiw Teat Jesús.

<sup>29</sup> Quiaj tasaj nej a Pedro: —Teat, masey meáwan macueatiw ic, xique ngwüy —aj nej.

<sup>30</sup> Quiaj tasaj nej Teat Jesús: —Naleaing sasaj ic Pedro, aaga ongwüüts cam, wüx nganaw mepaj ijquiw ombeay a gallo, ique lamepiüing arojmbwü ngo mejaw jane xic —aj nej Teat Jesús.

<sup>31</sup> Pedro tandead napac, tapiüing: —Masey sanandeow naquiiüb ic, xique ngome sanapiüing ngo najaw jane ic —aw.

Aton atquiaj tapiüingwü meáwan minipilan nej.

*Teat Jesús ataag orar tiül Getsemaní*  
(Mt. 26:36-46; Lc. 22:39-46)

<sup>32</sup> Condom tapeayiw tiül Getsemaní. Quiaj Teat Jesús tasaj minipilan nej:

—Cheteron ningüy; xique sanamb nataag orar —aj nejiw.

<sup>33</sup> Taquiiüb mamb a Pedro, Jacobo, at a Juan. Quiaj tapots amix omeaats, tayaag xeyay ngo majneaj.

<sup>34</sup> Tasaj nejiw: —Xeyay amix ximeaats, sayaag atnej teasandeow. Icüliün xic ningüy, nde memeayüün —aj nejiw.

<sup>35</sup> Condom Teat Jesús tamb quiríwan iün majüy, quiaj mejquiet tiüt ataag orar. Tatün ocueaj Teat Dios sitiül alndom mawün nej wüx meáwan leawa apmamongoch.

<sup>36</sup> Tapiüing: —Teat, ngo majlüy nicuajind leawa ique ngondom merang. Sandiüm mewün xic wüx aaga nangaag naél leawa laliüc namongoch. Pero naleaing Teat, nde merang sandiüman xique, irang atnej ique indiüm —aw.

<sup>37</sup> Condom tandilil majaw nejiw. Almapeay quiaj tajaw lameayiw. Quiaj tasaj a Pedro:

—Simón, ¿lermeaya? ¿Neol ngondom mefüc noic ores?

<sup>38</sup> Nde memeayüün, iyamban Teat Dios, nde matüch icon nimeech. Masey tiül imeajtsan indiüman mendüjpiün Teat Dios, pero naleaing icona ngo meücan wüx, nind imeayüün —aj nejiw.

<sup>39</sup> Condom tandüy quiaj alinomb masaj Teat Dios atnej landoj mandeac.

<sup>40</sup> Wüx tandilil alinomb niüing ajlüyiw nejiw, taxom nejiw alinomb almameayiw, cos xeyay laínd ameyayiw. Quiaj lango majawwü cuane apmasajwü nej.

<sup>41</sup> Wüx tapeay amb arojmbwü, quiaj tasaj nejiw:

—¿Neol aliün memeayüuna, tenguijal ixoj-tana? Landoj, lamatüch a ores. Nganüy apmayacüch a Teat Naxey teowixaw monrang ngo majneaj.

<sup>42</sup> Witiüron, tabaats, lapeay aaga apmetiüb xic —aj nejiw Teat Jesús.

*Aquiiüpüw mamb Teat Jesús*  
(Mt. 26:47-56; Lc. 22:47-53; Jn. 18:2-11)

<sup>43</sup> Tengualeámban andeac Teat Jesús, quiaj ajngot a Judas, áag tajlüy tiül a gajpiüp (12). Aquiiüb miün xeyay nipilan, ajamiünüw espada, at xiül; iüch nejiw mambwü ajcüwa montangtang miteaats, mondüy wüx aaga poch tüünd Moisés, at montangtang monajiüt tiül nadam nangaj iüm.

<sup>44</sup> Aaga Judas lamasaj nejiw nguineay apmatiüb majüquich ngün apmasapwü, cos lamapiüing:

—Áag sanacheech mimboy nej, aag ayaj isapan, iquiiüpan nde mecuiür —aw.

<sup>45</sup> Wüxan apeay aleáingan niüing ajlüy Teat Jesús, tapiüing:

—Teat —aw.

Andüüban macheech mimboy nej.

<sup>46</sup> Quiaj tasapwü Teat Jesús, taquiiüpüw mamb.

<sup>47</sup> Naleaing nop minipilan Teat Jesús tasoond miespada nej, quiaj tandooig nop olaag mimos minatang miteaats.

<sup>48</sup> Teat Jesús tasaj ajcüwa nipilan:

—¿Cuane ijmbichan espadas y xiül wüx isapan xique? ¿Jowa xique, need xic, ngwüy neola?

<sup>49</sup> Meáwan nüt tajlüyüs niüing ijlyüün naquiaach icon tiül nadam nangaj iüm, icona ngo mesapan xic. Pero naleaing atcüy apmajlüy, cos netam majlüy atnej lamapiüing tiül Mípoch Teat Dios —aj nejiw Teat Jesús.

<sup>50</sup> Quiaj tacueatiw nej meáwan minipilan nej, tecuiürüw.

*Nop nench tecuiür*

<sup>51</sup> Nop nench tandüüb mamb Teat Jesús, awinchay tiül noic püy, tasapwü nej.

<sup>52</sup> Quiaj nej sojndiüt tiül apix nej, tecuiür miotáagan.

*Teat Jesús alniüing ajlüy monajiüt*  
(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Condom taquiüjpüw mamb Teat Jesús niüng ajlüy minatang miteaats. Quiaj canchiütoj meáwan montangtang miteaats, at montangtang monajiüt tiül nadam nangaj iüm, aton mondüy wüx aaga poch tüünd Moisés.

<sup>54</sup> Ata Pedro aton tandüüb Teat Jesús miünquiajan ajngot. Tamb tatüch tiül püjchiün mbeay ombiüm minatang miteaats. Quiaj tsotot maquiüjpüw monjiür aniüng miteaats, metsantsayej mbeay biümb.

<sup>55</sup> Ajcüwa montangtang miteaats at meáwan monajiüt tiül judios tayambüw acas nipilan mapiüngüw nóiquian cuane ngo majnej tandec Teat Jesús, para mayacüw asoet mandeow, pero ngo maxomüw.

<sup>56</sup> Cos xeyayiw tandecüw ngo maleaing wüx ombas nej, palpálwüx andecüw, ngome nóiquian.

<sup>57</sup> Altiül witiütoj tewüyayej wüx mawaijchaw, tapiüngüw:

<sup>58</sup> —Xicona tanguiayasan wüx tandec mapiüng nej apmajarrich aaga nadam nangaj iüm leaw nipilan tarangüw, ndoj wüx er nüt apmawitich alinop nangaj iüm, ngome narangüch naag owixaran. Atquiaj tandec aaga naxey quiaj —awüw.

<sup>59</sup> Pero ngome nóiquian tandecüw mayacüw asoet.

<sup>60</sup> Condom aaga minatang miteaats witiüt lombom pinawan, matün manguiaj Teat Jesús. Tasaj:

—¿Neol ngo merndeaca? ¿Cuane aag teamandecüw wüx imbas quiaja? —aj.

<sup>61</sup> Teat Jesús ndijchiówan, ngo masaj nej nicuajind. Quiaj tatün manguiaj alinomb, tasaj:

—¿Ique aaga Cristo, micual ic Teat Diosa? —aj.

<sup>62</sup> Quiaj tasaj nej Teat Jesús:

—Xícam aag ipiüng quiaj. Apmejawan xic salcheten amb wüx miác Teat Dios. Cos xique aaga Teat Naxey, apmejawan wüx salüic ximiün tiül cielo samb tiül oic —aj nej.

<sup>63</sup> Quiaj minatang miteaats tachiüt apix nej, xeyay tajcüy, tapiüng:

—¿Cuane tengualeámban macüliüts manguiajiütsa?

<sup>64</sup> Nganüy icona lamenguiayiün meáwan aaga ngo majnej lamandec quiaj, cos andec atnej Teat Dios nej. ¿Cuane ajiür menguiayiüna? —aw.

Quiaj meáwan nejw tapiüngüw netam mandeow.

<sup>65</sup> Altiül tapots mateontsüw onts ombeayiw nejw wüx ombas nej. Aton tatsajcüw onüüg nej, tatoliw. Condom tasajüw:

—¿Nganüy isüet jane netol ic! —ajüw.

At ajcüwa monajiüt quiaj taleambüw nej aton.

*Pedro apiüng ngo majaw jane Teat Jesús*  
(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Pedro aliün quiaj tiül püjchiün, quiaj apeay niüng ajlüy nej nop nüx nerang minajiüt minatang miteaats.

<sup>67</sup> Wüx tajaw a Pedro teatsantsüy mbeay biümb, quiaj lombot mapiür majaw, tasaj:

—Ique aton tequiüüb aaga Jesús naw Nazaret —aj.

<sup>68</sup> Quiaj a Pedro tapiüng:

—Ngwüy, ngo najaw jane, ngo najaw cuane leaw ipiüng quiaj —aw.

Ndoj taw quiaj andüy mbeay nden, quiaj tepaj a gallo.

<sup>69</sup> Aaga nüx tajaw nej alinomb. Ndoj tapots masaj nipilan alquiaj, tapiüng:

—Aaga naxey quiaj nop naw tiül nejw —aw.

<sup>70</sup> Pedro quiaj tawaiich alinomb. Ndoj ajoy miün quiriw ores, ajcüwa nipilan aliw quiaj tasajüw nej alinomb:

—Naleaing ique nop naw tiül nejw, cos indeac atnej andecüw monaw Galilea —ajüw.

<sup>71</sup> Quiaj a Pedro tapots mapiüng ngo maleaing aag ayaj, tapaj minüt Teat Dios, tapiüng:

—¿Por dios, ngo najaw jane aaga naxey temepiüngan quiaj! —aw.

<sup>72</sup> Aaga gallo tepaj amb ijmbüw apaj. Quiaj a Pedro leaad omeaats leaw Teat Jesús lamasaj nej. Cos tasaj nej: “Wüxan nganaw mepaj ijmbüw apaj a gallo, ique lamepiüng arojmbüw ngo mejaw jane xic”, aj nej. Wüx leaad omeaats aag ayaj, quiaj tapots ajiünts.

## 15

*Teat Jesús alteombas Pilato*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Wüx lachiüjmbaw, quiaj ajcüwa montangtang miteaats canchiütoj maquiüjpüw montangtang monajiüt tiül nadam nangaj iüm, at mondüy wüx aaga poch tüünd Moisés, maquiüjpüw alacas monajiüt. Quiaj taquiüjpüw mamb Teat Jesús netsaag, mayacüw teowix Pilato.

<sup>2</sup> Aaga Pilato tatün nej manguiaj:

—¿Naleaingue, ique aaga minatang nena-jiüt ocueaj cambaj Israele? —aj.

Quiaj tasaj nej Teat Jesús:

—Atnej ipiüng quiaj —aj nej.

<sup>3</sup> Ajcüwa montangtang miteaats tayacüw nej xeyay asoet.

<sup>4</sup> Condom Pilato tatün nej manguiaj alinomb, tasaj:

—¿Neol ngo merndeaca? Ijaw nguineay teamayacüw isoet xeyay —aj.

<sup>5</sup> Teat Jesús ngo masaj nej nicuajind, quiaj a Pilato mbayat majaw nej.

*Atüniw mandeow Teat Jesús*

(Mt. 27:15-31; Lc. 23:13-25; Jn. 18:38—19:16)

<sup>6</sup> Aaga Pilato quiaj ajlüyay wüx matsambiich nop najlüy tiül manchiüc wüx nangos nüt, leaw nipilan apmatüniw tsajmbiüm.

<sup>7</sup> Aliw tiül manchiüc acas nipilan cos tambiyaw nipilan wüx tadjüyw maquiüjpüw monajiüt. Altiül nop nenüt Barrabás.

<sup>8</sup> Xeyay nipilan tambüw majawüw a Pilato. Tapots matüniw marang atnej mbójan marang.

<sup>9</sup> Quiaj tasaj nejiw a Pilato:

—¿Cuane indüümana? ¿Ngwüy, sanatsambiich minatang nenajiüt icueajiüna? —aj nejiw.

<sup>10</sup> Cos lamajaw ajcüwa montangtang miteaats tayacüw teowix nej a Teat Jesús, ajcan ngo mandüümüw majawüw mandüüb nej xeyay nipilan.

<sup>11</sup> Ajcüwa montangtang miteaats taquiajchiw ombeay nipilan mapiüngüw tsajmbiüm Barrabás.

<sup>12</sup> Quiaj a Pilato tatün manguiay alinomb:

—¿Cuane indüüman mejawan narang wüx aag ipiüangan minatang nenajiüt icueajiüna? —aj nejiw.

<sup>13</sup> Nejiw tepajüw napac:

—¡Ich mandeow wüx cruz! —awüw.

<sup>14</sup> Quiaj tasaj nejiw a Pilato:

—¿Cuane asoet ajüür? —aj nejiw.

Meáwan nipilan tepajüw alinomb:

—¡Ich mandeow wüx cruz! —awüw.

<sup>15</sup> Cos aaga Pilato tandiüm majneaj aweaag meáwan nipilan, quiaj tatsambiich a Barrabás. Ndoj tapiüng majwüch Teat Jesús, quiaj tüüch mamb mayacüw wüx cruz.

<sup>16</sup> Condom ajcüwa soldados taquiüjpüw Teat Jesús andüy tiül noic püjchiün nüüng acül Pilato, nenüt pretorio. Quiaj canchiütoj meáwan soldados.

<sup>17</sup> Condom quiaj tasoijquiw tiül noic napixeran morada, ndoj tayacüw wüx omal nej noic corona nepeat sats.

<sup>18</sup> Quiaj tapots mitsojow nej, tasajüw:

—¡Mbich ique minatang nenajiüt ocueaj judíos! —ajüw.

<sup>19</sup> Tawüjchiw omal nej naag xiül, aton tateontsüw onts ombeayiw nejiw wüx ombas nej. Ndoj taquejliw micosüw nejiw teombas nej, atnej teayambüw monajneaj.

<sup>20</sup> Wüx lapaxiow mitsojow, quiaj tasoijndiw aaga morada napixeran, cas tasoijquiw tiül apix nej alinomb. Ndoj quiaj taquiüjpüw mamb mayacüw wüx cruz.

*Teat Jesús tajmel wüx cruz*

(Mt. 27:32-44; Lc. 23:26-43; Jn. 19:17-27)

<sup>21</sup> Nop naxey naw tiül cambaj Cirene, nenüt Simón, miteatiw Alejandro maquiüüb a Rufo, les tajngot imiün tiül wajchiüc. Wüx

tamong amb quiaj, tasapüw nej müjchiw mambitic micruz Teat Jesús.

<sup>22</sup> Quiaj taquiüjpüw mamb a Teat Jesús andüy tiül nüüng nasoic Gólgota, aag ayaj amb apiüng: Omal Mondeow.

<sup>23</sup> Condom tüjchiw nej vin aolüw tiül noic süüig nenüt mirra, pero nej ngo mayar manganeow.

<sup>24</sup> Wüx landoj mayacüw wüx cruz, quiaj tembaagayej tiül apix nej. Tasüetiw wüx majawüw ngün apmajoyiw anopnopo.

<sup>25</sup> Aleamb pinawan ajüy nüt tayacüw nej wüx cruz.

<sup>26</sup> Condom tarangüw acas poch mayacüw wüx omal cruz nüüng apiüng cuane asoet nej. Apiüng: “Aag agüy minatang nenajiüt ocueajiw nipilan judío”, aw.

<sup>27</sup> Aton tajmeliw wüx cruz ijpw moneed, nop amb wüx miác Teat Jesús, alinop amb wüx miquiamb nej.

<sup>28</sup> Atquiaj tajlüy leaw landoj lamapiüng tiül Mipoch Teat Dios, cos apiüng: “Tayacüch atnej nop nerang ngo majneaj”, aw.

<sup>29</sup> Leaw tamongoj quiaj titsojow nej, talanglangüw omalüw müjchiw majüiquichaw ajcüyw. Tapiüngüw:

—¡Jaa, ngwüy ique nepiüng apmejarrich aag nadam nangaj iüm, ndoj wüx er nüt apmelomboch alinomb!

<sup>30</sup> ¡Nganüy erwüney wüx cruz iquiáyan quiaj, iriow tiül! —ajüw.

<sup>31</sup> At aton ajcüwa montangtang miteaats at mondüy wüx aaga poch tüünd Moisés titsojow nej, tapiüngüw nejeýejan quiaj:

—Ney tawün wüx alinop, pero nganüy a nej ngondom mewüney wüx nejáyan quiaj.

<sup>32</sup> Nganüy apmajawaats sitiül naleang nej aaga Cristo, minatang nenajiüt ocueaj cambaj Israel, cos sitiül apmaw tiüt imiün wüx cruz, mbich apmayariiüts andeac nej —awüw.

At monlüy wüx cruz aton titsojow nej.

*Wüx tandeow Teat Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Wüx lalimnüt, quiaj pojniüt wüx iüt, tiün ram wüx lanchejliow nüt.

<sup>34</sup> Wüx lanchejliow nüt, quiaj Teat Jesús tepaj napac, tapiüng:

—Eloi, Eloi, ¿lama sabactani? —aw. Aag ayaj apiüng: Teat Dios, Teat Dios, ¿neol tecueat xic?

<sup>35</sup> Altiül leaw alquiaj tanguaiyw aag ayaj, tapiüngüw:

—Inguaiyiün, teamapaj a Elías —awüw.

<sup>36</sup> Quiaj tamb nop, acuiür macachiich tiül vinagre noic esponja, aag ayaj atnej walang sap. Tayac wüx nots xiül. Quiaj tüüch macheý. Tapiüng:

—Cawül majawaats sitiül aliüc Elías mawün nej tiüt —aw.



<sup>37</sup> Quiaj Teat Jesús tepaj napac, ndoj tandeow.

<sup>38</sup> Wüx tandeow Teat Jesús, quiaj aaga nadam jael nepal teomeaats nadam nangaj iüm chiütat naw cawüx andüy tüüt, nómban mbajcaw pinawan.

<sup>39</sup> Alombom quiaj niüing ajlüy micruz Teat Jesús nop minatang tüül soldados, teamajaw. Wüx nej tanguiaj tepaj, ndoj tajaw nguineay tandeow, quiaj tapiüing:

—jNaleaing aaga naxey quiaj Mical nej Teat Dios! —aw.

<sup>40</sup> Aton aliw quiaj acas montaj, miünquaijan alembemiw teamajawüw. Altiül María Magdalena, Salomé, at a María mimümuw José maquiüüb Jacobo aag chingüy.

<sup>41</sup> Ajcüwa montaj quiaj, tandüjpiw Teat Jesús wüx tajüy tüül Galilea, tambeolüw nej. Aton aliw quiaj altigüy montaj, ajcüw tiünüw mandüjpiw nej matüchiw Jerusalén.

*Wüx tamiüraad Teat Jesús*

(Mt. 27:57-61; Lc. 23:50-56; Jn. 19:38-42)

<sup>42</sup> Wüx lamitiüt nüt, langwiüts, cos aaga nüt quiaj tenguaial ayambüch leaw apmetam wüx nüt axoodaran, cos oxep quiaj nüt axoodaran.

<sup>43</sup> José naw tüül cambaj Arimatea, nej nop nej natang tüül monajiüt ocueaj judíos. Nej ngo mimbol, tamb niüing ajlüy a Pilato matün micuero Teat Jesús mamiüt. Cos nej aton teamacül majlüy tüül micambaj Teat Dios.

<sup>44</sup> Pilato mbayat wüx tanguiaj najénan landeow Teat Jesús. Quiaj tapaj a minatang tüül soldados matün manguiaj sitiül naleaing landeow.

<sup>45</sup> Wüx minatang soldado tapiüing naleaing landeow, quiaj a Pilato tasaj a José alndom maquiüüb mamb mamiüt.

<sup>46</sup> Condom quiaj José tamb mangal noic najneaj püy. Ndoj tawün tüüt Teat Jesús, tawinch tüül a püy, taxaing maquiüüb mamb mayac tüül noic jayats oxiiüt narangüch tüeng tüic tüül piedra. Ndoj tayacüw noic nadam piedra mapal.

<sup>47</sup> María Magdalena, at María mimüm José, tajawüw nguiane tayacüch.

## 16

*Teat Jesús tapac tüül mondeow*

(Mt. 28:1-10; Lc. 24:1-12; Jn. 20:1-10)

<sup>1</sup> Wüx lamong a nüt axoodaran, quiaj María Magdalena, Salomé, at María mimüm Jacobo tangalüw najmboc angan aceite majoyiw mayacüw wüx ombas Teat Jesús.

<sup>2</sup> Úmban arraw doming almajnchep nüt, quiaj tambüw andüyiw niüing ajlüy oxiiüt.

<sup>3</sup> Tandeacüw nejeyéjan quiaj, tapiüingüw: —jJane apmawün ocueajiüts a piedra nepal ombeay aaga oxiiüt? —awüw.

<sup>4</sup> Wüx tatüchiw quiaj, quiaj tajawüw aaga nadam piedra nepal oxiiüt laáw.

<sup>5</sup> Wüx tajmeliw tüül oxiiüt, quiaj tajawüw nop nench, asooig najal apix nej raan. Alchetem wüx miác niüing tayacüch a Teat Jesús. Quiaj mbayatoj.

<sup>6</sup> Pero nej tasaj nejjiw:

—Nde mbayameron, cos sawaw icona teameyamban Teat Jesús naw Nazaret, áag tambiyaw wüx cruz. Nganüy lapac, ngo majlüy ningüy. Jogüy ijawan niüing tayacüw.

<sup>7</sup> Nganüy quiüran isajan a Pedro at meáwan minipilan nej. Isajan: “Teat Jesús laámb ombas nej andüy tüül Galilea. Quiaj apmejawan, atnej lamasaj icon” —aj nejjiw.

<sup>8</sup> Quiaj tawüw tüül oxiiüt acuiürrüw, cos xeyay mbayatoj, tambeapmbeap nejjiw, ngo masajüw nejinguind cos xeyay mbayatoj.

*Teat Jesús tejüiquichay majaw nej María Magdalena*

(Jn. 20:11-18)

<sup>9</sup> Wüx Teat Jesús tapac tüül mondeow úmban arraw doming, quiaj tejüiquichay ombas majaw nej a María Magdalena, aag landoj mawün wüx ombas ayaiw nimeech.

<sup>10</sup> Condom quiaj María tamb masaj minipilan Teat Jesús, cos xeyay amix omeajtsüw, tenguaial ajiüntsüw.

<sup>11</sup> Masey lamanguiaiyw Teat Jesús lapac, aton a María landoj majaw nej, nejjiw ngo mayariw andeac nej.

*Teat Jesús tejüiquichay majawüw nej ijpüw minipilan nej*

(Lc. 24:13-35)

<sup>12</sup> Wüx ndoj ayaj, quiaj Teat Jesús tejüiquichay alinomb majawüw nej ijpüw minipilan nej wüx aliw tüül tiüüd andüyiw tüül wajchiüc, pero naleaing lango majüic matnej.

<sup>13</sup> Nejjiw aton tambüw masajüw alacas minipilan nej, átan ngo mayariw nejjiw andeacüw.

*Teat Jesús tasaj minipilan nej cuane netam marangüw*

(Mt. 28:16-20; Lc. 24:36-49; Jn. 20:19-23)

<sup>14</sup> Condom Teat Jesús tejüiquichay majawüw nej ajcüwa gajpanop (11) minipilan nej wüx aliw wüx mes teaüetiw. Quiaj talic nejjiw ajcan ngo mayariw leaw tasoiquiw, aton cos adam omeajtsüw, ngo mayariw andeacüw monjaw nej lapac.

<sup>15</sup> Ndoj tasaj nejjiw:

—Quiüran tüül meáwan cambaj wüx iüt, isajan meáwan nipilan wüx aaga najneajay nanderac nguineay alndom maw asoeteran.

<sup>16</sup> Jane apmawar xepoch, mayar yow aton, apmaw asoet nej. Pero sitiül aljane ngo mayar xepoch, aag ayaj apmamongoch xeyay ngo majneaj tüül biümb alinoic nüt.

<sup>17</sup> Jane ayar xepoch apndom ombasüw marangüw ateócan. Wüx xenüt apmatajácüw majnejaj nipilan leaw alwüx ombasüw nimeech; at apmandeacüw alinoic ombeayiün.

<sup>18</sup> Masey masapüw ndiüc; at sitiül tündiw manganeowüw leaw alndom mambiy nejiw, ngome apmarang nejiw nicuajind. Aton wüx apmayacüw owixaw wüx moniün andeow apmajnejajiw —aj nejiw Teat Jesús.

*Teat Jesús tamb andüy tiül cielo*  
(Lc. 24:50-53)

<sup>19</sup> Landoj masaj nejiw aag ayaj, quiaj tamb Teat Jesús andüy cawüx tiül cielo. Quiaj chetet amb wüx miác Teat Dios.

<sup>20</sup> Ndoj minipilan nej tambüw tiül meáwan cambaj mandeacüw aaga najnejajay nanderac leaw apiüng wüx nguineay Teat Dios alndom mawün asoeteran. Nejaj Teat Cristo tambeol nejiw, tajüiquich majaraw leaw tandeacüw, aag ayaj naleaing, cos tarang ateócan wüx tandeacüw mipoch nej. Atquiaj tajlüy. Amén.

## Najneaj nanderac leaw tapiüŋg SAN LUCAS wüx Teat Cristo

*Neol tajlüy aaga nawüig cam*

<sup>1</sup> Xeyay lamarangüw wüx nawüig nguineay andüübndüjpeay meáwan leawa tajaraw naleaing tajlüy,

<sup>2</sup> atnej taquiajchiw icoots ajcüw leawa tajawüw tanomb con onüjcüw; aton tambelölüw wüx mandeacüw meáwan poch leaw tanguiayiw.

<sup>3</sup> Nganüy xique laúmb natüntün nanguiay meáwan, nguineay alndom najaw naleaing cuane tajlüy. Áag tapiüŋgas sanarang nasaj ic palan Teat Teófilo, nguineay andüübndüjpeay,

<sup>4</sup> mejaw naleaing meáwan leaw lerquiaacharan wüx.

*Nop ángel apiüŋg apwijquiam Juan Bautista*

<sup>5</sup> Tiül mineat Herodes wüx nej tarang minatang monajiüt tiül iüt Judea, tajlüy nop miteaats tiül nipilan judío nenüt Zacarías, ajlüy tiül noic ajlüy miteaats ocueaj Abías. Mintaj nej teat Zacarías nenüt müm Elisabet, naw tiül acualaats teat Aarón, áag tajlüy tanomb.

<sup>6</sup> Miijpüéj ayariw andeac Teat Dios, arangüw atnej lamapiüŋg Teat Dios. Nejingund ngondom mapiüŋg nejw alcuane ngo majneaj arangüw.

<sup>7</sup> Naleaing nejw ngo majiürüw micualüw nejw cos müm Elisabet ngondom majiür micual nej; aton cos miijpüéj xeyay latang ombasüw.

<sup>8</sup> Condom wüx tatüch nejw aaga noic ajlüy miteaats marangüw najiüt tiül nadam nangaj iüm, teat Zacarías tajlüy tiül.

<sup>9</sup> Cos miteaats ajlüyayej wüx masüetiw majawüw cuane najiüt apmarangüw anopnopo. Teat Zacarías tatüch nej majmel tiül nadam nangaj iüm ocueaj Teat Dios mayac pom.

<sup>10</sup> Meáwan nipilan monaw tiül cambaj acüliwan mbeay nadam nangaj iüm teatajcüw orar wüx teajmel pom.

<sup>11</sup> Teat Zacarías altiül nadam nangaj iüm, quiaj tajaw nop ángel ocueaj Teat Dios alembem amb wüx miác artül niüŋg ajmel pom.

<sup>12</sup> Wüx teat Zacarías tajaw aaga ángel, mbayat xeyay, lango majaw cuane apmarang.

<sup>13</sup> Quiaj tasaj nej a ángel:

—Teat Zacarías, nde mbayamear, cos Teat Dios lamanguaiy leaw itün ocueaj nej.

Nganüy müm Elisabet mintaj apmajiür nop micual nej. Apmeaach manüt Juan.

<sup>14</sup> Ique apmapac imeaats xeyay. Aton xeyay nipilan apmapac omeajtsüw wüx apwijquiam,

<sup>15</sup> cos nej xeyay najneaj apmarang majaw Teat Dios. Ngome apmanganeow vün, aton ngome apmanganeow alinoic yow leaw alndom müüch mangün nipilan. Teat Dios apmüüch nej majiür Nangaj Miespíritu Nej wüx aliün teomeaats mimüm nej.

<sup>16</sup> Nej apmüüch leaam omeajtsüw alinomb xeyay nipilan tiül israel wüx Teat Dios, midiosüw nejw.

<sup>17</sup> Nej apmamong ombas marang minajiüt nej, teoj aliüc aaga lapiürang aliüc. Apmarang atnej tarang tanomb teat Elías, müüch majneaj omeajtsüw nateateran majawüw micualüw nejw. Aton müüch marangüw najneaj leaw ngo mandüümüw mayariw leaw asoiquiw. Atquiaj alndom müüch majlüy noic ajlüy nipilan mayariw andeac aaga Cristo leaw lapiürang aliüc —aj nej aaga ángel.

<sup>18</sup> Quiaj tapiüŋg teat Zacarías, tasaj a ángel: —¿Nguineay alndom najaw naleaing aag ayaja? Cos xique xeyay lasataxey, at xantaj latang ombas aton —aw.

<sup>19</sup> Quiaj tasaj nej a ángel:

—Xique nenütiüs Gabriel nerangas minajiüt Teat Dios. Nej tüüch xic niün nasaj ic aaga najneaj poch quiaj.

<sup>20</sup> Nganüy cos ngo meyar sandeac, langome apmerndeac leaw atüch a nüt majlüy aaga lanasaj ic quiaj, ndoj apmerndeac alinomb —aj nej.

<sup>21</sup> Ajcüwa nipilan leaw ngo majmeliw, teamacüliw teat Zacarías, lambayajow ngo majawüw cua nerang nej, neol tequiy tiül nadam nangaj iüm.

<sup>22</sup> Wüx taw tiül nadam nangaj iüm teat Zacarías langondom mendeac masaj nejw nicuajind. Quiaj tapiüŋgüw:

—Aleaic tüünd majaw tiül nadam nangaj iüm —awüw.

Nej tüüch nejw majawüw cuane apiüŋg naag owix nej, cos lamejew, langondom mendeac.

<sup>23</sup> Wüx tatüch a nüt ndom minajiüt nej tiül nadam nangaj iüm, quiaj tajtsor.

<sup>24</sup> Naleaing ajiür miün acas nüt lacual müm Elisabet mintaj nej. Quiaj tacülan aniüŋg nej acoquiaw caaw, ngo maw majüy. Tapiüŋg:

<sup>25</sup> “Teat Dios lamajiür xic lasta, lamüüch xic namongoch xemonxing teombas nipi-lan”, aw.

*Ángel tapiüŋg apwijquiam Teat Jesús*

<sup>26</sup> Wüx lamajiür anaíw caaw, quiaj aaga ángel Gabriel tüüch nej mamb Teat Dios

andüy tiül iüt Galilea, tiül noic cambaj nenüt Nazaret,

<sup>27</sup> majaw nop nüx nenüt María. Aaga nüx quiaj altiüt mipoch aweaag nop nench nenüt José, naw tiül acualaats a Rey David tajlüy tanomb.

<sup>28</sup> Aaga ángel wüx tapeay niüng ajlüy a nüx, tasaj:

—Jow müm, satepeay ic! Sasoic nasaj ic lamexom xeyay monajneaj, cos Teat Dios lamambeol ic. Xeyay najneajay apmanderac wüx imbas tiül meáwan montaj —aj.

<sup>29</sup> Nej a nüx wüx tajaw aaga ángel, mbayaw manguaiy andeac, tapiüng tiül omeaats nej: “¿Neol tatepeay xic atquiaja?” aw.

<sup>30</sup> Quiaj tasaj nej aaga ángel:

—María, nde mbayamear, cos Teat Dios apmambeol ic xeyay.

<sup>31</sup> Nganüy apmejiür micual, apmewiquiach nop nine nench, apmeaach manüt JESS.

<sup>32</sup> Nej apmajlüy xeyay netam ajlüy. Apmanderac wüx nej apmapiürang micual nej Teat Dios najlüy tiül cielo. Teat Dios apmüüch nej marang nop minatang nenajiüt atnej tarang wüx a Rey David, mixeech nej najlüy tanomb.

<sup>33</sup> Nej apmajlüy wüx meáwan nipilan judío micual teat Jacob, apmarang natang meáwan nüt, aag ayaj ngo majiür ndoj —aj nej.

<sup>34</sup> María tasaj a ángel:

—¿Nguineay alndom majlüy aaga ipiüng quiaja, cos xique nganaw najiür xenoj? —aj.

<sup>35</sup> Quiaj tasaj nej a ángel:

—Aag ayaj Nangaj Espíritu ocueaj Teat Dios apmerang. Nej Teat Dios apmajiür ic mewiquiach aaga nine, cos aaga nine quiaj nangaj nej Micual Teat Dios.

<sup>36</sup> At icualaats müm Elisabet apmajiür nop nine. Masey xeyay latang ombas, anderac nómban ngondom majiür micual nej. Nganüy lacual lamajiür anaíw micaaw a nine teomeaats nej.

<sup>37</sup> Cos para Teat Dios ngo majlüy nicuajind naél ngondom marang —aj nej a ángel.

<sup>38</sup> Quiaj tapiüng a María:

—Xique nganüy sajlüy tiül owix Teat Dios, ich marang wüx ximbas atnej lamepiüng apmarang —aw.

Quiaj tamb a ángel.

*María tamb majaw Elisabet*

<sup>39</sup> Tiülan aaga nüt quiaj María tamb nagen andüy tiül tüc tiül noic cambaj tiül iüt Judea.

<sup>40</sup> Wüx tapeay quiaj tajmel aniüng teat Zacarías, quiaj tatepeay müm Elisabet.

<sup>41</sup> Wüx Elisabet tanguaiy atepeay nej María, quiaj ajwicwic teomeaats nej aaga

nine. Quiaj Nangaj Espíritu ocueaj Teat Dios tiün andüy wüx nej.

<sup>42</sup> Quiaj tandeac napac, tapiüng:

—Xeyay najneajay apmanderac wüx imbas tiül meáwan montaj, aton xeyay najneajay apmanderac wüx ombas aaga nine alteomeaats quiaj.

<sup>43</sup> ¿Jow a xique, cuane xic, miün majaw xic mimüm Micual Xeteat Diosa?

<sup>44</sup> Cos wüxan sanguaiy itepeay xic, quiaj xecual apac omeaats, ajwic tiül ximeaats.

<sup>45</sup> Najneajay apmapac imeaats cos teyar meáwan leaw lamasaj ic Teat Dios nguineay apmarang —aw.

<sup>46</sup> Condom quiaj tapiüng a María:

Sayaag tiül ximeaats xeyay najneajay arang Teat Dios.

<sup>47</sup> Apac ximeaats wüx Teat Dios, cos nej newün xic wüx.

<sup>48</sup> Teat Dios najneaj majaw xic masey xique ngo nembeat nicuajind tiül nipilan.

Naw wüx nganüy meáwan nipilan aliüc miün, apmandeacüw xeyay najneaj wüx ximbas.

<sup>49</sup> Cos lamarang xeyay najneaj wüx ximbas Teat Dios; nej cuajantanej alndom marang,

Xeyay nangaj minüt Teat Dios.

<sup>50</sup> Nej andiüm meáwan nipilan leawa lajlüy nganüy, aton ajiür lasta leaw aliüc miün apmajlüy, meáwan leaw apmariw nej andeac.

<sup>51</sup> Naag owix nej lamarang xeyay nadamdam cuajantanej, aton tandrooch ombasüw monpiüng nejiw alwüx atamüw.

<sup>52</sup> Tawün niüng tsotojow montangtang monajiüt,

tayac quiaj leaw ayajcüw ngo membeatiw.

<sup>53</sup> Nipilan leawa ngo majiür üetiw, nej tüüch meáwan najneaj;

nganüy nipilan monjiür xeyay, tüüch mambüw owixáwan, nicuajind ngo maxomüw.

<sup>54</sup> Tambeol cambaj Israel, ajcüw monrang minajiüt nej;

ngo ndrom omeaats nejiw, tajiür nejiw lasta xeyay,

<sup>55</sup> cos atquiaj tasaj mixejchiiüts Abraham wüx micual micual nej; tapiüng tanaám apmajiür nejiw lasta meáwan nüt —aw a María.

<sup>56</sup> Ndoj María tacül quiaj maquiüb müm Elisabet arej caaw, condom tandilil tajtsor alinomb.

*Wijquiat Juan Bautista*

<sup>57</sup> Wüx tatüch a nüt wijquiam micual nej müm Elisabet, quiaj wijquiat nop nine nench.

<sup>58</sup> Wüx tanguaiyw acualaats nej, at moncül quiajan niüng acül nej, nguineay

Teat Dios lamajjür nej xeyay lasta, quiaj tapac omeajtsüw aton maquiüjpüw.

<sup>59</sup> Condom wüx tatüch ojpeacüw nüt, quiaj taquiüjpüw a nine matajçüch circuncidar atnej mbójan arangüw judíos. Tandüümüw müjchiw manüt Zacarías atnej minüt miteat nej.

<sup>60</sup> Quiaj mimüm nej a nine tapiüng:

—Ngwüy, Juan apmanüt —aw.

<sup>61</sup> Quiaj tasajüw nej:

—¿Neol ayaja? Cos ngo majlüy tiül icualaats nejinguind manüt atquiaj —awüw.

<sup>62</sup> Quiaj tatüniw manguiayiw miteat a nine, arangüw owixaw majaw, majüic nguineay andiüm müüch manüt a nine.

<sup>63</sup> Teat Zacarías quiaj tatün quiriw nine tirip xiül, condom tarang wüx, tapiüng: “Juan minüt nej”, aw. Meáwan monlüy quiaj mbayatoj majawüw.

<sup>64</sup> Quiaj taley oniw nej a teat Zacarías, tajneaj mendeac, andüüban tasaj Teat Dios najneajay arang.

<sup>65</sup> Meáwan moncül quiajan niüng acüliw nejiw mbayatoj, aton meáwan cambaj najlüy tiül tüic tiül iüt Judea tumb manguiayiw wüx aag ayaj.

<sup>66</sup> Meáwan nejiw leawa tanguiyiw tayacüw wüx omeajtsüw, tapiüngüw:

—¿Jane aaga nine quiaja? ¿Cuane aparang alinoic nüte? —awüw.

Atquiaj tapiüngüw nipilan cos Teat Dios teamambeol a nine, ngo macueat.

### *Zacarías tandeac leaw aliüc miün*

<sup>67</sup> Teat Zacarías miteat a nine, tambeol nej Nangaj Espiritu ocueaj Teat Dios, tüüch nej poch cuane mandeac, tapiüng:

<sup>68</sup> Xeyay najneaj ajlüy Teat Dios ocueaj Israel,

cos nej lafün ningüy tiül icootsa mawün asoet micambaj nej.

<sup>69</sup> Lamüüch icoots nop leaw alndom mawün icoots wüx,

aag ayaj imiün tiül acualaats mixejchüüts David, aaga nerang minajiüt nej.

<sup>70</sup> Atnej lamandeac Teat Dios wüx tasaj nangaj mondeac andeac nej, ajcüwa tajlüyiw tanomb, cos tapiüng:

<sup>71</sup> Nej apmawün icoots teowixaw leaw andiümüw mambiyaw icoots, at apmawün icoots teowixaw meáwan ajcüy majaw icoots.

<sup>72</sup> Ajjür lasta meáwan mixejchüüts, aton apleaam omeaats wüx meáwan leawa lamapiüng apmarang.

<sup>73</sup> Cos aag agüy Teat Dios tasaj miteatiüts Abraham apmarang:

<sup>74</sup> Apmawün icoots teowixaw moncüy majaw icoots, marangaats leawa nej andiüm, ngo mimbo-laats.

<sup>75</sup> Majlüyüüts najneajay, ngo majiüraats nicuajjind nisoet, marangaats leawa nej andiüm meáwan nüt wüx aliün mapacaats.

<sup>76</sup> Aton ique xecual, apmenderac wüx apmapiürang ique nop ic nendaeac andeac Teat Dios najlüy tiül cielo, cos ique apmemong ombas, Teat Naxey teoj, apmetaag majneaj mitiüid nej.

<sup>77</sup> Apmesajüw minipilan nej nguineay Teat Dios alndom mawün wüx omeaats meáwan asoetiw nejiw, quiaj alndom mawüw wüx.

<sup>78</sup> Cos xeyay ajjür icoots lasta Miteatiüts Dios,

áag tüüch icoots noic najneaj atnej ran, aag ayaj Micual nej imiün tiül cielo.

<sup>79</sup> Nej apmüüch majlüyiw tiül ran leaw ajlüyiw atnej aliw tiül pojniün, tengual andeowüw tiül asoetiw nejiw.

Nej apmayac icoots wüx marangaats najneaj, lango majlüy moncüy, aw a Zacarías.

<sup>80</sup> Aaga nine micual Zacarías quiaj tatang najneaj, xeyay tayamb Teat Dios. Tamb macül tiül wajchiüc niüng ngo majlüy cambaj, leaw atüch a nüt mejüiquichay majaw nej cambaj israel.

## 2

### *Wijquiat Teat Jesús (Mt. 1:18-25)*

<sup>1</sup> Wüx aaga nüt quiaj minatang monajiüt tiül Roma nenüt Augusto César tapiüng meáwan nipilan netam mambüw mayacüw mineatüw nejiw.

<sup>2</sup> Ninguiaj amelich ajmel mineataran wüx Cerenio tarang nenajiüt tiül iüt Siria.

<sup>3</sup> Quiaj tambüw meáwan nipilan mayacüw mineatüw nejiw tiül micambajüw nejiw.

<sup>4</sup> At a José tamb aton imiün tiül cambaj Nazaret tiül Galilea andüy Belén tiül Judea. Aag ayaj micambaj David, cos José micual nej acualaats David.

<sup>5</sup> Quiaj tamb mayacüw mineatüw nejiw aqiiüib María minüx nej. Aaga minüx nej laliüc wijquiam micual nej.

<sup>6</sup> Wüx aliw tiül Belén, quiaj tatüch a nüt wijquiam micual a María.

<sup>7</sup> Quiaj wijquiat micual nej, nop nine nench; aag ayaj ombas macual. Condom taxaing mawinç ombas tiül noic püy, tapiüb tiül üeteay nimal, cos lango matüchiw tiül a iüm niüng axoodaran.

### *Monjüür sap tanguiyiw andeacüw ángeles*

<sup>8</sup> Aliwan quiaj acas monjüür sap, acüliw tiül wajchiüc ongwüüts majiürüw misapüw nejiw.

<sup>9</sup> Tapeay niüing ajlüyiw nejiw nop ángel ocueaj Teat Dios. Xowüy larraj, nómban arraj nejiw ran ocueaj Teat Dios. Nejiw xeyay mbayatoj majawüw.

<sup>10</sup> Quiaj tasaj nejiw a ángel:

—Nde mbayameron, cos sanasaj icon noic jayats majlüy leaw ngome aag anguiayeran. Xeyay apmüüch mapac omeats meáwan nipilan.

<sup>11</sup> Nganüy nganüy cam tiül micambaj David lawijquaiw nop newün icon wüx. Aag ayaj a CRISTO Micual Teat Dios.

<sup>12</sup> Sanasaj icon nguineay alndom mexoman aaga nine. Apmexoman alpiüüm tiül üeteay nimal, newinch ombas tiül püy —aj nejiw.

<sup>13</sup> Ndójan mapiüing aag ayaj, quiaj tapeayiw xeyay ángeles imiün tiül cielo maquiüjpüw aaga ángel quiaj. Condom tapots mandeacüw wüx Teat Dios, tapiüingüw:

<sup>14</sup> ¡Najneajay lamarang Teat Dios najlüy tiül cielo,

najneajay apmajlüy wüx iüt, najneajay apmajlüyiw meáwan nipilan leaw apmandüjpiw Teat Dios!, awüw.

<sup>15</sup> Condom wüx tandilileaw ajcüwa ángeles andüyiw tiül cielo, lamacueat nejiw, quiaj tesajey monjiür sap nop alinop, tapiüingüw:

—Tabaats matüchiiüts Belén majawaats aaga apiüingüw lajlüy quiaj, cos Teat Dios lamüüch icoots manguaiyüüts —awüw.

<sup>16</sup> Quiaj tambüw najénan. Wüx tapeayiw quiaj, naleaing taxomüw a María maquiüüb a José, átan a nine alpiüüm tiül üeteay nimal.

<sup>17</sup> Wüx landoj majawüw aag ayaj monjiür sap, quiaj tandeacüw manguaiy meáwan nipilan nguineay tasoiquiw wüx aaga nine quiaj.

<sup>18</sup> Meáwan nipilan leawa tanguaiyiw andeacüw monjiür sap ajchiquaiw cawüx manguaiyiw, apac omeajtsüw.

<sup>19</sup> Nej a María meáwan leawa tanguaiy tayac wüx omeats.

<sup>20</sup> Condom monjiür sap wüx tandilileaw xeyay tapac omeajtsüw masajüw Teat Dios. Aton tandeacüw wüx meáwan leawa Teat Dios lamüüch nejiw manguaiyiw, at leaw lamüjndiw majawüw atnej tasoiquiw.

*Taquiüraab nine Jesús tiül nadam nangaj iüm*

<sup>21</sup> Wüx tatüch ojpeacüw nüt, quiaj tarangüch wüx ombas a nine atnej ajlüyay marangüw judíos matajcüw circuncidar monench; tujúchiw manüt JESS, atnej aaga ángel lamasaj María wüx nganaw majlüy teomeats nej a nine.

<sup>22</sup> Condom tatüch a nüt mambüw tiül nadam nangaj iüm tiül Jerusalén mayacüw ichech mimüm nine atnej ajlüyay

marangüw judíos, cos atquiaj apiüing tiül aaga poch tüünd Moisés. Quiaj tambüw José maquiüüb María maquiüjpüw a nine, majüiquichaw tiül nangaj iüm, müjchiw Teat Dios.

<sup>23</sup> Tarangüw aag ayaj cos atquiaj apiüing tiül Mipoch Teat Dios, cos apiüing: “Meáwan monench mbas macualaran apmajlüyiw ocueaj nejiw Teat Dios”, aw.

<sup>24</sup> Quiaj tambüw mayacüw ichechiw nejiw atnej apiüing tiül Mipoch Teat Dios, cos apiüing majmel ijquaiw nguex tengwüy ijquaw palom.

<sup>25</sup> Tiül aaga nüt quiaj alquiaj tiül Jerusalén nop teat naxey nenüt Simeón. Aaga naxey quiaj xeyay najneaj arang, cos ayar andeac Teat Dios; nej teamacül aaga nüt wüx Teat Dios apmawün wüx cambaj Israel. Nangaj Espiritu ocueaj Teat Dios alwüx ombas nej.

<sup>26</sup> Aton landoj lamasaj nej Nangaj Espiritu ocueaj Teat Dios ngome apmandeow, ne-tam ombas majaw aaga Cristo leaw apmüüch nej miün Teat Dios, ndoj tandeow.

<sup>27</sup> Aaga naxey quiaj tamb andüy tiül nadam nangaj iüm cos Nangaj Espiritu neech nej mamb. Wüx tapeayiw tiül nadam nangaj iüm a José maquiüüb María maquiüjpüw a nine Jesús marangüw atnej apiüing tiül aaga poch tüünd Moisés.

<sup>28</sup> Quiaj Teat Simeón angóchan a nine, tasap mapeic. Tandeac najneajay masaj Teat Dios, tapiüing:

<sup>29</sup> Nganüy Teat Dios, najneajan sanandeow cos lameach xic najaw aaga leaw tesaj xic.

<sup>30</sup> Lanajaw con xiniüüg aag leaw lameach miün mawün wüx nipilan;

<sup>31</sup> cos aaga leaw lamejüiquich quiaj, apmambeol meáwan nipilan.

<sup>32</sup> Nej ajlüy atnej noic ran leaw apmarraj mambeol meáwan nipilan monaw tiül palpálwüx cambaj;

aton apmarang xeyay najneajay tiül micambaj Israel, aw teat Simeón.

<sup>33</sup> Condom quiaj teat José at mimüm a nine Jesús mbayatoj manguaiyiw andeac a teat Simeón wüx a nine quiaj.

<sup>34</sup> Quiaj teat Simeón tandeac masaj nejiw, tapiüing:

—Teat Dios mambeol icon —aw.

Condom tasaj a María mimüm a nine, tapiüing:

—Por nej aaga nine cam apmajmiücüw tiül ngo majneaj xeyay nipilan tiül Israel. At altiül apmawün wüx meáwan ngo majneaj. At aton xeyay nipilan ngome apmandiümüw nej, ngome apmayariw nej andeac.

<sup>35</sup> Atquiaj apmajüiquich altiül omeats meáwan anopnop nipilan. Nganüy ique müm, xeyay apmamix imeaats; apmeyeaag atnej matsuel ic nots espada —aw.

<sup>36</sup> Aton alquaij tiül nadam nangaj iüm nop müm najtaj nenüt Ana. Nej nop nendec andeac Teat Dios, micual nej Fanuel, nawüw tiül acualaats Aser. Nej xeyay latang ombas. Tajiür minoj nej wüx monguich nej, tacül aweaag ayaiw neat, quiaj tandeow minoj nej.

<sup>37</sup> Lacül peic miow apiquiw (84) neat tatow lembej omal. Nej ngo macueat amb tiül nadam nangaj iüm marang najiüt nüt ongwiiüts, xeyay ayamb Teat Dios, xeyay aiünd.

<sup>38</sup> Aaga müm natajtaj quiaj andüüban iün majaw nejiw, tüüch gracias Teat Dios. Aton tandeac wüx aag nine Jesús quiaj, masaj meáwan nipilan tiül Jerusalén leawa tea-macüliw nop newün nejiw wüx.

#### *Tandilileaw andüyiw Nazaret*

<sup>39</sup> Wüx landoj marangüw meáwan atnej ajlüy tiül mipoch Teat Dios, quiaj tandilileaw andüyiw tiül iüt Galilea, tiül Nazaret micambajüw nejiw.

<sup>40</sup> Aaga nine tatang najneajay napac, taxom omeaats, Teat Dios tambeol nej xeyay.

#### *Teat Jesús tandüy tiül nadam nangaj iüm*

<sup>41</sup> Miteat nej mimüm nej neatneátan ambüw Jerusalén majawüw nangos nüt pascua.

<sup>42</sup> Wüx lamajiür gajpic (12) mineat nej a Teat Jesús, tambüw Jerusalén atnej mbójan marangüw majawüw nangos nüt.

<sup>43</sup> Condom wüx landoj nangos nüt nejiw tajtsoriw; nganüy a nench tacülan Jerusalén. Naleaing José maquiüüb mimüm a nench ngo majawüw.

<sup>44</sup> Lamajüyiw noic nüt, apiüngüw nejiw álan tiül acualajtsüw nejiw. Quiaj tapots mayambüw pal nüt. Tayamyambüw meáwan tiül acualajtsüw nejiw, at niüing leaw xowüy andeacüw maquiüjpüw.

<sup>45</sup> Wüx ngo maxomüw, quiaj tandilileaw alinomb andüyiw Jerusalén mayambüw.

<sup>46</sup> Wüx er nüt quiaj taxomüw; altiül nadam nangaj iüm, alchetem pinawan mondüy wüx poch leawa tüünd Moisés tanomb. Teamanguiay andeacüw, aton teamatün manguaiy nejiw.

<sup>47</sup> Meáwan leawa teamanguiay nej andeac mbayajow manguaiyiw, cos xeyay axom omeaats mangoch masaj nejiw.

<sup>48</sup> Wüx taxomüw nej miteat nej mbayajow majawüw. Condom tasaj nej mimüm nej:

—Xecual, ¿neol terang atquiaj quiaja? Jogüy miteat ata xique xeyay lanayamban ic, lanateowan ximeajtsan wüx ímbas —aj.

<sup>49</sup> Quiaj tasaj nejiw a nench:

—¿Neol teyamban xic, müm, ngo me-jawana netam narang minajiüt Xeteate? —aj nejiw.

<sup>50</sup> Naleaing nejiw ngo maxomüw omea-jtsüw wüx leawa tasaj nejiw quiaj.

<sup>51</sup> Condom taquiüjpüw mamb, tandilileaw andüyiw Nazaret. Tanaámb tarang leaw asoic. Mimüm nej tayac wüx omeaats meáwan leawa tajaw leawa tanguaiy.

<sup>52</sup> Teat Jesús tanaámb tatang najneaj, aton taxom omeaats xeyay. Teat Dios tambeol nej, at nipilan najneájan majawüw nej aton.

## 3

### *Juan Bautista aquiaach tiül wajchiüc*

(Mt. 3:1-12; Mr. 1:1-8; Jn. 1:19-28)

<sup>1</sup> Lamajiür gajpocoic (15) neat tatow arang natang nenajiüt Tiberio César tiül Roma. Poncio Pilato nenajiüt nej tiül Judea; nganüy a Herodes nenajiüt nej tiül Galilea. At michiig nej Felipe nenajiüt nej tiül Iturea, at tiül iüt Traconite. Aaga Lisantias nenajiüt nej tiül Abilinia.

<sup>2</sup> Teat Anás at Teat Caifás natang miteaats nejiw tiül nipilan israel. Wüx aaga nüt quiaj aaga Juan micual teat xan Zacarías, tacül tiül wajchiüc niüing ngo majlüy cambaj. Quiaj Teat Dios tüüch nej poch leawa netam mandeac.

<sup>3</sup> Quiaj a Juan tapots mandeac Mipoch Teat Dios tiül meáwan cambaj ajlüyiw mbeay lam Jordán. Tasaj nipilan leaw laleaaw omeaats wüx Teat Dios mayariw yow, majüiquichaw naleaing lamacueatiw arangüw ngo majneaj. Quiaj Teat Dios apmawün wüx omeaats nej asoetiw nejiw.

<sup>4</sup> Atquiaj tajlüy atnej nomb tarang tiül minawüig nej Isaias, aaga nendec andeac Teat Dios, cos tapiüng:

Apmanguaiyaran aljane teandeac tiül wajchiüc niüing ngo majlüy cambaj, teamapiüng:

“Xique xiün nüüch leaam imeajtsan mecueatiün merangan ngo majneaj, cos aliüc Teat Naxey,

netam meleainguijchan mitiüid nej.

<sup>5</sup> Meáwan nesojcolüy tiüc apmiütam, meáwan tiüc apndajrriüm tiüt matotow; meáwan netojngoyay tiüid apmaleaing, at leawa tiüid nendjropüy apmatotow.

<sup>6</sup> Quiaj meáwan nipilan apmajawüw nguineay Teat Dios alndom mawün asoeteran.”

<sup>7</sup> Wüx tambüw majawüw a Juan müüch nejiw yow, quiaj tasaj nejiw:

—¿Neol cua iyamban ningüy icona micual ndiüc? ¿Jane nesaj icon mercuiüran meri-owan tiül aaga xeyay ngo majneaj leaw aliüc miün apmajlüye?

<sup>8</sup> Sitiül naleaing laleaaw imeajtsan nguineay temerangan, ijüiquichan nómban irangan najneaj. Nde merangrangayon wüx mepiüing: “Abraham xeteatiün”,

merawan; cos naleaing sasaj icon, Teat Dios alndom müüch majlüy micual Abraham masey a piedra quiaj, ndot mandüüm.

<sup>9</sup> Aton nganüy aaga üech alwüx mioxi-jchaw xiül; atquiaj meáwan xiül leawa ngo mayac najneaj aóng, apndojquiüm majlos tiül biümb —aj nejiw.

<sup>10</sup> Condom quiaj nipilan tatüniw nej manguaiyw:

—¿Nguineay netam narangana? —ajüw nej.

<sup>11</sup> Quiaj tasaj nejiw a Juan:

—Leawa nejiür ijquaiw apix nej ich müüch noic leaw ngo majiür, at leaw nejiür üet, ich müet aweaag leaw ngo majiür —aj nejiw.

<sup>12</sup> Átan tambüw majawüw a Juan acas monxaing tomiün, cos andiümüw mayariw yow. Tasajüw nej:

—Teat, ¿jow xicona, cuane netam narangana? —ajüw nej.

<sup>13</sup> Quiaj tasaj nejiw:

—Itüniün aleaw wüx atow nej isoiquiün, nde meyacan wüx nicuajind —aj nejiw.

<sup>14</sup> Aton acas soldado tatüniw manguaiyw nej:

—Jow xicona, ¿cuane netam narangana? —awüw.

Quiaj tasaj nejiw a Juan:

—Nde mewaijchan aljane mewüniün leaw almajiür, aton nde meyacan asoet leaw ngo marang nicuajind. Ich mapac imeajtsan wüx leaw ingüyaranan —ajowiw.

<sup>15</sup> Meáwan nipilan acüliwan, ngo majawüw jane aaga Juan sitiül nej ngwüy aaga Cristo, leawa lapiürang aliüc mawün nejiw wüx.

<sup>16</sup> Quiaj tasaj nejiw a Juan:

—Xique naleaing süüch icon yow, pero aliüc miün nop teat naxey xeyay netam ajlüy ngo mat xic. Xique sayaag nicuajind xic, ngondom natüch nacheed aónts apaj nej. Nej apmüüch icon Nangaj Espiritu ocueaj Teat Dios, apmawün wüx imbasan meáwan ngo majneaj atnej biümb ambel nendaejndej.

<sup>17</sup> Aag ayaj atnej arang nop nerang najiüt, cos alteowix nej minipüch nej, apmaxaing osaab trigo matendeay, condom apmaxaing mayac tiül troj. Ndoj aaga opang trigo apmabel niüng ngondom jejquem —aw.

<sup>18</sup> Atquiaj tapaj nej ocueajiw, tasaj meáwan nipilan wüx aaga najneaj leaw aliüc miün apmajlüy, nguineay alndom maw asoeteran.

<sup>19</sup> At aton a Juan talic a Herodes, aaga natang nenajiüt, cos ngo majneaj arang, lamaquiiüb Herodías, aag ayaj mintaj Felipe michüüg nej. Aton tapaj ocueajiw wüx meáwan ngo majneaj arang.

<sup>20</sup> Naleaing Herodes ngo mayar leaw asoic, tarang alinoic xeyay ngo majneaj, tayac tiül manchiüc a Juan.

*Tayar yow Teat Jesús*

(Mt. 3:13-17; Mr. 1:9-11)

<sup>21</sup> Wüx tengual ayariw yow nipilan, at Teat Jesús aton tayar yow. Ndoj wüx tengual andeac masaj Teat Dios, quiaj tajüic tiül cielo,

<sup>22</sup> tiün wüx ombas nej Nangaj Espiritu ocueaj Teat Dios, ajüic atnej noic palom. Quiaj tanguaiyaran noic nanderac imiün tiül cielo, tapiüüng:

—Ique xecual, xowüy sajiür ic lasta, apac ximeaaats najaw ic —aw.

*Acualajtsüw mixejchaw mixeech Teat Jesús*

(Mt. 1:1-17)

<sup>23</sup> Wüx Teat Jesús tamelich aquiaach lamajiür nimiow gajpowüw (30) mineat nej. Ajaraw nej micual nej José; aaga José micual nej Elí.

<sup>24</sup> Aaga Elí micual nej Matat, Matat micual nej Leví, Leví micual nej Melqui, Melqui micual nej Jana, Jana micual nej José.

<sup>25</sup> José micual nej Matatías, Matatías micual nej Amós. Amós micual nej Nahum. Nahum micual nej Esli, Esli micual nej Nagai.

<sup>26</sup> Aaga Nagai micual nej Maat. Maat micual nej Matatías, Matatías micual nej Semei, Semei micual nej José. José micual nej Judá.

<sup>27</sup> Judá micual nej Joana, Joana micual nej Resa, Resa micual nej Zorobabel, Zorobabel micual nej Salatiel, Salatiel micual nej Neri.

<sup>28</sup> Neri micual nej Melqui, Melqui micual nej Adi, Adi micual nej Cosam, Cosam micual nej Elmodam, Elmodam micual nej Er.

<sup>29</sup> Er micual nej Josué, Josué micual nej Eliezer, Eliezer micual nej Jorim, Jorim micual nej Matat.

<sup>30</sup> Matat micual nej Leví, Leví micual nej Simeón, Simeón micual nej Judá, Judá micual nej José, José micual nej Jonán, Jonán micual nej Eliaquim.

<sup>31</sup> Eliaquim micual nej Melea, Melea micual nej Mainán, Mainán micual nej Matata, Matata micual nej Natán.

<sup>32</sup> Natán micual nej David, David micual nej Isái. Isái micual nej Obed, Obed micual nej Booz, Booz micual nej Salmón, Salmón micual nej Naasón.

<sup>33</sup> Naasón quiaj micual nej Aminadab, Aminadab micual nej Aram, Aram micual nej Esrom, Esrom micual nej Fares, Fares micual nej Judá.

<sup>34</sup> Judá micual nej Jacob, Jacob micual nej Isaac, Isaac micual nej Abraham, Abraham micual nej Taré, Taré micual nej Nacor.



<sup>35</sup> Nacor micual nej Serug, Serug micual nej Ragau, Ragau micual nej Peleg, Peleg micual nej Heber, Heber micual nej Sala.

<sup>36</sup> Sala micual nej Cainán, Cainán micual nej Arfaxad, Arfaxad micual nej Sem, Sem micual nej Noé, Noé micual nej Lamec.

<sup>37</sup> Lamec micual nej Matusalén, Matusalén micual nej Enoc, Enoc micual nej Jared, Jared micual nej Mahalaleel, Mahalaleel micual nej Cainán.

<sup>38</sup> Cainán micual nej Enós, Enós micual nej Set, Set micual nej Adán, Adán micual nej Teat Dios.

## 4

*Nimeech tandiüm mayac wüx naél Teat Jesús*

(Mt. 4:1-11; Mr. 1:12-13)

<sup>1</sup> Wüx ndoj ayar yow Teat Jesús tiül lam Jordán, xeyay tambeol nej Nangaj Espiritu ocueaj Teat Dios. Condom wüx tandilil imiün tiül lam Jordán, quiaj Nangaj Espiritu tüüch nej mamb andüy tiül wajchiüc niüng ngo najlüy cambaj.

<sup>2</sup> Tacül quiaj ic miow (40) nüt, quiaj tandiüm mayac nej wüx naél minatang nimeech. Teat Jesús taiünd ngo met meáwan tiül aaga nüt quiaj, condom xeyay tind üet.

<sup>3</sup> Quiaj tasaj nej a nimeech:

—Sitiül ique Micual Dios ic, ¿neol ngo mesaj aaga piedra quiaj marang pana? —aj nej.

<sup>4</sup> Quiaj Teat Jesús tasaj nej:

—Tiül Mipoch Teat Dios apiüng: “Ngome áagan nüeteran ipacüy nipilan; leawa nem-beat, aag ayaj meáwan poch leaw andeac Teat Dios”, aw —aj nej.

<sup>5</sup> Condom quiaj nimeech taquiiüb nej mamb andüy wüx nop najal oleaj tiüc. Quiaj tüüch nej majaw najen meáwan cambaj leaw almajlüy wüx iüt.

<sup>6</sup> Quiaj tasaj nej a nimeech:

—Sanüüch ic meyar mejlüy wüx meáwan aaga najneajay cambaj quiaj, cos xique süünd, alndom nüüch jane xic sandiüm nüüch.

<sup>7</sup> Sitiül ique apmequieel micos tiximbas meyar sandeac, meáwan aag ayaj sanüüch ic meneay —aj nej.

<sup>8</sup> Quiaj nganüy tasaj nej Teat Jesús:

—Iriow niüng sajlüy nimeech, cos ajlüy tiül Mipoch Teat Dios, apiüng: “Aag miün Teat Dios netam mequieel micos teombas nej meyar andeac”, aw —aj nej.

<sup>9</sup> Condom nimeech taquiiüb nej mamb andüy tiül cambaj Jerusalén, tambüw andüyiw mal aaga nadam nangaj iüm. Quiaj tasaj nej:

—Sitiül naleaing ique Micual Dios ic, nguam ijchic tiüt;

<sup>10</sup> cos ajlüy tiül Mipoch Dios, apiüng:

Teat Dios apmüüch miün miángeles nej mambeolüw ic.

<sup>11</sup> Apmangochiw ic tiül owixaw nejw, ngana maleamb ileaj piedra, aw —aj nej nimeech.

<sup>12</sup> Quiaj tasaj nej Teat Jesús:

—Aton ajlüy tiül Mipoch Teat Dios, apiüng: “Nde mendium mertsoj leaw apiüng Teat Naxey Midios”, aw —aj nej.

<sup>13</sup> Quiaj nimeech lango maxom cuane naél mayac wüx Teat Jesús; tacueat nej acas nüt, tamb.

*Teat Jesús tamelich aquiaach tiül Galilea*  
(Mt. 4:12-17; Mr. 1:14-15)

<sup>14</sup> Teat Jesús tandilil alinomb andüy Galilea, xeyay tambeol nej Nangaj Espiritu. Tanderac wüx nej tiül meáwan cambaj najlüy quiaj.

<sup>15</sup> Nej taquiaach tiül ajcüwa sinagogas tiül meáwan cambaj; meáwan nipilan xeyay najneaj tandeacüw wüx nej.

*Teat Jesús ngo mandüüram tiül Nazaret*  
(Mt. 13:53-58; Mr. 6:1-6)

<sup>16</sup> Condom tandilil Teat Jesús andüy Nazaret, tiül cambaj niüng tatang. Wüx noic nüt axoodaran tamb tiül sinagoga atnej mbójan marang, witiüt, lembem mateow Mipoch Teat Dios.

<sup>17</sup> Quiaj tüünd aaga nawiiig leawa tarang Isaías, aaga nendeac andeac Teat Dios. Andüüban maleaig niüng apiüng atcüy:

<sup>18</sup> Aaga Espiritu ocueaj Teat Dios almaquiiüb xic,

cos nej lamarriiüd xic nasajüw meáwan nipilan leaw ngo majiür, nasajüw wüx aaga najneajay nanderac.

Lamüüch xic niün nüüch mapac omeajtsüw leawa xeyay amix omeajtsüw.

Aton nasajüw apmawüw wüx leaw ayajcüw atnej aliw tiül manchiüc.

At nüüch ram oniüjcüw leawa nesomeb, aton nawüniw wüx leaw amongochiw xeyay ngo majneaj.

<sup>19</sup> Tüüch xic niün nandeac wüx aaga najneajay neat leaw apmarang Teat Dios alinoic nüt.

<sup>20</sup> Condom quiaj tapal a nawiiig, tüüch aaga nembeol tiül nangaj iüm, ndoj chetet. Meáwan nipilan leaw aliw tiül a sinagoga ngo macueatiw majawüw nej.

<sup>21</sup> Quiaj tasaj nejw:

—Nganüy cam lajlüy aaga leaw apiüng tiül a nawiiig quiaj ningüy niüng ijlüyiün —aj nejw.

<sup>22</sup> Meáwan nipilan tandeacüw najneaj wüx ombas Teat Jesús, mbayajow manguiayiw aaga najneaj poch leawa tandeac. Quiaj tandeacüw nejeyéjan quiaj:

—¿Neol, ngome aag ayaj micual José? —awüw.

<sup>23</sup> Condom Teat Jesús tasaj nejw:

—Lanayaag apmesajan xic aaga poch cam: “Nendüy, ertajquiaj majneaj iquiáyan quiaj; cos lananguaiyüün xeyay cuajantanej lamerang tiül Capernaum, irang atquiaj ningüy tiül micambaj aton”, apmerawan —aj nejiw.

<sup>24</sup> Condom tasaj nejiw alquiriw:

—Naleaing sasaj icon, nop nendeac andeac Teat Dios ngo mayarich andeac nej tiül miüt nej.

<sup>25</sup> At sasaj icon, tajlüy xeyay monlemben omal montaj tiül Israel wüx aliün mapac teat Elías, wüx ngo majoet aroom neat al anaíw caaw. Quiaj tajlüy xeyay lop meáwan wüx iüt.

<sup>26</sup> Naleaing Teat Dios ngo müüch mamb a Elías mambeol meáwan monlemben omal montaj tiül Israel, tüüch mamb mambeol nop lemben omal najtaj tiül Sarepta niüנג ajlüy cambaj Sidón.

<sup>27</sup> At wüx aliün mapac teat Eliseo, aaga nendeac andeac Teat Dios, tajlüy xeyay moniün andeow tiül Israel, axom nejiw napat monandeow nasoic lepra. Naleaing ne-jingüind tiül nejiw mamongoch iün andeowüw, áagan nop naw Siria nenüt Naamán —aw Teat Jesús.

<sup>28</sup> Almanguaiyiw ayaj, meáwan nipilan leaw aliw quiaj tiül a sinagoga tajcüyiw xeyay.

<sup>29</sup> Quiaj witiütöj, taquiüjpüw mamb Teat Jesús andüy mbeay cambaj. Condom naw quiaj taquiüjpüw andüy cawüx wüx omal tiüc niüנג ajlüy micambajüw nejiw, apmat-echiw nej tiüt.

<sup>30</sup> Teat Jesús ámban pinawan nejiw tamong tamb, ngo maxomüw majawüw.

*Nop naxey nechach, alwüx ombas nej nimeech*

(Mr. 1:21-28)

<sup>31</sup> Condom Teat Jesús tamb tiül cambaj Capernaum tiül iüt Galilea. Tamb tiül a sinagoga wüx noic nüt axoodaran, tapots maquiaach nipilan.

<sup>32</sup> Mbayajow manguaiyiw nguineay aquiaach, cos aquiaach nejiw atnej nop natang nenajiüt.

<sup>33</sup> Tiül aaga sinagoga quiaj, alquiaj nop naxey alwüx ombas nej nimeech, iüch nej michach. Aaga naxey quiaj tandeac napac, tasaj Teat Jesús:

<sup>34</sup> —¡Icúeat xicon Jesús naw Nazaret! ¿Cuane indium merang wüx ximbasana? ¿Tewiün mendrooch ximbasana? Xique sajaw jane ic. Ique Nangaj Micual Teat Dios —aj.

<sup>35</sup> Quiaj Teat Jesús talic nej, tasaj:

—¡Tapots ipaj, iriow wüx ombas a naxey quiaj! —aj.

Quiaj a nimeech talox tiüt a naxey niüנג ajlüy nipilan, ndoj quiaj taw wüx ombas nej. Tajneaj a naxey, ngo marang nej nicuajind.

<sup>36</sup> Meáwan nipilan mbayajow majawüw, tesajayej nejeýéjan quiaj, tapiüngüw:

—¿Cuane aag andeac quiaja? cos ayar nej andeac nej a nimeech wüx talic maw —awüw.

<sup>37</sup> Meáwan nipilan tandeacndeacüw wüx Teat Jesús tiül meáwan cambaj.

*Tajneaj müm miocuats Simón Pedro*

(Mt. 8:14-15; Mr. 1:29-31)

<sup>38</sup> Condom Teat Jesús witiüt taw tiül a sinagoga, tamb andüy aniüנג teat Simón. Müm najtaj miocuats Simón niün andeow, xeyay iüch nej nerraar. Tatüniw Teat Jesús mamongoch nej iün andeow.

<sup>39</sup> Quiaj Teat Jesús tatüch aaga niün andeow, tasaj a monandeow maw; quiaj taw, tamong iüch nej nerraar a müm najtaj. Andüüban witiüt, tamb marang nejiw üetiw.

*Teat Jesús tüüch majneaj xeyay moniün andeow*

(Mt. 8:16-17; Mr. 1:32-34)

<sup>40</sup> Wüx lajmel nüt meáwan leaw ajiürüw monandeow, cuajantanej monandeow, taquiüjpüw mamb niüנג ajlüy Teat Jesús. Nej tayac owix wüx ombasüw moniün andeow, quiaj tajneajiw.

<sup>41</sup> Altiül moniün andeow leaw alwüx ombas nimeech, tawün wüx ombasüw nejiw. Tepajüw tasajüw Teat Jesús:

—¡Ique Micual Dios! —awüw.

Nej talic nejiw, ngo müüch nejiw mendeacüw, cos nejiw lamajawüw naleaing nej aaga Cristo lapiürang aliüc.

*Teat Jesús aquiaach tiül Galilea*

(Mr. 1:35-39)

<sup>42</sup> Wüx larrow tiüt alinoic nüt Teat Jesús taw tiül a cambaj, tamb andüy tiül wajchiüc. Nipilan tayambüw nej. Wüx taxomüw, quiaj tandiümüw mapalüw nej, ngo müjchiw mamb macueat nejiw.

<sup>43</sup> Quiaj tasaj nejiw:

—Netam namb tiül palpálwüx cambaj aton nandeac nasaj nipilan wüx aaga naneajay nanderac andüy wüx micambaj Teat Dios, cos áag tasoiquiüs niün —aj nejiw.

<sup>44</sup> Quiaj tamb Teat Jesús maquiaach tiül meáwan sinagoga leaw ajlüy tiül iüt Galilea.

## 5

*Tandocoj xeyay cüet*

(Mt. 4:18-22; Mr. 1:16-20)

<sup>1</sup> Noic nüt Teat Jesús almbey nadam yow nenüt Genesaret. Xeyay nipilan tapeayiw quiaj, acharrayej niüנג ajlüy nej, cos andiümüw manguaiyiw Mipoch Teat Dios.

<sup>2</sup> Quiaj Teat Jesús tajaw alquiaj ijpüw müx mbeay yow. Ajcüwa mondoc laawüw tiüt, teajantsüw ndoc.

<sup>3</sup> Condom Teat Jesús tajtep tiül nop müx, aaga müx ocueaj teat Simón. Quiaj tasaj matech tiül yow alquiaj macueat mbeay iüt. Chetet tiül müx, tapots maquiaach nipilan.

<sup>4</sup> Wüx landoj andeac, quiaj tasaj teat Simón:

—Itech a müx andüy tiül najal, iyacan mindocon mesapan cüet —aj nejiw.

<sup>5</sup> Quiaj tasaj nej teat Simón:

—Teat, pal ongwiiüts sandocon sapacüchiün xiniüjcan ngo nasapan nicuajind. Pero nganüy sitiül atquiaj ipiüng Teat, sanayacan ndoc cos lamesaj xicon —aj nej.

<sup>6</sup> Wüx tayacüw ndoc xeyay cüet tapalüw, ndoc tengual chiütaw.

<sup>7</sup> Condom tarangüw owixaw mapajüw aquiüjpüw nejiw monlüy tiül alinop müx, mambeolüw nejiw. Quiaj tiünüw, tayacüw amal miüjpüw a müx. Tajlüy tsoyomoj tiüt cos xeyay a cüet.

<sup>8</sup> Wüx tajaw aag ayaj teat Simón Pedro, quiaj taquieel micos nej tiüt niüng ajlüy Teat Jesús, tasaj:

—Xique Teat, sayaag ngo nembeat nicuajind, najneaj mecueat xic cos nop xic nipilan nejiüras nisoet —aj.

<sup>9</sup> Tandeac atquiaj cos mbayat majaw andocoj xeyay cüet; at meáwan leawa tajlüyiw quiaj mbayatoj.

<sup>10</sup> At teat Jacobo maquiüüb teat Juan, micul nejiw teat Zebedeo, ajcüw ayaj aquiüjpüw teat Simón, mbayatoj aton. Quiaj Teat Jesús tasaj Simón:

—Nde mbayamear teat, cos ajan wüx nganüy langome apmeyamb cüet mendoc, apmeyamb nipilan mesajüw mandüjpiw xic —aj.

<sup>11</sup> Condom wüx tapeayiw mbeay iüt maquiüjpüw a müx, acueatiwan quiaj meáwan, tandüjpiw mamb Teat Jesús.

*Tamongoch napat monandeow nenüt lepra*

(Mt. 8:1-4; Mr. 1:40-45)

<sup>12</sup> Noic nüt Teat Jesús altiül noic cambaj, tapeay niüng ajlüy nej nop naxey, axom nej napat monandeow nasoiç lepra. Aaga naxey quiaj wüx tajaw Teat Jesús taquieel micos nej tiüt, mejquiet tiüt nómban, tatün ocueaj, tasaj:

—Teat, sitiül ique indium, sawaw alndom memongoch iün sandeow —aj.

<sup>13</sup> Condom quiaj tandic owix Teat Jesús marreeg nej, tasaj:

—Xecual sandiüm, sanamongoch iün indeow —aj.

Wüxan ndoj mapiüng aag ayaj, andüüban tajneaj aaga naxey quiaj.

<sup>14</sup> Quiaj Teat Jesús tasaj nej nde masaj nejingüind. Aton tasaj:

—Quiür ijchaw majawüw ic miteaats, iyac erchec atnej nomb tapiüng teat Moisés neta marangüch. Quiaj apmajawüw nipilan ique lerneaj —aj.

<sup>15</sup> Xeyay tengual anguiayeran, tengual ajüic nguineay teamarang Teat Jesús. Quiaj tapeayiw nipilan manguiyiw nej andeac, aton mamongoch nej iün andeowüw.

<sup>16</sup> Naleaing Teat Jesús tamb andüy tiül wajchiüc niüng ngo majlüy nipilan, mataag orar, mandeac aweaag Teat Dios.

*Tajneaj nop ndron ombas*

(Mt. 9:1-8; Mr. 2:1-12)

<sup>17</sup> Noic nüt wüx Teat Jesús tengual aquiaach, altsotomoj quiaj acas fariseos at aton ajcüwa mondüy wüx poch tiünd Moisés. Ajcüw ayaj napeayiw imiünüw tiül nguiajantanej cambaj tiül iüt Galilea, tiül iüt Judea, at monaw tiül cambaj Jerusalén. Quiaj Teat Dios xeyay tambeol Teat Jesús mamongoch monandeow.

<sup>18</sup> Condom tapeayiw quiaj acas monxey aquiüjpüw mamb nop ndron ombas, amb wüx mats. Tandiümüw mamelichaw mayacüw niüng ajlüy Teat Jesús.

<sup>19</sup> Naleaing ngo maxomüw nguineay mamelichaw cos xeyay nipilan alquiaj. Quiaj tajtepiw mal iüm, tajarrichaw qiriw. Cas tamongochiw a ndron ombas amb tiül, alwüx mimats nej. Tayacüw pinawan niüng ajlüy Teat Jesús.

<sup>20</sup> Wüx Teat Jesús tajaw nguineay nejiw ayacüw wüx omeajtsüw andeac nej, quiaj tasaj a ndron ombas:

—Laáw isoet teat —aj.

<sup>21</sup> Quiaj ajcüwa mondüy wüx aaga poch tiünd Moisés, at ajcüwa fariseos tapots andeacndeacüw wüx nejeýéjan quiaj, tapiüngüw: “¿Jane nej aaga naxey quiaj, neol tapots andeac ngo majneaj wüx Teat Dios? Cos nejingüind nipilan ngondom mawün nisoet, néjan quiaj Teat Dios alndom”, awüw.

<sup>22</sup> Naleaing Teat Jesús tajaw cuane teamandeacndeacüw wüx, quiaj tasaj nejiw:

—¿Cuane wüx ipiüngpiüangan tiül imeajt-sana?

<sup>23</sup> ¿Cuane ngo maél iyajcan napiüng: “Laáw isoete”, ngwüy napiüng: “Witiür ijüy, naja”? —aj nejiw.

<sup>24</sup> Condom tasaj nejiw niüangan:

—Nganüy apmejawan naleaing Teat Naxey alndom mawün nisoet ningüy wüx aaga iüt cam —aj nejiw.

Quiaj tasaj a ndron ombas:

—Witiür, ixaing mimats teat, quiür ijtsor —aj.

<sup>25</sup> Andúuban ajneaj, witiüt taxaing miamats nej piiow wüx, teamajawüw nej nipilan, tajtsor apac omeaats, tandeac xeyay najneaj wüx Teat Dios.

<sup>26</sup> Meáwan nipilan mbayajow majawüw, tandeacüw xeyay najneaj wüx Teat Dios, at xeyay timbолоj, tapiüngüw:

—Nganüy landoj majawaats noic xeyay najneaj leaw ngome aag ajaraw —awüw.

*Teat Jesús tapaj a Levi  
(Mt. 9:9-13; Mr. 2:13-17)*

<sup>27</sup> Condom Teat Jesús taw quiaj, taxom nop nesap mitomiün cambaj, nenüt Levi, alchetem wüx bang niüng angüyeran tomiün. Quiaj tasaj:

—Mac, indüüb xic —aj.

<sup>28</sup> Quiaj witiüt a naxey, acueátan quiaj meáwan, tandüüb mamb Teat Jesús.

<sup>29</sup> Condom teat Levi tarang noic nadam monet aniüng nej. Alquiaj xeyay monsap tomiün, at aliw quiaj xeyay nipilan alwüx mes maquiüjpüw.

<sup>30</sup> Ajcüwa mondüy wüx aaga poch tüünd Moisés, at ajcüwa fariseos tandeacndeacüw masajüw minipilan Teat Jesús:

—¿Neol teretiün tenganeowan mequiüjpan monsap mitomiün cambaj, at nipilan monrang nisoete? —ajüw.

<sup>31</sup> Quiaj tasaj nejüw Teat Jesús:

—Jane ayaag napac najneaj, ngo metam mayamb nop nendüy; pero jane ayaag niün andeow ich mayamb nop nendüy.

<sup>32</sup> Xique ngo niün nayamb nipilan leaw ayaag najneaj arang; xique tüinas nayamb leaw ngo mayamb Teat Dios, cos sandiüm nüüch leaam omeajtsüw wüx Teat Dios, marangüw leawa nej andiüm —aj nejüw.

*Tatüniw manguaiyüw Teat Jesús wüx aiündaran*

*(Mt. 9:14-17; Mr. 2:18-22)*

<sup>33</sup> Nejüw tasajüw Teat Jesús:

—¿Neol minipilan teat Juan aiündüw xeyay, at atajcüw orar, átan ajcüwa fariseos? Jow nganüy minipilan, ¿neol tetiwan, anganeowüwan? —ajüw.

<sup>34</sup> Quiaj tasaj nejüw Teat Jesús:

—¿Alndom monamb niüng nengoch owix maiündüwa wüx nej a nench alquiaj al maquiüjpüwa?

<sup>35</sup> Alinoic nüt wüx lango majlüy a nench, wüx aaga nüt quiaj mbich apmaiündüw —aj nejüw Teat Jesús.

<sup>36</sup> At aton tandeac alacas poch ngome aleáingan, andiüm maquiaach nejüw, tapiüng:

—Nejinguind ngo mandooig quirüw jayats jael macancham tiül noic nguirich napixeran, cos sitiül apmarang atquiaj, apsojndiüm alinomb aaga jayats jael. Ngome áagan, aton aaga jayats jael quiaj

ngome apmayar maquiüüb aaga nguirich jael.

<sup>37</sup> At aton nejinguind ngo mayac jayats vin tiül nguirich taag iquial vin, cos sitiül apmayac tiül, apmapotiich nej, apmajüñch tiüt a vin, apndrom ombas, at a taag aton.

<sup>38</sup> Leaw jayats vin netam majmel tiül jayats taag, quiaj mbich ngo ndrom ombasüw, apmaiücüw.

<sup>39</sup> Nejinguind nenganeow ajlüyay vin ngome apmandiüm manganeow jayats vin, cos anderac ajlüyay vin alwüx ajneaj, ngo matnej jayats vin —aj nejüw Teat Jesús.

## 6

*Tajeliw trigo wüx nüt axoodaran  
(Mt. 12:1-8; Mr. 2:23-28)*

<sup>1</sup> Wüx noic nüt axoodaran, Teat Jesús tamongoj ambüw tiül corrül. Minipilan nej wüxan amongoj tandojquiw aól trigo, ndoj tapots maliüdüw teowixaw nejüw maw osaab müetiw.

<sup>2</sup> Quiaj acas fariseos teamajawüw aag ayaj, tasajüw:

—¿Neol terangan leaw ngo metam merangan wüx nüt axoodarana? —ajüw.

<sup>3</sup> Quiaj Teat Jesús tasaj nejüw:

—¿Neol, jow icona ngomeaag meteowana mejawana nguineay tarang mixejchiüts David wüx tind üet maquiüüb minipilan neje?

<sup>4</sup> Cos tajmel tiül nine nangaj iüm ocueaj Teat Dios, tawün aaga pan najmel wüx artül, tüetiw. Aag ayaj nejinguind ngondom müet, ajcüwan miteaats alndom müetiw —aj nejüw.

<sup>5</sup> At tasaj nejüw:

—Teat Naxey alwüx atam, ngo matnej aaga nüt axoodaran quiaj —aj nejüw.

*Nop naxey nawaag nots owix  
(Mt. 12:9-14; Mr. 3:1-6)*

<sup>6</sup> At aton alinoic nüt wüx nüt axoodaran Teat Jesús tamb tiül sinagoga maquiaach. Tiül aaga nangaj iüm quiaj alquiaj nop naxey ndron ombas, nandeow miác owix nej.

<sup>7</sup> Mondüy wüx aaga poch tüünd Moisés at ajcüwa fariseos teamacüliw majawüw majüic sitiül Teat Jesús apmüüch majneaj owix aaga naxey quiaj wüx nüt axoodaran, para alndom masapüw wüx, mayacüw asoet.

<sup>8</sup> Nej lamajaw cuane alwüx omeajtsüw. Quiaj tasaj aaga naxey nandeow owix:

—Witiür lembber pinawan —aj.

Quiaj witiüt a naxey lembem.

<sup>9</sup> Condom Teat Jesús tasaj nejüw:

—Sanatün nanguaiy icon: ¿Jow wüx nüt axoodaran, alndom marangüch najneaja, ngwüy ngondoma? ¿Alndom mambeolaran jangantaneje, ngwüy ich majlüye mandeowa? —aj nejüw.

<sup>10</sup> Condom tajaw nej teombasüw meáwan monlüy quiaj niüng ajlüy nej, quiaj tasaj a naxey:

—Ileanguiich iwix —aj.

Quiaj tarang a naxey atnej asoic; nómban ajneaj owix nej.

<sup>11</sup> Altüül tajcüyiw, tandeacüw nejeyéjan quiaj nguineay apmarangüw wüx Teat Jesús.

*Teat Jesús tarriüüd gajpiüp minipilan nej*  
(Mt. 10:1-4; Mr. 3:13-19)

<sup>12</sup> Tiül aaga nüt quiaj tamb Teat Jesús andüy wüx tiüc mataag orar, tacül quiaj aaga ongwiiüts matün ocueaj Teat Dios.

<sup>13</sup> Wüx larrow tiüt alinoic nüt, quiaj tapaj minipilan nej xenenguemoj; tarriüüd gajpiüp (12) tiül nejiw. Ajcüw ayaj tüjndiw manütiw apóstoles.

<sup>14</sup> Ajcüw ayaj: nop Simón, aag ayaj nasoi Pedro, at Andrés michiig nej. Alinop Jacobo, alinop Juan, alinop Felipe, alinop Bartolomé,

<sup>15</sup> alinop Mateo, alinop Tomás, alinop Jacobo micual Alfeo, alinop Simón nasoi Zelote,

<sup>16</sup> alinop Judas michiig Jacobo. Ata Judas Iscariote, aaga ndoj tayac teowixaw monajüt a Teat Jesús.

*Teat Jesús taquiaach xeyay nipilan*  
(Mt. 4:23-25)

<sup>17</sup> Condom taw tiüt alinomb Teat Jesús imiün wüx tiüc aqiiüüb minipilan nej. Wüx tatüchiw noic nadam püjchiün tacülíwan quiaj. Aliw quiaj aton xeyay nipilan imiün tiül iüt Judea, imiün tiül Jerusalén, at monaw mbeay ndec niüng ajlüy cambaj Tiro maqiiüüb Sidón. Ajcüw ayaj tambüw niüng ajlüy Teat Jesús manguyaiw andeac nej; at mamongoch nej iün andeowüw.

<sup>18</sup> Aton tajneajiw leaw alwüx ombasüw nimeech, üüch nejiw michachiw.

<sup>19</sup> Meáwan nipilan tandiümüw marrejquiw nej, cos ajawüw sitiül apmarrejquiw apmajneaj iün andeowüw.

*Leaw najneaj apmajlüy, at leaw ngo majneaj*  
(Mt. 5:1-12)

<sup>20</sup> Condom Teat Jesús taxaing omal majaw minipilan nej, tasaj:

—Najneajay ijlüyiün icona leaw ngo mejjüran xeyay, pero ijlüyiün tiül minipilan Teat Dios.

<sup>21</sup> 'Najneajay ijlüyiün icona leaw nganüy indeowan lop, cos alinoic nüt apaxiüm iretiün.

'Najneajay ijlüyiün icona leaw nganüy ngo majneaj imongochiün, ijiüntsán, cos alinoic nüt apmapac imeajtsán, apme-cuiquian.

<sup>22</sup> 'Najneajay ich mapac imeajtsán wüx apmajcüyiw majawüw icon nipilan, mawüniw icon ningüiün mandeacüw ngo majneaj wüx imbasán. At wüx apmandeacüw wüx minütiün atnej monrang ngo majneaj cos iyariün andeac Teat Naxey.

<sup>23</sup> Ich majneaj imeajtsán wüx aaga nüt quiaj, ich mapac imeajtsán, cos xeyay najneaj leaw apmeajndiün tiül cielo. Atquiaj tamongochiw mondeac andeac Teat Dios tanomb; cos aton tajcüy majaw nejw mixejchiün.

<sup>24</sup> 'Jaa! Nganüy a icona monjiür cuajantanej, landoj lamejiürán apac imeajtsán ningüy wüx a iüt cam.

<sup>25</sup> 'Jaa! Ata icona leaw nganüy ayaag paxiünüy üet cos alinoic nüt apmendeowan lop.

'Jaa! Aton icona leaw nganüy tengual icuiquian, cos alinoic nüt apmamix imeajtsán, apmejiüntsán.

<sup>26</sup> 'Jaa! Icona ngo majneaj apmejlüyiün wüx nipilan apmandeacüw najneaj wüx imbasán, cos atquiaj aton tandeacüw mixejchiün wüx ombasüw monwüyay andeacüw andeac Teat Dios.

*Ijiürán lasta moncüy majaw icon*  
(Mt. 5:38-48; 7:12)

<sup>27</sup> 'Icona leaw ilean ningüy nganüy sasaj icon: Ijiürán lasta leaw ajcüy majaw icon; irangan najneaj wüx ombasüw.

<sup>28</sup> Indeacan najneaj wüx ombas jane andeac ngo majneaj wüx imbasán. At itüniün Teat Dios mambeol nejw leaw andeacüw wüx imbasán ngo majneaj.

<sup>29</sup> Sitiül aljane maleamb imbeay, masey, ich maleamb necamb, nde merang wüx nicuajind. Sitiül aljane masoond ic tiül miqieed manood icueaj, iich micamix aton majoy.

<sup>30</sup> Aton sitiül jangantanej apmatün icueaj cuajantanej ndot ngo majiür, iich sitiül ijiür. Leaw lamanood icueaj cuajantanej nde metüntün mandilil müüch ic.

<sup>31</sup> Atnej indüüman marangüch najneaj wüx imbasán, irangan atnej wüx ombas alinop.

<sup>32</sup> 'Cos sitiül najneaj mejawan áagan nipilan leaw najneaj majaw icon, ¿nguineay ajüic irangan najneaja? Atquiaj arangüw nipilan leaw ngo mayamb Teat Dios, ajneaj majawüw leaw najneaj majaw nejw.

<sup>33</sup> Aton sitiül merangan najneaj wüx ombas nipilan leaw nerang najneaj wüx imbasán, ¿nguineay ajüic irangan najneaja? Cos atquiaj arangüw monrang ngo majneaj aton.

<sup>34</sup> At sitiül ijchan ajüchay áagan nipilan leaw ijawan alndom mangüy, mayac wüx alquiriw, ¿nguineay ajüic irangan najneaja? Cos atquiaj arangüw monrang ngo majneaj

aton, tǔjchiw ajǔchay leaw ajawǔw alndom mǔtǔch nejǔw alquiriw.

<sup>35</sup> Icona netam mejǔiran lasta leaw ajcǔy majaw icon, irangan najneaj wǔx ombasǔw, ijchan ajǔchiw, nde mecǔliǔn mayacǔw wǔx alquiriw. Atquaij apmeajndiǔn xeyay najneaj tiǔl cielo, aton apmejǔyǔiǔn micual icon Teat Dios. Cos nej aton ajǔir lasta jangantanej, masey aljane ngo mambeol nejinguind, tengwǔy masey arang ngo majneaj.

<sup>36</sup> Netam mendiǔman jangantanej atnej arang Mitetiǔts Dios, cos nej ajǔir lasta jangantanej.

*Nde meyacan asoet alinop*

(Mt. 7:1-5)

<sup>37</sup> 'Nde meyambyamban cuane asoet alinop, quaij nejinguind ngome apmayamb isoetiǔn. Nde meyacan asoet alinop, quaij nejinguind ngome apmayac isoetiǔn. Aton iwǔniǔn wǔx imeajtsan leaw arangǔch wǔx imbasan, quaij apmajwan wǔx omeaatsaran leawa icona irangan aton.

<sup>38</sup> Nde merangan reech, imbeolan jangantanej, cos sitiǔl atquaij merangan, Teat Dios apmambeol icon xeyay. Irangan atnej nop nenǔjpeay leaw najneaj arang; apmapeax palan ipeaxay. Cos atnej imbeolan alinop, atnej apmambeol icon Teat Dios aton —aj nejǔw Teat Jesús.

<sup>39</sup> Condom tasaj nejǔw acas poch ngome aleáingan, tandeac andǔy wǔx nop somb, tapiǔng:

—Jow nop somb ¿alndom manetet owix alinop somba? ¿Ngo majmiǔc aweaag tiǔl ndorropa maquiǔba?

<sup>40</sup> Nop nequaijchay ngondom majntsop wǔx ajaw matnej ajaw nequiaach nej. Naleaing wǔx landoj laquaijchay xeyay, nej alndom matǔch ajaw nequiaach nej.

<sup>41</sup> '¿Neol nguineay ixom mejaw cuane nine najmel tiǔl oniǔǔg alinop, nganǔy a igue ngo mexom mejaw aaga xiǔl alatsam tiǔl iniǔǔga?

<sup>42</sup> ¿Cuane wǔx alndom mesaj alinop: “Coj, chiǔn nawǔn aaga nine najmel tiǔl iniǔǔg quaij”, meraj, sitiǔl igue ngo mejaw aaga xiǔl alatsam tiǔl iniǔǔga? ¡Ndeac mbeay! Sasaj ic menguiay, iwǔn aaga xiǔl alatsam tiǔl iniǔǔg quaij, ndoj quaij apmejaw najneaj para mewǔn aaga nine najmel altiǔl oniǔǔg alinop.

*Noic owil xiǔl wǔx óng ajaraw*

(Mt. 7:17-20; 12:34-35)

<sup>43</sup> 'Ngo majǔy noic owil najneaj xiǔl maóng ngo majneaj, at noic owil ngo majneaj xiǔl maóng najneaj.

<sup>44</sup> Cos xiǔl wǔx óng ajaraw sitiǔl najneaj tengwǔy ngo majneaj. Ngondom mapejtich toc wǔx noic owil sats; at ngondom mapejtich uva wǔx wajtsats.

<sup>45</sup> Nop nipilan andeac najneaj, aag ayaj ajǔiquich nej najneaj altiǔl omeaats. Nganǔy nop nipilan andeac ngo majneaj; aag ayaj ajǔiquich nej xeyay ngo majneaj altiǔl omeaats nej. Cos leawa ajǔy tiǔl omeaatsaran, aag ayaj neech mendeacaran.

*Ijǔw monrang iǔm*

(Mt. 7:24-27)

<sup>46</sup> '¿Neol tesajan xic: “Teat Naxey, Teat Naxey”, merawan, sitiǔl ngo merangan atnej sasaj icon?

<sup>47</sup> Sanasaj icon jane atnej. Wǔx nop aliǔc manguiay sandeac ndoj apmarang atnej anguiay,

<sup>48</sup> aag ayaj atnej nop naxey tawitich nop iǔm, taod tiǔt xeyay, condom talomboch wǔx piedra, lombom nandand. Ndoj, wǔx taw noic nadam lam xeyay napac tamong amb wǔx a iǔm quaij. Naleaing ngo marang nej nicuajind cos imiǔn wǔx piedra witiow.

<sup>49</sup> Nganǔy leawa nenguiay xepoch ndoj ngo marang atnej, aag ayaj atnej nop naxey tawitich ombiǔm nej tiǔlan wiǔd, ngo majǔir cuane masap nej tiǔt. Camǔm majngot nadam lam napac xeyay, ámban majarrich aaga iǔm quaij, aj nejǔw Teat Jesús.

**7**

*Tajneaj nop nerang minajiǔt minatang soldado*

(Mt. 8:5-13)

<sup>1</sup> Teat Jesús wǔx landoj mandeac aag ayaj manguiayiw nipilan, quaij tamb andǔy tiǔl cambaj Capernaum.

<sup>2</sup> Tiǔl Capernaum alquaij nop minatang soldado naw Roma, ajǔir nop nerang minajiǔt nej xowǔy ajǔir lasta; pero laxeyay iǔn andeow, laliǔc mandeow.

<sup>3</sup> Aaga soldado quaij wǔx tanguiy anderac wǔx Teat Jesús, quaij tǔtǔch mambǔw acas montangtang monajiǔt tiǔl judíos masajǔw Teat Jesús mamb mamongoch iǔn andeow aaga nerang minajiǔt nej.

<sup>4</sup> Quaij tambǔw ajcǔwa monxey quaij majawǔw Teat Jesús. Tapots masajǔw matǔniw ocueaj, tapiǔngǔw:

—Teat, najneaj membeol aaga soldado quaij;

<sup>5</sup> cos nej xeyay najneaj omeaats majaw icoots, tapiǔng marangǔch nop sinagoga ningǔy tiǔl micambajaats —awǔw.

<sup>6</sup> Quaij tamb Teat Jesús maquiǔb nejǔw. Wǔx laliǔc mapeayiw aniǔng nej, aaga minatang soldado tǔtǔch mamb acas minipilan nej mambǔw mangochiw Teat Jesús, masajǔw:

—Teat, nde mermbichay ipac. Xique ngo nembeat nicuajind, para mewǔn saniǔng.

<sup>7</sup> Ngo nembeat, pares ngo namb natǔch niǔng ijǔy. Xique sandiǔm teat, mepiǔng

apmajneaj, quiaj apmajneaj aaga nembeol xic.

<sup>8</sup> Cos xique aton sajiür nesaj xic cuane narang, aton sajiür xesoldado sasajüw cuane netam marangüw. Sitiül xique sanasaj nop: “Quiür”, naj; nej apmamb. Sitiül sanasaj alinop: “Mac”, naj, pues nej aliüc. Tengwüy sanasaj nembeol xic: “Irang aag agüy”, naj, pues nej apmarang —ajüw nej.

<sup>9</sup> Teat Jesús wüx tanguiaj aag ayaj mbayaw manguiay nguineay andeac aaga minatang soldado quiaj. Condom ndiliteay majaw nipilan mondüüb nej, tapiüng:

—Naleaing sasaj icon, ngo naxom nop tiül nipilan israel leawa neyar sandeac matnej aaga naxey quiaj —aw.

<sup>10</sup> Wüx tapeayiw tiül nden alinomb ajcüwa monamb quiaj, quiaj tajawüw aaga niün andeow lajneaj.

*Tapacüüch micual nop lemben omal naj-taj*

<sup>11</sup> Condom alinoic nüt tamb Teat Jesús andüy tiül noic cambaj nenüt Nain, aqiiüüb minipilan nej, at xeyay jangantanej nipilan aton.

<sup>12</sup> Wüx lapeay quiaj mbeay cambaj, quiaj tajaw laám apmamiüraad nop nandeow, aag ayaj micual nop lemben omal najtaj ajcánan ajiür. Almaquiüjpüw nej mamb xeyay nipilan monaw quiaj.

<sup>13</sup> Teat Jesús wüx tajaw aaga najtaj tajiür lasta, tasaj:

—Nde mejiünts müm —aj.

<sup>14</sup> Condom tatüch quiaj marreeg a nandeow, ndoj quiaj monbitic nej lombotoj. Andüüb miün Teat Jesús tasaj a nandeow:

—jWitiür xecual! —aj.

<sup>15</sup> Quiaj witiüt chetem aaga nench nandeow quiaj, tendeac. Condom quiaj Teat Jesús tasaj mimüm a nench:

—Iquiiüb ijtsoriün müm —aj.

<sup>16</sup> Almajawüw aag ayaj a nipilan mbayajow, tapiüngüw:

—Xeyay najneaj arang Teat Dios. Lajlüy tiül icoots nop nendeac andeac nej. Naleaing Teat Dios lafün majaw micambaj nej —awüw.

<sup>17</sup> Quiaj tanguiayaran nguineay arang Teat Jesús meáwan tiül iüt Judea, at tiül meáwan cambaj nacül quiaj niüng ajlüy Judea.

*Minipilan Juan Bautista tambüw majawüw Teat Jesús*

(Mt. 11:2-19)

<sup>18</sup> Condom minipilan teat Juan tambüw masajüw nej meáwan aaga jayats majlüy quiaj, leawa tarang Teat Jesús. Quiaj a Juan tapaj ijpüw minipilan nej.

<sup>19</sup> Tüüch mambüw matüniw manguiayiw Teat Jesús sitiül nej aaga leaw lapiürang aliüc, ngwüy apmacülüw alinop.

<sup>20</sup> Wüx tapeayiw niüng ajlüy Teat Jesús ajcüw a monxey quiaj, tasajüw:

—Asaj xicon teat Juan, aaga neech yow nipilan, niünan natüniün nanguiaiyün ic sitiül ique aaga Cristo leaw lapiürang aliüc, ngwüy sanacülüw alinop —ajüw.

<sup>21</sup> Tiül aaga ores quiaj Teat Jesús tamongoch iün andeow xeyay moniün andeow, nexom nejiw cuajantanej necoy. Tawün wüx ombasüw leaw alwüx ombasüw nimeech. Aton xeyay nesomb tüüch maxomüw majawüw.

<sup>22</sup> Quiaj Teat Jesús tasaj nejiw:

—Quiüran isajan a teat Juan meáwan leaw temejanan temenguiayün. Isajan nguineay larraw oniüjcüw leaw nesomb, leaw necoex lajüy, leaw nexom nej napat monandeow nasoiç lepra lajneaj, leaw nelaag lamanguiay, aton leaw tandeow ngantü lapac. At leaw nipilan ngo majiür, temanguiayiw aaga najneaj nanderac aton.

<sup>23</sup> Najneajay ajlüy leaw ngo machiw omeaats wüx xique —aj nejiw Teat Jesús.

<sup>24</sup> Wüx laambüw minipilan Juan, quiaj Teat Jesús tapots mandeac masaj nipilan wüx a Juan, tapiüng:

—¿Cuane teamban mejawan tiül wajchiüca? ¿Teamban mejawan nots najchowa tenguiäl majowjow nej iünda?

<sup>25</sup> ¿Ngwüy, cuane teamban mejawana? ¿Teamban mejawan nop naxey asooig najneajay apix neje? Cos icona ijawan leaw asooig najneajay apix nej najneaj ajlüy, ngo metam nej nicuajind, aag ayaj leaw almajlüy aniüng nop natang nenajiüt.

<sup>26</sup> ¿Ngwüy, cuane teamban mejawana? ¿Teamban mejawan nop nendeac andeac Teat Diosa? Ajaj áag, naleaing nej nop nej nendeac andeac Teat Dios leaw alwüx atam.

<sup>27</sup> Cos andeac wüx a Juan aaga poch narangüch tiül Mipoch Teat Dios, niüng apiüng:

Sanüüch mamb nop nendeac xepoch maming ombas, teoj iliüc.

Nej apmataag majneaj mitiüüd niüng apmemong.

<sup>28</sup> Naleaing sasaj icon, meáwan nipilan ngo maw tiül ni anop nendeac andeac Teat Dios majntsop wüx atam atnej atam aaga Juan neech yow nipilan. Pero naleaing, leawa más chingüy tiül micambaj Teat Dios, aag ayaj alwüx atam —aj nejiw Teat Jesús.

<sup>29</sup> Meáwan nipilan, at monsap tomiün ocueaj cambaj, ajcüw ayaj leaw lamüüch nejiw yow a Juan, wüx tanguiaiyiw aag ayaj tandeacüw naleaing Teat Dios najneaj lamarang.

<sup>30</sup> Nganüy ajcüwa fariseos at mondüy wüx aaga poch tüünd Moisés ngo mayariw

leaw Teat Dios tandiüm müüch nejw, ngo mambw müüch nejw yow a Juan.

<sup>31</sup> Condom tapiüing Teat Jesús:

—¿Cuane at nejw sanapiüing wüx ajcüwa nipilan monlüy nganüy cama?

<sup>32</sup> Aag ayaj at nejw namix monguich montsoton tiül plas matsojow, tengual masajw aquiiüjpüw nejw: “Xicono tengual saindean, icona ngo mejiüangan; nganüy tengual sajiüntsán, icona ngo merangan amix imeajtsán mejiüntsán aton”, awüw.

<sup>33</sup> Tandeacas atquiaj cos wüx tiün a Juan neech yow nipilan, ngo müet pan ngo manganeow vin, icona tepiüangan nej alwüx ombas nej nimeech.

<sup>34</sup> Nganüy lapeay a Teat Naxey; nej net, anganeow aweaag jangantanej. Icona ipiüangan nej nerrombüy, nangüngün, ajlüyay maquiüüb monrang xeyay ngo majneaj, altiül monsap tomiün.

<sup>35</sup> Nganüy nipilan leaw Teat Dios üüch nejw maxomüw omeajtsüw, ajcüw ayaj ajüic ajiürüw fis, ajawwüw naleaing Teat Dios najneaj arang —aw.

*Teat Jesús alaniüing nop fariseo nenüt Simón*

<sup>36</sup> Nop fariseo tasaj Teat Jesús mamb met aniüing nej, quiaj tamb. Alquiaj wüx mes teaüetiw.

<sup>37</sup> Quiaj ajngot nop najtaj nejüürjüür naxey, naw tiül aaga cambaj quiaj. Wüx nej tanguiay Teat Jesús alaniüing aaga fariseo, quiaj tapeay ajoy najmboc angan aceite, amb tiül noic iquial arangüch alabastro.

<sup>38</sup> Aaga najtaj tajiünts, tamb matüch oleaj Teat Jesús imiün wanopech. Condom tajants oleaj Teat Jesús naag miyow oniüing nej, ndoj tajond naag miondeats omal nej, tacheecheech oleaj, cas tateng wüx najmboc angan aceite.

<sup>39</sup> Aaga fariseo nequiiüb Teat Jesús met aniüing nej, wüx tajaw aag ayaj tapiüing tiül omeaats nej: “Aag ayaj sitiül naleaing nop nendeac andeac Teat Dios, nej apmajaw jane aaga najtaj nesamb nej quiaj nguineay arang, cos nerang xeyay ngo majneaj”, aw.

<sup>40</sup> Condom Teat Jesús tasaj aaga fariseo:

—Teat Simón, sanasaj ic noic poch —aj.

Quiaj tapiüing a fariseo:

—Ipiüing teat —aw.

<sup>41</sup> Quiaj tasaj nej Teat Jesús:

—Tajlüy nop naxey ajüchiw nej ijpüw monxey. Nop ajüch acoquiaw acoic miow (500) tomiün nasoiç denario; alinop ajüch ic miow gajpowüw (50).

<sup>42</sup> Ajcüwa monxey quiaj ngo majiürüw cuane mengüyayej ajüchiw. Quiaj tasaj nejw aaga naxey ich majlüy, cos landoj lamawün wüx omeaats nej. Nganüy ipiüing ¿ngün tiül nejw alwüx apmajneaj majaw aaga naxey quiaja? —aj.

<sup>43</sup> Quiaj tapiüing a Simón:

—Xique sapiüing aaga nejüch nej xeyay —aw.

Quiaj tasaj nej Teat Jesús:

—Áag, naleaing ipiüing —ajow.

<sup>44</sup> Quiaj ndiliteay Teat Jesús, wantsat majaw a najtaj, condom tasaj a Simón:

—¿Lamejaw aaga najtaj quiaja? Wüx tajmeliüs ningüy iniüing, ique ngome teaach xic yow nejantsüy xileaj; pero aaga najtaj cam naag miyow oniüing nej tajants xileaj, ndoj tajond naag miondeats omal nej.

<sup>45</sup> Ique ngo mecheech ximboy, pero aaga najtaj cam wüxan tajmeliüs ningüy ngo macueat macheech xileaj.

<sup>46</sup> Ique ngo mejend wüx ximal najmboc angan aceite, pero aaga najtaj cam lama-jend wüx xileaj najmboc angan aceite.

<sup>47</sup> Pares sasaj ic, nganüy lanawün wüx ximeaaats meáwan xeyay ngo majneaj tarang, cos xeyay ajiür xic lasta. Nganüy nop leaw apiüing napateay asoet nej najwan, aag ayaj ngo mandium xic xeyay —aj nej.

<sup>48</sup> Condom tasaj a najtaj:

—Isoet lanawün wüx ximeaaats müm —aj.

<sup>49</sup> Meáwan leaw alquiaj teaüetiw maquiüjpüw tapots andeacndeacüw wüx nejeyéjan quiaj, tapiüingwü:

—¿Jane aaga naxey quiaja? ¿Nguineay apiüing alndom mawün nisoete? —awüw.

<sup>50</sup> Pero Teat Jesús tasaj a najtaj:

—Isoet lanawün wüx ximeaaats. Quiür, ich mapac imeaats cos lameyar sandeac —aj.

## 8

### *Montaj monbeol Teat Jesús*

<sup>1</sup> Condom quiaj tamb Teat Jesús andüy tiül meáwan nadam cambaj at namix cambaj, aquiiüb ajcüw gajpiüp (12) minipilan nej, maquiaach wüx aaga najneaj nanderac wüx micambaj Teat Dios.

<sup>2</sup> Aquiiüjpüw acas montaj, ajcüw ayaj tamongoch nej iün andeowwüw Teat Jesús, cuajantanej monandeow leaw taxom nejw. Altiül nop María nasoiç Magdalena, nej tajwan wüx ombas nej ayaiw nimeech.

<sup>3</sup> Alinop Juana mintaj Chuza najlüy wüx minajiüt Herodes; alinop Susana, at alacas montaj. Ajcüw ayaj tayacüw leaw alndom mayacüw mambeolüw Teat Jesús.

### *Andeac wüx nop nepiür*

(Mt. 13:1-9; Mr. 4:1-9)

<sup>4</sup> Noic nüt canchiütoj niüing ajlüy Teat Jesús xeyay nipilan, tapeayiw imiünw nguiajantanej cambaj. Quiaj tasaj nejw acas poch andüy wüx nepiür, tapiüing:

<sup>5</sup> —Tajlüy nop naxey tamb apiür. Wüx tengual maripip osaab soex, acas tajmiüç andüy tiül tiüüd, tacuüch nej tiüt nipilan, camüm majngotoj a quieç, taxomüw tüetiw.



<sup>6</sup> Altigüy tajmiüc tiül piedra, tajntsoy, condom tawaag cos ngo masap acats a iüt.

<sup>7</sup> Altigüy tajmiüc tiül sats, tajntsoy aweaag. Ndoj taxotüw tiüt a nine soex quiaj, tandeow.

<sup>8</sup> Altigüy tajmiüc tiül najneaj iüt, tajntsoyiw, terangüy najneajay —aw.

Ndoj mapiüng ayaj, tasaj nejiw napac manguaiyiw meáwan:

—Netam menguiayüin mexoman imeajt-san wüx leaw sandeac quiaj —aj nejiw Teat Jesús.

*Cuane wüx tandeac atquiaj*  
(Mt. 13:10-17; Mr. 4:10-12)

<sup>9</sup> Minipilan nej tatüniw manguaiyiw, tapiüngüw:

—¿Cuane wüx apiüng aaga indeac quiaja? —awüw.

<sup>10</sup> Nej tasaj nejiw:

—Icona ijndeán menguiayüin nguineay aldom majlüyeran tiül minipilan Teat Dios, pero pálwüx nipilan ngome apmasoiquiw aleáingan; atquiaj masey majawüw, atnej ngo majawüw. Masey manguaiyiw, naleaing ngo majawüw cuane wüx andeac —aj nejiw.

*Cuane amb apiüng wüx nepiür*  
(Mt. 13:18-23; Mr. 4:13-20)

<sup>11</sup> Condom quiaj tasaj nejiw:

—Sanasaj icon cuane wüx apiüng aaga nanderac quiaj: Osaab soex, aag ayaj Mipoch Teat Dios.

<sup>12</sup> Ajcüwa osaab soex leawa najmiüc tiül tiüüd, ajcüw ayaj atnej nipilan leaw anguiay Mipoch Teat Dios; condom aliüc minatang nimeech mawün tiül omeajtsüw nejiw. Atquiaj lango mayariw leawa tanguiayiw, lango mawüw wüx asoetiw nejiw.

<sup>13</sup> Nganüy aaga osaab soex najmiüc tiül piedra, aag ayaj apiüng wüx nipilan leaw anguiay Mipoch Teat Dios, ajüic xeyay tapac omeaats taryariw. Naleaing aaga nipilan quiaj ajlüy atnej nine soex napatey mioxich nej, ngome apmaüc; cos acásan nüt apmanguaiyiw Mipoch Teat Dios, camüm majlüy alngün naél, quiaj macueatiw.

<sup>14</sup> Átan aaga osaab soex najmiüc tiül sats, aag ayaj apiüng wüx nipilan anguiay Mipoch Teat Dios; nejiw ayacüw omeajtsüw wüx andiümdümw cuajantanej leaw najlüy wüx aaga iüt cam. Wüx aag ayaj ngo müüch nejiw mandüjpiw leaw lamanguaiyiw. Ngo mambeol nejiw nicuajind, lactüliw miün.

<sup>15</sup> Nganüy aaga osaab soex leaw najmiüc tiül najneaj iüt, aag ayaj apiüng wüx nipilan anguiay Mipoch Teat Dios, ayacüw wüx omeajtsüw. Aaga poch ambeol nejiw marangüw leaw andiüm Teat Dios, tanaámb ngo macueatiw —aj nejiw Teat Jesús.

*Tandeac wüx ran*  
(Mr. 4:21-25)

<sup>16</sup> Condom tasaj nejiw alinoic:

—Nejinguind ngo machen noic candil ndójan lamapal omal, at ngo matool tiüt teoleaj mats; netam mayac cawüx marraj, atquiaj jangantanej apmajmel aldom maxom majaw.

<sup>17</sup> Cos meáwan leaw naxotaran apmajüic, at meáwan leaw nexotüy apmajaraw, apmajüic ranüy.

<sup>18</sup> Nganüy ijchan ilajcan inguiayüin, sitiül aljane ayac wüx omeaats xepoch, apmüünd manguaiy altigüy. Pero sitiül nop ngome ayac wüx omeaats, aaga quiriw anguiay quiaj apndrom omeaats, ngome apmambeol nej nicuajind —aj nejiw Teat Jesús.

*Tapeay mimüm Teat Jesús, at michtiig nej*  
(Mt. 12:46-50; Mr. 3:31-35)

<sup>19</sup> Condom tapeay mimüm nej Teat Jesús, at michtiig nej; naleaing ngondom matüchuw niüng ajlüy nej cos xeyay nipilan.

<sup>20</sup> Quiaj tasoic Teat Jesús:

—Teat, mimüm at michtiig aliw ninguiay, andiümüw mendeacüw mequijüpüw —ajow.

<sup>21</sup> Quiaj tasaj nejiw Teat Jesús, tapiüng:

—Meáwan leaw nenguiay Mipoch Teat Dios, sitiül marang atnej anguiay, aag ayaj sayaag atnej xemüm, atnej xechtiig —aj nejiw.

*Teat Jesús talomboch iünd at omal yow*  
(Mt. 8:23-27; Mr. 4:35-41)

<sup>22</sup> Alinoic nüt Teat Jesús tajtep tiül müx maquiiüb minipilan nej, tasaj nejiw:

—Tabaats andüyiiüts necamb aaga nadam yow cam —aj nejiw.

Quiaj tambüw.

<sup>23</sup> Wüxan tengual ajüy a müx Teat Jesús tameay. Quiaj taw noic nadam iünd anasop a ndec maxaing. Aaga müx laliüc tsoyom tiüt cos tamelich yow. Nejiw lamapiüngüw apmandeowüw.

<sup>24</sup> Quiaj tapacüjchiw a Teat Jesús, tasajüw:

—¡Teat! ¡Teat! ¡Laliüc tsoyomoots tiüt! —awüw.

Quiaj witiüt Teat Jesús, tasaj a iünd lombom, at omal yow majlüyan. Quiaj lambat, ayac ndar a yow.

<sup>25</sup> Condom tasaj nejiw:

—¿Neol, wül ipiüangan lamejawan nguineay xique aldom narang cuajantaneje? —aj nejiw.

Nejiw mbayajow majawüw leawa lamarang Teat Jesús. Tesajayej nop alinop, tapiüngüw:

—¿Jane aaga teat naxey quiaja? cos wüx tasaj a iünd maquiiüb a yow majlüyiw miün, quiaj tajlüyiw miün —awüw.

*Nop alwüx ombas nej nimeech*  
(Mt. 8:28-34; Mr. 5:1-20)

<sup>26</sup> Condom tajtepiw wüx iüt tiül Gadara, necamb aaga nadam yow alareng Galilea.

<sup>27</sup> Wüx taw tiüt imiün tiül müx Teat Jesús, quiaj ajngot nop naxey miotáagan mangoch nej, naw quiaj tiül aaga cambaj quiaj. Lamajiür nüt acüliw wüx ombas nej nimeech. Aton ngo macül aniüng nej, acúlan tiül niüing amiüraad mondeow.

<sup>28</sup> Aaga naxey quiaj wüx tajaw Teat Jesús tepaj napac, ndoj tamb maquieel micos nej niüing ajlüy, tendead napac:

—¿Cuane indiiüm merang wüx ximbas a ique, Jesús Micual Teat Dios najlüy tiül cielo? Satün icueaj, nde merang wüx ximbas nicuajind —aw.

<sup>29</sup> Cos Teat Jesús lamasaj nimeech maw wüx ombas aaga naxey quiaj. Aaga naxey quiaj lamajiür xeyay nüt acül wüx ombas nej aaga nimeech. Masey landeaaw maelich naag galen, ayacüw tiül oleaj nej aton. Nej andooigndóoigan, ndoj lamacuarreech nej nimeech andüy tiül wajchiüc.

<sup>30</sup> Quiaj tatün nej manguiaiy Teat Jesús:

—¿Cuane minüt? —aj.

Nej tapiüng:

—Legión xenüt —aw.

Tapiüng atquiaj cos xeyay nimeech alwüx ombas nej.

<sup>31</sup> Condom nimeech tatüniw ocueaj nej nde mayac nejiw tiül biümb.

<sup>32</sup> Aleambüw quiaj tüeng tiüc noic ajlüy sow teayambüw üetiw. Quiaj a nimeech tasajüw Teat Jesús müüch nejiw mambüw andüyiw tiül sow. Quiaj tüüch nejiw mambüw Teat Jesús.

<sup>33</sup> Tacueatiw aaga naxey, tambüw majmeliw tiül a sow. Quiaj tecuiürrüw a sow ambüw wüx tiüc, tajmiücüw tiül yow, tumb mandeowüw.

<sup>34</sup> Ajcüwa monjiür sow wüx tajawüw aag ayaj mbayajow acuiürrüw tambüw mapiüngüw tiül cambaj masajüw nipilan nguajantanej.

<sup>35</sup> Quiaj tambüw meáwan nipilan majawüw cuane najlüy. Wüx tapeayiw niüing ajlüy Teat Jesús, quiaj tajawüw aaga naxey laáw wüx ombas nej nimeech alchetem niüing ajlüy Teat Jesús. Almasooig apix, lajnej, lamajiür fis. Mbayajow majawüw.

<sup>36</sup> Leaw alquiaj tajawüw nguineay tajlüy. Nejiw tasajüw nipilan nguineay tajnej aaga naxey alwüx ombas nimeech.

<sup>37</sup> Ajcüwa nipilan monaw tiül aaga iüt Gadara tasajüw Teat Jesús maw quiaj, cos xeyay imboloj mandüyiw. Quiaj Teat Jesús tajtep tiül müx alinomb, tawüw quiaj.

<sup>38</sup> Aaga naxey laáw wüx ombas nej nimeech quiaj, tapots masaj Teat Jesús maquiüüb nej mamb. Quiaj Teat Jesús tasaj nej macül, tasaj:

<sup>39</sup> —Indilil, ijtsor indeac meáwan najnej leaw lamarang wüx imbas Teat Dios —aj.

Quiaj tajtsor aaga naxey. Tapots mandeac meáwan tiül a cambaj nguineay najnej lamarang wüx ombas nej Teat Jesús.

*Micual Jairo, at a najtaj nerreeg apix Teat Jesús*

(Mt. 9:18-26; Mr. 5:21-43)

<sup>40</sup> Wüx Teat Jesús tandilil andüy necamb aaga nadam yow, xeyay nipilan tangochiw nej. Apac omeajtsüw majawüw cos teamacüliw nej.

<sup>41</sup> Condom tamb majaw nej nop naxey nenüt Jairo; nej nop natang tiül sinagoga. Taquieel micos nej niüing ajlüy Teat Jesús, tatün ocueaj mamb aniüng nej.

<sup>42</sup> Cos xeyay iün andeow micual nej, laliüc mandeow. Ajcánan nop nüx ajtiür, lamajiür maseyme gajpic (12) mineat nej. Condom wüx tamb Teat Jesús, xeyay nipilan acharrayej wüx ombas nej.

<sup>43</sup> Altiül nop müm najtaj lamajiür gajpic neat iün andeow, atsambiich nej miquiej nej. Lamandrooch wüx xeyay tomiün mangüy mondüy. Laímb meáwan leaw almajiür, pero nejuinguid ngondom mamongoch nej iün andeow.

<sup>44</sup> Aaga najtaj quiaj tamb amb wanopech Teat Jesús marreeg apix. Andüüban lomboj atsambiich nej miquiej nej.

<sup>45</sup> Quiaj tapiüng Teat Jesús:

—¿Jane nerreeg xic? —aw.

Meáwan nipilan tapiüngüw ngome nejiw. Quiaj teat Pedro y leaw almaquiüüb tapiüngüw:

—Teat, nipilan teamacharrüw ic, teamapatsüw ic, nganüy ipiüng: “¿Jane nerreeg xic?” meraw —awüw.

<sup>46</sup> Teat Jesús tapiüng:

—Aljane tarreeg xic, cos sayaag aljane lajnej iün andeow —aw.

<sup>47</sup> Aaga müm najtaj wüx tajaw ngondom maxot aag ayaj, quiaj tiün anmambeapmbeap nej, taquieel micos nej niüing ajlüy Teat Jesús. Quiaj tapots mapiüng manguiaiy meáwan nipilan neol tarreeg Teat Jesús, at nguineay tajnej iün andeow nej.

<sup>48</sup> Quiaj tasaj nej Teat Jesús:

—Quiür xecual, ich mapac imeaats, nganüy lerneaj cos teyar sandeac —aj nej.

<sup>49</sup> Teat Jesús tealeámban mandeac aag ayaj, quiaj ajngot nop imiün aniüng Jairo, aaga natang tiül sinagoga, tasaj a Jairo:

—Teat, landeow micual, icueat mesajsaj mamb a Teat Naxey —aw.

<sup>50</sup> Teat Jesús wüx tanguiaiy aag ayaj, quiaj tasaj aaga naxey:

—Nde mbayamear, iyar sandeac, apmajnej micual —aj.

<sup>51</sup> Wüx tapeay aniüing aaga naxey quiaj, ngo müüch majmel nejinguin, áagan a Pedro, Jacobo, Juan; at miteat nej, mimüm nej aaga nüx landeow quiaj tajmeliw.

<sup>52</sup> Meáwan nipilan teajiüntsüw wüx, teapajüw wüx aaga nandeow quiaj. Quiaj tasaj nejiw Teat Jesús:

—Nde mejiüntsán cos ngome landeow, al-mameay —aj nejiw.

<sup>53</sup> Nejiw itsojayéjan cos ajawüw naleaing landeow.

<sup>54</sup> Quiaj Teat Jesús tasap owix a nüx, tasaj napac:

—Xecual, witiür —aj.

<sup>55</sup> Quiaj tapac alinomb. Najénan witiüt. Condom Teat Jesús tasaj nejiw mayambüw üet a nüx quiaj.

<sup>56</sup> Miteat nej mimüm nej a nüx lambayajow. Teat Jesús tasaj nejiw nde masajüw nejinguin wüx aag ayaj.

## 9

*Tajwanüw a gajpiüw mambüw*  
(Mt. 10:5-15; Mr. 6:7-13)

<sup>1</sup> Condom Teat Jesús taxejneng a gajpiüw (12) minipilan nej. Tüüch nejiw ndom ombasüw masajüw nimeech maw wüx ombas nipilan, aton matajcwüw majneaj moniün andeow.

<sup>2</sup> Tasaj nejiw mambüw mandeacüw nguineay ajlüy tiül micambaj Teat Dios; aton tüüch ndom ombasüw mamongochiw iün andeow nipilan.

<sup>3</sup> Condom tasaj nejiw:  
—Nde mejoyiün nicuajind leaw netam icon tiül tiüü, nde mejoyiün nangoraad, morral, peats, tomiün. Aton nde mejoyiün ijquaiw camix.

<sup>4</sup> Aton jangantanej aniüing mejmeliün icüliünan quiaj, naw quiaj aperiwian.

<sup>5</sup> Ngünantanej cambaj niüing ngo mandiumüw icon, iriowan quiaj tiül aaga cambaj quiaj. Itajtan minajndot ileajiün majüic nejiw ngo majneaj arangüw —aj nejiw.

<sup>6</sup> Quiaj tambüw tamongoj tiül meáwan nine cambaj mandeacüw wüx aaga najneaj nanderac, nguineay apmaw asoeteran; aton tajtajcwüw majneaj moniün andeow nguijantanej tamongoj.

*Wüx tambiyaran Juan Bautista*  
(Mt. 14:1-12; Mr. 6:14-29)

<sup>7</sup> Aaga natang nenajiüt tiül aaga iüt quiaj nenüt Herodes, wüx tanguiay meáwan nguineay arang Teat Jesús, lango majaw ngün naleaing, cos altiül apiüingüw aaga Juan neech yow nipilan lapac laáw tiül mondeow.

<sup>8</sup> Altiül tapiüingüw mixejchiiüts Elías landilil. Altiül tapiüingüw aag ayaj alinop

nendeac andeac Teat Dios leawa tajlüy tanomb lapac, awüw.

<sup>9</sup> Pero Herodes tapiüing:

—Aaga Juan xique tujúchiüs mamb ndojquium onic nej. ¿Jane nganüy teananguiay arang xeyay cuajantanej quiaja? —aw.

Tandiüm majaw jane.

*Teat Jesús tüüch üetiw acoquiaw mil nipilan*

(Mt. 14:13-21; Mr. 6:30-44; Jn. 6:1-14)

<sup>10</sup> Wüx tandilileaw miapóstoles nej tapots masajüw Teat Jesús meáwan nguineay tarangüw. Condom taquiiüb nejiw mamb tiül wajchiüc niüing ngo majlüy nejinguin, tiül iüt ocueaj noic cambaj nenüt Betsaida.

<sup>11</sup> Nipilan wüx tajawüw laámb tandüjpiw mamb. Wüx tapeayiw niüing ajlüy Teat Jesús nej tajiür nejiw lasta. Condom tapots mandeac masaj nejiw nguineay alndom majlüyiw tiül minipilan Teat Dios. Aton tamongoch iün andeow leaw niün andeow.

<sup>12</sup> Wüx laqinüt aaga nüt quiaj, ajcwüw minipilan nej tambüw matüchiw Teat Jesús, tasajüw:

—Teat, isajüw a nipilan mambüw andüyiw tiül cambaj, tiül rüncü mayambüw nguiane apmaxojtüw, aton mayambüw cuane apmüetiw, cos tiül wajchiüc almajlüyüüts cam —ajüw.

<sup>13</sup> Quiaj Teat Jesús tasaj nejiw:

—Ngwüy, icona netam meyamban üetiw —aj nejiw.

Nejiw tapiüingüw:

—Teat, ngo najiüran cuane sanüjchiün, ajcánan acoquiaw pan alijpüw cüet alningüy. ¿Ngwüy sanambana nangalan nüeteran müetiw meáwan nipilan quiaja? —awüw.

<sup>14</sup> Cos atüch maseyme acoquiaw mil monxey. Condom Teat Jesús tasaj minipilan nej:

—Isajan a nipilan chetemoj, ic miow gajpowüw (50) noicnoic ajlüy —aj nejiw.

<sup>15</sup> Atquiaj tarangüw, tasajüw nipilan chetemoj.

<sup>16</sup> Condom Teat Jesús tayar acoquiaw pan alijpüw cüet. Ndoj taxaing omal majaw cawüx, tüüch gracias Teat Dios, ndoj tambaag, tüüch minipilan nej majineaw müjchiw meáwan nipilan.

<sup>17</sup> Meáwan nipilan tetiw paxiün, condom leaw tenaw taxainguw gajpiüw nchep.

*Pedro apiüing nejay Teat Jesús aaga leaw lapiürang aliüc*

(Mt. 16:13-19; Mr. 8:27-29)

<sup>18</sup> Noic nüt Teat Jesús teandeac aweaag Teat Dios, ataag orar néjan quiaj; minipilan nej alíwan quiaj maquüjpw. Condom nej tatün manguaiy nejiw:

—¿Cuane apiüingüw nipilan jane xic? —aj nejiw.

<sup>19</sup> Nejiw tasajüw:

—Altiül nipilan apiüngüw Juan, aaga neech yow nipilan. Altiül apiüngüw Teat Elías; altiül apiüngüw algün nendeac andeac Teat Dios najlüw tanomb lapac. Atquiaj apiüngüw —ajüw.

<sup>20</sup> Condom tatün manguaiy nejiw alinomb:

—¿Jow icona, cuane ipiüangan jane xic? —aj nejiw.

Quiaj tapiüng a Pedro:

—Ique aaga Cristo ocueaj Teat Dios —aw.

*Teat Jesús tapiüng apmambiyaw nej*

*(Mt. 16:20-28; Mr. 8:30—9:1)*

<sup>21</sup> Teat Jesús tasaj nejiw nde masajüw ne-jingüind jane nej.

<sup>22</sup> At aton tasaj nejiw:

—Aaga Teat Naxey netam mamongoch xeyay ngo majneaj. Apmajcüy majaw nej montangtang tiül judíos, at montangtang miteaats, at ajcüw mondüy wüx aaga poch tüünd Moisés aton. Ndójuwüx apmambiyaw nej. Pero naleaing wüx er nüt nej apmapac alinomb —aw.

<sup>23</sup> Condom tasaj meáwan leaw aliw quiaj:

—Sitiül aljane andiüm mandtüüb xic mayar sandeac, ich mawün wüx omeaats leawa nej andiüm marang. Ich mandtüüb wüx leaw sarang masey mamongoch xeyay naél meáwan nüt; masey mambiyaw nej wüx cruz cos ayar sandeac.

<sup>24</sup> Sitiül aljane ngo mayar sandeac ajcan imbol mambiyaw nej nipilan, alinoic nüt nej ngome apmamb tiül cielo. Pero sitiül aljane ngo mapiüng wüx masey mandeow cos ayar sandeac, alinoic nüt najneajay apmajlüy tiül cielo.

<sup>25</sup> ¿Jondot sitiül aljane maneay meáwan cuajantanej leaw almajlüy wüx iüt cam, cuane ambich sitiül nej apndrom ombas, lango mamb tiül cielo?

<sup>26</sup> Cos sitiül aljane ngo mayar sandeac, axing mitsoj nej nipilan wüx xique, at wüx xepoch; atquiaj a Teat Naxey aton apmaxing majaw nej wüx aliüc imiün tiül cielo, aqúiüüb miün xeyay nelitit, ranüy, najneajay ocueaj Teat Dios, at ocueaj nangaj miängeles nej.

<sup>27</sup> Naleaing sasaj icon alningüy acas tiül icona aliün mapacüw apmajawüw a Teat Naxey niüng arang natang nenajiüt —aj nejiw Teat Jesús.

*Tewüney majawüw nej Teat Jesús*

*(Mt. 17:1-8; Mr. 9:2-8)*

<sup>28</sup> Condom ajíuran opeacüw nüt tatow ndoj mandeac aaga poch quiaj, quiaj taquiüüb a Pedro, Juan, at a Jacobo, tajtepiw wüx nop tiüc, tamb mataag orar.

<sup>29</sup> Wüx teataag orar Teat Jesús, quiaj tajawüw mitey nej langome atnej, at apix nej rajnüy, xowüy lalitlit.

<sup>30</sup> Camüm majawüw, alquiaj mixejchiw nejiw leaw monlüy tanomb, ajcüw ayaj leaw Moisés maquiüüb a teat Elías, teandeacüw maquiüüpüw Teat Jesús.

<sup>31</sup> Niüng alembemoj xowüy lajneaj, ayej nejiw tiüt a ran. Teamandeacüw wüx leaw apmamongoch Teat Jesús wüx apmandeow tiül Jerusalén.

<sup>32</sup> Teat Pedro, at aqúiüüpüw nej xeyay laínd ameayiw, pero tapacüw wüx tajawüw aaga ran xowüy lajneaj niüng ajlüy Teat Jesús maquiüüb ajcüwa jipüw monxey quiaj.

<sup>33</sup> Moisés ata Elías laám apmawüw niüng ajlüy Teat Jesús, quiaj tapiüng a Pedro:

—Teat, najneaj macüliüts ningüy narangan arej nden, noic iney, noic aneyay teat Moisés, alinoic aneyay teat Elías —aw.

Atquiaj tapiüng a Pedro cos lango majaw cuane apmapiüng.

<sup>34</sup> Tengualeámban mandeac aag ayaj, quiaj pojniüt, taxot nejiw noic oic. Xeyay timboloj wüx tajawüw aliw tiül oic.

<sup>35</sup> Condom quiaj tanguaiyiw noic nanderac imiün tiül oic, tapiüng:

—Aag ayaj xecual xeyay sandiüm; in-guiaiüw, iyacan wüx imeajtsan leaw andeac nej —aw.

<sup>36</sup> Wüx landoj andeac a nendeac, quiaj tajawüw a Teat Jesús néjan. Nejiw ngo mapiüngüw nicuajind. Tacül acas nüt nejingüind ngo mandeacüw wüx leaw tajawüw.

*Tajneaj nop alwüx ombas nej nimeech*

*(Mt. 17:14-21; Mr. 9:14-29)*

<sup>37</sup> Raw tiüt alinoic nüt wüx tawüw tiüt imiünüw wüx tiüc, xeyay nipilan tambüw mangochiw Teat Jesús.

<sup>38</sup> Nop naxey naw tiül aaga xeyay nipilan quiaj tendeac napac, tapiüng:

—Teat, satün icueaj meamb mejaw xecual ajcánan sajiür.

<sup>39</sup> Alwüx ombas nej nimeech. Nguaiaj aaga nimeech xeyay tiüc nej mepajpaj, am-beapmbeap nej, awün nej teombeay popox. Xeyay ngo majneaj lamarang nej, nómban ngo macueat nej.

<sup>40</sup> Xique tasajasüw minipilan mawüniw a nimeech wüx ombas nej, pero ngondom ombasüw —aw a naxey.

<sup>41</sup> Quiaj tapiüng Teat Jesús:

—¡Neol icona nipilan ngo meyarüw sandeac, icona monrang ngo majneaj! ¿Cas nüt ipiüangan sanacül naquiüüb icon, naüc wüx leaw irangan quiaj? —aw.

Condom tasaj a naxey:

—Iquiüüb miün micual, teat —aj.

<sup>42</sup> Wüx tengual ajüy aaga nench quiaj matüch niüng ajlüy Teat Jesús, quiaj tam-beapmbeap nej alinomb. Aaga nimeech alwüx ombas nej talox nej tiüt. Teat Jesús talic a nimeech quiaj, maw macueat; quiaj

tajneaj aaga nench. Condom tüüch mamb maquiüüb miteat nej alinomb.

<sup>43</sup> Meáwan nipilan leaw alquiaj mbaya-toj majawüw nguineay xeyay najneaj lamarang Teat Dios.

*Teat Jesús tapiüing alinomb apmambiyaw nej*

(Mt. 17:22-23; Mr. 9:30-32)

Tealeámban mbayajow nipilan majawüw meáwan leaw lamarang Teat Jesús, quiaj tasaj minipilan nej:

<sup>44</sup> —Iyacan wüx imeajtsan aaga poch sanasaj icon cam, cos Teat Naxey apmay-acüch teowixaw nipilan —aj nejw.

<sup>45</sup> Naleaing minipilan nej ngo majawüw cuane wüx asoiquiw quiaj, cos ngo müjndiw majawüw, aton cos nejw axinguiaw matüniw manguiayiw wüx aaga poch quiaj.

*Jane apmarang natang*

(Mt. 18:1-5; Mr. 9:33-37)

<sup>46</sup> Condom minipilan nej tapots andeac-ndeacüw wüx mapiüingüw jane apmarang natang.

<sup>47</sup> Naleaing Teat Jesús tajaw cuane teamapiüingüw tiül omeajtsüw nejw. Quiaj taxaing nop nine mayac niüing ajlüy nej.

<sup>48</sup> Condom tasaj nejw:

—Jangantanej leaw apmajiür lasta aaga nine cam, aag ayaj atnej teamajiür xic lasta; jangantanej leaw ajüür xic lasta, aag ayaj ajüür lasta neech xic niün. Cos jane chingüy tiül icona, aag ayaj natang —aj nejw.

*Jane ngo majcüy majaw icoots, najneaj majaw icoots*

(Mr. 9:38-40)

<sup>49</sup> Condom quiaj tasaj nej a Juan:

—Teat, tajawasan nop naxey teamapaj minüt wüx tawün nimeech wüx ombas nipilan, lanasajan macueat cos ngome acquiüjpaats —aj.

<sup>50</sup> Quiaj tasaj nej Teat Jesús:

—Ich majlüy, nde mepalan cos sitiül nop ngo majcüy majaw icoots, najneaj majaw icoots —aj nej.

*Teat Jesús talic a Jacobo y Juan*

<sup>51</sup> Wüx lamatüch a nüt mamb Teat Jesús andüy tiül cielo, quiaj tapiüing netam mamb Jerusalén.

<sup>52</sup> Quiaj tüüch mamb acas mambüw ombas nejw. Ajcüw ayaj tambüw tatüchiw tiül noic nine cambaj tiül iüt Samaria mayambüw niüing apmaxojtüw.

<sup>53</sup> Naleaing ajcüwa nipilan monaw quiaj ngome tandiümw müjchiw maxojtüw quiaj Teat Jesús cos tajawüw andüyiw Jerusalén apmambüw.

<sup>54</sup> Minipilan nej, aaga Jacobo maquiüüb a Juan wüx tajawüw aag ayaj, quiaj tasajw Teat Jesús:

—Teat, zindiüm natüniün biümb imiün tiül cielo atnej nomb tarang mixejchiiüts Eliasa, mandajpüw ajcüwa nipilan quiaja? —ajüw.

<sup>55</sup> Quiaj ndiliteay Teat Jesús majaw nejw, talic nejw, tapiüing:

—Icona ngo mejawan cuane teamendea-can.

<sup>56</sup> Cos Teat Naxey ngo miün mandrooch ombasüw nipilan, nej tiün mawün wüx nipilan —aw.

Quiaj tambüw tandüyiw tiül alinoic cambaj.

*Leaw tandiümw mandüjpiw Teat Jesús*

(Mt. 8:19-22)

<sup>57</sup> Condom wüx aleambüw tiül tiüüd tajngot nop naxey masaj Teat Jesús:

—Teat, sanamb nguajantanej niüing ap-meamb —aj.

<sup>58</sup> Quiaj tasaj nej Teat Jesús:

—Wiül ajüürw ombiümw, at a quiec ajüürw; nganüy a Teat Naxey ngo majiür nguiane alndom maxood —aj nej.

<sup>59</sup> Condom tasaj alinop:

—Mac, indüüb xic, tabar —aj.

Aaga nasoiq quiaj tapiüing:

—Teat, sanamb nacül leaw andeow xeteat, namiüt; ndoj sanandüüb ic narang leaw ipiüing —aw.

<sup>60</sup> Teat Jesús tasaj nej:

—Icuaeat, ich majlüy ich memiütayej. Ique quiür indeac wüx nguineay alndom majlüyeran tiül micambaj Teat Dios —aj nej.

<sup>61</sup> Condom tapiüing alinop:

—Sanamb teat, nguajantanej niüing ap-meamb, pero netam namb saniüing nasajüw manguiayiw —aw.

<sup>62</sup> Quiaj tasaj nej Teat Jesús:

—¿Sitiül nop nechüüt iüt almasap owix arada, andüy wanopech teamajaw, nguineay apmarang najneaja? Aag ayaj ngondom majmel tiül micambaj Teat Dios —aj nej.

## 10

*Teat Jesús tüüch mambüw er miow gajpowüw minipilan nej*

<sup>1</sup> Wüx landoj aag ayaj, Teat Jesús tawün er miow gajpowüw (70) minipilan nej. Ajcüw ayaj tüüch mambüw ijpüwpüw ombas nejw tiül meáwan cambaj leaw niüing nej ap-mamb.

<sup>2</sup> Ndoj tasaj nejw:

—Xeyay najiüt ajlüy, pero monrang najiüt napateay. Itüniün ocueaj a Teat Naxey ne-neay najiüt, müüch miün monrang najiüt.

<sup>3</sup> Quiüran; xique süüch icon meamban at icon sap indüyüün tiül tegüy sampüy.

<sup>4</sup> Nde mejoyiün morral, iquial tomiün, at napüic; nde lombombomeron mete-peayiün jangantanej tiül tiüüd.

<sup>5</sup> Ngünantanej nden niüng apmejmelüün, ombas mertepeayiün, itüniün monapacüy.

<sup>6</sup> Sitiül alquiaj aljane ajüic ajneaj omeaats majaw icon, indeacan najneaj mequiüjpan; pero sitiül ngwüy, nde mendeacan mequiüjpan xeyay.

<sup>7</sup> Icülüün tiül aaga nden quiaj, itean, ingeowan leaw apmeajndiün quiaj, cos nop nerang najiüt netam müünd üet nej. Nde meamban mejüyjüyiün tiül ngünantanej nden.

<sup>8</sup> Nguijantanej cambaj niüng apmejmelüün sitiül apmangochiw icon najneajan, itean leaw apmeajndiün meatiün.

<sup>9</sup> Aton imongochiün iün andeow moniün andeow leaw almajlüy tiül aaga cambaj quiaj, at isajan nipilan: “Nganüy laliüc ndom mejmeliün tiül micambaj Teat Dios”, irajan.

<sup>10</sup> Pero nguijantanej cambaj niüng apmejmelüün, sitiül ngo mangochiw icon najneaj, wüx apmeriowan ilean tiül calle, isajan nipilan:

<sup>11</sup> “Leaw najndot najlüy ningüy tiül micambajan ngo nandiüman macül wüx xilea-jüün nicuajind; satajtan majüic ngo majneaj irangan. Pero ich leaam imeajtsan tea-jndiün mejmeliün tiül micambaj Teat Dios”, irajan.

<sup>12</sup> Xique sasaj icon, wüx apmajaraw wüx asoet nipilan, napateay quiriw ngo majneaj leaw apmamongochiw nipilan tajlüyiw tiül cambaj Sodoma, ngo matnej aaga cambaj niüng ngo mangochiw icon najneaj.

*Nipilan ngo mayambüw Teat Dios*  
(Mt. 11:20-24)

<sup>13</sup> ¡Jaa, icona monaw tiül cambaj Corazín! ¡Jaa, icona monaw tiül cambaj Betsaida! ¿Neol ngo meyariün sandeaca? Cos jondot tiül cambaj Tiro y Sidón tarangüch meáwan ateócan leaw tarangüch tiül icona mejawan, catsats tsotojow tiül ngwiat masoijqüiw nambeor apixaw nejüw, majüiquichaw leaam omeajtsüw wüx meáwan ngo majneaj tarangüw.

<sup>14</sup> Áag sasaj icon, alinoic nüt wüx Teat Dios apmajaw wüx asoeteran, napateay ngo majneaj apmamongochiw monaw Tiro maquiüüb Sidón, ngo mat icona.

<sup>15</sup> At icona monaw tiül cambaj Capernaum, ¿iyajcan icona apmeamban tiül cielo? ¡Niquimas! Cos aleáingan apmejlosan tiül aaga xeyay ngo majneaj tiül Hades —aw Teat Jesús.

<sup>16</sup> Ndoj tasaj minipilan nej:

—Nganüy sasaj icon, leaw apmanguyai indeacan, aag ayaj atnej anguiay sandeac; leaw ngo mandüümüw manguyaiw indeacan, ngo mandüümüw xic aton. Leaw ngo mandüüm xic, ngo mandüüm aaga neech xic niün aton —aj nejüw.

*Tandilileaw ajcüwa er miow gajpowüw*

<sup>17</sup> Wüx tandilileaw ajcüwa er miow gajpowüw (70) quiaj, apac omeajtsüw, tasajüw Teat Jesús:

—Teat, wüx minüt ique ajcüwa nimeech ayariw sandeacan —ajüw.

<sup>18</sup> Quiaj tasaj nejüw Teat Jesús:

—Xique tajawas ajmiüc a Satanás atnej ajlip imiün tiül cielo.

<sup>19</sup> Xique nganüy lanüüch icon mecuüjchiün tiüt ndiüc tengwüy napüp. Masey moncüy majaw icoots apmarangüw leaw andiümüw, icona ngome apmarang icon nicuajind.

<sup>20</sup> Naleaing nde mapac imeajtsan ajcan imboloj mandüyiw icon nimeech ayariw indeacan; ngwüy, ich mapac imeajtsan cos minüitiün lajlüy tiül cielo —aj nejüw.

*Apac omeaats Teat Jesús*  
(Mt. 11:25-27; 13:16-17)

<sup>21</sup> Ores quiaj aaga Nangaj Espiritu tüüch Teat Jesús mapac omeaats. Teat Jesús tapiüng:

—Xique sasaj ic apac ximeaats wüx ique Teat, ique natang nenajiüt tiül cielo at wüx iüt, cos meáwan leaw lajlüy texot, ngo meach majawüw mondüy monxom omeaats. Nganüy lameach majawüw ajcüwa atnej nine monguich quiaj. Atquiaj ajlüy, Teat, cos atquiaj indiüm —aw.

<sup>22</sup> Condom tapiüng:

—Meáwan cuajantanej tündiüs, tüüch xic Xeteat; nejingüind ngo majaw jane aaga micual nej, áagan Xeteat Dios nejaw. Aton nejingüind ngo majaw jane nej Xeteat Dios, áagan micual nej ajaw; at leaw andiüm müüch nej majaw —aw.

<sup>23</sup> Condom Teat Jesús watsat majaw minipilan nej, quiaj tasaj nejüw:

—Najneajay ajlüy jangantanej leaw axom majaw leaw icona ixoman mejawan nganüy.

<sup>24</sup> Cos naleaing sasaj icon, xeyay mondeac andeac Teat Dios at montangtang monajiüt tandiümüw majawüw leaw lamejawan; naleaing taton ngo majawüw. Tandüümüw manguyaiw leaw lamanguyaiün; naleaing taton ngo manguyaiw —aj nejüw.

*Teat Jesús tandeac wüx nop naw Samaria*

<sup>25</sup> Alquiaj nop nequiaach wüx aaga poch tüünd Moisés, witiüt matün manguyaiw majaw cuane apmapiüng Teat Jesús, tasaj:

—Teat ¿cuane netam naranga, nguineay alndom namb tiül cielo napac meáwan nüte? —aj.

<sup>26</sup> Teat Jesús tasaj nej:

—¿Cuane apiüng tiül aaga poch tüünd Moisésa? ¿Nguineay iyaag? —aj nej.

<sup>27</sup> Aaga naxey tasaj nej:

—Netam mendiüm Teat Dios con imeaats, con ipacüy, con mifis; aton netam mejüw.

lasta jangantanej atnej ijiürüy lasta iquiáyan quiaj —aj nej.

<sup>28</sup> Quiaj tasaj nej Teat Jesús:  
—Najneaj aag ipiüng quiaj. Sitiül atquiaj apmerang apmeamb tiül cielo niüng apmepac meáwan nüt —aj nej.

<sup>29</sup> Nej aaga naxey tandiüm majüiquich arang meáwan aag ayaj, quiaj tasaj Teat Jesús:

—¿Jane alinop apiüng netam majiürüch lasta quiaja? —aj.

<sup>30</sup> Quiaj tasaj nej Teat Jesús:  
—Nop naxey imiün Jerusalén andüy Jericó taxom nej need tiül tüüd, tanejtüw nej ocueaj meáwan leaw almajoy, tawüjchiw nej, laliüc mandeow tacueatiw.

<sup>31</sup> Condom tamong quiaj nop miteaats amb tiül a tüüd quiaj. Wüx tajaw alpiüüm aaga naxey quiaj, tayey tiüt tamong.

<sup>32</sup> Camüm tamong quiaj nop nembeol miteaats ajcüw nasoic levita. Átan wüx tatüch quiaj majaw alpiüüm a naxey, tamóngan aton.

<sup>33</sup> Ndoj tajngot nop naxey naw Samaria aleamb tiül aaga tüüd quiaj. Wüx tajaw a naxey, xeyay tajiür lasta.

<sup>34</sup> Quiaj tamb matüch, tayac aceite, tayac a vin wüx aaga necoy quiaj. Condom taóel, cas taxaing mayac wüx mibur nej. Taquiüüb mamb andüy niüng axoodaran; tacül quiaj majaw.

<sup>35</sup> Aw alinoic nüt wüx taw quiaj, tawün ijquiaw tomiün nenüt denario, tüüch ne-neay nden niüng axoodaran. Ndoj tasaj: “Jaw ningüy xicueaj, sitiül aleaic tetam, iyamb ocueaj nej. Xique sanangüy icueaj leaw sapeay”, aj.

<sup>36</sup> Tiül aaga arojpw quiaj, ¿jane ajüic tajiür lasta aaga naxey tajiüy mambiy nej need quiaja? —aj nej Teat Jesús.

<sup>37</sup> Condom aaga nequiaach wüx aaga poch tüünd Moisés tapiüng:

—Pues aaga tambeol nej —aw.  
Quiaj tasaj nej Teat Jesús:  
—Quiür a ique irang atnej aton —aj nej.

*Teat Jesús al aniüngüw Marta y María*

<sup>38</sup> Teat Jesús wüx tatüch tiül noic cambaj, alquiaj nop najta nenüt Marta. Tüüch nej-w maxojtüw aniüng nej.

<sup>39</sup> Aaga Marta quiaj, almajiür nop michiig nej nenüt María. María tamb chetem niüng ajlüy Teat Jesús manguiay andeac.

<sup>40</sup> Naleaing Marta tenguail amb wüx omeaats meáwan leaw teamarang tinden. Condom tamb matüch Teat Jesús masaj:

—Teat, ¿najneaj mejaw arang xechiig quiaja? Cos acueátan xic wüx narang xenajiütan. Isaj mambeol xic, Teat —aj.

<sup>41</sup> Quiaj tasaj nej Teat Jesús:  
—Marta, Marta, xeyay apal ic, xeyay amb wüx imeaats cuajantanej irang quiaj.

<sup>42</sup> Ajlüy noic leaw alwüx atam, María teamayac wüx omeaats aaga leaw netam quiaj, nejinguind ngome apmanood nej ocueaj —aj nej.

## 11

*Jesús aquiaach nguineay alndom mataj-caats orar*

(Mt. 6:9-15; 7:7-11)

<sup>1</sup> Noic nüt Teat Jesús teataag orar, y wüx landoj, quiaj tapiüng nop minipilan nej:

—Teat, iquiaach xicon nguineay natajcan orar atnej tarang teat Juan wüx taquiaach minipilan nej —aw.

<sup>2</sup> Quiaj tapiüng Teat Jesús:

—Icona, wüx apmetajcan orar atcüy ipiüngan:  
Xeteatiün Dios najlüy tiül cielo, ique nangaj minüt.

Sandiüman mejlüy wüx meáwan nipilan nguiajantanej.

Atnej iyambüch ninguiün tiül nangaj cielo, atquiaj aton netam meyambüch ningüy wüx aaga iüt cam, marangüch leaw ique indüüm.

<sup>3</sup> Iich xicon nüeteran nganüy nüt cam atnej mbójan irang.

<sup>4</sup> Iwün wüx imeaats aaga ngo majneaj tarangasan Teat, cos xicona aton lanawüniün wüx ximeajtsan meáwan ngo majneaj tarangüch wüx ximbasan.

Imbeol xicon nde narangan ngo majneaj, Teat,

Iwün ninguiün meáwan ngo majneaj, nde matüch xicon, irawan —aj nejw Teat Jesús.

<sup>5</sup> Aton tasaj nejw:

—Jondot nop icona almajiür nop mi-amigo nej pinawan ongwiiüts mapeay masaj nej: “Amigo, najüch icueaj arojpw pan.

<sup>6</sup> Cos napeay nop xeamigo, imiün miünquiaj ajngot, naleaing ngo najiür cuane sanüüch”, maj.

<sup>7</sup> Pero aaga naxey altiül iüm, apmasaj nej: “Tapots indeac, lanapal a iüm. Xecual lameayiw naquiüjpüw, ngondom witiün nawün nüüch ic”, maj nej.

<sup>8</sup> Naleaing sasaj icon, masey ngo mind witiow, nej apwitiüm mawün müüch leaw netam, ngome ajcan ajaw miamigo nej, apmarang cos ngo mandiüm manguiay mapajpaj nej.

<sup>9</sup> Nganüy sasaj icon: Sitiül apmetüniün apmeajndiün; sitiül apmeyamban monajneaj ocueaj nej apmexoman; sitiül apmerndeacan apmengocheranan.

<sup>10</sup> Cos meáwan leaw netün apmüünd; leaw neyamb apmaxom; leaw nendeac apmangocharan.

11 '¿Mbich alndom nop nateateran wux matün nej ocueaj pan micual nej, apmüüch noic piedra ingow üüch pana? ¿Tengwüy wux matün cüet, ingow üüch cüet apmüüch nop ndiüca?

12 ¿Jondot matün omb quit, ingow üüch omb quit apmüüch nop napüpa?

13 Sitiül icona monrang ngo majneaj icon, ijawan cuane najneaj meajchiün micualan; cuantemas Miteatiüts Dios najlüy tiül cielo apmüüch Nangaj Espíritu jane apmatün nej ocueaj —aj nejw Teat Jesús.

*Apiüngüw ambeol nej nimeech*  
(Mt. 12:22-30; Mr. 3:20-27)

14 Teat Jesús tawün nimeech wux ombas nop naxey nejew. Wüx taw aaga nimeech quiaj, quiaj tendec aaga naxey. Meáwan nipilan mbayajow majawüw.

15 Naleaing altiül tapiüngüw:

—Aaga naxey quiaj awün nimeech cos ambeol nej aaga minatang nimeech nenüt Beelzebú —awüw.

16 Altiül tandiümüw majawüw cuane aparang, tasajüw marang noic atéocan majawüw sitiül naleaing Teat Dios ambeol nej.

17 Teat Jesús tajaw nguineay teamapiüngüw tiül omeajtsüw nejw, áag tasaj nejw:

—Tiül meáwan cambaj sitiül monajiüt apmajcüyiw mbajcamoj, apmembiyayej apndrom ombasüw. Sitiül moncül tiül noic nden majcüyiw, ngo majlüyiw nóiquian, apndajr-riümoj.

18 Atánan quiaj sitiül minatang nimeech ngo majlüy nóiquian maquiüüb mimonbeol nej, ¿nguineay alndom marangüw cuajan-tanej ngo majneaj? Aag ayaj sasaj icon cos ipiüangan xique sawün nimeech, ambeol xic Beelzebú.

19 Sitiül naleaing Beelzebú nembeol xic nawün nimeech, isajan xic, jow minipilanan, ¿jane ambeol nejw mawüniw nimeech? ¿Ngwüy nimeech ambeol nejw? Ninguiaj ajüic ngo mejawan cuane temepiüangan.

20 Nganüy sitiül Teat Dios nembeol xic nawün nimeech wux ombas nipilan, naleaing sasaj icon lamatüch mejmeliün tiül minipilan Teat Dios.

21 'Sitiül nop naxey natang nenajiüt almajjür xeyay monjür nej aniüng, meáwan leaw almajjür aniüng nej najneaj ajlüy.

22 Nganüy sitiül aliüc alinop xeyay minipilan nej aqiiüüb miün, apmanojtiw aaga iüm quiaj, apmasapüw leaw monjür, apmümb mayariw membaagayej wux leaw taxomüw.

23 'At sasaj icon, leaw ngo mandüüm xic, ajcüy majaw xic. Jane ngo mambeol xic wux leaw teanaxaing, aag ayaj awíchan quiün.

*Wux nimeech andilil alinomb wux ombasaran*  
(Mt. 12:43-45)

24 'Nop nimeech wux apmacueat aljane, apmajüyjüy tiül wajchiüc mayamb nguiane apmaxood. Wüx lapaxiow ajüyjüy ngo maxom, quiaj apmapiüng: "Sanandilil sandüy tiül niüng tawas", apmaw.

25 Camüw mapeay quiaj, apmaxom aaga naxey atnej nop iüm najneajay najjirimb najmel mimbaj.

26 Almajaw atquiaj, quiaj apmamb majan alayaíw aqiiüüb nej alwüx apatüw, ngo matnej. Quiaj apmambüw andüyiw wux ombas a naxey quiaj. Ndójwüx aaga naxey quiaj xeyay ngo majneaj apmajlüy, ngo matnej tajlüy nomb —aj nejw Teat Jesús.

*Najneajay leaw anguiay Mipoch Teat Dios*

27 Teat Jesús wüxan tealeámban mandeac aag ayaj, quiaj tendec nop najtaj tiül nipilan, tapiüng:

—Najneajay ajlüy a müm najtaj newiquiach ic, neech ic ichech —aw.

28 Quiaj tapiüng Teat Jesús:

—¡Najneajay aton ajlüyiw meáwan leaw anguiayiw Mipoch Teat Dios ndoj ayacüw wux omeajtsüw! —aw.

*Nipilan atüniw atéocan*  
(Mt. 12:38-42; Mr. 8:12)

29 Wüx laxeyay nipilan mayeyiw nej tiüt, quiaj tapots masaj nejw:

—Nipilan nganüy cam ngo majneaj arangüw, atüniw atéocan majawüw. Naleaing ngame apmüjndiw majawüw; apmüjndiw áagan leaam omeajtsüw leaw tajlüy wux Jonás.

30 Atnej Jonás tajlüy tanomb, wux nej tatiib ocueajiw nipilan monaw Níneve leaw ngo majneaj teamarangüw, atquiaj ajlüy nganüy a Teat Naxey, teamatiib icueajiün leaw ngo majneaj teamerangan.

31 Alinoic nüt wux apmajaraw wux asoet nipilan, quiaj nop najtaj najlüy tanomb, nang nenajiüt imiün cawac, nej apmajüiquich ajcüwa nipilan aaga nüt cam alwüx axeyay ngo majneaj teamarangüw; cos nej imiün xeyay miünquiaj tamb manguiay andeac Salomón. Nganüy ajlüy ningüy tiül icona nop alwüx xeyay ajaw ngo matnej Salomón, icona ngo meyariün andeac nej.

32 At alinoic nüt wux Teat Dios apmajaw wux asoeteran, ajcüwa nipilan monaw Níneve leaw tajlüyiw tanomb apmay-acüw isoetiün. Cos ajcüwa nipilan quiaj tayambüw Teat Dios wux Jonás tapaj nej ocueajiw. Nganüy ajlüy tiül icona nop alwüx xeyay atam ngo matnej Jonás, pero icona ngo merangan leaw asaj icon.

*Ran ocueajaran*  
(Mt. 5:15; 6:22-23)



<sup>33</sup> Nejingüind ngame apmachen ran ndoj maxot, tengwüy mamooğ omal tiül nop nchep. Ngwüy netam mayac cawüx marraj, maxom majaw jane apmajmel tiül iüm.

<sup>34</sup> Oniügaran aag ayaj nerraj icoots. Sitiül iyac iniüüg wüx mejaw leaw najneaj, apmambeol ic merang najneaj. Wüx irang najneaj, aag ayaj atnej mejlüy tiül ran. Nganüy sitiül indium meyac iniüüg wüx mejaw leaw ngo majneaj, quiaj apmerang xeyay ngo majneaj; aag ayaj atnej ijlüy tiül pojniün.

<sup>35</sup> Netam mejaw wüx aaga ran ijiür quiaj, nde marang pojniün.

<sup>36</sup> Sitiül ique ijlüy tiül aaga ran quiaj, ngo mejlüy tiül pojniün, ranüy apmajlüy niüüg ijlüy atnej wüx marraj ic noic nadam ran —aj nejiw Teat Jesús.

*Teat Jesús ayac asoet fariseos y mondüy wüx mipoch Moisés*

(Mt. 23:1-36; Mr. 12:38-40; Lc. 20:45-47)

<sup>37</sup> Wüx landoj andeac Teat Jesús, quiaj tasaj nej nop fariseo mamb metiw aniüüg nej maquiüüb. Quiaj tamb Teat Jesús. Nganüy wüx chetet met,

<sup>38</sup> aaga fariseo wüx tajaw nguineay Teat Jesús ngo marang atnej ajlüyay arangüw nejiw wüx ajantsüw owixaw, quiaj mbayat.

<sup>39</sup> Quiaj Teat Jesús tasaj nej:

—Icona fariseos ijantsan ombas a tas, polat, pero amb tiül tan ajlüy ngo majneaj. Icona atquiaj ijlüyüün, masey ajüic irangan najneaj, tiül imeajtsan xeyay ngo majneaj ajlüy, cos inojtiün meyariün ocueaj alinop, at irangan cuajantanej ngo majneaj.

<sup>40</sup> ¡Nerchachiün! ¿Neol ngo mejawana, aag nerang amb wüx ombas, nej nerang amb tiül aton?

<sup>41</sup> Leaw almejiüran ijchan ajcüwa nipilan ngo majiür. Quiaj apmejlüyüün nerixixay najneaj.

<sup>42</sup> ¡Jaa, icona fariseos! Iyacan erchechiün naw tiül menta, ruda, at naw tiül cuajantanej soex napiürüch; pero icona ngo merangan leaw najneaj, ngo mejiüran lasta alinop atnej andiüm Teat Dios. Netam merangan meáwan aag ayaj, aton nde mecueatiün meyacan erchechiün.

<sup>43</sup> ¡Jaa, icona fariseos! Wüx iriümban tiül sinagogas iyamban nguiane chetemeron, nguineay alndom mejarawan. Aton iyambayamban merangüchiün casa niüüg ajlüy xeyay nipilan.

<sup>44</sup> ¡Jaa, icona mondüy wüx aaga poch tüünd Moisés, aton icona fariseos! ¡Monlombojchay icon! At icon oxiiüt wüx lajarriow, lango majüic, nipilan namong amb wüx ngo majaw sitiül aag ayaj oxiiüt —aj nejiw Teat Jesús.

<sup>45</sup> Condom tapiüüg nop naxey nendüy wüx aaga poch tüünd Moisés, tasaj Teat Jesús:

—Teat, wüx andeac aag ayaj ajüic atnej andüy wüx ximbasan temendeac —aj.

<sup>46</sup> Quiaj tapiüüg Teat Jesús:

—¡Jaa, icona aton mondüy wüx aaga poch tüünd Moisés! Cos ijchan nipilan mamalüw leaw ngondom mamalüw; pero icona ngo mendiüman merrejquiün aag ayaj masey con nots micual iwixan.

<sup>47</sup> ¡Jaa icona! Cos teametajcan majneaj mioxiütüw mandeac andeac Teat Dios leaw tajlüyiw tanomb, leaw tandeowüw ambiw nejiw mixejchiün.

<sup>48</sup> Aag ayaj ajüic icona najneaj mejawan leaw tarangüw mixejchiün; nejiw monbiy, nganüy icona teamerangan mioxiütüw.

<sup>49</sup> 'Cos Teat Dios meáwan aag ayaj lamajaw, áag tapiüüg: "Sanüjchiw mambüw niüüg ijlüyüün mandeacüw andeac, at sanüjchiw mambüw apóstoles aton. Altiül apmambiyaranüw, alacas apmayambüch ombasüw", aw.

<sup>50</sup> Aag ayaj tandeac Teat Dios cos ajcüwa nipilan najlüy nganüy cam, apmengüyiw leaw tarangüchiw wüx ombasüw mondeac andeac nej tanomb, ajan wüx tarang iüt cam.

<sup>51</sup> Aag ayaj ajan wüx miquiej Abel, ndójwüx wüx miquiej Zacarias, áag tambiyaw tiül nadam nangaj iüm niüüg ajlüy artül. Nganüy sasaj icon, Teat Dios apmüüch icon mengüyüün leaw tambiyaranüw quiaj.

<sup>52</sup> ¡Jaa, icona mondüy wüx aaga poch tüünd Moisés! Cos ijawan leawa netam, pero ngo merangan. At lamepálan alinop, ngo meajchiün majaw, marang —aw Teat Jesús.

<sup>53</sup> Wüx teamandeac masaj nejiw aag ayaj, meáwan mondüy wüx aaga poch tüünd Moisés, at a fariseos xeyay tajcüyiw. Condom quiaj tapots masajsajüw nej cuajantanej.

<sup>54</sup> Tayambüw nguineay masapüw wüx alngün poch leaw apmandeac, mayacüw asoet.

## 12

*Teat Jesús tandeac andüy wüx monlombojchay*

<sup>1</sup> Wüx aaga nüt tapeay quiaj xeyay nipilan, canchiütoj acas mil, lacharrayej. Quiaj Teat Jesús ombas masaj minipilan nej, tapiüüg:

—Ijawan nguineay arangüw a fariseos, nde mitsojow icon. Aag ayaj alndom marang icon atnej arang lewadura wüx ajmel tiül ajtsaj marang pan, cos andüy quiaj apmaxip mexeyay. Nejiw ajüic atnej arangüw najneaj; aag ayaj ngo maleaing, arangüwan.

<sup>2</sup> Cos meáwan leaw naxotaran apmajüic, at meáwan leaw nexotüy apmajaraw alinoic nüt.

<sup>3</sup> Atquiaj leaw indeacan iconan quiaj masey tiül pojniün, alinoic nüt apmanguia-yaran. Átan leaw tendecan wüx indexeyon tiül ilajcan, alinoic nüt apmanderac napac manguiaj cambaj.

*Jane netam mermbolan mendüiyün*  
(Mt. 10:26-31)

<sup>4</sup> Xique sasaj icon xeamigojüw, nde mermbolan mendüiyün leaw alndom mambiy icon, cos áagan alndom marangüw.

<sup>5</sup> Nganüy sanasaj icon jane netam mermbolan mendüiyün: ermbolan mendüiyün aaga leaw alndom mambiy icon, ndoj alndom mayac icon tiül xeyay ngo majneaj, tiül biümb. Nej netam mermbolan mendüiyün.

<sup>6</sup> '¿Neol ngo mejawana, acoquiaw nine quiec ijquiaj tomiün ombat? Naleaing Teat Dios ngo ndrom omeaats masey noic tiül nejijw, cos meáwan ajaw.

<sup>7</sup> At miondeats omalaran lateoraw. Nde mermbolan nicuajind, cos icona alwüx im-beatiün, ngo mat nejijw a nine quiec quiaj.

*Leaw ngo mexotüy wüx mandeac sandeac*

(Mt. 10:32-33; 12:32; 10:19-20)

<sup>8</sup> 'Aton sasaj icon, jangantanej ngo mex-otüy wüx masaj nipilan ayar sandeac, xique aton sanandeac nasajüw miángeles Xeteat Dios xenipilan nejijw.

<sup>9</sup> Nganüy jangantanej leaw apmapiüng xique ngome micual xic Teat Dios, at a xique aton sanasaj miángeles Xeteat Dios ngome xenipilan nejijw.

<sup>10</sup> 'Aton sasaj icon, jangantanej leaw ap-mandeac alngün ngo majneaj wüx ombas Teat Naxey, nej alndom nawün wüx ximeaats. Nganüy leawa nendec ngo ma-jneaj wüx ombas Nangaj Espiritu ocueaj Teat Dios, aaga nisoet quiaj mbich ngon-dom maw wüx ombas nej.

<sup>11</sup> 'Sitiül alngün nüt apmequiürajpan may-acüw icon teombas montangtang tiül ajcüwa sinagoga, tengwüy niüng ajlüy montang-tang monajiüt, nde meyamban imeajtsan wüx cuane apmepiüangan;

<sup>12</sup> cos wüx apmerndeacan, aaga Nan-gaj Espiritu ocueaj Teat Dios apmüüch icon poch leaw netam mepiüangan —aj nejijw Teat Jesús.

*Ngo majneaj mandüümdüüram cuajan-tanej*

<sup>13</sup> Condom nop naxey náwan tiül nipilan tasaj nej:

—Teat, isaj xecoj mambaag pinawan aaga najcuaeat cam nüjndiün, müüch xic leaw saneay —aj nej.

<sup>14</sup> Quiaj Teat Jesús tasaj nej:

—Teat ¿jane neyac xic najaw wüx leaw ijndean, nambaag icueajiün? —aj nej.

<sup>15</sup> Condom tasaj meáwan nipilan:

—Ijawan wüx, nde mendüümdüüman ocueaj alinop; cos ngome wüx lame-jiüran cuajantanej alndom mambeol icon mepacan —aj nejijw.

<sup>16</sup> Quiaj tasaj nejijw acas poch andüy wüx corrül, tapiüng:

—Tajlüy nop naxey nejijw, meáwan omeaats micorrül nej tumb merangüy.

<sup>17</sup> Condom aaga naxey quiaj tapiüng tiül omeaats nej: “¿Nguineay sanarang cos ngo najiür nguiane sanayac omeaats xecorrül?”, aw.

<sup>18</sup> Quiaj tapiüng: “Atcüy sanarang, sanam-bich najarrich xetroj, ndoj sanarang alacas nadamdam, nayac tiül meáwan sanaxaing, at meáwan salnajiür.

<sup>19</sup> Quiaj sanapiüng xiquíayan quiaj: Canüy najneajay ijlüy cos almejiür meáwan leaw netam, apmafüc ic xeyay neat. Canüy ixood, iret, inganeow, ich mapac imeaats, sanaj ximeaats”, aw a naxey.

<sup>20</sup> Quiaj Teat Dios tasaj nej: “¡Chach! Aaga ongwüüts cam apmendeow. Jow, leaw teamecanchich quiaj, ¿cuane ajpare? ¿jane apmaneaye?” aj nej.

<sup>21</sup> 'Atquiaj leaw necancanchich cuajan-tanej néjan quiaj wüx, ngo majiür nicuajind niüng ajlüy Teat Dios —aj nejijw Teat Jesús.

*Teat Dios üüch meáwan leawa netam*  
(Mt. 6:25-34)

<sup>22</sup> Condom Teat Jesús tasaj minipilan nej:

—Sasaj icon, nde mamb wüx imeajtsan mepiüangan cuane apmeatiün, cuane apme-sojquüün.

<sup>23</sup> ¿Neol ngwa, icona alwüx itaman, ngo matnej nületeran; aton micuerpojan alwüx atam, ngo matnej napixerana?

<sup>24</sup> Ijawan nguineay ajlüyiw mimüm wiür, cos nejijw ngo mepiürüw maxainguw omeaats corrül, ngo macanchichaw leaw apmüetiw alinoic nüt, cos Teat Dios üüch nejijw. ¿Neol ngome alwüx imbeatiüna, ngo matnej quieque?

<sup>25</sup> ¿Ngwüy jane tiül icona wüx xeyay ayambyamb omeaats alndom matang wüx alquiwiwe?

<sup>26</sup> Sitiül ngondom merangan leaw ngo maél, ¿neol tapots iyacan imeajtsan wüx cuajantanej leawa naéle?

<sup>27</sup> 'Ijawan nguineay ajlüyiw a mbaj, nguineay atangüw. Cos ngo marangüw najiüt nicuajind, at ngo mendileaw. Nganüy sasaj icon, aaga minatang nenajiüt leaw tajlüy nomb nenüt Salomón, nej tajiür xeyay tomiün. Masey tajiür xeyay najneajay apix nej; ngo matüch matnej ajneajiw a mbaj.

<sup>28</sup> Sitiül Teat Dios ayac mimbaj a soex leaw almajlüy nganüy, oxep lamarang asap

andaab pow, cuane wüx ngo mambeol icon.  
¿Neol ngo meyacan imeajtsan wüx neje?

<sup>29</sup> Icona nde meyacan imeajtsan wüx leaw apmeatiün menganeowan.

<sup>30</sup> Cos nipilan leaw ngo mayambüw Teat Dios, xeyay ayacüw omeajtsüw wüx aag ayaj. Icona ijawan Miteatiüts Dios, nej alwüx, nej ajaw meáwan leawa teatam icon.

<sup>31</sup> Netam meyamban merangan meáwan leaw andiüm Teat Dios; quiaj nej apmüüch icon meáwan leawa netam.

*Tiül cielo icanchichan leawa nembatm-beat*

(Mt. 6:19-21)

<sup>32</sup> 'Nde mermbolan xecualüw, masey nepateayiün, cos Miteatiüts Dios xeyay ajneaj omeaats, andiüm müüch icon mejlüyiün tiül micambaj nej.

<sup>33</sup> Inüjpiün leaw almejiüran, condom imbeolan leaw nipilan ngo majiür. Aag ayaj atnej mejiüran xeyay tiül iquial tomiün tiül cielo niüng mitomiünan ngo mümb, ngondom pandiüm, ngondom majmel quiaj need maneed, átan a ndeooq ngondom majlüy mandrooch ombas.

<sup>34</sup> Cos niüng ijiüran cuajantanej nembatmbeat, quiaj almajlüy imeajtsan.

*Netam mepacan mecüliün*

<sup>35</sup> 'Ersooigayon, icüliün, icheniün a ran.

<sup>36</sup> Irangan atnej arangüw monrang najiüt tiül noic nden wüx teamacüliw neneay nden. Cos wüx apmapeay imiün niüng nen-goch owix, camüm majngot mapaj nejiw, najénan maleajquiw a iüm majmel.

<sup>37</sup> Najneajay apmajlüyiw ajcüw monrang najiüt quiaj wüx apmapeay neneay nden maxom nejiw teamacüliw nej, ngo mameayiw. Naleaing sasaj icon, ndójwüx nejay a neneay nden apmayac mes, at nüeteran, masaj nejiw chetemoj metiw.

<sup>38</sup> Masey mapeay pinawan ongwiiüts, masey andüy wüx arraw, sitiül apmaxom nejiw teamacüliw nej ngo mameayiw, najneajay apmajlüyiw ajcüw leawa teamacüliw nej quiaj.

<sup>39</sup> Aton sanasaj icon, jondot nop nateateran majaw cuame ores apmajmel aniüng nej need, nej ngome apmameay, ngome apmüüch majmel tinden maneed leaw ajüür.

<sup>40</sup> Ata icona aton netam mecüliün mepacan, cos Teat Naxey apmandilil wüx ngome teateotsaran —aj nejiw Teat Jesús.

*Nop mos nerang najneaj; alinop nerang ngo majneaj*

(Mt. 24:45-51)

<sup>41</sup> Quiaj Pedro tasaj Teat Jesús:

—Teat, ¿indeac aag ayaj nanguiayiün xicon, ngwüy tendec manguiayiw meáwan nipilan atona? —aj.

<sup>42</sup> Quiaj tasaj nej Teat Jesús:

—¿Jane aaga nerang najiüt, nerang najneaj, nexom omeaats, leaw neneay nden tayac teowix nej aniüng nej majaw nej ocueaj, mawiül monlüy quiaj marang leaw netama?

<sup>43</sup> Najneajay apmajlüy aaga nerang najiüt quiaj wüx apmandilil neneay nden, cos apmaxom nej teamarang meáwan leaw lamasaj.

<sup>44</sup> Naleaing sasaj icon, aaga neneay nden quiaj ndójwüx apmayac teowix nej meáwan leaw almajüür majaw nej ocueaj.

<sup>45</sup> Nganüy sitiül aaga nerang najiüt quiaj mapiüng neneay najiüt nequiy apmapeay, maw, ndoj tapots mawüüch meáwan monrang najiüt quiaj, monxey, montaj. At a nej ngo marang nicuajind, metmétan, angüngünan.

<sup>46</sup> Ndot tealeámban aag ayaj, quiaj apeay aaga neneay najiüt wüx a nüt lango leaam omeaats nerang najiüt macüli nej. Quiaj apmüüch mamongoch xeyay ngo majneaj, ndoj apmüüch maquiüüb tiül meáwan leaw ngo mayariw nej andeac.

<sup>47</sup> 'Sasaj icon, leaw nerang najiüt nejaw cuane andiüm neneay najiüt, ndoj ngo marang atnej, apmajwüch xeyay.

<sup>48</sup> Nganüy nop leaw ngo majaw cuane andiüm neneay najiüt, ndoj tarang leaw ngo metam marang, apmajwüch napateay quiriw. Cos meáwan leawa nüünd xeyay, apmajtan ocueaj nej xeyay aton, leaw nüünd xeyay leaw ajaraw alndom marang, nej netam marang xeyay aton.

*Teat Jesús üüch mbajcam nipilan*

(Mt. 10:34-36)

<sup>49</sup> 'Xique tiünas ningüy wüx aaga iüt cam, nganüy apmajlüy xeyay moncüy, atnej xique tiünas nayac biümb. ¡Malüy lajlüy aag ayaj!

<sup>50</sup> Xique netam namongoch xeyay necoy. Xeyay ngo majneaj ximeaats ¡Malüy sapiüng landoj lajlüy!

<sup>51</sup> ¿Ngwüy ipiüngana xique xiün ningüy nayac majlüy monajneaj wüx iüt cama? Ngwüy, xique xiün nüüch majlüy xeyay moncüy, mbajcan palpáwüx.

<sup>52</sup> Cos naw wüx nganüy alndom majlüy acoquiaw nipilan tiül noic nden ngo majlüyiw nóiquian. Arojpwüw apmajcüyiw majawüw ijpüw, tengwüy ijpüw apmajcüyiw majawüw arojpwüw.

<sup>53</sup> Nateateran apmajcüy majaw nacualaran, tengwüy nacualaran apmajcüy majaw nateateran. Namümaran apmajcüy majaw nacualaran, nacualaran apmajcüy majaw namümaran. Aton namümaran apmajcüy majaw mintaj nacualaran, mintaj nacualaran apmajcüy majaw napeweran —aj nej.

*Apiüng wüx leaw altiic miün apmajlüy*  
(Mt. 16:1-4; Mr. 8:11-13)

<sup>54</sup> At tasaj meáwan nipilan:

—Icona wüx ijawan lamawitich oic noleat lamepiüngan: Apmajoet, irawan. Naleaing atquiaj apmajlüy.

<sup>55</sup> At wüx apmapep tiüt ncherrec lamepiüngan: Apmerraar, irawan. Naleaing atquiaj apmajlüy.

<sup>56</sup> Sasaj icon ndeac mbeay! Icona ipiüngan ijawan wüx oic, wüx caaw, at wüx iüt. ¿Neol a nganüy ngo mejawan nicuajind wüx meáwan leaw tengual ajlüy tiül aaga nüt cama?

*Ijneaj anaag leaw ajcüy majaw ic*  
(Mt. 5:25-26)

<sup>57</sup> ¿Neol ngo mejawan icónan quiaj nguineay netam merangan najneaja?

<sup>58</sup> Cos sitiül aljane aleaic iriow anaag wüx, apmayac ic teombas monajiüt, pues indeac anaag, ijaw cuane ngo majneaj irang, isaj apmeyac ingow wüxan nganaw mepeay anaag teombasüw monajiüt. Cos teat xan alndom masaj mongot mayacüw ic tiül manchiüc.

<sup>59</sup> Naleaing sasaj ic, wüx lerpeay tiül manchiüc langondom meriow najen, apmeriow leaw imbich mengüy leaw apmatüniw icueaj —aj nejiw Teat Jesús.

### 13

*Netam majcueat meáwan leaw ngo majneaj*

<sup>1</sup> Wüx aaga nüt quiaj acas nipilan tasajüw Teat Jesús nguineay a Pilato tapiüng mambiyaranüw acas nipilan monaw Galilea, ndoj taól miquiejüw nejiw tiül miquiej nimal leaw teambiiyaw ajcüw monaw Galilea, marang ichechiw nejiw.

<sup>2</sup> Quiaj tasaj nejiw Teat Jesús:

—Cuane ipiüngan ¿jow ajcüwa monxey tandeowüw quiaj, más xeyay asoetiw ajiürüwa, ngo mat nejiw meáwan nipilan monaw Galilea, áag tamongochiw atquiaja?

<sup>3</sup> Xique sasaj icon ngwüy, cos sitiül icona ngo leaam imeajtsan meyamban Teat Dios, meáwan icona apmandrojchich imbasan aton.

<sup>4</sup> Ngwüy, cuane ipiüngan ¿jow ajcüwa gajpopeac (18) nipilan tandeowüw achar nejiw tiüt mitorre Siloé, alwüx ngo majneaj arangüwa, ngo matnejiw meáwan nipilan monlüy tiül Jerusaléne?

<sup>5</sup> Xique sasaj icon ngwüy, cos sitiül icona ngo leaam imeajtsan meyamban Teat Dios, meáwan icona apmandrojchich imbasan aton —aj nejiw.

*Tandeac wüx toc ngo meóng*

<sup>6</sup> Condom Teat Jesús tandeac masaj nejiw, tapiüng:

—Tajlüy nop naxey ajiür noic corrül, altiül noic owil toc. Tamb majaw sitiül alwüx aóng, pero ngo maxom wüx nicuajind.

<sup>7</sup> Quiaj tasaj aaga naxey nejiür micorrül nej: “Aaga toc cam aroomb neat wüx aag agüy xiün ningüy naybam aóng nej, ngo naxom wüx nicuajind. Indooig, cuane ajpar, cos teapalpálan iüt”, aj.

<sup>8</sup> Aaga nejiür corrül tasaj nej: “Teat, ich macül áagan a neat cam; sanataag majneaj, sanatoxtox mapench a iüt wüx owil, ndoj sanayac omeaats iüt.

<sup>9</sup> Sapiüng arpeóng, tengwüy sitiül ngo meóng, mbich quiaj sanandooig”, aw —aj nejiw Teat Jesús.

*Tajneaj iün andeow nop najtaj wüx nüt axoodaran*

<sup>10</sup> Noic nüt axoodaran Teat Jesús altiül sinagoga teaquiaach.

<sup>11</sup> Alquiaj nop müm najtaj ajiür noic monandeow ayac nimeech, lamatüch gajpopeac (18) neat tatow maxom nej. Lamandrooch nej ombas, apejngüxan ajüy, ngondom maleaing.

<sup>12</sup> Teat Jesús wüx tajaw nej, quiaj tasaj:

—Müm najtaj, canüy lerneaj, laáw mimonandeow —aj nej.

<sup>13</sup> Quiaj tayac owix wüx omal a müm najtaj, andüüban ajneaj, nómban taleaing. Quiaj tapots masaj Teat Dios najneaj arang.

<sup>14</sup> Nganüy aaga natang tiül a sinagoga tajcüy cos Teat Jesús lamataag majneaj monandeow wüx nüt axoodaran. Quiaj tasaj nipilan:

—Ajlüy anaíw nüt leaw alndom marangüch najiüt. Tiül aaga nüt quiaj netam merwiünan matajüch majneaj iün indeowan, ngome wüx nüt axoodaran —aj nejiw.

<sup>15</sup> Quiaj Teat Jesús tapiüng:

—¿Ndeac mbeay! ¿Neol, jowa icona ngo mechejtüün miboyiüna miburrana mequiüjpan meajchiün yow wüx nüt axoodarana?

<sup>16</sup> Aaga müm najtaj cam, nej nop naw tiül acualaats Abraham aton. Nimeech lamüüch nej mamongoch xeyay ngo majneaj lamatüch gajpopeac (18) neat. ¿Neol ngondom matajüch majneaj wüx nüt axoodarana? —aw.

<sup>17</sup> Wüx Teat Jesús tandeac aag ayaj taxinguaiw meáwan leaw teajcüyiw majawüw nej. Pero altigüy nipilan tapac omeajtsüw xeyay majawüw meáwan najneajay tarang Teat Jesús.

*Tandeac wüx osaab mostaza*  
(Mt. 13:31-32; Mr. 4:30-32)

<sup>18</sup> Condom Teat Jesús tasaj nejiw:

—¿Nguineay alndom nasaj icon cuane atnej ajlüy micambaj Teat Dios, ngwüy cuane

wüx alndom nandeac naquiaach icon wüx, mejawana?

<sup>19</sup> Ajlüy atnej arang osaab mostaza wüx nop naxey apmapiür tüül micorrül nej. Cos apmadam apmatnej nadam xiül; quiec alndom marangüw ombiümüw wüx mipüüig nej —aw Teat Jesús.

*Tandeac wüx levadura*  
(Mt. 13:33)

<sup>20</sup> Teat Jesús tapiüing alinomb:  
—¿Cua wüx alndom nandeac naquiaach icon mejawan nguineay ajlüy micambaj Teat Dios?

<sup>21</sup> Ajlüy atnej arang levadura, cos wüx nop najtaj apmayac tüül arej nepeax arin, aaga levadura apmüüch maxip ajtsaj marang pan —aw.

*Iriümban tüül quicheech ombeay iüm*  
(Mt. 7:13-14, 21-23)

<sup>22</sup> Teat Jesús tanaámb amb andüy Jerusalén. Tamong tüül nadamdand cambaj, tüül namix cambaj, tanaámb teaquiaach nipilan.

<sup>23</sup> Aljane tatün manguiay nej:  
—Teat ¿ngwa naleaingue, napateay nipi-lan apmawüw wüx asoetiw? —aj.

Quiaj tapiüing Teat Jesús:

<sup>24</sup> —Ipacan wüx, ijmeliün iriümban tüül quicheech niüing ajmeleran. Cos xeyay nipilan apmamiümüw majmeliw, pero ngome apmajmeliw.

<sup>25</sup> Sitiül nateateran lawitiwo mapal a iüm, nganüy icona ngome tejmeliün, condom tapots ipajan mepiügan: “Teat, teat, ileaig a iüm najmeliün”, merajan. Nej apmasaj icon: “Ngo najaw jane icon, nguiane neri-owan”, apmaj icon.

<sup>26</sup> Icona quiaj apmesajan: “Xicona tete-san, tanganeowasan naquiüjpan ic; aton ique tequiaach tüül xecambajan”, apmeraan.

<sup>27</sup> Nej apmapiüing: “Lanasaj icon ngo najaw jane icon, nguiane neriowan. Iriowan ningüy niüing sajlüy monrang ngo majneaj”, apmaj icon.

<sup>28</sup> Quiaj apmejiünts san xeyay, apmenchic-nchiquian ilüiquiün wüx apmejawan teat Abraham, teat Isaac, teat Jacob, at meáwan mondeac andeac Teat Dios aliw tüül micambaj Teat Dios; pero icona ngondom mejmeliün.

<sup>29</sup> Cos aliücwüw imiün nonüt, imiün noleat, imiün calüy, imiün cawac; apchetemoj wüx mes tüül micambaj Teat Dios.

<sup>30</sup> Altiül leaw ayaag chingüy nej nganüy, tüül aaga nüt quiaj apmarang natang; aton altiül leaw ayaag atnej natang nganüy, tüül aaga nüt quiaj apmarang chingüy —aw Teat Jesús.

*Teat Jesús tajiünts majaw moncül*  
*Jerusalén*

(Mt. 23:37-39)

<sup>31</sup> Tüülan aaga nüt quiaj tapeayiw quiaj acas fariseos, tasajüw nej:

—Iriow ningüy, quiür ijaw nguiane apmendiüy cos Herodes teamandiüm mambiy ic —ajüw nej.

<sup>32</sup> Nej tasaj nejjiw:

—Quiüran isajan aaga atnej wiül quiaj: “Xique nganüy teanawün nimeech wüx ombas nipilan, teanamongoch monandeow nganüy at oxep; nawiür landoj xenajiüt”, irajan.

<sup>33</sup> Xique tanaámb netam nandüüb xetiüüd nganüy, oxep, at nawiür, cos nop nendeac andeac Teat Dios ngondom mandeow nguiajantanej, netam matüch Jerusalén.

<sup>34</sup> ¿Jerusalén, Jerusalén! ¿Neol tembiy ajcüwa mondeac andeac Teat Dios? ¿Neol teloxiw leaw Teat Dios tüüch mamb masajüw ic wüx nej? ¿Xique xeyay tandiümas naxej-neng micual, atnej arang noic quit maxej-neng micual nej teombas miolümb nej, pero ngo mendiüm!

<sup>35</sup> Nganüy apmejawan nguineay apmajeat imbiüman. Aton sasaj icon langome apmexoman mejawan xic; naleaing apmejawan xic wüx apmatüch a nüt mepiügan: “Najneajay ajlüy aaga niün, tüüch nej miün Teat Dios”, merawan —aj nejjiw Teat Jesús.

## 14

*Nop naxey apep nej*

<sup>1</sup> Noic nüt axoodaran, Teat Jesús tamb met aniüing nop natang nenajiüt ocueajiw fariseos. Nejjiw teamandacüwiw Teat Jesús sitiül aleaic apmarang.

<sup>2</sup> Alquiaj niüing ajlüy Teat Jesús nop naxey niün andeow, apep nej.

<sup>3</sup> Quiaj Teat Jesús tasaj mondüy wüx aaga poch tüünd Moisés, at ajcüwa fariseos:

—¿Cuane ipiügan, najneaj matajcüch majneaj nop niün andeow wüx noic nüt axoodarana? —aj nejjiw.

<sup>4</sup> Nejjiw ndijchijówan. Condom quiaj Teat Jesús tasap owix a niün andeow, tüüch majneaj, ndoj tasaj mamb.

<sup>5</sup> Condom tandüy wüx masaj nejjiw:

—Jow icona, jondot mejawan miburran, miboyiün lajmiüc tüül lol ¿ngo mewüniünan najénan masey wüx nüt axoodarana? —aj nejjiw.

<sup>6</sup> Nejjiw ngondom mangochiw masajüw nej nicuajind.

*Leawa najpajüw aniüing nengoch owix*

<sup>7</sup> Wüx Teat Jesús tajaw ajcüwa nipilan nguineay ayambyambüw chetemoj niüing chetew netamtamüw nipilan, quiaj tasaj nejjiw nguineay netam marangüw, tapiüing:

8—Wüx apmejpan anüing nop nengoch owix, nde memongon ombas chetemerong quiaj, jondot aliüc alinop aton najpaj quiaj, alwüx atam ngo mat icona.

9 Condom aliüc aaga nepaj icon masaj icon: “Witiüron ninguij cos apchetem aaga alinop cam”, apmaj icon. Quiaj apmexinguian meamban chetemerong niüing ajlüyiw ümb wüx moncheten.

10 Más najneaj, wüx apmejpan niüing nengoch owix, quiüran cheteron mequiüjpan ümb wüx moncheten. Mbich wüx aliüc aaga nepaj icon apmapiüing: “Xeamigo, imongon ombas”, apmaj icon. Quiaj apmapac imeajtsan, apmemongon mequiüjpan tiül leaw namongoj ombas.

11 Cos jangantanej leaw nerangrang adam apmüünd monxing. Pero leaw ayaag nicuajind nej, apmandiüram —aw Teat Jesús.

12 Condom tasaj aaga naxey nepaj nej mamb met aniüing nej:

—Wüx apmerang noic nüeteran nde mepajüw miamigo, micoj, michiüg, icualaats, mivecin leaw nejüür. Cos nejw alndom mandilileaw mapajüw ic alinoic nüt, quiaj apmatotow.

13 Ngwüy, wüx apmeyac nüeteran ipaj leaw nipilan ngo majiür, at leaw necoex, leaw nesomb.

14 Quiaj apmapac imeaats cos nejw ngondom mapajüw ic matotow. Nganüy a ique, Teat Dios apmangüy ic alinoic nüt wüx nej apmapacüch leaw monrang najneaj —aj nej Teat Jesús.

#### *Wüx apmajlüy nadam nüeteran*

15 Nop tiül ajcüw alchetemog wüx mes maquiüjpüw Teat Jesús, tasaj nej:

—Najneajay apmajlüy leaw apmajlüy tiül monet alinoic nüt tiül micambaj Teat Dios —aj.

16 Quiaj Teat Jesús tapiüing:

—Nop naxey tarang noic nadam nüeteran, tapaj xeyay nipilan.

17 Wüx lamatüch majlüy monet, quiaj tasaj mamb aaga nembeol nej masaj leaw lamapaj: “Tabaats, landoj lajmel a nüeteran”, maw.

18 Quiaj meáwan nejw tayambüw nguineay ngo mambüw. Nop tapiüing: “Sangal noic corrül, nganüy netam namb najaw; nde mejcüy teat, naleaing ngondom namb”, aw.

19 Alinop tapiüing: “Sangal acoquiaw mancuerna boy, netam namb najawüw; nde mejcüy teat, naleaing ngondom namb”, aw.

20 Alinop tapiüing: “Lesndot angoch xiwix; naleaing teat, ngondom namb”, aw.

21 Quiaj tandilil aaga nembeol quiaj masaj neneay nden meáwan leawa tasoic. Quiaj tajcüy aaga neneay nden quiaj, tasaj

nej: “Nganüy nganüy quiür tiül cambaj, ipajüw miünüw meáwan nipilan leaw ngo majiür, leaw necoex, leaw ngo majiür owix, leaw nesomb; isajüw miünüw”, aj.

22 Ndoj marang aag ayaj, quiaj tasaj neneay nden: “Teat, lanarang atnej ipiüing, pero naleaing aliün majlüy nüeteran”, aw.

23 Tandüy wüx masaj nej a neneay nden: “Quiür tiül meáwan tiüd, tiül rünc, inetet owixaw miünüw leaw apmexom, para alndom chipiüm saniüing.

24 Cos naleaing sasaj ic, nejinguid leaw sapaj ombas ngome apmiünüw saniüing chetemoj metiw”, aj —aw Teat Jesús.

#### *Minipilan Teat Jesús netam macueatiw cuajantanej*

25 Xeyay nipilan tandüjpiw Teat Jesús; condom nej ndiliteay majaw nejw, tapiüing:

26 —Sitiül aljane andiüm majlüy tiül xenipilan, netam mayac omeaats wüx xic. Nde mayac omeaats wüx miteat nej, mimüm nej, mintaj nej, micual nej, micoj nej, michiüg nej. At ngondom mayac omeaats wüx leaw apmamongoch. Sitiül ngo marang atquiaj ngondom majlüy tiül xenipilan.

27 At sitiül aljane ngo mandiüm mamongoch naél, masey mambiyaran wüx cruz ajcan ayar sandeac, ngondom majlüy tiül xenipilan.

28 ¿Cos jane tiül icona sitiül mandiüm marang nop torre, ngo chetem mayamb omeaats majaw nguítow apmetam nej mandondoche?

29 Jondot lamawitich tiüt marang, condom langdom mandondoch; quiaj nipilan apmajawüw, apmitsojow nej.

30 Apmapiüingüw: “Aaga naxey quiaj iünan mawitich, nganüy lango majiür cuane naag mandondochay”, apmawüw.

31 Ndot nop natang nenajiüt wüx apmajaw apmajlüy montsoj, aliüc alinop natang nenajiüt aqiiüw miün nimiow mil (20,000) soldados, nej ajcánan gajpowüw mil (10,000) ajiür, ¿quia, ngome ombas apchetem mayamb omeaats sitiül alndom mangoch aaga nimiow mil quiaja?

32 Sitiül ajaw ngondom mengoch aweaag, wüxan aliün miünquiaj ajngotoj ajcüwa alinoic ajlüy quiaj, nej apmüüch mamb minipilan nej mayambüw monajneaj.

33 Atquiaj icon sitiül ngo mendiüman mecueatiün leaw almejiüran, ngondom mejlüyiün tiül xenipilan.

#### *Wüx quiniüc larrew*

(Mt. 5:13; Mr. 9:50)

34 Najneaj quiniüc aag ayaj najtix, pero quiniüc lango majtix ¿cuane ajpar, cos nguineay apmajtix alinomb?

35 Ngondom mamb tiül iüt, ngondom ponongom pandiüm marang omeaats iüt,

netam majwich ninguiün. Jane apman-  
guiay aag ayaj, ich mayamb omeaats majaw  
cuane wüx amb apiüing —aw Teat Jesús.

## 15

### *Andeac wüx ndron sap*

(Mt. 18:10-14)

<sup>1</sup> Tatüchiw niüing ajlüy Teat Jesús xeyay  
monrang ngo majneaj; aliw tiül aton mon-  
sap tomiün ocueaj cambaj. Tambüw niüing  
ajlüy Teat Jesús manguiayiw aquiaach nej.

<sup>2</sup> Ajcüwa fariseos, at mondüy wüx  
aaga poch tüünd Moisés tendeadcndecüw,  
tapiüingüw:

—Aaga naxey quiaj aquiüüb tiül monrang  
ngo majneaj, üet aweaag —awüw.

<sup>3</sup> Quiaj Teat Jesús tandeac acas poch  
andüy wüx nejiw, tapiüing:

<sup>4</sup> —¿Jondot aljane tiül icona ajiür acoiç  
miow (100) sap, camüm ndrot ocueaj nop,  
nguineay apmaranga? Apmacueat tiül wa-  
jchiüc ajcüwa peic miow gajpoquiy (99)  
quiaj, cas tamb mayamb aaga ndron ocueaj  
leaw axom.

<sup>5</sup> Wüx apmaxom apmaxaing mapiib wüx  
onic, apac omeaats.

<sup>6</sup> Ndoj, wüx apmapeay aniüing nej ap-  
maxejneng leaw xowüy ajneaj aweaag, at  
moncülan quiaj niüing acül nej, apmasaj:  
“Ndrot xesap, nganüy lanaxom. Ich mapac  
imeajtsan, mapac omeajtsaats”, apmaj.

<sup>7</sup> Naleaing sasaj icon atquiaj apac omeaat-  
saran xeyay tiül cielo wüx nop nerang ngo  
majneaj lalaaw omeaats wüx Teat Dios  
matün ocueaj, ngo matnej peic miow gajpo-  
quiy (99) nipilan leaw ayajcüw ngo ma-  
jiürüw nisoet, apiüingüw ngo metam majpaj  
ocueajiw —aw Teat Jesús.

### *Andeac wüx tomiün leawa ndrot*

<sup>8</sup> Condom tandeac alinoic, tapiüing:

—Jondot nop najtaj ajiür gajpowüw  
tomiün, ndrot ocueaj noic, nguineay  
apmaranga? Apmachen ran majimb tiül  
iüm leaw axom.

<sup>9</sup> Wüx apmaxom apmaxejneng leaw  
xowüy ajneaj aweaag, at moncülan quiaj  
niüing acül nej, apmasaj: “Ndrot noic  
xetomiün, nganüy lanaxom. Ich mapac  
imeajtsan, mapac omeajtsaats”, apmaj.

<sup>10</sup> Naleaing sasaj icon, atquiaj xeyay  
apac omeajtsüw miángeles Teat Dios wüx  
nop nerang ngo majneaj lalaaw omeaats  
matün ocueaj Teat Dios mawün asoet nej  
—aw Teat Jesús.

### *Nop nacualaran nexiül, arang ngo ma- jneaj*

<sup>11</sup> Aton Teat Jesús tandeac alinoic,  
tapiüing:

—Tajlüy nop naxey ajiür ijpüw micual nej.

<sup>12</sup> Aaga chingüy nacualaran tasaj miteat  
nej: “Teat, imbaag nómban, iich xic leaw ap-  
meaach xic”, aj. Miteat nej quiaj tambaag,  
tüüch nejiw mianopnopoç.

<sup>13</sup> Ngome xeyay nüt aaga chingüy quiaj  
taxaing meáwan leawa tüünd. Tamb andüy  
alinoic iüt ninguiün miünquiaj. Quiaj tam-  
bich mandrooch meáwan leaw ajoy mamb  
wüx cuajantanej ngo majneaj.

<sup>14</sup> Condom wüx laümb mandrooch  
meáwan leaw almajiür, tajlüy noic nadam  
lop tiül aaga cambaj quiaj; nej xeyay tind  
üet pero ngo majiür cuane apmayar.

<sup>15</sup> Quiaj mbiüijlat wüx ayamb arang najiüt.  
Tamb majaw nop naxey tiül aaga iüt quiaj;  
tüüch nej mamb tiül mirrunch nej mejiür  
sow.

<sup>16</sup> Quiaj tind müet üet sow, cos nejingüind  
ngo müüch nej üet.

<sup>17</sup> Quiaj leaad omeaats, tapiüing nejáyan  
quiaj: “¡Xetead almajiür xeyay monrang  
najiüt, nenaw ocueajiw nejiw nóteran;  
nganüy a xique teasandeow lop ningüy!

<sup>18</sup> Leaw sanarang, sanandilil alinomb  
sandüy niüing ajlüy xetead. Sanasaj: Teat,  
lanarang xeyay ngo majneaj leaw ngo  
mandiüm Teat Dios, at ique ngo mendiüm.

<sup>19</sup> Nde meyac xic tiül mepiüing micual xic.  
Ngwüy, iyac xic atnej nop nerang minajiüt,  
sanaj”, aw.

<sup>20</sup> Condom quiaj taw quiaj, tandilil andüy  
aniüing miteat nej.

‘Aliücan ninguiün majaw nej miteat nej,  
xeyay tapac omeaats majaw nej. Acuiür  
tamb mangoç nej mapeiquic nej onic,  
majend nej omal.

<sup>21</sup> Andüüb miün tasaj miteat nej: “Teat,  
lanarang xeyay ngo majneaj leaw ngo  
mandiüm Teat Dios, ata ique ngo mendiüm.  
Nganüy nde meyac xic tiül mepiüing micual  
xic”, aj.

<sup>22</sup> Quiaj miteat nej tasaj monrang mina-  
jiüt nej: “Iyamban leaw najneaj napixeran  
ijchan masooig, aton noic iquial owixeran,  
at ijchan masooig najneaj napajaran.

<sup>23</sup> ¡Quiüran ijanan miün aaga naxip  
quicheech wacüx; imbiyan matsambaats  
marangaats nangos nüt!

<sup>24</sup> Cos aaga xecual cam landoj lanapiüing  
landeow, nganüy lanaxom almapac.  
Tapiüingas landoj laámb, nganüy lapeay”, aj  
nejiw. Quiaj tapots apac omeajtsüw ajlüy  
nangos nüt.

<sup>25</sup> ‘Aaga alinop natang micual nej al-  
tiül corrül nganaw mapeay. Wüx nganaw  
matüch aniüing nej, tanguiay tengual ajlüy  
nangos nüt, at monjiüing.

<sup>26</sup> Quiaj tapaj nop nerang minajiüt miteat  
nej, tatün manguiay cuane najlüy.

<sup>27</sup> Quiaj tasaj nej: “Michiig lapeay, miteat  
tapiüing mandeow aaga quicheech wacüx

naxip tiül, cos apac omeaats lapeay michiig napac najneájan”, aj nej aaga nerang najiüt.

<sup>28</sup> Quiaj tajcüy aaga natang quiaj, ngo mandüüm majmel tindén. Quiaj taw miteat nej mawüywüy nej majmel.

<sup>29</sup> Ndoj nej quiaj tasaj miteat nej: “Xique xeyay neat lanarang minajiüt, ngome áag narang adam ximeaats. Wül meaach xic masey nop nine teants nambiy natsamb anaag xeamigos.

<sup>30</sup> Nganüy wüx apeay aaga micual quiaj, nej lamambich mandrooch wüx montaj meáwan leawa teaach; pero ique lamembiy aaga naxip wacüx mengoch ombas”, aj nej.

<sup>31</sup> Quiaj tasaj nej miteat nej: “Xecual, ique meáwan nüt ilningüy mequiiüb xic. Meáwan leawa alnajiüt, aag ayaj landoj ineay.

<sup>32</sup> Nganüy netam marangaats nangos nüt mapac omeajtsaats, cos aaga michiig cam landoj lanapiüng landeow, nganüy lanaxom almapac. Tapiüngas landoj laámb, nganüy lapeay”, aj nej miteat nej —aw Teat Jesús.

## 16

*Tandeac wüx nop minatang nerang najiüt*

<sup>1</sup> Condom Teat Jesús tasaj minipilan nej aton:

—Tajlüy nop naxey nejüür xeyay, ajiür nop minatang nerang minajiüt nej. Aaga nerang najiüt quiaj tajmel asoet; tapiüngüw nej androochndróochan ocueaj neneay najiüt.

<sup>2</sup> Condom neneay najiüt tapaj masaj nej: “Lananguiay tengual irang ngo majneaj. Nganüy apmeaach xic meáwan leaw altiül iwix, cos ninguiay ndoj süüch ic najiüt”, aj nej.

<sup>3</sup> Condom aaga naxey quiaj tapiüng nejáyan quiaj: “Jow nganüy nguineay sanarang, cos neneay najiüt langome apmüüch xic najiüt. Xique ngondom ximbas satox iüt; at saxing namb satüneay.

<sup>4</sup> Lanajaw nguineay sanarang para alndom najiür amigo niüng alndom namb wüx lasajwan tiül xenajiüt”, aw.

<sup>5</sup> Condom quiaj tapaj anopnopo leawa nejüch neneay najiüt. Tatün manguiay nop: “¿Nguitow ijüch neneay najiüta?”, aj.

<sup>6</sup> Quiaj tapiüng: “Coic miow (100) ngan aceite”, aw. Quiaj tasaj: “Cheter, jogüy minawiig, irang alinoic, iyac áagan ic miow gajpowüw (50)”, aj.

<sup>7</sup> Condom tasaj alinop: “¿Jow ique, nguitow ijüch?” aj. Quiaj tasaj nej: “Coic miow (100) nepeax trigo”, aj nej. Quiaj tasaj: “Jogüy minawiig, irang alinoic, iyac áagan peic miow (80)”, aj.

<sup>8</sup> Condom quiaj aaga neneay najiüt talomb aaga naxey nerang ngo majneaj

quiaj cos taxom omeaats mayamb nguineay apmajlüy alinoic nüt. Nipilan tiül aaga nüt cam xeyay axomüw omeajtsüw marangüw cuajantanej. Pero ajcüw monyamb Teat Dios ngo mayacüw omeajtsüw wüx maxomüw xeyay cuajantanej ningüy wüx iüt.

<sup>9</sup> Nganüy sasaj icon: Netam mexoman imeajtsan wüx nguineay apmerangan wüx cuajantanej leaw ijiüran wüx aliün mepacan ningüy wüx aaga ngo majneaj iüt cam, pero ngome atnej tarang aaga naxey quiaj. Pues netam mejüüran amigos leaw apmambe-olüw icon wüx laámb meáwan leaw ijiüran. Ndoj apmejlüyün najneaj tiül cielo meáwan nüt.

<sup>10</sup> Cos leaw nerang najneaj wüx cuajantanej, masey wüx noic nine najiüt, atan-quiaj apmarang wüx noic nadam najiüt aton. Leaw arang ngo majneaj wüx noic nine najiüt, wüx noic nadam najiüt aton ngo majneaj apmarang.

<sup>11</sup> Sitiül icona ngo merangan najneaj wüx leaw almejiüran ningüy wüx iüt, ¿nguineay apmerangan najneaj wüx leawa más xeyay netam, aag ayaj wüx minajiüt Teat Dios?

<sup>12</sup> Sitiül ngo merangan najneaj wüx ocueaj alinop, ¿jane apmeech icon mejüüran ineayiüna?

<sup>13</sup> Nejingüind nerang najiüt ngondom marang minajiüt ijpüw monxey nóiquian, cos ndot apmandiüm marang leaw apiüng nop, ngome apmarang leaw apiüng alinop. Tengwüy xeyay mandüüm mandüüb nop, quiaj ngome apmandüüb wüx leaw apiüng alinop. Atquiaj ajlüy, nómban ngondom mendüüb Teat Dios sitiül meyac imeaats wüx xeyay tomiün aton —aj nejiw Teat Jesús.

<sup>14</sup> Ajcüwa fariseos wüx tanguiayiw aag ayaj, itsojayéjan Teat Jesús cos nejiw xowüy andiümdüümw tomiün.

<sup>15</sup> Quiaj tasaj nejiw Teat Jesús:

—Icona ipiüangan najneaj irangan, pero irangánan majaw icon nipilan. Nganüy Teat Dios lamajaw nguineay imeajtsan. Cos meáwan leawa nipilan ayajcüw más netam, Teat Dios ngo mind majaw aag ayaj.

*Aaga poch tüünd Moisés tan ajlüy*

<sup>16</sup> Aaga poch tüünd Moisés, at leawa tandeacüw mondeac andeac Teat Dios ajlüyiw leaw tapeay aaga Juan neech yow nipilan. Naw quiaj ajmel anderac wüx aaga najnejay cambaj ocueaj Teat Dios. Nganüy meáwan nipilan tengual mayambüw nguineay majmeliw tiül.

<sup>17</sup> Ngo maél ndrom ombas a cielo ndrom ombas a iüt, ngo matnej aél majcueat noic nine letra tiül Mipoch Teat Dios.

*Teat Jesús apiüng wüx moncueateay (Mt. 19:1-12; Mr. 10:1-12)*



<sup>18</sup> Sitiül nop naxey macueat mintaj nej maquiüüb alinop, aaga naxey quiaj ajiür xeyay nisoet. At jane apmaquiüüb nop naxey najtaj ajiür xeyay nisoet —aj nejw Teat Jesús.

*Andeac wüx Lázaro, at wüx nop nejür xeyay*

<sup>19</sup> Condom Teat Jesús tapiüng alinoic:

—Tajlüy nop naxey ajiür xeyay tomiün, asoog najnejay apix nej. Meáwan nüt ajlüy monet, ajlüy atnej nadam nangos nüt aniüng nej.

<sup>20</sup> At aton tajlüy nop naxey netüney nenüt Lázaro. Xeyay necoy axom nej, lamambich nej ombas. Nej mbójan amb mayacüw chetem mbeay minden a naxey nejür quiaj.

<sup>21</sup> Aaga netüney quiaj malüy apiüng alndom mamilmil müet leawa najmiüc tiüt teoleaj mimes a naxey nejür quiaj. Pet ambüw malüpiw minecoy nej.

<sup>22</sup> Noic nüt aaga pobre Lázaro tandeow. Quiaj ángeles taquiüüpüw nej mamb andüy niüng ajlüy teat Abraham. Condom aaga nejür quiaj, tandeow aton, ndoj tamiüraad.

<sup>23</sup> Aaga naxey nejür quiaj tapeay tiül Hades niüng ambüw mondeow, teamamongoch xeyay ngo majneaj. Condom quiaj taxaing omal majaw miünquiaj; quiaj tajaw a Lázaro najnejay ajlüy almaquiüüb Teat Xan Abraham.

<sup>24</sup> Quiaj tendeac napac tapiüng: “¡Teat Abraham, ijiür xic lasta teat! Isaj a Lázaro maxec tiül yow micual owix nej, miün matequeech wüx xeniw mendeyndey, cos langondom, xeyay necoy teamamongoch tiül aaga biümb cam”, aw.

<sup>25</sup> Quiaj Abraham tasaj nej: “Xecual, ich leaam imeaats nguineay tajneaj ijlüy wüx iüt, tejür meáwan leawa tendiün; pero a Lázaro ngo majneaj tamongoch. Nganüy nej najnejay ajlüy ningüy, ique atüch ic memongoch aaga ngo majneaj quiaj.

<sup>26</sup> At ajiür noic niüng angochay najal andüy tiüt naw ningüy andüy quiaj, ngondom mamongaran andüy niüng ijlüyiün; at imiün ninguiaj ngondom mamongaran andüy ningüy”, aj nej.

<sup>27</sup> Quiaj tasaj nej a naxey: “Teat Abraham, satün icueaj teat, isaj a Lázaro mamb aniüng xeteat.

<sup>28</sup> Cos alnajiür acoquiaw xechiig, sandiüm mamb masaj mayambüw Teat Dios; quiaj nejw ngome aliücüw ningüy alinoic nüt tiül aaga biümb cam”, aj nej.

<sup>29</sup> Condom tasaj nej teat Abraham: “Alquiaj almajiürüw aaga poch tüünd teat Moisés, at leawa tarangüw mondeac andeac Teat Dios. Ág ich manguiayiw”, aj nej.

<sup>30</sup> Quiaj tapiüng a naxey: “Ngwüy Teat Abraham, ngome apmanguiayiw. Pero

sitiül aljane mamb niüng ajlüyiw nejw imiün tiül mondeow, quiaj nejw apleaam omeajtsüw wüx Teat Dios”, aw.

<sup>31</sup> Teat Abraham tasaj nej: “Sitiül ngo marangüw leawa tapiüng teat Moisés, tengwüy ngo mayariw leawa tandeacüw ajcüwa mondeac andeac Teat Dios, masey mamb nop imiün tiül mondeow ngome apmayariw andeac”, aj nej —aw Teat Jesús.

## 17

*Nde meyacüchiün wüx ngo majneaj (Mt. 18:6-7, 21-22; Mr. 9:42)*

<sup>1</sup> Condom Teat Jesús tasaj minipilan nej:

—Meáwan nüt apmajlüy leaw andiüm mayac icon wüx merangan ngo majneaj. Pero, ¡xeyay ngo majneaj apmamongoch leaw apmayac wüx alinop marang ngo majneaj!

<sup>2</sup> Najneaj maelich teonic nej nop cow majlos tiül ndec, wüxan nganaw mayac wüx marang ngo majneaj nop leaw jayats mayar sandeac.

<sup>3</sup> Netam mejawan nguineay apmerangan tiül icona.

‘Sitiül aljane apmarang ngo majneaj wüx imbas, ipaj ocueaj. Sitiül nej leaad omeaats wüx aaga ngo majneaj tarang quiaj, matün perdon, pues iwün wüx imeaats leawa tarang.

<sup>4</sup> Jondot nop apmandeac wüx imbas ngo majneaj ayaiw andeac tiül noic nüt, ndoj tatün icueaj ayaiw atün mewün wüx imeaats aaga ngo majneaj lamandeac wüx imbas, ique netam mewün wüx imeaats nguitówan quiaj —aj nejw Teat Jesús.

*Netam mayacüch omeaatsaran wüx Teat Dios*

<sup>5</sup> Condom miapóstoles nej Teat Jesús tasajüw nej:

—Teat, imbeol xicon naleaing nayacan ximeajtsan más wüx Teat Dios —ajüw nej.

<sup>6</sup> Quiaj tasaj nejw Teat Jesús:

—Sitiül icona iyacan imeajtsan wüx Teat Dios masey iyajcan nepateayiün alndom merangan, atnej apateay osaab mostaza, apndom mesajan aaga xiül sicóromo quiaj: “Lojquiür, quiür piürar tiül ndec”, merajan, atquiaj apmajlüy —aj nejw.

*Nguineay netam marang nop nerang najiüt*

<sup>7</sup> Aton tasaj nejw Teat Jesús:

—Jane nop tiül icona ajiür minerang najiüt nej nechüüt iüt, tengwüy nejür wacüx, wüx apmapeay arang najiüt aaga nerang najiüt quiaj, apmasaj: “Imong, cheter, iret”, maj.

<sup>8</sup> Sapiüng ngwüy, ingow asaj aag ayaj apmasaj: “Irang süet, iyac mes. Leaw ndoj süet sanganeow ndoj teret a ique”, apmaj.

<sup>9</sup>Ngwüy ¿netam masaja: “Dios mangüy ic”, apmaj, ajcan arang leaw netam maranga? ¡Ngwüy!

<sup>10</sup>Atquiaj wüx icona aton, wüx lamerangan leawa Teat Dios lamapiüng merangan, netam meyajcan ngome alngün xeyay najneaj terangan, cos terangan áagan leaw atüch icon merangan —aj nejiw Teat Jesús.

*Gajpowüw monxey axom nejiw napat monandeow nasoiç lepra*

<sup>11</sup>Teat Jesús tanaám amb andüy Jerusalén, tamong niüng angochay iüt ocueaj Samaria maquiüüb Galilea.

<sup>12</sup>Wüx tapeay tiül noic nine cambaj, quiaj tambüw mangochiw nej gajpowüw monxey axom nejiw napat monandeow nenüt lepra. Miünquiajan lombojow ngo matüchiw nej.

<sup>13</sup>Tepajüw napaç, tapiüngüw:

—¡Teat Jesús, Teat Naxey! ¡Ijiür xicon lasta! —awüw.

<sup>14</sup>Wüx Teat Jesús tajaw nejiw, quiaj tasaj:

—Quiüran, ijchan majaw icon miteaats ocueajiüts —aj nejiw.

Quiaj tambüw, condom wüxan tenguaial ajüyiw, quiaj tayajcüw lajneajiw, nómban ndroj a necoy.

<sup>15</sup>Condom nop nejiw wüx tajaw lajneaj, andilülan tiüt tamb, apac omeaats, teamandeaç wüx leawa lamarang Teat Dios.

<sup>16</sup>Taquiëel micos nej mequiet tiüt niüng ajlüy Teat Jesús masaj Dios mangüy nej. Aaga naxey quiaj naw Samaria.

<sup>17</sup>Condom Teat Jesús tapiüng:

—Neol, sayaag gajpowüw lajneaj iün andeowüw. ¿Jow al ojquiyey, wüliwe?

<sup>18</sup>¿Neol ngo majlüy alinop tiül nejiw miün müüch gracias Teat Dios; neol áagan a napeay miün naxey cama? —aw Teat Jesús.

<sup>19</sup>Condom quiaj tasaj aaga naxey:

—Witiür quiür, nganüy lerneaj cos teyar sandeaç —aj nej Teat Jesús.

*Nguineay apmajlüy minipilan Teat Dios (Mt. 24:23-28, 36-41)*

<sup>20</sup>Condom fariseos tatüniw manguiayiw Teat Jesús, tasajüw:

—¿Ngow ipiüng apmajlüy ningüy micambaj Teat Dios, aaga nüt wüx nejay Teat Dios apmajlüy wüx minipilan neje? —ajüw nej.

Quiaj tasaj nejiw:

—Wüx Teat Dios apmayac ningüy micambaj nej, aag ayaj ngondom maxoram marjaraw.

<sup>21</sup>Ngondom mapiürang wüx: “Jögüy”, tengwüy mapiürang: “Jofün”, cos micambaj Teat Dios lajlüy tiül icona —aj nejiw Teat Jesús.

<sup>22</sup>Condom tasaj minipilan nej:

—Aliüç miün nüt apmendiüman mejawan masey noic nüt tiül aaga nüt wüx Teat Naxey lajlüy wüx micambaj nej; pero ngome apmejawan.

<sup>23</sup>Apmawaijchaw icon mapiüngüw: “Jögüy a Teat Naxey”, tengwüy: “Jofün.” Icona nde meamban mendüjpiün.

<sup>24</sup>Alinoic nüt wüx Teat Naxey aliüç apmajüç, cos apmajlüy atnej noic najlip wüx ajlipiich ngondom mexotüy, nómban arraj nguiajantanej.

<sup>25</sup>Pero naleaing ombas netam mamongoch xeyay ngo majneaj, majcüy majaw nej nipilan najlüy nganüy cam.

<sup>26</sup>Aaga nüt wüx aliüç Teat Naxey apmajlüy atnej tajlüy tanomb wüx almapac Noé.

<sup>27</sup>Nipilan ngo meteotsüw wüx; netiw nanganeowüw, angoch owixaw atnej ajlüyay marangüw. Wüx tatüch aaga nüt wüx Noé tajmel tiül nadam müx; quiaj tajngot a yow, tandrooch nej ombasüw meáwan.

<sup>28</sup>Aton atnej tajlüy tanomb wüx almapac a Lot, nipilan aton ngo meteotsüw wüx; cos netiw, nanganeowüw, nengalayey, nenüübayej, nepiürüw, arangüw ombiümüw.

<sup>29</sup>Wüx taw quiaj a Lot tiül cambaj Sodoma tajmiüç biümb, at azufre imiün tiül cielo atnej ajoet. Quiaj tandrooch ombas meáwan leaw almajlüy tiül aaga cambaj quiaj.

<sup>30</sup>Atnej wüx aaga nüt quiaj ngome teateotsaran wüx nicuajind, atquiaj apmajlüy wüx a nüt aliüç Teat Naxey.

<sup>31</sup>Wüx aaga nüt quiaj sitiül aljane ngo majlüy aniüng nej, nde majmel mawün leaw almajiür tiül iüm. Sitiül aljane altiül corrül, nde mandilil andüy aniüng nej.

<sup>32</sup>Ich leaam imeajtsan nguineay tarang mintaj a Lot.

<sup>33</sup>Sitiül aljane ngo mayar sandeaç cos imbol mambiyaw nej nipilan, wüx apmandeow apmamongoch xeyay ngo majneaj, ngome apmamb tiül cielo. Nganüy sitiül aljane ngo mapiüng wüx masey mandeow cos ayar sandeaç, nej alinoic nüt apmajlüy xeyay najneaj tiül cielo.

<sup>34</sup>Aton sasaj icon, wüx aaga ongwiiüts quiaj ijpüw almameayiw wüx noic mats, nop apxaijnguiam, alinop apmajcuaeatan.

<sup>35</sup>Átan apmajlüy ijpüw montaj teanchiülüw nóiquian, nop apxaijnguiam, alinop apmajcuaeatan.

<sup>36</sup>Ijpüw monxey tearangüw najiüt tiül corrül, nop apxaijnguiam, alinop apmajcuaeatan —aj nejiw Teat Jesús.

<sup>37</sup>Wüx tanguiayiw aag ayaj minipilan nej, quiaj tasajüw nej:

—Teat ¿nguiane apmajlüy aag ayaja? —ajüw nej.

Quiaj tasaj nejiw:

—Niüng ajlüy nop nandeow, quiaj apsonongom a potwit —aj nejiw Teat Jesús.

## 18

*Nop lemben omal najtaj y nop juez*

<sup>1</sup> Condom Teat Jesús tasaj nejiw alacas poch ngome aleaing miün, cos tandiüm müüch leaam omeajtsüw nguineay netam mandeacüw maquiüjpüw Teat Dios, mata-jcöw orar meáwan nüt nde paxiüm.

<sup>2</sup> Quiaj tapiüing:

—Tajlüy noic cambaj, ajlüy quiaj nop nejaw wüx asoeteran, ngo majiür lasta nipilan, at ngo mimbol mandüy Teat Dios.

<sup>3</sup> Tiül aaga cambaj quiaj alquiaj nop najtaj lemben omal, lambójan amb quiaj masaj aaga naxey mandondoch noic moncüy.

<sup>4</sup> Pero aaga naxey quiaj ngo mandiüm. Ndóiwüx tapiüing nejáyan quiaj: “Masey ngo najiür lasta nipilan, aton ngo nimbol nandüy Teat Dios;

<sup>5</sup> nganüy sanarang leaw netam wüx mimoncüy aaga lemben omal najtaj quiaj, wüxan nganaw müüch xic najcüy cos oleajleájan ningü”, —aw.

<sup>6</sup> Quiaj tapiüing Teat Jesús:

—Inguiayiün nguineay tapiüing aaga ngo majneaj nejaw wüx asoeteran quiaj.

<sup>7</sup> ¿Jow icona cuane ipiüingana? ¿Jow Teat Dios ngondom mambeol leaw monyamb neje, montüm nej ocueaj nüt ongwiiütsa? ¿Ngwüy ipiüingana nequiy mambeol nejawe?

<sup>8</sup> Xique sasaj icon, nej ngome apmequiy mambeol nejw. Jow wüx aliüc Teat Naxey, ¿quia apmaxom wüx iüt nipilan leaw aliün mayacüw omeajtsüw wüx neje? —aw Teat Jesús.

*Jesús tandeac wüx nop fariseo, at wüx nop nesap tomiün*

<sup>9</sup> Condom tandeac alinoic poch Teat Jesús manguiayiw leaw apiüingüw nejiw xeyay najneaj arangüw, ngo matnejw jangantanej nipilan. Tapiüing:

<sup>10</sup> —Tajlüy ijpüw monxey, nop fariseo, alinop nesap mitomiün cambaj. Tambüw tiül nadam nangaj iüm metajcüw orar.

<sup>11</sup> Aaga fariseo wüx tataag orar, lombójan, atcüy tapiüing: “Süüch ic gracias Teat Dios, cos xique ngo mat xic jangantanej nipilan leaw moneed, monrang ngo majneaj, monjiür pálwüx montaj; aton ngo mat xic aaga nesap mitomiün cambaj quiaj.

<sup>12</sup> Xique saüünd ijbüw tiül noic seman; aton sayac xehech aaga diezmo naw tiül meáwan leawa saxom”, aw.

<sup>13</sup> Nganüy aaga nesap mitomiün cambaj miünquiajan lembej, ngo mandiüm maxaing omal majaw cawüx, atoltol mal miüünd nej, tapiüing: “¡Teat Dios, xique nerangas ngo majneaj, ijiür xic lasta Teat!” aw.

<sup>14</sup> Xique sasaj icon aaga naxey nesap mitomiün cambaj quiaj, apmajtsor najneajay omeaats cos Teat Dios tanguiy nej andeac. Nganüy aaga fariseo ngwüy. Atquiaj ajlüy cos jane nelombojchay, nicuajind nej, apamongoch monxing. Nganüy jane ayaag

nicuajind nej, Teat Dios apmapiüing, najneajay arang —aw Teat Jesús.

*Taquiüraab mamb namix nine majawüw Teat Jesús*

(Mt. 19:13-15; Mr. 10:13-16)

<sup>15</sup> Condom taquiüraab niüing ajlüy Teat Jesús tegüy namix nine matepeayiw nej majend nej omalüw. Minipilan nej wüx tajawüw aag ayaj, tapots maliquiaw monquiüb namix nine.

<sup>16</sup> Quiaj Teat Jesús tapaj minipilan nej masaj:

—Ijchan miünüw a namix nine niüing sajlüy, nde mepalan. Jangantanej apmajmel tiül micambaj Teat Dios netam majlüy atnej ajcüwa namix nine cam.

<sup>17</sup> Naleaing sasaj icon jane andiüm majmel tiül micambaj Teat Dios, sitiül ngo mandiüm marang atnej nop nine, nómban ngondom majlüy tiül —aj nejiw Teat Jesús.

*Nop nejüür xeyay tomiün tandeac aweaag Teat Jesús*

(Mt. 19:16-30; Mr. 10:17-31)

<sup>18</sup> Nop nenajiüt tiül judíos tatün manguiay Teat Jesús, tasaj:

—Teat, sawaw ique najneaj irang. Nganüy isaj xic Teat, ¿cuane netam narang, nguineay alndom napac meáwan nüt tiül cielo? —aj.

<sup>19</sup> Quiaj tasaj nej Teat Jesús:

—¿Neol tepiüing xique nerangas najneaja? Nejinguind nipilan ngo marang najneaj; áagan Teat Dios arang najneaj.

<sup>20</sup> Ique lamenguiay leaw andiüm Teat Dios, cos apiüing: “Nde mejiür minajtaj; nde membiy nipilan; nde merneed; nde merwaiich; iyar andeac miteat, mimüm” —aj nej Teat Jesús.

<sup>21</sup> Quiaj tasaj nej aaga naxey quiaj:

—Teat, meáwan aag ayaj sayac wüx ximeaats nde sajngot miün —aj nej.

<sup>22</sup> Wüx tanguiy aag ayaj Teat Jesús, quiaj tasaj:

—Alünan alinoic nganaw merang. Quiür inüüb leaw almejiür, condom imbaag ombeat meach leawa nipilan ngo majiür, quiaj apmejiür tiül cielo xeyay nembeatm-beat, ndoj tewiün mendüüb xic —aj.

<sup>23</sup> Aaga naxey wüx tanguiy aag ayaj ngo majneaj mayaag, tamix omeaats, ngo mandiüm mandrooch ombas leaw ajiür, cos nop nej nejüür xeyay.

<sup>24</sup> Wüx Teat Jesús tajaw amix omeaats aaga naxey, quiaj tapiüing:

—¡Xowüy laél majmeliw tiül micambaj Teat Dios ajcüwa monjiür xeyay!

<sup>25</sup> Más ngo maél nop camello mamong amb tiül owil nots ndiüc, ngo matnej aél ocueajiw a nipilan monjiür majmeliw tiül micambaj Teat Dios —aw.

<sup>26</sup> Meáwan leawa tanguiyiw aag ayaj tapiüingüw:

—Sitiül atquiaj ajlüy, ¿jane alndom maw wüx asoet neje? —awüw.

<sup>27</sup> Quiaj tasaj nejiw Teat Jesús:

—Leaw nipilan nómban ngondom marang, Teat Dios alndom marang —aj nejiw.

<sup>28</sup> Condom tasaj nej teat Pedro:

—Teat, xicona tacueatasan meáwan leaw tajiürasan para nandüjpiün ic —aj nej.

<sup>29</sup> Quiaj tasaj nejiw Teat Jesús:

—Naleaing sasaj icon, ngo majlüy ne-jinguind macueat aniüng nej, miteat nej, mimüm nej, micoj nej, michiüg nej, mintaj nej, micual nej, para majlüy tiül micambaj Teat Dios,

<sup>30</sup> leaw ngome apmüünd majiür alinomb meáwan leawa tacueat ningüy wüx aaga iüt cam, at alinoic nüt apmüünd mapac meáwan nüt tiül cielo —aj nej.

*Tandüy wüx mapiüng apmambiyaran*  
(Mt. 20:17-19; Mr. 10:32-34)

<sup>31</sup> Condom Teat Jesús tawün ninguiün qiriw ajcüwa gajpiüp minipilan nej, tasaj: —Nganüy tabaats matüchiiüts Jerusalén. Quiaj apmajlüy atnej lamapiüngüw mondeac andeac Teat Dios nguineay apmarangüch wüx ombas a Teat Naxey.

<sup>32</sup> Cos apmayacüch teowixaw napeay miün nipilan; apmitsojow nej mandeacüw ngo majneaj wüx ombas; apmateontsüw wüx ombas nej onts ombeayiw nejiw.

<sup>33</sup> Apmatoliw, condom apmambiyaw nej nómban. Ndoj, wüx er nüt apmapac alinomb —aj nejiw Teat Jesús.

<sup>34</sup> Pero nejiw ngo maxomüw omeajtsüw wüx aag ayaj, ngo majawüw cuane wüx amb apiüng; cos ngo müjndiw majawüw.

*Teat Jesús tüüch majneaj nop somb tiül Jericó*

(Mt. 20:29-34; Mr. 10:46-52)

<sup>35</sup> Teat Jesús wüx laliüc mapeay tiül cambaj Jericó, alquiaj nop naxey nesomb alchetem mbeay tiüd teatüney.

<sup>36</sup> Aaga naxey quiaj wüx tanguiay xeyay nipilan teamong, quiaj tatün manguiay cuane najlüy.

<sup>37</sup> Quiaj tasoic Teat Jesús naw Nazaret namong amb quiaj.

<sup>38</sup> Condom tepaj napac:

—¡Teat Jesús, micual David, ijiür xic lasta! —aw.

<sup>39</sup> Quiaj taliqiuaw nej leaw monmong ombas, macueat apaj. Pero nej tayac wüx alquiriw apaj, tapiüng:

—¡Micual David, ijiür xic lasta! —aw.

<sup>40</sup> Quiaj Teat Jesús lembet, tapiüng mamb majanüch aaga naxey quiaj. Wüx tapeay niüng ajlüy nej, tatün manguiay, tasaj:

<sup>41</sup> —¿Cuane ipiüng, teat? —aj.

Quiaj tasaj nej aaga naxey:

—Teat, sandiüm meeach majneaj xiniüg, sandiüm naxom najaw —aj nej.

<sup>42</sup> Quiaj tasaj nej Teat Jesús:

—Nganüy apmexom mejaw; lerneaj cos teyac imeaats wüx xique —aj nej.

<sup>43</sup> Andüüban rat oniüg, condom tandiüb mamb Teat Jesús, tüüch gracias Teat Dios. At meáwan nipilan wüx tajawüw aag ayaj tandeacüw najneaj wüx Teat Dios aton.

## 19

*Zaqueo tandiüm majaw Teat Jesús*

<sup>1</sup> Condom Teat Jesús tapeay Jericó, tamong amb tiül cambaj.

<sup>2</sup> Alquiaj nop naxey nejiür xeyay tomiün, nenüt Zaqueo, minatang ocueajiw monsap mitomiün cambaj.

<sup>3</sup> Aaga Zaqueo quiaj andiüm matüch niüng ajlüy Teat Jesús majaw. Pero ngondom cos tequech oleaj, aton cos xeyay nipilan alquiaj.

<sup>4</sup> Leawa tarang, tecuiür tamong ombas, tajtep noic owil xiül nenüt sicómoro para maxom majaw, cos Teat Jesús netam mamong amb quiaj.

<sup>5</sup> Wüx tatüch quiaj Teat Jesús, taxaing omal majaw cawüx. Tajaw a Zaqueo, quiaj tasaj:

—¡Zaqueo! ¡Erngualeateay, iriow tiüt! Cos nganüy netam naxood iniüng —aj.

<sup>6</sup> Almanguaiy aag ayaj a Zaqueo, ajchícan tiüt tamb mangoch Teat Jesús, apac omeaats.

<sup>7</sup> Meáwan nipilan wüx tajawüw aag ayaj tapots andeacndeacüw wüx. Tapiüngüw Teat Jesús laámb maxood aniüng nop nerang xeyay ngo majneaj.

<sup>8</sup> Pero Zaqueo witiüt lembem masaj Teat Jesús:

—Nganüy Teat, leaw alnajiür sanawün pinawan nüüch leawa ngo majiür; at sitiül aljane aleaic lanayar ocueaj wüx sawaiüch, nganüy sanandilil nüüch alapiquiw atow nej sayar —aj.

<sup>9</sup> Quiaj tapiüng Teat Jesús:

—Wüx aag ayaj ajüiquich nej laáw wüx asoet, cos aaga naxey cam aton nop micual mixejchiiüts Abraham.

<sup>10</sup> Teat Naxey iün mayamb meáwan nipilan mawün wüx asoetiw leawa landrojow tiül arangüw ngo majneaj —aw Teat Jesús.

*Gajpowüw monrang najiüt tüjndiw tomiün*

(Mt. 25:14-30)

<sup>11</sup> Wüx laliüc mapeayiw Jerusalén, quiaj Teat Jesús tandeac alinoic poch masaj ajcüwa nipilan quiaj müüch nejiw majawüw ngome laliüc matüch aaga nüt wüx Teat Dios apmajlüy wüx micambaj nej.

<sup>12</sup> Condom tasaj nejiw:

—Tajlüy nop naxey netamtam ajlüy niplan, tamb tiül noic cambaj miünquiaj mayar minajiüt nej marang natang nenajiüt, cas tandilil.

<sup>13</sup> Wüxan nganaw mamb, tapaj gajpowüw monrang minajiüt nej. Tüüch anopnopo noic tomiün xeyay nembeat, ndoj tasaj nej: “Iyamban nguineay alndom mexoman wüx alquiriw aaga tomiün cam, ndoj apmeajchiün xic leaw sapeay”, aj nejw.

<sup>14</sup> Ajcüwa nipilan micual miüt nej ngo mandüümüw, ajcüyiw majawüw nej. Áag tujúchiw mamb noic ajlüy nipilan mapiüngüw ngo mandüümüw aaga naxey quiaj marang natang nenajiüt tiül nejw.

<sup>15</sup> Masey atquiaj tarangüw, aaga naxey tayar minajiüt nej. Ndoj tandilil andüy tiül miüt nej. Wüx lapeay, quiaj tapaj monrang minajiüt nej leawa tüüch tomiün, majaw nguitow lamaxomüw wüx anopnopo.

<sup>16</sup> Aaga ombas mapeay tasaj nej: “Teat, jogüy mitomiün, lanaxom wüx algajpowüw”, aj nej.

<sup>17</sup> Quiaj tasaj nej aaga natang nenajiüt: “Najneajay terang cos terang leaw sapiüng; masey napateay süüch ic, ique teyamb nguineay mexom wüx alquiriw. Nganüy sanüüch ic mejlüy wüx gajpowüw cambaj”, aj nej.

<sup>18</sup> Condom wüx tapeay alinop tasaj nej: “Teat, jogüy mitomiün, lanaxom wüx alacoquiaw”, aj nej.

<sup>19</sup> At tasaj nej aaga natang nenajiüt: “Nganüy sanüüch ic mejlüy wüx acoquiaw cambaj”, aj nej.

<sup>20</sup> Quiaj tapeay alinop masaj nej: “Jogüy mitomiün, teat. Tayacas tiül noic nine püy.

<sup>21</sup> Cos ximbol nandüy ic teat, sayaag xowüy apmejcüy. Cos sawaj ique ixaing omeaats corrül masey ngome ique ipiür, at ique iwit masey ngome ique itendeay”, aj nej.

<sup>22</sup> Quiaj tasaj nej aaga natang nenajiüt: “Ngo majneaj irang, aaga poch leaw indeac quiaj ayac isoet. Sitiül lamejaw xique napatatas, sawit leaw ngo nayac, at sitiül ipiüng saxaing masey ngome xique sapiür;

<sup>23</sup> ¿neol ngo meyac tiül banco xetomiün? Quiaj wüx sanapeay nayar, lamaxom wüx alquiriw”, aj nej.

<sup>24</sup> Condom tasaj leaw aliw quiaj: “Inojiütün ocueaj a tomiün; ijchan aaga nejjiür gajpowüw”, aj nejw.

<sup>25</sup> Quiaj tasajüw nej: “¡Teat, aag ayaj lamajiür gajpowüw!”, ajüw nej.

<sup>26</sup> Quiaj tasaj nejw aaga natang nenajiüt quiaj: “Naleaing sasaj icon, leawa tayamb nguineay mayac wüx alquiriw, apmüünd xeyay; nganüy jane ngo mayamb nguineay maxom wüx alquiriw, apmajnot ocueaj aaga leawa tüünd”, aj nejw.

<sup>27</sup> At tapiüng: “Iquiüjpan miün ningüy niüng sajlüy; imbiyan ajcüwa moncüy majaw xic leaw ngo mandüümüw narang minatangüw nejw”, aw a natang nenajiüt —aj nejw Teat Jesús.

*Teat Jesús tajmel tiül Jerusalén*

(Mt. 21:1-11; Mr. 11:1-11; Jn. 12:12-19)

<sup>28</sup> Ndoj mapiüng aag ayaj, Teat Jesús tanaám tamb andüy Jerusalén.

<sup>29</sup> Wüx laliüc matüchiw mal cambaj Betfagé, at Betania, niüng ajlüy aaga tiüc nasolc mitiüc Olivos, quiaj tüüch mamb ijpw minipilan nej.

<sup>30</sup> Tasaj:

—Quiüran tiül aaga cambaj quiün. Wüx apmepeayiün quiaj, apmexoman nop quicheech bur netsaag quiaj, nganaw müünd memas. Ichejtüün iquiüjpan miün.

<sup>31</sup> Sitiül aljane matün manguiaj icon neol techejtüün, isajan: “Cos Teat Naxey neech xicon niünan najanan apmetam nej”, irajan —aj nejw Teat Jesús.

<sup>32</sup> Condom ajcüwa minipilan nej tambüw, taxomüw a bur atnej lamasaj nejw Teat Jesús.

<sup>33</sup> Naleaing wüx teamachejtiw, quiaj tasaj nejw money nej:

—¿Neol techejtüün a bur quiaja? —ajüw nejw.

<sup>34</sup> Quiaj tasajüw:

—Cos Teat Naxey nesaj xicon niünan najanan, apmetam nej —ajüw.

<sup>35</sup> Quiaj taquiüjpw mamb a bur andüy niüng ajlüy Teat Jesús. Condom tayacüw wüx opech a bur apixaw nejw, cas tatepichaw wüx Teat Jesús.

<sup>36</sup> Quiaj nipilan tapots mapojchiw tiüt tiül tiüüd apixaw nejw niüng apmamong Teat Jesús.

<sup>37</sup> Wüx laliüc matüchiw niüng amiücüch tiüt mitiüc Olivos, quiaj meáwan nipilan leaw almandüjpiw nej, ajcüwa monyar nej aquiaaach, tepajüw apac omeajtsüw, tandeacüw najneaj wüx Teat Dios cos tajawüw meáwan najneaj leawa tarang Teat Jesús.

<sup>38</sup> Tapiüngüw:

—¡Apac omeajtsaats cos lapeay nop leaw iün wüx minüt Teat Dios! ¡Nej natang nenajiüt! ¡Najneajay ajlüy tiül cielo; najneajay ajlüy Teat Dios! —awüw.

<sup>39</sup> Altiül nipilan acas fariseos, tasajüw Teat Jesús:

—Teat, iliquiaw mapalüw ombeayiw ajcüwa minipilan quiaj —ajüw nej.

<sup>40</sup> Quiaj Teat Jesús tasaj nejw:

—Xique sasaj icon sitiül ajcüwa nipilan cam ndijchiümoj, piedra apmangochiw apmendeacüw —aj nejw.

<sup>41</sup> Wüx laliüc matüchiw cambaj Jerusalén, Teat Jesús taxom majaw a cambaj, quiaj tamix omeaats, tajiünts majaw.

<sup>42</sup> Tapiüng:

—¡Malüy ram iniüjcan mejawan nganüy nüt cam, ajlüy leaw alndom müch icon mejiüran monajneaj! Nganüy naél mejawan, nexotüy, ngondom mejawan.

<sup>43</sup> Aliüc miün nüt apmajlüy xeyay ngo majneaj apmatüch icon. Cos ajcüwa ijcüyüün mequiüjpan apmayeyiw icon tüüt; apmalüw icon mayacüw icon pinawan.

<sup>44</sup> Apndajrüüm tüüt meáwan imbiüman, ngome apmacül noic piedra mesapüy maquiüüb alinoic. At icona nóiquian mequiüjpan micualan apmümb ndrom imbasan, cos ngome teyariün wüx Teat Dios tüün mawün icon wüx —aw Teat Jesús.

*Tawün tüül nadam nangaj iüm leaw ngo metam majlüy quiaj*

(Mt. 21:12-17; Mr. 11:15-19; Jn. 2:13-22)

<sup>45</sup> Condom Teat Jesús tajmel tüül nadam nangaj iüm, quiaj tapots mawün meáwan monüjpeay, mongalüy leaw aliw tüül.

<sup>46</sup> Tasaj nejiw:

—¿Neol ngo leaam imeajtsana nguineay apiüng tüül Mipoch Teat Diosa? Cos apiüng: “Saniüy ajlüy niüng alndom matajcüch orar”; pero icona lamerangan aaga nadam nangaj iüm cam atnej niüng axotüy moneed —aj nejiw Teat Jesús.

<sup>47</sup> Teat Jesús nütnütan aquiaach nipilan tüül nadam nangaj iüm. Ajcüwa montangtang miteaats, at mondüy wüx aaga poch tüünd Moisés, at monajiüt ocueaj nipilan judío, tapots mayambüw nguineay alndom mambiyaw nej.

<sup>48</sup> Naleaing ngo maxomüw cuane wüx masapüw nej, cos meáwan nipilan xeyay andiümüw manguiayiw andeac nej.

## 20

*Tasajüw Teat Jesús nguiane ayar najiüt*

(Mt. 21:23-27; Mr. 11:27-33)

<sup>1</sup> Noic nüt Teat Jesús teaquiaach nipilan tüül aaga nadam nangaj iüm tüül Jerusalén, teamapiüng nguineay alndom mawaran wüx nisoet. Quiaj tapeayiw niüng ajlüy nej montangtang miteaats, mondüy wüx aaga poch tüünd Moisés, at natangtang monajiüt tüül judíos.

<sup>2</sup> Quiaj tasajüw nej:

—Isaj xicon nguiane teyar minajiüt merang aag ayaj. ¿Jane neech ic? —ajüw nej.

<sup>3</sup> Quiaj tasaj nejiw Teat Jesús:

—Ata xique aton sanatün nanguiay icon noic poch. Isajan xic:

<sup>4</sup> Jow aaga Juan, wüx tüüch yow nipilan, ¿jane ipiüngan nesaj nej marang aag ayaja? ¿Diosa, ngwüy nipilana? —aj nejiw.

<sup>5</sup> Quiaj tendeadndeacüw nejeyéjan quiaj, tapiüngüw:

—¿Cuane apmapiüngaatsa? Cos sitiül apmapiüngaats Teat Dios neech nej miün, quiaj apmasaj icoots: “¿Neol ngo meyariün andeac neje?” apmaw.

<sup>6</sup> Sitiül apmapiüngaats nipilan, apmambiyaw icoots cambaj, apmaloxiw icoots, cos meáwan nipilan apiüngüw aaga Juan nop nendeac andeac Teat Dios nej —awüw.

<sup>7</sup> Tapiüngüw ngo majawüw jane neech nej miün a Juan.

<sup>8</sup> Quiaj tasaj nejiw Teat Jesús:

—Ata xique aton ngo nasaj icon jane neech xic niün narang aaga teanarang cam —aj nejiw.

*Ngo majneaj monrang najiüt*

(Mt. 21:33-44; Mr. 12:1-11)

<sup>9</sup> Condom quiaj Teat Jesús tapots masaj nipilan acas poch andüy wüx napiürüch, tapiüng:

—Tajlüy nop naxey tapiür xeyay owil uva tüül micorrül nej, condom nej taw quiaj tamb xeyay nüt. Tayac teowix nipilan a corrül quiaj.

<sup>10</sup> Wüx tatüch a nüt mapeederan a uva, quiaj aaga neneay corrül tüüch mamb nop nerang minajiüt nej mamb majaw monrang najiüt mayar leaw aneay nej neneay iüt. Pero tatoliw nej, ndoj tujchiw mandilil owíxan, ngo müjchiw nicuajind.

<sup>11</sup> Condom aaga neneay iüt tandüy wüx müüch mamb alinop nerang minajiüt nej. Átan wüx tapeay quiaj angochiw miün nej, tapots matoliw. Condom tandilil aton owíxan, ngo müjchiw nicuajind.

<sup>12</sup> Aaga neneay corrül tandüy wüx müüch mamb alinop nerang minajiüt nej. Átan wüx tapeay quiaj, angochiwan mawüjchiw nej, landüy wüx apmambiyaw. Tawüniw maloxiw ninguiün.

<sup>13</sup> Ndjówüx quiaj tapiüng aaga naxey neneay corrül: “Jow nganüy, ¿nguineay sanaranga? Sanüüch mamb xecual, aag xowüy sajiür lasta. Sapiüng wüx apmajawüw nej apmarangüw leawa nej apiüng”, aw.

<sup>14</sup> Pero ajcüwa monrang najiüt tüül corrül wüx tajawüw micual neneay iüt, quiaj tapiüngüw nejíwan quiaj: “Nej aag ayaj apmaney aaga corrül cam. Tabaats mambiyaats, ndoj icoots apmaneyiüüts a iüt cam”, awüw.

<sup>15</sup> Quiaj tasapüw, tawüniw tüül corrül, tambiyaw. ¿Cuane ipiüngan apmarang a neneay iüt wüx ombasüw ajcüwa monrang najiüt quiaja?

<sup>16</sup> Pues apmamb mambiy nejiw, condom apmayamb alinoic ajlüy monrang najiüt mayac teowixaw aaga corrül quiaj —aj nejiw Teat Jesús.

Ajcüwa nipilan wüx tanguiyaiw aag ayaj, tapiüngüw:

—¡Malüy Dios ngo marang atquiaj!  
—awüw.

<sup>17</sup> Teat Jesús tajaw teombasüw nejiw, quiaj tapiüng:

—¿Neol, cuane wüx amb apiüng tiül Mipoch Teat Dios? niüng apiüng:

Aaga piedra leawa taloxiw ninguiün mon-rang iüm,

nganüy lafüm marang xeyay netam piedra tiül oxing iüm.

<sup>18</sup> Jane apmajmiüc wüx aaga piedra quiaj, apmapol nej; pero sitiül aaga piedra quiaj apmajmiüc wüx ombas aljane, nömban ap-macuaiaach tiüt —aw Teat Jesús.

*¿Netam majwan tomiün andüy tiül Roma?  
(Mt. 21:45-46; 22:15-22; Mr. 12:12-17)*

<sup>19</sup> Ajcüwa montangtang miteaats at mondüy wüx aaga poch tüünd Moisés quiajan tandiümüw masapüw nej, cos tayajcüw aaga andeac quiaj andüy wüx ombasüw nejiw amb apiüng. Pero timboloj mandüyiw nipilan, áag taton ngo marangüw nicuajind.

<sup>20</sup> Ndoj tüjchiw mamb acas monxey mandacüwiw. Ajcüw ayaj ajüic atnej najneaj arangüw, pero ambüw mayambüw nguineay aldom mandacüwiw, masapüw wüx, mayambüw leaw andeac Teat Jesús, mayacüw nej teowix natang nenajiüt.

<sup>21</sup> Quiaj tiünüw masajüw nej:

—Teat, sajawan ique indeac iqiaiaach leaw naleaing, ngo mewaiich. At aton ique ngo mepiüng wüx jane tiül nipilan netam, jane ngo metam. Ique iqiaiaach Mipoch Teat Dios atnej netam.

<sup>22</sup> Nganüy isaj xicon ¿naleaing netam majwan tomiün müünd aaga César, ngwüy ngo metama? —ajüw nej.

<sup>23</sup> Teat Jesús tajaw neol tatüniw nej manguiyaiw aag ayaj, quiaj tasaj nejiw:

—¿Neol tendiüman meycan xic wüx naéle?

<sup>24</sup> Ich miün noic tomiün majawaats. ¿Jane mitey alwüxe, aton jane minüt alwüx a tomiün cama? —aj nejiw.

Quiaj tasajüw nej:

—César —ajüw.

<sup>25</sup> Quiaj tasaj nejiw:

—Ijchan a César leaw aneay nej, aton ijchan Teat Dios leaw aneay Teat Dios —aj nejiw Teat Jesús.

<sup>26</sup> Ngo maxomüw algün poch leaw aldom masapüw wüx, áag leawa tandeac niüng teamanguiyaiw nipilan. Leawa tarang, nejiw mbayatoj manguiyaiw leaw asaj nejiw, ndijchiütójan.

*Wüx apmapacaran tiül mondeow  
(Mt. 22:23-33; Mr. 12:18-27)*

<sup>27</sup> Condom acas saduceos tambüw jawüw Teat Jesús. Ajcüwa saduceos quiaj apiüngüw mondeow langome apmapacüw alinomb.

<sup>28</sup> Tasajüw Teat Jesús:

—Teat, Moisés tarang tiül minawiig nej, tapiüng: Sitiül nop naxey mandeow, macül mintaj nej lemben omal, ngome tajiürüw micualüw nejiw, quiaj michiig nej netam mengoch owix aweaag aaga lemben omal quiaj, majiürüw micualüw majüic atnej mi-coj nej tajiür micual nej.

<sup>29</sup> Tajlüy ayaíw monxey nop necual nejiw. Aaga natang nacularan tengoch owix, ndoj tandeow wüx nganaw majiürüw micualüw nejiw.

<sup>30</sup> Condom quiaj michiig nej tengoch owix aweaag aaga najtaj lemben omal quiaj. Átan tandeow aaga naxey, nganaw majiürüw micualüw nejiw.

<sup>31</sup> Atanquiaj tarang amb arojüpüw. Ajcüw ayaíw monxey quiaj, tengoch owix maquiüüb aaga najtaj, pero ngome tajiürüw micualüw nejiw.

<sup>32</sup> Ndójwüx nejay aaga najtaj tandeow.

<sup>33</sup> ¿Jow alinoic nüt wüx apmapacaran tiül mondeow, ngün tiül ajcüwa monxey ap-maquiüjpüw aaga najtaja? Cos miayaíw tengoch owixaw maquiüjpüw —ajüw nej.

<sup>34</sup> Quiaj tasaj nejiw Teat Jesús:

—Nipilan tiül aaga nüt cam angoch owixaw.

<sup>35</sup> Pero jane apmapac tiül mondeow mamb tiül cielo, ngome apmajlüy atquiaj, ngome apmajlüy angoch owixeran.

<sup>36</sup> Langondom mandeowüw alinomb, apmajlüyiw at nejiw ángeles, apmajlüyiw micual nejiw Teat Dios aton, cos nej lamapacüüch nejiw tiül mondeow.

<sup>37</sup> Nganüy wüx aaga apacaran tiül mondeow quiaj, nejay teat Moisés taquiaach wüx tiül minawiig nej niüng tapiüng tajaw noic owil nine xiül leaw teandaab. Tiül aaga nawiig quiaj apiüng: Teat Dios Midios Abraham, Midios Isaac, Midios Jacob.

<sup>38</sup> Cos Teat Dios ajaw meáwan nipilan almapac, ngo majlüy leaw landeow nömban. Teat Dios ngome midiosüw mondeow, nej midiosüw leaw almapac —aj nejiw Teat Jesús.

<sup>39</sup> Condom acas mondüy wüx aaga poch tüünd Moisés tasajüw Teat Jesús:

—Najneajay aaga ipiüng quiaj Teat —ajüw.

<sup>40</sup> Quiaj lango matüntüniw manguiyaiw nej.

*¿Jane mixeech a Cristo?*

*(Mt. 22:41-46; Mr. 12:35-37)*

<sup>41</sup> Condom quiaj tasaj nejiw Teat Jesús:

—¿Neol tapiürang wüx aaga Cristo, teat David mixeech neje?

<sup>42</sup> Nejay a David tapiüng tiül aaga nawiig nenüt Salmó:

Teat Dios tasaj a Teat Naxey:

“Cheter ningüy wüx xeác,

<sup>43</sup> leaw ndoj nayac ajcüwa moncüy majaw ic maquejliw micosüw nejiw timbas.”

<sup>44</sup> ¿Nguineay alndom mapiürang David mix-eech aaga Cristo sitiül nejay David tasaj: Teat Naxey? maj, —aj nejiw Teat Jesús.

*Teat Jesús andeac wüx ajcüw mondüy wüx poch tüünd Moisés*

(Mt. 23: 1-36; Mr. 12:38-40; Lc. 11:37-54)

<sup>45</sup> Meáwan nipilan teamanguaiyiw, quiaj Teat Jesús tasaj minipilan nej, tapiüng:

<sup>46</sup> —Nde merangan mat nejiw ajcüwa mondüy wüx aaga poch tüünd Moisés, cos nejiw xowüy andiümüw majüyjüyiw niüng ajlüy xeyay nipilan, asojjúiw najaljal apixaw nejiw. Aton xowüy andiümüw matepeayaranüw. Ayambüw leaw najneaj bang tiül sinagoga chetemoj quiaj. At aton xowüy ayambüw chetemoj niüng chetejow netamtam nipilan niüng ajlüy monet.

<sup>47</sup> At anojtiw aniüngüw monlemben omal montaj, at meáwan leaw almajiürüw. Ndoj andiümüw maxotiw arangüw aaga ngo majneaj quiaj, atajcüw orar xeyay majaw nejiw nipilan. Ajcüw ayaj ombeayíwan, nejiw apmüjndiw mamongochiw xeyay ngo majneaj alinoic nüt —aj nejiw Teat Jesús.

## 21

*Ichech nop lemben omal najtaj*

(Mr. 12:41-44)

<sup>1</sup> Wüx Teat Jesús altiül nadam nangaj iüm tajaw nipilan monjiür xeyay tomiün nguineay teamayacüw ichechiw nejiw tiül iqial nichech.

<sup>2</sup> Átan tajaw nop lemben omal müm najtaj tayac ichech nej ijquiaw nine tomiün.

<sup>3</sup> Ndoj quiaj tapiüng:

—Naleaing sasaj icon, aaga müm najtaj lemben omal quiaj, nej teyac xeyay, ngo mat nejiw ajcüwa nipilan quiaj.

<sup>4</sup> Cos meáwan lamayacüw leaw nenaw ocueajiw. Nganüy aaga müm najtaj quiaj tayac meáwan leaw tajiür, masey lango majiür ombeat üet nej —aw Teat Jesús.

*Wüx apjarriüm nadam nangaj iüm*

(Mt. 24:1-2; Mr. 13:1-2)

<sup>5</sup> Altiül teandeacndeacüw wüx aaga nadam nangaj iüm nguineay ajneaj, nguineay atsajüy ombas aaga piedra, at cuajantanej najneajneaj nichech leaw tayacüch tiül nangaj iüm. Wüxan teamandeacüw wüx meáwan aag ayaj, quiaj tasaj nejiw Teat Jesús:

<sup>6</sup> —Meáwan aag leawa temejawan nganüy cam, alinoic nüt apndrom ombas. Ngome apmajlüy masey anoic piedra

nesapüy maquiüüb alinoic, cos meáwan apmateajquich —aj nejiw.

*Wüx laliüc ndrom ombas a iüt cam*

(Mt. 24:3-28; Mr. 13:3-23)

<sup>7</sup> Condom quiaj tatüniw nej manguiayiw, tasajüw:

—Teat ¿ngow apmajlüy aag ayaja? ¿Cuane apmajlüy majaraw ngow apmajlüy aag ipiüng quiaja? —ajüw nej.

<sup>8</sup> Quiaj tasaj nejiw Teat Jesús:

—Ijawan, nde mawaiich icon nejingüind. Cos xeyay nipilan aliücüw miün, apmandeacüw wüx xique. Altiül apmapiüngüw: “Xique aaga Cristo, nganüy lamatüch a nüt”, apmawüw. Xique sasaj icon nde meyariün andeacüw ajcüwa nipilan quiaj.

<sup>9</sup> Wüx apmenguaiyüün lajlüy montsoj, lajlüy moncüy, nde mbayameron cos atquiaj netam majlüy ombas; naleaing nganaw matüch a nüt ndrom ombas a iüt cam —aj nejiw Teat Jesús.

<sup>10</sup> Condom tandüy wüx masaj nejiw:

—Noic iüt apmajcüyiw majawüw monaw tiül alinoic iüt.

<sup>11</sup> Aton apmajlüy xeyay nadam ateam, apmajlüy lop, apmajlüy monandeow tiül palpálwüx cambaj; aton apmajlüy xeyay monbayan. Átan apmajaraw xeyay cuajantanej cawüx tiül cielo.

<sup>12</sup> Naleaing wüx nganaw majlüy meáwan aag ayaj, apmayambüch imbanan, apndeaameron mayacüw icon teomasüw monajiüt tiül sinagoga. Apmejmelüün tiül manchiüc; apmequíürapan niüng ajlüyiw montangang monajiüt. Apmemonogochiün aag ayaj ajcan iyariün sandeac.

<sup>13</sup> Atquiaj icona alndom mendeacan wüx xic nguiajantanej.

<sup>14</sup> Nde meyamban imeajtsan cuane apmepiüangan, nguineay alndom meriowan wüx.

<sup>15</sup> Cos xique sanüüch icon poch cuane apmepiüangan; sanüüch icon mexoman imeajtsan. Quiaj meáwan leawa teajcüyiw majawüw icon ngondom maxomüw cuane apmapiüngüw mangochiw indeacan.

<sup>16</sup> Aton miteatiün, micojon, michijquian, icualajtsan, miamigojan, apmayacüw icon teowixaw monajiüt. Altiül icon apmembiyaranan.

<sup>17</sup> Meáwan nipilan apmajcüyiw majawüw icon ajcan iyariün sandeac.

<sup>18</sup> Naleaing ngome apndrom ombas masey nots miondeats imalan, cos teamajiür icon Teat Dios.

<sup>19</sup> Sitiül icona apmeiücan wüx meáwan aag ayaj, najneajay apmejlüyüün alinoic nüt, cos apmepacan meáwan nüt tiül cielo.

<sup>20</sup> Wüx apmejawan a cambaj Jerusalén laímb mayey nej tiüt soldados, quiaj alndom



mepiüngan lamatüch a nüt mandrojchich ombas.

<sup>21</sup> Pues leaw altiül Judea ich mecuiür andüy wüx tüic; leaw altiül cambaj Jerusalén ich maw quiaj; at leaw altiül corrül nde mandiril andüy tiül cambaj.

<sup>22</sup> Cos aaga nüt quiaj apmamongocharan xeyay ngo majneaj. Netam majlüy meáwan leawa lajlüy tiül Mipoch Teat Dios.

<sup>23</sup> ¡Pobre nejiw ajcüwa montaj leaw alteomeajtsüw micualüw nejiw, at leaw ajiür nine tealeámban achech wüx aaga nüt quiaj! Apmajlüy xeyay necoy wüx aaga iüt cam, cos Teat Dios apmüüch mamongochiw ngo majneaj ajcüwa nipilan cam.

<sup>24</sup> Altiül apmandeowüw tiül montsoj; altiül apmambüw pres andüy tiül palpálwüx iüt; pálwüx nipilan apmarangüw leaw andiümüw marangüw wüx cambaj Jerusalén, leaw palaw a nüt ocueajiw pálwüx nipilan —aj nejiw Teat Jesús.

*Wüx aliüc Teat Naxey*

(Mt. 24:29-35, 42-44; Mr. 13:24-37)

<sup>25</sup> Condom Teat Jesús tandüy wüx masaj nejiw, tapiüng:

—Apmajaraw xeyay cuajantanej wüx ocas, wüx nüt, wüx caaw, at ningüy wüx iüt aton. Nipilan xeyay apmbayamoj, lango majawüw cuane apmarangüw, cos apmeterrüür napa a nadam ndec, apmajlüy nadamdam ajponch aton.

<sup>26</sup> Altiül nipilan apojniüm teombasüw cos xeyay apmbayamoj wüx apmajawüw leawa apmajlüy, cos meáwan leaw almajlüy cawüx tiül cielo apmajüjyü.

<sup>27</sup> Quiaj apmajaraw aaga Teat Naxey aliüc amb tiül oic xeyay najneajay ajlüy, ayey nej tiüt nelitlit, cos lamarang minatang nena-jiüt.

<sup>28</sup> Wüx ijawan lawitiow majlüy meáwan aag ayaj, ich mapac imeajtsan xeyay, cos laliüc meriowan tiül meáwan ngo majneaj —aw Teat Jesús.

<sup>29</sup> Condom tasaj nejiw alacas poch andüy wüx xiül, tapiüng:

—Ijawan nguineay arang a toc, tengwü cuajantanej alinoic xiül.

<sup>30</sup> Cos wüx apatsam, quiaj ajüic laliüc matüch nüt wüx apmerraar.

<sup>31</sup> At a nganüy wüx apmejawan lajlüy aag lanasaj icon quiaj, quiaj apmejawan laliüc matüch a nüt wüx Teat Dios apmajlüy wüx micambaj nej.

<sup>32</sup> Naleaing sasaj icon, meáwan aag ayaj apmajlüy wüx aliün majlüyiw ajcüwa nipilan quiaj.

<sup>33</sup> Masey a iüt at a cielo apndrom ombasüw, xepoch apmajlüy meáwan nüt, ngome apndrom ombas.

<sup>34</sup> Ijawan wüx, nde meatmeatiünan memongochiün wüx iretiün, nde mengüniün, nde

meyacan imeajtsan wüx leaw alndom mexoman wüx aaga iüt cam, ndot quiaj matüch a nüt.

<sup>35</sup> Cos wüx aaga nüt aliüc, ngome teamateotsüw wüx meáwan nipilan ningüy wüx iüt.

<sup>36</sup> Wüx aag ayaj netam mepacan, meáwan ores meáwan nüt netam metajcan orar, metüniün ocueaj Teat Dios meriowan tiül meáwan aaga ngo majneaj leaw apmajlüy quiaj, mejlüyiün najneajay niüng ajlüy Teat Naxey —aw Teat Jesús.

<sup>37</sup> Teat Jesús, noic nüt teaquiaach tiül nadam nangaj iüm. Wüx langwiiüts taw quiaj; tamb andüy wüx aaga tüic nasoiic mitiüc Olivos.

<sup>38</sup> Xeyay nipilan tiül cambaj rawrráwan tiüt ambüw tiül nadam nangaj iüm manguiayiw aquiaach nej.

## 22

*Ayambüw cuane wüx masapiw Teat Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Laliüc matüch nangos nüt ocueajiw nipilan judío, aaga nasoiic pascua, aaga nüt wüx üeteran pan ngo majmel levadura.

<sup>2</sup> Ajcüwa natangtang miteaats at mondüy wüx aaga poch tüünd Moisés tayambüw nguineay alndom mambiyaw Teat Jesús, pero timbолоj mandüyiw nipilan.

<sup>3</sup> Quiaj a natang nimeech Satanás tajmel tiül omeaats a Judas Iscariote, nej nop tiül ajcüwa gajpiüp (12) minipilan Teat Jesús.

<sup>4</sup> Aaga Judas quiaj tamb masaj natangtang miteaats, at montang monajiüt tiül nadam nangaj iüm, tasaj nejiw nguineay alndom mayac teowixaw nejiw Teat Jesús.

<sup>5</sup> Nejiw quiaj tapac omeajtsüw, tasajw apmüjchiw nej tomiün.

<sup>6</sup> Condom nej tapiüng apmayac teowixaw nejiw; quiaj tapots mayamb nguineay marang aag ayaj wüxan ngo majlüy quiaj nipilan.

*Teat Jesús ndójwüx üt aweaag minipilan nej*

(Mt. 26:17-29; Mr. 14:12-25; Jn. 13:21-30; 1 Co. 11:23-26)

<sup>7</sup> Condom tatüch a nangos nüt wüx üeteran pan ngo majmel levadura. Aaga nüt quiaj netam mandeow sap majmel marang nichech wüx pascua.

<sup>8</sup> Quiaj Teat Jesús tüüch mamb a Pedro maquiüb a Juan, tasaj:

—Quiüran ijawan cuane apmetam icoots wüx apmetiüts wüx nangos nüt pascua —aj nejiw.

<sup>9</sup> Nejiw quiaj tasajw Teat Jesús:

—¿Nguiane ijac indium, Teat, namban narangan aag ayaja? —ajw.

<sup>10</sup> Teat Jesús tasaj nejiw:

—Wüx apmelmeliün tiül cambaj, quiaj apmexoman nop naxey ajoy nop ngan yow. Indüjpiün mamb aaga najüy quiaj, apmayac icon tinden niüing andüy quiaj.

<sup>11</sup> Condom quiaj apmesajan neneay iüm: “Apiüing Teat Naxey: ¿Nguiane ajlüy niüing saxejnenguenon netiün wüx pascua naquiiüb xenipilana? aw”, apmerajan.

<sup>12</sup> Quiaj apmatiib icueajiün nop nadam teomeaats iüm cawüx amb ijpüw iüm, landoj lamatajcwüw majneaj. Andüy quiaj apmeyacan üetiüts —aj nejiw Teat Jesús.

<sup>13</sup> Condom quiaj tambüw. Taxomüw meáwan atnej lamasaj nejiw Teat Jesús. Quiaj tambüw mayacüw leaw apmüeteran wüx nangos nüt pascua.

<sup>14</sup> Wüx tatüch metiw, quiaj tapeay quiaj Teat Jesús maquiiüb altigüy miapóstones nej. Quiaj chetetoj.

<sup>15</sup> Wüx alchetemoj wüx mes, quiaj tasaj nejiw:

—iXeyay teanandiüm net naquiiüb icon wüx aaga pascua cam, wüxan nganaw namongoch xeyay ngo majneaj!

<sup>16</sup> Cos ningüy ndoj, langa net naquiiüb icon alinomb wüx pascua, leaw apmajlüyüts nóiquian niüing apmajlüyüts maquiiüpaats Teat Dios —aj nejiw Teat Jesús.

<sup>17</sup> Condom quiaj taxaing noic vas, tüüch gracias Teat Dios, ndoj tapiüing:

—Jogüy isapan inganeowan noicnoic pite.

<sup>18</sup> Nganüy sasaj icon, xique landoj langome sananganeow miyow uva naquiiüb icon; apndom wüx apmatüch alinoic nüt niüing apmajlüyüts maquiiüpaats Teat Dios —aw.

<sup>19</sup> Condom quiaj taxaing a pan, tüüch gracias Teat Dios. Quiaj tambaag müüch nejiw, tapiüing:

—Aag agüy xecuerpo, apmayacüch mandeow mawün isoetiün. Atcüy netam merangan para leam imeajtsan xic wüx —aw.

<sup>20</sup> Atanquiaj tarang wüx landoj üetiw. Taxaing a vas, tapiüing:

—Aag agüy xequeie, ajüiquich wüx jayats poch lamarang Teat Dios müüch icon, cos xequeiej apmajünch tiüt mawün isoetiün.

<sup>21</sup> Aaga naxey leaw apmayac xic teowixaw moncüy majaw xic, nganüy teasüet anaag nóiquian wüx mes.

<sup>22</sup> Naleaing apmarangüch wüx ombas Teat Naxey atnej tanderac tanomb wüx nej. Nganüy aaga naxey leaw apmayac nej teowixaw monajiüt xeyay ngo majneaj apmamongoch! —aw Teat Jesús.

<sup>23</sup> Condom minipilan nej atünayej menguiayayej wüx jane tiül nejiw apmayac nej teowixaw monajiüt.

*Andeacndeacüw wüx jane alwüx atam ajlüy*

<sup>24</sup> Condom minipilan Teat Jesús tandeacndeacüw tiülan nejiw, tapiüingüw wüx jane tiül nejiw alwüx atam ajlüy, jane apmarang natang.

<sup>25</sup> Quiaj Teat Jesús tasaj nejiw:

—Meáwan natangtang monajiüt tiül meáwan iüt arangüw apatüw atnej lamaneayiw meáwan nipilan leaw ajlüyiw wüx. Átan ayamyambüw nguineay manderacüw wüx nejiw majüic najneaj arangüw.

<sup>26</sup> Icona nde merangan atquiaj. Tiül icona jane natang netam mayaag atnej chingüy. Leaw najmel marang natang tiül icona netam mambeol jangantanej.

<sup>27</sup> Ngwüy, cuane ipiüing, ¿ngün más netam ajlüye? Sapiüing aaga apchetem mayambüch üet nej; ngome aaga sayac nüeteran wüx mes. Nganüy xique najlüy naquiiüb icon atnej nop neyac nüeteran wüx mes, atnej nop nerang minajiütan.

<sup>28</sup> Icona ijlüyüin mequiiüpan xic meáwan nüt wüx samongoch cuajantanej naél.

<sup>29</sup> Cos atnej Xeteat Dios lamüüch xic narang natang nenajiüt, ata xique sanüüch icon merangan natang nóiquian mequiiüpan xic,

<sup>30</sup> para metiüts manganeowaats nóiquian wüx xemes ningüün niüing sanarang natang. Átan apchetemeron niüing chetejow montangtang monajiüt, mejawan wüx asoetiw ajcüwa gajpic ajlüy nipilan monaw tiül micual micualüw Israel —aj nejiw Teat Jesús.

*Pedro apmapiüing ngo majaw jane Teat Jesús*

(Mt. 26:31-35; Mr. 14:27-31; Jn. 13:36-38)

<sup>31</sup> Condom Teat Jesús tasaj a Pedro:

—Simón, Simón inguiay, cos Satanás minatang nimeech teamatün icon, teamandiüm mayac icon tiül naél, atnej ajwüch trigo maw osaab.

<sup>32</sup> Xique lanatün ocueaj Teat Dios mambeol ic ngo mecueat iyac imeaats wüx nej, atquiaj wüx apmendilil apmembeolüw micojow michijquaiw —aj.

<sup>33</sup> Quiaj tasaj nej a Simón:

—Xique teat, sajlüy namb naquiiüb ic nguiajantanej, masey majmeliür tiül manchiüc, masey mambiyaw icor —aj nej.

<sup>34</sup> Quiaj tasaj nej Teat Jesús:

—Naleaing sasaj ic, Pedro, gallo apmepaj nganüy leaw ndoj mepiüing arojmbüw ipiüing ngo mejaw jane xic —aj nej.

*Laliüc majlüy xeyay ngo majneaj*

<sup>35</sup> Condom Teat Jesús tatün manguiay nejiw:

—Jow wüx tujúchüis icon meamban ngo mejoyiün morral, ngo mejoyiün iquial tomiün, ngo mesojquüin napüic, ¿tetam

icon aleaic leaw nómban ngome tejiürana?  
—aj nejiw.

Quiaj tapiüngüw:

—Nicuajind, Teat —awüw.

<sup>36</sup> Condom quiaj tasaj nejiw:

—Nganüy, leaw ajiür morral ich majoy, at iquial tomüün. Sitiül nop ngo majiür espada, ich manüüb micamix nej mangal nots.

<sup>37</sup> Cos sasaj icon xique netam marangüch wüx ximbas atnej lasanderac wüx tiül Mipoch Teat Dios, cos apiüng: “Tayacüch atnej nop nerang ngo majneaj”, aw. Meáwan leawa lasanderac wüx quiaj, netam majlüy atnej —aj nejiw.

<sup>38</sup> Quiaj tasajüw nej:

—Teat, alningüy ijtsüw espada —ajüw.

Quiaj tasaj nejiw:

—¡Lajlüy, atówan ayaj! —aj nejiw.

*Teat Jesús ataag orar tiül Getsemani  
(Mt. 26:36-46; Mr. 14:32-42)*

<sup>39</sup> Condom Teat Jesús taw quiaj maquiüüb minipilan nej, tamb andüy wüx mitiüc Olivos atnej mbójan marang.

<sup>40</sup> Wüx tapeayiw quiaj, tasaj minipilan nej:

—Itüniün ocueaj Teat Dios, ngana aleaic marang wüx imbasan nimeech —aj nejiw.

<sup>41</sup> Condom quiaj tacueat nejiw Teat Jesús, tamb tajüy atow nej atüch niüng alndom majlos noic piedra. Quiaj taquieel tiüt micos nej masaj Teat Dios,

<sup>42</sup> tapiüng:

—Teat, ngwüy alndom mamórgan wüx ximbas meáwan naél leaw aliüc miün; ique ijaw Teat, ngome leawa xique sandiüm, cos leaw ique ijaw netam —aw.

<sup>43</sup> Condom quiaj tapeay nop ángel imiün tiül cielo mambeol nej, müüch nej apac.

<sup>44</sup> Cos Teat Jesús xeyay tamix omeaats, ngo macueat matün ocueaj Teat Dios; taw xeyay minalil nej, ancatectec tiüt atnej quiej.

<sup>45</sup> Wüx ndot mataag orar, quiaj witiüt tamb majaw minipilan nej. Almajgot majaw almameayiw, cos laümb apacüw, xeyay amix omeajtsüw.

<sup>46</sup> Quiaj tasaj nejiw:

—¿Neol tapots imeayiüna? ¡Ipacan, itüniün ocueaj Teat Dios, quiaj ngondom marang nicuajind wüx imbasan nimeech! —aj nejiw.

*Aquiüjpüw mamb Teat Jesús*

*(Mt. 26:47-56; Mr. 14:43-50; Jn. 18:2-11)*

<sup>47</sup> Tengualeámban andeac Teat Jesús, quiaj ajngot noic ajlüy nipilan, aaga Judas ombas nej; nej nop nej tiül ajcüwa gajpiüp (12) apóstoles. Wüx tajngot, nómban atüch Teat Jesús macheech mimboy nej.

<sup>48</sup> Condom Teat Jesús tasaj a Judas:

—¿Atquiaj lameteots metiib ndeaam Teat Naxeye, wüx apmecheech mimboy neje? —aj.

<sup>49</sup> Minipilan nej wüx tajawüw aag ayaj, quiaj tapiüngüw:

—Teat, ¿natsojon naquiüjpan naag espada? —awüw.

<sup>50</sup> Condom nop minipilan Teat Jesús tamb mangoch nop nerang minajiüt natang miteaats, tandooig miác olaag.

<sup>51</sup> Quiaj Teat Jesús tasaj nej:

—¡Ijlüyan, icueat, ich majlüy! —aj.

Condom quiaj tarreeg olaag aaga naxey quiaj, tataag majneaj nómban.

<sup>52</sup> Quiaj tasaj ajcüwa montangtang miteaats, at monlüy wüx nadam nangaj iüm, at montangtang teat xeech monajiüt tiül nejiw, leawa tiünw masapüw nej:

—¿Cuane imbichan espada maquiüüb a to-cots xiül quiaj, tewiünana mesapan xique? ¿Neol, jowa xique need xique?

<sup>53</sup> Meáwan nüt samb tiül nadam nangaj iüm. ¿Neol ngo mesapan xique? Nganüy cos lamatüch a nüt merangan aag ayaj, at nimeech lamüünd marang atquiaj —aj nejiw.

*Pedro apiüng ngo majaw jane Teat Jesús*

*(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

<sup>54</sup> Condom quiaj ndeaad Teat Jesús, taquiüraab mamb andüy aniüng minatang miteaats. Teat Pedro tandüüb nej mamb, miünquiajan ajngot.

<sup>55</sup> Ajcüwa nipilan ajalüw biümb quiaj tiül püjchiün mbeay ombiüm minatang miteaats metsantsayej; alchetemoy ayeyiw tiüt biümb. At a Pedro aton tamb tsotom quiaj maquiüjpüw.

<sup>56</sup> Alquiaj nop nüx nerang najiüt quiaj, wüx tajaw altsotom mbeay biümb a Pedro, tajaw majneaj, quiaj tapiüng:

—At aaga naxey quiaj aton taquiüüb aaga Jesús —aw.

<sup>57</sup> Aaga Pedro ngo mandiüm mapiüng naleaing, quiaj tapiüng:

—Ngwüy müm, ngo najaw jane aag ipiüng quiaj —aw.

<sup>58</sup> Ajóyan quiripite ores, quiaj tajaw nej alinop, tasaj nej:

—Ique aton nop tiül aquiüjpüw nejiw —aj nej.

Quiaj tapiüng a Pedro:

—Naxey, ngwüy ngome xique —aw.

<sup>59</sup> Üüchan ores tatow ndoj masaj nej aaga nop, quiaj tapiüng alinop:

—Naleaing, aaga naxey quiaj aton aquiüüb nej, cos naw Galilea —aw.

<sup>60</sup> Aaga Pedro tandüy wüx mapiüng:

—Naxey, ngo najaw cuane ipiüng quiaj —aw.

Tengualeámban mandeac aag ayaj a Pedro, quiaj tepaj a gallo.

<sup>61</sup> Teat Jesús ndiliteay majaw a Pedro. Quiaj leaad omeaats aaga tapiüng Teat Jesús: “Sasaj ic Pedro, aaga gallo apmepaj nganüy leaw ndoj mepiüng arojmbüw ipiüng ngo mejaw jane xic”, maj nej.

<sup>62</sup> Wüx leaad omeaats aag ayaj a Pedro, taw quiaj, tapots müüch ajünts.

*Tawüjchiw Teat Jesús*  
(Mt. 26:67-68; Mr. 14:65)

<sup>63</sup> Ajcüwa monxey monjiür Teat Jesús itsojayéjan nej, tatoliw nej.

<sup>64</sup> Quiaj taoeliw onüüg nej, cas tapots maleambüw mitey. Tasajüw:  
—¡Süet jane neleamb ic! —ajüw.

<sup>65</sup> At tasajüw nej cuajantanej ngo majneaj.

*Teat Jesús alniüng ajlüy monajiüt*  
(Mt. 26:59-66; Mr. 14:55-64; Jn. 18:19-24)

<sup>66</sup> Wüx larrow tüüt, quiaj canchiütoj montangtang monajiüt tüül judíos, montangtang miteaats, átan mondüy wüx aaga poch tüünd Moisés. Taquiüjpüw mamb Teat Jesús andüy niüng alcanchiümoj altegüy montang monajiüt. Quiaj tatüniw nej manguiayiw:

<sup>67</sup> —Isaj xicon, ¿cuane ipiüng, ngwüy ique aaga Cristo tapiürang aliüca? —ajüw nej.

Quiaj tasaj nejüw:

—Masey nasaj icon, icona ngome apmepariün sandeac.

<sup>68</sup> Aton sitiül aleaic natün nanguiaiy icon, ngome apmesajan xic, ngome apmetsambijchan xic.

<sup>69</sup> Naleaing, naw wüx nganüy Teat Naxey apchetem amb wüx miác Teat Dios, aag nerang cuajantanej leaw almajlüy —aj nejüw Teat Jesús.

<sup>70</sup> Condom yajnguiat tüüt masajüw nej:

—¿Cuane ipiüng, ique micual ic Teat Diosa? —ajüw nej.

Quiaj tasaj nejüw:

—Xique, atnej ipiüngan quiaj —aj nejüw.

<sup>71</sup> Condom quiaj tapiüngüw:

—¡Cuane tengualeámban macüliüts manguiayiiüts, cos anguiayayoots nguineay andeac! —awüw.

## 23

*Teat Jesús alteombas Pilato*  
(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Condom quiaj tambüw meáwan nejüw maquiüjpüw mamb Teat Jesús andüy niüng ajlüy a Pilato.

<sup>2</sup> Wüx tapeayiw quiaj tapots mayacüw asoet, tapiüngüw:

—Aaga naxey cam taxomasan tea-maquiaach nipilan nde marangüch leaw netam marangüch. Apiüng ngo metam majwan tomiün müünd a César. Ngome

áagan ayaj, aton apiüng nej aaga Cristo leaw lapiürang aliüc, nop minatang nenajiüt —awüw.

<sup>3</sup> Quiaj tatün manguiay nej a Pilato:

—¿Naleaingue, ique aaga minatang nena-jiüt tüül cambaj Israele? —aj.

Quiaj tasaj nej Teat Jesús:

—Naleaing teat, atnej lamepiüng quiaj —aj nej.

<sup>4</sup> Condom Pilato quiaj tasaj natangtang miteaats at meáwan nipilan:

—Nicuajind nisoet ngo naxom wüx ombas aaga naxey cam —aj nejüw.

<sup>5</sup> Quiaj nejüw tayambyambüw xeyay nguineay mawaijchaw, tapiüngüw:

—Lamüüch majcüy nipilan, lamaquiaach ngo majneaj meáwan tüül Judea, tamelich tüül Galilea, nganüy lapeay ningüy —awüw.

*Teat Jesús alniüng ajlüy Herodes*

<sup>6</sup> Wüxan tanguiaiy aag ayaj a Pilato, quiaj tatün manguiay sitiül aaga naxey quiaj naw Galilea.

<sup>7</sup> Wüx tapiüngüw naleaing, quiaj tüüch mamb andüy niüng ajlüy a Herodes, cos nej natang nenajiüt tüül Galilea. Aton aaga nüt quiaj Herodes ajlüy tüül Jerusalén.

<sup>8</sup> Condom Herodes wüx tajaw Teat Jesús, quiaj tapac omeaats xeyay, cos lamajiür nüt tenguiat mandüüm majaw. Xeyay laman-guiay anderac wüx Teat Jesús nguineay arang. Nej aton tenguiat mandüüm majaw marang noic ateoacán.

<sup>9</sup> Ndoj quiaj tapots müüch matüntün manguiay; pero Teat Jesús ngo mendeaac nómban.

<sup>10</sup> Ajcüwa montangtang miteaats, at mondüy wüx aaga poch leaw nomb tarang a Moisés, aliw quiaj aton; tatepichaw asoet nej xeyay.

<sup>11</sup> Aaga Herodes maquiüüb misoldados nej atsojayéjan majawüw Teat Jesús. Tasoi-juiw nej tüül noic najneajay napixeran majüic atnej nop minatang nenajiüt. Aag ayaj itsojoj nej. Condom tüüch nej mamb alinomb andüy niüng ajlüy a Pilato.

<sup>12</sup> Ningüinüt nej a Pilato najcüy aweaag a Herodes; nganüy wüx aaga nüt quiaj nómban ajneajüw.

*Atüniw mandeow Teat Jesús*

(Mt. 27:15-26; Mr. 15:6-15; Jn. 18:39—19:16)

<sup>13</sup> Condom Pilato tapaj canchiümoj meáwan micual cambaj, at montangtang miteaats maquiüüb monajiüt.

<sup>14</sup> Quiaj tasaj nejüw:

—Icona tequiüjpan miün aaga naxey cam. Tepiüngan nej teamaquiaach nipilan wüx ngo majneaj. Nganüy lamenguiayün laimb natüntün nanguiaiy, ngo naxom wüx ombas nej nicuajind nisoet leaw ipiüngan.

<sup>15</sup> Átan a Herodes aton ngo maxom nicuajind, áag tüüch mandilil alinomb. Nganüy

lamejawan ngo majiür nicuajind nisoet aaga naxey cam mandeow wüx.

<sup>16</sup> Leaw sanarang wüx nganüy, sanüüch majwüch, condom sanatsambiich —aj nejiw a Pilato.

<sup>17</sup> Tapiüng aag ayaj Pilato cos alndom tsajmbiüm nop najlüy tiül manchiüc wüx nangos nüt, leawa cambaj atün.

<sup>18</sup> Quiaj nipilan anyajnguian tiüt apajüw, tapiüngüw:

—¡Ngwüy nde metsambiich aag ayaj! ¡It-sambiich a Barrabás! —awüw.

<sup>19</sup> Aaga Barrabás quiaj, tajmel tiül manchiüc cos tasojnong nipilan majcüyiw majawüw monajiüt; aton nej nop nembiy nipilan.

<sup>20</sup> Quiaj Pilato tandüy wüx masaj nejiw alinomb, cos xeyay tandiüm matsambiich Teat Jesús.

<sup>21</sup> Quiaj a nganüy nipilan tepajüw xeyay napac, tapiüngüw:

—¡ich mandeow wüx cruz, ich mandeow wüx cruz! —awüw.

<sup>22</sup> Pilato quiaj tasaj nejiw amb arojmbüw:

—Xique ngo naxom cuane ngo majneaj arang aaga naxey cam. Ngo naxom wüx ombas nej nicuajind nisoet mandeow wüx. Súpan nüüch majwüch, ndoj sanatsambiich —aj nejiw.

<sup>23</sup> Nejiw tepajüw napac, tapiüngüw majmel wüx cruz. Ajcan laxeyay ayajyajiwa a nipilan maquiüjpüw montangtang miteaats, quiaj tajlüy atnej andiümüw.

<sup>24</sup> Quiaj Pilato tapiüng apmarang leawa nejiw apiüngüw.

<sup>25</sup> Condom quiaj tatsambiich aaga naxey nembiy nipilan leaw tatüniw tsajmbiüm, áag leaw tajlüy tiül manchiüc cos tasojnong nipilan majcüyiw majawüw monajiüt. Ndoj tayac teowixaw nejiw a Teat Jesús marangüw wüx leaw andiümüw.

*Teat Jesús tajmel wüx cruz*

(Mt. 27:32-44; Mr. 15:21-32; Jn. 19:17-27)

<sup>26</sup> Condom quiaj taquiüjpüw mamb Teat Jesús mayacüw wüx cruz. Tenguiálan ajüyiw, quiaj mangochiw nop naxey nenüt Simón, naw tiül cambaj Cirene, les tajngot imiün tiül corrül. Quiaj tujchiw mambitic a cruz, mandüüb mamb Teat Jesús.

<sup>27</sup> Tandüjpiw nej mamb xeyay nipilan. Al-tiül xeyay montaj teajüntsüw teapajüw cos xeyay amix omeajtsüw.

<sup>28</sup> Quiaj Teat Jesús wantsat majaw nejiw, tapiüng:

—Müm montaj monaw Jerusalén, nde mejiüntsán wüx ximbas, ijiüntsán wüxan icona, at wüx micualan.

<sup>29</sup> Cos aliüc miün nüt apmapiürang: “Najneajay ajlüy leaw ngondom majiür

micual nej, at leaw ngo majiür nine tenguiál achech.”

<sup>30</sup> Aaga nüt quiaj nipilan apmasajüw a tiüc: “¡Jmiüc wüx ximbasan, ixot xicon”, apmajüw a lom.

<sup>31</sup> Cos sitiül alndom marangüw aag agüy wüx nüt aliün majlüy nateaic xiül, ¿cuane apmarangüw wüx nawaag nüt? —aw.

<sup>32</sup> Wüx taquiüjpüw mamb Teat Jesús, aqiuüjpüw mamb ijpüw monxey leaw xeyay ngo majneaj tarangüw; apmayacaranüw wüx cruz nóiquian maquiüüb.

<sup>33</sup> Condom tapeayiw wüx Calvario, nasoic Omal Mondeow, quiaj tayacüw wüx cruz Teat Jesús maquiüüb ajcüw ijpüw monrang xeyay ngo majneaj quiaj. Nop tayacüw amb wüx miác nej, alinop amb wüx miquiamb nej.

<sup>34</sup> Quiaj Teat Jesús tapiüng:

—Teat Dios, nde meyac wüx imeaats aaga ngo majneaj teamarangüw cam, cos ngo majawüw cuane teamarangüw —aw.

Condom ajcüwa soldados tasuetiw wüx apix nej, membaagayej wüx.

<sup>35</sup> Meáwan nipilan aliw quiaj teamajawüw. Monajiüt aton titsojow nej, tapiüngüw:

—Alinop mbich awün wüx; nganüy ich mewüneay wüx nejáyan quiaj, majüic sitiül naleaing nej aaga Cristo lapiürang aliüc —awüw.

<sup>36</sup> Átan ajcüwa soldados aton titsojow nej, tatüchiw nej müjchiw nachich vin.

<sup>37</sup> Tasajüw:

—Sitiül ique minatang nenajiüt tiül judíos, nganüy erwüneay wüx iquiáyan quiaj —ajüw nej.

<sup>38</sup> Tarangüch acas poch wüx omal cruz. Aag ayaj tarangüch wüx ombeayiw griego, wüx ombeay latin, at wüx ombeay hebreo. Apiüng: “Aag agüy minatang nenajiüt ocueajiw judíos.”

<sup>39</sup> Camüm nop tiül nejiw ajcüwa monrang xeyay ngo majneaj najlüyiw wüx cruz, it-sojúyan Teat Jesús, tasaj:

—Sitiül ique aaga Cristo lapiürang aliüc, ¿neol nganüy ngo merwüneay wüx iquiáyan quiaj, mewün xicon aton? —aj.

<sup>40</sup> Pero aag aqiuüüb nej talic nej, tasaj:

—¿Ngo mermbol mendüy Teat Diosa? Cos icora aton ajlüyiür tiül aaga naél cam.

<sup>41</sup> Icora naleaing netam mamongochiür atcüy, cos tarangar xeyay ngo majneaj. Nganüy aaga teat naxey cam ngo marang nicuajind ngo majneaj —aj.

<sup>42</sup> Condom aaga naxey tasaj Teat Jesús:

—Teat Jesús, ich leaam imeaats xic wüx apmejlüy niüng irang natang nenajiüt —aj.

<sup>43</sup> Quiaj tasaj nej Teat Jesús:

—Naleaing sasaj ic xecual, nganüy apmajlüyiür tiül noic najneajay cambaj nasoic paraiso —aj nej.

*Wüx tandeow Teat Jesús**(Mt. 27:45-56; Mr. 15:33-41; Jn. 19:28-30)*

<sup>44</sup> Wüx lamatüch limnüt, quiaj pojniüt nómban meáwan wüx iüt. Tiün ram lapeay tiül pinawan nchejliow nüt.

<sup>45</sup> Nüt nómban ngo merraj, at aaga tar-rang jael nepal teomeaats nadam nangaj iüm nómban chiütaw pinawan.

<sup>46</sup> Condom Teat Jesús tepaj napac, tapiüng: —Teat, sayac tiül iwix xeespíritu —aw.

Wüx landoj mapiüng aag ayaj, quiaj tandeow.

<sup>47</sup> Condom aaga natang tiül soldados, wüx tajaw meáwan leawa tajlüy quiaj, tandeac najneaj wüx Teat Dios, tapiüng:

—Naleaing, aaga naxey quiaj ngo majiür nicuajind nisoet —aw.

<sup>48</sup> Ajcüwa nipilan leaw tajlüyiw quiaj, wüx tajawüw meáwan nguineay tajlüy, tandilileaw atoltolüw mal miüündüw nejwi; xeyay ngo majneaj mayajcüw.

<sup>49</sup> Nganüy meáwan leaw xowüy andeacüw maquiüjpüw Teat Jesús aliw quiaj, átan montaj leawa tiünüw imiünüw Galilea mandüjpiw nej. Naleaing miünquiájan almajlüyiw, teamajawüw nguineay teajlüy.

*Tamiüraad Teat Jesús**(Mt. 27:57-61; Mr. 15:42-47; Jn. 19:38-42)*

<sup>50</sup> Tajlüy nop naxey nenüt José, naw tiül cambaj Arimatea tiül üt Judea, xowüy ajneaj omeaats, arang najneaj. Nej nop tiül natang monajiüt tiül judíos.

<sup>51</sup> Aaga José quiaj teamacül majlüy tiül micambaj Teat Dios. Nej ngo majneaj majaw meáwan leawa ngo majneaj lamarangüw montangtang monajiüt.

<sup>52</sup> Tamb majaw a Pilato matün Teat Jesús mamiüt.

<sup>53</sup> Wüx landoj mawün wüx cruz Teat Jesús, quiaj tawinch tiül noic napixeran. Condom tamb mayac tiül noic oxiüt larangüch noic warraj tüeng tiüc. Tiül aaga oxiüt quiaj nganaw mamelichaw tiül nicuajind mondeow.

<sup>54</sup> Tiül aaga nüt quiaj tengual ayambüch leaw apmetam wüx nangos nüt, aton laliüc majmel nüt, quiaj amelich a nüt axoodaran.

<sup>55</sup> Ajcüwa montaj mondüüb miün Teat Jesús imiünüw Galilea, tambüw majawüw oxiüt. Tajawüw nguineay tapiiberan tiül a Teat Jesús.

<sup>56</sup> Condom tawüw quiaj, tambüw mayambüw najmboc angan soex, at najmboc angan aceite. Condom taxojtüw wüx nüt axoodaran atnej apiüng tiül aaga poch leawa Teat Dios tüüch a Moisés tanomb.

## 24

*Teat Jesús tapac taw tiül mondeow**(Mt. 28:1-10; Mr. 16:1-8; Jn. 20:1-10)*

<sup>1</sup> Ümban arraw domingo wüx amelich se-man, ajcüwa montaj tambüw niüng ajlüy oxiüt; ajoyiw mamb najmboc angan soex leawa landoj lamayambüw. At aquiüjpüw mamb alacas montaj aton.

<sup>2</sup> Camüm mapeayiw, quiaj tajawüw aaga piedra napalaran wüx oxiüt lango majlüy niüng tayacüch.

<sup>3</sup> Quiaj tajmeliw majawüw. Teat Jesús ngo majlüy quiaj niüng tapiiberan.

<sup>4</sup> Nejwi nómban mbayajow, ngo majawüw cuane apmarangüw. Quiaj majawüw ijpüw monxey alembemoj niüng ajlüyiw nejwi, xowüy lalilit apixaw nejwi.

<sup>5</sup> Quiaj mbayatoj xeyay, taxequiw tiüt omalüw. Condom ajcüwa monxey tasajüw nejwi:

—¿Neol, cuane temeyamban ningüy niüng amiüraad mondeow? cos aaga Teat Naxey almapac.

<sup>6</sup> Nej ngo majlüy ningüy cos lapac alinomb. Ich leaam imeajtsan leaw tasaj icon wüx altiül Galilea.

<sup>7</sup> Cos tapiüng, aaga Teat Naxey apmajmel teowixaw nipilan monrang ngo majneaj, apmambiyaw nej wüx cruz. Condom wüx er nüt apmapac alinomb, aw —ajüw nejwi.

<sup>8</sup> Nejwi quiaj leaad omeajtsüw wüx aaga poch tasaj nejwi Teat Jesús.

<sup>9</sup> Wüx tandilileaw imiünüw niüng ajlüy oxiüt, quiaj tambüw masajüw ajcüwa gajpanop (11) miapóstoles Teat Jesús, maquiüüb alacas leaw andüüb nej.

<sup>10</sup> Ajcüwa monamb monaj miapóstoles Teat Jesús, ajcüw ayaj nop María Magdalena, alinop Juana, alinop María mimüm Jacobo, at alacas montaj.

<sup>11</sup> Nejwi apóstoles tapiüngüw atnej nechachiw montaj tandeacüw a poch quiaj; ngome tapiüngüw aag ayaj naleaing.

<sup>12</sup> Condom teat Pedro witiüt tamb acuiür andüy niüng ajlüy oxiüt. Almapeay quiaj talech onic majaw tiül oxiüt, tajaw ngo majlüy nicuajind, áagan apix Teat Jesús nawincharan tiül alquiaj. Quiaj a nganüy tandilil mbayánan, ngo majaw cuane najlüy.

*Tiül tiüüd andüy Emaüs**(Mr. 16:12-13)*

<sup>13</sup> Aaga nüt quiaj ijpüw minipilan Teat Jesús aleambüw tiül tiüüd, laambüw andüyiw tiül noic cambaj nenüt Emaüs. Ajiür coen gajpanoic (11) kilómetros naw Jerusalén.

<sup>14</sup> Ajcüwa nipilan quiaj tengual mandeacüw wüx meáwan leawa tajlüy.

<sup>15</sup> Nejwi tengual mandeacüw wüx aag ayaj, quiaj tatüch nejwi Teat Jesús, tajüyiw nóiquian maquiüjpüw.

16 Naleaing atnej aleaic nexot nej oniüjcw, ngo majawwü jane.

17 Condom quiaj tatün manguiay nejw Teat Jesús:

—¿Cuane wüx temendeacan tenguiail ijüyiün tiül tiiüda? ¿Neol xeyay amix imeajtsana? —aw.

18 Quiaj tasaj nej nop nenüt Cleofas, tapiüng:

—¿Neol ngwüy, íquian quiaj iltiül Jerusalén aaga nüt cam, pero ngo mejaw cuane tajlüy quiaja? —aj nej.

19 Quiaj tasaj nejw:

—¿Neol, cuane najlüy quiaja? —aj nejw.

Quiaj tasajw nej:

—¿Ngo menguiay leaw tajlüy wüx Teat Jesús naw Nazarete? Nej nop nendec andeac Teat Dios, cuajantanej alndom marang, aton najneajay andeac wüx Teat Dios manguiay nípilan.

20 Naleaing montangtang miteaats, aton monajiüt tiül xecambajan tayacüw nej tewowixaw nípilan mayacüw wüx cruz, mandeow.

21 Xicona tapiüngasan nej apmawün xicon wüx aaga naél leawa meáwan nípilan judío teanamogochiün. Nganüy lamatüch er nüt tatow ndoj marangw atquiaj.

22 Nganüy acas montaj tiül xicona teamambolochiw xicon; cos wüx tambwüw majawwüx oxiiüt úmban arraw,

23 quiaj tajawwüw lango majlüy quiaj Teat Jesús niüng tapiiberan. Ndoj tandilileaw masajw xicon aag ayaj. Aton apiüngwüw tajawwüw ijpüw ángeles, tasajwüw nejw aaga Teat Jesús lapac.

24 Condom quiaj tambwüw acas saquiüjpan majawwüw oxiiüt. Tajawwüw naleaing atnej tapiüngwüw ajcüwa montaj, cos ngo majlüy quiaj Teat Jesús —ajwü nej.

25 Quiaj tasaj nejw Teat Jesús:

—¡Nguitow apac imalan! ¡Ngow apmepiügan naleaing meáwan leawa tapiüngwüw mondeac andeac Teat Dios!

26 ¿Neol cuane ipiügan, ngo metam mamongoch atquiaj aaga Cristo leaw lapiürang aliüca, wüx nganaw mamb andüy tiül cielo? —aj nejw Teat Jesús.

27 Condom tapots müüch masaj nejw wüx meáwan leaw apiüng tiül Mipoch Teat Dios, ajan wüx aaga poch leawa tüünd a Moisés, tandüüb meáwan leaw tandeacüw wüx nej mondeac andeac Teat Dios.

28 Condom wüx lapeayiw tiül a cambaj niüng andüyiw quiaj, quiaj Teat Jesús tajüic atnej apmamóngan.

29 Pero xeyay tasajsajwü:

—Icül teat, macüliüts, langwiiüts agüy, laliüc majmel nüt —ajwü.

Quiaj tacül Teat Jesús maquiüüb nejw, taquiüjpüw andüy niüng acüliw.

30 Condom wüx alchetemoj maquiüjpüw nóiquian wüx mes, quiaj Teat Jesús taxaing a pan, condom tataag orar, ndoj tambaag müüch nejw.

31 Quiaj rat oniüjcw, leaad omeajtsüw majawwüw jane nej. Naleaing Teat Jesús quiaj ndrot, lango maxomwüw majawwüw.

32 Condom quiaj tendeadndeacüw, tapiüngwü:

—¿Naleaing ngwüy, áag tapots apac omeajtsar wüx aleambaats tiül tiiüd, wüx teamasaj icor wüx Mipoch Teat Dios? —awüw.

33 Condom aag ayaj, andilileawan tiüt, tandüyiw Jerusalén alnomb. Taxomwüw ajcüwa gajpanop (11) miapóstoles Teat Jesús, at meáwan minipilan nej alcanchiümoj maquiüjpüw nóiquian.

34 Andüüban masoiqüiw:

—Naleaing Teat Jesús lapac tiül mondeow, cos landoj axomayej maquiüüb teat Simón —ajwü nejw.

35 Condom ajcüwa ijpüw quiaj tapiüngwüw aton nguineay tandeacüw maquiüjpüw Teat Jesús wüx aliw tiül tiiüd, at cos naleaing tajawwüw ranüy wüx tambaag a pan.

*Teat Jesús tejüiquichay tiül minipilan nej (Mt. 28:16-20; Mr. 16:14-18; Jn. 20:19-23)*

36 Tealeámban mandeacüw aag ayaj, quiaj majawwüw Teat Jesús alembem pinawan niüng ajlüyiw nejw. Tatepeay nejw, tapiüng:

—Tamtámban ijlüyiüna —aw.

37 Nejw mbayatoy xeyay, apiüngwüw nejw nembolooch.

38 Quiaj tasaj nejw Teat Jesús:

—¿Neol mbayaterona? ¿Neol teteotsan atquiaja?

39 Jogüy ijawan xiwix, xileaj. Xique tan sajlüy. Isamban xic mejawan, cos noic espíritu ngo majiür onij olaats matnej nganüy teamejawan sajlüy cam —aj nejw.

40 Wüx tasaj nejw aag ayaj, quiaj tüüch nejw majawwüw owix nej oleaj nej.

41 Nejw ngo majawwüw cuane marangwüw, mbayajówan, pero apac omeajtsüw majawwüw nej. Quiaj tasaj nejw Teat Jesús:

—¿Ijüiran ningüy nüeterana? —aj nejw.

42 Quiaj tujúchwi nej quiriw nechench cüet, alquiriw micün xiül.

43 Tasap, tüet quiájan niüng ajlüyiw nejw.

44 Condom tasaj nejw:

—Aaga leaw teajlüy cam tasajas icon ninguinüt wüx saliün naquiüüb icon. Tapiüngas netam majlüy atnej lasanderac wüx tiül aaga poch leawa tüünd a Moisés nomb, at leaw tapiüngwüw mondeac andeac Teat Dios, at tiül salmos aton —aj nejw.

45 Quiaj tüüch nejw majawwüw ranüy nguineay lamapiüng wüx nej tiül Mipoch Teat Dios.

<sup>46</sup> Tasaj nejiw:

—Atquiaj lajlüy larangüch wüx nawiig, cos aaga Cristo leaw lapüurang aliüc netam mambiyeran. Condom wüx er nüt apmapac alinomb naw tiül mondeow.

<sup>47</sup> Netam manderac wüx nej manguiayiw meáwan cambaj wüx aaga iüt cam, masoiquiw netam mayambüw Teat Dios, matüniw ocueaj, para mawüw wüx asoetiw. Netam memelichan mendeacan wüx nej naw tiül Jerusalén andüy quiaj.

<sup>48</sup> Nganüy icona netam mejlüyiün wüx, mepiüngan meáwan aag ayaj cos ijawan naleaing.

<sup>49</sup> Xique sanüüch miün leawa lamapiüng Xeteat Dios apmüüch icon. Icülünan ningüy tiül cambaj Jerusalén leaw ndoj meajndiün aag ayaj imiün tiül cielo. Nej apmüüch icon merangan cuajantanej —aj nejiw Teat Jesús.

*Teat Jesús tamb andüy tiül cielo*

*(Mr. 16:19-20)*

<sup>50</sup> Condom quiaj tawüw tiül cambaj, taquiiüb nejiw mamb andüy Betania. Quiaj tandic cawüx owix nej, tatün monajnej müüch nejiw Teat Dios.

<sup>51</sup> Tengualeámban atün monajnej, quiaj tacueat nejiw, tanaámb amb andüy cawüx tiül cielo.

<sup>52</sup> Minipilan nej wüx landoj maquiejliw micosüw nejiw mandeacüw najnejjay wüx Teat Jesús, quiaj tandilileaw andüyw Jerusalén, najnejjay apac omeajtsüw.

<sup>53</sup> Tanaámb ngo macueatiw ambüw tiül nadam nangaj iüm mandeacüw najnejjay arang Teat Dios.



## Najneaj nanderac leaw tapiüng SAN JUAN wüx Teat Cristo

### *Nanderac tiün marang nipilan*

<sup>1</sup> Tanomb wüx nganaw majlüy iüt, nganaw majlüy nicuajind, pero aaga Nanderac quiaj almajlüy. Aaga Nanderac quiaj almajlüy maquiiüb Teat Dios; nej Dios nej.

<sup>2</sup> Nej ajlüy nóiquian maquiiüb Teat Dios nde ajlüy.

<sup>3</sup> Meáwan leaw almajlüy, tajlüy arang nej. Nicuajind ngondom majlüy leawa almajlüy nganüy, sitiül nej ngo marang.

<sup>4</sup> Nej üüch mapac meáwan cuajantanej leaw almajlüy. Aaga neech mapacaran quiaj, arraj nipilan atnej ran arraj cuajantanej.

<sup>5</sup> Aaga ran quiaj arraj tiül pojniün; pojniün ngondom mapeniich aaga ran quiaj.

<sup>6</sup> Tajlüy nop naxey nenüt Juan, aaga neech yow nipilan; nej tiün üüch nej miün Teat Dios.

<sup>7</sup> Aaga naxey quiaj tiün mandeac wüx aaga almajlüy atnej ran quiaj, para mariariw andeac nej meáwan nipilan.

<sup>8</sup> Juan ngome nej aaga ran quiaj. Nej tiün majüiquich cuane amb apiüng aaga ran quiaj, jane wüx andeac.

<sup>9</sup> Nej aaga ran quiaj naleaing, tengual marraj meáwan nipilan; nej tiün wüx aaga iüt cam.

<sup>10</sup> Aaga ran quiaj tajlüy wüx iüt cam, pero nipilan ngo majawüw jane nej masey nej tarang meáwan leaw almajlüy.

<sup>11</sup> Nej tiün tiül micambaj nej; pero micambaj nej ngo mandüümüw nej.

<sup>12</sup> Nganüy meáwan monyar andeac nej, ajcüw ayaj tündiw majlüyiw micual nejiw Teat Dios.

<sup>13</sup> Cos ngome wijquiatoj awiüquich nejiw nipilan, átan ngome aljane tandüüm majaw wijquiamoj. Aton ngome nop naxey tandüüm majiür micual nej. Ngwüy, nejiw micual nejiw Teat Dios.

<sup>14</sup> Aaga Nanderac quiaj tiün wijquiam marang nipilan atnej icoots; at tacül ningüy maquiiüpaats. Tajawaats nej tarang xeyay cuajantanej najneaj. Nej arang leaw naleaing, cos naleaing nej anopüyan micual Teat Dios.

<sup>15</sup> Juan tiün mandeac wüx nej, tapiüng:  
—Tandeacas wüx aaga Teat Naxey cam wüx tapiüngas aliüc miün nop natang, xeyay netam ajlüy, ngo mat xic; cos wüx nganaw najlüy, nej almajlüy —aw.

<sup>16</sup> Xeyay ajüiquich mimonajneaj nej tiül meáwan icoots, cos nej üüch icoots meáwan leaw netam, üüchan.

<sup>17</sup> Aaga ajlüyay poch tüünd teat Moisés tajlüy, para ndom majawaats nguineay netam marangaats. Nganüy aaga jayats poch Teat Jesucristo tüüch icoots para alndom majawaats cuane naleaing, at para mariariiüts mimonajneaj nej.

<sup>18</sup> Naleaing nejinguind ngo maxom majaw nejay Teat Dios. Ágan anopüyan micual nej lamajaw cos almaquiiüb, nej ajüiquichay majaw nguineay ajlüy.

### *Leawa tandeac Juan Bautista*

(Mt. 3:11-12; Mr. 1:7-8; Lc. 3:15-17)

<sup>19</sup> Atcüy tapiüng a Juan wüx ajcüwa monajiüt ocueaj nipilan judío tiül Jerusalén tujchiw mamb acas miteaats ata lewitas, matüniw manguiayiw wüx aaga teamandeac quiaj. Tasajüw:

—¿Jowa ique jan ic? —ajüw.

<sup>20</sup> Nej ngo mawaich, aleáingan tapiüng:

—Xique ngome aaga Cristo lapiürang aliüc —aw.

<sup>21</sup> Tandüyiw wüx matüniw nej manguiayiw:

—¿Jane ic? ¿Ngwüy ique Elíasa? —awüw.

Juan tandüy wüx mapiüng:

—Ngwüy, ngome xique —aw.

Condom tandüyiw wüx masajüw nej:

—¿Ngwüy ique alinop nendeac andeac Teat Dios? —ajüw nej.

—Ngwüy —aw.

<sup>22</sup> Condom tasajüw nej alinomb:

—Ngwüy naleaing sapiüngan, ipiüng jane ic, isaj xicon. Cos netam napiüngan wüx sanapeayiün niüng ajlüyiw moneech xicon niünan. Ipiüng jan ic —ajüw nej.

<sup>23</sup> Quiaj tasaj nejiw a Juan:

—Xique aaga nendeac tiül wajchiüc atnej tapiüng Isafas wüx tapiüng: “Ileanguijchan mitiiüd Teat Naxey cos aliüc” —aw.

<sup>24</sup> Ajcüwa nasoiquiw mambüw majawüw a Juan quiaj, üüch nejiw mambüw fariseos.

<sup>25</sup> Condom tasajüw a Juan:

—Sitiül ngome ique a Cristo, at ngome aaga Elías, at ngome alinop nendeac andeac Teat Dios, ¿neol tapots meeach yow nipilan? —ajüw nej.

<sup>26</sup> Quiaj tasaj nejiw a Juan:

—Naleaing ipiüngan xique süüch yow. Nganüy almajlüy nop tüülan nipilan, icona ngo mejawan jane nej.

<sup>27</sup> Xique tapiüngas aliüc miün nop natang netam ajlüy, ngo mat xic, cos wüx nganaw najlüy, nej lajlüy. Sayaag ngondom nacheed aonts apaj nej, cos sayaag nicuajind xic —aj nejiw.

<sup>28</sup> Atquiaj tajlüy tiül cambaj Betábara nonüt necamb lam Jordán niüng tengual tüüch yow nipilan a Juan.

*Teat Jesús atnej sap ocueaj Teat Dios*

<sup>29</sup> Aw alinoic nüt, Juan tajaw Teat Jesús aliüc andüy niüing ajlüy nej. Quiaj tapiüing:

—Ijawan aaga naxey aliüc quiaj. Aag ayaj Teat Dios neech nej miün. Apmarangüch wüx nej atnej arangüch wüx quicheech sap nambiyaran wüx pascua, cos nej apmangüy asoet nipilan.

<sup>30</sup> Aag ayaj lanapiüing wüx, cos tapiüingas: “Aliüc miün nop teat naxey xeyay netam ajlüy, ngo mat xic. Nej ombas majlüy, xique teoj; cos wüx nganaw najlüy, nej almajlüy”, saw.

<sup>31</sup> Xique ngo najaw jane nej, nguineay apmajawüw nipilan judío. Áag tiünas nüjchiw mayariw yow —aw.

<sup>32</sup> At tapiüing a Juan:

—Xiquiaj sawaj Nangaj Espiritu ocueaj Teat Dios tiün imiün cielo atnej noic palom mejquiem wüx ombas nej.

<sup>33</sup> Xique nganaw najaw jane nej. Pero cos aaga nesaj xic niün nüüch yow nipilan lamasaj xic: “Wüx apmejaj Nangaj Espiritu miün andüy wüx ombas nop teat naxey macül wüx nej, aag ayaj apmüüch nipilan Nangaj Espiritu ocueaj Teat Dios.”

<sup>34</sup> Naleaing, nganüy lanajaw Mical Teat Dios nej, cos xiquiaj tajawas atquiaj tajlüy —aw a Juan.

*Teat Jesús tarriüid acas minipilan nej*

<sup>35</sup> Aw alinoic nüt Juan alembem quiaj lamacüüch ijpüw minipilan nej.

<sup>36</sup> Quiaj majaw aleamb quiaj Teat Jesús, tapiüing:

—Ijawan, jogüy lapeay aaga nasoi Misap Teat Dios —aw.

<sup>37</sup> Ajcüwa ijpüw minipilan Juan wüx tanguaiyiw aag ayaj, quiaj tambüw mandüjpiw Teat Jesús.

<sup>38</sup> Teat Jesús wantsat majaw almandüjpiw nej, tasaj nejiw:

—¿Cuane iyamban, teat? —aj nejiw.

Quiaj tapiüingüw:

—Rabí (amb apiüing nequiaach), ¿nguiane icül? —ajüw nej.

<sup>39</sup> Tasaj nejiw Teat Jesús:

—Tabaatsaron mejawan —aj nejiw.

Quiaj tambüw majawüw nguiane acül. Condom tacülfwan quiaj maquiüjpüw, cos langwiiüts.

<sup>40</sup> Nop tiül aaga ijpüw quiaj leaw tanguaiyiw andeac teat Juan, condom tandüjpiw Teat Jesús, aag ayaj teat Andrés, michüig teat Simón Pedro.

<sup>41</sup> Condom aaga Andrés quiaj tsajmbiüt mayamb Simón micoj nej, tasaj:

—Lanaxoman aaga Mesías nasoi a Cristo, aag lapiürang aliüc —aj.

<sup>42</sup> Condom teat Andrés taquiüüb mamb teat Simón majaw Teat Jesús. Wüx Teat Jesús tajaw a Simón, quiaj tasaj:

—Ique Simón micual teat Jonás, nde nganüy apmenüt Cefas, aag ayaj nasoi Pedro —aj nej.

*Teat Jesús tarriüid Felipe y Natanael*

<sup>43</sup> Aw alinoic nüt Teat Jesús tind amb andüy tiül iüt Galilea, quiaj taxom Felipe, tasaj:

—Mac, tabar —aj.

<sup>44</sup> Aaga Felipe quiaj naw Betsaida tiül micambajüw Andrés y Pedro.

<sup>45</sup> Condom aaga Felipe tamb mayamb Natanael. Wüx taxom tasaj:

—Lanaxoman aaga teat naxey leaw tanomb lamandeac wüx nej tiül aaga nawiig tarang Moisés. At ajcüwa mondeac andeac Teat Dios tandeacüw wüx nej. Aag ayaj nenüt Jesús, micual José, naw cambaj Nazaret —aj.

<sup>46</sup> Quiaj tapiüing Natanael:

—Jow aaga cambaj Nazaret quiaj, ¿mbich cuane najneaj alndom maw quiaja? —aw.

Quiaj tapiüing a Felipe:

—Tabar mejaw —aw.

<sup>47</sup> Wüx Teat Jesús tajaw ajngot a Natanael, quiaj tapiüing:

—Jogüy aliüc nop nipilan judío leaw ngome áag awaiich —aw.

<sup>48</sup> Quiaj tasaj nej Natanael:

—¿Neol teat, nguiane meyaag ximbas? —aj.

Quiaj tasaj nej Teat Jesús:

—Xique tajawas ic wüx nganaw mapaj ic Felipe, wüx alchetemear teowil toc —aj nej.

<sup>49</sup> Condom quiaj tasaj nej Natanael:

—Rabí, ique aaga Mical Teat Dios, ique minatang nenajiüt tiül nipilan judío —aj nej.

<sup>50</sup> Quiaj tasaj nej Teat Jesús:

—¿Neol, aag sasaj ic tajawas ic teowil toc teyar sandeaca? Naleaing apmejaj aliüc miün apmajlüy xeyay najneajneaj, ngome áagan ayaj —aj nej.

<sup>51</sup> At tasaj nejiw Teat Jesús:

—Naleaing naleaing sasaj icon, nde nganüy andüy quiaj apmejawan lejquiaw nangaj cielo, apmejawan ajcüwa ángeles ocueaj Teat Dios iünüw at andilileaw niüing ajlüy Teat Naxey —aj nejiw.

**2***Nengoch owix tiül Caná*

<sup>1</sup> Wüx er nüt tajlüy nop nengoch owix tiül cambaj Caná tiül iüt Galilea. Alquiaj mimüm Teat Jesús.

<sup>2</sup> Teat Jesús maquiüüb minipilan nej tasoiquiw mambüw quiaj aton.

<sup>3</sup> Camüm wüx tümb a vin, quiaj tasaj nej mimüm nej Teat Jesús:

—Lango majlüy vin manganeowaran —aj nej.

<sup>4</sup> Quiaj Teat Jesús tapiüing:

—Müm, ¿neol tesaj xic atquiaja? Cos xique nganaw matüch a nüt narang cuajantanej —aw.

<sup>5</sup> Quiaj tasoiquiw monbeol, asaj nejiw mimüm Teat Jesús:

—Iranang leaw apmasaj icon —aj.

<sup>6</sup> Ajlüy quiaj anaíw xor icial yow narangüch piedra. Ajcüw ayaj atam nejiw a nipilan judío wüx arangüw leawa lambójan marangüw para majlüyiw nerixix alinomb teombas Teat Dios. Ajcüwa xor quiaj ajoy ojpeacüw tengwüw gajpowüw ngan yow.

<sup>7</sup> Condom Teat Jesús tasaj monbeol:

—Ichipichan yow a xor quiaj —aj nejiw.

Quiaj tachipichaw.

<sup>8</sup> Ndoj tasaj nejiw Teat Jesús:

—Nganüy itembiün noic pite, ijoyiün mamb, ijchan aaga najlüy wüx nengoch owix —aj nejiw.

Condom atquiaj tarangüw.

<sup>9</sup> Wüx ndoj manganeow aaga yow narangüch marang vin, aaga najlüy wüx nengoch owix quiaj, nej ngo majaw nguia naw. Pero ajcüwa monbeol lamajawüw cos nejiw monpiow yow. Condom aaga najlüy wüx nengoch owix quiaj, tapaj aaga nench,

<sup>10</sup> tasaj:

—Meáwan nipilan ombas mayacüw naneajay vin. Wüx laxeyay anganeowaran, quiaj apmayacüw ngo majneajay vin. Nganüy a ique tepal aaga najneajay vin, ndójuwüw tewün —aj nej.

<sup>11</sup> Ninguiaj amelich arang ateócan Teat Jesús tiül aaga cambaj Caná tiül Galilea. Tüüch majaraw nguineay nej alndom marang cuajantanej. Quiaj minipilan nej tayaran nej andeac.

<sup>12</sup> Wüx ndoj ayaj, quiaj Teat Jesús tamb andüy tiül cambaj Capernaum, taquiiüb mimüm nej, michiig nej, minipilan nej. Tacüliw quiaj acas nüt.

*Jesús tawün leaw ngo metam majlüy tiül nangaj iüm*

(Mt. 21:12-13; Mr. 11:15-18; Lc. 19:45-46)

<sup>13</sup> Laliüc matüch a nüt majlüy aaga nangos nüt pascua ocueajiw nipilan judío. Quiaj tamb Teat Jesús andüy tiül cambaj Jerusalén.

<sup>14</sup> Wüx tajmel tiül nadam nangaj iüm, taxom quiaj monüüb boy, monüüb sap, monüüb palom, at mongowüüch tomiün alt-sotomoj quiaj.

<sup>15</sup> Wüx tajaw aag ayaj, quiaj tarang nots newüjchay para mewüjchay. Condom tawün meáwan tiül nadam nangaj iüm maquüjpüw misapüw nejiw, at miboyiw nejiw. Tawiich ninguiün mitomiünwüw mongowüüch tomiün; tatech ninguiün mimesüw nejiw.

<sup>16</sup> Tasaj monüüb palom:

—Iwüniün ningüy aag ayaj! Nde merangan ombiüm Xeteat marang plas —aj nejiw.

<sup>17</sup> Minipilan nej quiaj leaad omeajtsüw naleaing tarangüch tanomb niüng apiüng: “Xeyay sanajcüy, cos ngo mind najaw marangüw ngo majneaj tiül ombiüm Xeteat”, aw.

<sup>18</sup> Condom ajcüwa nipilan judío tatüniw manguiayiw nej:

—¿Neol terang atquiaja, cuane apmejüiquich merang najawan, majiüc nguiane iyar minajiüt merang atquiaja? —ajüw nej.

<sup>19</sup> Quiaj tasaj nejiw Teat Jesús:

—Indrojchiün ombas aaga nangaj iüm cam, ndoj xique wüx er nüt sanawitich alinomb —aj nejiw.

<sup>20</sup> Quiaj titsojow nej, tapiüngüw:

—Aaga nadam nangaj iüm cam tarangüch wüx ic miow anaíw (46) neat; ¿nguineay ipiüng ique apmewitich wüx er nüte? —awüw.

<sup>21</sup> Pero Teat Jesús ngo mandeac wüx aaga nadam nangaj iüm quiaj. Nej tandeac andüy wüx ombas nej.

<sup>22</sup> Wüx Teat Jesús tapac alinomb imiün tiül mondeow, quiaj minipilan nej leaad omeajtsüw aaga poch leaw tandeac quiaj. Aton tayaran tayacüw wüx omeajtsüw leawa nomb tarangüw mondeac andeac Teat Dios, at aaga poch tasaj nejiw Teat Jesús.

*Teat Jesús ayaag omeajtsüw meáwan nipilan*

<sup>23</sup> Wüx Teat Jesús altiül Jerusalén tiül nangos nüt pascua, xeyay nipilan tayaran leaw nej aquiaach cos tajawüw meáwan ateócan leaw nej tarang.

<sup>24</sup> Naleaing Teat Jesús ngo masap ombas majaw nejiw, cos ajaw nguineay ajlüyiw meáwan.

<sup>25</sup> Nej ngo metam nejingund masaj nej nguineay omeaats nipilan, cos nej lamajaw nguineay omeaats meáwan nipilan.

### 3

*Teat Jesús tandeac aweaag Nicodemo*

<sup>1</sup> Tajlüy nop naxey tiül fariseos nenüt Nicodemo. Nej nop nenajiüt tiül nipilan judío.

<sup>2</sup> Aaga naxey quiaj tamb majaw Teat Jesús noic ongwüüts. Tasaj:

—Rabi, sajawan Teat Dios tüüch ic mewiün mequiaach xicon; cos nejingund ngondom marang ateócan atnej ique irang sitiül ngome Teat Dios ambeol nej —aj.

<sup>3</sup> Quiaj tasaj nej Teat Jesús:

—Naleaing naleaing sasaj ic, sitiül aljane ngo wijquiam alinomb, ngome apmajlüy tiül xenipilan majaw micambaj Teat Dios —aj nej.

4 Quiaj Nicodemo tatün nej manguiay:

—¿Nguineay alndom nop natang nipilan mandlül wijquiam alinomba? ¿Mbich alndom majmel teomeaats mimüm nej alinomb wijquiam? —aj nej.

5 Quiaj tasaj nej Teat Jesús:

—Naleaing naleaing sasaj ic, sitiül nop nipilan ngo wijquiam alinomb naag yow y Nangaj Espiritu ocueaj Teat Dios, aag ayaj ngondom majmel tiül micambaj Teat Dios.

6 Leaw micual cambajiüt, cambajiüt nej; nganüy jane apwijquiam alinomb naag Nangaj Espiritu ocueaj Teat Dios ajlüy atnej jayats wijquiam, awiquiach nej Nangaj Espiritu.

7 Nde mbayamear menguiay sasaj ic quiaj: “Netam wijquiamaran alinomb”, naj ic.

8 Cos iünd apew nguiajantanej imiün, alndom menguiay aterriür, pero ngo mejaw nguiane imiün, at ngo mejaw nguiane andüy. Atquiaj ajlüy wüx nop jayats wijquiam, awiquiach nej Nangaj Espiritu ocueaj Teat Dios —aj nej.

9 Nicodemo tandüy wüx matün manguiay:

—¿Nguineay alndom marangüch atnej ipiüng quiaja? —aj nej.

10 Quiaj tasaj nej Teat Jesús:

—Ique nop ic natang nequiaach tiül nipi-lan judío. ¿Neol ngo mejaw wüx aag ayaja?

11 Naleaing naleaing sasaj ic, xicona sandeacan wüx leaw sawawan naleaing, at leaw sawawan naag xiniüjcan sandeacan manguiayaran. Pero icona ngo mendiüman meyariün sandeacan.

12 Sitiül ngo meyariün sandeac wüx leaw almajlüy ningüy wüx aaga iüt cam, ¿nguineay apmeyariün sitiül sanandeac wüx leaw almajlüy tiül cielo?

13 'Nejinguind nganaw mamb andüy cawüx tiül cielo, áag miün tiün imiün cawüx tiül cielo, aag ayaj Teat Naxey, cos imiün quiaj tiün.

14 Atnej tanomb tarang Moisés tiül waj-chiüw wüx taxaing nop narangüch ndüic mayac cawüx wüx nots xiül, atanquiaj apx-aijnguiam Teat Naxey mayacüch wüx cruz.

15 Pares meáwan jangantanej leaw apma-yar nej andeac, apmapac meáwan nüt niüng ajlüy Teat Dios.

*Teat Dios xeyay andiüm meáwan nipilan*

16 Cos Teat Dios xeyay andiüm meáwan nipilan wüx aaga iüt cam, áag tüüch miün anopüyan Micual Nej mawün wüx asoet jangantanej leaw apmayar nej andeac. Atquiaj ngondom ndrom mamb tiül aaga xeyay ngo majneaj; pero apmapac meáwan nüt niüng ajlüy Teat Dios.

17 Teat Dios ngo müüch miün anopüyan Micual nej wüx aaga iüt cam mayac asoet

nipilan. Ngwüy, nej tiün mawün wüx asoetiw meáwan nipilan wüx aaga iüt cam.

18 Jane apmayar andeac Micual Teat Dios, Teat Dios lango mayac nej asoet; pero jane ngo mayar andeac nej, mbich landoj lamayac nej asoet Teat Dios, cos ngo mayar andeac anopüyan Micual Nej.

19 Nej tiün wüx aaga iüt cam majlüy at-nej ran, cos aquiaach leaw naleaing. Pero altiül ngo mandiümüw aaga ran quiaj, cos xeyay tandiümüw aaga pojniün niüng alndom mexotayej marangüw ngo majneaj. Ajcüw ayaj lamayac nejw asoetiw Teat Dios.

20 Meáwan ajcüw leaw andiümüw marangüw ngo majneaj ngo mandiümüw aaga ran quiaj, ajcüyiw majawüw, ngo matüchiw. Cos sitiül apmambüw quiaj, aaga ran quiaj apmajüiquich ngo majneaj teamarangüw.

21 Nganüy monrang najneaj, nejw mbich ambüw niüng ajlüy aaga ran. Quiaj ajüiquichaw nguineay arangüw najneaj atnej andiüm Teat Dios —aj nej Teat Jesús.

*Juan Bautista tandeac alinomb wüx Teat Jesús.*

22 Ndoj Teat Jesús taw Jerusalén tamb andüy tiül iüt Judea aquiüüb minipilan nej. Tacülüw quiaj acas nüt, tujchiw yow nipilan.

23 Aton Juan tengual üüch yow nipilan tiül Enon, quiájan niüng ajlüy Salim cos ajlüy quiaj xeyay yow. Xeyay nipilan apeayiw quiaj müjndiw yow.

24 Aag ayaj tajlüy wüx nganaw mayacüch tiül manchiüc a Juan.

25 Condom tajlüy noic mondeac tiül nipilan judío maquiüjpüw minipilan Juan nguineay alndom najneajay majlüyiw majaw nejw Teat Dios.

26 Ndoj ajcüw aaga nipilan quiaj, tambüw masajüw a Juan:

—Rabí, ijaw nguineay teamarang aaga naxey leaw tequiüüb nonüt necamb lam Jordán, áag tesaj xicon wüx. Nganüy nej aton tengual üüch yow nipilan, meáwan laambüw mandüjpiw nej —ajüw.

27 Quiaj tasaj nejw a Juan:

—Nejinguind ngondom marang aag ayaj sitiül Teat Dios najlüy tiül cielo ngo müüch nej marang.

28 Icona tenguiayüün wüx tapiüngas, xique ngome aaga Cristo lapiürang aliüc. Xique tujndiüs niün ombas xic, nej aliüc tamiün.

29 Pues wüx nop nench apmaquiüüb nop nüx, aaga nench quiaj almajiür miamigo nej alquiaj almaquiüüb nej. Wüx anguiay nej andeac xeyay apac omeaats manguiay. Ata xique nganüy wüx sanguiaj nguineay Teat Jesús xeyay andüjpiw nej, xeyay apac ximeaats nanguiay, cos leaw ninguiay ne-tam narang.

<sup>30</sup> Nej netam marang natang, nganüy xique apmapateay satam.

*Aaga niün imiün tiül cielo*

<sup>31</sup> Aaga niün imiün tiül cielo, nej ajlüy wüx meáwan leaw almajlüy. Nganüy nop najlüy wüx iüt, aag ayaj naw wüx iüt; nej andeac wüx leaw ajlüy wüx aaga iüt cam. Nganüy aaga niün imiün tiül cielo, nej ajlüy wüx meáwan almajlüy.

<sup>32</sup> Nej andeac wüx leaw ajaw, at andeac wüx leaw anguiay; pero nejingüind ngo marayar andeac nej.

<sup>33</sup> Jane apmayar andeac nej, aag ayaj apmajaw naleaing andeac Teat Dios.

<sup>34</sup> Cos jane Teat Dios tüch miün, nej andeac leaw andeac Teat Dios, cos Teat Dios tüch nej Nangaj Miespíritu nej palanüy, ngo metam mapeax.

<sup>35</sup> Teat Dios xeyay andiüm Micual Nej; meáwan leaw almajlüy lamayac tiül owix nej.

<sup>36</sup> Jane ayar andeac Micual Teat Dios apmapac meáwan nüt niüng ajlüy Teat Dios. Nganüy jane ngo mandiüm mayar andeac Micual Teat Dios, ngome apmajaw aaga apacaran quiaj cos xeyay ajcüy majaw nej Teat Dios —aj nej*iw a Juan.*

## 4

*Teat Jesús tendeac aweaag nop najtaj naw Samaria*

<sup>1</sup> Wüx Teat Jesús tajaw nguineay ajcüwa fariseos tandeacndeacüw wüx nej cos teaxeyay minipilan nej, aton xeyay teamüch yow nipilan ngo matnej Juan;

<sup>2</sup> masey ngome nejay Teat Jesús neech yow, minipilan nej arangüw.

<sup>3</sup> Wüx Teat Jesús tajaw aag ayaj, quiaj taw quiaj tiül Judea, tandilil andüy Galilea alinomb.

<sup>4</sup> Pero netam mamong amb tiül iüt Samaria.

<sup>5</sup> Condom tatüch tiül noic nine cambaj nenüt Sicar tiül iüt Samaria. Quiájan mbeay cambaj ajlüy miüt aaga Jacob najlüy tanomb. Aaga iüt quiaj nej tüch José micual nej.

<sup>6</sup> Alquiaj aaga lol pil tarang teat Jacob tanomb. Teat Jesús cos laümb apac ajüy, chetet quiaj mbeay lol, laliüc lembem nüt.

<sup>7</sup> Quiaj tapeay nop najtaj naw Samaria mepiow yow. Teat Jesús tasaj nej;

—Nachej tigüy miyow müm, nanganeow —aj.

<sup>8</sup> Minipilan nej laambüw tiül cambaj mangalüw nüeteran.

<sup>9</sup> Aaga najtaj naw Samaria tasaj Teat Jesús:

—¿Neol techej xicueaj yow, teat? Cos ique nop ic nipilan judío, nganüy xique nop najtaj nawas Samaria. Ique ijaw nipilan judío

ngome áag andeacüw maquiüjpüw monaw Samaria —aj.

<sup>10</sup> Quiaj tasaj nej Teat Jesús:

—Sitiül mejaw leaw Teat Dios alndom müüch, aton mejaw jane nechej icueaj yow, sayaag apmetün xicueaj, condom sanüüch ic yow leaw tüch mapacaran meáwan nüt —aj.

<sup>11</sup> Quiaj tasaj nej a najtaj:

—Teat, ique ngo mejiür cuane merwüneay yow, nganüy aaga lol cam xeyay nequiüü. ¿Nguia naw apmeyer aaga yow ipiüing quiaja?

<sup>12</sup> Cos xexejchiün teat Jacob tacueat müüch xicon aaga lol cam. Nej tanganeow aaga yow, at micual nej, minimal nej. ¿Jow nganüy ique, alwüx itama, ngo matneje? —aj nej.

<sup>13</sup> Quiaj tasaj nej Teat Jesús:

—Jangantanej apmanganeow a yow cam apmind anganeow yow alinomb.

<sup>14</sup> Pero jane apmanganeow aaga yow xique sanüüch, langome apmind anganeow yow alinomb. Cos aaga yow xique sanüüch, apmajlüy tiül nej atnej noic lol teapacaw müüch nej mapac meáwan nüt —aj nej.

<sup>15</sup> Condom tasaj nej aaga najtaj:

—Teat, iich xic aaga yow ipiüing quiaj, quiaj langome apmind sanganeow yow alinomb, atquiaj ngo metam niün ningüy nayaw yow —aj nej.

<sup>16</sup> Quiaj tasaj nej Teat Jesús:

—Quiür ipaj minoj, iquiüüb miün —aj.

<sup>17</sup> Quiaj tapiüing a najtaj:

—Ngo najiür xenoj —aw.

Quiaj tasaj nej Teat Jesús:

—Naleaing ipiüing ngo mejiür minoj;

<sup>18</sup> cos lamejiür acoquiaw. Nganüy aag almequiüüb, aag ayaj ngome minoj. Naleaing tepiüing —aj nej.

<sup>19</sup> Camüm manguiay aag ayaj a najtaj, quiaj tapiüing:

—Teat, sapiüing ique nop nendeac andeac Teat Dios.

<sup>20</sup> Isaj xic neol xexejchiün tarangüw casa Teat Dios cawüx wüx aaga tüc quiaj, nganüy icona nipilan judío ipiüingan áagan tiül Jerusalén alndom marangüch casa Teat Dios —aw.

<sup>21</sup> Quiaj tasaj nej Teat Jesús:

—Netam meyar sandeac, müm, cos aliüc miün nüt wüx ngome apmetam meamban wüx aaga tüc quiaj, átan ngome apmetam meamban Jerusalén merangan casa Teat Dios.

<sup>22</sup> Icona monaw Samaria ngo mejawan jane teamerangan casa; xicona mbich sajawan jane sarangan casa, cos naw tiül nipilan judío ajlüy jane apmawün wüx asoeteran.

<sup>23</sup> Aliüc apmatüch a nüt, aag ayaj nganüy, cos jane naleaing ayamb Teat Dios wüx

omeaats, apmajüiquich naleaing wüx omeaats arang, ngo mitsoj. Cos Teat Dios aton atquiaj andiüm marangüch casa.

<sup>24</sup> Teat Dios Espiritu nej; jane apmayamb nej netam marang con omeaats, masey ngondom maxom majaw —aj nej.

<sup>25</sup> Quiaj tasaj nej a najtaj:

—Lanajaw aliüc Mesías, aaga nasocristo. Wüx nej apmapeay apmasaj icoots nguineay ajlüy meáwan cuajantanej —aj nej.

<sup>26</sup> Teat Jesús tapiüng:

—Xique aag ipiüng quiaj, tengual andeacar —aw.

<sup>27</sup> Aliünüw wüx andeacüw, quiaj ajngotoj minipilan Teat Jesús. Nejiw mbayajow wüx tajawüw Teat Jesús teandeac maquiüüb nop najtaj. Pero taton ngo matüniw nej manguiayiw cuane andiüm a najtaj, cuane wüx teamandeacüw.

<sup>28</sup> Condom quiaj taw quiaj a najtaj, acueátan quiaj mingan nej; tamb andüy tiül cambaj, tasaj nipilan:

<sup>29</sup> —Macaron, ijawan nop naxey lamasaj xic meáwan leaw lanarang. ¿Ngwüy ijaca, aaga Cristo neje? —aj nej.

<sup>30</sup> Quiaj tawüw tiül cambaj, tambüw majawüw Teat Jesús.

<sup>31</sup> Wüx nipilan nganaw mapeayiw quiaj, minipilan nej teamasajüw nej:

—Teat, mac iret —ajüw.

<sup>32</sup> Nej tasaj nej:

—Xique sajiür süet, icona ngo mejawan cuane —aj nej.

<sup>33</sup> Condom minipilan nej tapots atünayej menguiayayej:

—¿Ngwüy, aljane tajamiün üet neje? —awüw.

<sup>34</sup> Quiaj Teat Jesús tasaj nej:

—Icona apac imeajtsan wüx landoj iretiün, xique apac ximeaats wüx sarang leaw Xeteat Dios tüüch xic niün narang, cos sandiüm nandondoch minajiüt nej.

<sup>35</sup> Icona wüx lapiürüch corrül ipiüangan: “Wüx lamatüch apiqüiw caaw, quiaj apxaijnguiam omeaats corrül”, irawan. Nganüy xique sasaj icon: Netam mejawan a corrül, cos nganüy lajneaj xaijnguiam omeaats corrül.

<sup>36</sup> Jane arang xenajiüt maxaing sapiür, sanangüy alinoic nüt, cos aaga arang quiaj apmajlüy meáwan nüt. Aaga nepiür, maquiüüb nexaing omeaats corrül, apmapac omeajtsüw nóiquian.

<sup>37</sup> Ningüy ajüic naleaing leaw apiürang: “Pálwüx nepiür, pálwüx nexaing”.

<sup>38</sup> Xique lanüüch icon meamban merangan xenajiüt. Aag ayaj apmajlüy atnej wüx nop mayambüch mamb maxaing omeaats corrül, masey ngome nej nepiür; cos pálwüx nesaj nipilan wüx xique, nganüy icona

ipeánan mesajüw mayambüw xic —aj nejw Teat Jesús.

<sup>39</sup> Xeyay nipilan monaw tiül aaga cambaj tiül iüt Samaria taryiw andeac Teat Jesús wüx tanguiayiw andeac aaga najtaj, cos tapiüng: “Tasaj xic meáwan leaw lanarang”, maw.

<sup>40</sup> Wüx tapeayiw quiaj monaw tiül aaga cambaj quiaj, tapots masajüw Teat Jesús macül quiaj maquiüüpüw. Quiaj tacül quiaj ic nüt.

<sup>41</sup> Xeyay nipilan taryiw nej andeac wüx tanguiayiw nejw Teat Jesús tengual aquiaach.

<sup>42</sup> Condom tasajüw a najtaj:

—Nganüy mbich lanayariün andeac nej cos nejw tanguiayisan andeac, ngome áagan leaw tesaj xicon wüx nej. Nganüy sajawan naleaing nej aaga Cristo leaw lapiürang aliüc mawün wüx asoet nipilan meáwan wüx iüt —ajüw nej.

*Teat Jesús tamongoch iün andeow micual nop nenajiüt*

<sup>43</sup> Wüx tamong ic nüt quiaj, Teat Jesús taw Samaria, tamb andüy Galilea.

<sup>44</sup> Masey nejw Teat Jesús teandeac nguineay nop nendeac andeac Teat Dios ngome andiüram tiül miüt nej, nganüy nej apmandilil mandüy quiaj alinomb.

<sup>45</sup> Wüx tapeay tiül Galilea, apac omeajtsüw majawüw nej monaw quiaj, cos nejw laiünüw Jerusalén aton majawüw nangos nüt pascua. Tajawüw quiaj meáwan leaw nej tarang wüx nangos nüt.

<sup>46</sup> Condom Teat Jesús tandilil alinomb andüy cambaj Caná tiül Galilea, niüng ninguinüt tangowüüch yow marang vin. Ajlüy tiül cambaj Capernaum nop natang nenajiüt ocueaj cambaj, xeyay iün andeow micual nej.

<sup>47</sup> Aaga naxey quiaj wüx tanguiay Teat Jesús lapeay Galilea imiün Judea, tamb matüch quiaj majaw. Tapots matün ocueaj Teat Jesús mamb aniüng nej mamongoch iün andeow micual nej, cos laxeyay, laliüc mandeow.

<sup>48</sup> Quiaj tasaj nej Teat Jesús:

—Icona sitiül ngo mejawan ateócan ngome apmeyariün sandeac —aj.

<sup>49</sup> Naleaing aaga nenajiüt xeyay tatün ocueaj Teat Jesús, tasaj:

—Teat, ich majmiüc imal imeaats, tabar wüxan nganaw mandeow xecual —aj nej.

<sup>50</sup> Condom quiaj tasaj nej Teat Jesús:

—Quiür ijtsor, micual lajneaj —aj.

Aaga naxey tayar andeac Teat Jesús, quiaj tajtsor.

<sup>51</sup> Wüx laámb apmapeay aniüng nej, tambüw mangochiw nej mimos nej, tapiüngüw:

—Micual lajneaj —ajüw nej.

<sup>52</sup> Condom quiaj tatün manguaiy nejiw cuame ores tajneaj micual nej. Quiaj tapiüngüw:

—Tim lanchejliow nüt tacueat müüch nej nerraar, quiaj tajneaj—awüw.

<sup>53</sup> Quiaj leaad omeaats aaga naxey, naleaing aaga ores wüx tasaj nej Teat Jesús: “Micual lajneaj”, maj nej. Quiaj aaga naxey tayar andeac Teat Jesús maquiiüb meáwan leaw alaniüng nej.

<sup>54</sup> Aaga leaw tarang Teat Jesús wüx tandilil andüy Galilea imiün Judea, aag ayaj amb ijmbüw ateócan lamarang quiaj.

## 5

### *Tajneaj nop ndron ombas tiül Betesda*

<sup>1</sup> Wüx ndoj ayaj lamatüch a nüt wüx nipilan judío ajiürüw noic nangos nüt. Quiaj Teat Jesús tamb alinomb andüy Jerusalén.

<sup>2</sup> Ajlüy quiaj tiül Jerusalén noic apal ombeay cambaj niüng among sap. Alquiaj noic nadam onüüg yow, minüt nej Betesda tiül ombeayiw nipilan judío. Ayey nej tiüt acokuaiw iüm ngo majiür owil.

<sup>3</sup> Ajlüyiw quiaj xeyay moniün andeow: altiül nesomb, altiül necoex, altiül ndron ombas ngondom majüy. Teamacüliw ngow, cojores apmendalalüy a yow quiaj.

<sup>4</sup> Cos nguiajnguiaj iün nop ángel ocueaj Teat Dios maól a yow, ndoj jane ombas apmajmel tiül a yow quiaj apmajneaj iün andeow.

<sup>5</sup> Alquiaj nop naxey lamajiür nimioiw gajpopec (38) neat iün andeow.

<sup>6</sup> Teat Jesús tajaw alpiüüm quiaj, lamajaw lamajiür xeyay neat iün andeow a naxey quiaj, quiaj tasaj:

—¿Ngwüy indüüm mejneaja?—aj.

<sup>7</sup> Quiaj tasaj nej aaga niün andeow:

—Teat, ngo najiür jane mayac xic tiül yow wüx apmendalalüy. Cos wüx lasamb sanajmel, quiaj lajmel alinop ombas nej—aj nej.

<sup>8</sup> Quiaj tasaj nej Teat Jesús:

—Witiür, ixaing mitec ijüy—aj.

<sup>9</sup> Andüüban ajneaj a naxey quiaj, taxaing mitec nej, tajüy. Pero cos aaga nüt quiaj, noic nüt axoodaran,

<sup>10</sup> quiaj ajcüwa monajiüt tiül judíos tasajüw aaga naxey lajneaj quiaj:

—Nganüy nüt axoodaran, ngondom mexaing mejoy mitec—ajüw.

<sup>11</sup> Quiaj tasaj nejiw aaga naxey:

—Aaga neech xic najneaj, nej nesaj xic: “Ixaing mitec, ijüy”—aj xic.

<sup>12</sup> Quiaj tatüniw nej manguaiyiw:

—¿Jane aaga nesaj ic: “Ixaing mitec, ijüy”?—ajüw nej.

<sup>13</sup> Naleaing aaga naxey quiaj ngo majaw jane netaag nej majneaj, cos tajlüyiw quiaj xeyay nipilan, nganüy Teat Jesús laáw quiaj.

<sup>14</sup> Condom Teat Jesús taxom nej tiül nadam nangaj iüm. Tasaj:

—Ijaw nganüy lerneaj, nde mendüy wüx merang nisoet, ngana maxom ic alinoic xeyay ngo majneaj—aj nej.

<sup>15</sup> Condom tamb a naxey quiaj masaj ajcüwa monajiüt tiül judíos Teat Jesús netaag nej majneaj.

<sup>16</sup> Quiaj ajcüwa monajiüt tajcüyiw majawüw Teat Jesús, tayambüw ombas mambiyaw cos arang cuajantanej wüx nüt netam maxoodaran.

<sup>17</sup> Condom Teat Jesús tasaj nejiw:

—Xeteat meáwan nüt arang najiüt, ata xique aton—aj nejiw.

<sup>18</sup> Quiájan ajcüwa monajiüt tandiüümüw mambiyaw nej cos ngome áagan arang wüx nüt axoodaran, pero cos tayac atnej Dios nej wüx tapiüng miteat nej Teat Dios.

### *Leaw Micual Teat Dios alndom marang*

<sup>19</sup> Condom quiaj tasaj nejiw Teat Jesús:

—Naleaing naleaing sasaj icon, Micual Teat Dios ngondom marang nicuajind arárgan; nej arang leaw ajaw arang miteat nej. Cos meáwan leaw arang miteat nej, átan micual nej alndom marang aton.

<sup>20</sup> Teat Dios xeyay andiüm Micual Nej, üüch nej majaw meáwan leawa nej teamarang; aliüc miün apmüüch majaw alngün xeyay najneaj leawa icona apmbayameron mejawan.

<sup>21</sup> Cos Teat Dios apacüüch mondeow, atquiaj Micual Nej aton apmapacüüch jane nej andiüm.

<sup>22</sup> Ngome nejay Teat Dios apmayac asoeteran, meáwan ayaj lamayac teowix Micual Nej.

<sup>23</sup> Atquiaj meáwan nipilan netam marangüw casa Micual Nej atnej arangüw casa Teat Dios. Jane ngo mandiüm Micual Teat Dios, átan ngo mandiüm Teat Dios, cos Teat Dios neech nej miün.

<sup>24</sup> Naleaing sasaj icon: Jane apmayac omeaats wüx manguaiy sandeac, aton mayar andeac aaga neech xic niün, nej apmapac meáwan nüt, lango majmel asoet. Apmapac meáwan nüt niüng ajlüy Teat Dios.

<sup>25</sup> Naleaing sasaj icon, aliüc apmatüch a nüt, aag ayaj nganüy, wüx mondeow apmanguaiyiw andeac Micual Teat Dios. Jane apmanguaiy mayar andeac apmapac.

<sup>26</sup> Teat Dios üüch mapacaran, atquiaj Micual Nej aton alndom müüch mapacaran, cos atquiaj üüch nej Teat Dios marang.

<sup>27</sup> At lamüüch majaw wüx asoeteran cos nej Teat Naxey.

<sup>28</sup> Nde mbayameron menguiayiün aaga sasaj icon cam, cos aliüc miün nüt wüx meáwan mondeow apmanguaiyiw nej andeac.

<sup>29</sup> Jane tarangüw najneaj apmawüw tiül mondeow mapacüw meawan nüt tiül cielo; nganüy monarang ngo majneaj apmapacüw aton majmel asoetiwiw nejiw.

*Ajlüy nejüiquich jane nej Teat Cristo*

<sup>30</sup> 'Xique ngondom narang nicuajind sandüman xique, sarang leawa sasoi. Wüx xique sayac asoet aljane, sayac leaw naleaing nej tarang. Xique ngo nateots narang sandüman xique, sarang leaw andiüm Xeteat Dios, cos nej tüüch xic niün.

<sup>31</sup> Sitiül xiquiáyan quiaj teandeaac wüx leaw alndom narang, alndom mapiürang aag ayaj ngo membeat.

<sup>32</sup> Ajlüy nop nendeac naleaing wüx xique nguineay alndom narang. Xique sawaw leaw nej andeaac wüx xique, aag ayaj xeyay nembeat.

<sup>33</sup> Icona teajchiün mambaran niüng ajlüy Juan matüniw manguiayiw nej. Leaw nej tapiüng wüx xique aag ayaj naleaing.

<sup>34</sup> Xique ngo metam xic aljane mapiüng jane xic. Aag ayaj sasaj icon cos sitiül apmeyerariün sandeaac apmeriowan wüx isoetiün.

<sup>35</sup> Aaga teat Juan tajlüy atnej nots najquiol teatitit andaab marraj nipilan. At icona tapac imeajtsan acas nüt wüx tarraj icon cos tenguiayiw aquiaach nej.

<sup>36</sup> Xique sajiür cuane nejüiquich jane xic; aag ayaj alwüx ambeat, ngome áagan leaw tapiüng a Juan. Meáwan leawa xic sarang, leaw tündiüs niün narang, ajüiquich majaw naleaing Teat Dios neech xic niün.

<sup>37</sup> Aaga Teat neech xic niün quiaj, aton lamandeaac wüx xique; masey icona ngo menguiayiw andeaac nej, ngo mexoman mejawan.

<sup>38</sup> Meáwan andeaac nej ngo macül wüx imeajtsan, cos ngo mendiüman meyarariün andeaac aaga leawa Teat Dios tüüch miün.

<sup>39</sup> Icona xeyay ipacan wüx meteowan Mipoch Teat Dios cos ipiüangan quiaj alndom mepacan meáwan nüt tiül cielo. ¿Neol ngo mejawana, tiül Mipoch Teat Dios andeaac wüx xique?

<sup>40</sup> Naleaing icona ngo mendiüman meyarariün sandeaac nüüch icon mepacan meáwan nüt tiül cielo.

<sup>41</sup> Xique ngo nayamb nipilan marangüw xic casa ombeayiw.

<sup>42</sup> Xique sayaag imbasan, sawaw icona ngo mendiüman Teat Dios.

<sup>43</sup> Jogüy xique tiünas, tüüch xic niün Xeteat Dios, pero icona ngo meyarariün sandeaac. Jondot miün nop nejáyan quiaj, aag ayaj mbich apmeyerariün andeaac nej.

<sup>44</sup> ¿Nguineay icona apmeyerariün andeaac Teat Dios sitiül mbich meaw ilombochayon icoyónan quiaj? Cos ngo meyacan wüx imeajtsan meyamban mandeaac najneaj wüx imbasan Teat Dios.

<sup>45</sup> Nde mepiüangan xique sanayac isoetiün niüng ajlüy Xeteat Dios; cos leaw arang atquiaj, aag ayaj a poch tüünd Moisés leaw ipiüangan indüjpiün. Aag ayaj ajüiquich nguineay irangan.

<sup>46</sup> Jondot naleaing iyariün andeaac Moisés, apmeyerariün sandeaac aton, cos Moisés tapiüng wüx xique.

<sup>47</sup> ¿Nguineay apmeyerariün sandeaac, sitiül andeaac teat Moisés ngo meyarariün? —aj nejiw Teat Jesús.

## 6

*Teat Jesús tüüch üetiw acoquiaw mil monxey*

(Mt. 14:13-21; Mr. 6:30-44; Lc. 9:10-17)

<sup>1</sup> Noic nüt Teat Jesús tamb andüy necamb nadam yow Galilea, aaga nasoi Tiberias aton.

<sup>2</sup> Xeyay nipilan tandüjpiw nej mamb cos lamajawüw tarang xeyay ateočan, tamongoch iün andeow xeyay moniün andeow.

<sup>3</sup> Condom Teat Jesús tamb andüy wüx nop tüüch chetet quiaj maquiüb minipilan nej.

<sup>4</sup> Laliü matüch aaga nangos nüt pascua oceuaijw nipilan judío.

<sup>5</sup> Wüx Teat Jesús taxaing omal majaw aliücüw xeyay nipilan, quiaj tasaj a Felipe:

—¿Nguineay apmangalaats nüeteran müjchiüts metiw meáwan ajcüwa nipilan quiaja? —aj.

<sup>6</sup> Aag ayaj tandeac cos andiüm majaw cuane apmapiüng a Felipe, cos Teat Jesús lamajaw cuane apmarang.

<sup>7</sup> Quiaj tasaj nej a Felipe:

—Teat, masey majlüy ijquaiw coic miow (200) tomiün denario majon pan, ngome apmatüch nejiw nequirquiriw —aj nej.

<sup>8</sup> Condom quiaj alinop minipilan nej Teat Jesús, aaga Andrés michiig a Simón Pedro, tapiüng:

<sup>9</sup> —Alningüy nop nench ajiür acoquiaw pan cebada alijpüw nine cüet. Pero ¿nguitow apmawiül aaga atoyay nipilan quiaja? —aw.

<sup>10</sup> Condom quiaj tasaj nejiw Teat Jesús:

—Isajan meáwan chetemoj —aj nejiw.

Cos niüng almajlüyiw ajlüy xeyay nine nateaic soex, quiaj chetetoj tiüt, atüch tam acoquiaw mil monxey.

<sup>11</sup> Quiaj Teat Jesús taxaing aaga acoquiaw pan; condom wüx landoj müüch gracias Teat Dios, quiaj tambaag müüch minipilan nej. Condom minipilan nej tajneaw müjchiw meáwan ajcüwa nipilan. Atanquiaj tarang wüx aaga cüet aton, tüüch nejiw leaw tandiümüw.

<sup>12</sup> Condom wüx lapaxiow üetiw, quiaj tasaj minipilan nej:



—Ixainguiün meáwan leawa nenaw, ngondom majcueat tiüt nicuajind —aj nejiw.

<sup>13</sup> Almümb maxainguw, leaw nenaw üetiw tiül aaga acoquiaw pan cebada leaw tajlüy, chipiüt gajpiüp (12) nchep.

<sup>14</sup> Ajcüwa nipilan almajawüw aaga ateócan lamarang Teat Jesús quiaj, tapiüngüw:

—Naleaing, nejay aaga nendeac andeac Teat Dios leaw netam müün ningüy wüx iüt cam —awüw.

<sup>15</sup> Nej a Teat Jesús wüx tajaw andiümüm masapüw nej mayacüw marang minatang nenajiüt oceajiw nejiw, quiaj taw quiaj anopüyan. Tamb andüy miünquiaj tiül tiüc.

*Teat Jesús tajüy teomal yow*  
(Mt. 14:22-27; Mr. 6:45-52)

<sup>16</sup> Wüx langwiiüts, quiaj minipilan nej Teat Jesús tawüw tiüt tambüw andüyiw mbeay aaga nadam yow.

<sup>17</sup> Lapojniowüy, nganaw mapeay quiaj Teat Jesús, quiaj tajtepiw tiül nop müx mamongoja a yow quiaj andüyiw cambaj Capernaum.

<sup>18</sup> Condom quiaj taw noic nadam iünd xowüy lapac, tayac nadamdám omal yow.

<sup>19</sup> Wüx lamiünquiaj ambüw, quiaj tajawüw Teat Jesús laliüc matüch nejiw, teajüy amb teomal yow. Quiaj mbayatoj.

<sup>20</sup> Nej tasaj nejiw:

—Nde mbayameron, xique, ngome aljane —aj nejiw.

<sup>21</sup> Nej apac omeajtsüw, quiaj tatepichaw nej tiül müx, camüm mayajcüw lapeayiw niüng andüyiw quiaj.

*Nipilan tayambüw Teat Jesús*

<sup>22</sup> Ajcüwa nipilan tacüliwan necamb yow aaga ongwiiüts quiaj. Wüx rat tiüt tealeámban mayambüw quiaj Teat Jesús; cos tajawüw ambüw tiül müx minipilan nej nejíwan quiaj, pero Teat Jesús ngo mamb; aton cos áagan a müx tajlüy quiaj.

<sup>23</sup> Aliünüw quiaj niüng Teat Jesús tatün oceaj Teat Dios metiw ajcüwa nipilan quiaj; quiaj apeayiw quiaj acas müx imiünüw tiül cambaj Tiberias.

<sup>24</sup> Wüx tajawüw naleaing ngo majlüy quiaj Teat Jesús átan minipilan nej, quiaj tajtepiw tiül ajcüwa müx quiaj, tambüw andüyiw Capernaum mayambüw Teat Jesús.

*Jesús, aaga pan üüch mapacaran*

<sup>25</sup> Wüx tapeayiw necamb aaga nadam yow quiaj, quiaj taxomüw Teat Jesús, tasajüw:

—Rabí ¿ngüt tepeay ningüye? —ajüw.

<sup>26</sup> Quiaj tasaj nejiw Teat Jesús:

—Naleaing sasaj icon, sawaw tengual meyamban xic cos paxiüt iretiün, ngome

teameyamban xic cos ijawan neol andom narang cuajantanej.

<sup>27</sup> Netam merangan najiüt meyamban cuane meatiün. Pero nde meyacan imeajtsan wüx leaw andom mexoman ningüy wüx iüt cos ngome apmaiüc, apmamong najen. Netam meyamban leawa ngome apmamong; aaga neech mapacaran meáwan nüt niüng ajlüy Teat Dios. Aag ayaj Teat Naxey apmüüch icon, cos Teat Dios lamayac teowix nej marang aag ayaj —aj nejiw.

<sup>28</sup> Condom quiaj tatüniw manguiayiw nej:

—¿Cuane netam narangana? ¿Nguineay alndom narangan leaw Teat Dios andiüma? —awüw.

<sup>29</sup> Quiaj tasaj nejiw Teat Jesús:

—Leaw andiüm Teat Dios majaw merangan, aag ayaj meyariün andeac jane üüch müün —aj nejiw.

<sup>30</sup> Condom quiaj tasajüw nej:

—¿Cuane alndom merang najawan para nayariün indeaca? Jow nganüy, ¿cuane apmeranga?

<sup>31</sup> Cos xexejchiün tündiw nüeteran wüx tajlüyiw tiül wajchiüc, atnej apiüng tiül Mípoch Teat Dios: “Tündiw nüeteran imiün cielo” —ajüw nej.

<sup>32</sup> Quiaj tasaj nejiw Teat Jesús:

—Naleaing sasaj icon, ngome mixejchiün Moisés neech nejiw a nüeteran quiaj; nejaj Xetate Dios neech nejiw. Nganüy nej lamüüch icon leaw najneajay nüeteran imiün tiül cielo.

<sup>33</sup> Cos nüeteran leawa Teat Dios üüch nganüy, aag ayaj tüüch müün imiün tiül cielo, para meáwan nipilan wüx iüt mapacüw meáwan nüt —aj nejiw.

<sup>34</sup> Condom tasajüw nej:

—Teat, iich xicon aaga nüeteran ipiüng quiaj —ajüw nej.

<sup>35</sup> Quiaj tasaj nejiw Teat Jesús:

—Xique aaga nüeteran alndom müüch mapacaran meáwan nüt. Cos jane aliüc niüng sajlüy langome apmind üet; jane apmayar sandeac langome apmind anganeow yow alinomb.

<sup>36</sup> Naleaing landoj nasaj icon, pero cos icona ngo meyariün sandeac masey lamejawan xic.

<sup>37</sup> Meáwan leaw Xetate Dios üüch xic majlüy xenipilan nejiw, nejiw aliücüw niüng sajlüy, xique ngome sanawüniw.

<sup>38</sup> Xique tiünas ximiün cielo narang leaw andiüm aaga neech xic niün, ngome xiün narang leaw xique sandiüm.

<sup>39</sup> Xetate Dios, aag neech xic niün, nej ngo mandiüm majaw ndrom nop tiül nejiw leaw nej lamüüch xic; leawa nej andiüm, aag ayaj napactüchiw alinoic nüt.

<sup>40</sup> Leaw Xetate Dios andiüm, aag ayaj meáwan jane apmajaw Mical nejiw mayar

andeaç, apmapac meáwan nüt; xique sana-  
pacúçhiw alinoic nüt —aj nejiw Teat Jesús.

<sup>41</sup> Quiaj ajcúwa monajiüt tiül nipilan judío  
tapots andeaçdeacúw ngo majneaj wüx  
Teat Jesús cos apiüng: “Xique aaga nüeteran  
tiün imiün cielo”, maw.

<sup>42</sup> At tapiüngüw:

—¿Neol, ngome aag ayaj Jesús micual José?  
Icoots ajawaats jane miteat nej mimüm nej.  
Jow nganüy, ¿neol tapiüng nej imiün tiül  
cielo tiüna? —awüw.

<sup>43</sup> Condom quiaj tasaj nejiw Teat Jesús:

—Icuaeatiün indeaçdeacaç quiaj.

<sup>44</sup> Nejiwingüind ngondom miün niüng sajlüy  
sitiül Xeteat Dios neech xic niün ngo mam-  
beol nej miün. Aton xique sanapacúçh  
alinoic nüt majlüy niüng sajlüy.

<sup>45</sup> Tiül minawijquiaw mondeaç andeaç  
Teat Dios apiüng: “Teat Dios apmaquiaaach  
meáwan nipilan.” Atquiaj a nganüy jane  
ayar andeaç Teat Dios mayac wüx omeaats  
aliüc niüng sajlüy.

<sup>46</sup> Nejiwingüind alinop ngo maxom majaw  
Xeteat Dios, aag miün leaw tiün imiün niüng  
ajlüy nej, nej ajaw.

<sup>47</sup> Naleaing naleaing sasaj icon, jane  
ayar sandeaç aag ayaj lamajiür mapacaran  
nganüy, at apmajiür mapacaran meáwan  
nüt tiül cielo.

<sup>48</sup> Xique aaga nüeteran neech mapacaran  
meáwan nüt.

<sup>49</sup> Mixejchiün tanomb tündiw nüeteran  
imiün cielo wüx tajlüyiw tiül wajchiüc, pero  
tandeowüw.

<sup>50</sup> Nganüy xique teanasaj icon wüx leaw  
nüeteran tiün imiün tiül cielo, cos jane  
apmüet aag ayaj langome apmandeow.

<sup>51</sup> Xique aaga nüeteran almapac, tiün  
imiün cielo. Jane apmüet aaga nüeteran  
cam apmapac meáwan nüt. Aaga nüeteran  
leaw xique sanüüch, aag ayaj xecuerpo. Cos  
sanandeow ingow andeow meáwan nipilan  
wüx iüt —aj nejiw Teat Jesús.

<sup>52</sup> Condom ajcúwa nipilan judío quiaj,  
tapots andeaçdeacúw tiülan nejiw,  
tapiüngüw:

—¿Nguineay apiüng aag ayaj nej nüeterana?  
¿Mbich icoots apmatsambaats nej! —awüw.

<sup>53</sup> Quiaj tasaj nejiw Teat Jesús:

—Naleaing sasaj icon, sitiül ngo met-  
samban a Teat Naxey, ngo menganeowan  
miçueiej nej, ngondom mepacaç meáwan  
nüt.

<sup>54</sup> Jane apmatsamb xic manganeow xe-  
queiej apmapac meáwan nüt; cos xique sana-  
pacúçh alinoic nüt.

<sup>55</sup> Xique aaga naleaing nüeteran, at xe-  
queiej aton aaga naleaing nanganeowaran.

<sup>56</sup> Jane apmatsamb xic manganeow xe-  
queiej apmaw wüx asoet nej; quiaj apmajlüy  
nóiquian maquiiüb xic, ata xique sanajlüy  
nóiquian maquiiüb.

<sup>57</sup> Xeteat Dios neech xic niün almapac, ata  
xique aton salnapac cos nej almapac. Atan-  
quiaj jane apmatsamb xic sanüüch mapac  
meáwan nüt.

<sup>58</sup> Xique aaga atnej nüeteran tiün imiün  
tiül cielo. Aaga nüeteran quiaj ngome atnej  
Teat Dios tüüch mixejchiüts müetiw wüx  
tajlüyiw tiül wajchiüc. Masey tüetiw, pero  
tandeowüw. Jane apmüet aaga nüeteran  
sasaj icon quiaj, apmapac meáwan nüt —aj  
nejiw Teat Jesús.

<sup>59</sup> Atquiaj taquiaaach Teat Jesús tiül noic  
sinagoga tiül Capernaum niüng xenengue-  
jow nipilan judío.

*Leaw üüch mapacaran meáwan nüt*

<sup>60</sup> Wüx tanguaiyiw aag ayaj, altiül minip-  
ilan nej tapiüngüw:

—Aag ayaj xeyay naél. ¿Mbich jane al-  
ndom manguiay mayac wüx omeaats aag  
ayaja? —awüw.

<sup>61</sup> Condom Teat Jesús wüx tajaw teandeaç-  
deacúw wüx aag ayaj, quiaj tatün man-  
guiay nejiw:

—¿Ngo majneaj meyajcan aag ayaja?

<sup>62</sup> ¿Cuane apmepiüangan ndot mejawan  
landiül Teat Naxey andüy tiül cielo niüng  
tajlüy nomba?

<sup>63</sup> Aagan Nangaj Espiritu ocueaj Teat  
Dios alndom müüch mapacaran; nganüy  
aaga cuerpo ngondom mambeol nicuajind.  
Meáwan poch leaw lanasaj icon quiaj  
Nangaj Espiritu üüch xic nendeac, ajcúw  
ayaj tüüch mapacaran.

<sup>64</sup> Xique sawaw ngome meáwan icona  
iyariün sandeaç —aj nejiw.

Tandeac atquiaj Teat Jesús cos lamajaw  
jane ngo mayar nej andeaç, at lamajaw jane  
apmayac nej teowix monajiüt.

<sup>65</sup> Aton tasaj nejiw:

—Lanasaj icon, nejiwingüind ngondom  
miün niüng sajlüy mayar xepoch sitiül  
Xeteat Dios ngo mambeol nej miün —aj  
nejiw.

<sup>66</sup> Ajan quiaj xeyayiw tiül minipilan nej  
tanotoj tiüt, lango mandüpiw nej.

<sup>67</sup> Condom quiaj Teat Jesús tatün man-  
guiay ajcúwa gajpiüp (12) minipilan nej:

—¿Jow icona, ngwüy indüman meriümban  
mecuaeatiün xic atona? —aj nejiw.

<sup>68</sup> Quiaj tasaj nej Simón Pedro:

—Teat ¿jane alinop alndom nandüjpiün?  
Cos íquian quiaj andeaç a poch leaw alndom  
müüch mapacaran meáwan nüt.

<sup>69</sup> Xicona lanayariün indeac, aton sa-  
jawan naleaing ique a Cristo lapiürang aliüc,  
aaga Nangaj Micual Teat Dios almapac  
—aw.

<sup>70</sup> Quiaj tasaj nejiw Teat Jesús:

—¿Neol ngwüy, lanarriüid icon gajpiüp  
(12) xenipilan? Pero naleaing sawaw nop tiül  
icona minipilan nej nimeech —aj nejiw.

<sup>71</sup> Teat Jesús tandeac aag ayaj wüx ombas Judas, aaga micual Simón Iscariote, cos lamajaw aaga Judas quiaj apmayac nej tewixaw monajiüt, masey nej naw tiül a gajpiüp (12) minipilan nej.

## 7

*Michiig Teat Jesús ngo mayariw nej andeac*

<sup>1</sup> Wüx ndoj aag ayaj, Teat Jesús tajüy maquiaach tiülan iüt Galilea; ngo mandüüm mamb tiül iüt Judea, cos ajcüwa monajiüt tiül judíos andiüüm mambiyaw nej.

<sup>2</sup> Laliüc matüch nangos nüt wüx nipilan judío arangüw namix nine nden leaaw omeajtsüw wüx tajlüyiw tiül wajchiüc mixejchiw nej.

<sup>3</sup> Quiaj michiig nej Teat Jesús tasajüw nej: —¿Neol tecülan ningüye? Quiür indüy tiül iüt Judea; atquiaj minipilan monlüyiw quiaj apndom majawüw leawa teamerang.

<sup>4</sup> Cos sitiül nop andiüm majaraw, ngonondom marang leaw arang axotüyan. Nganüy ique sitiül temendiüm mejaraw, ijüiquichay nómban majawüw meáwan nipilan leaw alndom merang —ajüw nej.

<sup>5</sup> Ninguiaj ajüiquich nejw michiig nej ngo mayariw nej andeac.

<sup>6</sup> Condom quiaj Teat Jesús tasaj nejw: —Xique nganaw matüch a nüt namb quiaj, icona ngünantanej nüt alndom meamban.

<sup>7</sup> Cos ngome apmajcüyiw majawüw icon nipilan; pero ajcüyiw majawüw xic, cos aleíngan sapaj ocueajiw wüx arangüw ngo majneaj.

<sup>8</sup> Quiüran icona ijawan a nangos nüt quiaj; xique ngo namb cos nganaw matüch namb —aj nejw.

<sup>9</sup> Ndoj masaj nejw aag ayaj tacülan tiül iüt Galilea.

*Teat Jesús tamb majaw nangos nüt*

<sup>10</sup> Condom wüx laambüw michiig nej, ndoj Teat Jesús aton tamb Jerusalén tiül iüt Judea majaw aaga nangos nüt quiaj, axotüyan cos ngo mandüüm majawüw nej nipilan.

<sup>11</sup> Ajcüwa monajiüt tiül judíos tayambüw nej quiaj, tapiüngüw:

—¿Wül aaga naxey? —awüw.

<sup>12</sup> At tiül a nipilan aton tandeacndeacüw wüx nej. Altiül tapiüngüw: “Aaga naxey najneaj arang”; altiül tapiüngüw: “Ngo majneaj arang, xowüy awaiüch nipilan”, awüw.

<sup>13</sup> Pero nejinguid ngo mandeac wüx ombas nej manguiayaran, cos imboloj mandüyiw monajiüt.

<sup>14</sup> Lapeay pinawan ajlü a nangos nüt, quiaj Teat Jesús tajmel tiül nadam nangaj iüm, tapots aquiaach nipilan.

<sup>15</sup> Quiaj mbayatoj ajcüwa monajiüt, tapiüngüw:

—¿Nguineay tendüy aag ayaja, sitiül nej ngo mequiajchaya? —awüw.

<sup>16</sup> Quiaj tasaj nejw Teat Jesús:

—Leawa xique saquiaach, aag ayaj ngome xepoch; xique saquiaach leaw asaj xic aaga neech xic niün.

<sup>17</sup> Sitiül aljane naleaing andiüm marang leaw andiüm Teat Dios, nej apmajaw sitiül meáwan saquiaach quiaj naleaing ocueaj Teat Dios, tengwangwüy sandeácan.

<sup>18</sup> Jangantanej leaw andeac awünan tiül omeaats, aag ayaj teamayamb malom-boocharan; nganüy jane ayamb nguineay alndom manderac najneaj wüx aaga neech nej miün, aag ayaj andeac naleaing, ngo mawaiüch.

<sup>19</sup> ¿Neol ngwa, teat Moisés tüüch icon aaga poch netam merangana? Naleaing nejinguind tiül icona ngo marang atnej tapiüng. Jow nganüy, ¿neol tendiüman membiyan xique? —aj nejw.

<sup>20</sup> Quiaj tasajüw nej nipilan:

—¿Lamaxom ic nimeech! ¿Neol, jane teamandiüm mambiy ique? —ajüw nej.

<sup>21</sup> Quiaj tasaj nejw Teat Jesús:

—Xeyay tamb wüx imeajtsan wüx tarangas noic najneaj wüx nüt axoodaran.

<sup>22</sup> Ipiügan teat Moisés tüüch icon leaw ajlüyay arangüch, aaga circuncisión, masey ngome nejay tayac, cos nde tanomb lamarangüw mixejchiün. Nganüy icona itajcan circuncidar nop masey wüx nüt axoodaran.

<sup>23</sup> Atquiaj ajlüyay merangan masey wüx nüt axoodaran, cos ipiügan netam merangan aaga poch tayac teat Moisés. Jow nganüy, ¿neol tejcüyüün mejawan xic cos samongoch iün andeow nop naxey wüx nüt axoodarana?

<sup>24</sup> Netam mejawan nop cuane arang, ndoj cas teyacan asoet. Nde meyacyacánan asoet jangantanej sitiül ngo mejawan naleaing cuane arang —aj nejw Teat Jesús.

*Teat Jesús apiüng nguiane imiün*

<sup>25</sup> Condom acas nejw leaw monaw quiaj tiül Jerusalén tapots andeacndeacüw wüx Teat Jesús, tapiüngüw:

—¿Neol ngome aag ayaj leaw teamayambüw mambiyawa?

<sup>26</sup> Nganüy joyaj tengual aquiaach nipilan, nejinguind ngo mapal nej. ¿Ngwüy ijaca monajiüt lamapiüngüw naleaing aaga naxey quiaj, nej aaga lapiürang netam miüna?

<sup>27</sup> Icootsa ajawaats nguia naw aaga naxey quiaj, pero wüx aliüc a Cristo lapiürang aliüc nejinguind ngome apmajaw nguia naw —awüw.

<sup>28</sup> Teat Jesús alquiaj teaquiaach nipilan tiül nadam nangaj iüm; tandeac napac, tapiüng:

—Icona ijawan jane xic; ijawan nguiane nawas. Naleaing xique ngo niün narang leaw sandiüman xique, tiünas cos Xeteat tüüch xic niün. Icona ngo mejawan jane nej, pero naleaing nej Teat Dios nej.

<sup>29</sup> Xique sawaj jane nej, cos nej tüüch xic niün —aw.

<sup>30</sup> Quiaj tandiümüw masapüw nej; pero nejinguind ngo majntsop masap cos nganaw matüch a nüt ndeaaam.

<sup>31</sup> Xeyaj sawaj nej andeac, tapiüngüw:

—Aaga naxey quiaj naleaing nej áag lapiürang netam miün. ¿Mbich alndom majlüy alinop marang atécán atnej nej lamaranga? —awüw.

*Fariseos tasajüw mongot masapüw Teat Jesús*

<sup>32</sup> Wüx ajcüwa fariseos tanguiaiyw nipilan teandecüw najneaj wüx Teat Jesús, quiaj nejiw maquiüppüw ajcüwa montangtang miteaats tasajüw mongot monjiür aaga nadam nangaj iüm masapüw nej.

<sup>33</sup> Tengualeámбан aag ayaj, Teat Jesús tasaj nipilan:

—Áagan acas nüt sanacül ningüy naquiiüb icon, condom sanandilil sandüy niüng ajlüy aaga neech xic niün.

<sup>34</sup> Icona masey apmeyamban xic, naleaing ngome apmexoman, cos ngondom meamban niüng sanamb —aj nejiw.

<sup>35</sup> Quiaj ajcüwa monajiüt tapots andeacndecüw nejeyéjan quiaj, tapiüngüw:

—¿Nguiane apiüng apmamba niüng ngondom maxomaatsa? ¿Ngwüy ijaca, apmamb maquiaach ajcüwa icootsa leaw tambüw tiül iüt Grecia, ngwüy tiül alinoic iüta; ngwüy naleaingue apmamb maquiaach pálwüx nipilana?

<sup>36</sup> ¿Nguineay amb aag apiüng quiaj wüx tapiüng: “Apmeyamban xic pero ngome apmexoman xic, cos ngondom meamban niüng sanajlüy?” —awüw.

*Yow neech mapacaran meáwan nüt*

<sup>37</sup> Aaga nüt wüx ndojndojay nangos nüt, wüxay chipiwaran quiaj, quiaj Teat Jesús witiüt, tandeac napac, tapiüng:

—Sitiül aljane nind anganeow yow, ich miün niüng sajlüy manganeow.

<sup>38</sup> Cos apiüng tiül Mipoch Teat Dios, jane ayar sandeac apmajlüy atnej teapacaw tiül omeaats nej aaga yow leaw üüch mapacaran —aw Teat Jesús.

<sup>39</sup> Pues aaga yow quiaj apiüng wüx Nangaj Espíritu ocueaj Teat Dios leaw apmüjndiw meáwan monyar andeac Teat Jesús. Aaga Nangaj Espíritu quiaj nganaw miün cos Teat Jesús nganaw mandilil andüy tiül cielo.

*Nipilan ngo mandeacüw nóiquian*

<sup>40</sup> Altiül nipilan wüx tanguiaiyw aag ayaj tapiüngüw:

—Naleaing aaga naxey quiaj nejay aaga nendec andeac Teat Dios leaw netam miün —awüw.

<sup>41</sup> Altiül tapiüngüw:

—Aag ayaj a Cristo leawa Teat Dios tapiüng apmüüch miün mawün asoet nipilan —awüw.

Altiül tapiüngüw:

—¿Mbich tiül Galilea alndom maw quiaj aaga Cristo?

<sup>42</sup> Cos Mipoch Teat Dios apiüng aaga Cristo netam majlüy nop naw tiül acualaats mixejchiiüts David. Aton netam maw tiül cambaj Belén niüng tanomb wijquiaat David —awüw.

<sup>43</sup> Atquiaj tajlüy, palpálwüx tandeacüw wüx Teat Jesús.

<sup>44</sup> Altiül tandiümüw masapüw nej mamb tiül manchiüc, pero nejinguind ngo majntsop masap.

*Monajiüt ngo mayariw andeac Teat Jesús*

<sup>45</sup> Wüx ajcüwa mongot monjiür nadam nangaj iüm tandilileaw niüng ajlüyiw fariseos maquiüüb montangtang miteaats, quiaj tatüneran manguiayaranüw:

—¿Wül, neol ngo mequiüjpan miün a naxeye? —ajowiw.

<sup>46</sup> Quiaj tapiüngüw a mongot monjiür nadam nangaj iüm:

—Nejinguind ngome áag mandeac atnej teamandec aaga naxey —awüw.

<sup>47</sup> Quiaj tasajüw nejiw a fariseos:

—¿Ngwüy, at icona aton lamawaiich icon?

<sup>48</sup> ¿Neol, cuane ijawan, mbich aljane monajiüt tiül icootsa, ngwüy aljane tiül fariseos lamayariw andeac neje?

<sup>49</sup> Ajcüwan a nipilan leaw ngo majawüw wüx aaga poch tüünd Moisés, nejiw monyar andeac nej. Nejiw cuajparüw, apmambüw tiül ngo majneaj —ajüw nejiw.

<sup>50</sup> Alquiaj aaga Nicodemo, áag tamb majaw Teat Jesús noic ongwiiüts, cos nop nej fariseo aton. Quiaj tasaj nejiw:

<sup>51</sup> —¿Neol, nguiane tenguiaiyiün aag ayaja? Sajaw ngondom mayacaats asoet nop naxey sitiül ngome ombas mapajaats manguiayiiüts andeac, majawaats cuane arang —aj nejiw.

<sup>52</sup> Quiaj tasajüw nej:

—¿Ngwüy ique aton nerioiw Galilea? Iyamb, iteow tiül Mipoch Teat Dios, quiaj apmejaw ngome áag ajlüy nop nendec andeac Teat Dios naw Galilea —ajüw nej.

<sup>53</sup> Condom quiaj tacueatiw, tajtsoriw anopnopoj.

## 8

*Nop najtaj ndeaaan wüx naxey*

<sup>1</sup> Condom Teat Jesús tamb andüy wüx mi-tüc Olivos.

<sup>2</sup> Raw miün tüüt, quiaj tandilil andüy tiül nadam nangaj iüm. Xeyay nipilan tambüw majawüw nej; quiaj chetet tapots maquiaach nejw.

<sup>3</sup> Camüm tapeayiw quiaj mondüy wüx aaga poch tüünd Moisés, at ajcüwa fariseos. Aquüüpüw mamb nop najtaj asapüw wüx naxey, mayacüw pinawan nipilan niüng ajlüy Teat Jesús.

<sup>4</sup> Quiaj tasajüw Teat Jesús:

—Teat, aaga najtaj cam ndeaan wüx naxey.

<sup>5</sup> Tiül aaga poch tüünd Moisés apiüng ne-tam majlos mandeow ajcüwa montaj mon-rang atquiaj. Jowa ique, ¿cuane ipiünga? —ajüw nej.

<sup>6</sup> Aag ayaj asajüwan majawüw cuane apmapiüng, nguineay maxomüw cuane wüx mayacüw nej asoet. Quiaj Teat Jesús mejquiet tüüt, tapots majenchjench tüüt owix nej.

<sup>7</sup> Cos tanaám matüniw manguiayiw nej, quiaj lembet, tasaj nejw:

—Jangantanej tiül icona ayaag ngo majiür nisoet, nej ich malox ombas aaga najtaj cam —aj nejw.

<sup>8</sup> Ndoj mejquiet tüüt alinomb, tandüy wüx majenchjench tüüt owix nej.

<sup>9</sup> Quiaj ajcüwa monajiüt wüx tanguiayiw aag ayaj tayajcüw ngo majneaj, taxinguiaw; tawüw quiaj nopnöpan, ajan wüx leaw natang, ndójwüx meáwan nejw tawüw quiaj. Néjan quiaj Teat Jesús tacül quiaj niüng ajlüy aaga najtaj.

<sup>10</sup> Quiaj Teat Jesús witiüt alinomb. Wüx tajaw néjan a najtaj aliün quiaj, quiaj tasaj: —Müm najtaj, ¿wüliwe? ¿Neol, nejingund lango mayacüw isoete? —aj.

<sup>11</sup> Quiaj tasaj nej a najtaj:

—Ngwüy teat, nejingund —aj nej.

Quiaj tasaj nej Teat Jesús:

—Ata xique aton ngo nayac isoet. Quiür, nde mendüy wüx merang nisoet —aj nej.

*Teat Jesús atnej ran wüx iüt*

<sup>12</sup> Teat Jesús tandüy wüx maquiaach nipi-lan, tapiüng:

—Xique sajlüy ningüy wüx aaga iüt cam atnej ran. Jane andüüb xic ngome apmajüy tiül pojniün; cos xique sanarraj mitüütüw nejw, aton apmapacüw meáwan nüt —aw.

<sup>13</sup> Quiaj tasajüw nej ajcüwa fariseos:

—Ique indeácan aag ayaj; nguineay sana-jawan sitiül naleaing, cos wüx nop andeac wüxan ombas nej, aag ayaj ngo membeat —ajüw nej.

<sup>14</sup> Quiaj tasaj nejw Teat Jesús:

—Masey sandeac wüxan xique, naleaing leaw sandeac aag ayaj nembeat; cos sawaw nguiane ximiün tüünas, at sawaw nguiane

sandüy sanamb. Pero icona ngo mejawan nguiane ximiün tüünas, átan ngo mejawan nguiane sandüy sanamb.

<sup>15</sup> Icona iyacan asoet atnej ajlüy meran-gan ningüy wüx iüt. Xique ngo niün nayac asoet nejingund.

<sup>16</sup> Ndot xique nayac asoet aljane, sa-narang naleaing atnej netam; cos ngome xiquian quiaj wüx sarang, saquiüb wüx Xeteat, aaga neech xic niün.

<sup>17</sup> Tiül minawijquian apiüng sitiül ajlüy jipüw monjaw mandeacüw nóiquian leawa tajawüw, netam mayarich andeacüw nejw.

<sup>18</sup> Nganüy sasaj icon xique nop nendec leawa sawaw wüx xique, alinop nejay Xeteat aaga neech xic niün, nej aton apiüng wüx jane xique —aj nejw Teat Jesús.

<sup>19</sup> Condom quiaj tatüniw manguiayiw nej: —¿Nguiane almajlüy miteate? —ajüw nej.

Quiaj tasaj nejw Teat Jesús:

—Icona ngo mejawan jane xic, átan Xeteat ngo mejawan jane nej. Sitiül icona me-jawan jane xic, at Xeteat aton apmejawan jane nej —aj nejw.

<sup>20</sup> Atquiaj tapiüng Teat Jesús wüx tengui-al aquiaach nipilan tiül nadam nangaj iüm niüng ajlüy iquial nichech. Nejingund ngo masap nej cos nganaw matüch minüt nej ndeaam.

*Niüng sanamb icona ngondom meamban*

<sup>21</sup> Condom tasaj nejw alinomb Teat Jesús: —Xique sanamb, icona apmeyamban xic. Naleaing icona apmendeowan tiül isoetiün. Niüng sanamb icona ngondom meamban quiaj —aj nejw.

<sup>22</sup> Quiaj ajcüwa monajiüt tiül judíos tandeacndeacüw wüx, tapiüngüw:

—¿Ngwüy, apmembiyay nejáyan quiaja, áag tapiüng ngondom mambaats niüng ap-mamba? —awüw.

<sup>23</sup> Quiaj tasaj nejw Teat Jesús:

—Icona nerowan wüx iüt; xique nawas cawüx tiül cielo. Icona ijüran iniüangan ningüy; xique tiül cielo saniüng.

<sup>24</sup> Aag tasajas icon apmendeowan wüx isoetiün, cos ngo meyariün mepiüangan naleaing xiquiay aaga teanasaj icon wüx quiaj —aj nejw.

<sup>25</sup> Condom quiaj tatüniw nej manguiayiw: —¿Neol, jane ique? —ajüw nej.

Quiaj tasaj nejw Teat Jesús:

—Landoj lanasaj icon jane xic.

<sup>26</sup> Alndom nasaj icon xeyay cuajantanej, at alndom najüiquich nguineay irangan; pero ngo metan narang, cos sandeac leaw asaj xic aaga neech xic niün. Aag ayaj sasaj meáwan nipilan cos sawaw aag ayaj naleaing —aj nejw.

<sup>27</sup> Naleaing nejw nómban ngo maxomüw omeajtsüw nguineay Teat Jesús teamasaj nejw wüx Teat Dios.

<sup>28</sup> Áag tasaj nejiw Teat Jesús:

—Wüx landoj mexaingüün meyacan cawüx aaga Teat Naxey, quiaj apmejawan xique. Ngo narang nicuajind xiquíáyan quiaj, xique sandeac leaw Teat Dios asaj xic nandeaç.

<sup>29</sup> Aaga neech xic niün tanaám̄b aqiiüüb xic; nej nómban ngo macueat xic cos xique meáwan nüt sarang leaw nej andiüm —aj nejiw.

<sup>30</sup> Wüx tandeac atquiaj xeyay nipilan tayaran nej andeaç.

*Aaga naleaing nanderac quiaj alndom mawün wüx jangantanej*

<sup>31</sup> Condom quiaj Teat Jesús tasaj ajcüwa nipilan judío leawa lamaryiwan andeaç nej:

—Sitiül icona tanaám̄b meyacan wüx imeajtsan leaw sasaj icon, apmejlüiyün tiül xenipilan.

<sup>32</sup> Quiaj apmejawan cuane naleaing; ndoj aaga naleaing quiaj apmawün icon wüx isotiün —aj nejiw.

<sup>33</sup> Quiaj tasajüw nej:

—Xicona áagan Abraham xexejchiün, ngome áag sarangan mimos aljane. Jow nganüy ¿neol tepiung apmewün xicon wüxe? —ajüw nej.

<sup>34</sup> Quiaj tasaj nejiw Teat Jesús:

—Naleaing naleaing sasaj icon, meáwan nipilan leaw arang nisoet ajlüy atnej mos ocueaj nisoet.

<sup>35</sup> Nop mos ngondom mateoraw tiül nacualaran cos aag ayaj acas nüt acül quiaj. Nganüy nop nacualaran meáwan nüt acül quiaj.

<sup>36</sup> Sitiül Micual Teat Dios apmawün icon wüx, naleaing apmeriowan wüx nómban.

<sup>37</sup> Xique lanajaw icona mixejchiün Abraham; pero altiül indiüman membiyan xic cos ngo mind meyariün leawa sasaj icon.

<sup>38</sup> Xique sandeac leawa sawaw niüng ajlüy Xeteat; nganüy icona irangan leawa inguiayüün asaj icon miteatiün —aj nejiw Teat Jesús.

<sup>39</sup> Quiaj tasajüw nej:

—Néjan quiaj Abraham xeteatiün —awüw.

Quiaj tasaj nejiw Teat Jesús:

—Sitiülme naleaing micual icon Abraham, neol ngo merangan atnej tarang.

<sup>40</sup> Nganüy icona indiüman membiyan xic masey teanasaj icon naleaing leaw Teat Dios asaj xic. Mixejchiün Abraham ngome atquiaj tarang.

<sup>41</sup> Icona indüjpiün wüx atnej tarangüw miteatiün —aj nejiw.

Quiaj tasajüw nej:

—Xicona ngo macual xicon pálwüx; sajiüwan nop xeteatiün, aag ayaj Teat Dios —ajüw nej.

<sup>42</sup> Quiaj tasaj nejiw Teat Jesús:

—Sitiül naleaing Teat Dios miteatiün, apmendiüman xic, cos xique ximiün niüng ajlüy Teat Dios tiünas. Xique ngo nfünan, nej tiüch xic niün.

<sup>43</sup> ¿Neol ngondom mexoman imeajtsan wüx leawa sandeaca? Cos ngo mendiüman menguiayüün meyariün leawa teanasaj icon.

<sup>44</sup> Icona lamiteatiün nimeech cos ajlüyay indiüman merangan leaw andiüm nej. Aaga nimeech quiaj nop nej nembiy nipilan ajlüyay. Nómban ngo marang leaw naleaing, átan ngo mapiüng leaw naleaing. Meáwan andeaç awaiich, cos nej minatang newaiich, aton nej miteat monwaiich.

<sup>45</sup> Nganüy a xique sandeac leaw naleaing, áag ngo meyariün.

<sup>46</sup> ¿Jane tiül icona alndom majüiquich sitiül xique sajiür nisoete? Sitiül xique teanasaj icon leaw naleaing, ¿neol ngo meyariün sandeaca?

<sup>47</sup> Jane altiül minipilan Teat Dios, Mipoch Teat Dios andiüm manguiay. Nganüy icona cos ngome ocueaj icon Teat Dios, áag ngo mendiüman menguiayüün andeaç nej —aj nejiw.

*Wüx nganaw majlüy Abraham, Cristo al-majlüy*

<sup>48</sup> Condom quiaj ajcüwa monajiüt tiül nipilan judío tasajüw nej:

—¿Neol ngwa, naleaing tapiüngasan, ique irang atnej nop naw Samaria? ¡Aton lamaxom ic nimeech! —ajüw nej.

<sup>49</sup> Quiaj tasaj nejiw Teat Jesús:

—Xique ngo majlüy wüx ximbas nimeech. Sarang leaw andiüm Xeteat, nganüy icona indeacan ngo majneaj wüx ximbas.

<sup>50</sup> Xique ngo nayamb nerangrangüy wüx majaw xic nipilan. Ajlüy nop andiüm majaw narangüch casa. Nej apmajüiquich asoeteran.

<sup>51</sup> Naleaing sasaj icon, jane apmayar sandeac mayac wüx omeaats ngome apmandeow nómban —aj nejiw.

<sup>52</sup> Condom quiaj tasajüw nej ajcüwa nipilan:

—Nganüy mbich lanajawan alwüx imbas nimeech. Cos teat Abraham at meáwan mondeac andeaç Teat Dios tandeowüw; nganüy ique ipiüng: “Jane ayar sandeac leaw xic sapiüng, nej nómban ngome apmandeow”, iraw.

<sup>53</sup> ¿Neol, jowa ique, alwüx itam ijlüy, ngo matnej xexejchiün teat Abrahama? Cos nej tandeow, aton meáwan mondeac andeaç Teat Dios tandeowüw. ¿Jowa ique, jane ic? —ajüw nej.

<sup>54</sup> Quiaj tasaj nejiw Teat Jesús:

—Sitiül ndot xiquíáyan quiaj teasalom-bojchay, aag ayaj ngo membeat nicuajind.

Pero cos Xeteat Dios, áaga ipiüangan Midiosan, nej teamandeaç najneaj wüx xique.

<sup>55</sup> Icona ngo mejawan jane nej; xique saw jaw jane. Sitiül napiüing ngo najaw, aag ayaj tenguaal sawaiich atnej icona teamerangan. Nganüy xique naleaing sawaw jane nej, aton sarang leaw apiüing.

<sup>56</sup> Mixejchiün Abraham tapac omeaats wüx tajaw saliüc —aj nejiw.

<sup>57</sup> Condom quiaj tasajüw nej ajcüwa monajjiüt tiül judíos:

—Ique nganaw mejiür ic miow gajpowüw (50) mineat, ¿nguineay ipiüing tejaw teat Abraham? —ajüw nej.

<sup>58</sup> Quiaj tasaj nejiw Teat Jesús:

—Naleaing naleaing sasaj icon, wüx nganaw majlüy Abraham, xique salnajlüy —aj nejiw.

<sup>59</sup> Quiaj taxainguw piedra maloxiw nej; pero nej textotüy, taw tiül nadam nangaj iüm, tamong amb pinawan nejiw, quiaj tamb.

## 9

*Teat Jesús tüüch ram oniiüg nop somb*

<sup>1</sup> Teat Jesús wüx tamong tiül tüüd, tajaw nop naxey nesomb nde wijquiaw.

<sup>2</sup> Quiaj minipilan nej Teat Jesús tatüniw nej manguiayiw:

—Rabi ¿neol wijquiaat nesomb aaga naxey quiaja? ¿jane tajiür nisoete, miteat neje ngwüy mimüm neje, ngwüy nejay ajiür nisoete? —ajüw nej.

<sup>3</sup> Teat Jesús tasaj nejiw:

—Ngome cos nej nerang nisoet, taton ngome miteat nej mimüm nej. Tajlüy atquiaj cos Teat Dios atquiaj apmajüiquich leaw alndom marang.

<sup>4</sup> Wüxan aliün tiüt nüt netam narang minajiüt aaga neech xic niün, cos aliüc apojniüm, quiaj nejinguind langondom marang najiüt.

<sup>5</sup> Wüxan saliün ningüy wüx iüt, sajlüy atnej ran —aj nejiw.

<sup>6</sup> Ndójan mapiüing aag ayaj, quiaj tateonts tiüt onts ombeay nej, tarang ndeor. Condom tayac wüx oniiüg aaga nesomb quiaj.

<sup>7</sup> Quiaj tasaj:

—Quiür ijants iniiüg tiül oniiüg yow nenüt Siloé —aj. Aaga poch Siloé quiaj apiüing wüx leaw üünd mamb.

Quiaj aaga nesomb tamb mapej oniiüg; camüm mandilil lajneaj, larraw oniiüg.

<sup>8</sup> Condom quiaj meáwan monlüy niüng ajlüy aniüng nej, at meáwan leaw tajawüw nej nesomb tapiüingüw:

—¿Neol, ngome aag ayaj ajlüyay chetem, metüneaye? —awüw.

<sup>9</sup> Altiül tapiüingüw:

—Nejay —awüw.

Altiül tapiüingüw:

—Ngome áag, masey ajüic atnej —awüw.

Quiaj tasaj nejiw aaga naxey:

—Xiquiaj —aj nejiw.

<sup>10</sup> Condom tatüniw nej manguiayiw:

—¿Nguineay tejneaja, rat iniiüga? —ajüw nej.

<sup>11</sup> Quiaj tasaj nejiw:

—Aaga naxey nenüt Jesús tarang ndeor mayac wüx xiniüüg, condom tasaj xic: “Quiür tiül Siloé, ipej iniiüg quiaj”, aj xic. Quiaj tambas. Wüx tapejiüs xiniüüg, quiaj rat sawaw —aj nejiw.

<sup>12</sup> Quiaj tatüniw nej manguiayiw:

—¿Nguiane almajlüy aaga naxey quiaja? —awüw.

Quiaj tapiüing:

—Ngo najaw —aw.

*Fariseos atüntüniw manguiayiw aaga lamong misomb quiaj*

<sup>13</sup> Condom quiaj taquiüjpüw mamb aaga naxey lamong misomb andüy niüng ajlüyiw a fariseos.

<sup>14</sup> Aaga nüt wüx Teat Jesús tarang ndeor müüch majneaj aaga somb, aag ayaj wüx nüt axoodaran.

<sup>15</sup> Quiaj ajcüwa fariseos tandüyiw wüx matüniw manguiayiw aaga naxey nguineay tajneaj oniiüg. Quiaj tasaj nejiw:

—Tayac wüx xiniüüg ndeor. Condom tapejiüs xiniüüg, nganüy saxom najaw —aj nejiw.

<sup>16</sup> Altiül fariseos tapiüingüw:

—Aaga naxey quiaj ngome ocueaj Teat Dios, cos arang cuajantanej wüx nüt axoodaran —awüw.

Altiül tapiüingüw:

—Aaga naxey ngome nop nerang ngo majneaj, cos nop nerang ngo majneaj ngondom marang meáwan najneaj leaw nej arang quiaj —awüw.

Atquiaj nejiw ngo mandeacüw nóiquian.

<sup>17</sup> Condom tandüyiw wüx matüniw manguiayiw aaga naxey lamong misomb quiaj, tasajüw:

—Jowa ique ¿cuane ipiüing, jane nej aaga naxey ipiüing netaag majneaj iniiüga? —ajüw.

Quiaj tasaj nejiw:

—Xique sapiüing nej nop nendeac andeac Teat Dios —aj nejiw.

<sup>18</sup> Naleaing ajcüwa monajiüt tiül judíos ngo mandiümüw mayariw andeac aaga naxey quiaj; apiüingüw ngome naleaing tesomb, nganüy lajneaj. Quiaj tapajüw miteat nej,

<sup>19</sup> tatüniw manguiayiw:

—¿Aag agüy micualana, ipiüangan nesomb wijquiaata? Jow nganüy, ¿nguineay rat oniiüga? —ajüw.

<sup>20</sup> Quiaj miteat nej tapiüingüw:

—Naleaing nej xecualan nde wijquiaw nesomb.

<sup>21</sup> Pero ngo najawan nguineay tajneaj, jane neech nej ram oniiüg. Itüniün menguiayüün nejaj; nej latang, alndom masaj icon nguineay tajlüy —awüw.

<sup>22</sup> Atquiaj tapiüngüw miteat nej cos timboloj mandüyw ajcüwa monajiüt, cos ajcüwa monajiüt lamandeaüw sitiül aljane mapiüing naleaing Teat Jesús nej aaga Cristo lapiürang aliüc, nómban apmajwan tiül a sinagoga.

<sup>23</sup> Áag tapiüngüw miteat nej: “Itüniün menguiayüün nejaj cos nej latang”, awüw.

<sup>24</sup> Condom monajiüt tandüyw wüx mapajüw masajüw aaga naxey lamong misomb quiaj, tasajüw:

—Nganüy mbich isaj xicon naleaing, nde mewaiich; cos xicona sawawan Teat Dios netaag ic majneaj; aaga naxey quiaj nop nejiür nisoet, ngondom mataag ic majneaj —ajüw nej.

<sup>25</sup> Quiaj tasaj nejiw:

—Xique ngo najaw sitiül nej nop nejiür nisoet. Leaw xique sawaw tajlüyüs nesombas, nganüy larraw xiniüg —aj nejiw.

<sup>26</sup> Tandüyw wüx matüniw manguiayiw:

—¿Nguineay tarang wüx imbasa? ¿Nguineay tüüch ram iniüüga? —ajüw nej.

<sup>27</sup> Quiaj tasaj nejiw:

—Lanasaj icon, pero naleaing icona ngo mendüüman menguiayüün. ¿Neol nganüy tendüüman napiüing alinomba? ¿Ngwüy, icona aton indüüman mendüjpiüna? —aj nejiw.

<sup>28</sup> Quiaj tajcüyw, taliqiw nej, tasajüw:

—Ique minipilan aaga naxey quiaj, nganüy xicona mbich minipilan xicon teat Moisés.

<sup>29</sup> Xicona sawawan Teat Dios tandeac aweaag teat Moisés; nganüy aaga naxey quiaj ngo najawan nguia naw —ajüw nej.

<sup>30</sup> Quiaj tasaj nejiw aaga naxey:

—¿Nguineay aag ayaja? Icona ngo mejawan nguia naw, nganüy a xique sawaw lamüüch ram xiniüg, aag ayaj xeyay najneaj.

<sup>31</sup> Ajawaats Teat Dios ngo manguiay andeac nop nejiür nisoet; nej ambeol leaw monyamb nej, monrang leaw nej andiüm.

<sup>32</sup> Ngome áag ajlüy aljane müüch ram oniiüg nop nesomb nde wijquiaw.

<sup>33</sup> Sitiül aaga naxey quiaj ngome Teat Dios neech nej miün, ngondom marang nicuajind —aj nejiw.

<sup>34</sup> Quiaj tasajüw nej:

—Cuane ique, cos ique wüx wijquiatear lamejiür xeyay nisoet. Jow nganüy indüüm mequiaach xicon —ajüw nej.

Quiaj tawüniw nej tiül a sinagoga.

*Ajlüyw atnej somb*

<sup>35</sup> Teat Jesús tanguiy lajwan tiül sinagoga aaga naxey quiaj. Condom wüx taxom, quiaj tasaj:

—¿Jowa ique, iyar andeac Micual Teat Diosa? —aj.

<sup>36</sup> Quiaj tasaj nej aaga naxey:

—Teat, isaj xic jane, para alndom nayar andeac nej —aj nej.

<sup>37</sup> Quiaj tasaj nej Teat Jesús:

—Lamejaw, cos nganüy nejaj tengual indeac anaag —aj.

<sup>38</sup> Condom quiaj aaga naxey taquieel micos nej tiüt teombas Teat Jesús, tasaj:

—Sayar indeac Teat —aj.

<sup>39</sup> Quiaj Teat Jesús tapiüing:

—Xique tüünas wüx aaga iüt cam najaw wüx asoeteran. Jane nesomb apndom maxom majaw; pero jane apiüangan ajaw apmajlüy atnej nesomb —aw.

<sup>40</sup> Condom altiül fariseos leaw aliw niüing ajlüy nej, wüx tanguiyiw aag ayaj, quiaj tasajüw nej:

—¿Ngwüy ipiüing xicona nesombasan atona? —ajüw nej.

<sup>41</sup> Quiaj tasaj nejiw Teat Jesús:

—Sitiül ndot icona nersomban, ngome apmejiüran nisoet. Pero cos ipiüangan ijawan meáwan, atquiaj apmecülfünan tiül isoetiün —aj nejiw.

## 10

### *Andeac wüx micorrül sap*

<sup>1</sup> Aton Teat Jesús tapiüing:

—Naleaing naleaing sasaj icon, jane ngo majmel amb teombeay micorrül sap, pero apmajmel amb wüx otüeng corrül, aag ayaj nop need, nop nerang ngo majneaj.

<sup>2</sup> Nganüy nop nejiür sap ajmel amb teombeay corrül.

<sup>3</sup> Aaga najlüy wüx micorrül sap apmaleaag ombeay corrül majmel nejiür sap mawün misap nej. Ajcüwa sap anguiayiw nej andeac, aton apaj minüt misap nej mawün tiül corrül.

<sup>4</sup> Wüx lamawün misap nej, condom apmamong ombas, misap nej apmandüjpiw nej, cos anguiayiw nej andeac.

<sup>5</sup> Nejiw ngome apmandüjpiw nop pálwüx, apmecüürüw cos ngo manguiayiw andeac pálwüx nipilan —aw.

<sup>6</sup> Aaga poch quiaj tasaj nejiw Teat Jesús, pero nejiw ngo majawüw cuane wüx apiüing.

### *Teat Jesús aaga najneaj nejiür sap*

<sup>7</sup> Condom Teat Jesús tandüy wüx masaj nejiw, tapiüing:

—Naleaing naleaing sasaj icon: Xique aaga ombeay micorrül sap.

<sup>8</sup> Meáwan leawa ombas miünw, moneed nejiw, monrang ngo majneaj. Naleaing



ajcūwa sap ngo manguaiyw andeacūw, ngo mandūjpiw nejiw.

<sup>9</sup> Xique atnej ombeay corrül; jane apmajmel amb niüng sajlüy apmaw wüx asoet nej. Nej apmajmel tiül micorrül nej, aton apmaw maxom nateac soex.

<sup>10</sup> 'Nop need aliüc úpan maneed, mambiy, mandrooch ombas. Nganüy xique xiün nawün icon wüx isoetiün para mapac imeajtsan meáwan nüt.

<sup>11</sup> Xique sarang atnej nop najneaj nejiür sap, cos nop najneaj nejiür sap apmandeow mawün misap nej wüx naél.

<sup>12</sup> Nganüy nop nangüyan ngo maneay nej a sap, wüx apmajaw aliüc sampüy acueátan a sap apmecuiür, cos ngo maneay a sap. Condom aaga sampüy apmatsamb a sap, apmüüch sajrriüm.

<sup>13</sup> Aaga naxey quiaj acuiür cos nangüyan, ngo mapiüing wüx leaw alndom marang nejiw a sap.

<sup>14</sup> Xique aaga najneaj nejiür sap. Sajaw jane nejiw xesap, ata nejiw ajawüw jane xic.

<sup>15</sup> Atquiaj Teat Dios ajaw jane xic, aton xique sawaw jane nej. Xique sanandeow para nawün wüx xesap.

<sup>16</sup> Átan salnajiür alinoic ajlüy sap tiül alinoic corrül, netam naquiüjpüw miün aton. Nejiw apmanguaiyw sandeac; condom apcanchiümoj majlüyiw noic ajlüy, nop nejiür nejiw.

<sup>17</sup> Xeteat Dios xeyay andiüm xic, cos saneyacüy teowix nipilan mambiyaw xic. Condom sanapac alinomb xiquiáyan quiaj.

<sup>18</sup> Nejingüind ngondom mambiy xic sitiül ngo nandiüm, cos xique alndom nandeow, aton alndom napac alinomb xiquiáyan quiaj, nicuajind ngondom mapal xic. Cos aag ayaj asaj xic Xeteat Dios narang —aw.

<sup>19</sup> Camüm manguaiyw aag ayaj ajcūwa monajiüt tiül nipilan judío, quiaj tapots andeacndeacūw wüx alinomb.

<sup>20</sup> Xeyay tiül nejiw tapiüngüw:  
—Alwüx ombas nej nimeech, lamichach. ¿Neol tapots menguiayiün andeaca? —awüw.

<sup>21</sup> Nganüy altiül tapiüngüw:  
—Aaga poch quiaj ngondom mandeac nop naxey alwüx ombas nej nimeech. ¿Mbich alndom nop nimeech müüch ram onüüg nop somba? —awüw.

*Monajiüt tiül judíos ngo mandüümüw Teat Jesús*

<sup>22</sup> Wüx nüt aquind tearangüw nangos nüt tiül nadam nangaj iüm tiül Jerusalén. Aaga nangos nüt quiaj arangüw cos leaaw omeajtsüw wüx tatajcüch majneaj alinomb aaga nadam nangaj iüm quiaj.

<sup>23</sup> Tiül aaga nüt quiaj Teat Jesús alquiaj tiül nadam nangaj iüm; aleamb quiaj tiül noic nden apiürang wüx Portal de Salomón.

<sup>24</sup> Quiaj ajcūwa monajiüt tiül nipilan judío tayeyiw nej tiüt, tasajüw nej:

—¿Ngow sanajawan naleaing jane ique? Sitiül ique aaga Cristo lapiürang aliüc, isaj xicon aleáingan —ajüw nej.

<sup>25</sup> Quiaj tasaj nejiw Teat Jesús:

—Landoj lanasaj icon, pero icona ngo meyariün sandeac. Meáwan leaw asaj xic Xeteat Dios, aag ayaj teanarang. Meáwan leaw sarang quiaj, ajüiquich aleáingan jane xic.

<sup>26</sup> Naleaing icona ngo meyariün sandeac cos ngo mejlüyiün tiül xesap, atnej lanasaj icon.

<sup>27</sup> Xesap anguiayiw sandeac, andüjpiw xic; xique sawaw jane nejiw.

<sup>28</sup> Xique süjchiw mapacüw meáwan nüt, ngome apndrom ombasüw; nejingüind ngondom mawün nejiw tiül xiwix.

<sup>29</sup> Xeteat Dios neech xic, nej natang wüx meáwan leaw almajlüy; pares nejingüind ngondom mawün nejiw teowix nej.

<sup>30</sup> Xique saquiüüb Xeteat Dios, nop nej sajlüyüün —aj nejiw Teat Jesús.

<sup>31</sup> Condom quiaj ajcūwa monajiüt tandüyiw wüx maxaingüiw piedras maloxiw nej.

<sup>32</sup> Quiaj tasaj nejiw Teat Jesús:

—Xeteat Dios lamambeol xic narang xeyay cuajantanej najneaj mejawan. Jow nganüy ¿ngün tiül aaga najneaj sarang quiaj indüüman meloxiün xic wüxe? —aj nejiw.

<sup>33</sup> Quiaj tasajüw nej:

—Ngome sanaloxiün ic cos alngün najneaj irang, sanaloxiün cos ertsoj minüt Teat Dios. Ique nipilánan ic, nganüy temepiüing Dios ic —ajüw nej.

<sup>34</sup> Condom quiaj tasaj nejiw Teat Jesús:

—¿Neol ngo meteowan tiül Mipoch Teat Dios? niüng apiüing: "Icona ijlüyüün at icon dios", aw.

<sup>35</sup> Ajawaats meáwan leaw apiüing tiül Mipoch Teat Dios ngondom mapiürang ngo maleaing andeac. Naleaing Teat Dios apiüing atnej dios nejiw leaw arangüw minajiüt nej masajüw nipilan leaw nej asaj nejiw.

<sup>36</sup> ¿Nguineay alndom mepiüangan lanatsoj minüt Teat Dios aag tapiüngas xique Mical Teat Dios xic, sitiül nejay Teat Dios tawün xic müüch xic niün narang minajiüt neje?

<sup>37</sup> Sitiül ngome teanarang cuajantanej najneaj leaw Xeteat üüch xic narang, nde meyariün sandeac.

<sup>38</sup> Pares ngo nacueat narang, masey icona ngo meyariün sandeac, pero sandiüm meyariün leawa teanarang. Quiaj alndom mejawan naleaing Xeteat Dios ambeol xic, cos ajlüy tiül xique, ata xique sajlüy tiül nej —aj nejiw Teat Jesús.

<sup>39</sup> Quiaj tandiümüw alinomb masapüw nej; pero Teat Jesús tsajmbiüt teowixaw nejw.

<sup>40</sup> Condom Teat Jesús tandüy nonüt necamb lam Jordán niüng Juan ninguinüt tüüch yow nipilan. Tacül quiaj.

<sup>41</sup> Tambüw majawüw nej quiaj xeyay nipilan, tapiüngüw:

—Naleaing, masey teat Juan ngo marang nicuajind ateócan majaraw, pero nganüy ajüic meáwan leaw tapiüng wüx aaga naxey cam naleaing —awüw.

<sup>42</sup> Quíajan xeyay nipilan tayariw andeac Teat Jesús.

## 11

### *Lázaro tandeow*

<sup>1</sup> Tajlüy nop naxey niün andeow, nenüt Lázaro, michiig Marta maquiüb María, nawüw tiül cambaj Betania.

<sup>2</sup> Aaga María micoj Lázaro quiaj, nej apmateng najmboc angan aceite wüx oleaj Teat Jesús alinoic nüt, condom apmajond naag miondeats omal nej.

<sup>3</sup> Nganüy ajcüwa micoj Lázaro quiaj, wüx tajawüw michijquiaw nejw laxeyay iün andeow, quiaj tujchiw mamb masoic Teat Jesús:

—Teat, aaga teat naxey xowüy ijneaj anaag laxeyay iün andeow —ajow.

<sup>4</sup> Wüx tanguaiy aag ayaj Teat Jesús, quiaj tapiüng:

—Aaga monandeow quiaj ngome apmambiy nej nómban. Taxom nej cos atquiaj alndom majüiquicharan mimonajneaj Teat Dios; aton cos atquiaj alndom majüiquich najneajay arang Micual Teat Dios —aw.

<sup>5</sup> Masey Teat Jesús xeyay ajneaj aweaag müm Marta, aton müm María michiig nej, at teat Lázaro;

<sup>6</sup> pero wüx tanguaiy iün andeow a Lázaro, ngo mamb majaw, tacülan mamong ic nüt.

<sup>7</sup> Condom wüx lamong ic nüt, quiaj tasaj minipilan nej:

—Tabaats alinomb andüyiiüts tiül Judea —aj nejw.

<sup>8</sup> Quiaj tasajüw nej minipilan nej:

—Rabí, ngome lamajiür xeyay nüt wüx ajcüwa nipilan moncül quiaj tandiümüw maloxiw ic, nganüy ¿indiüm meamb quiaj alinomba? —ajüw nej.

<sup>9</sup> Quiaj tasaj nejw Teat Jesús:

—Ajawaats arraj nüt ajüür gajpic (12) ores. Sitiül nop apmajüy tiül arraj nüt ngome apmajoch, cos aaga ran quiaj ambeol nej maxom majaw.

<sup>10</sup> Pero sitiül nop ajüy ongwiiüts, alndom majtoch, cos nej ngo majiür ran —aj nejw.

<sup>11</sup> Condom tasaj nejw:

—Miamijoaats Lázaro lameay, nganüy sanamb napaacüüch —aj nejw.

<sup>12</sup> Quiaj tasajüw nej minipilan nej:

—Teat, sitiül lameay, aag ayaj ajüic teaám ajneaj —awüw.

<sup>13</sup> Teat Jesús tandeac atquiaj cos ajaw Lázaro landeow; pero minipilan nej apiüngüw naleaing almeameay.

<sup>14</sup> Condom quiaj Teat Jesús tasaj nejw aleáingan:

—Lázaro landeow.

<sup>15</sup> Najneaj ngo najlüy quiaj wüx tandeow, cos nganüy icona apmejawan leawa sanarang, quiaj alndom meyariün sandeac. Nganüy tabaats majawaats —aj nejw.

<sup>16</sup> Condom quiaj teat Tomás, aaga nasoic Cuüch, tasaj alacas minipilan Teat Jesús:

—Tabaats icoots aton mandeowaats maquiüjpaats Teat Jesús —aj nejw.

### *Teat Jesús iüch mapacaran meáwan nüt*

<sup>17</sup> Wüx tapeay quiaj Teat Jesús, Lázaro lamiüraad lamatüch peic nüt.

<sup>18</sup> Aaga cambaj Betania ngome miünquiaj, ajlüy ijquiaw kilómetro alwüx pinawan naw Jerusalén.

<sup>19</sup> Xeyay nipilan monaw Jerusalén lapeayiw quiaj majawüw müm Marta maquiüb müm María, para mawüwüyiw nejw majneaj omeajtsüw, cos tandeow michijquiaw nejw.

<sup>20</sup> Müm Marta wüx tanguaiy aliüc Teat Jesús, quiaj tamb mangoch; nganüy müm María tacülan tinden.

<sup>21</sup> Quiaj müm Marta tasaj Teat Jesús:

—Teat, sitiül ique mejlüy ningüy sapiüng xechiig ngo mandeow.

<sup>22</sup> At nganüy aton sawaw Teat Dios apmarang cuajantanej leaw apmetün ocueaj —aj nej.

<sup>23</sup> Quiaj tasaj nej Teat Jesús:

—Michiig apmapac alinomb müm —aj nej.

<sup>24</sup> Quiaj müm Marta tasaj nej:

—Naleaing teat, sawaw apmapac alinoic nüt wüx Teat Dios apmapacüüch meáwan mondeow —aj nej.

<sup>25</sup> Condom quiaj tasaj nej Teat Jesús:

—Xique nepacüüch mondeow, xique neech mapacaran. Jane ayar sandeac masey mandeow apmapac alinomb.

<sup>26</sup> Meáwan leaw almapac nganüy, sitiül ayar sandeac ngome apmandeow nómban. ¿Cuane ipiüng müm, naleaingue aag ayaja? —aj nej.

<sup>27</sup> Quiaj tasaj nej müm Marta:

—Sajaw naleaing ipiüng Teat, ique aaga Cristo leaw lapiürang aliüc, Micual Teat Dios —aj nej.

### *Tajiünts Teat Jesús*

<sup>28</sup> Ndoj mapiüng aag ayaj müm Marta, quiaj tamb mapaj müm María, tandex teolaag:

—Lapeay a Maestro, atün ic meamb mejaw —aj nej.

<sup>29</sup> Müm María camüm manguiay ayaj, quiaj tamb najen majaw Teat Jesús.

<sup>30</sup> Teat Jesús nganaw majmel tiül cambaj, alíünan niüng tangoch nej müm Marta.

<sup>31</sup> Ajcüwa nipilan leaw aliw tiül nden maquiüjpüw müm María mawüywüyw nej müjchiw mapac omeaats, wüx tajawüw amb acuiür tandüjpiw mamb cos apiüngüw nej laámb apmajiünts niüng ajlüy oxiüt.

<sup>32</sup> Müm María camüm mapeay niüng ajlüy Teat Jesús, quiaj taquieel tiüt micos nej, tapiüng:

—Teat, sitiül ndot mejlüy ningüy ngo mandeow xechiig —aw.

<sup>33</sup> Wüx Teat Jesús tajaw ajiünts müm María, at ajcüwa mondüüb nej mamb aton, quiaj tajngot amix omeaats.

<sup>34</sup> Tatün manguiay nejw:

—¿Nguiane temiütana? —aj nejw.

Quiaj tasajüw:

—Teat, tabaats mejaw —ajüw.

<sup>35</sup> Teat Jesús tajiünts.

<sup>36</sup> Quiaj tapiüngüw ajcüwa nipilan quiaj:

—Ijawan, xeyay andiüm a Lázaro —awüw.

<sup>37</sup> Altiül tapiüngüw:

—Neol ngwüy, tüüch ram oniiüg a somb, jow nganüy, ¿neol ngo mambeol a Lázaro mapac, ngo mandeowa? —awüw.

*Tapac imiün tiül mondeow a Lázaro*

<sup>38</sup> Teat Jesús tamix omeaats alinomb, quiaj tamb matüch aaga oxiüt. Aaga oxiüt quiaj noic warraj tüch narangüch, nepal wüx noic nadam piedra.

<sup>39</sup> Quiaj tasaj nejw Teat Jesús:

—Iwüniün a piedra apal oxiüt quiaj —aj nejw.

Quiaj tasaj nej müm Marta, micoj aaga nandeow quiaj:

—Teat, nganüy lango majneaj, lajmboc, cos lamajüür peic nüt tatow andeow —aj nej.

<sup>40</sup> Teat Jesús tasaj nej:

—¿Neol, ngome tasajas ic sitiül apmeyar sandeac apmejaw noic najneajay leaw Teat Dios apmaranga? —aj nej.

<sup>41</sup> Condom quiaj tawüniw a piedra. Quiaj Teat Jesús taxaing omal majaw cawüx, tasaj Teat Dios:

—Teat, süüch ic gracias Teat, cos sawaj inguiay sandeac.

<sup>42</sup> Xique sawaj meáwan nüt teamenguiay sandeac. Nganüy sasaj ic aag ayaj manguiayiw ajcüwa nipilan cam, majawüw naleaing ique teaach xic niün —aj.

<sup>43</sup> Ndoj mapiüng aag ayaj, quiaj tendeac napac:

—¡Lázaro, mac, iriow ninguiaj! —aj.

<sup>44</sup> Quiaj aaga nandeow quiaj taw, tan ajlüy awincharan ombas, naw wüx omal

andüy wüx oleaj. Quiaj tasaj nejw Teat Jesús:

—Ipüjliün ombas nej para majneaj majüy —aj nejw.

*Tayambüw nguineay masapiw Teat Jesús (Mt. 26:1-5; Mr. 14:1-2; Lc. 22:1-2)*

<sup>45</sup> Ndoj aag ayaj, xeyayiw nipilan judío leaw tambüw maniüngüw müm María tayariw andeac Teat Jesús, cos ajawayej nguineay tarang.

<sup>46</sup> Pero altiül aleáingan tambüw majawüw ajcüwa fariseos. Tapots masajüw meáwan nguineay lamarang Teat Jesús.

<sup>47</sup> Condom quiaj ajcüwa fariseos, at montangtang miteaats, tapajüw monajiüt tiül nipilan judío canchiütoj mandeacüw, tapiüngüw:

—¿Cuane apmarangaatsa? Cos aaga naxey quiaj xeyay cuajantanej teamarang.

<sup>48</sup> Sitiül müjchiiüts majlüyan marang leaw andiüm, meáwan nipilan apmariw andeac nej; ndoj ajcüwa monajiüt monaw Roma apmandrojchiw ombas aaga nadam nangaj iüm ocueajiiüts; apmanojtiw miiütaats aton —awüw.

<sup>49</sup> Nop nejw nenüt Caifás, minatang miteaats nej tiül aaga neat quiaj, tasaj nejw:

—Icona ngo mejawan nicuajind.

<sup>50</sup> Neol ngo leaam imeajtsan mepiüangan más najneaj mandeow nop naxey ingow ndroj ombas cambaj Israel —aj nejw.

<sup>51</sup> Aaga Caifás tandeac aag ayaj ngome wüx omeaats. Nej minatang miteaats tiül aaga neat quiaj, pares Teat Dios tüüch nej mapiüng nguineay Teat Jesús apmandeow mawün wüx cambaj Israel.

<sup>52</sup> Y ngome áagan nipilan judío, at apmawün wüx asoetiw meáwan mical Teat Dios leaw ajlüyiw wüx aaga iüt cam. Atquiaj alndom majlüyiw nóiquian.

<sup>53</sup> Ajan wüx aaga nüt quiaj ajcüwa monajiüt tiül judíos tapots mayambüw nguineay mambiyaw Teat Jesús.

<sup>54</sup> Nde quiaj Teat Jesús lango mejüiquichay niüng ajlüy ajcüwa monajiüt tiül nipilan judío; taw tiül Judea, tamb andüy tiül cambaj Efraín, noic cambaj niüng ajlüy wajhiüc. Quiaj tacül aquiüüb minipilan nej.

<sup>55</sup> Laliüc matüch nangos nüt pascua, aaga nadam nangos nüt ocueajiw nipilan judío. Xeyay nipilan monaw tiültiül nine cambaj laambüw Jerusalén marangüw leaw mbójan marangüw wüx ajantsaranüw majlüyiw nerixixay teombas Teat Dios. Cos andiümüw marangüw aag ayaj wüxan nganaw matüch nangos nüt.

<sup>56</sup> Nipilan tayambyambüw Teat Jesús. Wüxan aliw tiül nadam nangaj iüm tetünajey menguiayayej:

—¿Cuane ipiüngana? ¿Quia aliüc ajaw nangos nüt, ngwüy ngo miüna? —awüw.

<sup>57</sup> Cos ajcüwa montangtang miteaats, átan ajcüwa fariseos lamayacüw mipochiw nejiw sitiül aljane majaw nguiane almajlüy Teat Jesús, ich mapiüng nguineay alndom masapüw.

## 12

*Nop najtaj tajend najmboc angan aceite wüx oleaj Teat Jesús*

(Mt. 26:6-13; Mr. 14:3-9)

<sup>1</sup> Aliünan anaw nüt nganaw matüch pasca, quiaj Teat Jesús tamb Betania aniüng teat Lázaro, áag tapacüüch tiül mondeow.

<sup>2</sup> Quiaj tarangüw noic nüeteran metiw maquiüjpüw Teat Jesús. Müm Marta tengual ayac nüeteran, nganüy teat Lázaro alchetem nóiquian maquiüüb Teat Jesús.

<sup>3</sup> Condom quiaj müm María tayar pinawan litro najmboc angan aceite nenüt nardo, aag ayaj nembear xeyay. Tateng wüx oleaj Teat Jesús, condom tajend naag miondeats omal nej. Ndoj xowüy tajmboc angan meáwan tiül aaga iüm quiaj.

<sup>4</sup> Quiaj micual Simón Iscariote, aaga Judas, nop minipilan Teat Jesús leaw apmayac nej teowixaw monajiüt, tapiüng:

<sup>5</sup> —Aaga najmboc angan aceite quiaj xeyay nembear. ¿Neol ngo majnapa, majneran ombeat müjndiw nipilan ngo majiüre? —aw.

<sup>6</sup> Aaga Judas quiaj andeácan, ngome naleaing andiüm mambeolaran nipilan ngo majiür, pero cos need nej. Alteowix nej iquial tomiün, nguiajnguiaj awün maxot tomiün leaw ayacüw tiül.

<sup>7</sup> Condom quiaj Teat Jesús tasaj nej:

—Icuaeat, ich majlüy. Aag ayaj lamarang wüxan nganaw namiüraad.

<sup>8</sup> Nipilan leaw ngo majiür, meáwan nüt aliw ningüy mequiüjpan; nganüy xique ngome sanajlüy ningüy tiül icona meáwan nüt —aj nej.

*Tayambüw a Lázaro aton*

<sup>9</sup> Xeyay nipilan judío wüx tanguiayiw al Betania Teat Jesús, quiaj tambüw majawüw. Naleaing ngome néjan tambüw majawüw; aton tambüw cos andiümüw majawüw a Lázaro, aaga naxey leaw Teat Jesús tapacüüch tiül mondeow.

<sup>10</sup> Condom quiaj ajcüwa montangtang miteaats tapiüngüw netam mandeow a Lázaro aton;

<sup>11</sup> cos wüx tajawüw Lázaro almapac, xeyay nipilan tiül cambaj Israel lamacueatiw nejiw, lamayariw andeac Teat Jesús.

*Teat Jesús ajmel tiül Jerusalén*

(Mt. 21:1-11; Mr. 11:1-11; Lc. 19:28-40)

<sup>12</sup> Xeyay nipilan aliw Jerusalén majawüw nangos nüt pasca. Ráwan tiüt tanguiayiw aliüc Teat Jesús.

<sup>13</sup> Condom quiaj tachojiw op nit, andeandejndiw tiüt tambüw mangochiw nej. Teapajüw teamapiüngüw:

—¡Najneajay arang Teat Dios! ¡Najneajay leaw Teat Dios üüch miün marang Minatang Nenajiüt tiül icoots! —awüw.

<sup>14</sup> Teat Jesús taxom nop quicheech bur; tajtep wüx opech atnej lamapiüng tiül Mípoch Teat Dios, cos apiüng:

<sup>15</sup> Nde mermbolan cambaj Israel;

ijawan, aliüc Minatang Nenajiüt icueajiün, alchetem wüx opech nop quicheech bur.

<sup>16</sup> Wüxan tengual ajlüy aag ayaj minipilan nej ngo majawüw neol. Ndoj, wüx Teat Jesús landilil andüy tiül cielo, quiaj leaad omeajtsüw naleaing meáwan leaw tajlüy quiaj; aag ayaj landoj lamarangüch wüx nawiiig nde tanomb.

<sup>17</sup> Ajcüwa nipilan leaw tajlüyiw niüng ajlüy Teat Jesús wüx tapacüüch teat Lázaro, lamandecüw manguiayaran leaw tajawüw arang Teat Jesús.

<sup>18</sup> Pares meáwan nipilan tambüw mangochiw nej cos lamanguiayiw nguineay arang.

<sup>19</sup> Condom ajcüwa fariseos tandeacüw nejeyéjan quiaj, tapiüngüw:

—Nganüy lamajawaats ngondom marangaats nicuajind cos meáwan nipilan almandüjpiw nej —awüw.

*Acas nipilan griego andiümüw majawüw Jesús*

<sup>20</sup> Tiül ajcüwa monjaw nangos nüt quiaj, ajlüyiw tiül acas nipilan griego.

<sup>21</sup> Tambüw majawüw teat Felipe, aaga naw cambaj Betsaida tiül Galilea. Tasajüw:

—Teat, xicona xiünan cos sandiüman najawan aaga Jesús —ajüw.

<sup>22</sup> Quiaj tamb teat Felipe masaj teat Andrés, ndoj tambüw nóiquian masajüw Teat Jesús.

<sup>23</sup> Condom quiaj Teat Jesús tasaj nejiw:

—Lamatüch a nüt wüx Teat Naxey netam mandilil andüy tiül cielo, niüng apmajlüy najneajay.

<sup>24</sup> Naleaing naleaing sasaj icon, sitiül noic osaab trigo ngo majmiüc tiül iüt ndrom ombas, ngome apmajntsop, apmajlüyan noic nej. Nganüy sitiül apmapiürüch, apndrom ombas, mbich apmajntsop, ndoj apmayac altégüy.

<sup>25</sup> Jane xeyay andiüm leaw alndom maxom wüx iüt cam, ngome apmaxom leaw andiüm. Pero jane apmayamb Teat Dios, ngo mayac omeaats wüx leaw alndom maxom wüx iüt cam, nej teamacül mapac meáwan nüt maquiüüb Teat Dios.

<sup>26</sup> Sitiül aljane andiüm marang xenajiüt, ich mandüüb xic. Niüng xique sanajlüy, nej apmajlüy aton. Jane arang xenajiüt, Xeteat Dios apmapiüng nej najneaj arang.

*Teat Jesús tapiüng apmambiyaw nej*

<sup>27</sup> Nğanüy xeyay ngo majneaj ximeeats. ¿Cuane sanapiüng? ¿Quia napiüng: “Teat, iwün xic wüx, nde namongoch aaga xeyay ngo majneaj leaw aliüc”, nawa? Ngwüy, cos xiün namongoch aag ayaj.

<sup>28</sup> Teat, ijüiquich mimonajneaj majaraw —aw.

Condom tanguiyaran noic nanderac imiün tiül cielo, tapiüng:

—Lanajüiquich, pero nğanüy sanajüiquich alinomb —aw.

<sup>29</sup> Meáwan nipilan leaw aliw quiaj teamanguiyaw, tapiüngüw monteoc teateriür; altiül tapiüngüw:

—Ngwüy, nop ángel ocueaj Teat Dios tandeac —awüw.

<sup>30</sup> Condom quiaj tasaj nejw Teat Jesús:

—Teat Dios tandeac aag ayaj ngome cos netam nanguiyaw xique; tandeac para menguiyiün icona.

<sup>31</sup> Lamatüch a nüt majaraw wüx asoetiw monlüy wüx iüt cam; nğanüy minatang nimeech leaw ajlüy teowix nej aaga iüt cam apmajwan teowix nej.

<sup>32</sup> Wüx xique saxajnguian nayacüch cawüx, ndoj sanjüchwiw miünüw niüng sajlüy meáwan nipilan —aj nejw.

<sup>33</sup> Aag ayaj tandeac manguiyaran nguineay apmandeow.

<sup>34</sup> Quiaj tasajüw nej nipilan:

—Teat, xicona lananguiyaiün nguineay apiüng tiül Mipoch Teat Dios, cos apiüng aaga Cristo leaw netam miün apmapac meáwan nüt. Jow nğanüy, ¿neol tepiüng Teat Naxey netam xajnguian mayacüch cawüxe? ¿Jane aaga Teat Naxey ipiüng quiaja? —ajüw nej.

<sup>35</sup> Condom quiaj Teat Jesús tapiüng:

—Nğanüy acásan nüt sajlüy ningüy naquiüüb icon. Netam mendjpiün xic wüxan nğanüy, cos xique sajlüy atnej ran. Sanambeol icon ngana mejlüyiün tiül aaga ngo majneaj atnej pojniün; cos jane ajüy tiül pojniün ngo majaw cuane teamarang, ngo majaw nguiane apmandüy.

<sup>36</sup> Wüxan alningüy aaga ran quiaj, netam meyariün andeac nej para mejlüyiün tiül micual aaga ran —aw.

Ndoj mapiüng aag ayaj Teat Jesús, textütüy taw quiaj.

*Napateay nipilan tayariw andeac Teat Jesús*

<sup>37</sup> Masey Teat Jesús lamarang xeyay cuajantanej majawüw, aliün majlüy xeyay nipilan leaw ngo mayariw andeac nej;

<sup>38</sup> cos netam majlüy atnej nomb tarang tiül minawiig nej Isaías, aaga nendeac andeac Teat Dios, cos apiüng:

Teat, ¿jane lamayar leaw teaach xic nandeaça?

¿Jane lamayar wüx omeaats meáwan leaw iwix tarang majawüwa? aw.

<sup>39</sup> Pares ngo mayariw, cos aaga Isaías aton lamapiüng:

<sup>40</sup> Teat Dios tüüch majlüyiw at nejw somb. Aton tüüch madam omeajtsüw. Atquiaj ngondom majawüw.

Ngondom leam omeajtsüw wüx xic, miünüw niüng sajlüy nawüniw wüx asoetiw nejw, aw.

<sup>41</sup> Atquiaj tanomb tandeac Isaías wüx Teat Dios tüüch nej majaw nguineay ajneaj ajlüy Teat Jesús, at leawa nej apmarang.

<sup>42</sup> Masey atquiaj tajlüy, naleaing altiül monajiüt tiül nipilan judío tayariw andeac Teat Jesús. Pero imboloj mandüyiw ajcüwa fariseos, ngo majüiquichaw nómban, cos ajawüw alndom majwanüw tiül sinagoga.

<sup>43</sup> Xeyay andiümüw malomb nejw nipilan ingow ayambüw Teat Dios.

*Mipoch Teat Jesús apmajüiquich asoet nipilan*

<sup>44</sup> Ndoj Teat Jesús tasaj nipilan, tandeac napac:

—Jane ayar sandeac ngome sandeacán xique ayar, aton ayar andeac Xeteat Dios, aaga neech xic niün.

<sup>45</sup> Jane ajaw xique, ajaw jane neech xic niün aton.

<sup>46</sup> Xique, aag atnej ran quiaj, laxiün wüx iüt; jane apmayar sandeac langome apmacül tiül pojniün.

<sup>47</sup> Sitiül aljane apmanguiyaw sandeac, ndoj ngo mayac wüx omeaats marang atnej, xique ngome sanayac asoet nej, cos ngo niün nayac asoet nipilan; tiünas nawüniw wüx asoetiw.

<sup>48</sup> Sajaw ngo mind majaw xic, ngo mayar xepoch, lajlüy neyac nej asoet alinoic nüt, cos aaga poch leawa lanandeac apmayac nej asoet.

<sup>49</sup> Xique ngo nandeac leaw sandiüman xique. Xeteat Dios neech xic niün lamasaj xic cuane netam nandeac, cuane netam naquiaach.

<sup>50</sup> Sajaw leaw Xeteat asaj xic napiüng, aag ayaj üüch mapacaran meáwan nüt. Xique ágan sandeac, leaw asaj xic Xeteat Dios —aj nejw Teat Jesús.

## 13

*Teat Jesús ajants oleaj minipilan nej*

<sup>1</sup> Raw tiüt nangos nüt pascua, quiaj Teat Jesús ajaw laliüc matüch a nüt maw ningüy wüx aaga iüt cam, mamb niüng ajlüy Teat

Dios. Nej tanaám̄b xeyay andiüm minipilan nej leaw alaw ningüy wüx iüt, pero nganüy apmajüiquich nguineay andiüm nejw mas xeyay.

<sup>2</sup> Aaga ongwiiüts quiaj wüx teaüetiw, alquiaj Judas Iscariote micual Simón. Nimeech lamayac tiül omeaats nej mandiüm mayac Teat Jesús teowixaw monajiüt.

<sup>3</sup> Teat Jesús ajaw Teat Dios lamüüch nej marang cuajantanej. Aton ajaw nej tiün imiün niüng ajlüy Teat Dios; nganüy laliüc mandilil alinomb andüy niüng ajlüy Teat Dios.

<sup>4</sup> Wüx alchetemoj teaüetiw, quiaj witiüt Teat Jesús, taxeend najal apix mapeech quiaj, tayar noic püy tatsaag teomeaats.

<sup>5</sup> Quiaj tayar tigüy yow mateng tiül palangan, tapots majants oleaj minipilan nej. Condom tajond naag aaga püy leaw almat-saag teomeaats nej.

<sup>6</sup> Wüx laám̄b apmajants oleaj teat Simón Pedro, quiaj tasaj nej:

—Teat, ¿ique apmerjants xileaja? —aj nej.

<sup>7</sup> Quiaj tasaj nej Teat Jesús:

—Nganüy ngo mejaw neol tarangas, pero alinoic nüt apmejaw —aj nej.

<sup>8</sup> Quiaj tasaj nej teat Pedro:

—Ngwüy teat, ngome apmejants xileaj —aj nej.

Teat Jesús tasaj nej:

—Sitiül ngo meach xic narang aag ayaj, ngome apmejlüy tiül xenipilan —aj nej.

<sup>9</sup> Quiaj tasaj nej teat Simón Pedro:

—Sitiül atquiaj ajlüy Teat, ngome áagan xileaj ijants, at xiwix, ximal aton —aj nej.

<sup>10</sup> Teat Jesús tasaj nej:

—Jan les ndot axeeb lango metam max-eeb alinomb cos nerixix ombas, áagan oleaj nej netam majants. Icona ijlüyiün nerixixan, pero naleaing ngome meáwan —aj nej.

<sup>11</sup> Cos Teat Jesús lamajaw jane apmayac nej teowixaw monajiüt, áag tapiüng: “Ngome meáwan icona nerixixan ijlüyiün”, maw.

<sup>12</sup> Wüx landoj majants nej oleajiw, quiaj tasoog apix nej chetet alinomb. Tasaj nej-jiw:

—¿Ijawana neol tarangas aaga yaja?

<sup>13</sup> Icona isajan xic Maestro, at isajan xic Teat Xan. Najneaj, atquiaj netam cos xique minatangan, aton xique nequiaach icon.

<sup>14</sup> Sitiül xique minatangan, aton xique nequiaach icon, nganüy lanajants ileajiün, atquiaj icona aton netam mejantsayon ileajiün.

<sup>15</sup> Xique lanüüch icon mejawan aag ayaj alndom merangan atnej xique lanarang wüx icona.

<sup>16</sup> Naleaing naleaing sasaj icon, nop mos ngondom marang natang teombas neneay

nej. Aton nop nüünd miün ngondom marang natang teombas neech nej miün.

<sup>17</sup> Sitiül ijawan aag ayaj, merangan atnej, najneajap apmejlüyiün.

<sup>18</sup> ‘Ngome teanandeac aag ayaj wüx meáwan icona, cos xique nerriüjtas icon, sawaj imeajtsan. Pero naleaing netam majlüy atnej apiüng tiül Mipoch Teat Dios: “Nop leaw teaüet anaag apmarroob xileaj najmiüc”, aw.

<sup>19</sup> Xique lanasaj icon aag ayaj wüxan nganaw majlüy, cos wüx apmajlüy, quiaj apmejawan xique aaga naxey leaw lanasaj icon wüx.

<sup>20</sup> Naleaing naleaing sasaj icon, jane apmangoch mayar andeac nop leawa xique süüch mamb, aag ayaj atnej mangoch xic; jane apmangoch xic apmangoch Xeteat aton, cos nej neech xic niün —aj nejw Teat Jesús.

*Apiüng Judas apmayac nej teowixaw monajiüt*

(Mt. 26:20-25; Mr. 14:17-21; Lc. 22:21-23)

<sup>21</sup> Wüx ndoj mapiüng aag ayaj Teat Jesús, quiaj xeyay tamix omeaats. Condom ranüy tandeac masaj nejw:

—Naleaing sasaj icon, nop tiül icona apmayac xic teowixaw monajiüt —aj nejw.

<sup>22</sup> Minipilan nej wüx tanguiyaw aag ayaj, quiaj tejawayej teombasüw, ngo majawüw jane.

<sup>23</sup> Tajlüy nop tiül nejw leawa Teat Jesús xeyay tandiüm, alchetem aweaag nóiquian teaüetiw.

<sup>24</sup> Quiaj teat Simón Pedro tarang owix müüch nej matün manguiyaw jane wüx ombas teamandeac.

<sup>25</sup> Condom aaga nasoiç quiaj tatüch alquiriw Teat Jesús, matün manguiyaw:

—Teat, ¿jane aag ipiüng quiaja? —aw.

<sup>26</sup> Teat Jesús tasaj nej:

—Jane sanüüch lophon pan —aw.

Quiaj talop a pan, tüüch a Judas, micual Simón Iscariote.

<sup>27</sup> Wüx Judas landoj müet a pan, quiaj tajmel tiül omeaats nej aaga natang nimeech nenüt Satanás. Condom tasaj nej Teat Jesús:

—Leaw apmerang, quiür irang najen —aj nej.

<sup>28</sup> Nejingüind tiül leaw teaüet aweaag ngo maxomüw omeajtsüw neol tasaj atquiaj.

<sup>29</sup> Cos aaga Judas nesap iquial tomiün, altiül tapiüngüw Teat Jesús tasaj nej mamb mangal leaw netam nejw wüx nangos nüt. Altiül tapiüngüw tasoic mamb mambeol nipilan ngo majiür.

<sup>30</sup> Judas wüx landoj müet a pan, quiaj taw quiaj, langwiiüts.

*Noic jayats poch leaw netam marangüch*

<sup>31</sup> Wüx laáw quiaj a Judas, quiaj tapiüng Teat Jesús:

—Nğanüy apmajüic najneajay ajlüy Teat Naxey; aton nej apmajüiquich nguineay ajneaj ajlüy Teat Dios.

<sup>32</sup> Teat Naxey teamajüiquich nguineay ajneaj ajlüy Teat Dios, at Teat Dios aton apmajüiquich nguineay ajneaj ajlüy Teat Naxey; aag ayaj laliüc majlüy.

<sup>33</sup> Xecualüw, langome sanajlüy ningüy naquiüüb icon alacas nüt. Icona apmeyamban xic; pero sasaj icon atnej tasajasüw monajiüt ninguinüt: Ngondom meamban niüng sanamb.

<sup>34</sup> Netam mendüüman nop alinop atnej xique sandiüm icon. Aag ayaj jayats poch leaw sasaj icon merangan.

<sup>35</sup> Sitiül icona mendüüman nop alinop, quiaj nipilan apmajawüw xenipilan icon —aw Teat Jesús.

*Teat Pedro apmapiüing ngo majaw jane Teat Jesús*

(Mt. 26:31-35; Mr. 14:27-31; Lc. 22:31-34)

<sup>36</sup> Teat Simón Pedro quiaj tatün manguiay Teat Jesús:

—Teat, ¿nguiane apmeamba? —aj.

Teat Jesús tasaj nej:

—Niüng sanamb, ngondom mendüüb xic mamb nganüy; alinoic nüt alndom mendüüb xic mamb —aj nej.

<sup>37</sup> Condom quiaj teat Pedro tasaj nej:

—Teat, ¿neol ngondom nandüüb ic mamb nganüye? Xique sajlüy masey nandewow ingow indeow —aj nej.

<sup>38</sup> Quiaj tasaj nej Teat Jesús:

—¿Neol tepiüing ique apmendeow ingow sandeowa? Naleaing naleaing sasaj ic menguiay Pedro, wüx nganaw mepaj a gallo, ique lamepiüing arojmbüw ngo mejaw jane xic —aj nej.

## 14

*Teat Jesús atnej tiiüd andüy niüng ajlüy Teat Dios*

<sup>1</sup> Aton tasaj nejiw Teat Jesús:

—Nde mechiwean imeajtsan wüx inguiayiün sanamb. Iyacan imeajtsan wüx Teat Dios; iyacan imeajtsan wüx xique aton.

<sup>2</sup> Aniüing Xeteat tiül cielo ajlüy quiaj xeyay najneajneaj iüm niüng alndom macüleran. Sitiül ngo maleaing, xique ngome sanasaj icon atquiaj. Nganüy sanamb nataag majneaj niüng apmecüliün.

<sup>3</sup> Wüx landoj nataag majneaj niüng apmecüliün, quiaj sanandilil najan icon, apmajlüy iüts nóiquian niüng sanajlüy.

<sup>4</sup> Icona lamejawan nguiane sanamb; aton iyajcan a tiiüd —aj nejiw Teat Jesús.

<sup>5</sup> Quiaj tasaj nej teat Tomás:

—Teat, ngo najawan nguiane apmeamb, ¿nguineay sanayajcan a tiiüd? —aj nej.

<sup>6</sup> Teat Jesús tapiüing:

—Xique aaga tiiüd, xique nequiajchiüs palan leawa naleaing, at xique nejchiüs mapacaran. Nejinguind ngondom mamb niüng ajlüy Xeteat Dios sitiül ngo mayar sandeac.

<sup>7</sup> Sitiül naleaing lamejawan jane xic, aton apmejawan jane Xeteat. Nde nganüy lamejawan jane nej —aw.

<sup>8</sup> Quiaj tasaj nej teat Felipe:

—Teat, iich xicon najawan miteat, quiaj apmajneaj ximeajtsan —aj nej.

<sup>9</sup> Tasaj nej Teat Jesús:

—Felipe, ijaw cas nüt sajlüy naquiüüb icon, ¿neol nganaw mejaw jane xique? Cos jane ajaw xic, atanej majaw Teat Dios aton. ¿Neol tepiüing nüüch icon mejawan Teat Dios?

<sup>10</sup> ¿Neol ngo meyar sandeac mepiüing naleaing xique sajlüy tiül Xeteat, at Xeteat aton ajlüy tiül xique? Meáwan leaw sasaj icon, aag ayaj ngome sapiüangan xique. Xeteat najlüy tiül xic, nej arang minajiüt nej.

<sup>11</sup> Netam mepiüangan naleaing xique sajlüy tiül Xeteat, at Xeteat ajlüy tiül xique. Sitiül ngwüy netam meyariün mepiüangan naleaing leawa sarang.

<sup>12</sup> Naleaing naleaing sasaj icon, jane ayar sandeac, aton apmarang leaw sarang. Nej apmantsopiich wüx leawa xique tarangas, cos xique sanamb niüng ajlüy Xeteat Dios.

<sup>13</sup> Meáwan leaw apmetüniün ocueaj Teat Dios wüx xenüt, xique sanarang, cos atquiaj sanajüiquich mimonajneaj Teat Dios.

<sup>14</sup> Xique sanarang cuajantanej leaw apmetüniün xicueaj wüx xenüt.

*Teat Jesús apiüing apmüüch miün Nangaj Espiritu*

<sup>15</sup> Sitiül icona indiüman xic, apmerangan meáwan leaw lanasaj icon.

<sup>16</sup> Quiaj sanatün ocueaj Xeteat müüch miün alinop nembeol icon müüch mapac imeajtsan. Aag ayaj Nangaj Espiritu ocueaj Teat Dios. Nej apmacül maquiüüb icon meáwan nüt.

<sup>17</sup> Nipilan leaw ngo mayambüw Teat Dios ngondom mayariw aag ayaj, cos nejinguind ngondom maxom majaw aaga Nangaj Espiritu ocueaj Teat Dios. Icona lamejawan, nej arang leaw naleaing, cos nej almaquiüüb icon, ndoj meáwan nüt apmacül tiül imeajtsan.

<sup>18</sup> Ngome sanacueat icon nómban mejlüyiün atnej ndeoj; salüic alinomb.

<sup>19</sup> Nipilan wüx aaga iüt cam acásan nüt ajawüw xic, ndoj langome apmaxomüw majawüw xic; pero icona apmejawan xic alinomb cos sanapac. Atquiaj icona aton apmepacan meáwan nüt niüng sajlüy.

<sup>20</sup> Wüx aaga nüt quiaj apmejawan naleaing xique sajlüy tiül Xeteat Dios; at icona ijlüyiün tiül xique, y xique sajlüy tiül icona.

<sup>21</sup> Jane anguiay leawa xic sapiüng, sitiül apmayac wüx omeaats marang atnej, quiaj ajüic naleaing andiüm xic. Xeteat aton andiüm jane andiüm xic, ata xique aton sanandiüm, sanüüch maxom omeaats majaw wüx xique, —aj nej.

<sup>22</sup> Quiaj teat Judas, ngome aaga Iscariote, tasaj:

—Teat ¿neol tepiüng xicónan quiaj apmeach xicon najawan ic, jow meáwan nipilan wüx iüt, neol ngondoma? —aj nej.

<sup>23</sup> Quiaj Teat Jesús tasaj nej:

—Leaw nendiüm xic apmarang leawa sapiüng. At Xeteat aton apmendiüm nej, quiaj saliücan najlüyiün nóiquian naquiüjpan.

<sup>24</sup> Nganüy leaw ngo mandiüm xic ngome apmarang leawa sapiüng. Aaga poch leawa teanasaj icon quiaj, ngome sandeácan xique, Xeteat áaga neech xic niün nesaj xic.

<sup>25</sup> Teanasaj icon meáwan aag ayaj wüxan saliün ningüy naquiüüb icon.

<sup>26</sup> Nganüy Nangaj Espiritu, aaga Nembeol, leawa Xeteat apmüüch miün wüx xenüt, nej apmaquiaach icon wüx meáwan leaw netam. Nej apmüüch leaam imeajtsan meáwan leaw lanasaj icon.

<sup>27</sup> Nganüy sanacueat ningüy xemona-jneaj nüüch icon, müüch mapac imeajtsan; aag ayaj ngome nóiquian among atnej apac omeajtsüw nipilan monrang ngo majneaj. Ngo metam mechiwean imeajtsan, ngo metam mermbolan.

<sup>28</sup> Lamenguiayiün lanasaj icon xique sanamb, condom saliüc alinomb najan icon. Sitiül naleaing indüüman xic, apmapac imeajtsan wüx inguiayiün sanamb niüng ajlüy Xeteat Dios, cos nej xenatang.

<sup>29</sup> Nganüy lanasaj icon nguineay apmajlüy; atquiaj wüx apmajlüy meáwan aag ayaj, quiaj apmepiüangan naleaing leaw tandeacas.

<sup>30</sup> Lango matüch nendeac naquiüüb icon alquiriw, cos laliüc majngot minatang nerang ngo majneaj wüx aaga iüt cam. Nej nicuajind ngondom marang wüx ximbass.

<sup>31</sup> Nganüy cos netam majawüw meáwan nipilan wüx iüt nguineay sandiüm Teat Dios, sanarang leawa nej lamapiüng. Nganüy witiüron, tabaats.

## 15

### *Andeac wüx noic owil uva*

<sup>1</sup> Xique sajlüy atnej noic owil uva leawa Teat Dios tapiür; nej ajlüy wüx, teamajiür.

<sup>2</sup> Meáwan xepüüig leaw ngo mayac aóng apmandoquiiüm; nganüy meáwan leaw neóng apmajorrüchan omal para tsatsam mayac altégüy aóng.

<sup>3</sup> At icona aton, Teat Dios lamawün wüx imbasan meáwan ngo majneaj, cos lame-yariün xepoch.

<sup>4</sup> Netam tanaámb mejlüyiün nóiquian mequiüjpan xic; ata xique aton sanajlüy nóiquian naquiüüb icon. Sitiül ngo mejlüyiün nóiquian mequiüjpan xic, ngondom merangan nicuajind. Cos atnej arang mipüüig xiül sitiül landojquiow, langondom mayac aóng.

<sup>5</sup> Xique sajlüy atnej noic owil uva; icona ijlüyiün atnej mipüüig aaga uva quiaj. Jane tanaámb ajlüy nóiquian maquiüüb xic, xique sanaquiüüb; nej apmarang xeyay xenajiüt. Icona ngondom merangan nicuajind sitiül ngo majlüyiüts nóiquian.

<sup>6</sup> Jane ngo macül nóiquian naquiüüb, apmajwan majlos ningüün atnej arangüch wüx mipüüig uva leaw ngo mayac aong. Quiaj apmawaag, ndoj apxaijnguiam majwich tiül biümb mandaab.

<sup>7</sup> Sitiül tanaámb mejlüyiün nóiquian mequiüjpan xic, ngo ndrom imeajtsan leaw lanaquiaach icon, alndom metüniün xicueaj leaw indüüman, quiaj apmeajndiün.

<sup>8</sup> Wüx icona irangan xeyay xenajiüt, quiaj apmaderac najneajay wüx ombas Xeteat Dios; aton atquiaj ijüiquichan naleaing xenipilan icon.

<sup>9</sup> Xique sandiüm icon atnej Xeteat Dios andiüm xic. Tanaámb ich leaam imeajtsan nguineay xique sandiüm icon.

<sup>10</sup> Xeteat Dios andiüm xic cos sarang leawa nej apiüng. Sitiül atquiaj icona tanaámb merangan leaw lanapiüng, ata xique aton tanaámb sanandiüm icon.

<sup>11</sup> Aag ayaj sasaj icon para mapac imeajtsan xeyay meáwan nüt atnej apac ximeaats.

<sup>12</sup> Leawa xic sasaj icon merangan: Aag ayaj mendiüman nop alinop atnej xique sandiüm icon.

<sup>13</sup> Wüx nop naleaing andiüm aljane, ngo mapiüng wüx, masey mandeow ingow andeow aaga xeyay ajneaj aweaag.

<sup>14</sup> Icona, sitiül apmerangan leawa sasaj icon, apmajlüyiüts xeyay najneaj.

<sup>15</sup> Ngo napiüng icona ijlüyiün atnej mos, cos nop mos ngo majaw cuane arang ne-neay najiüt. Xique lanasaj icon mejlüyiün xeyay ajneajiüts, cos lanüüch icon menguiayiün meáwan leaw lamasaj xic Xeteat Dios.

<sup>16</sup> Ngome icona teyamban xic, xique tayambas icon mejlüyiün xenipilan.



Lanüüch icon meamban merangan xenajüüt mesajan meáwan nipilan mayariw sandeac, para nejiw aton tanaámb marangüw leaw sapiüng. Atquiaj Teat Dios apmüüch icon meáwan leaw apmetüniün wüx xenüt.

<sup>17</sup> Inguiayiün, sanasaj icon alinomb: Netam mendiüman nop alinop.

*Nipilan apmajcüyw majawüw icon*

<sup>18</sup> 'Sitiül meáwan nipilan ajcüyw majawüw icon, ich leaam imeajtsan nejiw landoj lajcüyw majawüw xic aton.

<sup>19</sup> Sitiül ndot icona apmerangan atnej arangüw meáwan nipilan, nejiw apmajneaj majawüw icon atnej ajneaj mejawayej nejeýan quiaj. Nganüy cos xique lanawün icon tiül nejiw, áag ajcüyw majawüw icon, cos lango merangan meáwan ngo majneaj leaw nejiw arangüw.

<sup>20</sup> Ich leaam imeajtsan leaw lanasaj icon wüx tapiüngas: "Nop najon mos ngome alwüx atam minajiüt nej; ajaraw alwüx atam minajiüt neneay najiüt." Sitiül ayambüw ximbas, ata icona aton apmayambüw imbasan xeyay. Sitiül nipilan lamayacüw wüx omeajtsüw leawa sandeac, atquiaj apmayacüw wüx omeajtsüw leaw indeacan.

<sup>21</sup> Meáwan aag ayaj apmarangüw wüx imbasan cos iyariün sandeac. Ngo majawüw jane neech xic niün.

<sup>22</sup> 'Sitiül xique ngo niün nasajüw wüx asoetiw nejiw, ngome apmayajcüw ajjiürüw nisoet. Nganüy cos tiünas nasajüw, áag ngo majiürüw cuane mewüyayej wüx.

<sup>23</sup> Jane ajcüy majaw xic, ajcüy majaw Xeteat aton.

<sup>24</sup> Sitiül ndot ngo narang xeyay cuajantanej najneaj tiül nejiw, leaw nejingüind ngondom marang, ngome apmayajcüw ajjiürüw nisoet. Nganüy masey tajawüw leawa tarangas, tanaámb ajcüyw majawüw xic, átan Xeteat aton ajcüyw majawüw.

<sup>25</sup> Atquiaj netam majlüy atnej tapiüngüw mondeac andeac Teat Dios wüx tapiüngüw: "Ngo majlüy cuaneol tajcüyw majawüw xic", awüw.

<sup>26</sup> 'Sanüüch miün nop nembeol icon, aaga Nangaj Espiritu ocueaj Teat Dios. Aliüc imiün niüng ajlüy Teat Dios. Nej aton apmajüiquich wüx xic.

<sup>27</sup> At icona aton apmejüiquichan naleaing wüx xique, cos nde wüx tamelichas saquiaach, icona almequiüjpan xic.

## 16

<sup>1</sup> 'Nganüy lanasaj icon meáwan aag ayaj, nganandot mepiüngan alinoic nüt xique ngo nasaj icon.

<sup>2</sup> Cos apmejwanaranan tiül sinagoga. Aton aliüc miün nüt wüx apmambiyaw

icon. Ajcüwa monbiy quiaj apmapiüngüw tearangüw minajiüt Teat Dios.

<sup>3</sup> Atquiaj apmarangüw cos ngo majawüw jane nej Xeteat, átan ngo majawüw jan xic.

<sup>4</sup> Nganüy lanasaj icon aag ayaj cos wüx apmajlüy atnej lanapiüng quiaj, quiaj apleaam imeajtsan nguineay xique landoj lanapiüng wüx aag ayaj.

*Leaw apmarang Nangaj Espiritu*

'Xique nganaw nasaj icon wüx aag ayaj cos saliün naquiüb icon.

<sup>5</sup> Nganüy sanandilil, sandüy niüng ajlüy aaga neech xic niün; icona ngo metüniün menguiayiün nguiaj süp.

<sup>6</sup> Cos lanasaj icon meáwan aag ayaj, nganüy xeyay lamix imeajtsan.

<sup>7</sup> Naleaing sasaj icon, najneaj sitiül xique sanamb; cos ndot ngo namb, aaga Nembeol müüch mapac imeajtsan ngome aliüc macül mequiüjpan. Nganüy sitiül sanamb, xique sanüüch miün aaga Nembeol quiaj.

<sup>8</sup> Wüx nej aliüc, apmüüch leaam omeaats meáwan nipilan mayajcüw ajjiürüw nisoet; aton apmüüch mayajcüw netam marangüw leawa najneaj. Apmüüch leaam omeajtsüw nguineay Teat Dios apmajaw wüx asoeteran alinoic nüt.

<sup>9</sup> Ajjiürüw nisoet cos ngo mayariw sandeac.

<sup>10</sup> Nej apmajüiquich leaw naleaing, leaw najneaj marangüch, cos xique sanamb niüng ajlüy Xeteat Dios, langome apmexoman mejawan xic.

<sup>11</sup> Nej apmüüch leaam omeaats nipilan nguineay Teat Dios apmajaw wüx asoeteran; cos Satanás, aaga minatang nerang ngo majneaj wüx aaga iüt cam landoj layacüch asoet.

<sup>12</sup> 'Aliün najiür cuane sanasaj icon; pero icona nganüy ngondom mejawan cuane wüx sandeac.

<sup>13</sup> Wüx aliüc Nangaj Espiritu ocueaj Teat Dios, nej apmüüch icon mejawan meáwan leaw naleaing; cos nej ngo mandeacán leawa andüüman nej, apmandeac leaw anguiay, aton apmüüch icon mejawan leaw aliüc miün apmajlüy.

<sup>14</sup> Nej apmandeac najneaj wüx xique. Apmayar meáwan leawa sapiüng, apmüüch icon mejawan cuane wüx apiüng.

<sup>15</sup> Meáwan leaw ocueaj Xeteat, aag ayaj xicueaj aton. Áag tapiüngas leaw Nangaj Espiritu apmandeac masaj icon, aag ayaj ajngot imiün wüx xique.

*Apmamix imeajtsan, ndójwüx apmapac imeajtsan*

<sup>16</sup> 'Alacas nüt langome apmexoman mejawan xic, cos sanamb sandüy niüng ajlüy Xeteat. Condom alinoic nüt apmejawan xic alinomb —aj nejiw Teat Jesús.

<sup>17</sup> Altiül minipilan nej tatünayej menguiayayej, tapiüngwüw:

—¿Quia nguineay amb aag apiüng quiaja? Cos asaj icoots: “Alquiriw nüt alünan wüx icona langome apmexoman mejawan xic, cos sanamb sandüy niüng ajlüy Xeteat. Condom alinoic nüt apmejawan xic alinomb”, maw.

<sup>18</sup> ¿Cuane aag apiüng: “Alünan alquiriw nüt quiaja”? Ngondom majawaats cuane wüx amb apiüng —awüw.

<sup>19</sup> Teat Jesús tajaw teamandüümwüw matüniw nej manguiayiw. Quiaj tasaj nejiw:

—¿Tenguial ertünayon menguiayayon wüx áag sasaj icon quiaja, alacas nüt langome apmexoman mejawan xic, condom alinoic nüt apmejawan xic alinomba?

<sup>20</sup> Naleaing naleaing sasaj icon, apmejiüntsán apmamix imeajtsán, pero ategüy nípilan apmapac omeajtsüw. Masey icona apmamix imeajtsán, ndójwüx apmapac imeajtsán xeyay.

<sup>21</sup> Atnej arang nop najtaj wüx apwijquiam micual nej, apmecoy omeaats cos lamatüch a ores. Ndoj, wüx lawijquiaw a nine, lango leam omeaats aaga necoy tamongoch quiaj, cos xeyay apac omeaats majaw lawijquiaw nop nine.

<sup>22</sup> At icona, nganüy amix imeajtsán; pero wüx salüic alinomb najaw icon, quiaj apmapac imeajtsán xeyay; nejingüind ngome apdom mawün aaga apac imeajtsán quiaj.

<sup>23</sup> Wüx aaga nüt quiaj nicuajind langome apmetam metüniün menguiayün xic. Naleaing naleaing sasaj icon meáwan leaw apmetüniün ocueaj Xeteat wüx xenüt, nej apmüch icon.

<sup>24</sup> Nganüy nicuajind nganaw metüniün ocueaj Xeteat wüx xenüt; pero sitiül icona apmetüniün apmeajndiün, quiaj apmapac imeajtsán xeyay.

#### *Xique altiül xiwix aaga iüt cam*

<sup>25</sup> Meáwan leawa lanasaj icon ngo najüiquich aleaing miün cuane wüx sandeac. Laliüc matüch a nüt wüx xique langome sanandec atquiaj, sanandec aleáingan wüx Xeteat.

<sup>26</sup> Wüx aaga nüt quiaj icona apmetüniün leaw indiüman wüx xenüt, ngome apmetam natün ocueaj Xeteat Dios müch icon.

<sup>27</sup> Xeteat Dios andiüm icon cos indiüman xic. Aton cos lameyariün mepiüangan naleaing tünas ximiün niüng ajlüy nej.

<sup>28</sup> Xique tünas ningüy wüx iüt ximiün niüng ajlüy Xeteat Dios. Nganüy sanaw ningüy, sanamb alinomb sandüy niüng ajlüy nej —aj nejiw Teat Jesús.

<sup>29</sup> Quiaj tasajüw nej minipilan nej:

—¡Ajaj teat, nganüy mbich lamejüiquich aleáingan leaw ideac!

<sup>30</sup> Nganüy lanajawan ique ijaw meáwan cuajantanej. Nejingüind ngo metam masaj ic cuane andiüm, cos ique lamejaw. Atquiaj sajanw naleaing Teat Dios neech ic mewiün —ajüw nej.

<sup>31</sup> Quiaj tasaj nejiw Teat Jesús:

—¿Lameyariün sandeac nganüye?

<sup>32</sup> Nganüy lamatüch a nüt ndajrüümeron, mejawan nguiane apmendüyiün inopnopon, cos apmecueatiün xic. Naleaing ngome sanajlüy xíquiañ quiaj cos Xeteat almaquiüüb xic.

<sup>33</sup> Lanasaj icon meáwan aag ayaj para mapac imeajtsán wüx xic. Masey wüx aaga iüt cam apmemongochiün xeyay ngo majneaj, pero alndom meücan wüx sitiül apmeyacan imeajtsán wüx xique, cos najntsopiüs wüx aaga iüt cam —aj nejiw.

## 17

*Teat Jesús atün ocueaj Teat Dios mambeol minipilan nej*

<sup>1</sup> Wüx ndoj mapiüng aag ayaj Teat Jesús, quiaj taxaing omal majaw cawüx, tataag orar, tapiüng:

—Xeteat Dios, nganüy lamatüch a nüt, ijüiquich mimonajnej wüx Micual, para nej majüiquich mimonajnej aton.

<sup>2</sup> Atnej ique lameaach nej majlüy wüx meáwan nípilan, atanquiaj aton iich mapacüw meáwan nüt ajcüwa nípilan leawa ique lameaach nej.

<sup>3</sup> Apmapacüw meáwan nüt cos ajawüw naleaing ique inopüyan Teat Dios, at apiüngüw ique teaach miün Jesucristo.

<sup>4</sup> Xique lanandec najneajay wüx ique ningüy tiül nípilan. Lanambich narang meáwan leawa teaach xic niün narang.

<sup>5</sup> Nganüy Teat, sanandilil sandüy niüng ijlüy, majlüyiür najneajay atnej tajlüyiür wüx nganaw majlüy aaga iüt cam.

<sup>6</sup> Ajcüwa nípilan leawa terriüjtüw meajchiw xic, lanüjchiw majawüw jane ic. Ajcüw ayaj minipilanüw, nganüy ique lameajchiw xic. Nejiw lamayacüw wüx omeajtsüw Mipoch, Teat.

<sup>7</sup> Nganüy lamajawüw naleaing ique tesaj xic meáwan leawa tandeac.

<sup>8</sup> Aaga poch leawa teaach xic lanasajüw, nejiw lamayariw. Lamajawüw aag ayaj naleaing cos ique teaach xic niün, ximiün niüng ijlüy sajngot.

<sup>9</sup> Satün icueaj Teat, membeolüw ajcüwa leaw teajchiw xic, cos icueajiw. Xique ngo natün membeol meáwan nípilan leaw ngo mayamb ic.

<sup>10</sup> Meáwan xenipilan ajcüw ayaj ineyay; aton meáwan leaw ijiür, ajcüw ayaj saneay. Nejiw teamajüiquichaw xemonajnej.

<sup>11</sup> Nganüy Teat, xique laliüc naw ningüy wüx iüt cam, sanamb sandüy niüng ijlüy;

nejiw apmacüliwan ningü. Xeteat Dios, nangaj ic, imbeolüw meáwan nüt ajcüwa leaw lameajchiw xic, para alndom majlüyiw nóiquian atnej ajlüyüür.

<sup>12</sup> Cos wüx xique sajlüw ningüw naquüjpw, ique teamembeol xic nayacüw tiül iwix meáwan leawa teajchiw xic. Nejingüind tiül nejiw ngo ndromoj tiül aaga xeyay ngo majneaj, áagan anop minipilan nimeech; cos netam majlüw atnej lajlüw tiül Nangaj Mípocho.

<sup>13</sup> 'Nganüw Teat, sanamb sandüw niüng ijlüw. Wüxan salüün ningüw wüx aaga iüt cam, teanandeac aag ayaj manguiayiw, mapac omeajtsüw xeyay atnej apac ximeeats.

<sup>14</sup> Xique lanasajüw wüx mípocho. Naleaing nipilan ajcüyiw majawüw nejiw, cos lango marangüw ngo majneaj atnej arang jangantanej nipilan, Xique aton ngo narang leaw arang jangantanej nipilan.

<sup>15</sup> Teat, ngo natün mewün nejiw ningüw wüx aaga iüt cam; satün icueaj membeolüw nganandot matüch nejiw nimeech.

<sup>16</sup> Cos xique ngo narang atnej jangantanej nipilan wüx iüt, atanquiaj nejiw aton lango marangüw ngo majneaj atnej arangüw jangantanej nipilan.

<sup>17</sup> Iwüniw pálwüx, majlüyiw icueaj, cos atquiaj alndom marangüw najneaj. Nangaj Mípocho apmambeol nejiw cos andeac naleaing.

<sup>18</sup> Atnej ique teaach xic niün wüx iüt, atanquiaj xique aton lanasajüw mambüw meáwan wüx aaga iüt cam.

<sup>19</sup> Xique lanüüch ximeeats namongoch leaw netam namongoch. Atanquiaj aton nejiw netam müjchiw omeajtsüw marangüw leaw ique indiüm, cos aag ayaj naleaing.

<sup>20</sup> 'Aton Teat, ngo natün wüxan nejiw; satün membeol meáwan leaw aliüc miün apmayariw sandeac wüx nejiw apmandeacüw masajüw nipilan wüx xic.

<sup>21</sup> Satün majlüyiw nóiquian omeajtsüw atnej icora ajlüyüür nóiquian Teat, atanquiaj majlüyiw aton; cos atquiaj jangantanej nipilan alndom majawüw naleaing ique teaach xic niün.

<sup>22</sup> Atnej xique sajlüquich wüx ique Teat, nguineay ajneaj ijlüw, atanquiaj aton lanüjchiw majüquichaw xemonajneaj. Wüx aag ayaj alndom majlüyiw nóiquian atnej icora ajlüyüür.

<sup>23</sup> Xique sajlüw tiül nejiw, ata ique Teat, ijlüw tiül xique. Atanquiaj aton alndom majlüyiw nóiquian omeajtsüw, para meáwan nipilan majawüw naleaing ique teaach xic niün. Aton indiümüw xeyay atnej indiüm xic.

<sup>24</sup> 'Teat, ajcüwa leawa teaach xic, sandiüm majlüyiw niüng sajlüw, majawüw nguineay ajneaj sajlüw. Cos ique Teat, indiüm xic

tanaámb atnej wüx nganaw majlüw aaga iüt cam.

<sup>25</sup> Xeteat Dios, najneajay irang. Masey nipilan ngo majawüw jane ic, xique naleaing sawaw jane ic. At ajcüwa xenipilan lamajawüw ique teaach xic niün.

<sup>26</sup> Xique lanüjchiw majawüw jane ic Teat; tanaámb teanasajüw nguineay ijlüw. Atnej indiüm xic Teat, atanquiaj nganüw sandiüm mendiümüw. Xique sanajlüw naquüjpw aton —aw.

## 18

### *Ndeaad Teat Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Wüx landoj mapiüng aag ayaj Teat Jesús, tawüw quiaj. Tambüw andüyiw necamb nine lam nasoic Cedrón. Tandüyiw quiaj niüng ajlüw acas owil nateaic xiül, maquiiüb minipilan nej.

<sup>2</sup> Aaga Judas, leaw apmayac nej teowixaw monajiüt, ayaag quiaj cos ajlüyay canchiüw quiaj maquüjpw Teat Jesús.

<sup>3</sup> Quiaj tapeay aaga Judas, aqiiüb mamb noic ajlüw soldados, at acas monjiür nadam nangaj iüm, üüch nejiw mambüw montangtang miteeats maquiiüb fariseos. Ajoyiw linternas, at najquiol irrajajey; aton ajoyiw espadas.

<sup>4</sup> Teat Jesús cos lamajaw cuane aliüc miün apmamongoch, quiaj witiüt tamb mangoch nejiw. Tapiüng:

—¿Jane iyambana? —aj nejiw.

<sup>5</sup> Quiaj tasajüw nej:

—Aaga Jesús naw Nazaret —ajüw nej.

Teat Jesús tasaj nejiw:

—Jogüy xic —aj nejiw.

Aaga Judas, leaw apmayac nej teowixaw monajiüt, altiül nipilan aton.

<sup>6</sup> Wüx tasaj nejiw Teat Jesús: “Jogüy xic”, maj nejiw, tanaámb tanotoj opechiw, ajmiücüw pajcawoj tiüt.

<sup>7</sup> Condom Teat Jesús tandüw wüx matün manguiay nejiw:

—¿Jane iyambana? —aj nejiw.

Quiaj tasajüw nej alinomb:

—Aaga Jesús naw Nazaret —ajüw nej.

<sup>8</sup> Quiaj tasaj nejiw Teat Jesús:

—Lanasaj icon jogüy xic. Sitiül xique temeyamban, ijchan mambüw xenipilan —aj nejiw.

<sup>9</sup> Atquiaj tajlüw atnej lamapiüng Teat Jesús wüx tapiüng: “Meáwan leawa teaach xic, nejingüind tiül nejiw ngome apndrom”, aw.

<sup>10</sup> Simón Pedro almajoy nots espada, tasoond tiül ombiüm, tandooig miác olaag nop naxey nenüt Malco, mimos minatang miteeats.

<sup>11</sup> Quiaj Teat Jesús tasaj a Pedro:

—¡Pedro, isoc alinomb tiül ombiüm nej miespada! ¿Neol, iyaag a ique ngo metam

namongoch aaga naél leaw lamapiüng Xeteat netam namongoche? —aj nej.

*Teat Jesús alteombas minatang miteaats (Mt. 26:57-58; Mr. 14:53-54; Lc. 22:54)*

<sup>12</sup> Ajcüwa soldados maquiüjpüw minatangüw nejiw, at monjiür nadam nangaj iüm ocueajiw nipilan judío, tasapüw Teat Jesús maoeliw.

<sup>13</sup> Condom taquiüjpüw mamb andüy aniüng Anás, miocuats Caifás. Aaga Caifás quiaj, nej minatang miteaats tiül aaga neat quiaj.

<sup>14</sup> Nej aaga Caifás quiaj, nejay nesaj monajiüt najneaj mandeow nop naxey ingow ndroj ombas aaga cambaj Israel, maw.

*Pedro apiüng ngo majaw jane Teat Jesús (Mt. 26:69-70; Mr. 14:66-68; Lc. 22:55-57)*

<sup>15</sup> Simón Pedro aquiüüb alinop minipilan Teat Jesús, tambüw mandüjpiw mamb Teat Jesús. Aaga alinop quiaj, ayaag nej ombas minatang miteaats. Áag tüünd majmel tindenden maquiüüb Teat Jesús;

<sup>16</sup> pero Pedro tacülan mbeay nden. Quiaj aaga naxey neyaag nej ombas minatang miteaats taw, tamb mandeac aweaag nejiür ombeay nden mamelich a Pedro aton.

<sup>17</sup> Condom aaga nüx nejiür ombeay nden tatün manguiaj a Pedro:

—¿Neol ngome ique nop minipilan aaga Jesús quiaja? —aj.

Pedro quiaj tapiüng:

—Ngwüy ngome xique —aw.

<sup>18</sup> Ores quiaj naquind, pares tajalüw biümb ajcüwa mos maquiüjpüw monjiür nangaj iüm, alombomoj teatsantsayej. At a Pedro aton alembem quiaj teatsantsüy mbeay biümb.

*Minatang miteaats atün manguiaj Teat Jesús*

*(Mt. 26:59-66; Mr. 14:55-64; Lc. 22:66-71)*

<sup>19</sup> Condom minatang miteaats tatün manguiaj Teat Jesús jane minipilan nej, at cuane wüx teamaquiaach.

<sup>20</sup> Quiaj tasaj nej Teat Jesús:

—Xique ngo naxot, sandeac niüng ajlüy nipilan; samb tiül tiül ajcüw a sinagogas, aton samb tiül aaga nadam nangaj iüm, niüng canchiüjow meáwan micual miüütaats. Xique ngo nexotüy wüx sandeac.

<sup>21</sup> ¿Jow nganüy, neol tetün menguiaj xique? Itün menguiayiw ajcüwa tanguiaiyiw sandeac. Nejiw ich mapiüngüw cuane wüx tandeacas, cos lamajawüw —aj nej.

<sup>22</sup> Wüx ndoj mapiüng aag ayaj Teat Jesús, nop nejiür nadam nangaj iüm taleamb nej, tapiüng:

—¿Neol tesaj atquiaj minatang miteaatsa? —aw.

<sup>23</sup> Quiaj tasaj nej Teat Jesús:

—Sitiül ngo majneaj sasaj, ipiüng cuane ngo majneaj sasaj; sitiül najneaj, ¿neol teleamb xique? —aj nej.

<sup>24</sup> Condom quiaj aaga Anás tüüch mamb Teat Jesús neóel, andüy niüng ajlüy alinop minatang miteaats, aaga Caifás.

*Teat Pedro tandüy wüx alinomb mawai-ich*

*(Mt. 26:71-75; Mr. 14:69-72; Lc. 22:58-62)*

<sup>25</sup> Teat Pedro tealeámban aliün lembem quiaj, teatsantsüy. Quiaj tasajüw nej:

—¿Ngome ique nop minipilan neje aaga naxey quiaja? —ajüw nej.

Quiaj tapiüng teat Pedro:

—Ngwüy, ngome xique —aw.

<sup>26</sup> Condom nop mimos minatang miteaats, acualaats aaga naxey nandooigaran olaag, andooig nej teat Pedro, tasaj nej:

—¿Ngome ique sawaw almequiüüb nej niüng ajlüy acas owil nateaic xiüla? —aj nej.

<sup>27</sup> Teat Pedro quiaj tandüy wüx alinomb mawaiich, tapiüng ngome nej. Quiaj apaj a gallo.

*Teat Jesús alteombas a Pilato*

*(Mt. 27:1-2, 11-14; Mr. 15:1-5; Lc. 23:1-5)*

<sup>28</sup> Ümban arraw taquiüjpüw mamb Teat Jesús imiün aniüng a Caifás andüy awan niüng ajlüy a gobernador romano. Nejiw ngo majmeliw cos tiül aaga ajlüyay netam marangüw quiaj, sitiül majmeliw aniüng nop ngome nipilan judío wüx aaga nüt quiaj, apmajlüyiw ngo merixix, langondom metiw tiül nangos nüt pascua.

<sup>29</sup> Quiaj taw a Pilato mandeacüw maquiüjpüw, tasaj nejiw:

—¿Cuane ngo majneaj arang aaga naxey cama? —aj nejiw.

<sup>30</sup> Quiaj tasajüw nej:

—Sitiül nej ngome aleaic arang ngo naquiüjpan miün niüng ijlüy —ajüw nej.

<sup>31</sup> Quiaj tapiüng a Pilato:

—Icona iquiüjpan mamb, ijawan wüx asoet nej atnej apiüng tiül minawijquian —aw.

Quiaj tasajüw nej ajcüwa nipilan:

—Xicona ngondom nambiyan nejingüind —ajüw nej.

<sup>32</sup> Atquiaj tajlüy para majlüy atnej lamapiüng Teat Jesús nguineay apmandeow.

<sup>33</sup> Condom a Pilato tandilil alinomb tajmel tiül awan, tapaj Teat Jesús matün manguiaj, tasaj:

—¿Ique minatangüw nipilan israele? —aj.

<sup>34</sup> Teat Jesús tasaj nej:

—¿Aag ayaj itün menguiaj cos indiüm me-  
jawa, ngwüy aljane tasaj ic wüx xique? —aj nej.

<sup>35</sup> Quiaj tapiünga a Pilato:

—¿Neol jow xique mbich nop icona xique? Cos micual miüt at montangtang miteaats monquiiüb ic miün niünga sajliü. ¿Neol, cuane iranga? —aw.

<sup>36</sup> Condom tasaj nej Teat Jesús:

—Ngame ningüy wüx aaga iüt cam sarang natang. Jondot wüx aaga iüt cam sarang natang xenipilan apmatsojow; ngome apmüjchiw ndeaan najmel teowixaw monajiüt tiül judíos. Nganüy cos ngwüy, ngome ningüy sarang natang —aj nej.

<sup>37</sup> Pilato tasaj nej:

—¿Naleaingue, ique nop minatang nena-jiüt tiül nejiw ipiünga? —aj nej.

Quiaj tasaj nej Teat Jesús:

—Xique natang atnej lamepiünga quiaj. Áag wijquatos tiünas wüx aaga iüt cam najüiquich cuane naleaing. Meáwan leawa andiümüw marangüw leawa naleaing, ajcüw ayaj apmandiümüw manguiayiw sandeac —aj nej.

<sup>38</sup> Quiaj tasaj nej a Pilato:

—¡Mbich jane ajaw cuane naleaing! —aj nej.

*Atüniw mandeow Teat Jesús*

(Mt. 27:15-31; Mr. 15:6-20; Lc. 23:13-25)

Ndoj mapiünga aag ayaj a Pilato, quiaj taw alinomb masaj nipilan, tapiünga:

—Xique sapiünga aaga naxey cam ngo ma-jiür asoet.

<sup>39</sup> Icona ipiünga alndom natsambiich nop najliü tiül manchiüc wüx nangos nüt pascua. ¿Jow nganüy, indiüman natsambiich aaga naxey minatangana? —aj nej.

<sup>40</sup> Quiaj tepajüw tapiünga:

—¡Ngwüy, nde metsambiich aag ayaj! ¡Barrabás aptsajmbiüm! —awüw.

Pues aaga Barrabás quiaj, need nej.

## 19

<sup>1</sup> Condom a Pilato tapiünga majwüch Teat Jesús.

<sup>2</sup> Ajcüwa soldados tapeatiw sats masoi-jquiw wüx omal Teat Jesús. At tasoijquiw nej tiül noic napixeran morada.

<sup>3</sup> Quiaj tapots mitsojow, tasajüw:

—¡Nganüy mbich ique minatang nenajiüt oceaj nipilan judío! —ajüw.

Quiaj tapots maleambüw nej.

<sup>4</sup> Condom a Pilato taw alinomb, tasaj a nipilan:

—Jogüy lanawün miün mejawan, naleaing sasaj icona xique ngo naxom nicuajind nisoet wüx ombas nej —aj nej.

<sup>5</sup> Quiaj taw Teat Jesús, alwüx omal nej aaga nepeat sats, at almasoig morada napixeran. Quiaj tasaj nej a Pilato:

—¡Jogüy aaga naxey! —aj nej.

<sup>6</sup> Quiaj montangtang miteaats maquiiüpüw monjiür nadam nangaj iüm

camüm majawüw ajntsopt Teat Jesús, yajnguiatoj tiüt apajüw, tapiünga:

—¡Ich mandeow wüx cruz! ¡Ich mandeow wüx cruz! —awüw.

Pilato tasaj nej:

—Iquiiüpan, icona iyacan wüx cruz, cos xique ngo naxom cuane asoet aaga naxey cam —aj nej.

<sup>7</sup> Ajcüwa nipilan judío tapiünga:

—Xicona salnajiüwan poch tiül xenaw-ijquian niünga apiünga netam mandeow cos awaiich, apiünga Micual nej Teat Dios —awüw.

<sup>8</sup> Wüx a Pilato tanguiy aag ayaj, mbayat xeyay.

<sup>9</sup> Condom tajmel awan alinomb, tatün manguiay Teat Jesús:

—¿Nguiane neriowa? —aj.

Teat Jesús ngame tasaj nej nicuajind.

<sup>10</sup> Quiaj tasaj nej a Pilato:

—¿Neol ngo merndeaca? ¿Neol ngo mejaw xique alndom nayac ic wüx cruz, aton alndom natsambiich ique? —aj nej.

<sup>11</sup> Quiaj tasaj nej Teat Jesús:

—Ngwüy, nicuajind ngondom merang wüx ximbas sitiül Xeteat Dios ngo müch ic merang. Naleaing sasaj ic, najntsopt asoet aaga neyac xic tiül iwix —aj nej.

<sup>12</sup> Ajan quiaj a Pilato tayamb nguineay alndom matsambiich Teat Jesús, pero ajcüwa monajiüt tiül judíos tepajüw napac, tapiünga:

—¡Sitiül apmetsambiich, ngo majiic ijneaj aweaag a César; cos jangantanej nendiüm marang minatangüy nenajiüt, aag ayaj ngo majneaj aweaag a César! —awüw.

<sup>13</sup> Wüx tanguiy aag ayaj a Pilato tawün tiül iüm Teat Jesús. Condom nej tsotot niünga ajaw wüx asoeteran, tiül noic nden nenüt Gabata tiül ombeayiw nipilan judío. Aag ayaj amb apiünga niünga nequiand tiüt piedra.

<sup>14</sup> Wüx laliüc lembem nüt aaga nüt quiaj, oxep quiaj pascua, quiaj a Pilato tasaj ajcüwa nipilan judío:

—¡Jogüy minatang nenajiüt! —aj nej.

<sup>15</sup> Nejw tepajüw napac, tapiünga:

—¡Iwün, iwün, ich mandeow wüx cruz! —awüw.

Quiaj tasaj nej a Pilato:

—¿Quia netam nayac wüx cruz aaga natang nenajiüt icueajiüna? —aj nej.

Quiaj montangtang miteaats tasajüw nej: —¡Xicona ngo najiüwan alinop minatang nenajiüt, áagan a César! —ajüw nej.

<sup>16</sup> Quiaj a Pilato tayac teowixaw nejw Teat Jesús mayacüw wüx cruz, taquiiüpüw mamb.

*Teat Jesús tajmel wüx cruz*

(Mt. 27:32-44; Mr. 15:21-32; Lc. 23:26-43)

<sup>17</sup> Teat Jesús tamb, tǔjchiw mambitic a cruz. Taquiiǔpǔw mamb andǔy tiǔl niǔng nasoic omal mondeow. Tiǔl ombeayiw nejiw apiǔngǔw Gólgota.

<sup>18</sup> Quiaj tayacǔw wǔx cruz Teat Jesús maquiǔb alijpǔw. Nop amb wǔx miác nej, alinop amb wǔx miquiamb nej; nganǔy Teat Jesús amb pinawan.

<sup>19</sup> Condom a Pilato tarang acas poch mayacǔch wǔx omal a cruz. Aaga poch quiaj apiǔng: “Jesús naw Nazaret, minatang nenajiǔt ocueaj judíos.”

<sup>20</sup> Xeyay nipilan judío tateowǔw aaga poch quiaj, cos niǔng tayacǔch wǔx cruz Teat Jesús ngome miǔnquiaj, aton cos aaga poch tarangǔch wǔx ombeayaran hebreo, griego, at wǔx latín.

<sup>21</sup> Pero ajcǔwa montangtang miteaats tasajǔw a Pilato:

—Nde meyac: “Minatang nenajiǔt ocueaj judíos.” Leaw netam meyac: “Nej nepiǔng minatang nenajiǔt ocueaj judíos,” —ajǔw nej.

<sup>22</sup> Quiaj tasaj nejiw a Pilato:  
—Leaw lanarang landoj lanarang —aj nejiw.

<sup>23</sup> Ajcǔwa soldados wǔx landoj mayacǔw wǔx cruz Teat Jesús, quiaj tayariw apix nej, tambajcǔw apiquiǔw quiriw mayariw noicnoic quiriw. Condom tayariw a najal micamix nej, aag ayaj ngo majiǔr niǔng ambeteay, najǔyeran naw cawǔx andǔy tiǔt.

<sup>24</sup> Quiaj tandeacǔw nejeyéjan quiaj, tapiǔngǔw:

—Ngome apmambajcaats micamix nej, apmasǔetiǔts wǔx, majǔic jane apmayar —awǔw.

Atquiaj tajlǔy cos landoj lamapiǔng tiǔl Mipoch Teat Dios, niǔng apiǔng: “Tambajcǔw sapix mayariw, tasǔetiw majawǔw jane apmayar xecamix”, aw. Atquiaj tarangǔw soldados.

<sup>25</sup> Aliw quiaj niǔng ajlǔy a cruz mimǔm nej Teat Jesús, at michiǔg mimǔm nej; at mǔm María mintaj teat Cleofas, at mǔm María Magdalena.

<sup>26</sup> Teat Jesús wǔx tajaw mimǔm nej, at nop minipilan nej, aaga xeyay tandiǔm alquiaj aton, quiaj tasaj mimǔm nej:

—Mǔm, joyaj nganǔy apmajlǔy atnej micual —aj.

<sup>27</sup> Condom quiaj tasaj aaga nop minipilan nej:

—Joyaj teat, nganǔy apmajlǔy atnej mimǔm —aj.

Naw quiaj aaga nop minipilan nej taquiiǔb mamb mimǔm Teat Jesús andǔy aniǔng nej atnej majiǔr mimǔm nej.

*Tandeow Teat Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Wǔx landoj aag ayaj, nej lamajaw meáwan lamapalǔch marang. Cos netam majlǔy atnej apiǔng wǔx nej tiǔl Mipoch Teat Dios, quiaj tapiǔng:

—Nind sanganeow yow —aw.

<sup>29</sup> Ajlǔy quiaj nop xar chipiow nachich vino, quiaj tasocoj tiǔl noic esponja, aag ayaj atnej walang sap. Ndoj cas tayacǔw wǔx omal nots narix xiǔl mipǔiǔg hisopo. Quiaj tayacǔw wǔx ombeay Teat Jesús.

<sup>30</sup> Teat Jesús wǔx landoj machey aaga nachich vino, quiaj tapiǔng:

—Canǔy lanambich narang meáwan leawa tiǔnas narang —aw.

Quiaj manguieer omal nej; tayac miespíritu nej teowix Teat Dios; tanaámb andeow.

*Tajtiǔl teombas micostil Teat Jesús*

<sup>31</sup> Oxep quiaj pascua, y nipilan judío ngo mandǔmǔw macǔlan wǔx cruz mondeow, cos aaga nǔt axoodaran quiaj xeyay nangaj. Quiaj tatǔniw ocueaj a Pilato majmbajǔch oleajiw leaw monlǔy wǔx cruz para andom mawǔniw tiǔt najen.

<sup>32</sup> Quiaj tambǔw a soldados tajmbajǔw oleajiw ajcǔw tajmeliw wǔx cruz maquiǔǔw Teat Jesús.

<sup>33</sup> Pero wǔx tapeayiw niǔng ajlǔy Teat Jesús, quiaj tajawǔw landeow, taton ngo majmbajǔw oleaj nej.

<sup>34</sup> Condom nop soldado tatil teombas micostil Teat Jesús naag nots lanza, quiaj taw quieǔ maquiǔb tiǔl yow.

<sup>35</sup> Jan tajaw meáwan aag ayaj teamandeaac wǔx; leawa andeaac aag ayaj ajaw naleaing. Aldom mepiǔngan icona aton naleaing.

<sup>36</sup> Meáwan aag ayaj tajlǔy atnej lamapiǔng tiǔl Mipoch Teat Dios wǔx tapiǔng: “Mio-laats nej ngo majmbajaran”, maw.

<sup>37</sup> Aton apiǔng tiǔl Mipoch Teat Dios: “Apmajawjawǔw aaga naxey tatileran quiaj”, aw.

*Tamiǔraad Teat Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Wǔx landoj meáwan aag ayaj, quiaj teat José naw tiǔl cambaj Arimatea tamb majaw a Pilato matǔn ocueaj, mǔiǔch nej maquiǔb mamb Teat Jesús mamiǔt. Pilato taneam, quiaj tawǔn maquiǔb mamb. Aaga José quiaj nop nej minipilan Teat Jesús, pero naleaing axotǔyan cos imbol mandǔy monajiǔt tiǔl judíos.

<sup>39</sup> At teat Nicodemo, aaga tamb mandeaac aweaag Teat Jesús noic ongwiiǔts, nej tamb quiaj aton, ajoy mamb maseyme nimiow gajpowǔw (30) kilo najmboc angan sǔiǔg naolǔch omal tiǔl mirra maquiǔb áloes.

<sup>40</sup> Quiaj teat José maquiǔb teat Nicodemo taxainguǔw, tawinchaw tiǔl noic pǔy naneajay, ayacǔw wǔx aaga najmboc angan

süüig, cos atquiaj arangüw nipilan judío wüx apmamiütüw nop nandeow.

<sup>41</sup> Niüנג tayacüw wüx cruz Teat Jesús, quíaján ajlüy acas owil nateaic xiül. Alquiaj noic oxiüt jayatsüy, nganaw mamiütaran quiaj nejinguind.

<sup>42</sup> Quíaján tayacüw Teat Jesús, cos aaga oxiüt quiaj ngome miünquiaj ajlüy, aton ajcan lamí nangos nüt pascua ocueajiw judíos.

## 20

*Teat Jesús tapac imiün tiül mondeow (Mt. 28:1-10; Mr. 16:1-8; Lc. 24:1-12)*

<sup>1</sup> Úmban arraw domingo wüx aliün mex-emem, quiaj tamb niüנג ajlüy oxiüt müm María Magdalena, tajaw aaga piedra nay-acüch mapal oxiüt ngo majlüy niüנג tay-acüch.

<sup>2</sup> Andilán tiüt tamb majaw teat Simón Pedro maquiüb alinop aaga xowüy andiüm nej Teat Jesús. Quiaj tasaj nejijw:

—Lamawüniw tiül oxiüt Teat Naxey, ngo majawaats nguiane tambüw mayacüw —aj nejijw.

<sup>3</sup> Camüm manguaiyiw aag ayaj, quiaj tamb teat Pedro maquiüb alinop minipilan Teat Jesús andüyiw niüנג ajlüy oxiüt.

<sup>4</sup> Ijpüéj tambüw acuiürüw nóiquian, pero aaga alinop quiaj alwüx acuiür, tamong wüx ombas teat Pedro, ombas mapeay niüנג ajlüy oxiüt.

<sup>5</sup> Quiaj tapiür majaw tiül. Tajaw aaga püy tan ajlüy quiaj; nej taton ngo majmel.

<sup>6</sup> Condom quiaj tapeay teat Simón Pedro andüüban nej. Nej mbich nómban tajmel tiül oxiüt, tajaw aaga püy alquiaj.

<sup>7</sup> At aaga püy nawincheran wüx omal Teat Jesús ngo majlüy nóiquian maquiüb aaga alinoic püy; alpejchiüm pálwüx, tan ajlüy awinchay.

<sup>8</sup> Condom quiaj alinop minipilan Teat Jesús, aaga napeay ombas, tajmel tiül oxiüt aton. Wüx tajaw aag ayaj, aleíngan tajaw naleaing lapac.

<sup>9</sup> Cos ores quiaj nganaw majawüw leawa lamapiüנג tiül Mipoch Teat Dios niüנג apiüנג Teat Jesús apmapac tiül mondeow.

<sup>10</sup> Condom ajcüwa ijpw minipilan Teat Jesús quiaj, tandilleaw alinomb andüyiw aniüngüw nejijw.

*Teat Jesús tejüiquichay majaw nej müm María Magdalena (Mr. 16:9-11)*

<sup>11</sup> Müm María wüx tapeay alinomb, tacülan mbeay oxiüt, tengual ajjünts, tapiür majaw tiül oxiüt.

<sup>12</sup> Quiaj tajaw ijpw ángeles alchetemoj niüנג tayacüch Teat Jesús; nop amb wüx omal, alinop amb wüx oleaj, apixaw nejijw rajnúy.

<sup>13</sup> Quiaj tatüniw nej manguaiyiw, tasajüw: —Müm najtaj, ¿Neol tapots ijiüntsaj? —ajüw nej.

Quiaj tasaj nejijw aaga najtaj:

—Cos lajwan aaga Teat Naxey, ngo najaw nguiane tamb mayacüch —aj nejijw.

<sup>14</sup> Wüxan ndoj mapiüנג aag ayaj, wantsat majaw wanopech nej. Quiaj majaw alem-bem quiaj Teat Jesús, pero nej ngo majaw majneaj sitiül aag ayaj Teat Jesús.

<sup>15</sup> Condom quiaj tasaj nej Teat Jesús:

—Müm najtaj ¿neol tapots ijiüntsaj, jane teameyamba? —aj nej.

Müm María apiüנג nej aag ayaj nop nerang najiüt quiaj. Quiaj tasaj:

—Teat, sitiül ique nerwün, isaj xic nguiane almeyac para namb naxaing —aj.

<sup>16</sup> Quiaj tasaj nej Teat Jesús:

—¡María! —aj nej.

Müm María quiaj wantsat majaw nej, tasaj nej wüx ombeayiw nejijw, tiül hebreo:

—¡Raboni! —aj. Aag ayaj wüx ombeayiw nejijw apiüנג Nequiaach.

<sup>17</sup> Teat Jesús tasaj nej:

—Nde mesamb xic müm, cos nganaw namb sandüy niüנג ajlüy Xeteat Dios. Quiür isajüw xenipilan, xique sanamb sandüy niüנג ajlüy Xeteat, aag ayaj Miteatiün aton; niüנג ajlüy Xedios, aag ayaj Midiosan aton —aj nej.

<sup>18</sup> Quiaj tamb müm María Magdalena masaj minipilan Teat Jesús nej landoj majaw Teat Jesús. Aton tapiüנג meáwan leawa tasaj nej.

*Teat Jesús tejüiquichay tiül minipilan nej (Mt. 28:16-20; Mr. 16:14-18; Lc. 24:36-49)*

<sup>19</sup> Tiülan aaga nüt domingo quiaj, wüx langwiiüts, minipilan nej aliw tiül iüm canchiünoj; apalüw ombeay iüm cos imboloj mandüyiw monajiüt ocueaj judíos. Camüm majawüw Teat Jesús alembem pinawan nejijw. Quiaj tatepeay nejijw, tapiüנג:

—Tamtámban ijlüyiüna —aw.

<sup>20</sup> Wüx ndoj mapiüנג aag ayaj, quiaj tüüch nejijw majawüw owix nej at micostil nej. Xeyay tapac omeajtsiw wüx tajawüw nej.

<sup>21</sup> Condom tandüy wüx matepeay nejijw alinomb. Tapiüנג:

—Tamtámban ijlüyiün. Atnej Xeteat Dios tüüch xic niün, atanguiaj nganüy xique süüch icon meamban meáwan wüx aaga iüt cam —aj nejijw.

<sup>22</sup> Wüx ndoj mapiüנג aag ayaj, quiaj tapep miüfund nej wüx ombasüw nejijw. Tasaj nejijw:

—Iyariün Nangaj Espiritu ocueaj Teat Dios.

<sup>23</sup> Nganüy jangantanej leaw icona ap-meajchiün macueat arang ngo majneaj, mewüniün wüx imeajtsan asoet nej, at Teat

Dios aton apmawün wüx omeaats. Sitiül aljane ngo mandium macueat arang ngo majneaj, Teat Dios aton ngome apmawün wüx omeaats asoet nej —aj nejiw Teat Jesús.

*Teat Jesús tejüiquichay majaw nej Tomás*

<sup>24</sup> Tomás, aaga nasoić Cuüch, nej nop tiül ajćüwa gajpiüp (12) minipilan Teat Jesús, ngome tajlüy quiaj wüx tapeay Teat Jesús.

<sup>25</sup> Alacas minipilan Teat Jesús tasajüw nej: —¡Landoj najawan Teat Naxey! —ajüw nej.

Quiaj tasaj nejiw a Tomás:

—Sitiül ngo najaw aóp owix nej niüng tapaparan clavos, sitiül ngo naxec tiül nots micual xiwix niüng tapaparan clavos; aton sitiül ngo naxec xiwix teombas micostil nej, nómban ngo nayar indeacan —aj nejiw.

<sup>26</sup> Wüx lamajiür ojpeacüw (8) nüt tatow ndoj aag ayaj, minipilan Teat Jesús canchiütoj alinomb tiül iüm; alquiaj a Tomás maquiüjpüw. Tan ajlüy palaw ombeay iüm, camüm majawüw Teat Jesús alembem pinawan nejiw, tatepay nejiw, tapiüng:

—Tamtámban ijlüyiüna —aw.

<sup>27</sup> Condom quiaj Teat Jesús tasaj a Tomás:

—Jaw aop xiwix teat, ixec ningüy nots micual iwix, condom iwind iwix andüy ningüy, ixec teombas xecostil. Ipiüng naleaing, nde mechiw imeaats —aj.

<sup>28</sup> Quiaj tapiüng a Tomás:

—¡Teat Naxey, Xeteat Dios! —aw.

<sup>29</sup> Quiaj tasaj nej Teat Jesús:

—Tomás ¿neol, ajcan lamejaw xic tepiüng naleaing lasapaca? Najneajay apmajlüyiw jane apmapiüngüw naleaing lasapac masey ngo majawüw xic naag oniüjćüw —aj nej.

*Neol tarangüch a nawiig cam*

<sup>30</sup> Teat Jesús tarang xeyay cuajantanej ngome aag ajaraw, müüch majaw minipilan nej; pero aton ngome meáwan tarangüch tiül aaga nawiig cam.

<sup>31</sup> Nganüy meáwan leawa tarangüch tiül aaga nawiig cam, tarangüch para alndom mepiüangan naleaing Teat Jesús Micual Teat Dios nej; aton mepiüangan nej aaga Cristo lapiürang aliüć. Cos jangantanej leaw apmayer mapiüng naleaing aag ayaj, apmapac meáwan nüt.

## 21

*Teat Jesús tejüiquichay majawüw nej ayaiw minipilan nej*

<sup>1</sup> Wüx landoj aag ayaj, tejüiquichay alinomb Teat Jesús majawüw nej minipilan nej. Atcüy tajlüy wüx tajlüyiw mbeay nadam yow Tiberias.

<sup>2</sup> Cos acas minipilan nej ajlüyiw quiaj nóiquian, nop teat Simón Pedro, nop teat Tomás aaga nasoić Cuüch, alinop teat Natanael naw tiül cambaj Caná tiül iüt Galilea, at ijpüw micual teat Zebedeo, maquiüjpüw alijpüw minipilan nej.

<sup>3</sup> Condom tasaj nejiw teat Simón Pedro:

—Sanamb sandoc —aj nejiw.

Quiaj tasajüw nej:

—Ata xicona sanamban, tabaats —ajüw nej.

Quiaj tambüw, ambüw tiül nop müx. Aaga ongwiiüts quiaj ngo mandocoj nicuajind.

<sup>4</sup> Wüx ümb chiüjmbaw raw, quiaj majawüw Teat Jesús alembem mbeay yow. Naleaing nejiw ngo mateotsüw wüx sitiül aag ayaj Teat Jesús.

<sup>5</sup> Condom quiaj tasaj nejiw Teat Jesús:

—Xecualüw ¿tesapan indocona? —aj nejiw.

Quiaj tasajüw:

—Ngo nasapan —ajüw.

<sup>6</sup> Quiaj tasaj nejiw Teat Jesús:

—Iyacan mindocon amb wüx miác otüeng müx, mbich apmesapan —aj nejiw.

Tarangüw atnej tasoiquiw. Ndoj ngondom maxainguw mindocoj nejiw cos chipiow a cüet.

<sup>7</sup> Quiaj nop tiül nejiw, aaga xowüy andiüm nej Teat Jesús, tasaj teat Pedro:

—¡Aaga iün Teat Naxey! —aj.

Teat Pedro camüm manguiy aag ayaj, quiaj masoig micamix nej cos tasoond, tanaám ajchic tiül yow.

<sup>8</sup> Condom ajćüwa aquiüjpüw nej taquiüjpüw mamb aaga müx andüy wüx iüt. Atan ndoc tanotoj mamb chipiow a cüet, cos ngome miünquiaj wüx iüt, ajüür maseyme coic miow (100) metros.

<sup>9</sup> Wüx tajtepiw wüx iüt, tajawüw oliüć biümb quiaj. Alpiiüm wüx nop cüet, aton alquiaj pan.

<sup>10</sup> Quiaj tasaj nejiw Teat Jesús:

—Jamiünan acas cüet leawa les ndot mesapan quiaj —aj nejiw.

<sup>11</sup> Quiaj teat Simón Pedro tajtep tiül müx macheed a ndoc manot andüy wüx iüt. Aaga ndoc ngo chiütam masey chipiüt tiül nadamdám cüet. Atüch coic miow ic miow gajparoo (153) cüet.

<sup>12</sup> Condom tasaj nejiw Teat Jesús:

—Macaron metiiüts —aj nejiw.

Nejinguind tiül nejiw ngo majntsop matüniw nej manguiyiw jane nej, cos lamajawüw nej Teat Jesús.

<sup>13</sup> Quiaj tatüch nejiw Teat Jesús, tayar a pan müüch nejiw, at a cüet.

<sup>14</sup> Aag ayaj arojmbüw wüx ajüiquichay majaw nej minipilan nej, wüx landoj apac tiül mondeow.

*Teat Jesús tandeac aweaag teat Simón Pedro*

<sup>15</sup> Wüx landoj üetiwi, quiaj Teat Jesús tasaj teat Simón Pedro:

—Simón, micual teat Jonás ¿cuane ipiüng, indium xic, ngwüy ajntsop wüx indium meáwan aag ayaja? —aj.



Quiaj tapiüing teat Pedro:

—Teat, ique ijaw xique sandiüm ic —aw.

Quiaj Teat Jesús tasaj nej:

—Ijiürüw quicheech xesapüw —aj nej.

<sup>16</sup> Condom tandüy wüx masaj nej amb ijbübüw:

—Simón, micual teat Jonás ¿naleaing indiüm xic? —aj nej.

Quiaj teat Pedro tasaj nej:

—Teat, ique ijaw xique sandiüm ic —aj nej.

Quiaj tasaj nej Teat Jesús:

—Ijiürüw xesap —aj nej.

<sup>17</sup> Condom quiaj tasaj nej amb arojmbüw:

—Simón, micual teat Jonás ¿naleaingue indiüm xique? —aj nej.

Teat Pedro quiaj tamix omeaats ajcan lamasaj nej amb arojmbüw sitiül andiüm nej, quiaj tapiüing:

—Teat, ique ijaw meáwan cuajantanej; ique ijaw naleaing sandiüm ic —aj.

Tasaj nej Teat Jesús alinomb:

—Ijiürüw xesap.

<sup>18</sup> Naleaing naleaing sasaj ic, wüx aliün mermonguich, iquíáyan quiaj isooig ipix, iriümb leaw niüng indiüm; pero wüx apmer-taxey pálwüx apmasooig ic tiül ipix, apmendic iwüx, apmequíüraab niüng ngo mendiüm meamb —aj nej.

<sup>19</sup> Tasaj nej aag ayaj majüiquich nguineay netam mandeow teat Pedro, cos apmandeow wüx arang minajiüt Teat Dios. Ndoj mandeac aag ayaj, tapiüing:

—Indüüb xic tanaámb —aj.

*Nop minipilan nej aaga xeyay andiüram*

<sup>20</sup> Wüx wantsat teat Pedro, quiaj tajaw almandüüb nejiw aaga xeyay andiüm nej Teat Jesús, aaga leaw chetet aweaag nóiquian maquíüüb Teat Jesús wüx tetiw, wüx tatün manguiay: “Teat ¿jane apmayac ic teowixaw monajiüt?” maw.

<sup>21</sup> Teat Pedro wüx tajaw almandüüb nejiw aaga alinop quiaj, quiaj tasaj Teat Jesús:

—Teat ¿jowa neje aaga alinop quiaja? —aj.

<sup>22</sup> Quiaj tasaj nej Teat Jesús:

—Sitiül xique nandiüm ngo mandeow, aliün mapac wüx sanandilil alinomb, ¿neol, cuane imbiche? Ique tanaámb indüüb xic —aj nej.

<sup>23</sup> Condom aaga poch quiaj tejüiquichay manguiayiw meáwan monyar andeac Teat Jesús, tapiürang aaga nop minipilan nej ngome apmandeow. Pero naleaing Teat Jesús ngo mapiüing lango mandeow. Nej tapiüing: “Sitiül xique nandiüm ngo mandeow, aliün mapac wüx sanandilil alinomb, ¿neol, cuane imbich?”, aw.

<sup>24</sup> Nej aaga nop tiül minipilan Teat Jesús teamarang aaga nawüig cam. Meáwan aag agüy tajaw, tanguiy. Atquiaj alndom

majawaats meáwan leaw tarang, aag ayaj naleaing.

<sup>25</sup> Aliün majlüy xeyay leaw tarang Teat Jesús. Naleaing sapiüing sitiül apmarangüch wüx nawüig meáwan leawa tarang, ngome apmajoy aaga iüt cam. Atanquiaj tajlüy. Amén.

## Leawa tarangüw miapóstoles Teat Jesucristo Los HECHOS de los apóstoles

*Apmüüch miün Nangaj Espiritu*

<sup>1</sup> Teat Teófilo, tiül aaga nawüig tarangas ningünüt tasajas ic meáwan leaw tarang Teat Jesús, at leaw tapots maquiaach.

<sup>2</sup> Ndóiwüx tasajas ic nguineay tamb andüy cawüx tiül cielo. Naleaing wüx nganaw mamb andüy tiül cielo tarrüüd miapóstoles nej. Condom tasaj nejiw nguineay netam marangüw, atnej tasaj nej Nangaj Espiritu ocueaj Teat Dios.

<sup>3</sup> Condom tandeow, pero naleaing wüx tapac alinomb tejiüquichay majawüw nej minipilan nej tiül ic miow (40) nüt. Atquiaj tarang majaraw naleaing nej almapac. At tasaj nejiw nguineay ajlüy tiül micambaj Teat Dios.

<sup>4</sup> Wüx Teat Jesús aliün maquiüüb nejiw, tasaj nejiw nde mawüw tiül Jerusalén, tapiüng:

—Icülüün aag leaw lamapiüng Teat Dios aliüc miün apmajlüy. Aag ayaj landoj lanasaj icon ningünüt.

<sup>5</sup> Naleaing Juan tüüch yow nipilan, pero aag ayaj náagan yow. Nganüy icona alningüy alacas nüt apmeyariün Nangaj Espiritu ocueaj Teat Dios —aw.

*Wüx Teat Jesús tamb andüy tiül cielo*

<sup>6</sup> Condom alinoic nüt wüx aliün maquiüjpüw Teat Jesús, tatüniw manguiayiw:

—Teat, ¿nganüy nüt cam apmeaach majlüyüüts wüx micambajaats Israel alinomba? —ajüw.

<sup>7</sup> Teat Jesús tasaj nejiw:

—Icona ngo metam mejawan ngow, ngün nüt apmajlüy aag ayaj. Cos néjan quiaj Teat Dios ajaw ngow apmüüch majlüy aag ayaj.

<sup>8</sup> Icona apmeajndiün Nangaj Espiritu ocueaj Teat Dios majlüy wüx imbasan, quiaj alndom merangan cuajantanej. Apmemelichan mendeacan wüx xique naw ningüy tiül cambaj Jerusalén. At apmeamban tiül meáwan cambaj tiül Judea, at meáwan tiül Samaria. At apmeamban meáwan tiül palpáwüx cambaj wüx iüt —aj nejiw.

<sup>9</sup> Condom wüx Teat Jesús landoj mapiüng aag ayaj, tanaámb amb andüy cawüx tiül cielo, teamajawüw nej. Ndoj tajngot noic oic taxot nej, lango maxomüw majawüw.

<sup>10</sup> Nejiw tealeámban majawüw andüy cawüx niüng amb Teat Jesús, quiaj tajawüw

ijpüw teat monxey alembemoj niüng ajlüyiw nejiw, xowüy larraw apixaw nejiw.

<sup>11</sup> Condom tendeaüw masajüw nejiw, tapiüngüw:

—Teat monxey monaw Galilea ¿neol teleámban lembemeron ningüy mejawan andüy cawüxe? Cos aaga Teat Jesús les ndot mejawan aw niüng ijlüyüün amb andüy cawüx tiül oic quiaj, atquiaj aliüc alinomb wüx aliüc imiün tiül cielo —awüw.

*Tarriüjtüch Matías marang ingow Judas*

<sup>12</sup> Condom quiaj tandilileaw andüyiw Jerusalén imiünüw wüx tiüc nasoic mitiüc Olivos. Aaga tiüc quiaj ngome miünquiaj ajlüy naw Jerusalén; ajiür atonej alndom majüyiw wüx noic nüt axoodaran.

<sup>13</sup> Nejiw wüx tapeayiw tiül cambaj Jerusalén, quiaj tajtepiw andüyiw cawüx tiül amb ijpüw iüm niüng axojtüw Pedro, Jacobo, Juan, Andrés, Felipe, Tomás, Bartolomé, Mateo, Jacobo micual Alfeo, Simón nasoic Zelote, at a Judas michiig Jacobo.

<sup>14</sup> Meáwan nejiw noic nej omeajtsüw tanaámb canchiüjow quiaj matajcüw orar, aqiuüjpüw michiig Teat Jesús, at a María mimüm nej, aton alacas montaj.

<sup>15</sup> Noic nüt wüx tajlüyiw quiaj, atüch maseyme acotic miow niniow (120) nipi-lan, quiaj witiüt a teat Pedro masaj nejiw, tapiüng:

<sup>16</sup> —Xecojow xechijquiaw, naleaing tajlüy meáwan atnej apiüng tiül Mipoch Teat Dios tarang teat David, wüx Nangaj Espiritu tambeol nej mapiüng nguineay apmarang a Judas, aaga nequiüüb monsap Teat Jesús.

<sup>17</sup> Cos Judas tateoraw tiül naquiüjpan, at tajlüy tiül marang aaga najiüt sarangan.

<sup>18</sup> Aaga Judas quiaj, tamb mangal noic iüt naag mitomiün nej, aag tangüyeran wüx tarang aaga xeyay ngo majneaj quiaj. Condom tamb terrondüy onic, tandeow. Ndoj tajmiüc mojcoj tiüt, tajpoet otüeng nej, taw meáwan mixiüt aonts nej.

<sup>19</sup> Meáwan nipilan moncül Jerusalén tanguaiyiw nguineay tajlüy. Áag tujúchw manüt aaga iüt quiaj Acéldama. Aaga poch Acéldama quiaj, apiüng Míiüt Quiej.

<sup>20</sup> Cos larangüch tiül Mipoch Teat Dios tiül Salmo, apiüng:

Ich majlüyan aaga iüt niüng acül nej, nde macül quiaj nejingüind, aw.

At aton tiül alinoic Salmo apiüng:

Ich majmel alinop marang ingow nej, aw.

<sup>21</sup> Nganüy netam mayacaats nop naxey leaw almaquiüüb icoots meáwan nüt wüx Teat Jesús almaquiüüb icoots,

<sup>22</sup> ajan wüx a nüt Juan tüüch yow Teat Jesús, ndóiwüx quiaj Teat Jesús tamb andüy tiül cielo. Cos netam maquiüjpaats alinop leaw naleaing tajaw Teat Jesús nguineay tapac alinomb —aw a Pedro.

<sup>23</sup> Quiaj tayacüw ijpüw monxey náwan tiül nejiw, nop José nasoic Barsabás, at ajiür alinoic minüt nej nasoic Justo. At tayacüw alinop nenüt Matías.

<sup>24</sup> Ndoj, quiaj tatajcüw orar, tapiüngüw:  
—Xetetiün Dios, ique ijaw tiül omeaats meáwan nipilan, nganüy iich majüic najawan ngün lamerriiüd tiül ajcüwa ijpüw cam.

<sup>25</sup> Netam alinop majmel marang apóstol, cos aaga Judas tacueat aaga najiüt quiaj wüx tarang aaga nadam nisoet, ndoj tamb tiül aaga xeyay ngo majneaj niüng atüch nej mamb —awüw.

<sup>26</sup> Ndoj, quiaj tasüetiw jane nop tiül nejiw, quiaj tajawüw Matías netam marang. Quiaj tateoraw tiül ajcüwa gajpanop (11) apóstoles.

## 2

*Wüx tapeay Nangaj Espiritu ocueaj Teat Dios*

<sup>1</sup> Wüx tatüch a nüt, nangos nüt nasoic Pentecostés, meáwan minipilan Teat Jesús alxenenguemoj nóiquian.

<sup>2</sup> Camüm manguaiyiw aliüic noic neterriür napac imiün tiül cielo, atnej aterriür napac iünd. Aaga neterriür quiaj tajmel tiül iüm niüng alchetemoj. Meáwan monlüy quiaj tanguaiyiw.

<sup>3</sup> Quiaj tajawüw atnej xeyay oniw biümb, ajcüw ayaj tajmiüc wüx ombasüw anopnopoj.

<sup>4</sup> Meáwan monlüy quiaj tajlüy wüx ombasüw nejiw Nangaj Espiritu ocueaj Teat Dios. Ndoj tapots andeacüw pálwüx ombeayaran leaw tüüch nejiw Nangaj Espiritu mandeacüw.

<sup>5</sup> Tiül aaga nüt quiaj, aliw tiül Jerusalén xeyay nipilan judío, monyamb Teat Dios monaw tiül palpálwüx cambaj wüx iüt.

<sup>6</sup> Wüx tanguaiyaran aaga neterriür quiaj, quiaj sonogotoj quiaj xeyay nipilan. Mbayatoj xeyay wüx tanguaiyiw andeacüw ombeayiw nejiw meáwan anopnop minipilan Teat Cristo.

<sup>7</sup> Xeyay mbayatoj majawüw aag ayaj, quiaj tesajajej, tapiüngüw:

—¿Neol, ngome monaw Galilea nejiw ajcüwa teandeacüw quiaja?

<sup>8</sup> ¿Neol, nguineay andeacüw ombeayiiütsa, leaw andeacaats nde ajngotoots miüna?

<sup>9</sup> Cos alningüy palpálwüx nipilan, altiül monaw Partia, monaw Media, monaw Elam, monaw Mesopotamia, monaw Judea, monaw Capadocia, monaw Ponto, monaw Asia,

<sup>10</sup> monaw Frigia, monaw Panfilia, monaw Egipto, at monaw tiül Africa niüng ajlüy cambaj Cirene. Alningüy monjüy miün nipilan naw Roma. Altiül nejiw wijquian ningüy judíos nejiw; altiül aton nipilan

ngome judío leaw lamayambüw Teat Dios aton.

<sup>11</sup> At alningüy monaw Creta, at monaw Arabia. Pero nganüy meáwan icoots ranüy manguaiyiiüts teamandeaacüw ombeayiiüts, nguineay Teat Dios lamarang xeyay najneaj leaw ngome áag ajaraw —awüw.

<sup>12</sup> Cos xeyay mbayajow, ngo majawüw cuane najlüy, áag tesajajej nejeyéjan quiaj, apiüngüw:

—¿Cuane aag ayaja? —awüw.

<sup>13</sup> Nganüy altiül itsojayéjan, tapiüngüw:

—Nangüniw, amongochiw wüx anganeowüw vin —awüw.

*Pedro tandeac tiül xeyay nipilan*

<sup>14</sup> Ndoj Pedro, quiaj tamong maquiüüb ajcüwa gajpanop (11) minipilan Teat Jesús, lembemoj niüng ajlüy nipilan. Condom tandeac napac manguaiyiw, tasaj nejiw:

—Teat cambaj Israel, at meáwan leawa jayats mapeay tiül Jerusalén, nganüy inguiayiün leaw sanasaj icon:

<sup>15</sup> Ajcüwa monxey teamenguiayiün andeacüw cam ngome nangüniw atnej icona ipiüangan. Cos nganüy les tatüch pinawan ajüy nüt.

<sup>16</sup> Aaga leaw tenguiäl mejawan quiaj, aag ayaj lamapiüng tiül Mipoch Teat Dios, tiül nawiiig tarang Joel, aaga nendeac andeac Teat Dios, cos apiüng:

<sup>17</sup> Teat Dios apiüng: Alningüy alinoic nüt, sanüjchiw mayariw Nangaj Xeespíritu meáwan nipilan;

quiaj micualan monench at monüx apmandeacüw sandeac,

monguich sanüüch maxomüw omeajtsüw leaw ajawüw atnej aümiw,

y montangtang ombas nipilan sanüjchiw maxomüw omeajtsüw wüx aümiw.

<sup>18</sup> Wüx aaga nüt quiaj, sanüüch mayariw Nangaj Xeespíritu meáwan monrang xenajiüt, monxey at montaj;

condom nejiw aton apmandeacüw sandeac.

<sup>19</sup> Sanarang atéocan cawüx tiül cielo majaraw, tiüt wüx iüt sanarang cuajantanej leaw ngomeaag ajaraw.

Apmajlüy xeyay quiej, apmajlüy xeyay biümb, at apmajlüy xeyay nasop.

<sup>20</sup> Quiaj a nüt lango merraj, apmajlüy pojniün,

at a caaw apmacants atnej quiej.

Aag ayaj apmajlüy wüx laliüc matüch a najneajay nüt wüx apmandilil Teat Naxey.

<sup>21</sup> Meáwan nipilan leaw apmayambüw Teat Dios,

matüniw Teat Dios mawün nejiw wüx asoetiw, apmawüw wüx, aw.

<sup>22</sup> Teat cambaj Israel, inguiayiün leaw sanasaj icon: Icona tejawan aaga Teat Jesús

naw Nazaret tarang xeyay ateócan wüx tajlüy ningüy maquiüjpaats. Tajüic naleaing Teat Dios neech nej miün, cos tambeol nej marang xeyay cuajantanej, leaw icona tejawan aton.

<sup>23</sup> Condom tayacüch tiül iwixan merangan wüx leaw tendiüman. Atquiaj netam majlüy, para majlüy atnej lamapiüng Teat Dios. Icona teyacan teowixaw nipilan monrang ngo majnej, tesajanüw mayacüw wüx cruz mandeow.

<sup>24</sup> Naleaing Teat Dios tapacüüch nej alinomb, tawün nej tiül mondeow, cos nej ngondom macül niüng acül mondeow.

<sup>25</sup> Teat David tanomb tandeac wüx nej tiül minawig nej, tapiüng: Xique tajawas Teat Dios tanaám al-maquiüb xic; cos nej alwüx xeác, ngo nimbol nandüy nicuajind.

<sup>26</sup> Xeyay apac ximeaats, ngo paxiüm nandead wüx aag ayaj. At ngo napiüng wüx masey nandeow, cos sanapac alinomb.

<sup>27</sup> Ique ngome apmecueat xic tiül niüng acüliw mondeow, apmepacüüch xic alinomb.

Ngome apmeaach majmboc xecuerpo, cos nangaj micual xic.

<sup>28</sup> Ique Teat, teaach xic najaw ngün a tiüld amb andüy niüng apacaran meáwan nüt.

Apmeaach mapac ximeaats cos sanajlüy niüng ijlüy, aw.

<sup>29</sup> Teat monxey micual iüt, inguiayüin. Aaga miteatiüts David naleaing tandeow tamiüraad; mioxiüt nej alningüy ajawaats nganüy nüt cam aliün majlüy.

<sup>30</sup> Naleaing cos nej nop nej nendead andead Teat Dios tajaw naleaing apmajlüy leaw tasaj nej Teat Dios, nguineay Teat Cristo aliüc miün apmajlüy naw tiül micual micual nej. Aag ayaj apchetem niüng chetey nej, apmarang natang nenajiüt.

<sup>31</sup> Teat David, cos tajaw aag ayaj, áag tandeac wüx nguineay apmapac alinomb Teat Cristo, ngo macül tiül niüng acüliw mondeow, at micuerpo nej ngome apmajmboc.

<sup>32</sup> Nej aaga Jesús quiaj, Teat Dios tapacüüch nej alinomb. Meáwan xicona tajawasan naleaing aag ayaj.

<sup>33</sup> Teat Dios taquiüb nej mamb andüy tiül cielo marang natang quiaj. Nej lamüünd aaga Nangaj Espiritu ocueaj Teat Dios leawa tasoic apmüünd. Nganüy lamüch miün. Meáwan aaga leaw ijawan quiaj, leaw inguiayüin nganüy cam, aag ayaj Nangaj Espiritu ocueaj Teat Dios nerang.

<sup>34</sup> Teat David ngo mapac alinomb mamb tiül cielo, pero nej tapiüng: Teat Dios tasaj a Teat Naxey:

“Cheter ningüy amb wüx xeác,  
<sup>35</sup> leaw ndoj nayac moncüy majaw ic, melembech wüx ileaj”.

<sup>36</sup> Nganüy ich manguiay meáwan micual iüt Israel, aaga Teat Jesús tembiyan wüx cruz, Teat Dios lamayac nej nganüy marang natang, cos nejay aaga Cristo —aj nejiw.

<sup>37</sup> Wüx tanguiaiyw aag ayaj ajcüwa nipilan quiaj, tayajcüw tiül omeajtsüw nejiw xeyay ngo majnej arangüw. Quiaj tasajüw a Pedro y alacas apóstoles:

—Teat monxey, jow nganüy ¿cuane sanarangana? —ajüw.

<sup>38</sup> Quiaj tasaj nejiw a Pedro:

—Ich leam imeajtsan xeyay ngo majnej irangan, nde nganüy irangan najnej. Ndoj iyariün yow meáwan inopnoyon wüx minüt Teat Jesucristo, majüic laáf isoetiün. Quiaj Teat Dios apmüch meyariün Nangaj Miespíritu nej.

<sup>39</sup> Cos Teat Dios lamapiüng apmüch miün Nangaj Miespíritu nej müüch icon, müüch micualan, at meáwan leaw apmayamb Teat Dios alinoic nüt. Cos aag ayaj apmüjndiw meáwan nipilan leaw Miteatiüts Dios apmapaj miünüw —aj nejiw.

<sup>40</sup> Condom tasaj nejiw xeyay wüx aag ayaj, tapaj nej ocueajiw, tapiüng:

—Iyamban Teat Dios, isajan mawün isoetiün, cos atquiaj alndom meriowan tiül ajcüwa nipilan monrang ngo majnej quiaj —aw.

<sup>41</sup> Condom meáwan leawa tayariw, at leawa tayacüw wüx omeajtsüw andead teat Pedro tayariw yow. Aaga nüt quiaj tajlüyiw xeyay jayats monyar andead Teat Dios, atüch maseyme arej mil nipilan.

<sup>42</sup> Nejiw tanaám arangüw atnej taquiajchiw nejiw miapóstoles Teat Jesús. Tajlüyiw nóiquian maquiüjpüw meáwan monyar andead Teat Dios, tatajcüw orar, at tajineaw a pan müetiw nóiquian para leam omeajtsüw wüx neol tandeow Teat Cristo.

*Leaw tarangüw ajcüw ombas monyar mipoch Teat Cristo*

<sup>43</sup> Meáwan nipilan xeyay mbyatoj, cos minipilan Teat Jesús tarangüw xeyay ateócan, xeyay cuajantanej leaw ngome aag ajaraw.

<sup>44</sup> Meáwan leaw tayariw andead Teat Jesús tajlüyiw nóiquian. At meáwan leaw almajüürüw tanchichaw nóiquian.

<sup>45</sup> Wüx anüjpiw iüt, iüm, tengwüy cuajantanej leaw ajüürüw, ajineaw ombeat müjchiw anopnop leaw netam nejiw.

<sup>46</sup> Nejiw ngo macueatiw ambüw canchiümoj tiül nadam nangaj iüm. At tanaám canchiüjow nóiquian müetiw pan aniüngüw nejiw. Ajlüyay apac omeajtsüw, xeyay ajnej omeajtsüw.

<sup>47</sup> Nejiw palúyan tandeacüw najneaj wüx Teat Dios, at meáwan nipilan ajneaj majaw nejiw. Meáwan nüt Teat Dios teamayac wüx majlüy xeyay monyar andeac nej.

### 3

#### *Tajneaj nop coex*

<sup>1</sup> Noic nüt teat Pedro maquiiüb teat Juan tambüw nóiquian andüyiw tiül nadam nangaj iüm, andüy wüx nchejlíow nüt, ores atajcüh orar.

<sup>2</sup> Alquiaj nop naxey necoex nde wijquiaw. Meáwan nüt aquiüraab mamb machetecharan mbeay nadam nangaj iüm metüney, matün ocueaj jane apmajmel tiül a nadam nangaj iüm. Aaga ombeay nangaj iüm quiaj nasoic Natsajüy Ombas.

<sup>3</sup> Aaga necoex quiaj, wüx tajaw a Pedro y Juan laambüw apmajmeliw tiül nadam nangaj iüm, quiaj tatün nej ocueajiw.

<sup>4</sup> Quiaj lembetøj majawüw nej. Condom tasaj nej a Pedro:

—Ijaw xicon —aj.

<sup>5</sup> Quiaj tajaw nejiw apac omeaats, teamacül cuane apmüjchiw.

<sup>6</sup> Quiaj a Pedro tasaj nej:

—Ngo najiür plata, ngo najiür oro; pero naleaing leawa sajür sanüüch ic: wüx minüt Teat Jesucristo naw Nazaret, sasaj ic witiür ijüy —aj nej.

<sup>7</sup> Quiaj teat Pedro tasap miác owix nej mawitich. Andüüban tajneaj oleaj nej, at nic oleaj nej.

<sup>8</sup> Condom ajchic cawüx witiow lombom, quiaj tajüy. Ndoj tajmel tiül nadam nangaj iüm maquiiüb nejiw, teajüy, teajchic, teamapiüng najneajay lamarang Teat Dios.

<sup>9</sup> Meáwan nipilan tajawüw nej lajüy, at teamapiüng najneajay lamarang Teat Dios.

<sup>10</sup> Tajawüw nejay aaga naxey quiaj lambójan chetej metüney mbeay nadam nangaj iüm nasoic Natsajüy Ombas, áag mbayatoj xeyay wüx tajawüw lajneaj.

*Pedro tandeac tiül minden iüm nasoic ocueaj Salomón*

<sup>11</sup> Aaga naxey lajneaj micoex quiaj, ngo matsambiich a Pedro y Juan. Condom meáwan nipilan mbayatoj, tambüw acuiürüw majawüw nejiw tiül minden iüm nasoic ocueaj Salomón.

<sup>12</sup> Pedro wüx tajaw ajcüwa nipilan quiaj, tapiüng:

—Teat cambaj Israel, ¿Neol mbayateron wüx aag ayaja? ¿Neol tejawjawan xicona? Atnej ajüic ipiüangan xicona süjchiün majneaj aaga naxey quiaj, atnej xicona süjchiün majüy nde ajneaj ximeajtsan.

<sup>13</sup> Ngwüy, xicona ngondom narangan aag ayaj. Teat Dios nerang aag ayaj, Midios miteatiüts Abraham, Midios teat Isaac, Midios teat Jacob, at Midiosüw mixejchiüts

monlüy tanomb. Nejay aaga Teat Dios quiaj tataag majneaj aaga naxey cam, para alndom mayarich andeac Teat Jesús, aaga Micual Nej. Aag ayaj icona teyacan teowix monajiüt mandeow. Wüx tandiüm a Pilato matsambiich, icona ngome tendiüman, tepiüangan ich mandeow.

<sup>14</sup> Icona ingow itüniün tsajmbiüm aaga nangaj nerang najneaj quiaj, tetüniün maw wüx aaga nerang ngo majneaj nembiy nipi-lan.

<sup>15</sup> Atquiaj terangan, tembiyan aaga tengual mepacüüch meáwan leaw almajlüy. Pero naleaing Teat Dios tapacüüch nej alinomb. Aag ayaj xicona tajawasan naleaing.

<sup>16</sup> Nganüy aaga naxey cam leaw ijawan, Teat Dios tataag nej majneaj, cos sayacan ximeajtsan wüx Teat Jesús, ngo nachíwean ximeajtsan. Áag nganüy ijawan nej lajneaj nómban.

<sup>17</sup> Teat monxey, xique sawaw naleaing icona wüx tembiyan Teat Jesús mequiüjpan minatangan monajiüt, terangan aag ayaj cos ngo mejawan nicuajind; ipiüangan najneaj temerangan.

<sup>18</sup> Quiaj tajlüy atnej tanomb lamapiüng Teat Dios. Cos meáwan mondeac andeac nej tapiüngüw aaga Cristo, Micual Teat Dios, apmamongoch xeyay ngo majneaj.

<sup>19</sup> Nganüy ich leaam imeajtsan naleaing xeyay ngo majneaj temerangan. Indililean iyamban Teat Dios cos nej alndom mawün isoetiün. Quiaj Teat Dios apmüüch icon mapac imeajtsan,

<sup>20</sup> wüx apmüüch miün Teat Jesucristo, aaga lamapiüng apmüüch miün mambeol icon.

<sup>21</sup> Nganüy naleaing nej netam macül tiül cielo, leaw atüch a nüt wüx Teat Dios apmataag majneaj meáwan ngo majneaj, atnej lamapiüngüw mondeac andeac nej najlüyiw tanomb.

<sup>22</sup> Teat Moisés aton tasaj mixejchiüts, tapiüng: “Teat Dios apmayac nop nendeac andeac nej imiün tiül icona, atnej tayac xic. Netam menguiayüün meáwan leaw apmasaj icon.

<sup>23</sup> Cos meáwan nipilan leaw ngo mayar andeac aaga nendeac andeac Teat Dios quiaj, apmajwan nómban, ngondom macül tiül micambaj nej.”

<sup>24</sup> Meáwan mondeac andeac Teat Dios leaw tajlüyiw tanomb ajan wüx Samuel tapiüngüw wüx aaga leaw almajlüy nganüy cam.

<sup>25</sup> Icona micual icon Israel, atnej tajlüyiw mondeac andeac Teat Dios. At ijlüyüün tiül aaga poch Teat Dios tüüch mixejchiüts, cos tasaj Abraham: “Meáwan nipilan wüx iüt apmaxomüw monajneaj wüx ombas micual leaw aliüc miün apmajlüy.”

<sup>26</sup> Teat Dios wüx tapacüüch alinomb Micual Nej, mbas tüüch miün mambeol icon, müüch icon mejiüran monajneaj; aton müüch icon inopnophon mecueatiün irangan ngo majneaj —aj nejw a Pedro.

#### 4

*Teat Pedro y teat Juan tajlüyiw teombasüw monajiüt*

<sup>1</sup> Pedro y Juan tengualeámban mandeacüw aag ayaj masajüw nipilan, quiaj ajngotoj miteaats aqüiüjpüw minatang monjiür nadam nangaj iüm, aton aqüiüjpüw saduceos.

<sup>2</sup> Quiaj tajcüyiw xeyay, cos Pedro y Juan tengual maquiajchiw nipilan, teomasajüw mondeow apmacüw alinomb cos Teat Jesús tapac alinomb.

<sup>3</sup> Quiaj tasaparanüw maquibaränüw mamb mayacaranüw tiül manchiüc cos langwiüts. Tawüniw amb alinoic nüt.

<sup>4</sup> Pero naleaing xeyay nipilan leaw tanguiayiw andeacüw Pedro y Juan tayariw Mipoch Teat Dios. Ajcüw ayaj atüch maseyme acoquiaw mil monxey.

<sup>5</sup> Larrow tiüt amb alinoic nüt, quiaj sonongotoj tiül Jerusalén meáwan monajiüt ocueajiw judíos, aqüiüjpüw montangtang monajiüt tiül nejw, at mondüy wüx aaga poch tüünd Moisés.

<sup>6</sup> Aqüiüjpüw aton aaga minatang miteaats nenüt Anás, aqüiüjpüw Caifás, Juan, Alejandro, at meáwan acualajtsüw natangtang miteaats.

<sup>7</sup> Quiaj tapiüngüw majanüw a Pedro y Juan. Wüx lapeayiw, quiaj tamongochiw lembemoj pinawan. Ndoj cas tatüniw manguiayiw, tasajüw:

—¿Nguiane meyariün minajiütan merangan aag ayaja? ¿Ngwüy jane nesaj icon merangana? —ajüw.

<sup>8</sup> Teat Pedro, ambeol nej Nangaj Espiritu ocueaj Teat Dios, quiaj tasaj nejw:

—Teat Xan monajiüt, montangtang monajiüt tiül Israel:

<sup>9</sup> Icona lametüniün menguiayüün xicon wüx aaga najneaj larangüch wüx ombas nop naxey lajneaj micoex, nguineay tajneaj. Najneaj, sanapiüangan.

<sup>10</sup> Nganüy meáwan icona inguiayüün, ich manguiay aton meáwan cambaj Israel. Aaga naxey alningüy timbasan cam, tajneaj wüx minüt Teat Jesús naw Nazaret, áag icona teyacan wüx cruz, ndoj Teat Dios tapacüüch alinomb.

<sup>11</sup> Aaga Teat Jesús quiaj, nejay aaga piedra icona monrang iüm teloxiün ninguiün, nganüy lafün marang xeyay netam piedra tiül oxing iüm.

<sup>12</sup> Nejingüind alinop ngondom mawün asoeteran; cos Teat Dios ngo mayac alinop

ningüy wüx aaga iüt cam leaw alndom mawün asoetiüts, áagan Teat Jesús alndom —aj nejw.

<sup>13</sup> Monajiüt wüx tajawüw a Pedro y Juan nómban ngo mimboloj wüx andeacüw, at tajawüw nejw ngome nequiaachayej, ajlüyiw at nejw jangantanej, quiaj mbayatoj. At tajawüw ajcüw ayaj taqüiüjpüw Teat Jesús.

<sup>14</sup> Cos aaga naxey lajneaj micoex nej alembem niüng ajlüyiw nejw, quiaj lango majiürüw cuane mapiüngüw.

<sup>15</sup> Quiaj tasoiquiw a Pedro y Juan mawüw tiül moncanchiün para alndom mandeacüw wüx nguineay apmarangüw.

<sup>16</sup> Quiaj tapiüngüw:

—¿Cuane apmarangaats wüx ombasüw ajcüwa monxey quiaja? Cos naleaing nadam atéocan lamarangüw, aag ayaj lajüic, lamanguiyiw meáwan nipilan moncül tiül Jerusalén. Icootsa ngondom mapiüngaats ngo maleaing.

<sup>17</sup> Nganüy, ngana majüy aag ayaj manguiay cambajiüt, netam maliquiajtsüw mambolochiüts, masajaats nde mandüyiw wüx alinomb mandeacüw wüx minüt aaga Jesús quiaj —awüw.

<sup>18</sup> Ndoj, quiaj tapajüw a Pedro y Juan maliquiaw, tasajüw nómban ngondom mandeacüw, aton ngondom maquiajchiw nipilan wüx Teat Jesús.

<sup>19</sup> Quiaj tapiüngüw a Pedro y Juan:

—Nganüy ipiüangan teat, ¿quia najneaj majaw Teat Dios nayariün indeacana, ngwüy nayariün andeac nejw?

<sup>20</sup> Naleaing xicona ngondom nacueatiün andeacan leaw lanajawan, leawa lananguiyiün —awüw.

<sup>21</sup> Quiaj tandüyiw wüx maliquiaw alinomb, tasajüw apmangochiw xeyay ngo majneaj sitiül mandilileaw marangüw alinomb. Ndoj tatsambijchaw, cos ngo maxomüw nguineay müjchiw mamongochiw ngo majneaj. At imboloj mandüyiw nipilan, cos meáwan nipilan tapiüngüw Teat Dios netaag majneaj aaga necoex quiaj.

<sup>22</sup> Pues aaga naxey lajneaj micoex quiaj, lamong ic miow (40) mineat nej.

*Tatüniw ocueaj Teat Dios mambeol nejw nde mimboloj*

<sup>23</sup> Pedro y Juan, wüx landoj tsajmbiüjow, quiaj tambüw majawüw aqüiüjpüw nejw. Tapiüngüw meáwan leaw tasajüw nejw montangtang miteaats at montangtang monajiüt tiül nangaj iüm.

<sup>24</sup> Wüx landoj manguiayiw aag ayaj, quiaj tatajcüw orar, tasajüw Teat Dios noic nej omeajtsüw, tapiüngüw:

—Xeteatiün Dios, ique terang cielo, terang iüt, terang ndec, at terang meáwan leaw almajlüy.

<sup>25</sup> Naleaing nde tanomb tapiüng a teat David, aag nerang minajiüt, cos timbeol nej marang wüx nawiig nguineay ipiüng. Nej tapiüng:

¿Neol tapots ajcüiyw meáwan nipilan tiül meáwan cambaja?

¿Neol tamb wüx omeajtsüw leaw nómban ngondom marangüwa?

<sup>26</sup> Meáwan monajiüt monaw tiül palpálwüx cambaj sonogotoj,

at montangtang tiül cambaj canchiüto nóiquian,

majcüiyw majawüw Teat Dios, aton majcüiyw majawüw Teat Cristo, aw.

<sup>27</sup> Cos naleaing canchiüto tiül aaga cambaj cam a Herodes maquiiüb a Poncio Pilato maquiiüpw nipilan judío, at pálwüx nipilan ngome judíos, majcüiyw majawüw nangaj micual, aaga Teat Jesús, leaw lameyac marang minajiüt.

<sup>28</sup> Atquiaj tarangüw para majlüy atnej lamepiüng nomb atquiaj apmajlüy.

<sup>29</sup> Nganüy Teat, ijaw nguineay tandeacüw wüx ximbasan ajcüwa monajiüt. Aag satüniün meach xicon narangan minajiüt, nandeacan mipoch nde nimbolan.

<sup>30</sup> At tanaám Teat, iyac iwix wüx xicon, para alndom namongochiün iün andeow nipilan, narangan ateócan, at cuajantanej ngomeaag ajaraw, wüx nangaj minüt micual Teat Jesús, —awüw.

<sup>31</sup> Ndoj matüniw ocueaj Teat Dios, quiaj tajlang atnej noic ateam niüng canchiüjow. Quiaj tiün wüx ombasüw nejijw meáwan anopnopo aaga Nangaj Espiritu ocueaj Teat Dios; ndoj ngo mimboloj mandeacüw Mipoch Teat Dios.

#### *Tacanchichaw nóiquian meáwan ajüürüw*

<sup>32</sup> Meáwan nejijw leaw lamayariw mipoch Teat Cristo tajlüyiw noic nej omeajtsüw, noic nej ayajcüw. Atquiaj nejinguind ngo mapiüng aneáyan nej leaw ajüür, tajlüy ocueajijw nejijw meáwan.

<sup>33</sup> Miapóstoles Teat Jesús tanaám mandeacüw, ngo memboloj masajüw wüx nipilan nguineay tapac alinomb Teat Jesús, cos Teat Dios xeyay ambeol nejijw.

<sup>34</sup> Atquiaj ngo majlüy tiül nejijw nejinguind leaw ngo majüür leaw netam. Cos meáwan leaw ajüür iüt tengwüy iüm, wüx ndoj manüüb lamajoy ombeat

<sup>35</sup> mayacüw teowixaw miapóstoles Teat Jesús. Condom nejijw lamajineaw müjchijw anopnop leaw netam nej.

<sup>36</sup> Tajlüy nop tiül nejijw nenüt José, leaw ajcüw apóstoles tujchijw manüt Bernabé. Aaga poch quiaj amb apiüng micual neech mapac omeaatsaran. Nej levita nej naw Chipre.

<sup>37</sup> Tajiür noic miüt nej, tanüüb. Condom tajoy ombeat tayac teowixaw miapóstoles Teat Jesús.

## 5

### *Tajiürüw nisoet Ananías maquiiüb Safira*

<sup>1</sup> At aton nop naxey nenüt Ananías y mintaj nej nenüt Safira, nej tanüüb noic miüt nej.

<sup>2</sup> Aaga naxey quiaj ngo mambich majoy ombeat iüt anüüb, tawün quiriw, taxot aweaag mintaj nej. Condom tajoy alquiriw mayac teowixaw apóstoles. Tawaiich, tapiüng ágan ayaj ombeat.

<sup>3</sup> Quiaj tasaj nej teat Pedro:

—Ananías ¿neol nguineay nimeech tayac tiül imeaats mewaiich Nangaj Espiritu, mexot ombeat miüta?

<sup>4</sup> ¿Neol jondot majlüy ngo menüüba, neol ngome ineaye? Aton wüx lamenüüb, ¿neol ngome ineay a tomiün ombeate? ¿Neol tendiüm merang aaga ngo majneaj quiaja? Aag ayaj Teat Dios iwaiich, ngome nipilan —aj nej.

<sup>5</sup> Ananías wüxan tanguiy aaga poch quiaj, quiaj ajmiüc andeow wüx. Condom meáwan leawa tanguiyiw aag ayaj mbayatoj.

<sup>6</sup> Quiaj tawüw acas monguich monxey, tambüw mawinchaw ombas, taxainguiw, taquiiüpw mamiütüw.

<sup>7</sup> Lamajoy maseyme arej ores tatow ndoj aag ayaj, quiaj tapeay quiaj mintaj nej. Nej ngo majaw cuane landoj ajlüy.

<sup>8</sup> Quiaj tasaj nej a Pedro:

—Isaj xic ¿naleaingue, atogüy tenüjpiün miütana? —aj nej.

Nej tapiüng:

—Naleaing atoyaj —aw.

<sup>9</sup> Pedro tasaj nej:

—¿Neol tendecan nóiquian mewaijchan Nangaj Espiritu? Nganüy, joyaj lapeayiw teombeay iüm monmiüt minoj. At a ique aton apmaxainguiw ic —aj nej.

<sup>10</sup> Quiaj ajmiüc aaga najtaj quiaj niüng ajlüy a Pedro, andeow wüx. Wüx tajngotoj ajcüw monguich monxey majawüw landeow nüügan, quiaj taxainguiw aton, taquiiüpw mamiütüw niüng ajlüy minoj nej.

<sup>11</sup> Condom xeyay mbayatoj meáwan monyar andeac Teat Cristo, at meáwan leaw tanguiyiw aag ayaj.

### *Xeyay cuajantanej ateócan tajlüy*

<sup>12</sup> Ajcüw apóstoles tarangüw xeyay ateócan tiül nipilan, at cuajantanej ngome aag ajaraw. Cos noic nej omeajtsüw, canchiütoj nóiquian tiül minden nadam nangaj iüm, niüng nasoic ocueaj Salomón.

<sup>13</sup> Meáwan nipilan apac omeajtsüw majawüw nejijw, pero altiül imboloj, ngo

mandiümwüw mambüw maquiüjpüw wüx canchiüjow.

<sup>14</sup> Xeyay nipilan, monxey at montaj, tayaran wüx Teat Cristo.

<sup>15</sup> Altiül nipilan tawüniw moniün andeow mayacüw tiül calle; altiül napeaaheran wüx mats, altiül wüxan tec, cos atquiaj wüx apmamong a Pedro, masey mindiw nej mamong wüx ombasüw apmajneajiw.

<sup>16</sup> At xeyay nipilan monaw tiültkü cambaj najlúyan quiaj, tambüw Jerusalén maquiüjpüw mamb moniün andeow, at leaw alwüx ombasüw nimeech, lamüüch nej michachiw. Meáwan tümb majneajiw.

*Tayambüch ombasüw a Pedro y Juan*

<sup>17</sup> Quiaj tajcüy aaga minatang miteaats maquiüüb meáwan minipilan nej. Ajcüw ayaj noic ajlüy nipilan nasoić saduceos. Nejiw xeyay ngo majneaj majawüw aag ayaj.

<sup>18</sup> Tasapüw ajcüw apóstoles mayacüw tiül manchiüć.

<sup>19</sup> Naleaing aaga ongwiiüts quiaj, nop ángel ocueaj Teat Dios taleaaig ombeay manchiüć, tawün nejiw. Condom tasaj nejiw:

<sup>20</sup> —Quiüran indüyiün tiül nadam nangaj iüm, isajan meáwan nipilan wüx aaga najneajay poch neech mapacaran —aj nejiw.

<sup>21</sup> Nejiw wüx landoj manguiayiw aag ayaj, úmban arraw tajmeliw tiül nadam nangaj iüm maquiajchiw nipilan.

Tiülan aaga ores quiaj minatang miteaats canchiütoj maquiüüb minipilan nej. Condom tapajüw meáwan montangtang ombas tiül cambaj Israel mandeacüw. Ndoj cas tüjchiw mamb majanaranüw miün ajcüwa apóstoles imiün tiül manchiüć.

<sup>22</sup> Naleaing wüx monjiür nangaj iüm tapeayiw mbeay manchiüć maleajquiw, tajawüw ngo majlüyiw tiül manchiüć. Quiaj tandilileaw mapiüngüw.

<sup>23</sup> Wüx tajngotoj tapiüngüw:

—Naleaing wüx tapeayasan quiaj, manchiüć tan palaw nandand; at ajcüwa monjiür aliün lombomoj quiaj mbeay manchiüć. Pero wüx taleaaigasan, quiaj tajawasan nejinguind ngo majlüy tiül —awüw.

<sup>24</sup> Wüx tanguiy aag ayaj aaga minatang miteaats, at a minatang ocueajiw monjiür nadam nangaj iüm, at alacas montangtang miteaats, quiaj titsoj nej omalüw, ngo majawüw nguineay apndom aaga tengual ajlüy quiaj.

<sup>25</sup> Quiaj tajngot nop naxey masaj nejiw:

—Joyajiw, aliw ninguiay tiül nadam nangaj iüm ajcüwa monxey teyacan tiül manchiüć, tengual aquiajchiw nipilan —aj nejiw.

<sup>26</sup> Quiaj tamb a minatang monjiür nadam nangaj iüm, aqiiüüb minipilan nej majanüw

miün. Ngo majcüyiw nicuajind, taquiüjpüw miün najneajan, cos imboloj mandüyiw nipilan, ngana maloxiw nejiw.

<sup>27</sup> Wüx tapeayiw quiaj maquiüjpüw, quiaj tamelichaw tiül moncanchiün. Condom aaga minatang miteaats tatün manguiy nejiw, tapiüng:

<sup>28</sup> —Xicona lanasajan icon ngondom mequiajchüw nipilan wüx aaga Jesús quiaj. ¿Neol ngo mecueatiüna? Nganüy laümb meajchüw manguiy meáwan nipilan tiül Jerusalén wüx aaga indeacan quiaj. Nganüy indiüman meyacan sasoetiün mepiügan xicona nembiyasan aaga naxey quiaj —aj nejiw.

<sup>29</sup> Quiaj tendeac a Pedro maquiüüb alacas apóstoles, tapiüngüw:

—Xicona netam narangan leaw asaj xicon Teat Dios, ngome leaw asaj xicon nipilan.

<sup>30</sup> Aaga Teat Dios quiaj Midiosüw mixejchiüts, nej nepacüüch alinomb a Teat Jesús, leaw icona teyacan wüx cruz, tembiyan.

<sup>31</sup> Nganüy Teat Dios lamayac nej marang natang, mawün wüx asoet nipilan. Atquiaj tarang Teat Dios müüch leaam omeajtsüw nipilan israel wüx meáwan ngo majneaj teamarangüw, macueatiw, para marangüw leaw najneaj. Atquiaj nej apmawün wüx omeaats asoetiw nejiw.

<sup>32</sup> Meáwan aag ayaj xicona tajawasan. At a Nangaj Espiritu leaw Teat Dios lamüüch ajcüw monyar andeac nej üüch nejiw majawüw aag ayaj naleaing —awüw.

<sup>33</sup> Wüx tanguiyiw aag ayaj ajcüwa nipilan tiül moncanchiün, quiaj tajcüyiw, tandiümwüw mambiyaw nejiw nómban.

<sup>34</sup> Altiül nejiw nop fariseo nenüt Gamaliel. Nej nop nequiaach wüx aaga poch tüünd Moisés. Meáwan nipilan arariw nej andeac. Aaga naxey quiaj witiüt, tasaj nejiw mawüniw quiaj noic ores ajcüw apóstoles.

<sup>35</sup> Condom tapiüng:

—Teat cambaj Israel, ijawan majneaj leaw apmerangan wüx ombasüw ajcüwa monxey quiaj.

<sup>36</sup> Cos atquiaj nomb tajlüy nop naxey nenüt Teúdas. Nej apiüng nop nej xeyay atam ajlüy. Aaga naxey quiaj tandüjpiw nej xeyay nipilan; atüch maseyme piquiw acoic miow (400) nipilan. Ndoj, wüx tandeow, meáwan leawa tandüjpiw nej tümb ndajriümoj, ngo majlüy nicuajind.

<sup>37</sup> Ndoj aag ayaj tajlüy alinop naxey nenüt Judas naw Galilea. At tandüjpiw nej xeyay cambaj wüx nüť ajmel mineataran. Aaga naxey quiaj tandeow aton. Condom meáwan leaw tandüjpiw nej tümb ndajriümoj.

<sup>38</sup> Nganüy sasaj icon, icueatiün ajcüwa teat monxey quiaj, ijchan mambüw. Cos sitiül



aaga aquiajchiw quiaj, aaga najiüt arangüw quiaj, ocueájan nipilan apndrom ombas.

<sup>39</sup> Nganüy sitiül aaga arangüw quiaj ocueaj Teat Dios, icona ngondom mendarrijchan. Netam mejawan, jondot Teat Dios tengual ijcüyiün mequiüjpan —aw.

<sup>40</sup> Quiaj tayariw andeac nej. Ndoj tapajüw alinomb ajcüwa apóstoles, tapots mawüjchiw. Condom tasajüw macueatiw nómban andeacüw wüx Teat Jesús. Ndoj cas tatsambijchaw.

<sup>41</sup> Ajcüwa apóstoles wüx tawüw tiül moncanchiün, tapac omeajtsüw xeyay, cos Teat Dios lamüüch nejij mamongochiw aaga monxing quiaj teowix monajiüt, cos lamayariw andeac Teat Jesús.

<sup>42</sup> Nejij ngo macueatiw maquiajchiw nipilan, mandeacüw wüx leaw tarang Teat Jesucristo. Atquiaj tarangüw meáwan nü, átan tiül nadam nangaj iüm, átan tiül aniüng nipilan.

## 6

*Tarriüjtüch ayaíw monxey marangüw diáconos*

<sup>1</sup> Tiül aaga nü quiaj, teaxeyayiw monyar andeac Teat Cristo. Noic nü ajcüwa judíos tiül nejij leaw mondeac griego ngo majnejaj majawüw ajcüwa judíos mondeac hebreo. Cos leawa mondeac griego apiüngüw ajcüwa monlemben omal montaj tiül nejij ngo müjndiw palan wüx ajineran cuajantanej meáwan nü.

<sup>2</sup> Quiaj ajcüwa gajpiüp (12) apóstoles tapajüw canchiümoj meáwan monyar andeac Teat Cristo. Tasajüw:

—Ngo majnejaj sitiül xicona nacueatiün saquiajchiün Mipoch Teat Dios najinean nüeteran.

<sup>3</sup> Pares nganüy xecojow xechijquiw, iriüjtan tiül icona ayaíw monxey leaw ijawan arangüw najnejaj, jane xeyay ambeol nejij Nangaj Espíritu, at jane xowüy axomüw omeajtsüw wüx cuajantanej. Ajcüw ayaj apmtüjchiüts marangüw aaga najiüt quiaj.

<sup>4</sup> Nganüy a xicona tanaám saquiajchiün Mipoch Teat Dios, at satajcan orar tanaám —ajüw.

<sup>5</sup> Meáwan monyar andeac Teat Cristo tandiümüw marangüw leaw apiüngüw apóstoles. Quiaj tayacüw a Esteban. Aaga naxey quiaj, xeyay ayac omeaats wüx Teat Dios, aton xeyay ambeol nej Nangaj Espíritu ocueaj Teat Dios. Tayacüw alacas, nop Felipe, nop Prócoro, nop Nicanor, nop Timón, nop Parmenas, alinop Nicolás naw Antioquia. Aaga Nicolás quiaj ngome judío nej, pero lamandüüb Teat Dios, Midios Israel.

<sup>6</sup> Ajcüwa nipilan quiaj taquiübaranüw niüng ajlüyiw apóstoles. Ndoj, wüx ajcüw

apóstoles tattüniw ocueaj Teat Dios mambeol nejij, tayacüw owixaw wüx omaliw nejij anopnopo.

<sup>7</sup> Atquiaj tajüy Mipoch Teat Dios, nguijantanej tanguaiyaran. Quiaj texeyay monyar andeac Teat Cristo tiül Jerusalén, at xeyay miteaats ocueaj israel tandüjpiw Teat Cristo aton.

*Ndeaad teat Esteban*

<sup>8</sup> Aaga Esteban quiaj, xeyay tambeol nej Teat Dios. Áag ndot ombas marang cuajantanej atéocan tiül cambaj leaw ngome aag ajaraw.

<sup>9</sup> Quiaj acas monxey monaw tiül a sinagoga nenüt Esclavos Libertados, ajcüw ayaj altiül monaw Cirene, monaw Alejandria, monaw tiül Cilicia, at monaw tiül Asia. Ajcüw ayaj witiütoj majcüyiw wüx leaw taquiaach Esteban. Tambüw tapots asajajey maquiüjpw.

<sup>10</sup> Naleaing ngondom mangochiw andeac, cos Esteban xeyay axom omeaats, tandeac atnej netam, cos ambeol nej Nangaj Espíritu.

<sup>11</sup> Condom ajcüwa monxey quiaj, tayambüw acas nipilan, tangüyiw para mawajchaw mapiüngüw nejij tanguaiyiw nguineay andeac aaga Esteban, cos andeac xeyay ngo majnejaj wüx ombas Moisés at wüx ombas Teat Dios aton.

<sup>12</sup> Ajcüwa monxey quiaj, tambüw tapots masajüw meáwan nipilan, at montangtang monajiüt tiül cambaj, at ajcüwa mondüy wüx aaga poch tüünd Moisés, müüch majcüyiw majawüw Esteban. Condom, quiaj tambüw masapüw a Esteban, tanotoj mamb taquiüjpw andüy teombasüw monajiüt ocueajiw Israel.

<sup>13</sup> Condom tayambüw acas monxey mawajchaw. Ajcüw ayaj tapiüngüw:

—Aaga naxey quiaj ngo paxiüm ocueaj andeac ngo majnejaj wüx aaga nangaj iüm cam at wüx aaga poch tüünd Moisés.

<sup>14</sup> Xicona tanguaiyaran andeac, apiüng aaga Jesús naw Nazaret apmandrooch ombas aaga nadam nangaj iüm cam, at apmambiüülüüch meáwan leaw arangaats, leawa tüüch icoots teat Moisés —awüw.

<sup>15</sup> Quiaj meáwan monajiüt ajlüyiw tiül moncanchiün taxainguiw omaliw majawüw teombas teat Esteban. Quiaj tajawüw atnej teombas nop ángel.

## 7

*Teat Esteban tandeac tiül monajiüt*

<sup>1</sup> Condom aaga minatang miteaats tasaj a Esteban:

—¿Naleingue meáwan leaw apiüngüw quiaja? —aj.

<sup>2</sup> Quiaj tapiüng a Esteban:

—Teat cambaj micual iüt Israel, inguaiyün sanasaj icon. Naleaing aaga Teat Dios xeyay najneajay ajlüy, tejüquichay majaw nej mixejchiiüts Abraham. Aag ayaj wüx Abraham aliün tiül iüt Mesopotamia, nganaw mamb macül tiül Harán.

<sup>3</sup> Teat Dios quiaj tasaj nej: “Iriow tiül miüt, icueat icualaats, quiür indüy tiül aaga iüt niüng sanüüch ic mejaw”, aj nej.

<sup>4</sup> Quiaj Abraham taw tiül aaga iüt niüng acüliw nipilan Caldeos, tiün macül tiül Harán. Naw quiaj, wüx tandeow miteat nej, tawün nej quiaj Teat Dios; tayac nej tiül aaga iüt cam niüng acüliüts nganüy.

<sup>5</sup> Naleaing Teat Dios ngo müüch nej noic iüt maneay tiül aaga iüt cam, masey quiripite atonej niüng acuüch oleaj. Teat Dios tasaj nej apmüüch nej meáwan aaga iüt cam maneayiw micual nej alinoic nüt wüx nej landeow. Aag ayaj tasoic wüx nganaw majür micual nej.

<sup>6</sup> Aton Teat Dios tasaj nej: “Micual apmarangüw napeay miün nipilan tiül miüt pálwüx nipilan, ngome miütüw nejiw, apmarangüw najon monrang najiüt ocueaj pálwüx nipilan, apmüjndiw mamongochiw xeyay ngo majneaj apiquiw acoc miow (400) neat.

<sup>7</sup> Ndoj xique sanüjchiw mamongochiw xeyay ngo majneaj ajcüwa nipilan niüng apmarangüw najon monrang najiüt. Wüx landoj aag ayaj, nejiw apmawüw quiaj, aliücüw mayambüw xic tiül aaga iüt cam”, aj nej.

<sup>8</sup> Teat Dios tayac noic poch müüch a Abraham nguineay apmarang aweaag. Tasaj mataag circuncidar micual nej majüic naleaing teamandüüb aaga poch leawa layacaranüw wüx marangüw. Atquiaj wüx wijquiat Isaac micualüw nejiw, tataag circuncidar wüx tajiür ojpeacüw nüt tatow wijquiw. Condom Isaac aton atquiaj tarang wüx Jacob micual nej, at a Jacob atnej tarang wüx ajcüwa gajpiüp (12) micual nej. Ajcüw ayaj mixejchiiüts tanomb.

<sup>9</sup> 'Ajcüwa mixejchiiüts quiaj, tanüjpiw José michijquiw nejiw, cos ngo majneaj majawüw. Condom mongalüy taquiüjpw manüjpiw tiül Egipto. Pero naleaing Teat Dios ngo macueat a José.

<sup>10</sup> Meáwan ngo majneaj leaw tamongoch José, Teat Dios tawün nej tiül. At tüüch nej mendüy xeyay, majneaj majaw nej a Faraón minatang nenajiüt tiül Egipto. Condom aaga Faraón tayac nej majiür najiüt majlüy wüx meáwan cambaj tiül Egipto, at tiül aniüng a Faraón aton tarang natang.

<sup>11</sup> 'Condom tajlüy nadam montiün andüy tiül meáwan cambaj tiül Egipto. At tiül meáwan cambaj tiül iüt Canaán ngo majlüy nüeteran. Quiaj mixejchiiüts aton ngo maxomüw nüeteran.

<sup>12</sup> Wüx Jacob tanguiy aliün majlüy trigo tiül Egipto, quiaj tüüch mambüw micual nej tiül Egipto. Ajcüw ayaj mixejchiiüts tajlüyiw nomb. Quiaj tambüw nomb oleajiw.

<sup>13</sup> Wüx tambüw amb iwic oleajiw, quiaj José tüüch majawüw micoc nej jane nej. At a Faraón aton quiaj tanguiy nguia naw, ngün minipilan a José.

<sup>14</sup> Condom José tatün mapeay miteat nej Jacob, maquiüüb miün meáwan micual nej macülüw tiül Egipto. Ajcüw ayaj ajlüyiw er miow gajpocoic (75) nipilan.

<sup>15</sup> Naw quiaj tamb a Jacob macül tiül Egipto. Tiül aaga iüt quiaj tandeow. At ajcüwa gajpiüp mixejchiiüts tandeowüw quiaj aton.

<sup>16</sup> Condom ajcüw ayaj, tajoyaran miolajtsüw nejiw mamiüraad tiül cambaj Siquem. Tamiürajtüw tiül aaga oxiüt tangal Abraham tanomb, angal ocueajiw micual Hamor tiül Siquem.

<sup>17</sup> 'Wüx laliüc matüch aaga nüt lamapiüng Teat Dios wüx tasaj Abraham nguineay apmambeol nejiw, quiaj micual Jacob laxeyayiw tiül Egipto.

<sup>18</sup> Tiül aaga nüt quiaj, tajmel alinop minatang nenajiüt tiül Egipto, leaw ngo majaw jane nej a José.

<sup>19</sup> Aaga nenajiüt quiaj, xeyay ngo majneaj arang, tawaiich ajcüwa nipilan acualajtsaats tanomb. Tüüch nejiw mamongochiw xeyay ngo majneaj. Tapiüng netam maloxiw ningiün micualüw nejiw ajcüw namix nine monenich jayats wijquiam, mandeowüw, cos ngo mandium majaw mexeyayiw.

<sup>20</sup> Tiül aaga nüt quiaj, wijquiat a Moisés. Teat Dios tandiüm nej, tatangüjchiw nej miteat nej mimüm nej arej caaw.

<sup>21</sup> Wüx langondom maxotüw nej, netam macueatiw; quiaj taxom nej nop nüx micual a Faraón, taxaing maquiüüb. Condom tatangüüch atnej majiür micual nej.

<sup>22</sup> Atquiaj Moisés wüx latang taquiajchich wüx meáwan leaw ajawüw mondüy tiül Egipto, aag tayarich meáwan leaw tandeac at leaw tarang.

<sup>23</sup> 'Wüx lamajiür ic miow (40) mineat nej, quiaj tateots mamb majaw micual miüt nej, ajcüw micual Israel, quiaj tamb.

<sup>24</sup> Naleaing wüx tajaw nguineay nop tiül micual Israel, teamambiy nej nop naw Egipto, quiaj tamb mawün. Condom Moisés tambiy aaga naxey naw Egipto mapalüch ombas.

<sup>25</sup> Cos nej apiüng tiül omeaats nej micual Israel apmajawüw Teat Dios apmambeol nej mawün nejiw quiaj. Naleaing nejiw ngo mapiüngüw atquiaj.

<sup>26</sup> Wüx rat tiüt amb alinoic nüt tamb quiaj alinomb a Moisés. Quiaj tajaw tea-cüyiw ijpw micual Israel. Quiaj tasaj ne-

jiw macueatiw, tapiüng: “Teat, icona ner-cualaatsayon; ¿neol tapots ermbiyayona?” aj nejiw.

<sup>27</sup> Quiaj aaga naxey tenguiäl ambiy quiaj, tatech nej ningüün, tasaj: “¿Jow a ique cuane minajiüta, jan neyac ic merang xenatangana, mejaw wüx sasoetiüna?”

<sup>28</sup> ¿Ngwüy, indüüm membiy xic aton, atnej tembiy tim aaga naxey naw Egipto?” aj nej.

<sup>29</sup> Moisés wüx tanguiay aag ayaj, quiaj tawün oleaj, tamb macül tiül iüt Madián. Condom quiaj tajiürüw micualüw nejiw ijpw monench.

<sup>30</sup> Condom wüx lamajiür ic miow (40) neat tatow acül quiaj, noic nüt altiül wajchiüc niüng ajlüy nop tiüc nenüt Sinaí. Quiaj tajaw teandaab noic owil sats. Tajaw nop ángel tiül aaga biümb quiaj.

<sup>31</sup> Moisés mbayat wüx tajaw aag ayaj, tatüch quiaj alquiriw majaw majneaj. Quiaj tanguiay andeac Teat Dios, tasaj nej:

<sup>32</sup> “Xique Teat Dios xic, Midiosüw miteatiün, Midios Abraham, Midios Isaac, Midios Jacob”, aj nej. Moisés quiaj tambeapmbeap nej, timbol majaw.

<sup>33</sup> Quiaj tasaj nej Teat Dios: “Isoond a napüic altiül ileaj quiaj, cos aaga niüng alembemear quiaj nangaj.

<sup>34</sup> Xique sawaw nguineay amongochiw tiül Egipto xenipilan, lananguiay nguineay aiümw, ümb apacüw. Pares nganüy sajngot nawüniw quiaj. Nganüy mac, sanüüch ic meamb indüy Egipto”, aj nej.

<sup>35</sup> “Aaga Moisés quiaj, ngome tandiüram, tasoic: “¿Jan neyac ic merang xenatanganan mejaw wüx sasoetiüna?” ajow. Pero nganüy Teat Dios tayac nej marang natang tiül nejiw, mawün nejiw tiül Egipto. Aaga ángel tajaw tiül biümb wüx tandaab aaga sats, aag ayaj tembeol nej.

<sup>36</sup> Aaga Moisés quiaj tawün nejiw tiül Egipto wüx landoj marang xeyay cuajantanej atéocan leaw ngome aag ajaraw tiül aaga iüt quiaj. At tarang atéocan tiül a ndec nasoi Nacants Ndec, at wüx tacüliw tiül wajchiüc ic miow (40) neat.

<sup>37</sup> Nej aaga Moisés quiaj, tasaj micual Israel, tapiüng: “Alningüy alinoic nüt Midiosaats apmayac nop nendeac andeac nej tiül icona, atnej tayac xic. Aag ayaj apmaw tiül icona. Netam menguiayün leaw nej apmasaj icon”, aw.

<sup>38</sup> Nej aaga Moisés quiaj, tajlüy tiül nipilan wüx tacüliw tiül wajchiüc. Aton nej tandeac aweaag nop ángel wüx tajlüy wüx aaga tiüc Sinaí. Condom nej tandeac masaj ajcüwa miteatiüts leawa tasaj nej a ángel. Nej tüünd Mipoch Teat Dios, leaw alndom müüch mapacüw nipilan. Aag ayaj atüch icootsa aton.

<sup>39</sup> Naleaing nejiw mixejchiüts ngome tandiümw mayariw aag ayaj; tandiümw mandlileaw alinomb andüyiw Egipto.

<sup>40</sup> Áag tasajüw Aarón: “Xicona sandiüman merang nop midiosaats maquiüüb icoots. Cos aaga Moisés newün icoots tiül Egipto, nganüy ngo majawaats nguia tandüy”, ajüw.

<sup>41</sup> Quiaj tarangüw nop dios atnej nop nine wacüx. Condom tambiyaw nimal mayacüw teombas aaga narangüch dios quiaj, marang ichechiw nejiw. Tapac omeajtsüw majawüw aaga narangüch naag owixan quiaj.

<sup>42</sup> Quiaj tacueat nejiw Teat Dios marangüw leaw andiümw. Tayambüw ocas najlüy cawüx, atnej apiüng tiül Mipoch Teat Dios leaw tarangüw mondeac andeac nej, cos apiüng:

Inguiayün cambaj Israel: ¿jow wüx tejlüyüün tiül wajchiüc ic miow (40) neat,

mbich tembiyan nimal meyacan erchechiün meajchiün xique?

<sup>43</sup> Ingow aag ayaj, icona tejoyiün ombiüm midiosan Moloc nguiajantanej niüng teamban.

Aton tejoyiün aaga irangan atnej ocas, ipiüangan aag ayaj midiosan Renfán.

Ajcüw ayaj terangan, tequiejliün micosan teombasüw nejiw.

Ajcan irangan aag ayaj sanawün icon ningüy tiül miiütan, sanayac icon miünquiaj necamb a cambaj Babilonia.

<sup>44</sup> Mixejchiüts, wüx tajüyiw tiül wajchiüc tajiürüw nop nine nangaj iüm narangüch taag. Tiül aaga nine nangaj iüm quiaj tacül aaga piedra alwüx ajcüw gajpowüw poch tayac Teat Dios. Aaga nine nangaj iüm quiaj tarangüch atnej Teat Dios lamapiüng wüx tasaj a Moisés marang atnej lamüüch majaw.

<sup>45</sup> Aaga nine nangaj iüm taag quiaj tamong teowixaw ajcüwa mixejchiüts tajlüyiw tanomb. Wüx taquiüüb nejiw miün Josué, at a nine nangaj iüm taquiüppüw miün aton. Aag ayaj wüx tasapüw aaga iüt cam niüng tacüliw pálwüx nipilan. Teat Dios tandrooch ombas ajcüwa pálwüx nipilan quiaj, para macüliw ningüy mixejchiüts. Aaga nangaj iüm quiaj, aliün majlüy ningüy wüx tajlüy David.

<sup>46</sup> David xeyay tambeol nej Teat Dios, nej tandiüm marang nop jayats nangaj iüm nadam, macül tiül Teat Dios, aaga midios Jacob.

<sup>47</sup> Taton ngo marang, Salomón tarang aaga nadam nangaj iüm ocueaj Teat Dios.

<sup>48</sup> Pero naleaing Teat Dios najlüy tiül cielo, ngo macül tiül nangaj iüm narangüch naag owixan, atnej tapiüng wüx nawiiig nop nendeac andeac Teat Dios:

<sup>49</sup> Nangaj cielo aag ayaj niüng chetejos, aaga iüt niüng sacüüch xileaj.

¿Nguineay ajlüy a iüm apmerangan meajchiün xique?

¿Ngwüy nguiane alndom naxooda?

<sup>50</sup> ¿Neol, ngome xique nerangas meáwan leaw almajlüye naag xiwixe?, av.

<sup>51</sup> Nganüy icona xeyay adam imeajtsan, ngo meyacan wüx imeajtsan andeac Teat Dios, ngo meajchiün ilajcan menguiayüün. At icon nipilan ngo mayamb Teat Dios; ngome áag merangan atnej andiüm a Nangaj Espiritu ocueaj Teat Dios. Icona irangan leaw indiüman, atnej tarangüw mixejchiün.

<sup>52</sup> ¿Cas mondeac andeac Teat Dios ngo majcüyiw majawüw nejiw mixejchiüna? Nejiw tambiyaw mondeac andeac Teat Dios tajlüyiw fanomb, cos nejiw tandeacüw naleaing wüx aliüc nop nerang najneaj. Aaga nerang najneaj quiaj, icona teyacan teowixaw nipilan monrang ngo majneaj, mandeow; atquiaj tembiyan.

<sup>53</sup> Masey nangaj ángeles tüüch icon aaga Mipoch Teat Dios mejiüran, naleaing icona ngo meyacan wüx imeajtsan, aj nejiw a teat Esteban.

#### *Tambiyaw a Esteban*

<sup>54</sup> Nejiw wüx tanguaiyiw aag ayaj, quiaj tajcüyiw xeyay, ancaporros olüiquiw majawüw a Esteban.

<sup>55</sup> Naleaing Esteban, cos altiül nej Nangaj Espiritu ocueaj Teat Dios, wüx taxaing omal majaw cawüx tiül cielo, quiaj taxom majaw nguineay ajneaj ajlüy Teat Dios; aton tajaw a Teat Jesús alembem amb wüx miác Teat Dios.

<sup>56</sup> Quiaj tapiüng:

— ¡Joyaj lanaxom najaw tiül cielo! Saxom najaw a Teat Naxey alembem amb wüx miác Teat Dios —aw.

<sup>57</sup> Quiaj nipilan tepajüw napac, tapalüw olajcüw ngana manguiayiw. Quiaj tajmeliw masapüw a Esteban.

<sup>58</sup> Ndoj taquiüjpüw andüy mbeay cambaj, tapots maloxiw. Ajcüwa monlox quiaj, taso-jndiw micamixaw nejiw mayacüw niüng ajlüy nop naxey nenüt Saulo.

<sup>59</sup> Wüx tenguiäl maloxiw, Esteban tasaj Teat Dios, tapiüng:

— Teat Jesús, ingoch xic —aw.

<sup>60</sup> Condom taquieel micos nej tiüt, tendead napac, tapiüng:

— Teat Dios, nde meyac wüx ombasüw nejiw aaga nisoet teamarangüw cam —aw.

Landoj mapiüng aag ayaj, quiaj tandeow.

## 8

*Saulo tayamb ombas monyar andeac Teat Jesús*

<sup>1</sup> Aaga naxey nenüt Saulo quiaj, aton tajneaj majaw mandeow a Esteban.

Tiül aaga nüt quiaj, witiüt noic nadam moncüy wüx ombasüw monyar andeac Teat

Jesús monlüy tiül Jerusalén. Ndoj meáwan tumb mawüniw oleajiw, tambüw andüyiw tiül iüt Judea, at tiül iüt Samaria. Áagan ajcüw apóstoles ngo mawüw quiaj.

<sup>2</sup> Ndoj acas monxey monyamb Teat Dios taxainguiw a Esteban, taquiüjpüw mamiütüw, xeyay tajiüntsüw wüx ombas.

<sup>3</sup> Condom aaga naxey nenüt Saulo quiaj, tapots mayamb ombasüw monyar andeac Teat Jesús. Tajmel tiültiül nden masap mayac tiül manchiüc monxey at montaj.

#### *Tanderac wüx Teat Jesús tiül Samaria*

<sup>4</sup> Meáwan monwün oleaj tasajüw nipilan leaw niüng tambüw wüx aaga najneajay nanderac.

<sup>5</sup> Felipe aton tamb andüy tiül noic cambaj tiül Samaria, tapots masaj nipilan wüx Teat Cristo.

<sup>6</sup> Meáwan nipilan tujchiw olajcüw manguiayiw leaw apiüng Felipe, aton tajawüw xeyay ateočan leaw tarang.

<sup>7</sup> Xeyay nipilan leaw alwüx ombasüw nimeech, tajneajiw. Wüx tawüw aaga nimeech quiaj, tepajüw napac. At xeyay nipilan axom nejiw napat monandeow, altiül landeow owix landeow oleaj, altiül necoex, pero tumb majneajiw.

<sup>8</sup> Quiaj xeyay tapac omeajtsüw ajcüwa nipilan tiül aaga cambaj quiaj.

<sup>9</sup> Alquiaj nop naxey nenüt Simón. Nej aton arang quiripite ateočan tiül aaga cambaj quiaj. Naleaing nej axot onüügaran mawaiich nipilan tiül Samaria. Apiüng nej nop naxey xeyay netam ajlüy.

<sup>10</sup> Aaga naxey quiaj, anguiayiw andeac nej namix monguich at natangtang nipilan, apiüngüw:

— Aaga naxey quiaj, naleaing xeyay ambeol nej Teat Dios —awüw.

<sup>11</sup> Xeyay ayariw nej andeac, cos nej axot onüügaran arang quiripite ateočan. Lamawaiich nejiw xeyay nüt wüx aag ayaj.

<sup>12</sup> Nganüy wüx tanguaiyiw nguineay andeac a Felipe cos tasaj nejiw nguineay alndom majlüyeran tiül micambaj Teat Dios; y tasaj nejiw aton wüx Teat Jesucristo, quiaj tayariw. Condom tayariw yow, monxey at montaj.

<sup>13</sup> Quiaj aaga Simón tapiüng lamayar Mipoch Teat Dios, ndoj tayar yow. Condom tamb maquiüüb a Felipe nguiajantanej. Nej xeyay mbayaw wüx ajaw nguineay a Felipe arang cuajantanej nadam ateočan leaw ngomeaag ajaraw.

<sup>14</sup> Ajcüwa apóstoles monlüy Jerusalén, wüx tanguaiyiw nipilan monaw Samaria lamayariw Mipoch Teat Dios, quiaj tujchiw mamb a Pedro maquiüüb a Juan mambüw quiaj, mambeolüw a Felipe.

<sup>15</sup> Nejiw wüx tapeayiw quiaj, tatüniw ocueaj Teat Dios müüch Nangaj Espiritu ajcüwa nipilan quiaj.

<sup>16</sup> Cos nejingüind tiül nejiw nganaw mayariw Nangaj Espiritu ocueaj Teat Dios. Nejiw tayariw áagan yow wüx minüt Teat Jesús.

<sup>17</sup> Quiaj a Pedro y Juan tayacüw owixaw wüx omalüw ajcüwa nipilan quiaj, quiaj tiün wüx ombasüw nejiw Nangaj Espiritu ocueaj Teat Dios.

<sup>18</sup> Aaga Simón wüx tajaw nguineay ajcüwa apóstoles ayacüw owixaw wüx omalüw nipilan, quiaj apeay wüx ombasüw nejiw aaga Nangaj Espiritu ocueaj Teat Dios. Quiaj tandiüm müüch nejiw tomiün.

<sup>19</sup> Tasaj nejiw:

—Ijchan xic aton narang aag ayaj, nüjchiw mayariw Nangaj Espiritu ocueaj Teat Dios jangantanej nipilan leaw sanayac xiwx wüx omal nej —aj nejiw.

<sup>20</sup> Quiaj tasaj nej a Pedro:

—Ijoy ningüiün aaga tomiün quiaj, ich ndrom imbas anaag, cos ique tendiüm mengal aaga leaw Teat Dios üüch, üüchan.

<sup>21</sup> Ique ngo matüch ic meaand aag ayaj, ngome minajiüt, cos Teat Dios ajaw imeaats ngome najneaj.

<sup>22</sup> Nganüy icueat aaga xeyay ngo majneaj temerang quiaj, itün ocueaj Teat Dios sitiül alndom mawün wüx omeaats aaga xeyay ngo majneaj ipiüing tiül imeaats quiaj.

<sup>23</sup> Xique sawaw ique xeyay ngo majneaj alwüx imeaats. Ijlüyay wüx irang ngo majneaj —aj nej.

<sup>24</sup> Quiaj tasaj nejiw a Simón:

—Itüniün ocueaj Teat Dios mambeol xic, ngana namongoch aaga ipiüangan quiaj —aj nejiw.

<sup>25</sup> Condom a Pedro y Juan, wüx landoj majüiquichaw wüx Teat Jesús, at wüx landoj mandeacüw Mipoch Teat Dios, quiaj tandilileaw alinomb andüyiw Jerusalén. Xeyay cambaj tiül Samaria leaw niüng tamongoj, tasajüw nipilan wüx Mipoch Teat Dios.

*Felipe tangoch nop naxey naw Etiopía*

<sup>26</sup> Condom nop ángel ocueaj Teat Dios tasaj a Felipe, tapiüing:

—Ernguialeateay, quiür indüy cawac, ingoch aaga tiüüd imiün Jerusalén andüy Gaza. Aaga tiüüd quiaj, amb tiül wajchiüc among —aw.

<sup>27</sup> Quiaj tamb a Felipe. Ndoj tangoch nop naxey naw tiül iüt Etiopía, eunuco nej, pero ajiür nadam najiüt ocueaj nop najtaj nenüt Candace. Aaga najtaj quiaj minatang nena-jiüt nej tiül iüt Etiopía. Aaga naxey quiaj, acül teowix nej meáwan tomiün. Nej tamb Jerusalén marang casa Teat Dios.

<sup>28</sup> Wüx tajtsor alchetem tiül micarret nej, tengual mateow Mipoch Teat Dios tiül aaga

nawiig tarang Isaías, nendeac andeac Teat Dios.

<sup>29</sup> Quiaj Nangaj Espiritu ocueaj Teat Dios tasaj a Felipe:

—Quiür itüch aaga carret quiün, indüüb mamb —aj nej.

<sup>30</sup> Quiaj tamb a Felipe matüch a carret. Tanguiy aaga naxey quiaj tengual mateow Mipoch Teat Dios leaw tarang Isaías. Tatün manguiay, tasaj:

—¿Teat, ixom imeaats wüx aag temeteow quiaja? —aj.

<sup>31</sup> Quiaj tapiüing aaga naxey:

—¿Nguineay sanaxom ximeaats sitiül ngo majlüy aljane maquiaach xic? —aw.

Ndoj quiaj tasaj a Felipe majtep tiül a carret chetem aweaag.

<sup>32</sup> Aaga Mipoch Teat Dios niüng tengual mateow, apiüing:

Wüx taquiüraab mamb mandeow, ajlüyan ngo menojteay, atnej nop sap.

Atnej nop quicheech sap wüx ajerep milan nej, ngo mepaj.

Atquiaj a nej aton wüx tandeow, ngo majcüy majaw monbiy nej.

<sup>33</sup> Nej tiünd mamongoch monxing, ndoj ngome tajaraw cuane asoet.

¿Jane alndom mapiüing meáwan ngo majneaj tarangüw wüx ombas nej ajcüwa nipilan quiaja?

Cos tambiyaw nej ningüy wüx iüt.

<sup>34</sup> Quiaj tatün manguiay aaga naxey quiaj, tasaj a Felipe:

—Isaj xic teat, ¿jane wüx ombas apiüing aaga nendeac andeac Teat Dios quiaja?

¿Apiüing wüx nejáyan quiaja, ngwüy apiüing wüx alinop aljane? —aj.

<sup>35</sup> Condom Felipe tapots maquiaach nej ajan wüx aaga poch quiaj. Tapots masaj nej wüx Mipoch Teat Dios leaw tandeac Teat Jesús.

<sup>36</sup> Condom wüx tatüchiw niüng ajlüy yow, quiaj tapiüing aaga naxey quiaj:

—Joyaj yow ¿quia ngondom nayar yowa? —aw.

<sup>37</sup> Quiaj tapiüing a Felipe, tasaj nej:

—Alndom sitiül iyaag naleaing lajmel tiül imeaats Mipoch Teat Dios —aj nej.

Quiaj tapiüing aaga naxey quiaj:

—Nganüy lanapiüing naleaing aaga Teat Jesucristo quiaj Micual nej Teat Dios —aw.

<sup>38</sup> Quiaj tapiüing lombom a carret. Condom tawüw tiüt ijpiéj, tambüw tajmeliw tiül yow, Felipe maquiüüb aaga naxey quiaj. Quiaj tüüch nej yow a Felipe.

<sup>39</sup> Condom wüx tawüw imiün tiül yow, quiaj a Nangaj Espiritu ocueaj Teat Dios tawün quiaj a Felipe. Aaga naxey quiaj, ngo maxom majaw nguia tandüy a Felipe. Condom tamb maquiüüb mitiüüd nej apac omeaats.

<sup>40</sup> Felipe camüm mayaag altiül cambaj Azoto. Quiaj tamb tapots mandeac Mipoch Teat Dios tiültiül meáwan cambaj niüng tamong, atánan quiaj tatüch tiül cambaj Cesarea.

## 9

*Saulo tayar andeac Teat Jesús*  
(Hch. 22:6-16; 26:12-18)

<sup>1</sup> Pues aaga Saulo ngo mamong ajcüy majaw minipilan Teat Jesús, andiüm mam-bich mambiy meáwan. Quiaj tamb majaw natang miteaats.

<sup>2</sup> Tatün nawiiq majoy majüiquich tiül nangaj iüm tiül Damasco, alndom masap matsaag meáwan mondüüb Teat Jesús leaw apmadox, masey monxey masey montaj. Ndoj apmaquiiüb mamb andüy Jerusalén.

<sup>3</sup> Naleaing wüx aleamb tiül tiiüd laliüc matüch Damasco, quiaj tajaw noic ran imiün cielo, anmarraj nej, ayey nej tiüt.

<sup>4</sup> Quiaj tajmiüc a Saulo. Condom tanguiay andeac nop nendeac, tapiüng:

—Saulo, Saulo ¿neol tapots meyamb ximbas mejcüy mejaw xique? —aw.

<sup>5</sup> Quiaj tapiüng:

—¿Jan ic teat? —aw.

Quiaj tasaj nej aaga nendeac quiaj:

—Xique aaga Jesús, leaw ique tenguiual meyamb ombas mejcüy mejaw. Ngo majneaj mejcüy, cos andüy miün wüx imbas irang memongoch ngo majneaj, atnej nop jayats wacüx wüx atoel, quiaj atileran —aj nej.

<sup>6</sup> Quiaj mbayaw, ancambeapmbeapeay. Tapiüng:

—Jow nganüy Teat ¿cuane indium mejaw naranga? —aw.

Quiaj tasaj nej Teat Jesús:

—Witiür, quiür itüch tiül aaga cambaj quiün. Quiaj apmesoic cuane netam merang —aj nej.

<sup>7</sup> Ajcüwa monxey monquiiüb Saulo alombomoy quiaj, xeyay lambayajow aton. Cos anguiayayej andeac aaga nendeac, pero naleaing ngo maxomüw majawüw nejingund.

<sup>8</sup> Quiaj witiüt tiüt a Saulo; pero wüx taleaag oniiüg ngo maxom majaw nicuajind. Quiaj taquiüraab mamb, naneteteran owix, tamb andüy Damasco.

<sup>9</sup> Tajlüy quiaj er nüt ngo maxom majaw nicuajind nicuajind, ngo met, ngo manga-neow.

<sup>10</sup> Tiül aaga nüt quiaj altiül Damasco nop minipilan Teat Jesús nenüt Ananías. Aaga naxey quiaj aleaic tajaw atnej aüm, cos Teat Jesús tejüiquichay majaw nej. Tasaj:

—¡Ananías! —aj.

Ananías tapiüng:

—Sal ningüy Teat —aw.

<sup>11</sup> Quiaj tasaj nej Teat Jesús:

—Ernguialeateay, quiür iquiiüb aaga calle nasoic Naleainguiay, itün menguiay aniüng Judas. Alquiaj nop naxey nenüt Saulo naw Tarso, nej nganüy nganüy cam tenguiual ataaq orar.

<sup>12</sup> Nej aton lanüüch majaw atnej aüm, nop naxey nenüt Ananías lajmel niüng nej axood, apmayac owix nej wüx omal nej, quiaj aprram oniiüg nej alinomb —aj nej.

<sup>13</sup> Ananías wüx tanguiay aag ayaj, tapiüng:

—Teat, xique lananguiay xeyay nipilan andeacüw wüx aaga naxey quiaj, apiüngüw nej xeyay ngo majneaj teamarang wüx ombasüw minipilan tiül Jerusalén.

<sup>14</sup> Nganüy lapeay ningüy, ajamiün nawiiq ocueajiw montangtang miteaats, quiaj alndom masap matsaag meáwan mondüüb ic —aw.

<sup>15</sup> Quiaj tasaj nej Teat Jesús:

—Quiür, cos aaga naxey quiaj lanarriiüd marang xenajiüt. Nej apmamb mandeac xic wüx tiül palpálwüx nipilan, at niüng ajlüyiw minatangüw monajiüt, at tiül micual iüt Israel aton.

<sup>16</sup> Cos xique sanüüch majaw nguineay apmamongoch xeyay ngo majneaj áag andüüb xic —aj nej.

<sup>17</sup> Quiaj tamb a Ananías andüy tiül aaga nden niüng axood Saulo. Wüx tapeay quiaj, tayac owix wüx omal a Saulo. Tasaj:

—Teat Saulo, aaga Teat Jesús tejüiquichay mejaw tiül tiiüd wüx tewiün, nej nesaj xic niün nüüch ram iniiüg alinomb. Aton aliüc Nangaj Espiritu ocueaj Teat Dios majlüy wüx imbas —aj.

<sup>18</sup> Andüüban ajmiüc imiün teoniiüg nej atnej milil cüet. Quiaj rat oniiüg nej a Saulo. Condom quiaj witiüt, tamb mayar yow.

<sup>19</sup> Saulo wüx landoj üet, landoj anganeow, quiaj tayar apac alinomb. Condom tacül quiaj acas nüt maquiiüb minipilan Teat Jesús monlüy tiül Damasco.

*Saulo tandeac wüx Teat Jesús tiül Damasco*

<sup>20</sup> Quiajan tamb meáwan tiül ajcüwa sinagogas tiül Damasco mandeac masaj nipilan, naleaing aaga Teat Jesús Micual Teat Dios nej.

<sup>21</sup> Quiaj mbayatoj meáwan jane tanguiayiw andeac nej, tapiüngüw:

—¿Neol, ngome nej aag ayaj tasap xeyay minipilan Teat Jesús tiül Jerusalén? ¿Neol ngome áag iün marang ningüy, masap matsaag minipilan Teat Jesús maquiiüb andüy teombasüw montangtang miteaatsa? —awüw.

<sup>22</sup> Naleaing aaga Saulo taxom omeaats xeyay masaj nipilan, áag ngondom mangochiw nej andeac ajcüwa judíos moncül tiül Damasco, cos tasaj nejiw naleaing Teat Jesús aag ayaj a Cristo leaw netam miün.

*Saulo tawün oleaj*

<sup>23</sup> Wüx lamajiür xeyay nüt acül quiaj, quiaj ajcüwa judíos tandeacüw nóiquian ap-mambiyaw nej.

<sup>24</sup> Pero Saulo tanguiy aag ayaj. Masey tajiürw mbeay mbeay cambaj nüt ong-wiüts cos andiümüw masapüw mambiyaw, pero ngondom mambiyaw.

<sup>25</sup> Condom minipilan Teat Jesús tawüniw nej ongwiiüts; tayacüw nej tiül nop nadam nchep, tamongochiw nej amb nic coet neyey tiüt cambaj. Aaga coet quiaj, najtep oleaj xeyay, narangüch piedra. Atquiaj taw wüx.

*Saulo al Jerusalén*

<sup>26</sup> Wüx tapeay tiül Jerusalén a Saulo, tandiüm maquiüjpüw tiül minipilan Teat Jesús; pero naleaing nejiw timbолоj mandüyiw nej; ayajcüw ngome naleaing minipilan nej Teat Jesús.

<sup>27</sup> Quiaj a Bernabé tambeol nej, taquiiüb nej mamb andüy niüng ajlüyiw apóstoles. Condom tapots masaj nejiw wüx a Saulo nguineay tajaw Teat Jesús tiül tiüd. At tasaj nejiw cuane tasaj nej Teat Jesús, aton tasaj nejiw nguineay tandeac wüx Teat Jesús tiül Damasco, ngo mimbol.

<sup>28</sup> Condom quiaj tacül tiül Jerusalén a Saulo maquiüüb nejiw, ambüw nguiajantanej maquiüjpüw.

<sup>29</sup> Nej ngo mimbol mandeac wüx Teat Jesús. At aton tasajaj ajcüwa mondeac griego; pero nejiw ngo mayariw nej andeac; tayambüw nguineay mambiyaw.

<sup>30</sup> Wüx minipilan Teat Jesús tanguiyaw aag ayaj, quiaj taquiüjpüw nej mamb andüy Cesarea. Condom naw quiaj tujchiw nej mamb andüy Tarso.

<sup>31</sup> Tiül aaga nüt quiaj tajlüw najneajan tiül meáwan niüng canchiüjow minipilan Teat Jesús. Lango majcüyaran majarawüw tiül meáwan cambaj tiül Judea, tiül Galilea, at tiül Samaria. Tayacüw wüx omeajtsüw mandüjpiw leawa tandeac Teat Jesús, tarangüw leaw andiüm Teat Dios. Quiaj texeyayiw, cos tambeol nejiw Nangaj Espíritu ocueaj Teat Dios.

*Tajneaj Eneas*

<sup>32</sup> Condom alinoic nüt wüx tamb a Pedro mamong tiül tiül cambaj niüng ajlüyiw minipilan Teat Jesús majaw cuane arangüw, quiaj tamb aton tiül cambaj Lida.

<sup>33</sup> Taxom quiaj nop naxey nenüt Eneas. Aaga naxey quiaj lamajiür ojpeacüw neat acül wüx mats, androoch nej ombas monandeow.

<sup>34</sup> Quiaj tasaj nej a Pedro:

—Teat Eneas, Teat Jesucristo lamataag ic majneaj, witiür, ixaing mimats —aj.

Andüüban ajneaj aaga naxey quiaj, witiüt.

<sup>35</sup> Wüx tajawüw nej lajneaj, meáwan nipilan tiül Lida, at monaw tiül cambaj Sarón aton tandüjpiw Teat Jesús.

*Dorcac tapac alinomb*

<sup>36</sup> Tiül aaga nüt quiaj, altiül cambaj Jope nop najtaj minipilan Teat Jesús nej aton, nenüt Tabita. Aag ayaj nasoi Dorcas tiül ombeay griego. Nej xeyay najneaj arang, at ambeol nipilan ngo majiür.

<sup>37</sup> Wüx aaga nüt quiaj, tiün andeow a Dorcas, tandeow. Condom wüx landoj axejmbeacharan, taquiüraab majmel cawüx tiül amb ijpüw iüm.

<sup>38</sup> Pues aaga cambaj Jope ngome xeyay miünquiaj ajlüy aweaag cambaj Lida, niüng ajlüy Pedro. Wüx minipilan Teat Jesús monaw Jope tanguiyaw Pedro altiül cambaj Lida, quiaj tujchiw mamb ijpüw monxey masajüw:

—Teat, irang favor, mac najen mejaw xicon ningüy tiül Jope —awüw.

<sup>39</sup> Quiaj tamb a Pedro maquiüüb nejiw. Wüx tapeay quiaj, taquiüjpüw nej mamb andüy cawüx tiül amb ijpüw iüm. Camüm mapeay quiaj, andüüban mayeyiw nej tiüt monlemben omal montaj, ajiüntsüw. Tujchiw nej majaw apixaw nejiw arang Dorcas wüx almapac.

<sup>40</sup> Condom Pedro tawün nejiw quiaj meáwan, ndoj taquieel tiüt micos nej mataag orar Teat Dios. Condom ndiliteay majaw aaga nandeow quiaj, tasaj:

—Tabita, witiür —aj.

Quiaj taleaag onüüg aaga najtaj quiaj, wüx tajaw a Pedro quiaj witiüt chetem.

<sup>41</sup> Pedro, quiaj tandic owix nej masap owix a najtaj, tawitich lembem. Condom, quiaj tapaj miünüw minipilan Teat Jesús at monlemben omal montaj. Wüx tajngotoj majawüw, quiaj tajawüw lapac.

<sup>42</sup> Aag ayaj tanguiyaran meáwan tiül cambaj Jope, ndoj xeyay nipilan tandüjpiw Teat Jesús.

<sup>43</sup> Condom Pedro tacül tiül cambaj Jope xeyay nüt, aniüng nop naxey nenüt Simón, nop nerang najiüt wüx taag.

**10***Pedro alaniüng Cornelio*

<sup>1</sup> Altiül cambaj Cesarea nop naxey nenüt Cornelio, minatang noic ajlüy soldados nasoi Italiana.

<sup>2</sup> Aaga naxey quiaj, xeyay ayamb Teat Dios, xeyay andiüm marang leaw andiüm Teat Dios, nóiquian maquiüüb meáwan leaw al aniüng nej. At aton xeyay ambeol nipilan tiül aaga cambaj quiaj. Nej ajlüyay matün ocueaj Teat Dios mambeol nej.

<sup>3</sup> Aaga naxey quiaj, ranüy tüünd majaw atnej aüm, tajaw nop ángel ocueaj Teat Dios andüy wüx nchejliow nüt. Tajaw aaga ángel

quiaj tajmel niüng ajlüy nej. Condom tasaj nej:

—¡Teat Cornelio! —aj nej.

<sup>4</sup> Cornelio mbayat xeyay wüx tajaw a ángel. Quiaj tapiüng:

—¿Cuane Teat? —aw.

Quiaj tasaj nej a ángel:

—Teat Dios teamanguiaiy aag itün ocueaj, teamajaw nguineay imbeol nipilan ngo majiür.

<sup>5</sup> Nganüy iich mambüw acas monxey tiül cambaj Jope, majanüw miün nop naxey nenüt Simón, aag ayaj nasoic Pedro.

<sup>6</sup> Nej acül aniüng nop naxey nenüt Simón, aaga nerang najiüt wüx taag. Aaga nden quiaj ajlüy mbeay ndec. Nej a Pedro quiaj, apmasaj ic cuane netam merang —aj nej.

<sup>7</sup> Wüx laámb aaga ángel tengual andeac aweaag, quiaj Cornelio tapaj ijpüw monrang minajiüt nej, at alinop soldado neyamb Teat Dios.

<sup>8</sup> Condom Cornelio wüx landoj masaj nejw meáwan cuane tajaw, quiaj tüüch nejw mambüw tiül cambaj Jope majanüw miün a Pedro.

<sup>9</sup> Amb alinoic nüt nejw aliw tiül tiüüd, laliüc mapeayiw Jope. Aag ayaj laliüc lembenüt. Pedro tajtep andüy cawüx mal iüm mataag orar.

<sup>10</sup> Condom tind üet a Pedro. Tengualeámban arangüch üet nej, aleaic tajaw atnej aüm.

<sup>11</sup> Quiaj taxom majaw atnej lejquiat a cielo. Tajaw aliüc miün tiül cielo andüy wüx iüt atnej noic namad püy, naoeloeleran oxing, tengual aw tiüt.

<sup>12</sup> Tiül aaga püy quiaj, altiül cuajantanej nimal. Altiül nimal nejüür apiquiw oleaj; altiül nimal nesatatüy tiüt ajüy; altiül quieic aton.

<sup>13</sup> Quiaj tanguiaiy a Pedro andeac nop nendec, tasaj nej:

—Pedro, witiür imbiy aag ayaj, itsamb —aj nej.

<sup>14</sup> Quiaj tapiüng a Pedro:

—Ngwüy Teat, cos xique nómban ngome aag natsamb ajcüwa ngo majneaj nimal quiaj leaw xicona ngondom natsamban —aw.

<sup>15</sup> Quiaj tendeac amb ijmbüw aaga nendec quiaj, tasaj nej:

—Leaw lamapiüng Teat Dios najneaj matsaramb, ique ngondom mepiüng ngo majneaj —aj nej.

<sup>16</sup> Aag ayaj tajaw arojmbüw. Condom, quiaj xaijnguiat alinomb aaga püy quiaj, andüy tiül cielo.

<sup>17</sup> Pedro aliün wüx aag ayaj, tengualeámban mayamb omeaats nguineay amb aaga landoj majaw quiaj. Quiaj apeayiw mbeay nden ajcüwa monxey üüch

nejw mambüw a Cornelio, cos landoj matüniw manguiayiw nguiane acül a Simón.

<sup>18</sup> Quiaj tendeacüw, tatüniw manguiayiw, sitiül quiaj axood nop naxey nenüt Simón nasoic Pedro.

<sup>19</sup> Pedro tengualeámban mayamb omeaats wüx aaga landoj majaw quiaj, quiaj tasaj nej Nangaj Espiritu ocueaj Teat Dios:

—Jojay arojpwüw monxey lapeayiw mayambüw ic.

<sup>20</sup> Nganüy iriow tiüt quiür ijawüw, iquiüjpüw mamb nde mechiw imeaats. Cos xique nejchiüs miünwüw ningüy —aj nej.

<sup>21</sup> Quiaj taw tiüt a Pedro majaw ajcüwa monxey neech nejw miünwüw a Cornelio. Condom tasaj nejw:

—Jogüy xic, teat. ¿Aleaic iyamban xic wüx tewiünan ningüye? —aj nejw.

<sup>22</sup> Nejiw quiaj tapiüngüw:

—Nop minatang soldado nenüt Cornelio nesaj xicon niünan. Aaga naxey quiaj xeyay najneaj arang, ayamb Teat Dios. Aton meáwan nipilan judío apiüngüw nej xeyay najneaj arang. Nop ángel ocueaj Teat Dios landoj masaj nej miün mejanüch meamb aniüng nej manguiay leaw ique apmesaj —awüw.

<sup>23</sup> Quiaj tamelich nejw a Pedro, tüüch nejw nguiane maxojtüw. Wüx larrow tiüt amb alinoic nüt, quiaj tamb a Pedro maquiüüb nejw. At aton tambüw alacas minipilan Teat Jesús moncül tiül Jope.

<sup>24</sup> Larrow tiüt amb alinoic nüt, quiaj tatüchiw tiül cambaj Cesarea. Cornelio tengual macül nejw; laümb mapaj meáwan acualaats nej, at meáwan leaw xowüy andeac aweaag.

<sup>25</sup> Wüx tajmel tiül nden a Pedro, quiaj tamb a Cornelio mangoch nej, taquieel tiüt micos nej teombas a Pedro.

<sup>26</sup> Quiaj a Pedro tawitich nej, tasaj:

—Witiür teat, cos xique aton nipilan xic sat ic —aj nej.

<sup>27</sup> Tengual andeac aweaag tajmeliw tiül iüm. Quiaj tajaw xeyay nipilan lacanchiüjow quiaj.

<sup>28</sup> Condom quiaj tasaj nejw a Pedro:

—Icona lamejawan nguineay nop nipilan judío ngondom maquiüüb tiül pálwüx nipilan; at ngondom majmel aniüngüw nejw. Pero Teat Dios lamüüch xic najaw, nejinguind nipilan ngondom mapiürang ngo majneaj, ngo metam nej.

<sup>29</sup> Pares wüx tasoiquiüs niün, quiaj tiünas, ngo napiüng nicuajind. Nganüy sandiüm nanguiay ¿neol tepajan xic niün? —aj nejw.

<sup>30</sup> Quiaj tapiüng a Cornelio, tasaj nej:

—Xique lamajiür apeic nüt, aaga ores cam andüy wüx nchejliow nüt taiündas, tengual sataag orar ningüy saniüng. Quiaj tajawas



nop naxey alembem niüng sajlü, xowüy lalitlit apix nej.

<sup>31</sup> Condom tasaj xic aaga naxey quiaj, tapiüing: “Cornelio, Teat Dios teamanguiaiy leaw itün ocueaj, aton teamajaw nguineay imbeol nipilan ngo majiür.

<sup>32</sup> Nganüy iich mamb majanüch miün nop naxey altiül cambaj Jope, nenüt Simón nasoic Pedro. Aaga naxey quiaj axood aniüing Simón aaga nerang najiüt wüx taag, acül mbeay ndec. Wüx apmapeay aaga naxey quiaj, nej apmasaj ic cuane netam merang”, aw.

<sup>33</sup> Quiaj tujchiüs mamb mejanüch. Nganüy ique najneaj irang cos lerpeay. Meáwan xicona sajlüiyün ningüy narangan leaw Teat Dios andiüm, nanguiayiyün meáwan leaw nej lamasaj ic mesaj xicon —aj nej.

*Pedro tandeac aniüing Cornelio*

<sup>34</sup> Quiaj a Pedro tandeac masaj nejiw, tapiüing:

—Nganüy lanajaw Teat Dios andiüm jangantanej nipilan, ngo mapiüing wüx jane netam, jane ngwüy.

<sup>35</sup> Nej najneaj majaw meáwan nipilan tiül meáwan cambaj wüx iüt jane apmayamb nej, jane apmarang najneaj.

<sup>36</sup> Teat Dios tüüch manguiayiw mipoch nej aaga cambaj Israel, pero tapiüing nej najneajan majaw meáwan nipilan leaw apmayar andeac Teat Jesucristo. Aaga Teat Jesús quiaj, minatang ocueaj meáwan nipilan.

<sup>37</sup> Icona lamenguiayiyün cuane tajlüy meáwan tiül iüt Judea. Aag ayaj tamelich tiül Galilea, wüx Juan landoj maquiaach nipilan cuane netam marangüw para alndom mayariw yow.

<sup>38</sup> Lamejawan aton nguineay Teat Dios tayac Nangaj Miespíritu nej wüx ombas Teat Jesús naw Nazaret para marang cuajantanej. At lamejawan nguineay Teat Jesús tarang xeyay najneaj cos Teat Dios almaquiüüb nej. Nej aton tüüch majneaj meáwan nipilan leaw üüch nejiw nichachiw nimeech.

<sup>39</sup> Xicona tajawasan naleaing meáwan leaw tarang Teat Jesús tiül iüt Judea, at tiül Jerusalén. Condom tayacüw nej wüx cruz mandeow.

<sup>40</sup> Aaga Jesús quiaj Teat Dios tapacüüch nej wüx er nüt; tüüch nej mejüiquichay najawan.

<sup>41</sup> Ngome meáwan nipilan tajawüw nej, ágan xicona leaw lasarriüüdaranan nandeacan wüx nej cuane tarang. Xicona tajawasan, cos tetesan, tanganeowasan naquiüjpan wüx landoj apac alinomb.

<sup>42</sup> Nej tasaj xicon namban nasajan nipilan, napiüangan naleaing Teat Dios lamayac nej majaw wüx asoet meáwan nipilan, leaw aliün mapac at leaw landeow.

<sup>43</sup> Meáwan mondeac andeac Teat Dios lamapiüingüw wüx nej tanomb. Tapiüingüw meáwan leaw apmayar andeac Teat Jesús, Teat Dios apmawün wüx omeaats nej asoetiw nejiw —aw.

*Nipilan ngome judio ayariw Nangaj Espíritu*

<sup>44</sup> Tengualeámban mandeac a Pedro wüx aag ayaj, quiaj tiün Nangaj Espíritu ocueaj Teat Dios, tajmiüc wüx ombasüw meáwan nipilan leaw teamanguiaiyiw andeac nej.

<sup>45</sup> Quiaj mbayatoy ajcüwa judíos monyar andeac Teat Jesús leaw tambüw maquiüjpwüw teat Pedro, cos tajawüw nguineay ajcüwa nipilan ngome judio lamayariw Nangaj Espíritu aton.

<sup>46</sup> Cos teamanguiaiyiw lamandeaüw alinoic ombeayiün, teamapiüingüw najneajay lamarang Teat Dios.

<sup>47</sup> Condom tasaj nejiw a Pedro:

—¿Alndom aljane mapal, ngo mayariw yow ajcüwa nipilan quiaja? Cos nejiw aton lamayariw Nangaj Espíritu atnej icootsa —aj nejiw.

<sup>48</sup> Quiaj a Pedro tapiüing müüch nejiw mayariw yow wüx minüt Teat Jesús. Condom tasajüw a Pedro macül quiaj alacas nüt maquiüüb nejiw.

## 11

*Teat Pedro tamb Jerusalén masaj minipilan Teat Jesús nguineay tarang*

<sup>1</sup> Condom ajcüw apóstoles y aldemas minipilan Teat Jesús monlüy tiül Judea tanguiaiyiw nguineay ajcüwa nipilan ngome judíos aton lamayariw Mipoch Teat Dios.

<sup>2</sup> Wüx tapeay Jerusalén a Pedro, quiaj taliquiaw nej ajcüwa judíos leaw lamandüjpiw Teat Jesús.

<sup>3</sup> Tasajüw:

—¿Neol teamb aniüingüw nipilan ngome icootsa meretiün mequiüjpana? —ajüw nej.

<sup>4</sup> Quiaj tapots masaj nejiw a teat Pedro andüübndüjpeay nguineay tajlüy, tapiüing:

<sup>5</sup> —Xique sal tiül cambaj Jope, tengual sa-taag orar. Quiaj tajawas aleaic atnej saüm. Tajawas aliüc imiün tiül cielo atnej noic nadam pü, ndean oxingxing; aag ayaj tiün andüy niüng sajlüy.

<sup>6</sup> Tajawas majneaj tiül aag ayaj. Quiaj tajawas altiül cuajantanej nimal nejiür apiquiw oleaj; altiül napat nimal, altiül nimal nesatatüy tiüt ajüy, altiül quiec aton.

<sup>7</sup> Quiaj tanguiaiyiis andeac nop nendeac, tasaj xic: “Pedro, witiür imbiy cuajantanej aag ayaj, itsamb”, aj xic.

<sup>8</sup> Quiaj a xique tasajas: “Ngwüy Teat, cos xique nómban ngomeaag natsamb ajcüwa ngo majneaj nimal quiaj, leaw xicona ngon-dom natsamban”, saj.

<sup>9</sup> Quiaj tasaj xic amb ijmbüw aaga nendec imiün tiül cielo: “Leaw lamapiüng Teat Dios najneaj matsaramb, ique ngondom mepiüng ngo majneaj”, aj xic.

<sup>10</sup> Aag ayaj tajawas arojmbüw. Condom, quiaj xaijnguiat alinomb andüy tiül cielo.

<sup>11</sup> Condom, quiaj tapeayiw quiaj arojpw monxey niüng saxood mayambüw xic, müjndiw miünw imiün Cesarea.

<sup>12</sup> Quiaj tasaj xic a Nangaj Espiritu ocueaj Teat Dios namb naquiüjpüw nde nachiw ximeats. Tambüw aton maquiüjpüw xic ajcüwa anaif monyar andeac Teat Jesús cam. Tajmelasan aniüng nop teat naxey.

<sup>13</sup> Aaga teat naxey quiaj tasaj xicon nguineay tajaw nop ángel aniüng nej, lembet niüng ajlüy nej, tasaj nej: “Ijchaw mambüw acas monxey andüyiw Jope, majanüw miün nop naxey nenüt Simón, nasoic Pedro.

<sup>14</sup> Aaga naxey quiaj apmasaj ic nguineay alndom maw isoetiün, mequiüüb meáwan leaw al iniüng”, aj nej.

<sup>15</sup> Wüx tandeacas nasajüw, quiaj tayariw Nangaj Espiritu ocueaj Teat Dios atnej tayariüts nomb.

<sup>16</sup> Quiaj leaad ximeats nguineay tasaj icoots Teat Jesús wüx tapiüng: “Juan naleaing tüüch yow nipilan, aag ayaj náagan yow. Nganüy a icona apmeajndiün Nangaj Espiritu”, aw.

<sup>17</sup> Sitiül Teat Dios lamüüch nejw Nangaj Espiritu aton, atnej tüüch icoots wüx tayariüts andeac Teat Jesucristo ¿jow nganüy a xique, jane xic napiüng napal leaw andiüm Teat Dios? —aj nejw a Pedro.

<sup>18</sup> Wüx ndot manguiayiw aag ayaj, quiaj ndijchiütoj, apac omeajtsüw, tapiüngüw:

—[Najneajay lamarang Teat Dios! Nganüy naleaing Teat Dios lamüüch nipilan ngome judíos leam omeajtsüw ngo majneaj tea-marangüw y macueatiw, cos atquiaj nejw aton alndom mapacüw meáwan nüt tiül cielo —awüw.

*Minipilan Teat Jesús monlüy tiül Antioquía*

<sup>19</sup> Nganüy ajcüwa minipilan Teat Jesús leawa tawüniw oleajiw ajan wüx tajlüy nadam moncüy wüx tambiyaran Esteban, altiül tatüchiw tiül iüt Fenicia; altiül tambüw Chipre; altiül tatüchiw tiül cambaj Antioquía. Nejw ngo masajiw meáwan nipilan wüx aaga najneaj nanderac wüx Teat Jesús, áagan nipilan judío tasajüw.

<sup>20</sup> Condom acas monyar andeac Teat Jesús monaw tiül Chipre, at monaw tiül cambaj Cirene, tambüw tiül cambaj Antioquía. Wüx tapeayiw quiaj, tasajüw nipilan griegos wüx aaga najneaj nanderac wüx Teat Jesús.

<sup>21</sup> Teat Dios xeyay tambeol nejw; quiaj xeyay nipilan tayariw Mipoch Teat Dios,

tacueatiw meáwan ngo majneaj leawa tarangüw.

<sup>22</sup> Minipilan Teat Jesús monlüy tiül Jerusalén wüx tanguiayiw aag ayaj, quiaj tujúchw mamb andüy Antioquía a teat Bernabé mamb mambeol nejw.

<sup>23</sup> Wüx tapeay quiaj a teat Bernabé, xeyay tapac omeats wüx tajaw nguineay lamambeol nejw Teat Dios. Quiaj tasaj nejw mayacüw wüx omeajtsüw Mipoch Teat Dios tanaám, nde macueatiw.

<sup>24</sup> Teat Bernabé najneaj omeats, nómban ngo machiw omeats wüx Teat Dios. At cos xeyay ambeol nej Nangaj Espiritu, xeyay nipilan tayariw Mipoch Teat Dios.

<sup>25</sup> Ndoj tamb a Bernabé andüy tiül cambaj Tarso mayamb a Saulo. Wüx taxom, quiaj taquiüüb mamb andüy Antioquía.

<sup>26</sup> Quiaj tacüliw maquiüjpüw monyar andeac Teat Jesús nomb neat; taquiajchiw xeyay nipilan wüx Mipoch Teat Dios. Tiül Antioquía tamelich masoiquiw Cristiano nejw leaw monyar andeac Teat Cristo.

<sup>27</sup> Tiül aaga nüt quiaj, tapeayiw Antioquía acas mondeac andeac Teat Dios monaw Jerusalén.

<sup>28</sup> Nop tiül nejw nenüt Agabo. Aaga naxey quiaj tasaj nej Nangaj Espiritu ocueaj Teat Dios nguineay apmajlüy alinoic nüt. Quiaj witiüt masaj monyar andeac Teat Jesús wüx alcanchiümoj; tapiüng laliüc majlüy montiün andüy tiül meáwan cambaj, ngome apmajlüy nüeteran. Aag ayaj naleaing tajlüy wüx Claudio tarang natang nenajiüt tiül Roma.

<sup>29</sup> Quiaj minipilan Teat Jesús monlüy tiül Antioquía tapiüngüw anopnopo apmambelölw monyar andeac Teat Jesús monlüy tiül Judea; apmújchw leaw alndom.

<sup>30</sup> Naleaing atquiaj tarangüw, tujúchw mamb aaga leaw ijchiw quiaj majoyiw mamb a Bernabé maquiüüb a Saulo, mújchw montangtang tiül monyar andeac Teat Jesús monlüy tiül Judea.

## 12

*Tandeow Jacobo, Pedro tayacüch tiül manchiüc*

<sup>1</sup> Wüx aaga nüt quiaj, aaga Herodes minatang nenajiüt tayamb ombas minipilan Teat Jesús. Tasap acas müüch mamongochiw xeyay ngo majneaj.

<sup>2</sup> Ndoj tapiüng mambiyaran a Jacobo (Santiago minüt nej aton) micoj a Juan, tambiyaw naag espada.

<sup>3</sup> Condom Herodes wüx tajaw ajcüwa judíos najneájan majawüw aaga arang quiaj, quiaj tasap teat Pedro mayac tiül manchiüc aton. Naleaing tiül aaga nüt quiaj arangüw nangos nüt wüx üetiw pan ngo majmel levadura.

<sup>4</sup> Wüx lamasap a Pedro mayac tiül manchiüc, quiaj tayac teowixaw apiquiw ajlüy soldados monjiür manchiüc, majiürüw. Aag ayaj ajlüy apiquiw soldados tiül noicnoic ajlüy. Cos Herodes apiüng wüx landoj pascua, quiaj apmawün a Pedro mayac teowix cambaj.

<sup>5</sup> Pedro tajiürüch majneaj tiül manchiüc. Nganüy ajcüwa minipilan Teat Jesús xeyay tatajcüw orar Teat Dios mambeol nej.

*Teat Dios tawün tiül manchiüc a Pedro*

<sup>6</sup> Tiül aaga ongwiiüts quiaj, wüx Herodes apmawün a Pedro müüch cambaj ráwan tiüt, Pedro almameay pinawan niüng ajlüyiw ijpüw soldados. Netsaag naag ijsüw galen; aliw tiül ombeay manchiüc alijpüw soldados tengual majiürüw nej.

<sup>7</sup> Quiaj tapeay niüng ajlüy nej nop ángel ocueaj Teat Dios, anmarraj tiül manchiüc, tareeg teombaj a Pedro mapacüch, tasaj:

—Witiür najénan —aj.

Tanaám sojndiow aaga galen netsajcüy owix nej.

<sup>8</sup> Quiaj tasaj nej a ángel:

—Ersoijquiaj, aton isoog ipaj —aj nej.

Pedro atquiaj tarang. Condom aaga ángel tasaj nej alinomb:

—Isoog najal micamix, mac tabar —aj nej.

<sup>9</sup> Quiaj taw a Pedro tandüüb mamb a ángel. Naleaing ngo majaw sitiül naleaing meáwan leaw lamarang aaga ángel quiaj, tengwüw ajáwan. Nej apiüng aag ayaj ajáwan atnej maüm.

<sup>10</sup> Condom tamongoj noic ombeay manchiüc niüng ajlüy nop soldado nejiür manchiüc. Condom tamongoj amb ijquiw ombeay manchiüc niüng ajlüy alinop soldado. Wüx tatüchiw aaga nadam ombeay manchiüc niüng awaran andüy tiül cambaj, aag ayaj narangüch manchiüc, lejquiat nejáwan quiaj. Quiaj tambüw. Condom wüx tatüchiw nots calle, quiaj tacueat nej a ángel.

<sup>11</sup> Quiaj rat andüy a Pedro, tapiüng:

—Nganüy sawan naleaing Teat Dios tüüch miün miángel nej mawün xic teowix Herodes, ngana majlüy atnej andiümüw marangüw ajcüwa nipilan judío quiaj —aw.

<sup>12</sup> Atquiaj tapiüng tiül omeaats, condom tamb andüy aniüng María mimüm a Juan, aaga nasoic Marcos aton. Quiaj alcanchiümoj xeyay minipilan Teat Jesús tengual atajcüw orar.

<sup>13</sup> Wüx tapeay mbeay nden, quiaj tendead. Quiaj tiün nop nüx nenüt Rode majaw jane.

<sup>14</sup> Aaga nüx quiaj wüx tanguiay andeac a Pedro, xeyay apac omeaats, ngo maleaaig ombeay nden, andilílan tiüt andüy tiül nden masaj nejiw lapeay a Pedro, al mbeay nden.

<sup>15</sup> Quiaj tasajüw nej monlüy quiaj:

—¡Nerchach! —ajüw nej.

Nej nomb apiüng naleaing. Quiaj tapiüngüw:

—Ngome nej, aag ayaj miángel nej —awüw.

<sup>16</sup> Pedro nde asap andeac mbeay nden. Wüx tambüw maleajquiw, quiaj tajawüw naleaing. Quiaj mbayatoj xeyay.

<sup>17</sup> Pedro tarang owix ndiüchiümoj. Quiaj tapots masaj nejiw nguineay tawün nej tiül manchiüc Teat Dios. At tasaj nejiw:

—¡Jchan manguiay a Jacobo, at meáwan minipilan Teat Jesús —aj nejiw.

Condom taw quiaj, tamb.

<sup>18</sup> Camüm ram tiüt mbayajow a soldados. Xeyay tendead andeacüw wüx, cos ngo majawüw nguineay taw a Pedro.

<sup>19</sup> Condom Herodes tüüch mamb mayambüch a Pedro. Wüx laimb mayamb ngo maxom, quiaj tandüy wüx matüntün manguiay ajcüwa soldados monjiür manchiüc. Condom tüüch mamb maquiürajpüw mandeowüw. Ndoj Herodes taw Judea, tamb macül tiül cambaj Cesarea.

*Tandeow Herodes*

<sup>20</sup> Herodes xeyay tajcüy majaw nipilan monaw tiül cambaj Tiro at monaw tiül cambaj Sidón. Pero nipilan monaw Tiro maquiüüb Sidón tandeacüw nóiquian, mambüw majawüw aaga nenajiüt quiaj. Tandeacüw maquiüjpüw a Blasto mambeol nejiw. Aaga naxey quiaj, natang nejiür najiüt ocueaj Herodes. Quiaj tatüniw ocueaj a Herodes nde majcüyaran majarawüw. Cos nejiw teamaxomüw nüeteran naw tiül meáwan cambaj leaw Herodes ajlüy wüx.

<sup>21</sup> Herodes tayac noic nüt sonongom nipilan manguiayiw andeac nej. Condom wüx tatüch a nüt, tasooig najneaj apix nej, apix minatang nenajiüt. Ndoj tsotot tiül apal nej. Quiaj tapots andeac masaj nipilan.

<sup>22</sup> Quiaj tepajüw nipilan napac. Tapiüngüw:

—¡Nop dios teandeac quiaj, ngome nipilan! —awüw.

<sup>23</sup> Quiaj ajngot iün andeow a Herodes, tüüch nej miün andeow nop ángel ocueaj Teat Dios, cos tayaag nej xeyay atam ajlüy; nganüy Teat Dios ngo metam. Quiaj tandeow, tendiüc.

<sup>24</sup> Naleaing Mipoch Teat Dios tajüy xeyay, tanguiayaran nguiajantanej.

<sup>25</sup> Bernabé maquiüüb a Saulo wüx landoj marangüw minajiütüw nejiw tiül Jerusalén, quiaj tandilileaw alinomb andüyiw Antioquia, taquiüjpüw mamb a Juan nasoic Marcos.

## 13

*Bernabé y Saulo tambüw mandeacüw andeac Teat Dios*

<sup>1</sup> Tiül nipilan monyar andeac Teat Jesús monlüy tiül Antioquia altiül acas mondeac andeac Teat Dios, aton altiül monquiaach wüx Mipoch Teat Dios. Ajcüw ayaj nop Bernabé, alinop Simón nasoiç Niger, alinop Lucio naw Cirene, alinop Manaén, alinop Saulo. Aaga naxey nenüt Manaén quiaj, tatang aweaag a Herodes, aaga nenajiüt tiül Galilea.

<sup>2</sup> Noic nüt wüx alxenenguemoj tengual anderac Mipoch Teat Dios aton wüx teaiündüw, quiaj tasaj nejiw Nangaj Espiritu ocueaj Teat Dios, tapiüng:

—Iwüniün xicueaj a Bernabé maquiüüb a Saulo marangüw xenajiüt leawa lanateots nüjchiw —aw.

<sup>3</sup> Quiaj wüx landoj aiündüw, landoj matüniw ocueaj Teat Dios, tayacüw owixaw wüx omalüw a Bernabé maquiüüb a Saulo. Condom tetepeayayej maquiüüpüw, quiaj tawüw quiaj.

*Bernabé y Saulo tandeacüw Mipoch Teat Dios tiül Chipre*

<sup>4</sup> Condom tambüw niüng Nangaj Espiritu ocueaj Teat Dios lamüüch nejiw mayajcüw netam mambüw. Quiaj tambüw andüyiw tiül cambaj Seleucia. Condom nawüw quiaj tajtepiw tiül nadam müx, tandüyiw wüx noic iüt tiül ndec nasoiç Chipre.

<sup>5</sup> Wüx tajtepiw wüx iüt tiül cambaj Salamina, quiaj tandeacüw Mipoch Teat Dios tiül meáwan sinagogas. At almaquiüüpüw a Juan mambeol nejiw.

<sup>6</sup> Wüx laümb majüyiw tiül aaga nine iüt tiül ndec, quiaj tatüchiw tiül cambaj Pafos. Taxomüw quiaj nop naxey nenüt Barjesús, nop judío nej. Aaga naxey quiaj nop nesüet, y apiüng nej nop nendeac andeac Teat Dios, pero aag ayaj ngo maleaing.

<sup>7</sup> Aaga naxey mbich meaw maquiüüb nop nenajiüt nenüt Sergio Paulo, nenajiüt nej tiül aaga iüt quiaj. Aaga nenajiüt quiaj, xeyay fis ajiür. Nej tüüch mamb majpajüw miün a Bernabé y Saulo, cos andiüm manguiay Mipoch Teat Dios.

<sup>8</sup> Pero aaga newüyay asüet aton nasoiç Elimas tiül ombeayiw Griegos; nej tandiüm mapal nejiw, cos ngo mandiüm majaw mayar Mipoch Teat Dios aaga nenajiüt quiaj.

<sup>9</sup> Quiaj a Saulo nasoiç Pablo aton, tayaag tiül omeaats nej a Nangaj Espiritu ocueaj Teat Dios, quiaj tajaw teombas aaga naxey quiaj.

<sup>10</sup> Tasaj:

—I!que minaj ic newaiich, ngang xeyay ngo majneaj, micual ic minatang nimeech, cos ijcüy mejaw monrang najneaj! ¿Neol tapots iwaiich nipilan nde mayariw Mipoch Teat Dios?

<sup>11</sup> Nganüy Teat Dios apmüüch ic memongoch xeyay ngo majneaj, apmersomb, ngome apmexom mejaw a nüt acas nüt —aj.

Quiaj pojniüt oniiüg aaga naxey quiaj, nómban ngo maxom majaw nicuajind. Ndoj tapots ajüyjü, amb ninguiün amb ninguiün mayamb jane manetet nej owib.

<sup>12</sup> Aaga naxey nenajiüt quiaj wüx tajaw aag ayaj, quiaj tayar Mipoch Teat Dios, mbayat manguiay leaw aquiajchiw wüx Teat Dios.

*Pablo maquiüüb Bernabé aliw Antioquia tiül Pisidia*

<sup>13</sup> Condom tawüw Pafos a Pablo maquiüüb leaw aqiüüb mamb, tambüw ambüw tiül müx, tandüyiw tiül cambaj Perge tiül Panflia. Condom wüx tapeayiw quiaj, quiaj tacueat nejiw a Juan, tandilil alinomb andüy Jerusalén.

<sup>14</sup> Condom nejiw tawüw Perge, tandüyiw tiül cambaj Antioquia tiül Pisidia. Wüx tapeayiw quiaj, tambüw tajmeliw tiül nangaj iüm wüx nüt axoodaran, chetemoj.

<sup>15</sup> Wüx landoj ateraw tiül Mipoch Teat Dios leaw tüünd a Moisés, at leaw tarangüw mondeac andeac Teat Dios, quiaj montangtang tiül a sinagoga, tüjchiw mamb masoiquiw a Pablo y a Bernabé sitiül ajiürüw noic poch mapiüngüw. Tasoiquiw:

—Teat monxey, sitiül almejiüran alngün poch mepiüangan manguiayiw nipilan, alndom mepiüangan —ajowiw.

<sup>16</sup> Quiaj witiüt a Pablo lembem, tarang owix nej ndijchiümójan. Condom tasaj nejiw:

—Teat monxey micual iüt Israel, at icona monyar andeac Teat Dios, inguiayiwün sanasaj icon:

<sup>17</sup> Aaga Teat Dios Midiosüw cambaj Israel, nej tarriüüd ajcüwa mixejchiüts monlüy tanomb. Condom tüüch nejiw mexeyayiw wüx tacüliw tiül Egipto, tiül miüt pälwüx nipilan. Ndoj tawün nejiw quiaj.

<sup>18</sup> Condom wüx tacüliw tiül wajchiüc ic miow (40) neat, taüc wüx meáwan leaw tarangüw.

<sup>19</sup> Wüx tajmeliw tiül iüt Canaán, nej tandrooch ombas ayaíw nadamdamb cambaj tiül aaga iüt quiaj, müüch mixejchiüts maneayiw aaga iüt quiaj.

<sup>20</sup> Condom tatüch apiquiw acoic miow ic miow gajpowüw (450) neat, meáwan tiül aaga neat quiaj, Teat Dios tayac jueces majawüw wüx asoetiw nipilan. Tiün mandondoch wüx tajlüy aaga Samuel, nop nendeac andeac Teat Dios.

<sup>21</sup> Condom tatüniw ocueaj Teat Dios mayac nop natang nenajiüt tiül nejiw, aaga nasoiç rey. Quiaj Teat Dios tayac a Saül, micual Cis, marang natang nenajiüt tiül

nejiw ic miow neat. Aaga naxey quiaj naw tiül acualaats Benjamín.

<sup>22</sup> Ndoj, wüx Teat Dios tawün a Saúl, tayac a David mingow. Cos Teat Dios lamapiüung aag ayaj tanomb wüx tapiüung: “Lanaxom a David micual Isaí. Aaga naxey quiaj xeyay apac ximeaats najaw, nej apmarang meáwan leaw xique sandiüm”, aw.

<sup>23</sup> Naw tiül micual nej aaga rey David quiaj, wüx lamong xeyay neat, quiaj tiün majlüy Teat Jesús. Teat Dios tayac nej mawün asoetiw cambaj Israel, atnej lamapiüung apmarang.

<sup>24</sup> Pero nganaw mapeay a Teat Jesús, quiaj aaga Juan neech yow nipilan tasaj a cambaj Israel leaam omeajtsüw wüx aaga xeyay ngo majneaj teamarangüw, macueatiw, cas tayarwi yow.

<sup>25</sup> Juan wüx laliüc ndom minajiüt nej, tasaj nipilan: “¿Jane xic ipiüangan? Ngome xique leawa temepiüangan quiaj. Aliüc miün nop, aag ayaj xeyay netam ajlüy, xique ngo nembeat nicuajind, ngondom natüch nasound apaj nej”, aj nejwiw.

<sup>26</sup> Nganüy xique sasaj icon menguiayiün Teat monxey, micual acualaats Abraham, at icona monyamb Teat Dios: Aaga poch nepiüung wüx nguineay Teat Dios alndom mawün asoet nipilan, icona netam menguiayiün, meyarüün.

<sup>27</sup> Cos ajcüwa micual müütaats moncüül tiül Jerusalén, at monajiüt tiül nejiw ngome tajawüw jane nej Teat Jesús. Cos ngo maxomüw omeajtsüw wüx Mipoch Teat Dios leaw tarangüw mondeac andeac Teat Dios, natoraw wüx nüt axoodaran. Áag nejwiw tayacüw asoet Teat Jesús mandeow. Quiaj tajlüy atnej landoj lajlüy tiül Mipoch Teat Dios.

<sup>28</sup> Masey ngo maxomüw wüx ombas Teat Jesús nicuajind nisoet para mandeow, nejwiw tasajüw a Pilato mapiüung mandeow.

<sup>29</sup> Nejwiw ngo leaam omeajtsüw, tarangüw meáwan leaw larangüch tiül Mipoch Teat Dios nguineay apmajlüy wüx ombas Teat Jesús. Wüx landeow, quiaj tajwan tiüt imiün wüx cruz. Condom tamiüraad.

<sup>30</sup> Pero naleaing Teat Dios tapacüüch nej alinomb.

<sup>31</sup> Ndoj tejüiquichay xeyay nüt majawüw nej ajcüw leawa taquiüjpüw nej naw tiül Galilea, andüy Jerusalén. Nganüy nejwiw tengual masajüw nipilan leaw tajawüw.

<sup>32</sup> Nganüy xicon a ton teanasajan icon wüx aaga najneajay majlüy, cos aag ayaj Teat Dios lamasaj mixejchiüts.

<sup>33</sup> Nganüy lajlüy atnej Teat Dios lamapiüung apmajlüy tiül micualüw nejwiw mixejchiüts; ajcüw ayaj icootsa. Teat Dios tapacüüch alinomb Teat Jesús atnej larangüch tiül amb ijquiw Salmo, cos

apiüung: “Ique Xecual ic, nganüy lanüüch ic wijquiamear”, aw.

<sup>34</sup> Teat Dios tapacüüch nej alinomb, ngo müüch nej majmboc, cos atquiaj lajlüy tiül Mipoch Teat Dios, niüung Teat Dios apiüung: “Xique naleaing sanajiür icon lasta, cos sanarang atnej tasajas a David”, aw.

<sup>35</sup> Áag Teat Dios tapiüung tiül alinoic Salmo, wüx David tarang wüx nawüig, tapiüung: “Nde meaach majmboc aaga nangaj micual”, aw.

<sup>36</sup> Cos naleaing David wüx landoj arang natang tiül nipilan atnej lamasaj nej Teat Dios, quiaj tandeow. Condom tamiüraad niüung tamiürajtüw montangtang tajlüyiw tanomb, micuerpo nej tajmboc.

<sup>37</sup> Nganüy micuerpo Teat Jesús ngo majmboc, cos Teat Dios tapacüüch nej alinomb.

<sup>38</sup> Teat monxey micual xeiüt, netam mejawan, nganüy tengual nasajan icon áagan wüx Teat Jesús alndom meriowan wüx isoetiün.

<sup>39</sup> Meáwan nisoet leaw aaga poch tiünd Moisés apiüung ngondom maw, aaga nisoet quiaj alndom maw ocueaj jane apmayar andeac Teat Jesús.

<sup>40</sup> Nganüy netam mejawan, nde memon-gochiün atnej lamapiüung tiül Mipoch Teat Dios leaw tarangüw mondeac andeac Teat Dios, apiüung:

<sup>41</sup> Icona mondam omeaats, ijawan wüx, cos apmbayameron apndromeron.

Cos xique aleaic sanarang wüx aliün mepacan.

Aag ayaj icona apmepiüangan ngo maleaing, masey aljane apmasaj icon, aw —aj nejwiw.

<sup>42</sup> Wüx tawüw imiünüw tiül a sinagoga ocueajiw judíos, quiaj tattüniw nej ocueajiw nipilan ngome judío, sitiül apmandüyiw quiaj alinomb wüx apmatüch alinoic nüt maxoodaran masajüw nejwiw alquiriw wüx aaga poch quiaj.

<sup>43</sup> Wüx landajrriüjow imiünüw tiül a sinagoga, quiaj tandüjpiw a Pablo y Bernabé xeyay nipilan judío, at nipilan ngome judío leaw lamayambüw Teat Dios. Condom Pablo y Bernabé tasajüw nejwiw mayacüw wüx omeajtsüw Mipoch Teat Dios y mimonajneaj nej.

<sup>44</sup> Wüx tatüch alinoic nüt axoodaran, tajlüy mümb mamb meáwan nipilan monaw tiül cambaj manguiyiw Mipoch Teat Dios.

<sup>45</sup> Pero wüx ajcüwa judíos tajawüw laxeyay nipilan, quiaj tajcüyiw, ngo majneaj majawüw. Xeyay ngo majneaj tandeacüw wüx leaw Pablo taquiaach, tapiüngüw aag ayaj ngo maleaing.

<sup>46</sup> Quiaj tandeacüw a Pablo y Bernabé, ngo mimboloj, tasajüw nejwiw:

—Naleaing icona ombas nasajan icon wüx Mipoch Teat Dios cos judíos icon. Pero icona ngo meyariün, pares ngome apmeajndiün mepacan meáwan nüt niüng ajlüy Teat Dios. Nganüy sanamban nasajan nipilan ngome judío.

<sup>47</sup> Cos atquiaj lamasaj xicon Teat Dios narangan, atnej lamapiüing tiül Mipoch nej: Lanayac ic mejlüy atnej ran ocueajiw palpáwüx nipilan ngome judío, meamb mesajüw meáwan nipilan wüx iüt nguineay alndom maw asoetiw nejiw —aj nejiw.

<sup>48</sup> Ajcüwa nipilan ngome judíos, wüx tanguaiyiw aag ayaj, xeyay tapac omeajtsüw, najneajay majawüw Mipoch Teat Dios. Tüjchiw omeajtsüw Teat Dios meáwan leaw landoj lamapaj nejiw Teat Dios majlüyiw najneajay, mapacüw meáwan nüt tiül cielo.

<sup>49</sup> Quiaj tanguaiyaran Mipoch Teat Dios meáwan tiül aaga iüt quiaj.

<sup>50</sup> Pero ajcüwa judíos leawa ngo mayariw mipoch Teat Dios tasajüw montangtang ombas montaj leaw andüjpiw Mipoch Teat Dios, at montangtang ombas monxey tiül aaga cambaj quiaj, majcüyiw majawüw a Pablo y Bernabé. Quiaj witiüt noic nadam moncüy wüx ombasüw Pablo y Bernabé, tawüniw nejiw nómban tiül aaga iüt quiaj.

<sup>51</sup> Nejiw quiaj tatajtüw minajndot oleajiw nejiw, cas tambüw tandüyiw tiül cambaj Iconio.

<sup>52</sup> Meáwan leaw lamayariw andeac Teat Jesús xeyay tapac omeajtsüw, tajlüy wüx ombasüw nejiw Nangaj Espíritu ocueaj Teat Dios, tambeol nejiw.

## 14

### *Pablo y Bernabé aliw tiül Iconio*

<sup>1</sup> Pablo y Bernabé tapeayiw tiül cambaj Iconio; tambüw tiül a sinagoga ocueajiw nipilan judío. Wüx tandecäw wüx Teat Jesús, tayariw aag ayaj xeyay nipilan judío, at xeyay nipilan griego aton.

<sup>2</sup> Pero ajcüwa judíos leaw ngo mayariw aaga poch quiaj, tambüw tapots mawajchaw ajcüw páwüx nipilan, mapiüngüw nipilan monyar andeac Teat Jesús ngo majneaj teamarangüw.

<sup>3</sup> Pares tacüliw quiaj a Pablo y Bernabé xeyay nüt. Nejiw tandecäw wüx Teat Jesús ngo mimboloj cos ayacüw omeajtsüw wüx nej. Aton nej tüüch nejiw ndoj ombasüw marangüw cuajantanej ateócan leawa ngome aag ajaraw. Atquiaj tarang majüiquich naleaing meáwan leaw andeacüw quiaj.

<sup>4</sup> Nipilan tiül aaga cambaj quiaj, ngo majlüyiw nóiquian; altiül tambeolüw ajcüwa judíos, altiül tambeolüw apóstoles.

<sup>5</sup> Condom ajcüwa judíos maquiüjpüw nipilan ngome judíos, witiütöj nóiquian maquiüjpüw monajiüt majcüyiw majawüw apóstoles, andiümüw maloxiw naag piedra, mambiyaw.

<sup>6</sup> Nejiw a Pablo y Bernabé, wüx tanguaiyiw aag ayaj, quiaj tawüniw oleajiw, tandüyiw tiül ajcüwa cambaj Lистра y Derbe tiül iüt Licaonia, at tambüw tiül meáwan nine cambaj quiajan.

<sup>7</sup> Meáwan tiül niüng tambüw tasajüw nipilan aaga najneajay poch wüx Teat Jesús.

### *Taloxiw a Pablo tiül Lистра*

<sup>8</sup> Tiül cambaj Lистра, alquiaj nop naxey chetéjan ngondom majüy, necoex nde wi-quaiaw, ngome aag ajüy.

<sup>9</sup> Aaga naxey quiaj teamanguaiy meáwan leaw teamandeac a Pablo. Wüx Pablo tajaw nej majneaj, quiaj tajaw aaga naxey quiaj ajüic ayaag tiül omeaats naleaing Teat Dios alndom mataag nej majneaj.

<sup>10</sup> Quiaj tendecac a Pablo, tasaj nej napac: —Witiür lembem —aj.

Aaga naxey quiaj, ajchic lembem, quiaj tajüy.

<sup>11</sup> Nipilan wüx tajawüw nguineay lamarang a Pablo, quiaj tepajüw napac, tandecäw wüx ombeayiw nejiw, tapiüngüw:

—jLapeayiw a dios imiünüw cawüx, at nejiw nipilan! —awüw.

<sup>12</sup> Condom tüjchiw manüt a Bernabé, Júpiter, atnej minüt nop midiosüw nejiw, nganüy a Pablo tüjchiw manüt Mercurio, atnej minüt alinop midiosüw nejiw, cos Pablo nendeac.

<sup>13</sup> Condom nop miteaats ocueaj aaga dios Júpiter, taquiiüb mamb acas boy, aton ajoy mbaj nembet mandig a boy, laámb andüy mbeay cambaj niüng ajlüy ombiün aaga dios Júpiter. Xeyay nipilan taquiüjpüw nej mamb; apmambiyaw a boy mayacüw ichechiw nejiw.

<sup>14</sup> Ajcüw apóstoles Bernabé y Pablo wüx tanguaiyiw aag ayaj, quiaj tachiütüw apixaw nejiw, tajmeliw tiül a xeyay nipilan mapalüw teombas, tandecäw napac, tapiüngüw:

<sup>15</sup> —jMonxey! ¿Neol tepiüngan merangan aag ayaja? Xicon a aton nipilan xicon atnej ijlüyüin. Xicon xiünan nasajan icon mecueatiün iyamban cuajantanej narangüch dios, mendüjpiün áagan Teat Dios almapac, aag nerang cielo, nerang iüt, nerang ndec, nerang meáwan leaw almajlüy.

<sup>16</sup> Naleaing tanomb nej tüüch majlüyiw meáwan nipilan, marangüw leaw andiümüw.

<sup>17</sup> Pero naleaing Teat Dios ngo macueat nejiw nómban, cos tenguiäl majüiquich jane nej wüx arang meáwan najneaj; nej tüüch

majoet, üüch mayac aóng meáwan cuajan-tanej napiürüch. Aton üüch icoots nüeteran, üüch mapac omeajtsaats —awüw.

<sup>18</sup> Masey atquiaj tapiüngüw a Pablo y Bernabé, pero xeyay taél ocueajiw para mapalüw teombas a nipilan, ngana mambiyaw a nimal mayacüw ichechiw, müjndiw.

<sup>19</sup> Condom tapeayiw quiaj acas judíos monaw Antioquia at monaw Iconio. Ajcüw ayaj taquiajchiw ombeay nipilan majcüyiw majawüw a Pablo, mambiyaw. Quiaj tajcüyiw a nipilan, tapots maloxiw a Pablo naag piedra. Condom tanototoj tüüt, taquiüjpüw mamb maloxiw mbeay cambaj, apiüngüw landeow nómban.

<sup>20</sup> Ndoj, wüx xenenguetoj monyar andeac Teat Dios niüng ajlüy nej, quiaj tapac witiüt. Condom tandüyüw tüül cambaj alinomb maquiüüb nejiw. Wüx rat tüüt amb alinoic nüt, quiaj taw quiaj maquiüüb Bernabé, tandüyiw Derbe.

<sup>21</sup> Wüx landoj mandeacüw aaga najneajay poch tüül cambaj Derbe, y wüx lajlüy xeyay monyar andeac Teat Jesús, quiaj tandilileaw alinomb andüyiw Lистра. Condom tandüyiw Iconio, naw quiaj tandüyiw Antioquia.

<sup>22</sup> Meáwan leaw niüng tamongoj, tujchiw mapac omeajtsüw leaw monyar andeac Teat Jesús, tasajüw nde machiweaw omeajtsüw wüx Teat Dios, tasajüw:

—Netam mamongochiüts xeyay ngo ma-neaj, cos atquiaj alndom majmeliüts tüül micambaj Teat Dios —ajüw.

<sup>23</sup> At aton tayacüw acas montangtang tüül monyar andeac Teat Jesús leaw niüng tamongoj. Aag ayaj wüx ndoj aiündüw matüniw ocueaj Teat Dios, quiaj lamayacüw teowix Teat Dios ajcüwa nipilan lamayariw nej andeac, mambeol nejiw.

#### *Tandilileaw andüyiw Antioquia tüül Siria*

<sup>24</sup> Condom nawüw Antioquia tambüw tamongoj tüül Pisidia, quiaj tatüchiw Panfilia.

<sup>25</sup> Ndoj mandeacüw Mipoch Teat Dios tüül cambaj Perge, quiaj tambüw andüyiw tüül cambaj Atalia.

<sup>26</sup> Condom nawüw quiaj, tajtepiw tüül müx, tandüyiw Antioquia tüül Siria niüng tayacüchiw teowix Teat Dios, mambeol nejiw wüx aaga najiüt leaw landoj marangüw quiaj.

<sup>27</sup> Wüx tapeayiw Antioquia, taxejnenguw meáwan monyar andeac Teat Dios. Condom tapots masajüw nguineay tambeol nejiw Teat Dios, nguineay lamayariw Mipoch Teat Dios xeyay nipilan leaw ngome israel.

<sup>28</sup> Ndoj Pablo y Bernabé tacüliw quiaj xeyay nüt maquiüjpüw monyar andeac Teat Dios.

## 15

### *Tarangüw moncanchiün tüül Jerusalén*

<sup>1</sup> Condom tapeayiw tüül Antioquia acas monquiaach imiünüw tüül Judea. Ajcüw ayaj taquiajchiw monyar andeac Teat Cristo monlüy quiaj; tasajüw sitiül ngo majlüyiw circuncidado atnej apiüng Moisés marangüch, Teat Dios ngome apmawün asoetiw nejiw.

<sup>2</sup> Quiaj tajlüy noic nadam mondeacndeac, cos Pablo y Bernabé ngo majneaj majawüw aag ayaj. Quiaj tasoiquia a Pablo y Bernabé mambüw Jerusalén maquiüjpüw alacas monaw quiaj, majawüw ajcüw apóstoles at montangtang monajiüt tüül mondüüb Teat Cristo, majawüw wüx aaga mondeac quiaj.

<sup>3</sup> Condom ajcüw minipilan Teat Jesús tambeolüw nejiw mambüw. Quiaj tambüw. Wüx tamongoj tüül Fenicia at tüül Samaria tandeacüw masajüw minipilan Teat Jesús nguineay lamayariw Mipoch Teat Dios xeyay palpälwüx nipilan ngome judíos. Wüx tanguaiyiw aag ayaj, xeyay tapac omeajtsüw.

<sup>4</sup> Wüx tapeayiw Jerusalén, apac omeajtsüw majawüw nejiw meáwan minipilan Teat Jesús, átan apóstoles, átan montangtang. Quiaj nejiw a Pablo y Bernabé tapots masajüw nejiw nguineay tambeol nejiw Teat Dios marangüw minajiüt nej.

<sup>5</sup> Condom acas monxey monaw tüül fariseos, leaw lamayariw andeac Teat Jesús, witiütoj tapiüngüw:

—Netam matajcüchiw circuncidar ajcüwa nipilan ngome judíos, aton masoiquiw marangüw meáwan atnej apiüng tüül aaga poch tüünd Moisés —awüw.

<sup>6</sup> Quiaj xenenguetoj ajcüw apóstoles at montangtang majawüw nguineay apmajlüy wüx aaga mondeac quiaj.

<sup>7</sup> Wüx laxeyay mandeacüw wüx aag ayaj, quiaj witiüt a Pedro masaj nejiw:

—Xecojow xechijquiaw, lamajiür nüt icona tejawan nguineay tarriiüd xic Teat Dios namb nasajüw aaga najneajay poch nguineay Teat Cristo awün asoeteran, manguaiyiw ajcüwa nipilan ngome judíos y mayariw aag ayaj aton.

<sup>8</sup> Teat Dios nejaw tüül omeaatsaran, tajüquich majaraw naleaig lamayar nejiw cos tiün wüx nejiw Nangaj Espiritu ocueaj Teat Dios atnej tiün wüx icoots.

<sup>9</sup> Teat Dios ngo marang pälwüx tüül icootsa, pälwüx tüül nejiw, cos nej tawün asoetiw nejiw aton, wüx tayacüw omeajtsüw wüx nej.

<sup>10</sup> Jow nganüy, ¿neol tendiüman meajchiün majcüy Teat Dios? ¿Neol icona tendiüman meajchiün marangüw monyar andeac Teat Jesús leaw mixejchiüts átan icootsa ngome tarangaats palan atnej netama?

<sup>11</sup> Masey nganüy icootsa ajawaats Teat Jesús nde ajneaj omeaats lamawün asoetiüts, ngome cos aleaic arangaats; atquiaj arang wüx nejiw aton —aj nejiw.

<sup>12</sup> Quiaj ndijchiütoj meáwan, condom tanguiayiw meáwan tandeacüw Bernabé y Pablo cos tasajüw nguineay tambeol nejiw Teat Dios marangüw tiül palpáwüx nipilan cuajantanej atécán leaw ngome aag ajaraw.

<sup>13</sup> Wüx landoj andeacüw a Pablo maquiüüb a Bernabé, quiaj tapiünga a Jacobo: —Xecojow xechijquiaw, inguiayüün sanasaj icon:

<sup>14</sup> Teat Simón Pedro landoj mandeac nguineay tajlüy wüx Teat Dios tamelich mambeol ajcüwa nipilan ngome judíos mayariw nej andeac marangüw minipilan nej aton.

<sup>15</sup> Aag ayaj lamapiüng tiül Mipoch Teat Dios leaw tarangüw mondeac andeac nej niüng apiüng:

<sup>16</sup> Ndoj aag ayaj sanandilil alinomb, sanawitich alinomb aniüng David cos lamjüic;

sanataag majneaj leaw ndrot ombas, sanalomboch alinomb.

<sup>17</sup> Atquiaj sanarang para mayariw andeac Teat Naxey meáwan nipilan leaw alüünan.

Aton meáwan nipilan monaw palpáwüx iüt apmarangüw xenipilan, aw.

<sup>18</sup> Atquiaj tapiüng Teat Dios, cos nej lamüüch majaraw wüx aag ayaj nde tanomb.

<sup>19</sup> 'Nganüy xique sapiüng nde maxolaats ajcüwa nipilan ngome judíos sitiül lamacueatiw arangüw ngo majneaj y lamandüjpüw Teat Dios.

<sup>20</sup> Úpan marangaats noic nawiig masajtsüw macueatiw üetiw cuajantanej najmel teombas dioses, aton nde majlüyiw maquiüjpüw pálwüx naxey pálwüx najtaj, aton nde matsambüw mionij nimal napatsüch onic andeow, nde matsambüw quiej.

<sup>21</sup> Cos tiül ngünantanej cambaj ajlüy jane mequiaach wüx aaga poch tüünd Moisés. Nde tanomb ajlüyay ateraw aag ayaj tiül meáwan sinagogas wüx nüt axoodaran —aw.

<sup>22</sup> Condom ajcüwa apóstoles at montangtang at meáwan monyar andeac Teat Dios, wüx ndot manguiayiw aag ayaj, najneájan majawüw. Condom quiaj tarriüjtüw acas monxey tiül nejiw müjchiw mamb andüy Antioquia maquiüjpüw a Pablo y Bernabé. Quiaj tayacüw a Judas nasoic Barsabás, alinop Silas. Ajcüwa monxey quiaj, natang nejiw tiül minipilan Teat Jesús.

<sup>23</sup> Quiaj tarangüw noic nawiig majoyiw mamb ajcüwa monxey quiaj. Tiül aaga nawiig quiaj apiüng:

“Xicona micojon michijquian, xicona apóstoles y montangtang tiül monyar andeac Teat Jesucristo, satepeayüün icon leaw ngome judíos moncül tiül Antioquia, tiül Siria, at tiül Cilicia. Tambtámban ijlüyüün.

<sup>24</sup> Xicona lananguiyüün nguineay acas monxey monáwan tiül xicona tambüw masajüw icon merangan leaw ngo metam merangan. Cos sanguiayüün tasajüw icon netam mejlüyüün circuncidado, y aton merangan meáwan atnej apiüng tiül aaga poch tüünd Moisés. Ajcüwa monxey quiaj, xicona ngome sasajan mambüw.

<sup>25</sup> Wüx canchiütason tandeacasan nóiquian, quiaj tapiüngasan najneaj narriüjtan acas monxey nüjchiün mambüw niüng ijlüyüün maquiüjpüw teat Bernabé y teat Pablo.

<sup>26</sup> Nejiw xeyay lamamongochiw cos aag andeacüw wüx Miteatiüts Jesucristo.

<sup>27</sup> Aag nganüy süjchiün mambüw a Judas y Silas mambüw maquiüjpüw. Nejiw aton apmasajüw icon wüx meáwan aag ayaj.

<sup>28</sup> Cos Nangaj Espíritu ocueaj Teat Dios, átan xicona aton, najneaj najawan sitiül ngo nüjchiün icon merangan leaw naél. Ágan acas poch cam mbich netam merangan:

<sup>29</sup> Nde meatiün alngün nüeteran leawa landoj ajmel teombas dioses marang nichech. Nde metsamban quiej, nde metsamban mionij nimal napatsüch onic andeow, aton nde mejlüyüün mequiüjpan pálwüx naxey pálwüx najtaj. Sitiül apmecueatiün meáwan aag ayaj, najneajay irangan. Ágan sasajan icon, tamtámban ajlüyüüts”, aw.

<sup>30</sup> Condom quiaj tambüw, ajcüwa nüjndiw mambüw quiaj andüyiw Antioquia. Wüx tapeayiw quiaj, tapajüw canchiümoj meáwan monyar andeac Teat Cristo müjchiw a nawiig.

<sup>31</sup> Meáwan monyar andeac Teat Cristo wüx ndot manguiayiw ateraw aaga nawiig quiaj, xeyay tapac omeajtsüw manguiayiw nguineay tasoiquiw tiül a nawiig.

<sup>32</sup> Condom Judas maquiüüb a Silas aton, cos nejiw mondeac andeac Teat Dios nejüw áag tandeacüw masajüw monyar andeac Teat Cristo, tüjchiw mapac omeajtsüw xeyay, tasajüw nde mimboloj.

<sup>33</sup> Condom wüx lamacülüw quiaj acas nüt, quiaj tandillleaw alinomb andüyiw niüng ajngotoj, tayacüchiw teowix Teat Dios mambeol nejiw.

<sup>34</sup> Naleaing Silas tapiüng apmacül quiaj, ngo majtsor.

<sup>35</sup> Pablo y Bernabé aton tacülüwan tiül Antioquia. Tanaámb aquiajchiw aaga poch wüx Teat Cristo. At tambeolüw nejiw xeyay monaw quiaj, cos taquiajchiw aton.



*Teat Pablo tamb amb ijbüw oleaj mandeac wüx Teat Dios tiül palpáwüx cambaj*

<sup>36</sup> Wüx lamacüliw quiaj acas nüt, quiaj a Pablo tasaj a Bernabé:

—Tabar andililear majawar monyar andeac Teat Jesús tiül meáwan cambaj niüng lamasajarüw wüx Mipoch Teat Dios, majawar cuane tarangüw —aj.

<sup>37</sup> Quiaj a Bernabé tapiüng maquiüjpüw mamb alinomb a Juan, nasoi Marcos.

<sup>38</sup> Naleaing Pablo ngo majneaj majaw maquiüjpüw mamb alinomb, cos landoj macueat nejiw tiül Panfilia nomb, ngo mamb maquiüüb nejiw wüx aaga najiüt tarangüw.

<sup>39</sup> Ndoj ajcan ngo meyarayej andeacüw, quiaj tecueatayej. Bernabé taquiüüb a Marcos, tandüyiw Chipre ambüw tiül müx.

<sup>40</sup> Condom Pablo tasaj a Silas maquiüüb mamb. Wüx tatüch a nüt mambüw, ajcüwa monyar andeac Teat Cristo tayacüw nejiw teowix Teat Dios mambeol nejiw. Ndoj quiaj tambüw.

<sup>41</sup> Condom nejiw tambüw tamongoj tiül Siria at tiül Cilicia, tasajüw monyar andeac Teat Cristo monlüy quiaj, nde macueatiw ayambüw Teat Dios.

## 16

*Pablo y Silas taquiüjpüw a Timoteo*

<sup>1</sup> Condom tambüw tandüyiw Derbe, naw quiaj tandüyiw Listra. Quiaj taxomüw nop neyar andeac Teat Jesús nenüt Timoteo, micual nop najtaj judia nendüüb Teat Jesús, pero miteat nej a Timoteo griego nej.

<sup>2</sup> Meáwan minipilan Teat Jesús monaw Listra at monaw Iconio apiüngüw aaga Timoteo quiaj xeyay najneaj arang.

<sup>3</sup> Quiaj a Pablo tandiüm maquiüüb mamb a Timoteo mambeol nej. Ndoj taquiüüb mataag circuncidar ngana müjchiw majcüyiw ajcüwa judios monlüy tiül aaga iüt niüng apmambüw, cos meáwan ajawüw aaga Timoteo quiaj, griego miteat nej.

<sup>4</sup> Condom meáwan cambaj niüng tamongoj, tujchiw hermanos majawüw aaga nawiiig leaw tarangüw apóstoles y montangtang minipilan Teat Jesús monlüy tiül Jerusalén.

<sup>5</sup> Atquiaj meáwan noic noic ajlüy minipilan Teat Cristo leaw niüng tamongoj tujndiw mapac omeajtsüw, y nütnütan tengual axeyayiw aton.

*Pablo tüünd majaw nop naxey naw Macedonia atnej aüm*

<sup>6</sup> Condom tambüw tamongoj tüütiül cambaj tiül Frigia at tüütiül cambaj tiül Galacia. Tatüchiw tiül Asia, pero tamongójan, ngo mandeacüw quiaj aaga najneajay poch quiaj; cos Nangaj Espiritu ocueaj Teat Dios ngo müüch nejiw mandeacüw.

<sup>7</sup> Wüx tapeayiw tiül niüng angochay iüt ocueajiw monaw Misia, tapiüngüw apmambüw andüyiw Bitinia, pero naleaing aaga Nangaj Espiritu ngo müüch nejiw mambüw quiaj.

<sup>8</sup> Quiaj tamongójan ambüw tiül Misia, tandüyiw cambaj Troas mbeay ndec.

<sup>9</sup> Noic ongwiiüts, Pablo aleaic tajaw atnej aüm, tajaw nop naxey naw Macedonia alembem niüng ajlüy nej. Aaga naxey quiaj, teamatün nej ocueaj, tasaj: “Imong indüy Macedonia membeol xicon”, aj nej.

<sup>10</sup> Wüx landoj majaw aag ayaj a Pablo, quiaj najénan tambasan sandüyiün Macedonia, cos sajawan naleaing Teat Dios nepaj xicon namban nasajanüw wüx aaga najneajay poch wüx Teat Jesucristo.

*Pablo y Silas aliw tiül Filipos*

<sup>11</sup> Condom tawasan Troas samban tiül nadam müx, saleaingüünan sandüyiün wüx noic iüt tiül ndec nenüt Samotracia. Amb alinoic nüt, quiaj tambasan sandüyiün tiül cambaj Neápolis.

<sup>12</sup> Condom nawasan quiaj, tandüyasan Filipos. Tiül aaga cambaj quiaj acüliw xeyay nipilan Romanos; aton aag ayaj más xeyay nembeat cambaj tiül Macedonia. Tacülasan quiaj acas nüt.

<sup>13</sup> Wüx noic nüt axoodaran tawasan tiül cambaj, tambasan sandüyiün mbeay lam niüng mbójan ambüw matajcüw orar. Quiaj chetetason. Condom tasajasanüw wüx Mipoch Teat Dios meáwan montaj leaw lapeayiw quiaj.

<sup>14</sup> Alquiaj nop najtaj nenüt Lidia, naw tiül cambaj Tiatura, nenüüb najneaj nacants jael. Aaga jael quiaj xeyay nembeat. Nej xeyay ayamb Teat Dios, teamanguiy meáwan cuane teanderac. Cos Teat Dios tambeol nej mayac wüx omeaats manguiay y mayar leaw teamandec a Pablo.

<sup>15</sup> Wüx landoj ayar yow maquiüüb micual nej, quiaj tasaj xicon namban aniüng nej naxojtan quiaj, tapiüng:

—Sitiül icona ipiüngan naleaing xique sayar andeac Teat Dios, ngranüy tabaats saniüng mexojtan —aj xicon.

Tatün xicon namban, quiaj tambasan.

<sup>16</sup> Condom alinoic nüt wüx tambasan sandüyiün niüng atajcüch orar, tangochasan nop nüx nesüet, cos alwüx ombas nej nimeech. Aaga nüx quiaj almajiür moneay nej, axomüw wüx ombas nej xeyay tomiün wüx aaga asüet quiaj.

<sup>17</sup> Aaga nüx quiaj tapots mandüüb xicon, teandec napac manguiay nipilan, apiüng:

—Ajcüwa monxey quiaj, monrang minajiüt Teat Dios najlüy tiül cielo. Nejiw teamasajüw icon nguineay alndom maw isoetiün —aw.

<sup>18</sup> Palüy atquiaj tarang xeyay nüt. Ndoj Teat Pablo lapaxiow manguiay, quiaj ndiliteay majaw. Condom tasaj aaga nimeech najlüy wüx ombas a nük:

—Sasaj ic nguiay wüx minüt Teat Jesucristo, iriow wüx ombas aaga nük quiaj —aj.

Quiaj taw aaga nimeech, tacueat nej najénan.

<sup>19</sup> Ajcüwa moneay nej, wüx tajawüw langome apmaxomüw tomiün wüx ombas aaga nük quiaj, quiaj tasapüw a Pablo maquiiüb a Silas. Condom taquiiüjpüw mamb andüy awan niüng ajlüyiw monajiüt.

<sup>20</sup> Wüx tapeayiw niüng ajlüy monajiüt, quiaj tapiüngüw:

—Ajcüwa monxey cam judíos nejiw, nganüy xeyay moncüy teamayacüw tiül micambajaats.

<sup>21</sup> Nejiw tengual maquiajchiw nipilan wüx midiosüw nejiw leaw icootsa ngondom mayariiüts marangaats, cos icootsa romanos icoots —awüw.

<sup>22</sup> Quiaj a cambaj tajcüyiw majawüw a Pablo y Silas wüx tanguaiyiw aag ayaj. Condom monajiüt tapiüngüw masojndich tiül apixaw; ndoj tapots awüjchiw.

<sup>23</sup> Wüx landoj mawüjchiw xeyay, quiaj tayacüw tiül manchiüc. Condom tasajüw aaga nejiür manchiüc majiür nejiw majej.

<sup>24</sup> Aaga naxey quiaj, wüx ndoj manguiay nguineay netam marang, quiaj tayac nejiw tiül manchiüc, tiül ümb wüx palaw teomeaats iüm. Condom tapünaran oleajiw nejiw tiül xiül.

<sup>25</sup> Lapeay pinawan ongwiiüts, Pablo y Silas tengual atajcüw orar matüniw ocueaj Teat Dios, y tengual atajcüw cantar himnos müjchiw Teat Dios. Meáwan leaw aliw tiül manchiüc tengual manguiayiw.

<sup>26</sup> Condom, quiaj tajlang noic nadam ateam, nómban alangüch oleaj a manchiüc. Quiaj lejquiat meáwan apal ombeay manchiüc. Aton sojndiüt meáwan galen netsajcüy monlüy tiül manchiüc.

<sup>27</sup> Camüm mapac a nejiür manchiüc majaw laímb lejquiam meáwan apal manchiüc, quiaj tasoond micochil nej membiyay nejáyan quiaj. Cos apiüng a nej laímb mecuiürüw meáwan monlüy tiül manchiüc.

<sup>28</sup> Quiaj a Pablo tendec napac, tapiüng: —Nde mermbiyay, jogüy meáwan xicon saliün ningüy —aw.

<sup>29</sup> Quiaj tatün ran aaga naxey quiaj. Condom tajmel tiül manchiüc acuiür ancambeapmbeapeay. Quiaj taquieel micos nej teombasüw a Pablo y Silas.

<sup>30</sup> Condom quiaj tawün nejiw, tatün manguiay nejiw:

—Teat monxey ¿cuane netam narang para naw wüx sasoete? —aj nejiw.

<sup>31</sup> Nejiw quiaj tasajüw nej:

—Iyar andeac Miteatiüts Jesucristo, quiaj apmeriow wüx isoet, at meáwan leaw monlüy iniüng —ajüw nej.

<sup>32</sup> Condom tasajüw nej wüx Mipoch Teat Dios, at meáwan monlüy aniüng nej.

<sup>33</sup> Tiülan aaga ongwiiüts quiaj, aaga naxey quiaj tajants minecoy ombasüw nejiw. Ndoj tayar yow maquiiüb meáwan monlüy aniüng nej.

<sup>34</sup> Condom tamelich nejiw tiül iüm, tayac nüeteran metiw. Xeyay tapac omeaats aaga naxey quiaj maquiiüb meáwan monlüy aniüng nej, cos lamayariw Mipoch Teat Dios.

<sup>35</sup> Ajcüwa monajiüt wüx larraw tiüt, quiaj tujchiw mamb mongot masajüw a nejiür manchiüc matsambiich a Pablo y Silas.

<sup>36</sup> Quiaj aaga nejiür manchiüc tasaj a Pablo:

—Monajiüt lamüjchiw miün nasoiic tatsambiich icon. Nganüy alndom meriowan, quiiüran ngo majlüy nicuajind naél —aj.

<sup>37</sup> Quiaj a Pablo tasaj a mongot:

—Xicona nipilan romano xicon, nejiw tawüjchiw xicon majawüw meáwan nipi-lan. Taton ngome tajawüw wüx sasoetiün, ndoj tayacüw xicon tiül manchiüc. ¿Neol nganüy tapiüngüw mawüniw xicon axo-tayéjan? ¡Ngwüy ngo mat! Ich miünüw nejeje mawüniw xicon —aj nejiw.

<sup>38</sup> Quiaj tambüw a mongot müjchiw manguiay monajiüt aaga poch quiaj. Ajcüwa monajiüt xeyay mbayatoj wüx tanguaiyiw aaga Pablo y Silas romanos nejiw.

<sup>39</sup> Quiaj tambüw matüniw monajneaj teombasüw a Pablo y Silas; tawüniw tiül manchiüc, pero tatüniw ocueajiw mawüw tiül aaga cambaj quiaj.

<sup>40</sup> Wüx tawüw tiül manchiüc, tandüyiw aniüng Lidia. Condom wüx landoj andeacüw maquiiüjpüw minipilan Teat Cristo monlüy quiaj, masajüw tanaámb mapac omeajtsüw mayambüw Teat Dios, quiaj tambüw.

## 17

### *Witiüt noic moncüy tiül Tesalónica*

<sup>1</sup> Pablo maquiiüb a Silas wüx tambüw, tamongoj ambüw tiül cambaj Anfipolis, ambüw tiül cambaj Apolonia, ndoj tatüchiw Tesalónica. Alquiaj nop sinagoga ocueaj nipilan judío.

<sup>2</sup> Pablo tamb tiül aaga sinagoga atnej mbójan marang nguiajantanej niüng amb. Nej tamb tiül aaga nangaj iüm miarobjmbüw nüt axoodaran, tandec maquiiüjpüw nipi-lan.

<sup>3</sup> Tasaj nejiw majawüw leaw apiüng tiül Mipoch Teat Dios, niüng apiüng aaga Cristo

netam mamongoch xeyay ngo majneaj, netam mandeow. Condom netam mapac alinomb. Aton tasaj nejiw:

—Aaga Teat Jesús teanasaj icon wüx quiaj, aag ayaj a Cristo temecülüün —aj nejiw.

<sup>4</sup> Altiül nejiw tayariw, tũjchiw omeajtsüw Teat Dios; condom taquiüjpüw a Pablo y Silas. Aton xeyay nipilan griego monyamb Teat Dios tayariw mipoch Teat Jesús aton, at xeyay montangtang ombas montaj monaw quiaj.

<sup>5</sup> Pero ajcüwa judíos leaw ngo mayariw andeac Teat Jesús, xeyay ngo majneaj majawüw aag ayaj. Quiaj tayambüw acas monjüyjüy nipilan leaw ngo majiür cuane marang, mambeolüw nejiw. Condom tambüw masajüw nipilan tiül a cambaj, mawitichaw noic nadam moncüy. Condom tajmeliw aniüng Jasón mayambüw a Pablo y Silas mawüniw mayacüw teowix cambaj.

<sup>6</sup> Pero ngo maxomüw a Pablo y Silas, quiaj tasapüw a Jasón, at alacas monyar andeac Teat Jesús, tanototoj mamb andüy teombasüw monajiüt tiül aaga cambaj quiaj. Wüx tapeayiw quiaj, tepajüw napac, tapiüngüw:

—Ajcüwa monxey tengual awitichaw moncüy tiül meáwan cambaj, nganüy lamatüchiw ningüy tiül micambajaats.

<sup>7</sup> Aaga Jasón cam lamayac aniüng nej ajcüwa monxey quiaj. Ajcüwa nipilan quiaj, arangüw leaw ngo mandüüm a César minatang nenajiüt ocueajiüts. Cos apiüngüw almajlüy alinop natang nenajiüt, aag ayaj aaga Jesús —awüw.

<sup>8</sup> Xeyay nipilan at monajiüt wüx tanguiyiw aag ayaj, quiaj tajcüyiw xeyay.

<sup>9</sup> Quiaj a Jasón at alacas monyar andeac Teat Dios leaw almaquiüüb, wüx landoj mayacüw mipochiw nejiw mapiüngüw Pablo apmaw quiaj, langome apmüüch majcüy nipilan, quiaj tsajmbiütoj.

#### *Pablo y Silas aliw tiül Berea*

<sup>10</sup> Condom meáwan monyar andeac Teat Cristo najénan tũjchiw mamb a Pablo maquiüüb a Silas andüyiw tiül cambaj Berea ores ongwüüts. Nejiw wüx tapeayiw Berea, tambüw tiül a sinagoga ocueajiw nipilan judío.

<sup>11</sup> Ajcüwa judíos monlüy quiaj, alwüx ajneaj omeajtsüw ngo mat nejiw monlüy Tesalónica, cos ayacüw wüx omeajtsüw manguiyiw Mipoch Teat Dios. Meáwan nüt tateowüw Mipoch Teat Dios majawüw sitiül naleaing leaw apiüngüw a Pablo y a Silas.

<sup>12</sup> Atquiaj xeyayiw tayariw Mipoch Teat Dios, at xeyay nipilan griego tayariw Mipoch Teat Dios aton; átan natangtang ombas montaj tiül cambaj, átan monxey.

<sup>13</sup> Wüx ajcüwa judíos monlüy Tesalónica, tanguiyiw nguineay a Pablo lamayac

Mipoch Teat Dios tiül Berea aton, quiaj tambüw matüchiw quiaj. Condom tapots maquiajchiw ombeay nipilan majcüyiw majawüw a Pablo.

<sup>14</sup> Quiaj ajcüwa monyar andeac Teat Jesús najénan tũjchiw mamb a Pablo andüy mbeay ndec. Nganüy a Silas maquiüüb a Timoteo tacülüwan Berea.

<sup>15</sup> Ajcüwa monquiüüb mamb Pablo, taquiüjpüw mamb andüy tiül cambaj Atenas. Condom wüx tandilileaw, tasaj nejiw a Pablo masajüw a Silas y Timoteo, mambüw najénan majawüw nej quiaj.

#### *Pablo altiül Atenas*

<sup>16</sup> Pablo altiül cambaj Atenas tealeámban macül a Silas y Timoteo, pero almajaw xeyay narangüch dios ajlüy tiül aaga cambaj quiaj, xeyay ngo majneaj mayaag.

<sup>17</sup> Nej tamb tiül a sinagoga, tandeac masaj nipilan judío at pálwüx nipilan monyamb Teat Dios monlüy quiaj. At meáwan nüt tamb mbeay plas aton mandeac Mipoch Teat Dios manguiyiw nipilan leaw axom quiaj.

<sup>18</sup> Tapeayiw quiaj acas monxey mondüy wüx minawijquyaw nasoiic epicúreos at ajcüwa nasoiic estoicos. Ajcüw ayaj tapots andeacüw maquiüjpüw a Pablo, altiül tapiüngüw:

—¿Cuane andiüm mapiüng aaga naxey ngo majaw ndijchiow ombeay quiaja? —awüw.

Altiül tapiüngüw:

—Ajüic atnej teamandeac wüx pálwüx dioses —awüw.

Atquiaj tapiüngüw, cos Pablo tandeac wüx Teat Jesús, aton tandeac nguineay tapac alinomb.

<sup>19</sup> Condom quiaj taquiüjpüw nej andüy tiül nop nadam iüm nasoiic Areópago. Wüx tapeayiw quiaj, tasajüw nej:

—¿Alndom nanguiyiüna cuane aaga jayats iquiaach quiaja?

<sup>20</sup> Cos ique sanguiyiüna temendeac xeyay cuajantanej ngome aag nanguiyiün. Nganüy sandiüman nanguiyiün cuane amb apiüng aag ayaj —awüw.

<sup>21</sup> Cos meáwan nipilan micual iüt tiül Atenas at monaw alinoic iüt moncúlan quiaj, ngo majlüy alinoic cuajantanej marangüw, sitiül ngo mandeacüw tengwüy manguiyiw alngün jayats manderac wüx.

<sup>22</sup> Quiaj lembet pinawan nejiw a Pablo tiül Areópago. Condom tapiüng:

—Teat monxey micual iüt Atenas, sawaj icona irangan casa xeyay palpáwüx dioses.

<sup>23</sup> Cos wüx tajüyiüs ningüy tiül micambajan, tajawas xeyay artül niüng irangan casa midiosan. Ndoj tamongos niüng ajlüy noic artül narangüch wüx poch apiüng: “Ocueaj aaga dios ngo majaraw jane nej”. Pues aaga dios quiaj, leawa icona ngo mejawan

jane masey irangan nej casa, aag Dios quiaj xique nganüy xiün nasaj icon wüx.

<sup>24</sup> 'Aag ayaj Teat Dios nerang iüt, nerang meáwan cuajantanej najlüy ningüy wüx iüt, cos nej natang tiül cielo at wüx iüt. Nej ngo macül tiül cuajantanej nangaj iüm narangüch naag owixaran.

<sup>25</sup> Nej ngo metam nej nicuajind, ngondom aljane mambeol nej müüch nej aleaic, cos nej üüch icoots miündaats, y teamepacüüch majlüy meáwan leaw almajlüy.

<sup>26</sup> 'Nej nerang meáwan nipilan ajan wüx nop. Condom naw wüx aaga nop quiaj tajlüy palpálwüx nipilan macülüw wüx aaga iüt cam, pero noic miqüiejiw. Nej lamajaw ngow apmajlüyiw anopnopo, aton lamüüch iüt niüing apmacülüw.

<sup>27</sup> Nej andiüm mayambüw nej, müjchiw nej omeajtsüw. Nej ngome miünquiaj almajlüy, álan niüing ajlüyüüts anopnopoos.

<sup>28</sup> Cos nej neech icoots mapacaats, nej nerang icoots. Sitiül nej ngo marang icoots, ngo majlüyüüts. Atnej lamarangüw wüx nawiig aton altiül monáwan tiül icona leaw monxom omeaats, apiüingüw: "Icootsa micual icoots Dios."

<sup>29</sup> Sitiül naleaing micual icoots Dios, ngondom mapiüngaats Teat Dios ajlüy atnej alngün cuajantanej narangüch oro, tengwüy plat, tengwüy piedra. Meáwan ajcüw ayaj nipilan tarangüw, cos nejw ayajcüw atquiaj ajlüy Dios.

<sup>30</sup> Aag ayaj arangrangüwan, cos ngo majawüw nguineay ajlüy Teat Dios. Pares Teat Dios ngome apmateow tiül leaw ngo majneaj tarangüw; pero nganüy nej apiüing netam manguiayiw wüx nej meáwan nipilan wüx iüt y macueatiw meáwan ngo majneaj arangüw.

<sup>31</sup> Cos Teat Dios lamayac noic nüt apmajaraw wüx asoet meáwan nipilan wüx iüt. Aag ayaj apmajlüy cos nej lamayac nop Teat Naxey majaw wüx asoeteran. Aag ayaj tajüiquich majaraw wüx tapacüüch nej alinomb maw tiül mondeow —aw a Pablo.

<sup>32</sup> Ajcüwa nipilan wüx tanguiyiw aaga poch apacaran alinomb, altiül titsojówan nej, altiül tasajüw:

—Alinoic nüt ndoj sananguiyiün indeac —ajüw nej.

<sup>33</sup> Condom quiaj tacueat nejw, taw quiaj a Pablo.

<sup>34</sup> Pero altiül tandüjpiw mamb a Pablo, tujúchw omeajtsüw Teat Dios. Tiül ajcüw ayaj, altiül nop naxey nenüt Dionisio. Aaga naxey quiaj, ajüür najiüt tiül Areópago. At altiül nop najtaj nenüt Dámaris. Ngome ágan, aton tajlüyiw alacas.

<sup>1</sup> Ndoj aag ayaj, quiaj taw tiül Atenas a Pablo, tamb andüy tiül cambaj Corinto.

<sup>2</sup> Wüx tapeay Corinto, quiaj taxom nop naxey nenüt Aquila, judío nej naw tiül iüt Ponto, jayats mapeayiw imiün Italia, aquiiüb mintaj nej nenüt Priscila. Cos aaga Claudio minatang nenajiüt tiül Roma, tapiüing netam mawüw quiaj meáwan nipilan judío, pares nejw tawüw quiaj. Teat Pablo tamb majaw nejw mandeacüw maquiüjpw.

<sup>3</sup> Condom tacül quiaj maquiüjpw, cos nej aton arang aaga najiüt arangüw Aquila y Priscila, tarangüw najiüt nóiquian; aag ayaj arangüw iüm taag manüjpiw.

<sup>4</sup> Teat Pablo mbójan amb tiül sinagoga wüx nüt axoodaran maquiaach Mipoch Teat Dios manguiayiw nipilan judío, at nipilan griego aton.

<sup>5</sup> Wüx Silas y Timoteo tapeayiw imiünw tiül iüt Macedonia, quiaj a Pablo tarang ágan minajiüt Teat Dios pal nüt. Tenguial müüch a nipilan judío majawüw majneaj naleaing Teat Jesús, aag ayaj a Cristo leawa lapiürang aliüc.

<sup>6</sup> Pero ajcüwa nipilan judío tajcüyiw majawüw a Pablo; tandeacüw xeyay ngo majneaj wüx ombas nej. Quiaj a Pablo tataad apix nej, ndoj tasaj nejw:

—Ich macül wüx imbasan aaga nisoet mandrooch imbasan, aag ayaj xique ngo najiür naél. Ajan wüx nganüy sanamb nasajüw meáwan nipilan ngome judío —aj nejw.

<sup>7</sup> Quiaj taw tiül a sinagoga, tamb andüy aniüing nop naxey nenüt Justo, nop neyamb Teat Dios. Aaga naxey quiaj ajüür aniüing nej niüing ajlüy a sinagoga.

<sup>8</sup> Condom nop naxey nenüt Crispo, natang nej tiül a sinagoga, nej aton tüüch omeaats Teat Jesús maquiüüb meáwan monlüy aniüing nej. Aton xeyay nipilan tiül Corinto wüx tanguiyiw andeac Pablo, tujúchw omeajtsüw Teat Dios, ndoj tayarw yow.

<sup>9</sup> Ndoj, noic ongwiiüts Teat Dios tüüch manguiay a Pablo atnej maüm, tasaj:

—Nde mermbol, indeac xic wüx, nde ndi-jchiümeaw.

<sup>10</sup> Cos xique salnaquiüüb ic, nejninguind ngondom marang alngün ngo majneaj wüx imbas. Cos sajiür xeyay xenipilan tiül aaga cambaj cam —aj nej.

<sup>11</sup> Quiaj tacül quiaj a Pablo nomb neat pinawan, maquiaach nipilan wüx Mipoch Teat Dios.

<sup>12</sup> Pero wüx Galión tarang nenajiüt tiül iüt Acaya, quiaj a judíos sonongotoj nóiquian mapiüingüw masapüw a Pablo. Quiaj tasapüw, taquiüjpw mamb andüy awan.

<sup>13</sup> Condom quiaj tasajüw nenajiüt:

## 18

*Pablo altiül Corinto*

—Aaga naxey cam tengual maquiaach ombeay nipilan mǔjchiw omeajtsǔw Teat Dios, pero naleaing alinoic aquiaach, ngome atnej apiǔng aaga poch tǔnd Moisés —ajǔw.

<sup>14</sup> Pablo laǔmb apmendeac, quiaj tendeac a Galión masaj ajcǔwa judíos:

—Sitiǔl aaga naxey quiaj ajiǔr alngǔn nisoet, tengwǔy alngǔn xeyay ngo majneaj arang, najneaj sananguiay leaw apmepiǔngan cuane arang.

<sup>15</sup> Pero nganǔy cos ijcǔyǔnan mejawan ajcan aleaic aquiaach, ajcan andeac wǔx minǔt aljane, aton aag ayaj wǔx poch leaw icona indǔjpiǔn; pues ijawan coen ninguiaj, xique ngo nandiǔm najaw wǔx aag ayaj —aj nejiw.

<sup>16</sup> Ndoj quiaj tawǔn nejiw tiǔl awan.

<sup>17</sup> Condom ajcǔwa nipilan griego tasapǔw a Sóstenes, nop nej natang tiǔl sinagoga. Tapots matoeliw nej quiaj mbeay awan. Aaga Galión ngo mapiǔng nicuajjind, masey teamajaw.

*Pablo tandilil andǔy Antioquia, condom tandǔy quiaj amb arojmbǔw oleaj*

<sup>18</sup> Teat Pablo tacǔl tiǔl Corinto alacas nǔt, condom wǔx taw quiaj, tatepeay meáwan monyar andeac Teat Jesús monlǔy quiaj, cas tamb andǔy Siria amb tiǔl mǔx, taquiǔjpǔw nej mamb a Priscila y Aquila. Quiaj tambǔw ambǔw wǔx iǔt andǔyiw Cencrea majtepiw tiǔl mǔx. Tiǔl Cencrea tajerep omal nej a Pablo nangwing, majǔic nej lamarang leawa lamasaj Teat Dios apmarang. Condom quiaj tawǔw quiaj, tambǔw.

<sup>19</sup> Wǔx tapeayiw tiǔl Éfeso, quiaj a Pablo tecueatayej maquiǔjpǔw a Priscila y Aquila. Ndoj nej tamb andǔy tiǔl a sinagoga, mandeac maquiǔjpǔw nipilan judío.

<sup>20</sup> Condom tasajǔw nej macǔl quiaj xeyay nǔt maquiǔjpǔw, pero nej ngo mandǔm.

<sup>21</sup> Wǔx tandǔm maw quiaj, tatepeay nejiw, tapiǔng:

—Netam namb najaw aaga nangos nǔt laliǔc majlǔy tiǔl Jerusalén. Ndoj saliǔc alinomb najaw icon sitiǔl Teat Dios mapiǔng —aj nejiw.

Quiaj taw Éfeso amb tiǔl nadam mǔx.

<sup>22</sup> Wǔx tapeay Cesarea, quiaj tamb andǔy Jerusalén, matepeay meáwan minipilan Teat Cristo monlǔy quiaj. Ndoj naw quiaj, tamb andǔy Antioquia.

<sup>23</sup> Ndoj acǔl quiaj acas nǔt taw quiaj, tamb alinomb andǔy tiǔl meáwan cambaj tiǔl Galacia, at tiǔl Frigia, mǔǔch mapac omeajtsǔw mambeol meáwan monyar andeac Teat Cristo monlǔy tiǔl aaga iǔt quiaj.

*Apolos tandeac mipoch Teat Dios tiǔl Éfeso*

<sup>24</sup> Ndoj tapeay tiǔl Éfeso nop naxey judío nenǔt Apolos naw Alejandria. Aaga naxey quiaj xeyay axom omeaats wǔx andeac, y ajaw xeyay leaw apiǔng tiǔl Mipoch Teat Dios.

<sup>25</sup> Nejaquiaacharan wǔx Teat Jesús, y ngo paxiǔm mandeac wǔx leaw taquiaach Teat Jesús, masey nej tajlǔy minipilan nej aaga Juan neech yow nipilan.

<sup>26</sup> Apolos tapots mandeac tiǔl a sinagoga ngo mimbol; pero wǔx Priscila y Aquila tanguaiyiw nguineay aquiaach, quiaj taquiǔjpǔw andǔy aniǔngǔw nejiw. Condom taquiajchiw nej alquiriw wǔx Teat Jesús leaw nej nganaw manguiay.

<sup>27</sup> Condom wǔx tandǔm Apolos mamb andǔy tiǔl Acaya, quiaj tambeolǔw nej minipilan Teat Cristo monlǔy Éfeso. Tarangǔw noic nawǔg mǔjchiw nej majoy, majawǔw minipilan Teat Cristo monlǔy tiǔl Acaya, cos atquiaj alndom mangochiw nej najneajan. Wǔx nej tapeay tiǔl Acaya, xeyay tambeol ajcǔw monyar andeac Teat Cristo monlǔy quiaj, leaw Teat Dios lamambeol mayambǔw nej.

<sup>28</sup> Nej wǔx tandeac wǔx Teat Jesús manguiayiw nipilan, tajǔiquich nguineay ajcǔwa judíos ngo majneaj arangǔw. Ngondom mapiǔngǔw ngo maleaing cos tasaj nejiw nguineay apiǔng tiǔl Mipoch Teat Dios. Tasaj nejiw aaga Cristo leawa tealeámban macǔliw, aag ayaj Teat Jesús.

## 19

*Pablo altiǔl Éfeso*

<sup>1</sup> Wǔx Apolos aliǔn tiǔl cambaj Corinto, Pablo laǔmb majǔy tiǔl meáwan cambaj tiǔl tiǔc; nganǔy lamatǔch Éfeso. Quiaj taxom acas monyar andeac Teat Jesús.

<sup>2</sup> Condom tatǔn manguiay nejiw:

—¿Jow icona, wǔx teajchiǔn imeajtsan Teat Dios, teyariǔn Nangaj Espiritu ocueaj neje? —aj nejiw.

Nejiw tapiǔngǔw:

—Xicona ngo nanguaiyǔn sitiǔl almajlǔy aaga Nangaj Espiritu ocueaj Teat Dios —awǔw.

<sup>3</sup> Quiaj tasaj nejiw:

—¿Cuane wǔx teyariǔn yow? —aj nejiw.

Nejiw tapiǔngǔw:

—Wǔx leaw tapiǔng a Juan wǔx tǔǔch yow nipilan —awǔw.

<sup>4</sup> Quiaj tasaj nejiw a Pablo:

—Juan wǔx tǔǔch yow nipilan, aag ayaj tarang majǔic jane lealeaw omeaats wǔx aaga ngo majneaj teamarang y macueat, para marang leaw najneaj. At a Juan tasaj nipilan mayariw andeac aaga nop aliǔc miǔn andǔǔban nej. Aaga apiǔng aliǔc miǔn quiaj, aag ayaj Teat Jesús, aaga Cristo —aj nejiw.

<sup>5</sup> Wüx tanguyaiw aag ayaj, quiaj tayariw yow wüx minüt Teat Jesús.

<sup>6</sup> Ndoj, wüx Pablo tayac owix wüx omalüw nejiw, quiaj tiün wüx ombasüw nejiw Nangaj Espiritu ocueaj Teat Dios. Condom quiaj tandeacüw pälwüx ombeayiün. At aton tandeacüw leaw Teat Dios tasaj nejiw mandeacüw.

<sup>7</sup> Ajcüwa monxey quiaj ajlüyiw maseyme gajpiüp (12) nejiw.

<sup>8</sup> Condom Pablo nde asap amb tiül a sinagoga. Ngo mimbol mandeac Mipoch Teat Dios manguiayiw nipilan; tamb quiaj arej caaw. Tapots masaj nejiw mayariw mipoch Teat Jesús para majlüyiw tiül micambaj Teat Dios.

<sup>9</sup> Pero naleaing altiül nipilan nadam omeajtsüw ngo mandüümüw mayariw aaga poch wüx Teat Jesús. Tapots mandeacüw xeyay ngo majneaj manguiay nipilan wüx leaw tandeac a Pablo. Ndoj quiaj tacueat nejiw a Pablo, taquiüüb mamb leaw lamayariw mipoch Teat Jesús; taquiaach nejiw meáwan nüt tiül noic escuela niüng aquiaach nop naxey nenüt Tiranno.

<sup>10</sup> Atquiaj tarang a Pablo iüm neat. Quiaj meáwan nipilan judío at nipilan griego moncül tiül iüt Asia tanguyaiw mipoch Teat Jesús.

<sup>11</sup> Teat Dios xeyay tambeol a Pablo marang xeyay cuajantanej nadam ateócan.

<sup>12</sup> Altiül tajoyiw masey mipüw nej, tengwüy cuajantanej apix nej leaw naw wüx ombas nej, majoyiw mayacüw wüx ombas ajcüwa moniün andeow, quiaj tajneajiw; at masey nimeech alwüx ombasüw, tawüw aton.

<sup>13</sup> Alquiaj acas nipilan judío leaw ajüyjüyüwan, ngo macüliw tiül noic cambaj. Nejiw aton apiüngüw alndom ombasüw mawüniw nimeech wüx ombas nipilan. Wüx taxomüw nop nipilan alwüx ombas nimeech, quiaj tasajüw a nimeech:

—Sasajan ic wüx minüt aaga Jesús, leawa teamandeac wüx a Pablo, iriow —ajüw.

<sup>14</sup> Ajcüwa monxey monrang aag ayaj, ajlüyiw ayaíw, micual nejiw nop judío nenüt Esceva. Aaga naxey quiaj natang miteaats nej.

<sup>15</sup> Wüx tarangüw aag ayaj, quiaj tendeac a nimeech, tasaj nejiw:

—Xique sawaw jane a Jesús, sawaw jane a Pablo aton; pero icona çjane icona? —aj nejiw.

<sup>16</sup> Quiaj tajmel masap nejiw aaga naxey alwüx ombas nej nimeech quiaj. Tapots atsojow maquiüjpüw. Tajntsop wüx cos napac, tapots mambiy nejiw. Quiaj tenodayej tecuiürrüw tajtsoriw miotaagtajcüwan, anmecoy ombasüw ajmbiyaw.

<sup>17</sup> Meáwan nipilan moncül tiül Éfeso, átan nipilan judío átan nipilan griego, wüx tanguyaiw aag ayaj timboloj xeyay. Tandeacüw najneaj wüx minüt Teat Jesús.

<sup>18</sup> Condom xeyay nipilan leaw lamandüjpiw Teat Jesús tiünüw mapiüngüw nguineay laiünüw wüx arangüw ngo majneaj.

<sup>19</sup> At xeyay nipilan leaw ateowüw nawiiig ocueaj nimeech, tajamiünüw minawijquaiw nejiw mambeliw niüng ajlüy meáwan nipilan. Condom mawüniw nguitow ombeat meáwan aaga nawiiig quiaj, tajawüw atüch ic miow gajpowüw mil (50,000) tomiün plat.

<sup>20</sup> Atquiaj tajüy aaga poch wüx Teat Jesús, ngo majcueat, cos tajüic naleaing cuajantanej alndom.

<sup>21</sup> Landoj meáwan aag ayaj, quiaj a Pablo tapiüng apmamb tiül iüt Macedonia at tiül iüt Acaya, ndoj apmamb Jerusalén. At tapiüng naw Jerusalén netam mamb tiül Roma aton.

<sup>22</sup> Condom tüüch mambüw ijpüw monbeol nej tiül Macedonia: nop Timoteo alinop Erasto; nganüy a nej tacülan quiaj tiül Asia alacas nüt.

*Witiüt noic nadam moncüy tiül Éfeso*

<sup>23</sup> Tiül aaga nüt quiaj, witiüt noic nadam moncüy wüx aaga najneaj nanderac nguineay Teat Cristo awün asoeteran.

<sup>24</sup> Aag ayaj tawitich nop naxey nerang plat, nenüt Demetrio, cos nej arang plat nine ombiüm diosa nasoic Diana. Ajcüw monbeol nej marangüw aaga najiüt quiaj, axomüw wüx xeyay tomiün.

<sup>25</sup> Quiaj a Demetrio tasojnong nejiw, at altigüy monrang aaga najiüt quiaj, tasaj nejiw:

—Teat monxey, icona ijawan axomaats xeyay tomiün wüx aaga najiüt arangaats cam.

<sup>26</sup> Nganüy lamejawan lamenguiayiün nguineay aaga Pablo tenguiäl maquiaach ombeay nipilan masaj ngome dios nej leaw narangüch naag owixaran. Xeyay nipilan lamayariw nej andeac, ngome áagan nipilan ningüy tiül Éfeso, aton laliüc mambich masaj meáwan nipilan ningüy tiül iüt Asia.

<sup>27</sup> Xeyay ngo majneaj ajlüy, cos ngome áagan minajiütaats apmümb, at aton apmajcueat ayambüch aaga nangaj iüm ocueaj natang müm dios Diana, camüm apmajcueat ayambüch a müm dios aton, leaw meáwan moncül ningüy tiül Asia, at meáwan nipilan wüx iüt üjchiw omeajtsüw —aj nejiw.

<sup>28</sup> Wüx nejiw tanguyaiw aag ayaj, quiaj tajcüyiw xeyay, tepajüw napac, tapiüngüw:

—¡Xeyay netam ajlüy aaga müm dios Diana, midiosaats meáwan nipilan ningüy tiül Éfeso! —awüw.

<sup>29</sup> Quiaj tajcüyw xeyay nipilan tiül aaga cambaj quiaj. Condom tasapüw teat Gayo maquiüüb teat Aristarco, tanototoj mamb andüy niüing lambójan ajlüy moncanchiün. Ajcüwa ijpw monxey quiaj monaw Macedonia, aqúiüjpüw a Pablo.

<sup>30</sup> Teat Pablo tandiüm mamb majmel niüing tengual ajcüyw quiaj, pero ajcüwa monyar andeac Teat Jesús ngo müjchiw nej mamb.

<sup>31</sup> At aton acas monajiüt tiül Asia leaw miamigos nej, tüjchiw mamb masoic nde mamb tiül a moncanchiün quiaj.

<sup>32</sup> Nejiw a nipilan tiül aaga moncanchiün quiaj ngo mandeacüw nóiquian, palpálwüx tandeacüw cos ngo majawüw cuane najlüy, neol sonongot nipilan.

<sup>33</sup> Quiaj acas judíos tasajüw nop tiül nejiw nenüt Alejandro cuane najlüy. Condom tatechiw nej teopech mamong mendeac. Quiaj tarang owix nej ndijchiümojan. Tandiüm mandeac noic poch ngana majcüyaran majarawüw meáwan nipilan judío.

<sup>34</sup> Wüx nipilan tajawüw nej nop judío nej, quiaj yajnguiat tiüt apajüw, tepajüw maseyme ijquiw ores, tapiüngüw:

—jXeyay netam ajlüy aaga müm dios Diana, midiosaats monaw Éfeso! —awüw.

<sup>35</sup> Condom quiaj aaga nerang nawiig ocueaj cambaj, tasaj nipilan ndijchiümoj. Tapiüng:

—Teat cambaj micual iüt Éfeso, meáwan nipilan wüx iüt ajawüw aaga cambaj Éfeso cam ajlüyay majiür aaga nangaj iüm ocueaj natang müm dios Diana. Cos aaga müm dios quiaj, najmiüc imiün cielo.

<sup>36</sup> Aag ayaj nejingund ngondom mapiüng ngo maleaing. Nganüy netam ndijchiümeron, ngondom merangan nicuajind irangánan.

<sup>37</sup> Icona tequiüjpanüw miün ningüy ajcüwa monxey quiaj; nejiw ngo manejiw nicuajind tiül a nangaj iüm ocueaj müm dios; at ngo mandeacüw ngo majneaj wüx ombas aaga mimümaats dios quiaj.

<sup>38</sup> Nganüy sitiül teat Demetrio y ajcüwa monrang najiüt atnej arang nej, andiümüw maquiüjpüw teombas monajiüt aljane, ich mambüw awan majawüw monajiüt. Quiaj ich mapiüngüw jane nejiür asoet para majaraw wüx.

<sup>39</sup> At sitiül ijiüran alngün pálwüx indiüman manderac wüx, quiaj alndom majlüy noic nadam moncanchiün majaraw wüx.

<sup>40</sup> Icootsa alndom majlüyüts tiül naé!; cos sitiül apmanderac wüx aag agüy teombas natang monajiüt mapiüngüw ningüy lawitiow moncüy, cuane apmapiüngaats —aw.

<sup>41</sup> Ndoj mapiüng aag ayaj, quiaj tasaj nipilan ndajriümoj majtsoriw.

## 20

*Pablo tamong tiül Macedonia at tiül Grecia aton*

<sup>1</sup> Wüx lalomboj moncüy, quiaj a Pablo tapaj miünüw meáwan monyar andeac Teat Jesús; tasaj nejiw tanaámb mandüjpiw. Condom tatepeay nejiw cos apmaw quiaj. Ndoj quiaj taw quiaj, tamb andüy tiül iüt Macedonia.

<sup>2</sup> Tajüy tiül meáwan cambaj tiül aaga iüt quiaj majaw monyar andeac Teat Jesús, masaj nejiw tanaámb mandüjpiw Teat Dios, nde macueatiw. Quiaj tamb matüch tiül iüt Grecia.

<sup>3</sup> Condom tacül quiaj arej caaw. Wüx lamatüch a nüt maw quiaj, mamb amb tiül nop nadam müx andüy Siria, quiaj tanguiay nguineay lamapiüngüw ajcüwa judíos moncüy quiaj, cos lamapiüngüw apmasapüw nej. Quiaj tapiüng lango mamb amb tiül müx, apmamb amb wüx iüt, apmamong tiül Macedonia alinomb.

<sup>4</sup> Taquiüjpüw nej acas monxey: nop naw Berea nenüt Sópater; alijpüw monaw Tesalónica, nop Aristarco, alinop nenüt Segundo; alinop naw Derbe nenüt Gayo; alinop Timoteo; at alijpüw monaw tiül Asia, nop Tíquico alinop Tróximo.

<sup>5</sup> Ajcüw ayaj tambüw ombas nejiw macüliw xicon tiül cambaj Troas.

<sup>6</sup> Condom xicona wüx lamong aaga nangos nüt wüx üeteran pan ngo majmel levadura, quiaj tawasan Filipos, samban tiül müx. Wüx acoquiaw nüt tatüchasan Troas. Quiaj texomasayon naquiüjpanüw. Condom tacülasan quiaj ayaüw nüt.

*Pablo tamong tiül Troas*

<sup>7</sup> Wüx tamelich semán, minipilan Teat Jesús canchiütason nüetiün pan atnej tapiüng Teat Jesús. Ndoj Pablo taquiaach xicon cos arraw tiüt apmaw quiaj. Nej tandeac xeyay najal, tatüch pinawan ongwiiüts.

<sup>8</sup> Pues aaga iüm niüing canchiütason, cawüx tiül amb arojpw iüm, y teandaab xeyay candil quiaj.

<sup>9</sup> Alquiaj nop nench nenüt Eutico, alchetem tiül ventan. Cos Pablo xeyay najal tandeac, ág tind ameay aaga nench quiaj. Wüx lamasap nej ameay nómban, quiaj tajmiüc andüy tiüt imiün cawüx tiül amb arojpw iüm. Wüx tamb xaijnguiam, landeow nómban.

<sup>10</sup> Condom teat Pablo taw tiüt majaw. Wüx tajngot majaw, quiaj taquieel micos tiüt mejquiet wüx, mapeic. Ndoj tapiüng:

—Nde mbayameron, nej almapac —aw.

<sup>11</sup> Condom tajtep alinomb a Pablo andüy cawüx tiül aaga iüm niüing canchiütason, quiaj tambaag a pan. Condom wüx landoj

üet, tandüy wüx andeac; atquiaj tatüch ümb arraw. Ndoj taw quiaj.

<sup>12</sup> Aaga nench almapac, taquiüraab mamb majtsor; xeyay tapac omeajtsüw meáwan minipilan Teat Jesús.

*Pablo taw Troas tandüy Mileto*

<sup>13</sup> Condom xicona tambasan ombas icon, samban tiül nadam müx, tandüyasan tiül cambaj Asón, nangochiün quiaj a Pablo. Cos nej lamapiüng andiüm majüy tiüt amb wüx iüt.

<sup>14</sup> Wüx texomasayon naquüüjpan tiül Asón, quiaj tajtepasan tiül müx, tambasan sandüyiün tiül cambaj Mitilene.

<sup>15</sup> Condom tawasan quiaj. Larraw tiüt tamongasan mbas noic iüt tiül ndec nenüt Quío. Condom amb alinoic nüt tajtepasan wüx noic iüt tiül ndec nenüt Samos, ndoj taxoodasan tiül cambaj nenüt Trogilio. Condom amb alinoic nüt, quiaj tatüchasan tiül cambaj Mileto.

<sup>16</sup> Pablo lamapiüng apmamóngan tiül Éfeso, ngana mequiy tiül Asia. Cos andiüm mamb najen, sitiül alndom matüch Jerusalén, majlüy quiaj wüx nangos nüt Pentecostés.

*Pablo tequiaach tiül Mileto*

<sup>17</sup> Wüx altiül Mileto, tüch mamb mai-soiquiw montangtang monajtiüt tiül minipilan Teat Jesús tiül Éfeso miünüw majawüw nej.

<sup>18</sup> Wüx tapeayiw majawüw nej, quiaj tasaj nejw:

—Icona tejawan nguineay mbójan narang tiül icona ajan wüx aaga nüt tapeayiüs tiül Asia.

<sup>19</sup> Tejawan nguineay tarangas minajtiüt Teat Dios, ngo nerangrangüy wüx, pero tajiüntsas. At tejawan nguineay tamongochiüs xeyay ngo majneaj wüx ajcüwa judíos tandiümw mambiyaw xic.

<sup>20</sup> Naleaing xique ngo nacueat nasaj icon wüx meáwan najneaj. Atquiaj tarangas, tandeacas niüng canchiowaran, aton tambas najüy tiül nden nandeaac.

<sup>21</sup> Tasajasüw meáwan nipilan, masey judíos, masey pálwüx nipilan, ich leaam omeajtsüw macueatiw aaga ngo majneaj teamarangüw, marangüw najneaj atnej Teat Dios andiüm, mayacüw omeajtsüw wüx Miteatiüts Jesucristo.

<sup>22</sup> Nganüy sanamóngan, sanamb Jerusalén. Naleaing ngo najaw cuane sanamongoch quiaj. Pero sanamb cos Nangaj Espiritu ocueaj Teat Dios lamapiüng netam namb.

<sup>23</sup> Leaw xique sawaw, aag ayaj tiül ngünantanej cambaj niüng samong, Nangaj Espiritu ocueaj Teat Dios asaj xic nguineay tengual sajcal ndeaand, namongoch ngo majneaj.

<sup>24</sup> Meáwan aag ayaj, xique ngo napiüng wüx, ngo netajquiaj lasta napiüng ngon-dom nandeaow. Cos leaw sayac ximeeats wüx, aag ayaj mapac ximeeats nambich meáwan xenajtiüt leaw lamasaj xic Teat Jesús narang, napiüng wüx aaga najneajay poch manguiayeran nguineay Teat Dios andiüm mawün wüx asoet nipilan.

<sup>25</sup> Nganüy sawaw aleaw ningüy ajawayoots; nejingüind tiül icona niüng tamongos nasaj icon nguineay alndom mejlüyiün tiül micambaj Teat Dios, langome apmejawan xic alinomb.

<sup>26</sup> Pares nganüy sasaj icon, nejingüind ngondom mayac sasaoet sitiül aljane ngo maw wüx asoet nej;

<sup>27</sup> cos xique ngo naxot, tambichas nasaj icon meáwan leaw lamapiüng Teat Dios.

<sup>28</sup> Nganüy icona montangtang, netam mejawan cuane irangan; at netam membeolan meáwan monyar andeac Teat Jesús. Cos aaga Nangaj Espiritu ocueaj Teat Dios lamayac icon mejlüyiün minatangüw, membeolan meáwan, mejüüranüw atnej arangüw monjiür sap; cos Teat Jesús lamangüy asoetiw nejw naag miquiej nej.

<sup>29</sup> Sawaw wüx xique lango najlüy ningüy, apmajmeliw tiül icona nipilan atnej rombüy sampüy; ngame apmawüniw wüx ajcüwa sap.

<sup>30</sup> At tiülan icona apmaw altiül apmaquiajchiw leaw ngo maleaing; apmandiümw müch mandüjpiw nejw minipilan Teat Jesús.

<sup>31</sup> Nganüy netam mepacan wüx aag ayaj. Ich leaam imeajtsan nguineay tarangas wüx tacüliüs tiül icona aroomb neat, cos ngo lombom napaj icueajiün nüt ongwiiüts, nguiaj sajiünts wüx nasaj icon inopnopo.

<sup>32</sup> Nganüy teat, sayac icon teowix Teat Dios. Sasaj icon merangan atnej apiüng tiül Mipoch nej, cos aag ayaj apmambeol icon xeyay, ngo müch icon mermbolan. At apmüch icon mejlüyiün niüng ajlüyiw aldemas leawa lajwanüw wüx asoetiw.

<sup>33</sup> Xique ngo nandiümdium ocueaj aljane nicuajind, ngo nandiüm tomiün at ngo nandiüm napixeran;

<sup>34</sup> pero icona tejawan nguineay tarangas najiüt naag xiwx para naxom leaw netam xic y leaw netam nejw leaw saquiüjpw.

<sup>35</sup> Atquiaj tarangas para naquiaach icon nguineay netam merangan najiüt, membeolan leaw ngo majiür. Ich leaam imeajtsan wüx aaga poch leaw tapiüng Teat Jesús: “Najneajay apmajlüy jane ambeol alinop ingow imbeolaranan” —aj nejw teat Pablo.

<sup>36</sup> Wüx ndot mapiüng aag ayaj, quiaj teat Pablo taquieel tiüt micos nej, tataag orar maquiüüb nejw nóiquian.



<sup>37</sup> Meáwan nejiw tajiúntsüw xeyay, mejquietoj wüx onic a Pablo, y tachejchiw mimboy nej.

<sup>38</sup> Tamix omeajtsüw xeyay wüx tan-guiayiw aaga poch apiüng langome apma-jawüw nej alinomb. Ndoj quiaj taquiüjpüw mamb mayacüw nej niüng ajlüy a nadam müx.

## 21

### *Pablo tamb andüy Jerusalén*

<sup>1</sup> Wüx landoj sacueatayon naquiüjpanüw, quiaj tawasan quiaj, samban tiül nadam müx, saleaingüünan tambasan sandüyiün wüx noic iüt tiül ndec nenüt Cos. Condom amb alinoic nüt tatüchasan alinoic iüt tiül ndec nenüt Rodas, samongónan tambasan najtepiün wüx iüt tiül noic cambaj nenüt Pátara.

<sup>2</sup> Quiaj taxomasan alinop müx apmamb andüy Fenicia; tajtepasan tiül. Ndoj tawasan quiaj tambasan.

<sup>3</sup> Tamongasan niüng ajlüy noic iüt tiül ndec nenüt Chipre, tajlüy amb wüx miquiamb a müx, samongónan sandüyiün wüx iüt nenüt Siria. Tajtepasan wüx iüt tiül cambaj Tiro, cos a müx quiaj netam majwan amal.

<sup>4</sup> Wüx taxomasan monyar andeac Teat Jesús monlüy quiaj, tacülasan quiaj ayaiw nüt naquiüjpanüw. Naleaing nejiw tasajüw a Pablo nde mamb Jerusalén, cos Nangaj Espiritu ocueaj Teat Dios lamasaj nejiw nguineay apmamogoch a Pablo tiül Jerusalén.

<sup>5</sup> Wüx lamong aag ayaiw nüt, quiaj tawasan quiaj. Taquiüjpüw xicon meáwan monyar andeac Teat Jesús at mintajüw nejiw y micualüw nejiw, mayacüw xicon mbeay cambaj mbeay ndec. Quiaj taquieelasan xacosan, tataagasan orar.

<sup>6</sup> Wüx landoj satepeayayon naquiüjpanüw anopnopoj, quiaj tajtepasan tiül müx. Ndoj nejiw tandilileaw alinomb, tajtsoriw.

<sup>7</sup> Xicona nawasan Tiro, tambasan tiül cambaj Tolemaida, samban tiül nadam müx. Ndoj tambasan natepeayiün meáwan monyar andeac Teat Jesús monlüy quiaj. Condom tacülasan quiaj noic nüt naquiüjpanüw.

<sup>8</sup> Amb alinoic nüt, quiaj teat Pablo y leaw saquiüjpan tawasan quiaj, tambasan sandüyiün Cesarea. Wüx tatüchasan quiaj, tandüyasan aniüng nop nendec wüx Mipoch Teat Dios, nenüt Felipe, aag ayaj nop tiül ayaiw diáconos. Quiaj taxoodasan aniüng nej.

<sup>9</sup> Nej almajiür apiquiwi micual nej monüx. Ajcüwa monüx quiaj, andeacüw leaw asaj nejiw Teat Dios.

<sup>10</sup> Xicona tacülasan quiaj acas nüt. Ndoj tapeay quiaj nop nendec andeac Teat Dios imiün Judea nenüt Agabo.

<sup>11</sup> Aaga naxey quiaj, wüx tiün majaw xicon, tayar misiend a Pablo. Condom taóel oleaj nej owix nej nejáyan quiaj. Ndoj tapiüng:

—Atcüy apiüng Nangaj Espiritu ocueaj Teat Dios, apiüng atquiaj apmarangüw a judíos, cos apmaoeliw tiül Jerusalén aaga naxey neneay a siend cam, ndoj apmayacüw nej teowixaw napeay miün nipilan —aw.

<sup>12</sup> Xicona wüx tanguiyasan aag ayaj, quiaj tasajasan a Pablo naquiüjpanüw meáwan monyar andeac Teat Jesús tiül Cesarea, nde mamb Jerusalén.

<sup>13</sup> Quiaj tasaj xicon a Pablo:

—¿Neol tapots ijiúntsan meajchiün mamix ximeaatza? Cos xique sajlüy ngome áagan naoeleran, at sajlüy masey nandeow tiül Jerusalén wüx minüt Teat Jesús —aj xicon.

<sup>14</sup> Pues wüx tajawasan ngondom napalan, quiaj tacueatasan nasajan, tapiüngasan:

—Teat Dios ajaw nguineay apmarang —sawan.

<sup>15</sup> Wüx lamatüch a nüt nawan quiaj, wüx laimb naxaingüün meáwan leaw sanajoyiün, quiaj tambasan sandüyiün Jerusalén.

<sup>16</sup> Taquiüjpüw xicon acas monyar andeac Teat Jesús monaw Cesarea. Altiül nop naxey nenüt Mnasón naw Chipre, lamajiür nüt ayar mipoch Teat Jesús; aniüng nej sanaxojtan.

### *Teat Pablo amb majaw a teat Jacobo*

<sup>17</sup> Wüx tapeayasan Jerusalén, najneájan tangochiw xicon monyar andeac Teat Jesús, apac omeajtsüw majawüw xicon.

<sup>18</sup> Aw alinoic nüt, quiaj tamb a Pablo majaw a Jacobo, taquiüjbasan mamb aton. Alcanchiümoj quiaj meáwan montangtang monajiüt tiül minipilan Teat Jesús.

<sup>19</sup> Teat Pablo tapeay nejiw. Condom tapots mandeac masaj nejiw andüübndüjpeay nguineay Teat Dios lamarang tiül nipilan ngome judío wüx nej tamb mandeac Mipoch Teat Dios tiül meáwan cambaj.

<sup>20</sup> Nejiw wüx tanguiyaw aag ayaj, tapiüngüw najneajay lamarang Teat Dios. Ndoj tasajüw a Pablo:

—Pero naleaing teat, ique ijaw cas mil judíos almajlüy leaw lamayariw mipoch Teat Jesús. Meáwan nejiw andiümüw marangüw atnej apiüng tiül aaga poch tiünd Moisés.

<sup>21</sup> Nejiw lamanguiyaw, asoiquiw ique iquiaach meáwan judíos moncül tiül palpälwüx cambaj, macueatiw marangüw

atnej apiüŋg aaga poch tüünd Moisés. Teamesajüw lango metam matajcüw circuncidar micualüw nejiw. Teamesajüw aton lango metam marangüw meáwan leawa lambójan arangaats.

<sup>22</sup> ¿Nguineay apmarangaats a nganüy? Cos nipilan apsonongomoj, apmajlüy nadam moncüy wüx apmanguyaiw ique lerpeay.

<sup>23</sup> Nganüy sapiüŋgan najneaj merang atcüy: Alningüy tiül xicona apiquiw monxey, nejiw netam marangüw leaw lamapiüŋgüw apmarangüw.

<sup>24</sup> Alndom meamb mequiüjpüw merangan atnej ajlüyay marangaats wüx üjchiüts merixix ajlüyüüts. Aton netam mengüy leaw apmandrojchiw. Condom apmajerep omalüw nangwang, quiaj apmajawüw nipilan ngo maleaing leaw tanguyaiw nguineay irang. Cos apmajawüw at a ique aton ijlüy tiül, irang atnej apiüŋg tiül aaga poch tüünd Moisés.

<sup>25</sup> Pero ajcüwa nipilan ngome judíos leaw lamayariw mipoch Teat Jesús, ngo metam marangüw meáwan aag ayaj. Cos icootsa lamarangaats nawiiŋ masajajtsüw ngondom müetiw alngün nüeteran landoj arang nichech teombas dioses; ngondom matsambüw quiej, átan mionij nimal napatsüch onic andeow. Aton ngondom majiürüw pálwüx naxey pálwüx najtaj —ajüw nej.

*Asapüw Teat Pablo tiül nadam nangaj iüm*

<sup>26</sup> Teat Pablo quiaj taquiüüb mamb ajcüwa piqüiw monxey quiaj. Condom amb alinoic nüt tarangüw leaw ajlüyay marangüw wüx üjchiw merixix ajlüyiw. Quiaj tajmel tiül nadam nangaj iüm mapüŋg ngün nüt apndom aaga teamarangüw quiaj wüx apmayacüw nimal mambiyaran majmel marang ichewiw nejiw anopnopo.

<sup>27</sup> Pero wüx laliüc palam ayaíw nüt, quiaj tajawüw nej tiül nadam nangaj iüm acas judíos monaw tiül Asia. Condom quiaj tapots masajsajüw meáwan nipilan monlüy quiaj, nguineay ndom majcüyiw majawüw a Pablo. Quiaj tambüw masapüw a Pablo.

<sup>28</sup> Condom tepajüw napac, tapiüŋgüw:

—|Teat cambaj Israel, macaron imbeolan xicon! Jogüy lanasapan aaga naxey tengual aquiaach ombeay nipilan tiül meáwan cambaj majcüyiw majawüw micambajaats, aton macueatiw marangüw meáwan leaw apiüŋg tiül aaga poch tüünd Moisés. At aton andeac ngo majneaj wüx aaga nadam nangaj iüm cam. Y ngome áagan ayaj, átan lamamelich tiül aaga nadam nangaj iüm cam acas nipilan griego; atquiy lamitsojow aaga nadam nangaj iüm cam —awüw.

<sup>29</sup> Atquiaj tapiüŋgüw cos laiüüw quiaj majawüw a teat Pablo alquiaj tiül cambaj, almaquiüüb nop naxey ngome judío nej,

naw Éfeso, nenüt Trófimo. Pares tapiüŋgüw Pablo nemelich nej tiül nadam nangaj iüm.

<sup>30</sup> Quiaj witiüt noic nadam moncüy, sonogot meáwan nipilan. Quiaj tawüniw a Pablo, tanototoj imiün tiül nadam nangaj iüm. Condom andüüb mapalüw meáwan ombeay nangaj iüm.

<sup>31</sup> Cos lamapiüŋgüw apmambiyaw nómban, quiaj tamb masoic nop minatang ocueajiw soldados, nguineay nipilan tiül Jerusalén lamawitichaw noic nadam moncüy.

<sup>32</sup> Aaga naxey quiaj wüx ndot manguiy aag ayaj, quiaj tamb maquiüüb mamb tigüy soldados, at alacas montangtang ocueaj nej, acuiürrüw majawüw cuane najlüy. Wüx nipilan tajawüw aliüctüw monajiüt aquiüjpüw soldados, quiaj tacueatiw matoeliw a Pablo.

<sup>33</sup> Wüx tapeyaiw quiaj a monajiüt, quiaj tüüch mamb ndeaa a Pablo maoeleran naag ijtsüw galen. Condom tatün manguiy jane nej, cuane arang.

<sup>34</sup> Nipilan ancayajaj ngo majüic cuane teamapiüŋgüw. Altiül teapajüw teamapiüŋgüw pálwüx, altiül teamapiüŋgüw pálwüx. Quiaj aaga nenajiüt ngondom maxom omeaats wüx nicuajind cos tengual apajüw. Quiaj tapiüŋg maquiüuraab a Pablo andüy niüŋg acüliw soldados.

<sup>35</sup> Wüx lapeyaiw tiül ombeay iüm maquiüjpüw a Pablo, ajcüwa soldados quiaj tandejndiw tiüt, cos nipilan xeyay lajcüyiw majawüw nej.

<sup>36</sup> Xeyay nipilan almandüjpiw nejiw, tengual apajüw, apiüŋgüw:

—|ich mandeow nómban! —awüw.

*Teat Pablo tandeac nguineay arang manguiy nipilan*

<sup>37</sup> Pablo wüx laámb apmamelichaw nej niüŋg acüliw soldados, quiaj tasaj a nena-jiüt:

—¿Ngwüy, alndom nendeac nasaj ic noic poch? —aj.

Aaga naxey quiaj tasaj nej:

—¿Alndom mendeac griego?

<sup>38</sup> ¿Neol, ngome ique aaga naxey naw Egipto, teawitich moncüy ninguinüt, ndoj temelich tiül wajchiüc apiquiw mil monby nipilana? —aj nej.

<sup>39</sup> Quiaj tasaj nej a Pablo:

—Xique naleaing judío xic, nawas Tarso. Aaga cambaj quiaj najntsop atam tiül iüt Cilicia. Nganüy satün icueaj meaach xic nendeac nasajüw nipilan —aj nej.

<sup>40</sup> Quiaj tüünd mendeac, Pablo niüŋgan lembej tiül ombeay iüm, tarang owix nej ndijchiüm nipilan. Wüx ndijchiütoj, quiaj tamelich andeac, tandeac wüx hebreo, tapiüŋg:

## 22

1—Teat monxey micual xefüt, nganüy inguiayüün, sanapiüung menguiayüün nguineay sarang —aw.

2 Wüx nipilan tanguiayiw nguineay teamasaj nejiw a Pablo wüx ombeayiw nejiw, quiaj ndijchiütójan. Condom Pablo tapiüung:

3—Xique judío xic, wijquianos tiül cambaj Tarso, tiül Cilicia. Naleaing ningüy satang tiül a cambaj cam, taquiaach xic teat Gamaliel. Tequiaachayos wüx aaga poch tüünd Moisés, leaw tündiw mixejchiüts. Xique xeyay tayacas ximeats wüx narang, cos sapiüung minajiüt Teat Dios teanarang, atnej teamerangan nganüy cam.

4 Xique tayambas ombasüw monyar andeac Teat Jesús. Tasapasüw nayacüw tiül manchiüc monxey y montaj, mandeowüw.

5 At a natangtang miteats, at meáwan montangtang monajiüt tiül nipilan judío, alndom mapiüngüw wüx aag ayaj aton. Cos nejiw tujchiw xic nawüj najoy nüjchiw nipilan judío micual miütaats monlüy tiül Damasco, para müjchiw xic nasap natsaag meáwan monyar andeac Teat Jesús leaw sanaxom quiaj, naquüüb miün andüy ningüy tiül Jerusalén, müjndiw mamongochiw ngo majneaj.

*Pablo tapiüung nguineay tandüüb Teat Jesús*

(Hch. 9:1-19; 26:12-18)

6 'Quiaj tambas, y wüx saleamb tiül tiüüd laliüc natüch Damasco, limnüt camüm nayaag lamarraj xic noic ran imiün cielo, xowüy larraw.

7 Quiaj tajmiücas. Condom tanguiayüüs andeac nop nendeac, tasaj xic: "Saulo, Saulo, ¿neol tapots ijcüy mejaw xique?" aj xic.

8 Quiaj tatüniüs nanguiy: "¿Jan ic Teat?" saj. Quiaj tasaj xic: "Xique Jesús naw Nazaret, leaw ique tenguiäl ijcüy mejaw", aw.

9 At leawalnaquüüb tajawüw aaga ran quiaj aton, xeyay mbayatoj majawüw; pero ngo manguiyiw cuane andeac aaga nendeac masaj xic.

10 Xique quiaj tapiüngas: "¿Jow nganüy Teat, cuane netam naranga?" saj. Quiaj tasaj xic aaga nendeac quiaj, tapiüung: "Witiür, quiür indüy Damasco. Quiaj apmesoic meáwan cuane netam merang", aj xic.

11 Cos xique nómban ngo naxom najaw, nde ndoj machech xiniüüg aaga ran. Quiaj ajcüwa monxey saquüüjpüw, tanetetiw xiwix natüch Damasco.

12 'Altiül Damasco nop naxey nenüt Ananías, nej xowüy ayac wüx omeats marang atnej apiüung tiül aaga poch tüünd

Moisés. Meáwan nipilan judíos moncüü quiaj apiüngüw nej xeyay najneaj arang.

13 Aaga Ananías quiaj, tamb majaw xic. Wüx tapeay niüung sajlüy, quiaj tasaj xic: "Teat Saulo, nganüy aprram iniüüg", aj xic. Quiaj rat xiniüüg tiülan a ores quiaj, taxomas najaw aaga naxey quiaj.

14 Condom tasaj xic: "Aaga Teat Dios Midiosüw mixejchiüts, nej lamarriüüd ic, müüch ic menguiay cuane andiüm merang, aton mejaw aaga nerang najneaj, menguiay andeac nej.

15 Cos netam mepiüung wüx nej, mesaj meáwan nipilan tiül meáwan cambaj leaw tejaw leaw tenguiay.

16 Nganüy ngo metam mecül, witiür iyar yow, itün ocueaj nej, isaj mawün isoet", aj xic.

*Pablo tapiüung nguineay tüünd mamb tiül nipilan ngome judíos*

17 'Condom wüx tandilileas sandüy Jerusalén, sal tiül nadam nangaj iüm tenguiäl nataag orar nasaj Teat Dios, quiaj atnej aleaic tajawas atnej saüm.

18 Quiaj tajawas a Teat Jesús, tasaj xic: "Ernguialeateay, iriow ningüy tiül Jerusalén najénan. Cos nipilan ngome apmariw indeac wüx apmepiüung xic wüx", aj xic.

19 Xique tasajas: "Teat, nejiw tajawüw nguineay tarangas wüx tasapas xeyay monyar indeac nayacüw tiül manchiüc, wüx tawüüchasüw tiültiül sinagogas leaw niüung saxomüw.

20 Aton wüx tambiyaw aaga Esteban nendeac ic wüx, xique aton sal quiaj, tajawas, ajneajan najaw mandeow, aton xique ne-sapas micamixaw monbiy nej", saj.

21 Quiaj nej tasaj xic: "Quiür, cos xique sanüüch ic meamb miünquiaj tiül nipilan ngome judío", aj xic —aw a Pablo.

*Pablo alteowix monajiüt*

22 Nipilan aleaw ninguiaj taiüündw manguiyiw. Condom tepajüw napac, tapiüngüw:

—¡Ich mandeow aaga naxey quiaj; ngo metam mapacl! —awüw.

23 Nipilan tajcüyiw xeyay, tepajüw, andalalüw cawüx micamixaw nejiw, apüchiw cawüx najndot.

24 Quiaj tapiüung a nenajiüt mamelicharan a Pablo andüy niüung acüliw soldados. Ndoj tapiüung majwüch, mapiüung cuane arang, neol tapots apajüw atquiaj a nipilan, cuane wüx ajcüyiw majawüw nej.

25 Naleaing Pablo wüx landoj aelich, wüx laámb apmajwüch, quiaj tasaj nop natang ocueaj soldados najlüy quiaj:

—¿Ngwüy, alndom majwüch nop nipilan romano, sitiül ngome ombas majaraw wüx aoet neje? —aj.

<sup>26</sup> Wüx aaga minatang ocueaj soldados tanguaiy aag ayaj, tsajmbiüt masaj a nena-jiüt, camüm majngot tasaj:

—¿Cuane apmeranga? Cos aaga naxey quiaj romano nej —aj.

<sup>27</sup> Quiaj tamb a nenajiüt majaw a Pablo, tasaj:

—Isaj xic, ¿naleaingue, nipilan romano ique? —aj.

Quiaj tapiüng a Pablo:

—Naleaing —aw.

<sup>28</sup> Quiaj tasaj nej a nenajiüt:

—Xique tayacas xeyay tomiün para narang romano —aj nej.

Quiaj tapiüng a Pablo:

—Xique wijquiajos romano xic —aw.

<sup>29</sup> Atquiaj ajcüwa soldados laámb apmewüjchiw nej, pero wüx ndot manguiayiw aag ayaj, acueatiwan tawüw quiaj. At a nenajiüt aton wüx tajaw naleaing Pablo romano nej, quiaj mbayat xeyay, cos ajcan lamüüch maoeleran.

*Pablo alteombas montang monajiüt ocueaj judíos*

<sup>30</sup> Rat tiüt amb alinoic nüt, aaga nena-jiüt quiaj tandiüm manguiay majneaj, neol cuane wüx tayacüw asoet a Pablo ajcüwa nipilan. Áag tüüch mamb macheederan a Pablo, cos aoeliw naag galen. Condom tapaj mapeayiw canchiümoj meáwan montangtang miteaats, at meáwan ajcüwa noic ajlüy monjiür najiüt tiül judíos. Wüx la-canchiüjow meáwan, quiaj tawün a Pablo maquiüüb andüy niüng ajlüyiw.

### 23

<sup>1</sup> Condom quiaj taxaing omal a Pablo majaw teombasüw ajcüwa monxey montangtang monajiüt tiül judíos. Quiaj tapiüng:

—Teat monxey, micual iüt. Xique sayaag tiül ximeaats tanaámb sarang najneaj majaw Teat Dios —aw.

<sup>2</sup> Quiaj tapiüng a Ananías natang miteaats, tasaj monlüy niüng ajlüy a Pablo müjchiw wüx ombeay.

<sup>3</sup> Quiaj a Pablo tasaj a Ananías:

—[Teat Dios apmüüch wüx imbeay a ique newüyay arang najneaj! ¿Neol ngome chetetar ninguiay mejaw wüx sasoeate atnej apiüng tiül aaga poch tüünd Moisésa? ¿Neol a nganüy terang leaw ngo mapiüng tiül aaga poch tüünd Moisésa, cos tepiüng maleambüch ximbeaye? —aj.

<sup>4</sup> Quiaj tapiüngüw alacas monxey monlüy niüng ajlüy a Pablo, tasajüw a Pablo:

—¿Neol tesap mendeac ngo majneaj wüx ombas teat natang miteaats ocueaj Teat Dios? —ajüw nej.

<sup>5</sup> Quiaj tasaj nejw a Pablo:

—Teat, cos xique ngo najaw sitiül nej natang miteaats nej. Naleaing atquiaj

larangüch wüx nawiiig tiül Mipoch Teat Dios, apiüng: “Nde mendeac ngo majneaj wüx ombas nop natang nenajiüt tiül micambaj” —aj nejw.

<sup>6</sup> Pablo tajaw ajcüwa monxey monlüy tiül moncanchiün quiaj, noic ajlüy saduceos nejw, alinoic ajlüy fariseos nejw, quiaj tapiüng:

—Teat monxey, xique aton fariseo xic, micual xic fariseo. Xique sajlüy ningüy majaraw wüx sasoeat, cos xique sapiüng ajcüwa mondeow apmapacüw alinoic nüt —aw.

<sup>7</sup> Wüx ndot mapiüng aag ayaj, quiaj witiüt noic mondeac tiül fariseos maquiüjpüw saduceos. Quiaj mbajcatoj ajcüwa nipilan quiaj.

<sup>8</sup> Cos saduceos apiüngüw nipilan landeow lango mapacüw alinoic nüt. At apiüngüw ngo majlüy ángeles, átan espíritus aton ngo majlüy. Nganüy ajcüwa fariseos apiüngüw almajlüy meáwan aag ayaj.

<sup>9</sup> Tepajüw napac cos lajcüyiw. Condom acas monxey mondüy wüx aaga poch tüünd Moisés, aqiüüjpüw tiül fariseos, witiütoj, tapiüngüw:

—Aaga naxey quiaj, ngo majiür nicuajind nisoet. Cos ngo majaraw, jondot miespíritu Teat Dios tendead masaj nej, tengwüy alngün ángel. Ngondom majcüyüüts maquiüjpaats Teat Dios —awüw.

<sup>10</sup> Cos nipilan tapots ajcüyiw, quiaj mbayat a natang nenajiüt, lango majaw cuane marang, ngwüy apmambiyaw a Pablo. Quiaj tapaj miünüw a soldados mawüniw quiaj a Pablo maquiüjpüw andüy niüng acüliw.

<sup>11</sup> Aw alinoic ongwüüts, Teat Jesús tajüiüqichay niüng ajlüy a Pablo, tasaj nej:

—Nde mermbol teat, cos atnej tepiüng xic wüx ningüy tiül Jerusalén, atquiaj netam mepiüng xic wüx tiül Roma aton —aj nej.

*Tayambüw nguineay mambiyaw a Pablo*

<sup>12</sup> Wüx rat tiüt, acas judíos teyambayej nejeyéjan quiaj, tayambüw nguineay mambiyaw a Pablo. Wüx lamaxomüw nguineay apmarangüw, quiaj tayacüw mipochiw nejw müjchiw Teat Dios, tapiüngüw lango metiw lango manganeowüw nicuajind sitiül ngo mambiyaw a Pablo.

<sup>13</sup> Ajcüwa monxey monyacüw mipochiw wüx aaga ngo majneaj apmarangüw quiaj, ajlüyiw maseyme ic miow (40) monxey.

<sup>14</sup> Tambüw majawüw montangtang miteaats at montangtang monajiüt tiül nejw, tasajüw:

—Xicona lanayacan xepochiün nasajan Teat Dios, sapiüngan lango netiün ngo nanganeowan nicuajind sitiül ngo nambiyan a Pablo.

<sup>15</sup> Nganüy indeacan mequiüjpanüw ajcüwa monajiüt tiül icootsa mesajan a

nenajiüt mawün oxep a Pablo maquiüüb miün mayac niüing ijlüyiün, atnej indiüman menguiayüün majneaj cuane arang. Xicona sanajlüyiün ninguiün nambiyān wūxan nganaw mapeay niüing ijlüyiün —awüw.

<sup>16</sup> Naleaing nop micual michiig najtaj a Pablo tanguiay andeacüw ajcüwa nipilan quiaj, nguineay apmarangüw mambiyaw a Pablo. Quiaj tamb, tajmel niüing acüliw soldados müüch manguaiy a Pablo.

<sup>17</sup> Condom Pablo wüx landoj manguaiy, quiaj tapaj nop minatang soldado, tasaj:

—Teat, iqüiüüb aaga nench cam, iyac niüing ajlüy nenajiüt, cos nej andiüm müüch manguaiy noic poch a nenajiüt —aj.

<sup>18</sup> Aaga minatang soldado quiaj taquiüüb mamb a nench andüy niüing ajlüy nenajiüt. Wüx tapeay quiaj, tapiüing:

—Aaga Pablo najlüy tiül manchiüc tapaj xic, tasaj xic naquiüüb miün andüy ningüy niüing ijlüy aaga nench cam, cos nej andiüm masaj ic noic poch —aw.

<sup>19</sup> Quiaj aaga nenajiüt tasap owix a nench quiaj, taquiüüb andüy ninguiün quiriw, tatün manguaiy:

—¿Cuane indiüm mesaj xique? —aj.

<sup>20</sup> Quiaj tapiüing a nench:

—Teat, ajcüwa judíos lamapiüingüw apmasajüw ic mewün oxep a Pablo, mequiüüb andüy niüing apcanchiümoj montangtang monajiüt tiül nejw, atnej andiümüw manguiayiw majneaj cuane arang.

<sup>21</sup> Naleaing ique nde mewan andeacüw nejw, cos ajlüy maseyme ic miow monxey teamacüliw nej axotayéjan. Nejw lamayacüw mipochiw nejw masajüw Teat Dios, lamapiüingüw lango metiw lango manga-neowüw nicuajind sitiül ngo mambiyaw a Pablo. Nganüy landojay, tengual macüliw ic cuane apmepiüing —aj nej.

<sup>22</sup> Condom quiaj aaga nenajiüt quiaj, tasaj a nench majtsor, naleaing tasaj nde masaj nejingund wüx aaga lamüüch nej manguiay quiaj.

*Pablo tüünd mamb andüy teombas a Félix tiül Cesarea*

<sup>23</sup> Ndójan manguaiy, quiaj tapaj ijpüw montangtang ocueaj soldados. Tasaj nejw netam majlüyiw quiaj ijquiw acoic miow (200) soldados, al ermiow gajpowüw (70) montep cawüy, al ijquiw acoic miow monjoy lanzas, majlüyiw quiaj aaga ongwüüts quiaj, cos úmban pojniow apmambüw Cesarea.

<sup>24</sup> At tasaj nejw mayambüw cawüy majtep wüx a Pablo, para mapeay quiaj najneaj, mayacüw nej teowix a Félix, aaga natang nenajiüt tiül Cesarea.

<sup>25</sup> Condom tarang noic nawiw majoyiw mamb. Tiül a nawiw quiaj, apiüing:

<sup>26</sup> “Xique Claudio Lisias, sarang aaga nawiw cam nüüch ic teat Félix, satepeay ic Teat Xan nenajiüt.

<sup>27</sup> Aaga naxey cam ndeaaad, tasapüw nej nipilan judío; tandiümüw mambiyaw nej. Naleaing xique tawüniüs saquiüjpüw xesoldados, cos tajawas nej nipilan romano nej.

<sup>28</sup> Condom tandiümas najaw neol tayacüw nej asoet. Quiaj taquiüjpas andüy niüing ajlüyiw montangtang monajiüt tiül nejw.

<sup>29</sup> Quiaj tajawas tayacüw nej asoet imiün wüx ajlüyay mipochiw nejw. Naleaing nej ngo marang nicuajind leaw netam mandeow wüx, aton ngo metam mamb tiül manchiüc.

<sup>30</sup> Nganüy wüx tanguiayüüs nguineay ajcüwa judíos lamayambüw nguineay mambiyaw aaga naxey quiaj, quiaj xique najénan tujúchitüs miün andüy niüing ijlüy. At lanasajüw ajcüwa monyac nej asoet, mambüw mapiüingüw menguiay cuane asoet aaga naxey quiaj. Tamtámban teat”, aw.

<sup>31</sup> Ajcüwa soldados taquiüjpüw mamb a Pablo aaga ongwüüts quiaj, atnej tasoiquiw, tambüw matüchiw tiül cambaj Antípatris.

<sup>32</sup> Larraw tiüt, quiaj tandilileaw alinomb ajcüwa soldados monjüy tiüt, andüyiw Jerusalén niüing acüliw. Tacueatiw müjchiw ajcüwa montep cawüy a Pablo maquiüjpüw mamb.

<sup>33</sup> Wüx tapeayiw Cesarea ajcüwa soldados, quiaj tujúchiw nawiw a nenajiüt; aton tayacüw teowix nej a Pablo.

<sup>34</sup> Aaga nenajiüt quiaj, wüx landoj mateow a nawiw, quiaj tatün manguaiy a Pablo nguia naw. Wüx landoj manguaiy Pablo naw Cilicia,

<sup>35</sup> quiaj tasaj:

—Najneaj, ndoj sananguaiy indeac, leaw apeayiw monyac isoet —aj.

Condom quiaj tüüch mamb majiürüch a Pablo tiül noic najneaj iüm ocueaj Herodes.

## 24

*Teat Pablo tasaj Félix nguineay arang*

<sup>1</sup> Lamajiür acoquiaw nüt, quiaj tapeay Cesarea aaga natang miteaats nenüt Ananías, aqiüüb acas montangtang monajiüt tiül judíos. Aton aqiüüb nop teat xeech nexom omeaats, nenüt Tértulo. Camüm mapeayiw quiaj, tambüw niüing ajlüy nenajiüt mayacüw asoet a Pablo.

<sup>2</sup> Wüx tapeay maquiüraab miün a Pablo, quiaj tapots andeac a Tértulo mayac asoet. Tasaj a nenajiüt:

—Teat xan, sawawan ique neech namongochiün najneajan; at sawawan ique xeyay najneaj lamerang tiül meáwan cambaj, cos ique xeyay ixom imeaats.

<sup>3</sup> Pares sapiüangan Dios mangüy ic teat Félix, cos meáwan nüt ajlüy najneaj nguia-jantanej.

<sup>4</sup> Nganüy teat, ngana napalan ic xeyay, nandeac xeyay najal, satüniün icueaj teat, menguiay sandeacan.

<sup>5</sup> Xicona lanajawan aaga naxey cam, xeyay ngo majneaj teamarang, xeyay awitich moncüy tiül judíos tiül meáwan cambaj wüx iüt. Nej natang aton tiül noic ajlüy nipilan nasoic nazareno.

<sup>6</sup> Ngome áagan ayaj, aton tandiüm mitsoj leaw nangaj najlüy tiül nadam nangaj iüm tiül Jerusalén. Áag xicona tasapasan, tandiümasan najawan wüx asoet nej, atnej apiüing tiül aaga poch tüünd Moisés tanomb.

<sup>7</sup> Condom, quiaj tajngot a nenajiüt Lisias aqiiüb misoldados nej, najcüyw tajngotoj tanojtüw xicueajiün.

<sup>8</sup> Ndoj, tapiüing netam niünan ningüy niüing ijlüy napiüangan cuane asoet aaga naxey quiaj. Nganüy ique aton teat, alndom metün menguiay nej sitiül naleaing meáwan leaw sapiüangan quiaj —aj.

<sup>9</sup> Quiaj tapiüingüw ajcüwa judíos alquiaj: —Naleaing teat, atquiaj tajlüy meáwan —awüw.

<sup>10</sup> Quiaj aaga nenajiüt tarang owix nej müüch a Pablo mendeac. Quiaj tendeac a Pablo, tapiüing:

—Najneaj teat xan, sanandeac menguiay nguineay sarang, cos sanaw lamajiür xeyay neat irang nenajiüt ocueaj aaga iüt cam.

<sup>11</sup> Xique lamajiür gajpic (12) nüt tatow sapeay Jerusalén narang casa Teat Dios. Aag ayaj alndom metün menguiay sitiül naleaing, tengwüy ngo maleaing.

<sup>12</sup> Nejiw ngome taxomüw xic teasajcüy anaag nipilan; taton ngome tenguiäl sawitich moncüy tiül nadam nangaj iüm, tengwüy tiül alngün sinagoga, tengwüy tiül cambaj.

<sup>13</sup> Nejiw ajcüwa monyax sasoet monlüy ningüy cam, ngondom müjchüw ic mejaw sitiül naleaing meáwan leaw tenguiäl mandeacüw wüx ximbas quiaj.

<sup>14</sup> Leawa xique alndom nasaj ic naleaing, aag ayaj sandüüb leaw taquiaach Teat Jesús, leaw nejiw apiüingüw ngo maleaing. Atquiaj sarang minajiüt Midiosüw xexejchiün monlüy tanomb. Sandüüb opech leaw apiüing tiül a poch tüünd Moisés, al leaw tarangüw mondeac andeac Teat Dios.

<sup>15</sup> Xique sapiüing Teat Dios alinoic nüt apmamacüch meáwan nipilan leaw landeow, masey monrang najneaj, masey monrang ngo majneaj. At nejiw aton atquiaj apiüingüw.

<sup>16</sup> Wüx aag ayaj a xique sayamb nguineay narang najneaj meáwan nüt majaw Teat Dios, al nipilan aton.

<sup>17</sup> Xique, lamajiür acas neat ngo najlüy tiül xecambaj Jerusalén, aag a nganüy tapeayüüs quiaj. Sajoy xeyay cuajantanej nüjchüw nipilan tiül xecambaj jane ngo majjiür. Condom tambas tiül nadam nangaj iüm nayac xechech.

<sup>18</sup> Sal wüx aag ayaj, quiaj taxomüw xic acas judíos monaw Asia, sal tiül nadam nangaj iüm tenguiäl narang atnej netam marangüch. Ngo majlüy quiaj xeyay nipilan, aton ngome tenguiäl süüch majcüy nipilan.

<sup>19</sup> Nejiw ajcüwa nipilan quiaj netam miünuw ningüy niüing ijlüy teat xan, mapiüingüw cuane sawan wüx naquiüjpüw.

<sup>20</sup> Tengwüy joyajiw ajcüwa monxey quiaj, ich mapiüingüw sitiül taxomüw wüx ximbas alngün nisoet, alngün ngo majneaj sarang wüx tajlüyüüs niüing ajlüyiw montangtang monajiüt tiül nejiw.

<sup>21</sup> Tengwüy mapiüingüw ngo majneaj tarangas wüx tandeacas tiül nejiw. Tapiüingas: “Xique nganüy sajlüy ningüy majaraw wüx sasoet, cos xique sapiüing alinoic nüt meáwan nipilan leawa landeow apmamac alinomb”, sajüw —aw.

<sup>22</sup> Aaga Félix lamajaw nguineay ajlüy monyax andeac Teat Cristo; pero cos ngo mandiüm mandondoch nómban, quiaj tasaj nejiw:

—Leaw apeay a nenajiüt Lisias, quiaj sanambich nanguiay meáwan leaw ipiüangan —aj nejiw.

<sup>23</sup> Condom, quiaj tasaj nop minatang soldado maquiüüb alinomb a Pablo majjiür. Tasaj ngondom mapal nejingüind, sitiül aljane minipilan nej a Pablo andiüm mamb majaw nej, ndot aljane andiüm mambeol nej.

<sup>24</sup> Wüx lamajiür acas nüt, quiaj tapeay alinomb a Félix maquiüüb miün mintaj nej Drusila. Aaga najtaj quiaj, judía nej. Ndoj tüüch mamb majpaj a Pablo mandeac manguiayiw wüx mipoch Teat Jesucristo.

<sup>25</sup> Naleaing wüx tasaj nej a Pablo nguineay alndom marangüch najneaj, tasaj nej nguineay anopnop nipilan netam majaw cuane teamarang. Tasaj nej nguineay Teat Dios apmajaw wüx asoet meáwan nipilan alinoic nüt. Quiaj mbayat a Félix, condom tasaj a Pablo:

—Canüy lajlüy, quiür. Alinoic nüt wüx sanajlüyan ndoj sanapaj ic alinomb —aj nej.

<sup>26</sup> At aton aaga Félix teamacül sitiül Pablo apmüüch nej tomiün para tsajmbiüm. Pares catscatsüyan mapaj a Pablo mandeac aweaag.

<sup>27</sup> Wüx lamajiür iüm neat, quiaj tajmel ingow a Félix, tangoch a Porcio Festo marang nenajiüt. Pero aaga Félix cos andiüm majneaj aweaag judíos, pares ngo matsambiich a Pablo.

## 25

*Pablo alteombas a Festo*

<sup>1</sup> Aaga Festo tapeay mayar minajiüt nej. Condom wüx lamajiüt er nüt tatow ndoj ayar minajiüt nej, quiaj tamb andüy Jerusalem imiün Cesarea.

<sup>2</sup> Wüx tapeay Jerusalén, quiaj montangtang miteaats at montangtang monajiüt tiül judíos tambüw majawüw a Festo, mayacüw asoet a Pablo.

<sup>3</sup> Tatüniw ocueaj, tasajüw müüch mamb majanüch a Pablo andüy Jerusalem. Cos nejiw lamandeacüw axotayéjan apmambiyaw tiül tiüü.

<sup>4</sup> Quiaj a Festo tasaj nejiw, Pablo tenguaial ajiürüch tiül manchiüc tiül Cesarea, y nej apmandilil najénan andüy quiaj.

<sup>5</sup> Ndoj tasaj nejiw:

—Sitiül ajlüy acas monajiüt tiül icona alndom mambüw, alndom naquiüjpüw mamb mapiüngüw sitiül naleaing ajiür alngün nisoet aaga naxey quiaj, alngün ngo majneaj arang —aj nejiw.

<sup>6</sup> Festo tacül maseyem ojpeacüw tengwüy gajpowüw nüt tiül Jerusalem, condom quiaj tandilil andüy Cesarea. Wüx larraw tiüt amb alinoic nüt, quiaj chetet tiül apal nej. Ndoj tüüch mamb majanüch a Pablo.

<sup>7</sup> Wüx tapeay maquiüraab miün a Pablo, quiaj sonongotoj niüng ajlüy nej ajcüwa judíos napeayiw imiünw Jerusalem. Quiaj tapots mayacüw asoet a Pablo, mapiüngüw xeyay ngo majneaj arang. Pero ngo maw ocueajiw, cos ngo maxomüw cuane wüx alndom majüquichaw mapiüngüw naleaing meáwan aag ayaj.

<sup>8</sup> Condom, quiaj tandeac a Pablo nguineay arang, tapiüng:

—Xique ngo najiür nicuajind nisoet, ngo narang alngün ngo majneaj leaw apiüng tiül aaga poch tüünd Moisés. At ngo narang alngün ngo majneaj tiül nadam nangaj iüm tiül Jerusalem. Aton ngo nandeac ngo majneaj wüx ombas a César —aw.

<sup>9</sup> Pero a Festo, cos andiüm majneaj majawüw nej ajcüwa judíos, áag tasaj a Pablo:

—¿Indiüm meamb Jerusalem, majaraw wüx isoet quiaj niüng sajlüye? —aj.

<sup>10</sup> Quiaj a Pablo tasaj nej:

—Xique sajlüy tiül iwix, cos ique nop ic nenajiüt ocueaj a César natang nenajiüt tiül Roma. Ningüy netam majaraw wüx sasoet, ngome tiül Jerusalem. Xique ngo narang nicuajind ngo majneaj tiül a judíos, ique aton lamejaw.

<sup>11</sup> Cos sitiül alngün xeyay ngo majneaj sarang, leaw alndom nandeow wüx, xique ngondom napiüng ngo nandeow. Pero cos xique ngo najiür nicuajind sasoet wüx

meáwan leaw lamapiüngüw quiaj, nejin-guind ngondom mayac xic teowixaw nejiw. Nganüy a xique sanamb majaraw wüx sasoet teombas a César, aaga natang nenajiüt tiül Roma —aj nej.

<sup>12</sup> Condom Festo wüx landoj andeac aweaag a monxey monbeol nej wüx leaw arang, quiaj tasaj a Pablo:

—Sitiül indiüm meamb teombas a César tiül Roma, pues najneaj, apmeamb quiaj —aj.

*Pablo alteombas Rey Agripa*

<sup>13</sup> Wüx lamajiüt acas nüt, quiaj tamb tiül cambaj Cesarea nop nenajiüt nenüt Agripa, aquiüüb mintaj nej nenüt Berenice, mete-peayayej maquiüjpüw a Festo.

<sup>14</sup> Tacülüw quiaj xeyay nüt, quiaj a Festo tasaj aaga nenajiüt quiaj nguineay arangüch wüx ombas a Pablo, tasaj:

—Wüx taw a Félix, tacueat tiül manchiüc nop naxey.

<sup>15</sup> Condom wüx tambas Jerusalem, quiaj tambüw majawüw xic ajcüwa montangtang miteaats at montangtang monajiüt tiül judíos. Tasajüw xic natepich asoet aaga naxey quiaj, mandeow.

<sup>16</sup> Quiaj a xique tasajasüw, monajiüt ocueaj Roma ngondom mayac teowixaw nipilan nop najlüy tiül manchiüc mandeow sitiül nganaw manguiay andeacüw monyac nej asoet, cos atquiaj nej alndom mewüney.

<sup>17</sup> Condom nejiw tiünw maquiüjpüw xic miün ningüy. Xique ngome tequiyas; ráwan tiüt amb alinoic nüt, quiaj chetetos najaw wüx asoet nej. Ndoj tüjchiüs mamb majanüch aaga naxey najlüy tiül manchiüc.

<sup>18</sup> Ajcüwa monyac nej asoet, wüx tandeacüw, quiaj tanguiayüüs nguineay andeacüw. Ngo mandeacüw wüx atnej xique tayajcas apmandeacüw.

<sup>19</sup> Nejiw tandeacüw wüx midiosüw nejiw, aton wüx aaga nop naxey tandeow, nenüt Jesús. Naleaing cos a Pablo apiüng aaga naxey quiaj almapac.

<sup>20</sup> Xique ngo naxom ximeaats nguineay najaw wüx aag ayaj, quiaj tatüniüs nanguiy a Pablo. Tasajas sitiül andiüm mamb Jerusalem majaw wüx asoet nej.

<sup>21</sup> Pero nej tapiüng andiüm mamb majaraw wüx asoet nej teombas Augusto César tiül Roma, quiaj tüjchiüs mamb majiürüch; ndoj, wüxan apmatüch sanamongoch mamb andüy teombas a César —aj.

<sup>22</sup> Quiaj tapiüng Agripa, tasaj a Festo:

—Xique aton sandiüm nanguiy andeac aaga naxey quiaj —aj.

Festo tasaj nej:

—Najneaj, oxep apmenguiay —aj nej.

<sup>23</sup> Rat tiüt amb alinoic nüt, quiaj tamb Agripa aquiüüb a Berenice andüyiw awan. Nejiw xeyay najneaj ambüw, aquiüüb nejiw

nanfos nüt. Aton aquiüjpüw meáwan mon-  
ajiüt ocueaj soldados, aquíüjpüw montang-  
tang ombas monxey tiül aaga cambaj quiaj.  
Condom Festo tüüch mamb majanüch miün  
a Pablo.

<sup>24</sup> Wüx lapeay, quiaj tapiüng a Festo:

—Teat Xan Agripa, at icona teat monxey  
leaw iliünan ningüy mequiüjpan xicon,  
nganüy jogüy ijawan aaga naxey cam.  
Xeyay judíos tasajüw xic aaga naxey  
cam xeyay ngo majneaj arang. Átan tiül  
Jerusalén, átan ningüy Cesarea, tepajüw  
apiüngüw aaga naxey cam netam mandeow.

<sup>25</sup> Naleaing xique tajawas nej ngo majiür  
nicuajind nisoet cuane wüx apmandeow,  
aton cos nejay tapiüng andiüm mamb teom-  
bas César tiül Roma; áag tapiüngas sanüüch  
mamb.

<sup>26</sup> At aton cos ngo najaw cuane sanarang  
wüx nawiig nasaj xenatang, áag nganüy  
tapiüngas miün ningüy niüng ijlüyiün, teat  
monxey. At cos sawaj ique Teat Xan Agripa  
alwüx xeyay atam ijlüy. Cos wüx landoj  
mapiüng menguiay nguineay arang, quiaj  
sanajaw cuane alndom narang wüx nawiig.

<sup>27</sup> Cos xique sapiüng ngo majneaj nüüch  
mamb nop najlüy tiül manchiüc sitiül ngo  
napiüng cuane asoet ajiür —aw a Festo.

## 26

### *Pablo tasaj Agripa nguineay arang*

<sup>1</sup> Condom quiaj tapiüng Agripa, tasaj a  
Pablo:

—Nganüy apmendeac mepiüng nguineay  
irang —aj.

Quiaj a Pablo tarang owix nej ndi-  
jchiümoj. Condom quiaj tapots müüch  
mapiüng nguineay arang, tapiüng:

<sup>2</sup> —Teat Xan Agripa, apac ximeaaats cos  
nganüy ningüy niüng ijlüy alndom napiüng  
meáwan cuane sarang, neol tayacüw sasoet  
ajcüwa judíos quiaj.

<sup>3</sup> Aton xeyay apac ximeaaats, cos sawaj  
ique ijaw meáwan leawa xicona nipilan  
judío sarangan, ijaw cuane naél ajlüy tiül  
xicona. Nganüy teat, sandiüm meüç wüx  
menguiay sandeac.

*Pablo tapiüng nguineay tarang wüx  
nganaw mandüüb Teat Jesús*

<sup>4</sup> Meáwan judíos tajawüw nguineay sajn-  
got miün sarang quich, cos xique tatangas  
tiül micual xeüüt, átan tiül xecambaj, átan  
tiül Jerusalén.

<sup>5</sup> At aton tajawüw nguineay xique nde  
wüx sarang nench tajlüyiüs fariseo xic. Aag  
ayaj nejw alndom mapiüngüw wüx aton  
sitiül andiümüw, cos fariseos xeyay apacüw  
wüx marangüw meáwan leaw iün tiül a  
nawiig sajiüran.

<sup>6</sup> Nganüy sajlüy ningüy majaraw wüx  
sasoet, cos xique sapiüng sayac ximeaaats  
wüx nguineay Teat Dios alinoic nüt apma-  
pacüüch meáwan nipilan leaw landeow, at-  
nej tanomb tasaj xexejchiün.

<sup>7</sup> Meáwan micualüw a gajpiüp (12)  
monxey micual Israel apiüngüw naleaing  
aag ayaj aton; áag arangüw, ayambüw Teat  
Dios nüt ongwiiüts. Teat Xan Agripa, xique  
aton sayac ximeaaats wüx aag ayaj atnej  
nejw, áag tayacüw sasoet.

<sup>8</sup> Jow icona, monyac sasoet ¿neol  
tepiüngan Teat Dios ngome apmacüüch  
alinoic nüt nipilan leaw landeowa?

*Pablo tapiüng nguineay tayamb ombas  
minipilan Teat Jesús*

<sup>9</sup> Naleaing xique aton tanomb ngo ma-  
jneaj tarangas, tapiüngas netam narang  
xeyay ngo majneaj wüx ombasüw mondüüb  
Teat Jesús naw Nazaret.

<sup>10</sup> Aag ayaj tarangas tiül Jerusalén. Taya-  
casüw tiül manchiüc xeyay minipilan Teat  
Jesús, cos tajiüras nawiig ocueajiw mon-  
tangtang miteaats narang aag ayaj. At wüx  
tambiyaw minipilan Teat Jesús, at a xique  
aton sal tiül, tapiüngas najneaj mandeowüw.

<sup>11</sup> Ngome nomb tarangas, tawüüchasüw  
tiül meáwan sinagogas, nguineay ndom  
mapiüngüw apmacueatiw mandüjpiw Teat  
Jesús. Cos xeyay tajcüyiüs najawüw; tapots  
nayamb ombasüw masey tiül ngünantanej  
cambaj tiül palpälwüx iüt.

*Teat Pablo tandüy wüx mandeac  
nguineay tandüüb Teat Jesús*

(Hch. 9:1-19; 22:6-16)

<sup>12</sup> Aag ayaj sanarang, ndoj tambas  
sandüy tiül cambaj Damasco, sajoy nawiig  
ocueajiw montangtang miteaats.

<sup>13</sup> Teat Xan Agripa, wüx saleamb tiül  
tiüd lalimnüt, quiaj tajawas noic nar imiün  
tiül cielo, xowüy larraw, alwüx araw ngo  
matnej achech nüt. Nómбан arraj xic  
naquiüjpüw saquiüjpüw.

<sup>14</sup> Quiaj tajmiücas, condom tanguiaiüts  
andec nop nendec, andec wüx ombeay  
hebreo, tasaj xic: “Saulo, Saulo, ¿neol  
tapots ijcüy mejaw xique? Ngo majneaj  
mejcüy, cos ngo majneaj apmemongoch, at-  
nej arang boy wüx atoel, andüüb atileran”,  
aj xic.

<sup>15</sup> Xique quiaj tasajas: “¿Jan ic Teat?” saj.  
Nej tapiüng: “Xique Jesús, leaw ique ten-  
gual ijcüy mejaw.

<sup>16</sup> Nganüy witiür lember. Xique  
tejiüquichayos mejaw xic, cos lanayac ic  
merang xenajiüt, mendeac meáwan leawa  
lamejaw nganüy, at leawa sanüüch ic mejaw  
alinoic nüt,

<sup>17</sup> wüx xique sanawün ic teowixaw nip-  
ilan judío, at tiül pälwüx nipilan niüng  
sanüüch ic meamb nganüy,



<sup>18</sup> para alndom meajchiw majawüw cuane netam marangüw. Cos nganüy ngo majawüw cuane teamarangüw, atnej aliw tiül pojniün. At aton apmesajüw macueatiw marangüw meáwan ngo majneaj ocueaj Satanás quiaj, marangüw najneaj leaw Teat Dios andiüm. Cos netam müjchiw xic omeajtsüw nejiw para alndom nawün asoetiw nejiw. Atquiaj nejiw alndom majlüyw niüng apmajlüyw meáwan leaw apmayar xepoch”, aj xic teat Jesús.

*Pablo tarang leawa tasoic*

<sup>19</sup> Teat Xan Agripa, xique sarang leaw Teat Dios tüüch xic najaw imiün tiül cielo.

<sup>20</sup> Ombas tambas nandeaq nasajüw nipilan monlüy tiül Damasco. Condom tandeacas nasajüw monlüy tiül Jerusalén. Condom tandeacas nasajüw monlüy tiül meáwan cambaj tiül iüt Judea. Ndójwüx tambas nasajüw meáwan palpálwüx nipilan. Tasa-jasüw leaam omeajtsüw macueatiw meáwan ngo majneaj leaw teamarangüw, marangüw najneaj, mayariw andeaq Teat Dios.

<sup>21</sup> Añcan sarang aag ayaj tasapüw xic judíos tiül nadam nangaj iüm tiül Jerusalén; tandiümüw mambiyaw xic.

<sup>22</sup> Pero naleaing cos Teat Dios xeyay ambeol xic, aag saliün najlüy nganüy nüt cam, tealeámban nandeaq Mipoch nej manguaiy meáwan nipilan masey montangtang, masey monguich. Cos xique ngo nandeaq nicuajind pálwüx; xique sandeaq meáwan leaw lamapiüngüw tanomb ajcüwa mondeac andeaq Teat Dios. At Moisés lamandeaq aton nguineay aliüc miün apmajlüy.

<sup>23</sup> Cos lamapiüngüw nguineay aaga Cristo netam mamongoch xeyay ngo majneaj, apmandeow, ndoj nej ombas apmapac tiül mondeow; condom apmüüch manguaiyiw mipoch nej nipilan judío at pálwüx nipilan, cos mipoch nej ambeol nipilan atnej aaga ran ambeol nipilan maxom majaw —aw a Pablo.

*Pablo tandiüm müüch aaga Agripa mayamb Teat Jesús*

<sup>24</sup> Wüx tapiüng a Pablo meáwan aag ayaj, quiaj tendeaq a Festo napac, tasaj a Pablo:

—iNerchach Pablo! lamüüch ic merchach iteowteow nawig —aj.

<sup>25</sup> Quiaj Pablo tasaj nej:

—Ngwüy teat xan Festo, xique ngome nechachiüs, xique sandeaq naleaing leaw alndom majlüy.

<sup>26</sup> Joyaj Teat xan Agripa, nej aton lamajaw meáwan aag ayaj, pares xique ngo nimbol nandeaq manguaiy. Sayaag nej awaw wüx aag ayaj aton cos aag ayaj ngome nexotüy.

<sup>27</sup> ¿Ngwüy cuane ipiüng Teat xan Agripa, ngome naleaing leaw lamapiüngüw mondeac andeaq Teat Diosa? Xique sawaw ique ijaw naleaing aag ayaj —aj.

<sup>28</sup> Quiaj tapiüng a Agripa, tasaj a Pablo:

—iLaliüc meach xic nayar aquiaach Teat Cristo! —aj.

<sup>29</sup> Quiaj tasaj nej a Pablo:

—Masey laliüc tengwüy masey nequiy, Teat Dios andiüm ngome ic miün quiaj, aton nej andiüm meáwan leawa laman-guiayiw sandeaq nganüy cam, aton mayariw mipoch Teat Jesús para majlüyw atnej sajlüy. Pero ngome naoeleranüw naag galen atnej sajlüy cam —aj.

<sup>30</sup> Wüx landoj mapiüng aag ayaj a Pablo, quiaj witiüt aaga natang nenajiüt maquiüüb alinop nenajiüt, at a Berenice, at meáwan montsoton quiaj maquiüjpw.

<sup>31</sup> Condom tawüw andüyw ninguiün quiriw mandeaqüw nguineay apmarangüw. Quiaj tendeaqüw nejeyéjan quiaj, tapiüngüw:

—Aaga naxey quiaj ngo majiür nicuajind asoet cuane wüx apmandeow, at cuane wüx macül tiül manchiüc —awüw.

<sup>32</sup> Condom Agripa tasaj a Festo:

—Aaga naxey quiaj alndom tsajmbiüm sitiül nej ngo mapiüng mamb teombas a César —aj.

## 27

*Teat Pablo tüünd mamb andüy Roma*

<sup>1</sup> Wüx tapiüngüw sanamban sandüyiün tiül iüt Italia, samban tiül nadam müx, quiaj tayacüw a Pablo, at alacas monlüy tiül manchiüc, teowix nop naxey nenüt Julio, natang nej ocueaj noic ajlüy soldados nenüt Augusto.

<sup>2</sup> Condom tajtepasan tiül nop nadam müx naw tiül cambaj Adramitio. Aaga müx quiaj apmamong mbeay acas cambaj tiül Asia. Quiaj tambasan, saquiüjpan mamb teat Aristarco naw tiül cambaj Tesalónica tiül Macedonia.

<sup>3</sup> Amb alinoic nüt, quiaj tatüchasan wüx iüt mbeay cambaj Sidón. Aaga teat capitán Julio xeyay najneaj tarang, tüüch mamb a Pablo matepeay miamigo nej, mambeolüw nej.

<sup>4</sup> Condom nawasan quiaj, tateajquiw a vela, tambasan sandüyiün calüy, tamongan milan iüt Chipre najlüy tiül ndec, samban wüx ombas nonüt, cos xowüy lapac a iünd imiün noleat, ngondom nangochiün.

<sup>5</sup> Wüx lasamongan tiül mindequiw monaw Cilicia, at tiül mindequiw monaw Panfilia, quiaj tajtepasan wüx iüt mbeay cambaj Mira tiül iüt Licia.

<sup>6</sup> Quiaj aaga minatang soldado taxom nop nadam müx naw Alejandria. Aaga müx quiaj apmamb andüy Italia. Quiaj tasaj xicon najtepiün tiül.

<sup>7</sup> Ndoj tawasan quiaj, tambasan teanteáman, tajüyasan xeyay nüt. Tajlüy ngo

natüchiün niüng ajlüy cambaj Gnido, cos aliün mapac a iünd imiün noleat, ngo müüch xicon najüyiün najen. Áag tasapasán andüy cawac, sasapan milan iüt Creta. Condom tamongason samban niüng ajlüy oxing iüt Creta nasoiç Salmón. Sayeyiün tiüt aaga iüt, tandüyasan noleat.

<sup>8</sup> Tambasan sasapan mbeaymbeay iüt amb cawac. Xowüy laél, tajlüy ngo natüchiün mbeay iüt nasoiç Najneaj Puerto. Naw quiaj ngome miünquiaj ajlüy a cambaj Lasea.

<sup>9</sup> Lasaquiyan xeyay nüt, nganüy laliüc matüch maw napac iünd, apmaquind. Tiül aaga nüt quiaj naél majüy müx, áag tapaj nej ocueajiw a Pablo.

<sup>10</sup> Tasaj nejiw:

—Teat monxey, sawaw laliüc matüch a nüt maél majüy müx. Sitiül apmambaats, apmangochiüts xeyay ngo majneaj. Ngome áagan a müx maquiüüb amal nej alndom ndrom ombas, at a icootsa aton alndom mandeowaats —aj nejiw.

<sup>11</sup> Pero aaga minatang soldado tayar leaw andeacüw nejüyich a müx maquiüüb neneay müx, ingow ayar andeac a Pablo.

<sup>12</sup> Cos aton aaga niüng lomboy müx, niüng saxojtan quiaj, ngome najneaj macül quiaj a müx wüx apac iünd, áag xeyayiw nejiw tapiüngüw nawan quiaj, natüchiün najtepiün wüx iüt mbeay cambaj Fenice tiül iüt Creta nacüliün quiaj. Cos aaga niüng lomboy a müx quiaj andüy ombeay nonüt, at najneaj macül quiaj wüx apac iünd.

*Tangoch nejiw nadam iünd tiül ndec*

<sup>13</sup> Wüx tawün nine ncherec imiün cawac, quiaj tapiüngüw najneaj namban. Quiaj tax-aingiw aaga piedra nesap müx. Condom tambasan, sasapan mbeaymbeay iüt Creta.

<sup>14</sup> Naleaing ngome xeyay lasajüyiün, quiaj tangoch xicon noic napac xeech iünd imiün calüy nonüt, atnej leaw alndom mayac ndiüc oic, Euroclidón minüt nej.

<sup>15</sup> Aaga xeech iünd nangaj, tapots mawün a müx, ngondom ngochiün. Quiaj tajlüyasánan maquiüüb xicon a iünd.

<sup>16</sup> Wüx tatüchasan milan noic nine iüt najlüy tiül ndec nenüt Clada, quiaj taxaingasan a nine müx rondon wil a nadam müx, masey taél naxaingüün.

<sup>17</sup> Wüx landoj natepichan tiül nadam müx aaga nine müx, quiaj tatsajcüw pinawan otüeng a müx nandand naag tsapaj las mambeol nej. Condom tawüniw a vela cos imboloj malox xicon wüx noic nawaag tiül ndec nasoiç Sirte. Ndoj quiaj tajlüyasánan maquiüüb xicon mamb a iünd.

<sup>18</sup> Naleaing cos wüx rat tiüt amb alinoic nüt aaga iünd nde asap apac, teamachach xicon omal yow. Quiaj tapots mawijchaw tiül ndec amal a müx para tejyem quiriw.

<sup>19</sup> Wüx amb er nüt, quiaj tawiichasan tiül ndec altigüy leawa netam tiül nadam müx.

<sup>20</sup> Tamong xeyay nüt ngo majüic nüt, ngo majüic ocas, cos xeyay apac aaga xeech iünd. Ndojwüx lanapiüangan lango nawan wüx, sanandeowan.

<sup>21</sup> Wüx lamajüür xeyay nüt ngo netiün, quiaj witiüt a Pablo masaj nejiw, tapiüng:

—Teat monxey, xique tasajas icon sitiül meyariün sandeac ngo mawaats Creta, ngo miünaats mamongochiüts aaga naél cam, aton ngo ndrom ombas nicuajind.

<sup>22</sup> Nganüy sasaj icon nde mermbolan, nde mamix imeajtsan, cos masey a müx apndrom ombas, icootsa nejingüind ngome apmandeowaats.

<sup>23</sup> Cos Xeteat Dios leawa xique sandüüb, tengual narang minajiüt nej, tüüch miün niüng sajlüy nop miängel nej tepood.

<sup>24</sup> Aaga ángel quiaj, tasaj xic: “Pablo, nde mbayamear, cos ique netam memong teombas a César. Langome apmandeow nejingüind leaw almequiüüb tiül müx; cos almaquiüjpüw ic”, aj xic a ángel.

<sup>25</sup> Xique nganüy sasaj icon teat monxey, nde mermbolan, ich mapac imeajtsan, cos xique sayac ximeaats wüx Teat Dios, sawaw naleaing apmajlüy atnej lanasoic.

<sup>26</sup> Nguineayantanej netam majtochiüts wüx alngün nine iüt tiül ndec —aj nejiw a Pablo.

<sup>27</sup> Noic ongwiiüts lamatüch ijquiaw semán sajlüyiün tiül ndec, saleamban tiül ndec nasoiç Adriático, aqiiüüb xicon a xeech iünd. Aleamb pinawan ongwiiüts, quiaj tapiüngüw ajcüwa monrang najiüt tiül müx ayajcüw atnej ajüic laliüc natüchiün iüt.

<sup>28</sup> Quiaj tapeaxiw majawüw nguitow ajal a ndec. Tajawüw atüch nimiow gajponüy (36) metro. Ndoj tajüyasánan alquiripite. Condom tandüyiw wüx mapeaxiw alinomb. Quiaj tajawüw ajüür nimiow ayaíw (27) metro.

<sup>29</sup> Quiaj taloxiw tiüt apiquiw piedra nesap müx amb wüx owil a müx, apmacüliw ram, cos imboloj majtochiw wüx piedra. Nejiw malüy apiüngüw larrow.

<sup>30</sup> Condom ajcüwa monrang najiüt tiül a nadam müx tandiümüw mecuiürrüw macueatiw a müx. Quiaj tawüniw tiüt a nine müx mayacüw tiül ndec, arangüwan atnej ajüic apmaloxiw tiüt nesap müx amb teombas.

<sup>31</sup> Pero teat Pablo wüx tajaw aag ayaj, quiaj tasaj a natang soldado, at misoldados nej:

—Sitiül nejiw ayaj apmecuiürrüw, ngo macüliw tiül müx, icona aton ngondom meriowan wüx —aj nejiw.

<sup>32</sup> Quiaj a soldados tambüw mandojquiw milas a nine müx, mamb nómban.

<sup>33</sup> Condom wüx lajngot chiüjmbaw, quiaj tasaj nejw a Pablo metiw, tapiüng:

—Nganüy amb gajpopec nüt (14) tatow apacaats aiündaats, ngo metiüts nicuajind.

<sup>34</sup> Nganüy netam meretiün, müüch icon mejiüran ipacan. Cos nejingüind ngome apmandeow, ngome apndrom masey nots miondeats imalan —aw.

<sup>35</sup> Wüx landoj mapiüng aag ayaj, quiaj tayar a pan. Condom tüüch gracias Teat Dios niüng ajllyiw. Ndoj cas taquiüw a pan müet.

<sup>36</sup> Quiaj meáwan nejw tajneaj omeajtsüw, tetiw aton.

<sup>37</sup> Leaw sajllyüin tiül aaga nadam müx quiaj, sajllyüin ijquiaw acoc miow ermiow gajponüy (276) nipilan.

<sup>38</sup> Wüx landoj üetiwi paxiün, quiaj tawijchaw tiül ndec meáwan trigo, tejyem alquiriw a müx.

### *Tsoyot tiüt a nadam müx*

<sup>39</sup> Wüx larrow, quiaj tajüic a iüt, naleaing ngo mayajcüw nguiane. Tajawüw aaga iüt quiaj almajiür noic socol ayac püjchiün. Quiaj tapiüngüw sitiül alndom matepichaw quiaj a müx.

<sup>40</sup> Quiaj tandojqüiw milas nesap nine müx, tacueatüwan tiül ndec. Aton tachejtiw aaga las neoeleay remo neleaingüich a müx. Condom tateapiw a vela najllyü teoxing a nadam müx mangoch a iünd. Quiaj tajüy a müx aleáingan andüy tiül aaga socol quiaj.

<sup>41</sup> Naleaing iünd talox xicon andüy wüx noic oxing niüng angochay ndec. Quiaj tajtoch a müx, nómban tajtsot tiüt teombas. Quiaj tapots ajmbaj imiün wüx owil, ajmbaj nej omal yow.

<sup>42</sup> Condom tapiüngüw a soldados mam-biyaw meáwan leaw apmambüw tiül manchiüc ngana mecuiürrüw, cos ndot apmajchiquiaw tiüt majrrocoj.

<sup>43</sup> Naleaing aaga minatang ocueajiw soldados ngo müüch nejw marangüw cos andiüm mawün wüx a Pablo. Quiaj tapiüng jane ndoj ombas ajrroc, ich majchiquiaw tiüt ombas nejw, majtepiw wüx iüt.

<sup>44</sup> Nganüy jane ngondom ombas ajrroc, ich mayambüw xiül tengwüw masey quiriw najmbaj müx leaw axomüw mambüw wüx. Atquiaj tawasan wüx ngo mandeow nejingüind, tumb najtepiün wüx iüt.

## 28

### *Teat Pablo alwüx nine iüt tiül ndec nenüt Malta*

<sup>1</sup> Wüx landoj laümb najtepiün wüx iüt, quiaj tanguiayasan aaga nine iüt tiül ndec quiaj, nenüt Malta.

<sup>2</sup> Ajcüwa nipilan micual iüt moncüü quiaj, najneájan majawüw xicon, tambeolüw xicon xeyay, tajalüw biümb najüetiün cos xowüy laquind, tenguiual ajoet.

<sup>3</sup> Condom tamb a Pablo mayamb nawaag soex mandaab. Wüx tapeay mayac tiül biümb a soex, quiaj taw nop ndiüc naw tiül a soex quiaj, cos larraar mayaag. Quiaj matsamb nej owix nej, rondótan wüx.

<sup>4</sup> Ajcüwa nipilan micual iüt moncüü quiaj, wüx tajawüw aaga ndiüc alrroundom wüx owix a Pablo, quiaj tendeaüw nejeyéjan quiaj, tapiüngüw:

—Aaga naxey quiaj naleaing nembiy nipilan nej. Cos masey laáw wüx, ngo mandeow tiül ndec, nganüy mbich apmandeow; cos midiosaats ngondom müüch macül mapac nop nembiy nipilan —awüw.

<sup>5</sup> Naleaing Pablo tawiüch owix nej andüy tiül biümb, quiaj tajmiüc a ndiüc andüy tiül biümb; ndoj nej ngo marang nej nicuajind.

<sup>6</sup> Nejw tenguiual macüliw cajores apmapep nej, tengwüw cajores apmajmiüc mandeow. Pero wüx paxiüt macüliw ngo majüic marang nej nicuajind; quiaj tambiiüljchiw andeaüw, tapiüngüw Pablo lamidios nej.

<sup>7</sup> Tiül aaga iüt niüng tajtepasan quiaj, ajllyü quiaj miüt nop naxey nenüt Publio. Aaga naxey quiaj nenajiüt nej tiül aaga nine iüt tiül ndec quiaj. Nej tangoch ximbasan, at tüüch xicon nguiane naxojtan najneajay er nüt.

<sup>8</sup> Wüx aaga nüt quiaj tiün andeow miteat a Publio, tasap mats üüch nej nerraar, arang nej nequixquix. Quiaj tamb a Pablo majaw nej, condom tataag orar. Wüx landoj masaj Teat Dios, tayac owix wüx ombas aaga niün andeow quiaj, quiaj tajneaj.

<sup>9</sup> Wüx tanguiayaran aag ayaj, quiaj tapeayiw altigüy moniün andeow monaw tiül aaga nine iüt quiaj majaw nejw a Pablo. Meáwan tajneajiw.

<sup>10</sup> Condom ajcüwa nipilan quiaj, tapac omeajtsüw majawüw xicon, tambeolüw xicon. Ndoj wüx laliüc nawan quiaj, tjüchwi xicon meáwan leaw netam xicon najoyiün.

### *Teat Pablo tapeay Roma*

<sup>11</sup> Wüx laümb arej caaw tatow sacüliün wüx aaga nine iüt tiül ndec, quiaj tawasan quiaj, samban tiül nop nadam müx naw tiül cambaj Alejandria, cos aaga müx quiaj tacülan quiaj wüx nüt aqind iünd. Aaga nadam müx quiaj narangüch wüx oxing jppüw dios, nop nenüt Cástor alinop nenüt Pólux.

<sup>12</sup> Condom tajtepasan wüx iüt tiül cambaj Siracusa. Tacülasan quiaj er nüt.

<sup>13</sup> Ndoj nawasan quiaj, tambasan sapan mbeaymbeay iüt, nómban samban tatüchasan cambaj Regio. Amb alinoic nüt

tawasan quiaj, cos lamawün ncherec imiün quiaj. Quiaj tatüchasan cambaj Puteoli wüx amb ic nüt.

<sup>14</sup> Quiaj taxomasanüw acas monyar andeac Teat Jesús, tasajüw xicon nacüliün quiaj noic semán naquiüjpanüw. Condom nawasan quiaj, tambasan natüchiün tiül cambaj Roma, samban wüx iüt.

<sup>15</sup> Ajcüwa monyar andeac Teat Jesús monaw Roma lamanguiayiw xicona saliücan, quiaj tambüw mangochiw xicon tiül cambaj Foro de Apio, altiül tangochiw xicon tiül cambaj Tres Tabernas. Wüx Pablo tajaw nejiw, quiaj tapac omeaats xeyay, tüüch gracias Teat Dios.

<sup>16</sup> Wüx tapeayasan Roma, quiaj aaga minatang soldado tayac teowixaw monajiüt meáwan monamb tiül manchiüc. Naleaing Pablo tujchiw macül pálwüx anopüyan, tajiür nej nop soldado.

*Teat Pablo tandeac Mipoch Teat Dios tiül Roma*

<sup>17</sup> Laümb er nüt tatow sapeayüün Roma, quiaj tapiüng a Pablo majpajüw miün montangtang tiül nipilan judío leaw aliw quiaj. Condom wüx laümb mapeayiw niüng ajlüy nej, quiaj tasaj nejiw, tapiüng:

—Teat monxey micual xeüf, masey xique ngo narang nicuajind ngo majneaj wüx ombasüw micual miütaats, at ngo napiüng ngo majneaj marangüch meáwan leaw tarangüw mixejchiüts, nganüy micual miütaats tapapüw xic tiül Jerusalén, mayacüw xic teowixaw monajiüt monaw ningüy Roma namb tiül manchiüc.

<sup>18</sup> Nejiw monajiüt wüx laümb manguiayiw nguineay sarang, quiaj tandiümüw matsambijchaw xic, cos ngo maxomüw wüx ximbas nicuajind nisoet para nandeow.

<sup>19</sup> Pero nejiw micual miütaats ngo mandiumüw majawüw tsajmbiün. Pares tapiüngas netam niün ningüy teombas a César majaraw wüx sasoe. Naleaing, xique ngo niün nayac asoet micual xeüf.

<sup>20</sup> Nganüy tapajas icon mewiünan mejawan xic, nasaj icon neol tayacüw sasoe micual miütaats. Nganüy xique tatsaagaranas naag a galen cam, cos sayac wüx ximeaats nacül leaw lamapiüng tiül Mipoch Teat Dios aliüc miün apmajlüy, atnej meáwan icootsa micual Israel teamacüliüts —aw a Pablo.

<sup>21</sup> Nejiw quiaj tapiüngüw:

—Xicona ngo nanguiayüün nicuajind, ngo mapeay alngün nawüig imiün Judea mapiüng wüx ique, aton ngo miün alngün micual miütaats masajüw xicon mandeacüw sitiül ique ngo majneaj temerang.

<sup>22</sup> Naleaing nganüy sandiüman nanguiayüün mesaj xicon nguineay indeac. Cos xicona lananguiayüün nguajantanej

anderac ngo majneaj wüx ombasüw leaw monquiajchay wüx aaga poch quiaj —ajüw nej.

<sup>23</sup> Condom tayacüw alinoic nüt miünüw. Wüx tatüch aaga nüt, quiaj tapeayiw niüng acül nej xeyay nipilan. Nej tamelich masaj nejiw wüx Mipoch Teat Dios leaw taquiaach Teat Jesús, tamelich andeac ümb arraw, ndot laquinüt. At tasaj nejiw nguineay alndom majlüyiw tiül micambaj Teat Dios. Nej tüüch nejiw majawüw nguineay lamapiüng wüx Teat Jesús tiül Mipoch Teat Dios leaw tarang Moisés at leaw tarangüw mondeac andeac Teat Dios.

<sup>24</sup> Altiül tajawüw naleaing, aton tayariw leaw tandeac a Pablo; nganüy altiül ngo mayariw.

<sup>25</sup> Cos ngo mandeacüw nóiquian, altiül tapiüng naleaing, altiül tapiüng ngo maleaing; quiaj tandiümüw majtsoriw. Wüxan nganaw majtsoriw, quiaj tasaj nejiw a Pablo:

—Naleaing lamapiüng tiül Mipoch Teat Dios tarang teat Isaías aaga nendeac andeac Teat Dios, wüx tüüch nej poch a Nangaj Espiritu ocueaj Teat Dios mandeac masaj mixejchiüts. Tapiüng:

<sup>26</sup> Quiür isajüw a cambaj quiaj:

Masey apmenguiayüün naag ilajcan, ngome apmejawan cuane amb apiüng. Masey apmejawan naag iniüjcan, naleaing ngome apmejawan cuane.

<sup>27</sup> Cos ajcüwa nipilan quiaj nadam omeajtsüw,

nelajcüw, pares ngo manguiayiw, amontsotsüw onüjcüw, gana maxomüw majawüw; cos ngo mandiumüw majawüw cuane amb apiüng,

ngo miüchwi olajcüw manguiayiw, at ngo mayacüw wüx omeajtsüw leaw anguiayiw,

cos ngo mandiumüw leaam omeajtsüw wüx aaga ngo majneaj teamarangüw, ndoj marangüw najneaj.

Pares xique ngondom nawün asoetiwiw nejiw, irajüw, aj nej a Isaías.

<sup>28</sup> Nganüy inguiayüün, cos ngo mendüman meyarüün aag ayaj, pares Teat Dios lamüüch mamb masoiqüiw nipilan ngome judíos alndom maw asoetiwiw nejiw. Nejiw mbich apmanguiayiw —aj nejiw a Pablo.

<sup>29</sup> Wüx landoj masaj nejiw aag ayaj a Pablo, quiaj tajtsoriw, tapots asajayej wüx aag leaw tanguiayiw quiaj.

<sup>30</sup> Pablo tacül quiaj palanüy iüm neat tiül nop iüm angüy, xeyay tapac omeaats majaw meáwan leaw tambüw quiaj majawüw nej.

<sup>31</sup> Nej tasaj nejiw nguineay alndom majlüyiw tiül micambaj Teat Dios, at taquiaach nejiw wüx Teat Jesucristo, ngo mimbol

manguaiy jangantanej, nejinguid ngo ma-  
pal nej.

**Poch tarang wüx nawiig San  
Pablo müüch mondüüb Teat  
Cristo monlüy tiül cambaj  
Roma  
ROMANOS**

*Pablo atepeay mondüüb Teat Cristo tiül  
Roma*

<sup>1</sup> Xique nenütiüs Pablo nerangas minajiüt Teat Jesucristo. Teat Dios tayac xic narang miapóstol nej, namb nasaj meáwan nipilan wüx aaga najneaj nanderac nguineay alndom mawüw wüx asoetiw nejiw.

<sup>2</sup> Aaga najneaj nanderac quiaj, aag ayaj tanomb Teat Dios lamapiüng apmajlüy, lamarangüw wüx nawiig ajcüw mondeac andeac nej.

<sup>3</sup> Aaga leawa lamapiüng Teat Dios quiaj, aag ayaj apiüng wüx Miteatiüts Teat Cristo, micual nej. Teat Cristo tajlüy nipilan nej, micual micualüw David.

<sup>4</sup> Tajüic naleaing Micual Teat Dios nej cos alndom marang cuajantanej, y cos Nangaj Espiritu ocueaj Teat Dios tapactüch nej imiün tiül mondeow.

<sup>5</sup> Nej lamambeol xic xeyay, lamüch xic narang nop miapóstol nej namb nasaj nipilan tiül meáwan cambaj wüx iüt mayariw nej andeac, mandüümüw nej.

<sup>6</sup> Icona aton ijlüyiün tiül ajcüwa nipilan quiaj, cos Teat Dios lamayamb icon müüch icon mejlüyiün tiül minipilan Teat Jesucristo.

<sup>7</sup> Xique sarang aaga nawiig cam nüüch icon leawa iliün tiül cambaj Roma, cos Teat Dios ajür icon lasta, aag tayamb icon mejlüyiün micual nej. Miteatiüts Dios y Teat Jesucristo mambeol icon, müüch icon monajneaj tiül imeajtsan.

*Pablo andiüm mamb tiül cambaj Roma*

<sup>8</sup> Xique süüch gracias Miteatiüts Dios wüx minüt Teat Cristo por meáwan icona, cos tiül meáwan cambaj andeacüw nguineay icona ngo mechiwean imeajtsan wüx Teat Dios.

<sup>9</sup> Teat Dios ajaw xique ngo nacueat natün ocueaj nej mambeol icon. Xique xeyay apac ximeeats narang minajiüt nej; cos xenajiüt, aag ayaj nasaj nipilan nguineay lamarang Teat Cristo.

<sup>10</sup> Xique ngo nacueat natün ocueaj Teat Dios malüy alndom namb najaw icon, sitiüü nej andiüm.

<sup>11</sup> Sandiüm namb najaw icon nasaj icon wüx noic mimonajneaj Teat Dios, leaw Nangaj Miespíritu nej alndom müüch icon, mapac imeajtsan wüx nej.

<sup>12</sup> Aag ayaj sasaj icon cos sandiüm membeolayoots mayacaats omeajtsaats wüx Teat Dios.

<sup>13</sup> Xecojow xechijquiaw, sandiüm menguiayiün nguineay xique xeyay sandiüm namb najaw icon, nambeol icon wüx Mipoch Teat Dios, atnej sarang tiül pálwüx nipilan tiül meáwan cambaj. Pero ajlüy cuane mepal xic ngondom namb.

<sup>14</sup> Xique netam nasaj meáwan nipilan nguineay apiüng Teat Dios, masey nipilan griego, masey pálwüx nipilan, masey nipilan mondüy nawiig, masey nipilan ngo majaw xeyay.

<sup>15</sup> Xique sayaag atnej lango naüc wüx sandiüm namb nasaj icon aton monlüy tiül Roma, wüx aaga najneaj nanderac nguineay alndom maw asoeteran.

*Aaga najneaj nanderac alndom mawün  
wüx nipilan*

<sup>16</sup> Aaga najneajay nanderac leawa lamapiüng Teat Cristo, ngo naxing andeac wüx, cos aag ayaj alndom mawün wüx asoet meáwan nipilan leaw apmayar, ombas nejiw a nipilan judío, condom aldemas nipilan ngome judío.

<sup>17</sup> Tiül aaga leawa lamapiüng Teat Cristo quiaj, ajawaats nguineay nej alndom mawün asoetiüts, majlüyiüts ocueaj nej: aag ayaj sitiü mapiüngaats tiül omeajtsaats aag ayaj naleaing, ngo machiweaats omeajtsaats. Cos apiüng tiül Mipoch Teat Dios: "Sitiül aljane naleaing neyar andeac Teat Dios, aag ayaj apmapac", aw.

*Leaw ngo majneaj arangüw nipilan*

<sup>18</sup> Ajawaats nguineay Teat Dios imiün tiül cielo, apmajcüy majaw meáwan nipilan leaw ngo mayar nej andeac, leaw nerang ngo majneaj. Nejiw ngo mayariw leawa naleaing, cos andiümüw marangüw ngo majneaj.

<sup>19</sup> Leaw alndom majaraw wüx Teat Dios, nejiw ajawüw. Cos Teat Dios lamüüch nejiw majawüw aag ayaj.

<sup>20</sup> Cos nde wüx Teat Dios tarang a iüt cam, quiaj tajüic naleaing nej almajlüy, at alndom marang cuajantanej meáwan nüt masey nej ngo maxoram majaraw. Cos wüx meáwan leawa Teat Dios lamarang, nipilan alndom majawüw nej almajlüy. Quiaj nejninguind ngo majiür cuane apmewüyay wüx.

<sup>21</sup> Masey ajcüwa nipilan quiaj ajawüw naleaing Teat Dios almajlüy, nejiw ngo mapiüngüw najneaj tarang, at ngo müjchiw gracias Teat Dios. Ingow ayambüw Teat Dios, nejiw alomboochayej, ayambüw leaw ngo metam. Quiaj nómban ngondom mayacüw omeajtsüw wüx leaw najneaj.

<sup>22</sup> Nejiw apiüngüw ajürüw xeyay fis, pero naleaing nejiw xeyay nechachiw.

<sup>23</sup> Cos ingow müjchiw omeajtsüw Teat Dios leaw almapac, mapiüngüw najneajay ajlüy, nejiw üjchiw omeajtsüw leawa narangüch dios ngome almapac; ajlüyiw atnej nipilan.

At ũjchiw omeajtsŭw narangŭch dios, aag atnej quieç, atnej nimal nejiŭr piqiuw oleaj, atnej nimal nesatatŭy tiŭt ajiŭ.

<sup>24</sup> Aag tacueat nejiw Teat Dios marangŭw meáwan ngo majneaj leaw nejiw andiŭmŭw marangŭw; altiŭl nejiwan quiaj itsojow micuerpojŭw nejiw.

<sup>25</sup> Nejiw arangŭw aag ayaj cos tangowŭjchiw meáwan aaga naleaing leaw apiŭng Teat Dios; tandŭjpiw leaw ngo maleaing. Nejiw ingow ũjchiw omeajtsŭw Teat Dios nerang meáwan leaw almajlŭy, tŭjchiw omeajtsŭw meáwan cuajantanej leaw Teat Dios tarang. Néjan quiaj Teat Dios netam masoic najneajay arang, aton mŭjchiŭts gracias meáwan nŭt. Amén, aag ayaj naleaing.

<sup>26</sup> Por aag ayaj Teat Dios tacueat nejiw marangŭw xeyay monxing majaw nipilan. Montaj y monŭx lango mind anojow, cos andiŭmŭw majiŭrŭw najtaj.

<sup>27</sup> At monxey y monench lango mind aquiŭjpŭw najtaj, cos andiŭmŭw majiŭrŭw naxey. Aag ayaj xeyay monxing wŭx nop naxey majiŭr naxey. Cos arangŭw atquiaj, áag taxom nejiw cuajantanej monandew. Aaga ngo majneaj teamamongochiw quiaj, aag ayaj netam nejiw cos xeyay ngo majneaj arangŭw quiaj.

<sup>28</sup> Nejiw cos ngo mandiŭmŭw mayambŭw Teat Dios mapiŭngŭw netam nejiw, quiaj Teat Dios tŭŭch nejiw marangŭw aaga ngo majneaj amb wŭx omeajtsŭw quiaj, marangŭw leaw ngo metam marangŭch.

<sup>29</sup> Nejiw xeyay arangŭw cuajantanej ngo majneaj, monxey ajiŭrŭw pálwŭx najtaj, montaj ajiŭrŭw pálwŭx naxey. At monxey ajiŭrŭw naxey, montaj ajiŭrŭw najtaj. Altiŭl nerrejchiw, napatŭw, ngo mind majawŭw majiŭr cuajantanej alinop, ambiyaw nipi-lan. Ayambyambŭw moncŭy, newajchaw; andeacŭw ngo majneaj wŭx ombas alinop.

<sup>30</sup> Nejeyéjan quiaj andeacndeacayej wŭx ombasŭw, apaljchaw; ajcŭyiw majawŭw Teat Dios, ngo majiŭrŭw lasta alinop, nelomboochayej, nerangrangayej. Ayambŭw nguineay marangŭw alngŭn ngo majneaj leaw ngo majlŭy tanomb; at ngo mayariw andeac miteatiw, mimŭmŭw nejiw,

<sup>31</sup> nechachiw, ngo majawŭw cuane najneaj, ngo marangŭw leaw apiŭngŭw ap-marangŭw. Ngo mandiŭmŭw nejingund, ngo mawŭniw wŭx omeajtsŭw leaw arang alinop, ngo majiŭrŭw lasta nejingund.

<sup>32</sup> Nejiw ajawŭw naleaing Teat Dios lamapiŭng netam mandeow meáwan leaw nerang atquiaj; ngome áagan arangŭw aaga ngo majneaj quiaj, aton apac omeajtsŭw wŭx alinop apmarang atnej arangŭw nejiw.

## 2

### *Teat Dios ajaw wŭx asoeteran*

<sup>1</sup> Nganŭy sanasaj ic, ngo mejiŭr cuane apmewŭyay wŭx, ¿pues jane ic meyac asoet alinop? Cos wŭx iyac asoet alinop iquiáyan quiaj iyacŭy isoet, cos atanej temerang aton.

<sup>2</sup> Icootsa ajawaats naleaing Teat Dios ajaw monrang ngo majneaj; apmŭŭch mamongochiw ngo majneaj atow nej arangŭw.

<sup>3</sup> Nganŭy ique neryac asoet alinop, ique atanej temerang. ¿Nguineay ipiŭnga, Teat Dios langome apmŭŭch ic memongoch ngo majneaja, ipiŭng apmeriow wŭxe?

<sup>4</sup> ¿Ngwŭy, ique ipiŭng ngo metam ic monajneaj neje, iyaag Teat Dios apmaiŭc wŭx leaw irang, ngome apmajcŭye? Neol ngo mejaw sitiŭl nej teamaiŭc wŭx meáwan, aag ayaj cos andiŭm majaw meyaag xeyay ngo majneaj temerang, mecueat.

<sup>5</sup> Nganŭy cos nadam imeaats, ngo meyaag ngo majneaj teamerang. Atquiaj ique tengual meaach majcŭy Teat Dios, ndoj alinoic nŭt nej apmajŭiquich cuane ngo majneaj netam memongoch wŭx nŭt apchetem majaw wŭx asoeteran.

<sup>6</sup> Quiaj apmŭŭch anopnop atow nej tarang.

<sup>7</sup> Wŭx aaga nŭt quiaj, Teat Dios apmŭŭch mapac meáwan nŭt tiŭl cielo leaw tanaámb arang najneaj, majlŭy najneajay mapac meáwan nŭt.

<sup>8</sup> Nganŭy leaw nelombojchay, leaw ngo mandiŭm mayariw andeac Teat Dios, leaw monrang ngo majneaj; ajcŭw ayaj Teat Dios ajcŭy majaw.

<sup>9</sup> Meáwan nipilan monrang ngo majneaj apmamongochiw xeyay necoy, apmamix omeajtsŭw. Meáwan aag ayaj nipilan judío ombas apmŭŭndiw mamongochiw, andŭŭban a nipilan ngome judío.

<sup>10</sup> Nganŭy meáwan monrang najneaj, Teat Dios apmŭŭch majlŭyiw najneaj, apmasoiquiw najneaj arangŭw, apmŭŭch nejiw majneaj omeajtsŭw. Meáwan aag ayaj Teat Dios ombas apmŭŭch ajcŭwa nipilan judío, ndoj andŭŭban apmŭŭch a nipilan ngome judío aton.

<sup>11</sup> Atquiaj arang Teat Dios atotow, cos ngo mapiŭng wŭx jane nembed jane ngo mem-beat.

<sup>12</sup> Meáwan leaw nerang ngo majneaj wŭx nganaw majlŭy aaga poch tŭŭnd Moisés; pues wŭx Teat Dios apmayac nej asoet, ngome apmasaj nej wŭx aaga poch tŭŭnd Moisés. Pero leaw nerang ngo majneaj masey lamanguaiy aaga poch tŭŭnd Moisés, Teat Dios apmayac nej asoet atnej apiŭng aaga poch tŭŭnd Moisés.

<sup>13</sup> Cos Teat Dios ngo mawŭn asoet jane nenguíayan cuane apiŭng tiŭl aaga poch

tüünd Moisés. Nej awün asoet leaw nerang palan aaga poch.

<sup>14</sup> Jane ngome nipilan judío ngo majiür aaga poch tüünd Moisés. Naleaing wüx arangüw nejeyéjan quiaj atnej apiüng tiül aaga poch, aag ayaj nembeat poch ocueajiw nejiw, masey ngo majiürüw aaga poch tüünd Moisés.

<sup>15</sup> Cos wüx arangüw najneaj atnej apiüng, quiaj ajüic meáwan aaga poch quiaj ajlüy wüx omeajtsüw. Ayajcüw tiül omeajtsüw nejiw aaga nembeat poch quiaj, cos nguiaj leaw omeajtsüw sitiül najneaj arangüw tengwüy ayajcüw ngo majneaj arangüw.

<sup>16</sup> Atquiaj apmajlüy aaga nüt quiaj wüx Teat Dios apmüüch Teat Jesucristo majaw wüx asoetiw nejiw leawa tarangüw axotayéjan. Cos Teat Cristo apmajaw wüx asoeteran atnej tüüch xic nasaj icon.

*Nipilan judío y aaga ley ocueaj Moisés*

<sup>17</sup> Nganüy sanasaj ic jangantanej naw tiül nipilan judío, ique ipiüng judío ic. At ipiüng irang atnej apiüng tiül aaga poch tüünd Moisés. Irangrangüy wüx cos ipiüng ijaw jane nej Teat Dios.

<sup>18</sup> Ijaw cuane andiüm Teat Dios merang, at ijaw cuane najneaj, cos tequiaacharan wüx a poch tüünd Moisés.

<sup>19</sup> Ipiüng alndom metiib mitiüid nop somb; ipiüng alndom meaach majlüy tiül ran nop leaw ajlüy tiül pojniün.

<sup>20</sup> Ipiüng alndom mequiaach jane ngo majaw nicuajind; at alndom mequiaach monguich, cos ijaw cuane apiüng tiül aaga poch tüünd Moisés. Ipiüng aag ayaj tüüch ic merndüy mexom imeaats wüx cuane naleaing.

<sup>21</sup> Sitiül ique iquiaach alinop, ¿neol ngo merquiajchay iquiáyan quiaja? Ique iquiaach nipilan ngo maneed, nganüy a ique tengual erneed.

<sup>22</sup> Ique ipiüng ngondom nop naxey majiür minajtaj nej, at nop najtaj ngondom majiür minaxey nej. ¿Jow a ique neol teranga? At ipiüng ngo mind mejaw narangüch dios. ¿Jow a ique neol teneed aaga nembeat najlüy tiül nangaj iüm ocueaj ajcüwa dioses quiaja?

<sup>23</sup> Irangrangüy, cos ipiüng ijiür aaga poch tüünd Moisés. ¿Neol ngo mejaw, tengual meaach majcüy Teat Dios wüx irang leaw apiüng Moisés ngondom marangüch?

<sup>24</sup> Naleaing tarangüch tiül Mipoch Teat Dios, apiüng: “Nipilan leaw ngome judío andeacüw ngo majneaj wüx ombas Teat Dios cos icona ngo majneaj irangan”, aw.

<sup>25</sup> Naleaing aaga circuncisión irangan, aag ayaj nembeat sitiül iyac wüx imeaats leaw apiüng tiül aaga poch tüünd Moisés. Pero sitiül ngo merang atnej, aaga circuncisión quiaj ngo membeat nicuajind, atanej ngo mejiür masey ijiür.

<sup>26</sup> Sitiül pálwüx nipilan ngome judío leaw ngo majlüy circuncidado ayac wüx omeaats atnej apiüng tiül aaga poch tüünd Moisés, Teat Dios apmajaw nej atanej majlüy circuncidado, masey ngo majlüy.

<sup>27</sup> Masey aljane ngo majlüy circuncidado, sitiül nej arang atnej apiüng tiül aaga poch tüünd Moisés, nej alndom mayac isoet, cos ique irang ngo majneaj, masey ijiür meáwan aaga poch tüünd Moisés narangüch wüx nawüig, masey ijlüy circuncidado aton.

<sup>28</sup> Cos nop ngo majlüy merrey judío nej masey naw tiül nipilan judío, cos aaga circuncisión arangüch wüx cuerpo ngome nembeat sitiül nej ngo mayac wüx omeaats Mipoch Teat Dios.

<sup>29</sup> Pues nop merrey judío, aag ayaj nop neyac wüx omeaats marang leaw apiüng tiül Mipoch Teat Dios. Aton aaga circuncisión quiaj apiüng wüx leawa Nangaj Espíritu arang sitiül nop apmayac wüx omeaats marang najneaj atnej andiüm Teat Dios. Aag ayaj Teat Dios apiüng najneaj arang, masey nipilan ngo mapiüngüw najneaj arang.

### 3

<sup>1</sup> ¿Cuane axomüw wüx nipilan sitiül judío nejiw; aton cuane axomüw wüx sitiül ajlüyiw circuncidado?

<sup>2</sup> Pues xeyay axomüw wüx, cos Teat Dios ombas tüüch nejiw majiürüw Mipoch nej.

<sup>3</sup> Naleaing ngome meáwan nipilan tiül Israel tarangüw atnej apiüng Teat Dios. Nganüy cuane ipiüngan, ¿ndot ngo marangüw meáwan aag ayaj, Teat Dios langome apmarang leaw lamapiüng apmaranga?

<sup>4</sup> Ngwüy, Teat Dios apmarang leaw lamapiüng, cos nej ngo mawaiich, masey meáwan nipilan awaijchaw. Aag ayaj apiüng tiül Mipoch nej, cos apiüng:

Apmajaraw naleaing meáwan leaw indeac. Wüx apmarang wüx isoet, apmapiüngüw ique ngo mejiür nicuajind nisoet, aw.

<sup>5</sup> Sitiül wüx arangaats ngo majneaj, quiaj ajüiquichaats Teat Dios arang más najneaj, ¿cuane apmapiüngaats wüx aag ayaja? ¿Apmapiüngaatsa Teat Dios ngo majneaj arang sitiül apmüüch icoots mamongochiüts ngo majneaja por aaga ngo majneaj arangaats? (Sandeac atquiaj cos nipilan atquiaj apiüngüw.)

<sup>6</sup> ¡Ngwüy, Teat Dios nómban ngondom marang ngo majneaj! Cos sitiül Teat Dios ngo majneaj arang, ¿nguineay apmajaw wüx asoet nipilan?

<sup>7</sup> Nganüy sitiül xique sawaiich, quiaj sajüiquich Teat Dios nómban ngo mawaiich; ¿neol apmaderac wüx ximbas at xic nop nejür nisoete?



<sup>8</sup> Sitiül atquiaj ajlüy, ¿neol ngo marangaats ngo majneaj para majlüy más najneaja? Cos atquiaj andeacüw acas nipilan apiüngüw xicona atquiaj saquiajchiün. Aag ayaj apiüngüwan cos andeacüw ngo majneaj wüx ximbasan. Ajcüwa nipilan quiaj apmamon-gochiw xeyay ngo majneaj cos áag netam nejiw.

*Meáwan icootsa ajüüraats nisoet*

<sup>9</sup> Nganüy cuane ipiüngan, ¿jowa icootsa nipilan judío, más najneaj majaw icoots Teat Diosa, ngo mat icoots meáwan pálwüx nipilana? Aag ayaj ngo maleaing, cos lanapiüng meáwan nipilan arangüw ngo majneaj, masey judíos, masey nipilan ngome judío.

<sup>10</sup> Atcüy apiüng tiül Mipoch Teat Dios: Ngo majlüy nejingund nerang palan najneaj, ngome nop;

<sup>11</sup> nejingund ngo mandüüm majaw leaw andüüm Teat Dios,

nejingund ngo mayamb nej.  
<sup>12</sup> Meáwan nipilan lambiüjlaw wüx arangüw ngo majneaj; nómban lamandüjpiw aaga ngo majneaj tiüü.

Ngo majlüy nejingund marang najneaj, ngome nop.

<sup>13</sup> Xeyay ngo majneaj poch aw teombeayiw nejiw,

atnej najmboc naw tiül niüng amiüraad mondeow.

Oniweaw nejw ayac nejw wüx mewaijchaw.

Apal ombeayiw nejw ajlüy atnej micüy napat ndiüc;

<sup>14</sup> apaijchaw, ngo mandeacüw najneaj poch.

<sup>15</sup> Najénan acuiürrüw mambiyaw alinop.

<sup>16</sup> Nguajantanej mambüw androjchiw ombas cuajantanej, üjchiw mamix omeaatsaran.

<sup>17</sup> Nómban ngondom mayajcüw monajneaj.

<sup>18</sup> Ngo mapiüngüw wüx mimboloj mandüyiw Teat Dios.

<sup>19</sup> Icootsa ajawaats meáwan leaw apiüng tiül aaga poch tüünd Moisés, aag ayaj nembat ocueajiw ajcüwa nipilan leaw ajüürüw aaga poch quiaj. Aaga poch quiaj ajüüquich nguineay meáwan nipilan arangüw ngo majneaj. Aaga poch apal ombeayaran, quiaj nejingund ngondom mapiüng Teat Dios ngondom mayac nej asoet.

<sup>20</sup> At nejingund ngondom mapiüng apmaw asoet nej, cos arang atnej apiüng tiül aaga poch tüünd Moisés. Cos aaga mipoch Moisés quiaj, üüch icoots majawaats cuane nisoet ajüüraats.

*Néjan Teat Dios alndom mawün icoots wüx*

<sup>21</sup> Nganüy Teat Dios lamüüch icoots majawaats nguineay alndom mawün

asoetiiüts. Aaga poch tüünd Moisés ngo mambeol nicuajind, masey naleaing tandec wüx. At mondeac andeac Teat Dios tapiüngüw wüx aag ayaj.

<sup>22</sup> Nganüy ajawaats Teat Dios awün asoet meáwan nipilan monyar andeac Teat Jesucristo. Atquiaj arang Teat Dios wüx meáwan nipilan leaw apmüüch nej omeaats nej, masey judíos, masey jangantanej nipilan.

<sup>23</sup> Cos meáwan nipilan arangüw nisoet, nejingund ngondom matüch mimonajneaj Teat Dios maw asoet nej.

<sup>24</sup> Pero Teat Dios alndom mawün asoetiiüts, ngo metam mangüyiiüts nicuajind, cos Teat Cristo tandeow mawün icoots wüx asoetiiüts.

<sup>25</sup> Teat Dios tayac Teat Cristo mandeow ingow andeowaats maw asoetiiüts sitiül apmüjchiiüts omeajsaats. Atquiaj tarang Teat Dios majüüquich naleaing nej najneaj arang; taiüc wüx meáwan nisoet tajiüraats.

<sup>26</sup> Nganüy nej ajüüquich tanaám najneaj arang cos awün asoet meáwan nipilan leaw üüch omeaats Teat Jesús.

<sup>27</sup> Pares ngondom merangrangayoots, cos ngome ajcan lamarangaats atnej apiüng tiül a poch tüünd Moisés apmaw asoetiiüts; asoetiiüts aw wüx ayariiüts mipoch Teat Cristo.

<sup>28</sup> Quiaj ajawaats Teat Dios lamawün asoetiiüts cos ayariiüts mipoch Teat Cristo, ngome aag arangaats atnej apiüng tiül a poch tüünd Moisés.

<sup>29</sup> ¿Jow Teat Dios, áagan Midiosan nipilan judío neje? ¿Ngwüye, ngome Midiosüw pálwüx nipilan atona? Pues naleaing, nej Midios pálwüx nipilan aton.

<sup>30</sup> Cos Teat Dios nop nej, alndom mawün asoet meáwan nipilan leaw ayar nej andeac, masey ajlüy circuncidado, masey ngo majlüy.

<sup>31</sup> ¿Jow nganüy, cuane apmapiüngaatsa? ¿Alndom mapiüngaatsa aaga poch tüünd Moisés langom metama, cos lamayariiüts andeac Teat Cristo? ¡Ngwüy ngondom mapiüngaats atquiaj! Cos wüx ayariiüts andeac Teat Cristo, arangaats atnej apiüng tiül aaga poch tüünd Moisés. Quiaj ajüüch aaga poch leaw Moisés tüünd naleaing aliün metam.

## 4

*Nguineay Abraham taw wüx asoet*

<sup>1</sup> ¿Jow nganüy nguineay apmapiüngaats wüx mixejchiiüts Abrahama, nguineay taw asoet neje?

<sup>2</sup> Cos sitiül Abraham taw asoet nej ajcan arang najneaj, nej alndom merangrangüy wüx, pero naleaing ngome arangrangüy majaw nej Teat Dios.

<sup>3</sup> ¿Neol cuane apiüng tiül Mipoch Teat Dios wüx aag ayaja? Apiüng: “Abraham tayar andeac Teat Dios, pares taw asoet nej”, aw.

<sup>4</sup> Cos sitiül aljane marang najiüt apmangüyeran minajiüt nej, naleaing aag ayaj ngome üündan, aag ayaj ombeat arang najiüt.

<sup>5</sup> Pero wüx aljane apmüüch omeaats Teat Dios, mapiüng Teat Dios alndom mawün wüx nisoet jangantanej leaw apmaw nej andeac; quiaj Teat Dios apmawün nej asoet cos ayar nej andeac, masey nej ngome aleaic marang para alndom maw wüx.

<sup>6</sup> Aaga Rey David tandeac wüx aag ayaj aton, cos tapiüng najneajay ajlüy leaw Teat Dios apmawün asoetiw nejw masey ngondom marangüw nicuajind.

<sup>7</sup> Rey David tapiüng:  
Najneajay apac omeaats leaw Teat Dios lamawün nej asoet, nómban lango majüic asoet nej.

<sup>8</sup> Najneajay apac omeaats leaw Teat Dios lamasaj nej lango majiür nicuajind nisoet, aw.

<sup>9</sup> ¿Jow nganüy cuane apmapiüngaats wüx aag ayaja? ¿Apmapiüngaats aaga najneajay quiaj, tasoiquiw áagan nipilan judio monlüy circuncidado? ¿Ngwüy aag ayaj aton tasoiquiw ajcüwa nipilan ngome judio leaw ngo majlüyiw circuncidado? Lanapiüng Teat Abraham tawün nej asoet nej Teat Dios cos tayar nej andeac.

<sup>10</sup> ¿Ngüt tajwan asoet nej? ¿Tajwan asoet nej wüx landoj ajlüy circuncidado, ngwüy wüx nganawa? Pues nej tajwan asoet nej wüx nganaw majlüy circuncidado.

<sup>11</sup> Abraham tayar andeac Teat Dios, ndoj quiaj tajlüy circuncidado. Aag ayaj tajlüy para majüiquich naleaing lamayar andeac Teat Dios. Cos Teat Dios lamawün nej asoet wüx nganaw majlüy circuncidado, quiaj a Abraham tiün marang atnej nateataran ocueajiw meáwan monyar andeac Teat Dios, ajcüw leawa Teat Dios lamawün asoetiw masey ngo majlüyiw circuncidado.

<sup>12</sup> Aton Abraham arang atnej nateataran ocueajiw meáwan nipilan monlüy circuncidado, para nejw aton alndom mayariw andeac Teat Dios atnej nej tayar wüx nganaw majlüy circuncidado.

*Teat Dios apmarang leawa lamapiüng sitiül mayariüts andeac nej*

<sup>13</sup> Cos Teat Dios ngome tasaj a Abraham apmüjndiw mayariw micual nej meáwan iüt leaw almajlüy, ajcan andüjpiw aaga poch tüünd Moisés. ¡Ngwüy! Aag ayaj cos ayacüw omeajtsüw wüx Mipoch Teat Dios marangüw leaw apiüng.

<sup>14</sup> Cos sitiül ajcüwan a nipilan monrang leaw apiüng tiül a poch tüünd Moisés apmüjndiw leaw lamapiüng Teat Dios,

quiaj lango metam mayariüts andeac Teat Cristo. At leaw Teat Dios lamasaj Abraham apmüüch, lango membeat aton.

<sup>15</sup> Meáwan nipilan leaw ngo marang atnej apiüng tiül mipoch Moisés üüch majcüy Teat Dios. Nganüy sitiül ngo majlüy aaga mipoch Moisés quiaj, nejinguid ngondom majiür asoet wüx aag ayaj.

<sup>16</sup> Leawa Teat Dios lamapiüng apmüüch quiaj, aag ayaj apmüüch jane neyar nej andeac, apmüüch üüchan. Teat Dios apmüüch meáwan micual Abraham. Aag ayaj ngome ajcüwan judios mondüüb mipoch Moisés, aton apmüjndiw meáwan nipilan ngome judio leaw lamayariw andeac Teat Dios atnej Abraham tayar, cos nej miteatiüts.

<sup>17</sup> Aag ayaj apiüng wüx aton tiül Mipoch Teat Dios, cos apiüng: “Lanayac ic merang miteatiw xeyay palpáwüx nipilan”, aw. Aaga leaw apiüng quiaj, nembeat majaw Teat Dios, aaga Dios leaw alndom mapacüüch alinomb mondeow. Aton nej alndom müüch majlüy cuajantanej masey nganaw majlüy. Aaga Teat Dios quiaj, Abraham tayar nej andeac.

<sup>18</sup> Abraham tayar leaw lamapiüng Teat Dios wüx tapiüng apmajiürüw xeyay micualüw nejw, masey langondom majiürüw. Nej tayar wüx tasoic: “Apmejiüran xeyay micualan”, ajow.

<sup>19</sup> Abraham ngome tachiw omeaats wüx Teat Dios masey langondom majiürüw micualüw nejw, cos tayaag nej latang laliüc mandeow, cos laliüc majiür coic miow (100) mineat nej. Aton Sara mintaj nej ngondom majiür micual nej.

<sup>20</sup> Abraham ngo machiw omeaats mapiüng ngo maleaing leaw lamapiüng Teat Dios. Nej tüüch gracias Teat Dios, tapac omeaats.

<sup>21</sup> Nómban tapiüng naleaing Teat Dios alndom marang meáwan leaw lamapiüng apmarang.

<sup>22</sup> Cos Abraham tapiüng naleaing apmajlüy meáwan leaw lamasoic, áag Teat Dios tawün nej asoet.

<sup>23</sup> Ngome néjan quiaj apiüng tiül Mipoch Teat Dios taw asoet nej,

<sup>24</sup> Aton aag ayaj apiüng wüx icootsa leaw lamayariüts andeac Teat Dios, áag tapacüüch alinomb Miteatiüts Jesús.

<sup>25</sup> Cos Teat Jesús tayacüch teowixaw nipilan mandeow ingow andeowaats, condom tapacüüch nej Teat Dios alinomb para majlüyüts atnej nómban ngome aag arangaats nisoet.

## 5

*Nganüy ajaw icoots Teat Dios atnej ngo majiüraats nisoet*

<sup>1</sup> Nganüy lango majiüraats nisoet majaw icoots Teat Dios; lamawün asoetiüts cos

ayariiüts andeac nej, aton cos ayacaats omeajtsaats wüx Teat Cristo. Najneajay ajlüyiiüts lango majcüy majaw icoots, cos aqüüüjpaats Teat Dios.

<sup>2</sup> At icootsa ajawaats lamaxomaats xeyay monajneaj wüx nej cos tanaámb ayariiüts andeac nej, ngo macueatiiüts. Xeyay apac omeajtsaats cos ajawaats apmajlüyiiüts najneaj maqüüüjpaats Teat Dios.

<sup>3</sup> Ngome áagan ayaj, apac omeajtsaats aton masey amongochiiüts naél. Cos wüx amongochiiüts naél, ambeol icoots xeyay maiücaats wüx cuajantanej.

<sup>4</sup> Sitiül icootsa maiücaats wüx alndom mawaats tiül naél; wüx laawaats tiül aaga naél quiaj, quiaj alndom macüliiüts leaw aliüc miün.

<sup>5</sup> Aaga leaw teamacüliiüts aliüc miün quiaj, aag ayaj naleaing apmajlüy atnej lamapiüng Teat Dios. Cos nej xeyay lamajüür icoots lasta, lamüüch icoots majüüraats Nangaj Miespíritu nej tiül omeajtsaats.

<sup>6</sup> Wüx icootsa nómban ngo majüüraats apacaats, quiaj tatüch a nüt mapiüng Teat Dios, miün Teat Cristo mandeow mawün wüx monrang nisoet.

<sup>7</sup> Naleaing naél maxoram aljane mandiiüm mandeow ingow andeow alinop masey nerang najneaj. ¿Ngwüy naleaingue aljane alndom mapiüng mandeowa ingow andeow nop nerang najneaja?

<sup>8</sup> Nganüy Teat Dios tajüiquich guineay nej ajiüür icoots lasta, cos tüüch miün mandeow Teat Cristo ingow andeowaats wüx aliün marangaats ngo majneaj.

<sup>9</sup> Pares nganüy cos Teat Cristo tandeow taw miqueiej nej para mawün asoetiiüts, Teat Dios lango majcüy majaw icoots.

<sup>10</sup> Cos icootsa nomb tajcüy majaw icoots Teat Dios; nganüy najneaj majaw icoots, cos Micual nej tandeow ingow andeowaats. Nganüy ajlüyiiüts najneajan maqüüüjpaats Teat Dios, apmawaats wüx asoetiiüts cos Teat Cristo almapac.

<sup>11</sup> Ngome áagan, xeyay apac omeajtsaats aton wüx Teat Dios, cos Miteatiiüts Jesucristo tüüch icoots majlüyiiüts nóiquian maqüüüjpaats Teat Dios, lango majcüy majaw icoots.

### *Adán y Teat Cristo*

<sup>12</sup> Cos nisoet tajlüy ningüy wüx iüt imiün wüx nop naxey nenüt Adán, aaga nisoet quiaj üüch mandeowaran. Naw quiaj meáwan nipilan wüx iüt andeowüw, cos meáwan nipilan ajiüürüw nisoet.

<sup>13</sup> Tanomb wüx nganaw majlüy aaga poch tüünd Moisés, meáwan nipilan tarangüw ngo majneaj. Naleaing wüx ngo majlüy mipoch Moisés, nejninguind ngo majmel asoet nej wüx aag ayaj.

<sup>14</sup> Pero naleaing meáwan nipilan tandeowüw ajan wüx Adán aleaw wüx Moisés, masey ngo majüürüw nisoet atnej leaw tajiüür Adán. Aaga Adán quiaj ajlüy landiiüm matnej leaw tapiüurang aliüc.

<sup>15</sup> Leawa Teat Dios tüüch icoots, üüchan, aag ayaj xeyay najneaj, ngo matnej leaw Adán tüüch icoots. Cos sitiül meáwan nipilan andeowüw ajcan tarang nisoet nop naxey, aag ayaj Adán, cuantemas nganüy Teat Dios alndom mawün wüx meáwan nipilan, cos nop naxey, aag ayaj Teat Jesucristo xeyay tajiüür icoots lasta.

<sup>16</sup> Aaga leaw Teat Dios üüchan icoots, aag ayaj ngo matnej leaw tayac icoots wüx nop naxey wüx tarang nisoet. Cos tajmel asoetiiüts ajan wüx aaga nisoet tarang Adán. Nganüy aaga leaw üüch icoots Teat Dios, üüchan, tüüch icoots masey xeyay nisoet arangaats, cos atquiaj alndom maw asoetiiüts.

<sup>17</sup> Sitiül meáwan nipilan netam mandeow ajan wüx aaga nisoet tarang nop naxey, cuantemas nganüy xeyay nipilan apmapacüw por nop naxey. Ajcüw ayaj leaw lamüjndiw majüürüw monajneaj, üjndíwan. Lamawün nej asoetiw Teat Dios cos ayariw andeac nop Teat Naxey aag ayaj Teat Jesucristo.

<sup>18</sup> Atnej nganüy ajlüy noic xeyay ngo majneaj apmamongochiw nipilan, ajcan nop naxey ngo marang leaw apiüng Teat Dios. Atquiaj aton alndom maw asoeteran mapacaran meáwan nüt, cos Teat Cristo xeyay najneaj tarang wüx tandeow wüx cruz.

<sup>19</sup> Cos atquiaj atnej wüx nop naxey ngo marang atnej apiüng Teat Dios, meáwan nipilan lajlüyiw monrang nisoet. Atquiaj nganüy cos nop naxey tarang atnej apiüng Teat Dios, xeyay nipilan apmajlüyiw najneaj majaw nejiw Teat Dios, cos laáw asoetiw nejiw.

<sup>20</sup> Teat Dios tüüch Moisés aaga poch majüiquich ajlüy xeyay nisoet. Naleaing masey nipilan tarangüw xeyay ngo majneaj, Teat Dios tajiüür nejiw lasta xeyay.

<sup>21</sup> Ajawaats meáwan nipilan netam mandeow cos ajiüürüw nisoet, pero Teat Dios tüüch icoots mimonajneaj nej, tajiüür icoots lasta. Nganüy alndom majlüyiiüts najneaj teombas Teat Dios, mapacaats meáwan nüt tiül cielo, cos Miteatiiüts Jesucristo tandeow mawün asoetiiüts.

## 6

*Por Teat Cristo icoots almapacaats, langome aliünaats tiül nisoet*

<sup>1</sup> ¿Cuane apmapiüngaats nganüye? ¿Netam tanaámb marangaats nisoete para alndom majüür icoots lasta Teat Dios?

<sup>2</sup> ¡Ngwüy ngo matquiaj! Cos ajlüyüüts atnej landeowaats. ¿Nguineay landom mandüyüüts wüx marangaats nisoete?

<sup>3</sup> ¿Neol ngo mejawana, meáwan leawa lamayariüts yow, majüquichaats ajlüyüüts nóiquian maquiüjpaats Teat Cristo, aton tajlüyüüts nóiquian maquiüjpaats wüx tandeowa?

<sup>4</sup> Cos wüx ayariüts yow ajlüyüüts atnej tamiürjtaats maquiüjpaats Teat Cristo. Ndoj Teat Dios tapacüüch Teat Cristo, cos nej alndom marang cuajantanej najneaj. Atquiaj icoots aton ajlüyüüts atnej tapacaats alinomb marangaats leaw najneaj, ngo matnej tarangaats nomb.

<sup>5</sup> Sitiül tajlüyüüts nóiquian maquiüjpaats wüx tandeow, naleaing aton apmajlüyüüts nóiquian maquiüjpaats wüx apmapacaats tiül mondeow atnej tapac.

<sup>6</sup> Ajawaats meáwan ngo majneaj tarangaats nomb, aag ayaj atnej tamb wüx cruz nóiquian maquiüüb nej ndrom ombas nómban. Aaga nganüy ngo metam mandüyüüts wüx marangaats leaw ngo majneaj.

<sup>7</sup> Cos sitiül aljane landeow nóiquian maquiüüb Teat Cristo aag ayaj laáw asoet nej.

<sup>8</sup> Cos sitiül tandeowaats maquiüjpaats Teat Cristo, ajawaats aton alinoic nüt apmapacaats maquiüjpaats tiül cielo.

<sup>9</sup> Ajawaats Teat Cristo tapac imiün tiül mondeow, nej langondom mandeow alinomb, nómban ngondom mandeow.

<sup>10</sup> Cos Teat Cristo wüx tandeow tandrooch ombas meáwan nisoet, ndoj wüx tapac alinomb, tapac majlüy nóiquian maquiüüb Teat Dios.

<sup>11</sup> Nganüy icona aton netam meyajcan ijlüyüün atnej nop nandeow, cos nop nandeow langondom marang ngo majneaj. Pero naleaing netam meyajcan lamüüch icon mepacan Teat Dios, cos ijlüyüün nóiquian mequiüjpan Teat Cristo.

<sup>12</sup> Nde merangan ngo majneaj leaw andiüm micuerpojan mayac icon wüx, cos nisoet lango marang minatangan, lango metam merangan leaw andiüm.

<sup>13</sup> At nde meyacan wüx micuerpojan marang ngo majneaj; ingow aag ayaj ijchan imeajtsan Teat Dios. Nej apmüüch merangan najneaj, cos nganüy ijlüyüün atnej lamapacüüch icon alinomb. At netam meajchiün micuerpojan merangan najneaj atnej Teat Dios andiüm.

<sup>14</sup> Nganüy nisoet langondom müüch icon merangan leaw ngo majneaj, cos langome temeyamban mawün icon wüx aaga poch tüünd Moisés. Icona nganüy ijlüyüün tiül mimonajneaj Teat Dios.

*Nop najon marang najiüt ngondom marang andiüman nej*

<sup>15</sup> ¿Jow nganüy cuane apmarangaatsa? ¿Ngome apmacueatiüts arangaats nisoete, cos nganüy lango metam marangaats atnej apiüng tiül aaga poch tüünd Moisés ajcan ajlüyüüts tiül mimonajneaj Teat Dios? ¡Ngwüy ngondom!

<sup>16</sup> Cos icona ijawan sitiül irangan minajiüt alinop ngondom merangan leaw andiüman; netam merangan leaw apiüng neaney najiüt. Atquiaj aton sitiül apmerangan leaw andiüm micuerpojan ndóiwüx apmendeowan. Tengwüy sitiül apmerangan leaw andiüm Teat Dios, nej apmawün isoetiün.

<sup>17</sup> Süüch gracias Teat Dios, cos nganüy ijchan imeajtsan meyariün aaga leawa tequiaacharanan wüx, masey nomb terangan xeyay nisoet.

<sup>18</sup> Temerangan najneaj atnej andiüm Teat Dios; leriowan tiül irangan ngo majneaj leaw terangan nomb.

<sup>19</sup> (Aag ayaj sasaj icon leaw nipilan arang, cos nganaw mejawan nguineay amb leaw teanasa icon quiaj.) Atquiaj atnej nomb teajchiün micuerpojan majlüy tiül nisoet marang ngo majneaj; atquiaj a nganüy ijchan marang najneaj micuerpojan, marang leaw andiüm Teat Dios.

<sup>20</sup> Cos nomb wüx ngondom mecueatiün merangan nisoet, ngondom merangan nicuajind najneaj atnej andiüm Teat Dios.

<sup>21</sup> ¿Naleaing cuane texoman wüx aaga ngo majneaj terangan nomb leaw üüch icon monxing nganüy? Nicuajind ngo mexoman wüx, cos andüy wüx apmayac icon tiül ngo majneaj meáwan nüt.

<sup>22</sup> Nganüy Teat Dios lamawün icon tiül nisoet, lamüüch icon mejlüyüün ocueaj nej. Aag ayaj apmexoman xeyay najneaj nganüy, ndóiwüx apmepacan meáwan nüt niüng ajlüy Teat Dios.

<sup>23</sup> Cos sitiül aljane tanaámb arang nisoet, wüx apmendeow, quiaj apmangüy xeyay ngo majneaj; pero jane apmayar aaga najneajay leaw Teat Dios üüchan, aag ayaj apmapac meáwan nüt tiül cielo maquiüüb Miteatiüts Cristo Jesús.

## 7

*Andeac wüx mongoch owix*

<sup>1</sup> Xecojow xechijquiaw, sasaj icon leaw ijawan wüx a poch tüünd Moisés. ¿Neol ngo mejawana? Cos wüxan aljane aliün mapac netam marang atnej apiüng tiül mipoch Moisés.

<sup>2</sup> Moisés tapiüng nop najtaj netam mayar andeac minoj nej wüx aliün mapac. Pero sitiül minoj nej landeow, quiaj nej lajlüyan, lango membeat aaga poch.

<sup>3</sup> Nganüy sitiül almapac minoj nej, ndoj nej maquiüüb alinop naxey, aag ayaj atnej nop nejüür minaxey nej. Pero sitiül minoj nej landeow, quiaj nej lajlüyan lango membeat aaga poch quiaj, masey majüür alinop minoj nej, aag ayaj ngome nisoet.

<sup>4</sup> Atquiaj icona ijlüyiün nganüy, xecojow xechijquiaw, cos wüx Teat Cristo tandeow, icona atnej tendeowan mequiüjpan aton. Nganüy lango metam mendüjpiün aaga poch leaw tarang Moisés; ijlüyiünan para mendüjpiün alinop, aag ayaj Teat Cristo, cos nej tapac alinomb. Atquiaj ijlüyiün para merangan najneaj atnej andiüm Teat Dios.

<sup>5</sup> Wüx icootsa aliün marangaats leaw andiümdümaats, tandiümaats marangaats ngo majneaj, cos wüx tanguyaiyiüts nguineay apiüng tiül a poch tüünd Moisés, quiaj tajüic xeyay ngo majneaj arangaats, aag ayaj andüy wüx apmayac icoots tiül ngo majneaj.

<sup>6</sup> Nganüy lango metam mandüjpiüts aaga poch tüünd Moisés, cos wüx tandeowaats maquiüjpaats Teat Cristo, quiaj lango metam icoots aaga poch quiaj. Nganüy ajlüyiütsan marangaats leaw andiüm Teat Dios. Cos Nangaj Miespíritu nej lamüüch icoots marangaats najneaj, ngo matnej arangaats nomb, wüx arangaats atnej apiüng tiül aaga poch tüünd Moisés.

#### *Nisoet ngo mandiüm macueat xic*

<sup>7</sup> ¿Jow nganüy nguineay apmapiüngaats wüx aag ayaja? ¿Apmapiüngaats aaga poch tüünd Moisés quiaj, aag ayaj nisoete? ¡Ngwüy, ngome áag! Cos sitiül ngo majlüy aaga poch tüünd Moisés, xique ngome tajawas cuane nisoet. Sitiül aaga poch tüünd Moisés ngo mapiüng: “Nde mendümdüim ocueaj alinop”, ¿nguineay sanajaw sarang nisoet wüx sandiümdüim ocueaj alinopa?

<sup>8</sup> Naleaing aaga poch tüünd Moisés tüüch xic najaw wüx apmandiümdüimaran cuajantanej, aag ayaj nisoet, quiaj xique tandiümdüimas cuajantanej. Pero sitiül ngo majlüy a poch tüünd Moisés ngo majaraw cuane nisoet.

<sup>9</sup> Nomb xique sapiüng salnapan sarang najneaj, cos ngo nayaag ximeats cuane ajlüy tiül aaga poch tüünd Moisés. Naleaing wüx tateowas aaga poch tüünd Moisés, quiaj tajawas sarang nisoet, sajlüy atnej nop nandeow.

<sup>10</sup> Quiaj tajawas aaga poch tüünd Moisés leaw tajlüy para mambeol mapacaran, tüüch xic nayaag atnej lasandeow.

<sup>11</sup> Cos masey aaga poch tüünd Moisés tüüch xic najaw aaga nisoet teanarang quiaj, pero tawaiich xic, cos ngondom nacueat narang.

<sup>12</sup> Naleaing aaga poch tüünd Moisés quiaj, nangaj najneaj; y leaw apiüng netam marangüch, aag ayaj nangaj najneaj aton.

<sup>13</sup> ¿Jow nganüy, aaga poch tüünd Moisés quiaj masey najneaj, pero tiün müüch xic nandeow tiül ngo majneaja? ¡Ngwüy! Nisoet nerang aag ayaj, tüüch xic nandeow tiül ngo majneaj para majüic sarang nisoet, aag tayamb leaw najneaj mejüiquichay wüx. Cos wüx ajaraw cuane apiüng tiül mipoch Moisés, quiaj ajaraw a nisoet nguineay ngo majneaj ajlüy.

<sup>14</sup> Cos ajawaats aaga poch tüünd Moisés, aag ayaj Nangaj Espíritu ocueaj Teat Dios neyac. Nganüy xique cos nipilan xic, sarang leaw nisoet andiüm.

<sup>15</sup> Xique ngo najaw neol tarangas leawa sarang, cos ngo narang leawa sandiüm narang, sarang leawa ngo nandiüm narang.

<sup>16</sup> Pero sitiül sarang leawa ngo nandiüm narang, quiaj ajüic aaga poch tüünd Moisés quiaj najneaj.

<sup>17</sup> Atquiaj ngome xique sarang aaga ngo majneaj quiaj, nisoet leaw sajiür tiül ximeats nerang aag ayaj.

<sup>18</sup> Sajaw xiquian quiaj ngondom narang nicuajind najneaj, masey alwüx ximeats sandiüm narang najneaj, pero naleaing ngondom narang.

<sup>19</sup> Cos ngondom narang najneaj leaw sandiüm narang, sarang ngo majneaj leaw ngo nandiüm narang.

<sup>20</sup> Sitiül sarang leaw ngo nandiüm, ngome xique sarang aag ayaj, nisoet leaw ajlüy tiül ximeats nerang aag ayaj.

<sup>21</sup> Atquiaj wüx sandiüm narang najneaj, quiaj sayaag aliün nandiüm narang ngo majneaj.

<sup>22</sup> Tiül xique, tiül ximeats sandiüm narang najneaj leaw Teat Dios andiüm.

<sup>23</sup> Pero naleaing sayaag altiül xique alngün ngo majneaj leaw ngo müüch xic narang leaw najneaj sayaag tiül ximeats. Aag ayaj nisoet leaw üüch xic najlüy atnej nop najlüy tiül manchiü.

<sup>24</sup> ¡Pares xeyay ngo majneaj ximeats! ¿Nganüy jane alndom mambeol xic nacueat narang aaga ngo majneaj leaw sandiüm? Cos andüy wüx apmambiy xic.

<sup>25</sup> Süüch gracias Teat Dios, cos Miteatiüts Teat Cristo lamambeol xic. Nganüy sayar Mipoch Teat Dios tiül ximeats, masey xecuerpo aliün mandiüm marang nisoet.

## 8

### *Nangaj Espíritu ocueaj Teat Dios ambeol icoots*

<sup>1</sup> Nganüy meáwan mondüüb Teat Cristo lango majmel nicuajind asoetiw. Cos nejüw lango mandiümüw marangüw atnej andiüm micuerpojüw nejüw; nejüw andiümüw

marangwü leaw andiüm Nangaj Espiritu ocueaj Teat Dios.

<sup>2</sup> Cos Dios Nangaj Espiritu, aaga neech icoots mapacaats nóiquian maquiüjpaats Teat Cristo, lamawün icoots tiül nisoet; lango mandeowaats mambaats tiül castigo.

<sup>3</sup> Aaga poch tüünd Moisés ngondom mawün wüx ombasaats nisoet, cos nipilan icoots. Naleaing Teat Dios tawün asoetiüts cos tüüch miün micual nej majlüy nipilan atnej ajlüyüüts. Nej tandeow atnej nichech mangüy asoetiüts. Quiaj tawün meáwan nisoet najlüy wüx ombasaats.

<sup>4</sup> Atquiaj tarang Teat Dios para alndom marangaats palan atnej apiüng tiül aaga poch tüünd Moisés, cos lango marangaats atnej icoyóotsan quiaj andiümaats; nganüy arangaats atnej andiüm Nangaj Espiritu ocueaj Teat Dios.

<sup>5</sup> Cos jane arang atnej néjan quiaj andiüm marang, aag ayaj ayac wüx omeaats leaw andiüm micuerpo nej. Nganüy jane arang atnej andiüm Nangaj Espiritu ocueaj Teat Dios, ayac wüx omeaats leaw andiüm Nangaj Espiritu.

<sup>6</sup> Cos sitiül arangaats atnej icoyóotsan quiaj andiümaats, apmüüch icoots mandeowaats mambaats tiül castigo. Nganüy sitiül arangaats atnej andiüm Nangaj Espiritu ocueaj Teat Dios, apmapacaats meáwan nüt tiül cielo, najneajay apmajlüyüüts.

<sup>7</sup> Pero jane ayac omeaats wüx leawa néjan quiaj andiüm, Teat Dios ngo majneaj majaw, cos ngo mandüüm mandüüb leaw apiüng tiül Mípoch Teat Dios, at ngondom marang.

<sup>8</sup> Atquiaj jane neyac omeaats wüx marang leaw néjan quiaj andiüm, nómban ngondom majneaj majaw nej Teat Dios.

<sup>9</sup> Pero nganüy icona nde merangan leaw icoyónan quiaj indiüman. Sitiül naleaing ijiüran Nangaj Espiritu ocueaj Teat Dios tiül imeajtsan, irangan leaw andiüm Nangaj Espiritu. Nganüy sitiül aljane ngo majiür Nangaj Espiritu tiül omeaats nej, ngome ocueaj nej Teat Cristo.

<sup>10</sup> Nganüy sitiül Teat Cristo ajlüy tiül imeajtsan quiaj imeajtsan almapac cos lamawün isoetiün; pero micuerpojan atnej landeow cos ajlüy tiül nisoet.

<sup>11</sup> Sitiül ajlüy tiül imeajtsan Nangaj Espiritu ocueaj Teat Dios, áag tapacüüch Teat Jesús alinomb imiün tiül mondeow; pues nej aton apmapacüüch alinomb micuerpojan ijiüran nganüy. Cos Teat Dios apmarang aag ayaj naag Miespíritu nej najlüy tiül imeajtsan.

<sup>12</sup> Nganüy xecojow xechijquiaw, ngo metam marangaats leaw icoyóotsan quiaj andiümaats.

<sup>13</sup> Cos sitiül apmerangan atnej indiüman icoyónan quiaj, apmendeowan. Nganüy sitiül apmeajchiün mambeol icon Nangaj Espiritu ocueaj Teat Dios mawün wüx imeajtsan leaw icónan quiaj indiüman merangan, quiaj apmepacan.

<sup>14</sup> Meáwan leaw arang atnej andiüm Nangaj Espiritu ocueaj Teat Dios, ajcüw ayaj micual nejiw Teat Dios.

<sup>15</sup> Cos aaga Nangaj Espiritu lameajndiün quiaj, ngo müüch icon merbolan alinomb mejlüyiün at nejiw najonüw monrang najiüt. Aaga Espiritu lameajndiün quiaj, aag ayaj lamüüch icon mejlüyiün micual icon Teat Dios. Áag nganüy tüüch icon mepiüangan: "¡Xeteatiün Teat Dios!", merawan.

<sup>16</sup> Nejaw Miespíritu Teat Dios quiaj, üüch icoots mayajcaats tiül omeajtsaats icootsa ajlüyüüts micual icoots Teat Dios.

<sup>17</sup> Sitiül ajlüyüüts micual icoots Teat Dios, quiaj apmüjndiüts ocueaj Teat Dios. At apmüjndiüts maquiüjpaats Teat Cristo nóiquian leaw apmüünd. Sitiül apmamongochiüts atnej nej tamongoch, quiaj apmajlüyüüts nóiquian najneajay maquiüjpaats.

<sup>18</sup> Xique sayaag meáwan leaw apmamongochiüts ningüy cam, aag ayaj nicuajind, cos ajawaats apmajlüyüüts xeyay najneaj alinoic nüt tiül cielo.

<sup>19</sup> At meáwan leaw almajlüy tarang Teat Dios, teamacül aaga nüt wüx apmajüiquicharan meáwan micual Teat Dios.

<sup>20</sup> Cos meáwan leaw tarang Teat Dios, aag ayaj lango majneaj nganüy, ngo matnej tajlüy nomb. Atquiaj ajlüy ajan wüx tajlüy nisoet, lango majneaj. Naleaing tengual acüleran aaga nüt wüx meáwan leaw almajlüy apmajlüy najneajay alinomb.

<sup>21</sup> Alinoic nüt meáwan leaw Teat Dios tarang lango ndrom ombas, apmajlüy najneajay alinomb, atnej micual Teat Dios.

<sup>22</sup> Ajawaats meáwan leaw Teat Dios tarang tanomb, nganüy atnej teamamongoch necoy, atnej nop najtaj amongoch necoy wüx apmawiquiach micual nej.

<sup>23</sup> Ngome nejíwan quiaj amongochiw ngo majneaj nganüy, pero icootsa aton amongochiüts, masey ajüüraats Nangaj Espiritu ocueaj Teat Dios tiül omeajtsaats. Aag ayaj üüch icoots majawaats apmajlüyüüts najneaj alinoic nüt. Icootsa aiümaats, teamacüliüts aaga nüt wüx Teat Dios apmajlüyüüts atanej micual nej, andüy tiül cielo. Quiaj apmajüüraats jayats micuerpojaats.

<sup>24</sup> Icootsa tajwanaats wüx asoetiüts cos apiüngaats apmüjndiüts leawa teamacüliüts. Pues sitiül lamaxomaats leawa teamacüliüts, langondom mapiüngaats

tealeámban macüliiüts aag ayaj. ¿Cos jane apmacül müünd leawa lamüünd?

<sup>25</sup> Pero sitiül ngo maxomaats majawaats aaga leawa teamacüliiüts quiaj, netam maiündaats wüx macüliiüts aag ayaj.

<sup>26</sup> Atquiaj aton aaga Nangaj Espiritu ocueaj Teat Dios meábeol icoots wüx ngo majawaats nguineay apmasajaats Teat Dios wüx atajcaats orar. Quiaj Nangaj Espiritu apmasaj Teat Dios masey ngo maxomaats poch alndom mandeacaats.

<sup>27</sup> Teat Dios ajaw omeaatsaran, ajaw nguineay andiüm Nangaj Espiritu wüx atün ocueaj Teat Dios ingow atüniüts, cos nej arang leaw andiüm Teat Dios.

### *Apmajntsopiüüts wüx cuajantanej*

<sup>28</sup> Icootsa ajawaats meáwan leaw amon-gochiiüts, Teat Dios apmambeol icoots, ap-müüch maw najneaj atnej andiüm nej, cos lamapaj icoots mandüjpiüts, marangaats leawa nej andiüm.

<sup>29</sup> Cos meáwan monyar andeac Teat Dios, ajcüw ayaj Teat Dios tarriiüd nejiw wüx nganaw majlüyiw; tayac nejiw majlüyiw at-nej ajlüy Micual nej. Aag ayaj tarang Teat Dios para majlüy Teat Cristo ombas nej tiül meáwan monyar andeac Teat Dios.

<sup>30</sup> Pues ajcüw leawa Teat Dios tajaw wüx nganaw wijquiamoj apmayariw nej andeac, ajcüw ayaj tarriiüd. Ajcüw leawa Teat Dios tarriiüd quiaj, aton tawün asoetiw nómban. At ajcüw leawa tawün asoetiw quiaj, lamüüch nejiw majlüyiw najneajay.

<sup>31</sup> ¿Cuane alndom mapiüngaats wüx aag ayaja? Cos sitiül Teat Dios almaquiüüb icoots, nejingüind ngondom marang al-cuane wüx ombasaats.

<sup>32</sup> Teat Dios ngo mapiüng wüx, tüüch mamb wüx cruz micual nej mandeow mawün asoetiüts; aton ngome apmapiüng wüx müüch icoots meáwan leawa lamapiüng apmüüch.

<sup>33</sup> Jow nganüy ¿jane apmayac nej asoetiw leaw lamarriiüd nejiw Teat Dios? Cos Teat Dios nepiüng najneaj ajlüyiw maquiüjpüw nej.

<sup>34</sup> ¿Jane apmeyac asoetiütsa? Nejingüind, cos Teat Cristo tandeow condom tapac ali-nomb; nganüy ajlüy amb wüx miác Teat Dios niüng tengual masaj Teat Dios mam-beol icoots.

<sup>35</sup> Teat Cristo xeyay ajüür icoots lasta. ¿Nguineay alndom mecueateyoots maquiüjpaats Teat Cristo? ¿Ngwüy, wüx amongochiiüts naéle? ¿Wüx amix omeajt-saatsa xeyaye? ¿Ngwüy, wüx ajcüy majaw icoots nipilana? ¿Wüx aiündaats lopa? ¿Ngwüy, wüx ngo majiüraats apixaatsa? ¿Wüx aliüts tiül naéle, alndom mande-owaatsa? ¿Ngwüy, wüx ambiyaranataatsa?

<sup>36</sup> Wüx aag ayaj apiüng tiül Mipoch Teat Dios:

Ajcan sayariün indeac, sajlüyiün meáwan nüt atnej laliüc nandeowan; cos sajlüyiün at xicon sap najon mandeow, matsambaran.

<sup>37</sup> Pero icootsa, masey amongochiiüts meáwan aaga ngo majneaj quiaj, apma-jntsopiüts wüx cuajantanej naél, cos Teat Dios xeyay ajüür icoots lasta.

<sup>38</sup> Pares xique sawaj majneaj, nicuajind ngondom müüch macueat majiür icoots lasta Teat Dios. Masey apmandeowaats, masey aliün mapacaats; ata ángeles, nimeech, tengwüy leaw amongochiiüts nganüy, tengwüy leaw apmamongochiiüts oxep nawüür,

<sup>39</sup> leaw ajlüy cawüx tiül cielo, tengwüy leaw ajlüy ningüy wüx iüt, tengwüy cuajantanej leaw tarang Teat Dios; nicuajind ngondom müüch macueat majiür icoots lasta Teat Dios cos Teat Cristo tandeow mawün icoots wüx.

## 9

### *Teat Dios tayamb nipilan monaw Israel*

<sup>1</sup> Leawa xique teanasaj icon, aag ayaj naleaing, ngo nawaiich, cos sayar andeac Teat Cristo. Aton Nangaj Espiritu ocueaj Teat Dios üüch xic nayaag tiül ximeaats meáwan aag ayaj naleaing.

<sup>2</sup> Xique xeyay amix ximeaats, ngo ma-jneaj ximeaats.

<sup>3</sup> Nguiaj sayaag malüy xique alndom namb tiül castigo ingow ambüw micual xefiüt, ajcüw xecojow, xechijquaw.

<sup>4</sup> Teat Dios xeyay lamambeol micual xefiüt cos xicona micual xicon cambaj Israel. Teat Dios lamaquiüüb xicon atanej micual nej, tüüch xexejchiün tanomb majawüw nej atnej noic ran. Aton tayac poch maquiüjpüw, tüüch a Moisés aaga poch müüch nejiw majawüw nguineay netam marangüw. Aton tüüch nejiw mayambüw nej, müjchiw nej omeajtsüw, tasaj nejiw aton apmarang meáwan leaw lamapiüng.

<sup>5</sup> Ajcüwa xexejchiün quiaj, imiün tiül ne-jiw tajlüy Teat Cristo, tajiür cuerpo atnej meáwan nipilan, pero naleaing nej Mid-iosüw meáwan leaw almajlüy. Nej netam masoic najneajay ajlüy meáwan nüt. Amén, atquiaj netam majlüy.

<sup>6</sup> Teat Dios tarang leaw lamapiüng tiül Mipoch nej apmarang, pero ngome meáwan nipilan micual Israel naleaing nipilan israel nejiw.

<sup>7</sup> Aton ngome meáwan micual micualüw Abraham naleaing micual nejiw Abraham; cos Teat Dios tasaj Abraham: “Ajcüwa leaw apmasoiquiw naleaing micual, aag ayaj ap-majlüyiw nawüw tiül micual Isaac”.

<sup>8</sup> Aag ayaj apiüing ngome meáwan leawa naw tiül micual Abraham ajcüw ayaj micual Teat Dios; ngwüy, micual Teat Dios aag ayaj jane Teat Dios lamapiüing apmajlüy micual nej, ajcüw ayaj ateoraw tiül micual Abraham.

<sup>9</sup> Cos Teat Dios tasaj Abraham: “Wüx apmatüch aaga nüt tapiüing, saliüc alinomb, quiaj müm Sara apmajiür nop micual nej”, aw.

<sup>10</sup> Ngome áagan ayaj, aton wüx müm Rebeca mintaj Isaac tajlüy teomeaats nej micual nej, tajiür micual nej cuüch, micual aweaag Isaac minoj nej.

<sup>11</sup> Wüx nganaw wijquiamoj a cuüch, nganaw marangüw nicuajind najneaj nicuajind ngo majneaj; quiaj Teat Dios tarriüüd tiül nejw leawa nej tandiüm marang micual nej, ngome aag tarang najneaj tengwüy arang ngo majneaj.

<sup>12</sup> Teat Dios tasaj müm Rebeca: “Aaga natang tiül a cuüch quiaj, apmarang minajüt chingüy”, aj.

<sup>13</sup> Aag ayaj aton apiüing tiül Mipoch Teat Dios, cos Teat Dios apiüing: “Aaga Jacob sajiür lasta, nganüy aaga Esaü ngo mind najaw”, aw.

<sup>14</sup> ¿Jowa nganüy cuane apmapiüngaats wüx aag ayaja? ¿Apmapiüngaats Teat Dios arang ngo majneaja? ¿Ngwüy ngondom!

<sup>15</sup> Cos Teat Dios tasaj a Moisés: “Sanajüür lasta jane xique sandiüm najiür lasta, sanambeol jane xique sandiüm nambeol”.

<sup>16</sup> Aag ayaj ajüiquich nejingüind ngondom maxom monajneaj ocueaj Teat Dios por nejáyan quiaj andiüm, at ngome ajcan alcuane arang, aag ayaj cos Teat Dios tandiüm majiür lasta.

<sup>17</sup> Wüx aag ayaj apiüing tiül Mipoch Teat Dios, cos Teat Dios tasaj a Moisés masaj a Faraón, aaga natang nenajiüt tiül Egipto: “Tayacas ic merang natang nenajiüt, najüiquich wüx imbas nguineay xique alndom narang cuajantanej sitiül ngo marangüch atnej sandiüm. Aag ayaj sanarang para alndom manguiayiw wüx xique meáwan nipilan wüx iüt”, aw Teat Dios.

<sup>18</sup> Atquiaj ajüic nguineay Teat Dios ajüür lasta jane andiüm majiür lasta, aton jane nej andiüm müüch madam omeaats, aag ayaj üüch madam omeaats.

<sup>19</sup> Jondot aljane apmasaj xic: “Sitiül naleaing aag ayaj, ¿neol Teat Dios ayac asoet nipilan wüx arangüw ngo majneaja? cos ngondom mbiüjlam leaw andiüm Teat Dios”, maj xic.

<sup>20</sup> Pero nde mepiüing aag ayaj, ¿cos cuane ic mendiüm mengoch andeac Teat Diosa? Jondot nop xor mendeac masaj nerang nej: “¿Neol terang xic atcüy?” maj.

<sup>21</sup> Nop nerang xor alndom marang leawa nej andiüm marang. Nej alndom marang nop xor natsüjyay ombas, aton alndom marang alinop nawan tiül ndeor, quiaj ngo matsüjyay ombas.

<sup>22</sup> Atquiaj Teat Dios aton alndom müüch majaw nipilan nguineay nej alndom marang leawa nej andiüm. Naleaing nej aiüc wüx leaw arangüw monrang ngo majneaj, pero aton nganaw müüch mamongochiw ngo majneaj ajcüwa nipilan leawa laliüc mandroocheran ombasüw.

<sup>23</sup> Teat Dios arang aag ayaj majüiquich nguineay nej xeyaj najneaj arang wüx ombasaats, cos lamajiür icoots lasta; at lamapiüing majlüyüüts micual nej icoots, majlüyüüts najneajay tiül cielo.

<sup>24</sup> Teat Dios tayamb icoots aton, ngome ajcüwan a nipilan judío; tayamb nipilan ngome judío aton.

<sup>25</sup> Atnej tapiüing Teat Dios tiül a nawiiig tarang Oeas:

Leawa tanomb ngome xenipilan, nganüy sanasajüw xenipilan; at ajcüwa leaw ngo najiürüw lasta nomb, nganüy sanajüürüw lasta.

<sup>26</sup> Aton niüing tasajasüw: “Ngome xecambaj icon”, nganüy sanasajüw xecual icon, cos xique Dios almapac.

<sup>27</sup> Pero Isaías tandeac wüx nipilan israel aton, wüx tapiüing: “Masey apmajlüyiw xeyaj micual micualüw Israel atnej wiiüd mbeay ndec, pero naleaing nejw napateayiw apmawüw wüx asoetiw.

<sup>28</sup> Cos Teat Dios najénan apmajaw wüx ombasüw meáwan nipilan; apmüüch mamongoch ngo majneaj jane ngo mayar nej andeac”, aw.

<sup>29</sup> Wüx aag ayaj nde tanomb tandeac Isaías wüx tapiüing:

Sitiül Teat Dios najlüy tiül cielo y nerang cuajantanej, ngo mawün wüx nejingüind majlüyiw micual nej,

quiaj xicona landroj ximbasan atnej meáwan nipilan tiül ajcüwa cambaj Sodoma y Gomorra ndrot ombasüw.

*Alndom mawüw wüx asoetiw nipilan judío*

<sup>30</sup> ¿Cuane apmapiüngaats nganüy? Sandiüm nasaj icon, ajcüwa nipilan leaw ngome judíos nganüy alndom maw asoetiw nejw nómban. Masey ngome nejw ayambüw aag ayaj, pero naleaing apmaw asoetiw nejw sitiül apmayacüw omeajtsüw wüx Teat Dios.

<sup>31</sup> Pero ajcüwa nipilan israel leaw teamarangüw atnej apiüing tiül aaga poch tüünd Moisés, nejw ngondom maw asoetiw nejw wüx aag ayaj.



<sup>32</sup> ¿Pero neola? Cos nejiw masey teamarangüw atnej apiüing tiül aaga poch tüünd Moisés, ngo mayacüw omeajtsüw wüx Teat Dios. Arangüwan, cos lasap ombasüw wüx cuajantanej leaw arangüw. Ngo mandüümüw mayariw andeac Teat Cristo, aaga apiüing tiül Mipoch Teat Dios nasoic “noic piedra najtocharan wüx”.

<sup>33</sup> Aag ayaj apiüing Teat Dios tiül Mipoch nej, cos apiüing:  
Xique sanayac wüx tücc nenüt Sion noic piedra najtocharan wüx, najmiüccaran wüx;  
jangantanej leaw apmayar nej andeac, ngome apmaxing.

## 10

<sup>1</sup> Xecojow xechijquaiw, xique naleaing sayac wüx ximeaats malüy nipilan israel mawüw wüx asoetiwiw nejiw, pares satün ocueaj Teat Dios mambeol nejiw.

<sup>2</sup> Xique alndom napiüing nejiw xeyay ayambüw Teat Dios atnej ajlüyay marangüw, pero aag ayaj ngo matnej apiüing Teat Dios.

<sup>3</sup> Nejiw ngo majawüw nguineay Teat Dios tarang para mawün asoetiwiw nejiw. Apacüw wüx andüümüw marangüw cuajantanej leaw ajlüyay marangüw para mawüw wüx asoetiwiw nejiw. Aag ngo mandüümüw marangüw atnej apiüing Teat Dios.

<sup>4</sup> Cos Teat Cristo tarang meáwan leaw apiüing tiül aaga poch tüünd Teat Moisés, nganüy meáwan monyar nej andeac, apmaw wüx asoetiwiw nömban.

<sup>5</sup> Teat Moisés tarang tiül mipoch nej mapiüing nguineay alndom majlüyaran najneaj teombas Teat Dios, cos tapiüing: “Jane apmarang palan meáwan leaw apiüing tiül a poch cam apmamac”.

<sup>6</sup> Nganüy leaw tapiüing nguineay Teat Dios alndom mawün asoetiwiws ajcan ayariüts andeac Teat Cristo apiüing: “Nde mepiüingan tiül imeajtsan: ¿Jane apmamb cawüx tiül cielo? —cos aag ayaj atnej para müüch miün Teat Cristo alinomb—;

<sup>7</sup> tengwüy mepiüing: ¿Jane apmamb tüüta?” —cos aag ayaj atnej majtep Teat Cristo alinomb imiün tiül mondeow.

<sup>8</sup> ¿Nguineay apiüing aag ayaja? Apiüing: “Aaga poch leaw alndom mawün isoetiwiw, aag ayaj ajlüy tiül imeajtsan, indeacan wüx”. Aaga poch quiaj leawa sasajan icon netam meyariün, meyacan wüx imeajtsan.

<sup>9</sup> Cos sitiül apmepiüing Teat Jesús, aag ayaj Cristo nej leawa tapiüing aliüc, aton sitiül mepiüing tiül imeaats Teat Dios tapacüch nej naw tiül mondeow, quiaj apmeriow wüx isoet, lango meamb tiül castigo.

<sup>10</sup> Cos wüx nop ayar andeac Teat Jesús con omeaats, quiaj Teat Dios lajneaj majaw nej. Pero aton netam masaj nipilan nguineay tawün nej wüx Teat Jesucristo.

<sup>11</sup> Tiül Mipoch Teat Dios apiüing: “Meáwan monyar andeac Teat Cristo, ngome apmamingoch alngün monxing”, aw.

<sup>12</sup> Teat Dios ngo mayac nipilan judío pálwüx, nganüy pálwüx nipilan griego, cos nop Dios ajlüy ocueaj meáwan nipilan; nej xeyay ambeol meáwan monyambüw nej.

<sup>13</sup> Aag ayaj aton apiüing tiül Mipoch Teat Dios: “Meáwan jane apmasaj Teat Dios mawün nejiw wüx, aag ayaj apmaw asoetiwiw nejiw”.

<sup>14</sup> Sitiül nganaw mayariw andeac Teat Cristo, ¿nguineay alndom masajüw Teat Cristo mawün nejiw wüxe? Sitiül nganaw manguiayiw wüx Teat Cristo, ¿nguineay alndom mayariw andeac neje? At sitiül nejingüind ngo mamb masaj nejiw, ¿nguineay apmanguiayiw wüx neje?

<sup>15</sup> Cos sitiül ngo müjndiw mambüw, ¿nguineay alndom mandeacüw wüx neje? Wüx aag ayaj apiüing tiül Mipoch Teat Dios: “¡Najneajay oleaj, najneajay arang leaw apmamb masaj nipilan aaga najneaj poch leaw apiüing nguineay Teat Dios alndom mawün nipilan wüx asoetiwiw!”

<sup>16</sup> Pero naleaing ngome meáwan nipilan ayariw aaga najneajay poch, cos atnej tapiüing teat Isaías: “Teat Dios, nejingüind ngo mayar sandeacan”, aw.

<sup>17</sup> Pues jangantanej alndom mayar aaga najneajay poch wüxan anguiay; y nipilan apmanguiayiw aaga najneajay poch wüx aljane apmasaj nejiw wüx Teat Cristo.

<sup>18</sup> Nganüy sapiüing: ¿Neol, nganaw manguiayiw andeac Teat Dios ajcüwa nipilan? ¡Naleaing nejiw lamanguiayiw! Cos aag ayaj aton apiüing Mipoch Teat Dios:

Meáwan nipilan tiül palpálwüx cambaj lamanguiayiw andeacüw nejiw,  
y aaga poch quiaj tanguiyaran meáwan wüx a iüt cam.

<sup>19</sup> Pero sapiüing alinomb: ¿Jow Israel, ngo majawüw wüx aag ayaja? Ngwüy tajawüw, cos Teat Dios tapiüing tiül aaga poch tüünd Moisés:

Xique sanüüch icon mejcüyiün wüx ombasüw alinoic nipilan imiün alinoic iüt;

sanüüch icon mejcüyiün mejawan ajcüwa nipilan ngo mandüümüw manguiayiw wüx Teat Dios.

<sup>20</sup> Aton Teat Isaías tapiüing:

Ajcüwa nipilan leaw ngo mayambüw xic, taxomüw xic;

y leaw ngo matüniw manguiayiw wüx xique, tüjchiüs majawüw xic.

<sup>21</sup> Teat Isaías wüx andeac wüx Israel, apiüing: “Pal nüt tandiquias xiwix napajüw mandilileaw mayambüw xic, pero nejiw ngo mandüümüw, ngo mayariw sandeac”, aw Teat Dios.

## 11

*Altiül nipilan israel tawüw wüx asoetiw*

<sup>1</sup> Nganü sanatün nanguiyai icon: ¿Cuane ipiüangan, naleaingue, Teat Dios lango mandium micambaj neje Israel? ¡Ngwüy ngome atquiaj! Cos xique aton nawas tiül nipilan israel, acualaats xic teat Abraham, nawas tiül micual teat Benjamín.

<sup>2</sup> Teat Dios ngome lamacueat minipilan nej, cos nde tanomb tayamb nejiw. ¿Ngwüy ngo mejawan nguineay apiüing teat Elías tiül Mipoch Teat Dios wüx nej tasaj Teat Dios wüx aaga ngo majneaj arangüw Israele?

<sup>3</sup> Tapiüing: “Teat Dios, lamambiyaw ajcüwa monxey mondeac indeac, lamajar-rijchaw meáwan miartül, y xiquian quiaj saliün napac, pero andiümüw mambiyaw xic aton”, aw.

<sup>4</sup> Pero Teat Dios tapiüing: “Aliün najiür ayaíw mil nipilan leaw ngo maquiejliw micosüw nejiw teombas aaga narangüch dios nenüt Baal”, aw Teat Dios.

<sup>5</sup> At nganü aliün majlüy noic ajlüy nipilan leaw Teat Dios tarriiüd nde ajneaj omeaats, andiüm mambeol nejiw.

<sup>6</sup> Cos Teat Dios tajiür nejiw lasta, quiaj tayamb nejiw majlüyiw micual nej; y wüx arang aag ayaj, quiaj ajüic nejiw ngo marangüw nicuajind para maxomüw aaga monajneaj quiaj. Cos sitiül aljane netam marang aleaic, quiaj ajüic ngome üündan.

<sup>7</sup> ¿Condom cuane apmapiüngaats? Alndom mapiüngaats altiül nipilan israel tandiümüw maw asoetiw nejiw, pero ngo maxomüw; áagan ajcüwa leaw Teat Dios tarriiüd, tajwan asoetiw nejiw; pero alegüy nipilan tadam omeajtsüw.

<sup>8</sup> Atquiaj apiüing tiül Mipoch Teat Dios: “Teat Dios tüüch nejiw majlüyiw atnej ngondom mayambüw omeajtsüw wüx nej; ajlüyiw atnej nop somb ngo maxom majaw; ajlüyiw atnej nop laag ngo manguiay. Atquiaj aliün majlüyiw nganü”, aw.

<sup>9</sup> Aton teat David tapiüing wüx nejiw: Ich mandrooch nej ombasüw, cos palüy ambüw tiül nangos nüt.

Ich mandeowüw atnej cüet andeow wüx asap nej ndoc wüx ngo mateots andeow.

Ich mamongochiw leaw netam nejiw.

<sup>10</sup> Ich majlüyiw atnej nesomom oniüjcüw, ngo majawüw cuane teamarangüw.

Ich mamongochiw ngo majneaj meáwan nüt atnej nop naxey anmejquien wüx amal naüm.

*Nguineay alndom mawüw wüx asoetiw nipilan ngome judío*

<sup>11</sup> Nganü satün nanguiyai: ¿Jowa cambaj Israel, ajcan ngo mayariw andeac Teat Dios, lamacueat nejiw nómban? ¡Ngwüy ngo matquiaj! Cos nejiw tarangüw ngo

majneaj, ngo mayariw andeac Teat Cristo, quiaj Teat Dios tawün wüx asoetiw xeyay nipilan ngome judío. Atquiaj tarang Teat Dios müüch mandiumüw a nipilan judío mawün nejiw wüx asoetiw Teat Dios.

<sup>12</sup> Sitiül ajcan nipilan judío ngo mayariw andeac Teat Cristo, pares Teat Dios tawün wüx asoetiw xeyay nipilan ngome judío, ¡cuantemas wüx nejiw apmayariw andeac Teat Cristo xeyay najneajay apmajlüyiw!

<sup>13</sup> Nganü icona ngome nipilan judío icon, sanasaj icon Teat Dios tayac xic namb nasaj icon wüx Mipoch Nej, xique sayac wüx ximeaats narang najneaj leaw tündiüs narang.

<sup>14</sup> Xique sandiüm, malüy micual xefüt majawüw nguineay iyamban Teat Cristo, y mandiumüw aton mayariw andeac nej, para mawüw wüx asoetiw.

<sup>15</sup> Teat Dios tawün wüx asoetiw xeyay nipilan ngome judío, cos nej tacueat a cambaj Israel. Jow nganü wüx Teat Dios apmawün wüx nipilan judío, ¿nguineay apmajlüy? Apmajlüy najneajay, atnej wüx apacaran jane landeow.

<sup>16</sup> Sitiül aaga pan narangüch ombas apmajmel marang nichech ocueaj Teat Dios, pues aldemas pan nangaj aton. Sitiül noic owil xiül almapac y nangaj mioxiich nej, mipüüig nej aton almapac, nangaj.

<sup>17</sup> Altiül nipilan judío ajlüyiw atnej noic owil najneaj xiül nenüt olivo; nganü icona nipilan ngome judío ijlüyiün atnej noic owil olivo najntsopeáyan tiül xiül. Pues tandojqüüt mipüüig a najneaj xiül olivo quiaj, condom tapech mipüüig najntsopeáyan xiül wüx aaga najneaj xiül quiaj. Nganü almapac mipüüig aaga najntsopeáyan xiül cos ayar miyow mioxiich aaga najneaj olivo quiaj.

<sup>18</sup> Nganü icona nipilan ngome judío, nde merangrangayon wüx mejawan nipilan judío. Ich leaam imeajtsan aaga newün isoetiün ngome naw tiül icona; mioxiich nej nipilan judío. Icona ngo meajchiün mapac aaga xiül; más naleaing mioxiich aaga najneaj xiül üüch icon mepacan.

<sup>19</sup> Jondot nganü icona nipilan ngome judío apmepiüangan: “Naleaing, pero Teat Dios tandoig talox ningüün nipilan judío para mapech xicon wüx; nganü sajlüyiün najneajay ngo mat nejiw”, merawan.

<sup>20</sup> Naleaing, pero icona ngome alwüx ijneajiün, cos Teat Dios tandoig nejiw, tacueat nejiw ajcan ngo mayariw andeac. Nganü icona, Teat Dios lamawün icon wüx isoetiün cos teyariün andeac nej. Pero nde merangrangayon mejawan nejiw, netam mermbolan mendüyiün Teat Dios.

<sup>21</sup> Cos sitiül Teat Dios ngo majiür lasta mawün wüx omeaats nej leawa tarangüw nipilan judío, cuantemas te icona ngome

apmajiür icon lasta sitiül ngo meyariün nej andeac.

<sup>22</sup> Nğanüy ich leaam imeajtsan Teat Dios xeyay najneaj omeaats, pero at aton alndom majcüy, mapaj ocueajiiüts. Naleaing xeyay tajcüy majaw jane ngo mayar nej andeac, pero tajiür icon lasta. Nej ngome apmacueat majiür icon lasta sitiül tanaámb meyariün andeac nej, pero sitiül ngwüy, nej apmacueat icon aton.

<sup>23</sup> Pues nejw nipilan judío, ndot apmandilileaw mayariw andeac Teat Dios, nej apmaquiiüb nejw mambeol nejw alinomb. Aag ayaj atnej apmapech nejw alinomb tiül aaga najneaj owil olivo. Cos Teat Dios alndom marang leaw nipilan ngondom marang.

<sup>24</sup> Sitiül Teat Dios lamaquiiüb icon leaw ngome judío, mejlüyüin micual nej nóiquian mequiiüjpan nipilan judío cos teyariün nej andeac; cuantemas nğanüy apmaquiiüb alinomb nipilan judío leawa tacueat, sitiül apmayariw nej andeac.

*Ndójwüx a cambaj Israel apmajwanüw wüx asoetiw*

<sup>25</sup> Xechijquaiw xecojow, xique sandiüm nüüch icon mejawan leaw Teat Dios ngo müüch icon mejawan nde tanomb; pero nde mepiüangan icona xeyay lerndüyüin. Cos netam mejawan masey altiül nipilan judío xowüy ladam omeajtsüw nğanüy; pero aag ayaj apmajlüy leaw apalam jane apmayariw andeac Teat Dios monaw tiül nipilan ngome judío.

<sup>26</sup> Condom Teat Dios apmawün wüx asoetiw cambaj Israel, atnej nomb tapiüing Teat Dios tiül minawiiig nej, cos apiüing:

Aaga newün wüx asoeteran aliüc imiün Sion,

quiaj apmawün asoetiw meáwan micual a Jacob, macueatiw arangüw ngo majneaj.

<sup>27</sup> Quiaj apmümb majlüy meáwan leaw tasanüw apmajlüy, wüx sanawün asoetiw nejw.

<sup>28</sup> Cos cambaj Israel ngo mayariw nej andeac, áag tacueat nejw Teat Dios, quiaj tawün icon wüx isoetiün. Naleaing Teat Dios aliün majiür lasta Israel cos tarriiüd mixejchiw nejw.

<sup>29</sup> Teat Dios ngo mangowüüch leaw nej lamapiüing apmarang, cos leawa nej lamapiüing apmüüch, aag ayaj apmüüch. At leaw nej lamapiüing micual nej, aag ayaj micual nej.

<sup>30</sup> Icona nipilan leaw ngome naw tiül Israel, icona nomb ngo meyariün andeac Teat Dios, pero nğanüy lamajiür icon lasta, cos nipilan judío ngo mayariw nej andeac.

<sup>31</sup> Nğanüy icona lamajiür icon lasta Teat Dios cos nipilan judío ngo mayariw andeac

nej. Ndoj nejw apmajiürüchiw lasta atnej tajiür icon lasta Teat Dios.

<sup>32</sup> Teat Dios tacueat meáwan nipilan leaw ngo mayariw nej andeac. Condom meáwan atotow tajiür nejw lasta.

<sup>33</sup> Quiaj ajawaats nguineay Teat Dios xeyay najneajay ajlüy, xeyay nendüy, xeyay axom omeaats. Nejinguind ngondom majaw nguineay teamapiüing apmarang, cuane apmarang.

<sup>34</sup> “¿Jane ajaw cuane alwüx omeaats nej Teat Diosa, ngwüy jane nesaj nej cuane netam maranga?”

<sup>35</sup> ¿Jane alndom mangüy Teat Dios, müüch nej cuajantaneje?”

<sup>36</sup> Nejinguind, cos meáwan leaw almajlüy naw teowix nej, nej tarang; alteowix nej meáwan leaw almajlüy. Pares netam mayarich andeac Teat Dios meáwan nüt. ¡Amén!

## 12

*Netam marangaats casa Teat Dios*

<sup>1</sup> Nğanüy xecojow xechijquaiw, cos Teat Dios lamüüch icoots xeyay mimonajneaj nej, áag sasaj icon nğanüy netam meajchiün Teat Dios imeajtsan y micuerpojan, para mejlüyüin at icon noic nichech almapac, mejlüyüin nangaj, atnej andiüm Teat Dios. Cos aag ayaj najneajay majaw Teat Dios merangan.

<sup>2</sup> Nde mendüjpiün wüx merangan ngo majneaj atnej arangüw meáwan nipilan nğanüy cam. Netam mengowüjchiün meáwan ngo majneaj leaw iyajcan tiül imeajtsan, merangan najneaj, ngo matnej irangan nomb. Cos atquiaj alndom mejawan cuane andiüm Teat Dios merangan. Nej andiüm merangan najneaj, merangan palan; aag ayaj andiüm majaw.

<sup>3</sup> Por mimonajneaj nej Teat Dios tayac xic nasaj icon: Nejinguind tiül icona nde mapiüing tiül omeaats nej alwüx ajaw ngo matnej alinop. Netam meyajcan icona ijawan atow nej Teat Dios lamüüch anopnop majaw leaw netam majaw, para merangan leawa nej andiüm.

<sup>4</sup> Cos atnej icootsa ajawaats, micuerpojaats ajüür oleaj, ajüür owix, ajüür omal, ajüür oniüüg, ajüür olaag, ajüür oxing, ajüür ombeay, pero ngome meáwan aag ayaj noic nej arangüw.

<sup>5</sup> Atquiaj aton icootsa, masey xeyay ajlüyüüts, pero ajlüyüüts nóiquian wüx Teat Cristo, atnej majlüyüüts nop nipilan.

<sup>6</sup> Aton cos Teat Dios lamajiür icoots lasta, lamüüch icoots anopnopoots cuane alndom marangaats palpálwüx. Netam marangaats atnej lamüüch icoots Teat Dios marangaats. Sitiül Teat Dios lamüüch nop mandeac andeac nej, netam mandeac leaw Teat Dios asaj nej, nde mayac wüx.

<sup>7</sup> Tengwüy sitiül Teat Dios lamüüch alinop ndoj ombas mambeol, ich mambeol najneajay. Tengwüy sitiül Teat Dios lamüüch alinop ndoj ombas maquiaach, ich mayac omeaats wüx aquiaach.

<sup>8</sup> Tengwüy sitiül Teat Dios lamüüch alinop ndoj ombas müüch mapac omeaats alinop, ich müüch mapac omeaats alinop najneajay. Tengwüy sitiül aljane lamüüch nej Teat Dios majiür, ich mapac omeaats mambeol leaw ngo majiür. Tengwüy sitiül Teat Dios lamüüch aljane marang natang, ich mayac omeaats wüx marang atnej netam. Aton sitiül aljane lamüüch nej Teat Dios majiür lasta alinop, ich mapac omeaats wüx mambeol.

*Leaw netam marangüw monyar andeac Teat Cristo*

<sup>9</sup> Ijiüran lasta meáwan nipilan con imeajtsan, nde merangánan. Nde mendiüman merangan leaw ngo majneaj, ngwüy irangan leawa najneaj.

<sup>10</sup> Aton ijiürayon lasta nop alinop atnej mejiüran micojon michijquian, ermbeolayon.

<sup>11</sup> Leaw irangan, iyacan wüx imeajtsan merangan najneaj. Nde merangan anch wüx irangan minajiüt Teat Dios.

<sup>12</sup> Ich mapac imeajtsan, icüliün Teat Cristo imiün tiül cielo. Netam meücan wüx imongochiün ngo majneaj, tanaám itajcan orar, nde mecueatiün.

<sup>13</sup> Imbeolan monyar andeac Teat Dios sitiül aljane ngo majiür. Ijchan maxood iniüangan monyar andeac Teat Dios napeay miün.

<sup>14</sup> Nde mendeacan ngo majneaj wüx ombas nipilan leaw arangüw ngo majneaj wüx imbasan, itüniün majiürüw mimonajneaj Teat Dios, nde mepajchan nejw.

<sup>15</sup> Ich mapac imeajtsan mequiüjpan leaw apac omeaats, at jane ajiünts, ijiüntsan mequiüjpan aton.

<sup>16</sup> Ijlüyiün nóiquian nop alinop, nde merangrangayon atnej alwüx ijawan, pero ijlüyiün at icon nipilan leaw ajüic ngo membeat. Nde mepiüangan tiül imeajtsan icona nerndüyiün.

<sup>17</sup> Nde merangan ngo majneaj wüx ombas jane arang ngo majneaj wüx imbasan; iyamban imeajtsan nguineay merangan leaw najneaj majaw nipilan.

<sup>18</sup> Ipacan wüx sitiül alndom mejlüyiün najneaj mequiüjpan meáwan nipilan.

<sup>19</sup> Xecojow xechijquiw, sitiül aljane arang ngo majneaj wüx imbasan, nde mepalüchiün ombas. Ich majlüy, Teat Dios apmepalüch. Cos apiüng tiül Mipoch Teat Dios: “Xique sanüüch mangüy, xique sanapalüch ombas”, aw.

<sup>20</sup> Aton apiüng: “Sitiül aljane najcüy majaw ic mind üet, pues iich; tengwüy sitiül mind anganeow yow, iich manganeow. Cos wüx apmerang aag ayaj, quiaj apmaxing xeyay cos terang wüx ombas najneaj”, aw.

<sup>21</sup> Nde meach majntsop ngo majneaj wüx imbas; netam merang najneaj masey aljane arang ngo majneaj wüx imbas.

## 13

<sup>1</sup> Meáwan nipilan netam mayar andeacüw monajiüt. Cos Teat Dios neyac nejw, nej neech nejw majiürüw najiüt.

<sup>2</sup> Jane ngo mayar andeacüw monajiüt, aag ayaj ngo mayar andeacüw leaw tayac nejw Teat Dios. Jane ngo mayar andeac monajiüt, nejw apmamongochiw ngo majneaj.

<sup>3</sup> Nop nerang najneaj ngo metam mimbol mandüy monajiüt; pero nop nerang ngo majneaj netam mimbol mandüy monajiüt. ¿Jowa ique, ngo mendiüm mermbol mejaw monajiüta? Pues irang najneaj, quiaj monajiüt apmandeacüw najneaj wüx imbas.

<sup>4</sup> Teat Dios tayac nejw mambeolüw ic, pero sitiül apmerang ngo majneaj, quiaj netam mermbol; cos monajiüt alndom müjchiw ic memongoch ngo majneaj. Teat Dios tüüch nejw marangüw aag ayaj; tayac nejw müjchiw mangüyiw monrang ngo majneaj leaw arangüw.

<sup>5</sup> Netam meyariün andeacüw monajiüt, ngome ajcan ermbolan müjchiw icon memongochiün ngo majneaj, netam merangan cos tiül imeajtsan ijawan netam merangan najneaj.

<sup>6</sup> At netam mengüyiün leaw atüniw ocueaj cambaj, cos Teat Dios tayac nejw marangüw najiüt ocueaj cambaj.

<sup>7</sup> Ingüyiün meáwan leaw ijüchiün. Netam memiüchiün leaw atüniw; at netam memiüchiün leaw netam mengüyiün monajiüt. Aton leaw netam meyariün andeac, iyariün andeac; leaw netam mesajan najneajay ajlüy, netam mesajan najneajay ajlüy.

<sup>8</sup> Nde mejüchiün alinop, aton netam mejiüran lasta nipilan meáwan nüt. Cos leaw ajiür lasta alinop, aag ayaj arang palan atnej apiüng tiül aaga poch tüünd Moisés.

<sup>9</sup> Cos tiül aaga gajpowüw poch apiüng: “Nde mejiür minajtaj, nde mejiür minaxey, nde membiy nipilan, nde merneed, nde mewüy ombasaran, nde mendiüdmüm ocueaj alinop”, aw. Meáwan aaga poch quiaj, at atlegüy poch leaw alünan, aton apiüng andüy wüx aaga poch leaw apiüng: “Netam mejiürayon lasta atnej iquiáyan quiaj merjiürüy lasta”, aw.

<sup>10</sup> Cos sitiül ajiürayoots lasta, quiaj ngo mandiümaats marangaats ngo majneaj wüx alinop. Aag ayaj ajüiquich sitiül ajiürayoots

lasta, quiaj arangaats palan atnej apiüung tiül aaga poch tüünd Moisés.

<sup>11</sup> Aag ayaj netam marangaats, cos ajawaats acüliiüts tiül nipilan monrang ngo majneaj. Nganüy netam mapacaats, cos Teat Cristo aliüc mawün icoots wüx, laliüc matüch a nüt mapeay, ngo matnej wüx nüt ayariiüts andeac nej.

<sup>12</sup> Minütiüts ajlüyüüts ningüy wüx a iüt cam, aag ayaj tequech atnej noic ongwiiüts. Aaga nüt aliüc Teat Cristo laliüc matüch. Nganüy netam macueatiiüts marangaats meáwan ngo majneaj arangüch tiül pojniün, marangaats leaw najneaj arangüch tiül ran.

<sup>13</sup> Netam marangaats leaw najneaj atnej majlüyüüts tiül ran. Ngondom mangüniüts majlüyüüts tiül alngün nangos nüt, ngondom majiüraats minajtaats, minaxeyiüts. At ngondom mitsojoots micuerpojaats, marangaats cuajantanej ngo majneaj. At ngondom majcüyüüts majawaats nop alinop, ngondom mayajcaats ngo majneaj ajcan ngo majiüraats leaw ajiür alinop.

<sup>14</sup> Ingow aag ayaj, netam müjchiiüts nejaj Teat Cristo mambeol icoots ngo mayacaats omeajtaats wüx ajcüwa ngo majneaj quiaj leaw micuerpojaats andiüm mayac icoots wüx.

## 14

### *Nde mendeac wüx ombas alinop*

<sup>1</sup> Sitiül aljane lamayar andeac Teat Cristo, pero naleaing nganaw majaw xeyay, iquiüjpan najneajan tiül icona, nde mendeacndeacan wüx leaw nej nganaw majaw.

<sup>2</sup> Cos altiül ajaw alndom müeteran matsaramb cuajantanej, pero altiül leaw nganaw majaw xeyay wüx Mipoch Teat Cristo, apiüung áagan soex alndom müeteran.

<sup>3</sup> Jane lamajaw alndom müeteran matsaramb cuajantanej, ngondom maneoc ombas leaw ngo müet meáwan aag ayaj. At leaw ngo müet meáwan aag ayaj ngondom mandeac ngo majneaj wüx ombas leaw üet cuajantanej, cos Teat Dios lamawün nej asoet aton.

<sup>4</sup> Nganüy sanasaj ic, ¿neol tendeac ngo majneaj wüx ombas nop nerang minajiüt alinopa? Ngo majneaj mendeac aag ayaj, cos nej ngame minajiüt arang, nej arang minajiüt Teat Dios. Sitiül nej arang najneaj tengwüy arang ngo majneaj, Teat Dios apmajaw wüx aag ayaj, ngame ique. Nej alndom marang najneaj, cos Teat Dios apmambeol nej.

<sup>5</sup> Nop apiüung noic nüt alwüx atam mayambüch Teat Dios ngo matnej alinoic; pero alinop apiüung: Ngwüy, meáwan nüt atanej ajlüy, aw. Naleaing, wüx aag ayaj meáwan anopnop ich marang leaw nej yaag tiül omeaats najneaj.

<sup>6</sup> Cos leaw nepiüung noic nüt alwüx atam mayambüch Teat Dios, aag ayaj najneaj, ngo majiür nicuajind, cos ayamb Teat Dios. At leaw nepiüung meáwan nüt atanej alndom mayambüch Teat Dios, aag ayaj najneaj aton, cos ayamb Teat Dios. Aton leawa andüy matsamb cuajantanej natsambaran, aag ayaj najneaj majaw Teat Dios, cos üüch gracias Teat Dios, at leaw ngo mandüy matsamb leaw natsambaran, aag ayaj najneaj aton majaw Teat Dios, cos nej üüch gracias Teat Dios wüx apmüet.

<sup>7</sup> Nejingüind icootsa ngondom mapiüngaats icóotsan quiaj nguineay apmapacaats oxep nawiür, at nguineay apmandeowaats.

<sup>8</sup> Cos sitiül almapacaats, alndom marangaats leawa Teat Dios andiüm; sitiül apmandeowaats, aag ayaj cos Teat Dios andiüm. Atquiaj masey almapacaats masey landeowaats ajlüyüüts ocueaj Teat Dios.

<sup>9</sup> Cos Teat Cristo tandeow ndoj tapac alinomb para marang natang ocueajiw meáwan nipilan, masey landeow, masey almapac.

<sup>10</sup> ¿Jowa ique, neol teyambyamb cuane asoet alinopa? ¿Neol teneoc ombasüw micojow michijquiawa? Cos ajawaats alinoic nüt apmajlüyüüts nóiquian niüng ajlüy Teat Cristo, majaraw wüx cuane tarangaats.

<sup>11</sup> Atquiaj ajlüy tiül Mipoch Teat Dios, niüng apiüung:

Cos naleaing xique salnapac, meáwan nipi-lan apmaquiejliw micosüw nejw tix-imbas.

Meáwan anopnop apmapiüngüw xique Teat Dios, aw.

<sup>12</sup> Quiaj meáwan anopnopoots netam masa-jaats Teat Dios cuane tarangaats.

### *Nde meyac wüx marang ngo majneaj alinop*

<sup>13</sup> Pares netam macueatiiüts mayambyambaats nisoet wüx ombas nop alinop. Netam mayambaats nguineay marangaats najneaj, ngana müjchiiüts majtoch alinop micojoots michijquiaats, müjchiiüts majiür nisoet.

<sup>14</sup> Xique sayaag meáwan natsaramb najneaj matsambaats, cos Teat Jesús lamüüch xic nayaag atquiaj. Pero naleaing, aljane nepiüung almajlüy natsaramb ngondom matsamb, quiaj ngo majneaj sitiül nej apmatsamb aag ayaj, cos netam marangüch leaw apiüung omeaats.

<sup>15</sup> Sitiül icona wüx itsamban cuajantanej, quiaj alinop mihermanojan apmamix omeaats, quiaj apmajüic icona ngo mejiüran nej lasta. Ijawan, nde meajchiün majcüy wüx leaw iretiün, ngana macueat andüüb Teat Cristo, cos Teat Cristo tandeow mawün nej wüx aton.

<sup>16</sup> Nde meajchiün manderac ngo majneaj wüx aaga najneaj leaw irangan.

<sup>17</sup> Cos Teat Dios ngo metam nej leaw inganeowan, leaw itsamban; pero leaw netam nej, aag ayaj leawa asaj icon merangan. Irangan najneaj, ijlyüün nóiquian nop alinop, mapac imeajtsan atnej andiüm Nangaj Miespíritu nej.

<sup>18</sup> Cos sitiül atquiaj irangan minajiüt Teat Cristo, Teat Dios najneajay majaw icon, at nipilan aton apmapiüngüw najneaj irangan.

<sup>19</sup> Icootsa netam marangaats najneaj, ngo majcüyüüts majawaats nop alinop; netam mambeolaats nop alinop mayacaats omeajtsaats wüx Teat Cristo.

<sup>20</sup> Nde meajchiün aljane majcueat minajiüt Teat Dios wüx nüetaran. Naleaing meáwan nüetaran najneaj müeteran. Nganüy sitiül apmeyacan wüx naél alinop wüx ajaw leaw itean, aag ayaj mbich ngo majneaj.

<sup>21</sup> Najneaj sitiül ngo metsamban onij, sitiül ngo menganeowan yow neech mangüneran, aton sitiül ngo merangan nicuajind leaw alndom mayac wüx naél alinop. Nde merangan leaw alndom müüch nop mandüy wüx marang ngo majneaj. Nde merangan leaw alndom müüch machiw omeaats alinop.

<sup>22</sup> Meáwan anopnop nejáyan quiaj ich majaw nguineay ayar andeac Teat Dios, nguineay andiüm Teat Dios majaw marang. Najneajay apac omeaats leaw ngo metam machiw omeaats wüx leaw arang.

<sup>23</sup> Pero naleaing sitiül ichiwean imeajtsan wüx leaw itean itsamban, aag ayaj üüch icon mejiüran nisoet, cos iyajcan aag ayaj ngo majneaj. Meáwan leaw irangan sitiül ichiwean imeajtsan wüx, ngo mejawan sitiül najneaj tengwüy ngo majneaj, aag ayaj nisoet sitiül irangan.

## 15

*Ijchan majneaj omeaats alinop, ngome icónan quiaj*

<sup>1</sup> Icootsa leaw lamajawaats wüx Mipoch Teat Dios xeyay netam mambeolaats leaw aliün mapateay ajaw, ngondom marangaats leaw andiümaats.

<sup>2</sup> Meáwan anopnopoots netam marangaats atnej andiüm alinop; aag ayaj apmambeol nej apmüüch nej mapac omeaats wüx Teat Dios.

<sup>3</sup> Cos nej Teat Cristo ngome tarang leaw andiüm; nej tarang atnej apiüng tiül Mipoch Teat Dios, cos apiüng: "Meáwan ngo majneaj leaw asajüw ic, leaw arangüw, tiün andüy wüx ximbas".

<sup>4</sup> Cos meáwan leaw tarangüch tiül Mipoch Teat Dios tanomb, aag ayaj tarangüch maquiaacheranaats wüx. Aag ayaj ambeol icoots majawaats majneaj wüx leaw

teamacüliüts, müüch icoots maiücaats wüx, majawaats apmambeol icoots Teat Dios.

<sup>5</sup> Malüy Teat Dios neech mapac omeaatsaran, neech icoots maiücaats wüx cuajantanej, müüch icoots majlüyüüts nóiquian omeajtsaats nop alinop atnej Teat Cristo andiüm.

<sup>6</sup> Quiaj nóiquian masajaats najneajay arang Teat Dios miteat Miteatiüts Teat Cristo.

*Tasoiquiw nipilan ngome judío alndom mawüw wüx asoetiw*

<sup>7</sup> Atquiaj icona erndeacan mequiüjpan nop alinop, ijürayon lasta atnej Teat Cristo ajiür icoots lasta. Quiaj apmanderac najneaj wüx Teat Dios.

<sup>8</sup> Naleaing sasaj icon, Teat Cristo tiün mambeol nipilan judío majüiquich naleaing Teat Dios lamarang leaw lamapiüng apmarang. Atquiaj tarang Teat Cristo para alndom majlüy leaw Teat Dios tasaj tanomb xexejchiün.

<sup>9</sup> Aton Teat Cristo tiün para mapac omeajtsüw mayambüw Teat Dios ajcüwa nipilan ngome judío, cos ajiür nejiw lasta. Atnej apiüng tiül Mipoch Teat Dios:

Xique sanandeaic wüx minüt tiül nipilan ngome judío,

sanataag cantar himnos wüx ique.

<sup>10</sup> Apiüng alinoic tiül Mipoch Teat Dios:

Ich mapac imeajtsan icona nipilan ngome judío

nóiquian mequiüjpan nipilan judío.

<sup>11</sup> At apiüng alinomb:

Icona nipilan monaw palpálwüx iüt isajan Teat Dios najneajay ajlüy.

Aton meáwan nipilan indeacan nguineay najneajay arang Teat Dios.

<sup>12</sup> Isaías aton tarang wüx nawiiig:

Apmajmel nop nenajiüt naw tiül micualüw micual Isai,

nej apmajlüy wüx palpálwüx iüt;

nejiw apmacüliw aaga nenajiüt quiaj mambeol nejiw.

<sup>13</sup> Malüy Teat Dios, aaga nembeol meiücan wüx leaw almajlüy, müüch icon mapac imeajtsan xeyay, mejlüyüün najneaj mejawan nop alinop, meyacan imeajtsan wüx nej. Quiaj aaga Nangaj Espíritu ocueaj Teat Dios apmüüch icon meiücan wüx, ngana paxiüm mecüliün leaw temecüliün.

<sup>14</sup> Xecojow xechiqiuiaw, xique saw majneaj icona xeyay najneaj imeajtsan, at ijawan nguineay alndom mepajan ocueaj nop alinop.

<sup>15</sup> Naleaing tiül a nawiiig cam nguiay tayacas tiül napacpac poch nüüch leaam imeajtsan wüx meáwan aag ayaj. Teat Dios tajiür xic lasta;

<sup>16</sup> tayac xic narang najiüt ocueaj Teat Cristo, nasaj nipilan ngome judío mayariw

andea Teat Dios, para majlüyiw at nejiw noic najneajay nichech leawa Teat Dios andiüm. Cos Nangaj Espiritu lamüüch nejiw majlüyiw ocueaj Teat Dios.

<sup>17</sup> Xique nganüy xeyay apac ximeaats wüx aaga najiüt lanarang ocueaj Teat Dios, cos sajlüy nöiquian naquiiüb Teat Cristo.

<sup>18</sup> Xique ngo nandiüm napiüng wüx alinoic najiüt, sandeac áagan wüx najiüt ocueaj Teat Cristo, cos nej ambeol xic nüüch mayariw andeac nej ajcüwa nipilan ngome judío. Nejiw andüjpiw Teat Cristo wüx leaw sandeac, at wüx leaw Teat Dios tüch xic narang.

<sup>19</sup> Cos Nangaj Espiritu ocueaj Teat Dios tüüch xic narang atéocan leaw ngome aag ajaraw. Atquiaj tasajas nipilan nguineay Teat Cristo awün nisoet, nawas tiül cambaj Jerusalén sajüy tiül meáwan cambaj leaw tatüchiüs tiül iüt Ilirico.

<sup>20</sup> Xique sayamb namb nasaj nipilan niüng nganaw manguiayiw aaga najneaj nanderac wüx Teat Cristo, ngana narang najiüt niüng alinop lamawitich marang.

<sup>21</sup> Tarangas atnej larangüch tiül Mipoch Teat Dios, cos apiüng:  
Apmajawüw nej ajcüwa leawa nómban  
ngome áag masoiquiw wüx nej,  
jane nganaw manguiayiw wüx nej, nejiw  
apmayariw andeac nej.

*Teat Pablo apiüng apmamb andüy Roma*

<sup>22</sup> Pares ngo matüch namb najaw icon, masey xeyay tandiümas namb.

<sup>23</sup> Pero nganüy cos lanandondoch xena-jiüt ocueaj Teat Dios tiül aaga cambaj cam, aton cos lamajiür xeyay neat sandiüm namb najaw icon;

<sup>24</sup> nganüy sapiüng wüx sanamb España sanamong niüng ijlüyiün. Quiaj apmandeacaats maquiüjpaats nop alinop, mapac omeajtsaats nöiquian. Condom sandiüm membeolan xic namong namb más ninguiün.

<sup>25</sup> Nganüy ombas sanamb Jerusalén najoy mamb tomiün nambelöw mondüüb Teat Cristo tiül Jerusalén.

<sup>26</sup> Cos mondüüb Teat Cristo monaw tiül iüt Macedonia, at monaw tiül iüt Acaya tapiüngüw najneaj mamücüchiw quiriw tomiün mambeolüw mondüüb Teat Cristo leaw ngo majiür, monlüy Jerusalén.

<sup>27</sup> Naleaing nejiw tapiüngüw najneaj mambeolüw leaw ngo majiür, monlüy tiül Jerusalén, cos nejiw masey ngome judío nejiw, tündiw aaga najneajay mipoch Teat Cristo. Nganüy nejiw aton netam mambeolüw mondüüb Teat Cristo monlüy tiül Israel wüx cuajantanej leaw ngo majiürüw.

<sup>28</sup> Nganüy sapiüng wüx landoj xiün nayac meáwan tomiün, nandondoch leaw

teanarang, quiaj sanamong niüng ijlüyiün, ndoj sanamb España.

<sup>29</sup> Xique sawaj majneaj nguineay Teat Cristo apmambeol xic, müüch mapac ximeaats xeyay wüx sanapeay niüng ijlüyiün.

<sup>30</sup> Xecojow xechijquiaw, nganüy satün icueajiün membeolan xic, metüniün ocueaj Teat Dios mambeol xic xeyay. Aag ayaj sasaj icon, cos ajlüyiüts nöiquian maquiüjpaats Miteatiüts Teat Cristo, aton cos ajitürayoots lasta atnej andiüm Nangaj Espiritu ocueaj Teat Dios.

<sup>31</sup> Itüniün ocueaj Teat Dios mambeol xic, ngana masapüw xic nipilan moncüy majaw xic monlüy tiül iüt Judea. Aton itajcan orar para mayariw najneajan leaw sajoy mamb nüüch ajcüwa mondüüb Teat Cristo leaw ngo majiür, ajcüwa monlüy tiül Jerusalén.

<sup>32</sup> Atquiaj alndom natüch niüng ijlüyiün mapac ximeaats naquiiüb icon, sitiül Teat Dios andiüm. Quiaj sanaxood quiriw naquiiüb icon.

<sup>33</sup> Teat Dios, aaga neech monajneaj tiül omeajtsaats majlüy maquiiüb icon. Amén.

## 16

### *Atepeay anopnopo*

<sup>1</sup> Nganüy sanüüch mamb müm Febe, apmamb quiaj majaw icon, ingochiün najneaj. Cos nej ajjür najiüt tiül mondüüb Teat Cristo monlüy tiül cambaj Cencrea.

<sup>2</sup> Itepeayiün, ingochiün najneajan atnej netam mangocheran meáwan monyar andeac Teat Dios. At imbeolan wüx cuajan-tanej netam nej, cos nej lamambeol xeyay jangantanej; ata xique aton lamambeol xic.

<sup>3</sup> At aton itepeayiün teat Aquila at mintaj nej müm Priscila. Nejiw xeyay tambeolüw xic wüx sarang minajiüt Teat Cristo.

<sup>4</sup> Cos nejiw aton tajlüyiw tiül xeyay naél wüx tambeolüw xic ngana mambiy xic nipilan. Pares süüch nejiw gracias xeyay, ngome xíquian quiaj, aton meáwan monyar andeac Teat Cristo leaw ngome judío nejiw, üjchiw nejiw gracias aton.

<sup>5</sup> Itepeayiün meáwan mondüüb Teat Cristo leaw canchiüjow aniüngüw teat Aquila. At itepeayiün xeamigo teat Epeneto, cos nej ombas mayar andeac Teat Cristo tiül iüt Acaya.

<sup>6</sup> Itepeayiün ton müm María, cos nej lamarang xeyay najiüt ocueaj Teat Dios tiül icona.

<sup>7</sup> At itepeayiün teat Andrónico at teat Junias, ajcüw ayaj micual xeiüt, aton taquiiübasüw tiül manchiüc. Nejiw xowüy ajjür nejiw lasta meáwan apóstoles, aton ombas mayariw andeac Teat Cristo, teoj a xique.

<sup>8</sup> Itepeayiün teat Amplias, xique xowüy sajiür lasta wüx minüt Teat Dios.

<sup>9</sup> Itepeayiün teat Urbano, nej nembeol xicon wüx minajiüt Teat Cristo. At a teat Estaquis itepeayiün. Xique xowüy sajiür lasta.

<sup>10</sup> Itepeayiün teat Apeles, nej xeyay ajüiquich andüüb Teat Cristo. At itepeayiün meáwan acualaats teat Aristóbulo.

<sup>11</sup> Itepeayiün teat Herodiön, micual xeüit. At itepeayiün acualaats teat Narciso, ajcüw monyar andeac Teat Cristo.

<sup>12</sup> Itepeayiün müm Trifena, at müm Trifosa, nejw mimonrang minajiüt Teat Cristo; átan mimümaats Pérsida, cos nej lamarang xeyay najiüt aton.

<sup>13</sup> Itepeayiün teat Rufo, nej nop naxey leaw tarriiüd nej Teat Cristo. Aton mimüm nej itepeayiün, cos ajlüy atnej xemüm aton.

<sup>14</sup> Itepeayiün teat Asíncrito, teat Flegonte, müm Hermas, teat Patrobas, teat Hermes, at meáwan leaw aquiüjpüw nejw itepeayiün aton.

<sup>15</sup> Itepeayiün teat Filólogo, müm Julia, teat Nereo, at michiüg najtaj nej. Aton itepeayiün teat Olimpas at meáwan monyar andeac Teat Cristo monlüy quiaj.

<sup>16</sup> Meáwan icon itepeayiün nop alinop, müüch mapac imeajtsan. Aton meáwan noicnoic ajlüy mondüüb Teat Cristo atepeayiw icon aton.

<sup>17</sup> Xecojow xechijquiaw, sasaj icon netam mejawan wüx ajcüwa nipilan leaw andiümüw mayacüw icon wüx naél, mayacüw moncüy tiül icona. Ajcüw ayaj ngo marangüw atnej terquiaachayon wüx. Icueatiün ajcüw ayaj, nde mequiüjpan.

<sup>18</sup> Cos ajcüwa nipilan quiaj ngome minajiüt Miteatiiüts Teat Cristo arangüw; ajcüw ayaj nejüwan quiaj andiümüw. Nejiw ajüürüw nguineay mawüywüyiw nipilan; alndom mawajichaw mondüüb Teat Cristo leaw nganaw majaw xeyay.

<sup>19</sup> Cos xeyay languiayaran nguineay icona xeyay iyacan imeajtsan wüx merangan andiüm Teat Dios, pares apac ximeaats xeyay. Pero aton sandiüm mexoman imeajtsan más xeyay wüx irangan najneaj; ngo metam mexoman imeajtsan para merangan ngo majneaj.

<sup>20</sup> Teat Dios aaga neech monajneaj tiül omeajtsaats, apmambeol icon mecüüjchiün tiüt aaga Satanás. Miteatiiüts Teat Cristo mambeol icon, müüch icon monojneaj.

<sup>21</sup> At aton atepeay icon teat Timoteo, nej nembeol xic wüx aaga najiüt sarang. At atepeayiw icon teat Lucio, teat Jasón, y teat Sosípater. Nejiw micual xeüit aton.

<sup>22</sup> At a xique Tercio nerangas aaga nawüig cam ocueaj teat Pablo, xique aton satepeay icon wüx minüt Teat Cristo.

<sup>23</sup> At aton teat Gayo atepeay icon, xique aniüng nej sacül. Aton aniüng nej canchiüjow meáwan monyar andeac Teat Cristo. At teat Erasto, nesap mitomiün aaga cambaj cam, atepeay icon aton; at teat Cuarto atepeay icon.

<sup>24</sup> Miteatiiüts Teat Cristo mambeol meáwan icon. Amén.

*Andondoch andeac, andeac najneajay wüx Teat Dios*

<sup>25</sup> Nganüy marangaats casa Teat Dios, masajaats najneaj arang, cos nej alndom mambeol icon mejawan más xeyay wüx leaw tasajas icon, nguineay lamawün isoetiün Teat Jesucristo. Aag ayaj Teat Dios ngo müüch nejingüind majaw aaga ayaj tanomb.

<sup>26</sup> Pero nganüy Teat Dios lamüüch icoots majawaats aag ayaj, cos mondeac andeac Teat Dios monlüy tanomb tarangüw wüx nawüig. Nganüy meáwan nipilan netam manguaiyiw aag ayaj, cos Teat Dios almapac meáwan nüt, y tapiüng meáwan palpálwüx ajlüy nipilan netam manguaiy andeac nej, marangüw leawa nej andiüm.

<sup>27</sup> Pares apmarangaats casa Teat Dios meáwan nüt, néjan quiaj nendüy; masajaats najneajay arang wüx minüt Teat Jesucristo. Amén.



**Anoic nanderac arang wüx  
nawiig San Pablo müüch  
minipilan Teat Cristo moncül  
tiül Corinto  
1<sup>a</sup> CORINTIOS**

*Atepeay*

<sup>1</sup> Xique Pablo nop apóstol ocueaj Teat Jesucristo, cos Teat Dios tayac xic narang. Nganüy cam saquiiüb teat Sóstenes.

<sup>2</sup> Xicona satepeayiün icon meáwan monyar andeac Teat Cristo moncül tiül cambaj Corinto; icona aton micual icon Teat Dios cos tayamb icon mejlüyiün nangaj nóiquian mequiüjpan meáwan nipilan leaw andüjpiw Miteatiiüts Jesucristo.

<sup>3</sup> Sandiüman Miteatiiüts Dios at Miteatiiüts Jesucristo müjchiw icon mimonajneajiw, at mejiüran noic omeajtsan najneajay.

*Teat Pablo üüch gracias Teat Dios*

<sup>4</sup> Xique ajlüyay nüüch gracias Teat Dios cos nej lamüüch icon mimonajneaj nej ajcan ijlüyiün nóiquian mequiüjpan Teat Cristo Jesús.

<sup>5</sup> Cos indüjpiün Teat Cristo Jesús, quiaj Teat Dios lamambeol icon wüx meáwan indeacan, at meáwan leaw netam mexoman imeajtsan wüx.

<sup>6</sup> Ninguiaj ajüic naleaing leaw tasajas icon wüx Teat Cristo.

<sup>7</sup> Pares nganüy lamejiüran meáwan najneaj leaw Nangaj Espiritu ocueaj Teat Dios tapiüng apmüüch. Lamejiüran aag ayaj tatow tam mecüliün mapeay Miteatiiüts Jesucristo.

<sup>8</sup> Nej apmambeol icon ngo mejiüran nicuajind nisoet wüx aaga nüt apmajaw wüx asoeteran wüx nej aliüc alinomb.

<sup>9</sup> Cos Teat Dios leawa lamayac mipoch nej marang, aag ayaj apmarang. Nejaj Teat Dios tayamb icon mejlüyiün nóiquian mequiüjpan Micual nej Miteatiiüts Jesucristo.

*Ngo majlüyiw nóiquian*

<sup>10</sup> Xecojow xechijquiaw, satün xeyay icueajiün wüx minüt Miteatiiüts Jesucristo; malüy sapiüng nguineay mejlüyiün nóiquian. Nde mbajcameron meriowan palpáwüx; netam mejlüyiün noic nej imalan, noic nej imeajtsan.

<sup>11</sup> Xecojow xechijquiaw, sasaj icon aag ayaj cos xique lanasoic nguineay tengual ijlüyiün; tasajüw xic altiül monaw aniüng Cloé. Apiüngüw ajlüy moncüy tiül icona.

<sup>12</sup> Nganüy sandiüm nasaj icon nguineay sanguaiy temendeacan; cos altiül icon apiüng: “Xique sandüüb teat Pablo”, aw;

altiül apiüng: “Xique sandüüb teat Apolos”, aw; altiül apiüng: “Xique sandüüb teat Cefas”, aw; aton altiül apiüng: “Xique sandüüb nejaj Teat Cristo”, aw.

<sup>13</sup> ¿Neola, mbich ajlüy acas Teat Cristo? ¿Ngwüy, tamb wüx cruz a Pablo mangüy isoetiün? ¿Ngwüy, teyariün yow wüx minüt Pablo?

<sup>14</sup> Xique süüch gracias Teat Dios, cos ngo nüüch yow nejingund icon; ágan teat Crispo tujúchiüs yow, aton teat Gayo.

<sup>15</sup> Pares nejingund ngondom mapiüng nej tayar yow wüx minüt Pablo.

<sup>16</sup> At aton tujúchiüs yow acualaats Estéfanas. Lango leaam ximeaats sitiül tujúchiüs yow alinop.

<sup>17</sup> Cos Teat Cristo ngo müüch xic niün nüüch yow nipilan; nej tüüch xic niün napiüng wüx nguineay alndom mawaran wüx asoeteran. Áag ngo nandeac naél poch nerangrangüy wüx atnej xique xeyay saxom ximeaats. Naleaing sandeac ngo maél ngana mapiürang ngo membeat tandeow wüx cruz Teat Cristo.

*Teat Cristo ajüiquich nguineay omeaats Teat Dios*

<sup>18</sup> Ajcüwa nipilan leaw apndrom ombasüw tiül aaga xeyay ngo majneaj apiüngüw chach miün aaga tengual anderac wüx nguineay Teat Cristo tandeow mangüy asoetiüts. Pero aaga najneaj nanderac wüx nguineay Teat Cristo lamawün icoots wüx asoetiüts ajüiquich Teat Dios alndom marang cuajantanej.

<sup>19</sup> Cos Teat Dios apiüng tiül mipoch nej: Xique sanandrooch mifis leawa nepiüng xowüy landüy;

sanajüiquich ngo majawüw nicuajind.

<sup>20</sup> Jow nganüy, ¿wül, cuajpar leaw nepiüng xeyay andüye? ¿Wül leawa nepiüng xeyay andüy wüx aaga poch tüünd Moisésa? ¿Wül leawa nepiüng ndoj ombas mandeac leaw almajlüy wüx aaga nganüy nüt cama? Wüx meáwan aag ayaj Teat Dios lamapiüng nejw ngo mandüyiw nicuajind, ajlüyiw atnej nop chach.

<sup>21</sup> Cos Teat Dios nde tanomb lamajaw nipilan ngondom maxomüw nej nejeyéjan quiaj, pares tajaw najneaj mawün wüx asoeteran ajcüw leaw apmayariw andeac nej, masey nipilan apiüngüw chach poch sandeacan, ngo membeat.

<sup>22</sup> Nipilan israel apiüngüw aaga poch sandeacan ngo membeat cos andiümüw majawüw atécán; at nipilan griego ayambyambüw nguineay alndom majawüw wüx meáwan cuajantanej con mifisüw nejw.

<sup>23</sup> Naleaing xicona sandeacan wüx nguineay Teat Cristo tandeow wüx cruz; aag ayaj nipilan israel ajtochiw wüx cos ngo mandüümüw manguiayiw. Nganüy nipilan

ngome israel apiüngüw ngo membeat aaga nanderac quiaj, cháchan.

<sup>24</sup> Pero ajcüw leawa Teat Dios lamapaj majlüyiw micual nej, masey nipilan israel, masey nipilan griego, nejiw ajawüw áagan Teat Cristo alndom müüch nejw mayariw nej andeac, at majiürüw fis maxomüw Teat Dios.

<sup>25</sup> Masey altiül apiüngüw ngo membeat leawa tarang Teat Dios, pero Teat Dios axom omeaats xeyay, ngo matnej nipilan monpiüing nendüyiw. At masey apiüngüw Teat Dios ngondom marang nicuajind, naleaing ajawaats Teat Dios alndom marang xeyay cuajantanej, ngo matnej ajcüwa nipilan leawa monpiüing nejiw alndom marangüw cuajantanej.

<sup>26</sup> Xecojow xehijquiaw, ich leaam imeajtsan nguineay tejlüyiün wüx tarriiüd icon Teat Dios. Ngo majlüy tiül icona mondüyüdüw wüx cuajantanej wüx aaga iüt cam. Aton ngo majlüy tiül icona xeyay natangtang monajiüt; at ngo majlüy tiül icona xeyay netam ajlüy nipilan.

<sup>27</sup> Naleaing, Teat Dios lamarriiüd leaw ngome nendüy xeyay cos atquiaj apmüüch maxing leaw apiüing xowüy landüy. At tarriiüd leaw napiürang ngo membeatiw, cos atquiaj alndom müüch maxing monpiüing nejiw xowüy lambeatiw.

<sup>28</sup> Aton tarriiüd nipilan leaw apiürang ngo membeat, at leaw napiürang cuane appar. Atquiaj tarang Teat Dios para majüiquich lango membeatiw leaw apiürang wüx ombasüw nejiw xeyay nembeatiw.

<sup>29</sup> Atquiaj nejingüind ngondom merangrangüy teombas Teat Dios.

<sup>30</sup> Naleaing cos Teat Dios andiüm, pares ijlyüyiün nóiquian mequiüjpan Teat Cristo. At Teat Dios lamüüch icoots mendüyüiüts wüx andüjpiüts Teat Cristo. Nganüy ajlyüiüts najneaj, ngo majiüraats nicuajind nisoet teombas Teat Dios cos nej tawün icoots wüx.

<sup>31</sup> Mipoch Teat Dios apiüing: "Jane nind arangüy casa, ich marang casa Teat Dios", aw.

## 2

### *Taquiaach nejiw áagan wüx Teat Cristo*

<sup>1</sup> Pares xecojow xehijquiaw, ninguinüt wüx tambas niüing ijlyüyiün nasaj icon nguineay tarang Teat Dios mawün icoots wüx asoetiüts, ngo nasaj icon at xic nop xowüy landüy, at ngo nasaj icon naél poch.

<sup>2</sup> Tapiüngas ngome sanaquiaach icon wüx cuajantanej alinoic, sanaquiaach áagan wüx Teat Cristo leaw tamb wüx cruz mandeow mangüy asoetiüts.

<sup>3</sup> Ijawan wüx tajlüyiüs niüing ijlyüyiün, xique ngo nerangrangüy napiüing xiquian quiaj alndom narang cuajantanej. Naleaing timbolas, tambeapmbeap xic.

<sup>4</sup> Wüx tandeacas nasaj icon wüx Teat Cristo, ngo nandeaac atnej xowüy lasandüy. Tejawan nguineay tambeol xic Nangaj Espiritu ocueaj Teat Dios majüiquich leaw tarangas aag ayaj minajiüt Teat Dios.

<sup>5</sup> Atquiaj tarangas para mepiüing n-nejay Teat Dios nembeol icon meyariün andeac nej, ngome alngün nipilan xeyay axom omeaats mandeac.

### *Nangaj Espiritu üüch majawaats nguineay ajlüy Teat Dios*

<sup>6</sup> Naleaing nguiaj saquiajchiün wüx leaw xowüy laél, cos leawa latangüw wüx Mipoch Teat Dios alndom manguiaiyiw. Aaga sandeacan quiaj ngome ocueaj monpiüing nendüyiw wüx a iüt cam, at ngome mifis montang monajiüt, cos ajcüw ayaj najen apndrom ombasüw.

<sup>7</sup> Naleaing sandeacan aaga poch leaw Teat Dios üüch xicon. Aag ayaj nomb ngo manguiayaran cos nej ngo majüiquich nguineay apmarang. Naleaing nej tajaw nguineay apmarang, nguineay apmawün icoots wüx, nde wüx nganaw marang a iüt cam.

<sup>8</sup> Nejingüind montangtang monajiüt monlüy nganüy cam ngo majawüw nguineay andiüm marang Teat Dios. Cos sitiül tajawüw aag ayaj, ngome tayacüw wüx cruz Teat Cristo, aaga najneajay imiün tiül cielo.

<sup>9</sup> Atquiaj aton tarangüch tiül Mipoch Teat Dios, cos apiüing:

Ajlüy cuajantanej najneajay leaw ngome áag ajaraw,

ngome áag anguiayaran,

ngome áag ajmel tiül omalaran.

Teat Dios lamarang aag ayaj müüch meáwan mondiüm nej.

<sup>10</sup> Teat Dios tüüch miün aaga Nangaj Espiritu mambeol icoots majawaats aag ayaj. Cos Nangaj Espiritu ajaw meáwan cuajantanej ocueaj Teat Dios, masey xowüy laxotüy.

<sup>11</sup> Jane alndom majaw cuajantanej leawa almajlüy tiül omeaats nop nipilana? Nejáyan quiaj ajaw cuane ajlüy tiül omeaats nej. Atquiaj aton nejingüind ngondom majaw leawa almajlüy tiül omeaats Teat Dios, áagan a Nangaj Espiritu ocueaj Teat Dios nejaw aag ayaj.

<sup>12</sup> Icootsa ngo mayajcaats tiül omeajtsaats atnej ayajcüw altiül nipilan; pero ayajcaats tiül omeajtsaats atnej andiüm Nangaj Espiritu, aag ayaj lamüüch icoots Teat Dios. Quiaj alndom majawaats leawa lamüüch icoots Teat Dios.

<sup>13</sup> Wüx aag ayaj xicona sandeacan, ngome atnej axom omeaats nipilan ningüy wüx iüt; ngwüy sandeacan leaw aquiaach xicon Nangaj Espiritu. Cos aaga poch leawa

saquiajchiün, aag ayaj poch leaw asaj xicon Nangaj Espiritu ocueaj Teat Dios.

<sup>14</sup> Meáwan nipilan leawa ngo majiür Nangaj Espiritu tiül omeaats nej ngondom majaw cuane Nangaj Espiritu andiüm müüch, cos nej apiüng aag ayaj atnej ngo membea beat nicuajind. Cos niquimas ngondom majaw wüx aag ayaj sitiül Nangaj Espiritu ngo mambeol nej majaw.

<sup>15</sup> Cos leaw nembeol nej Nangaj Espiritu ocueaj Teat Dios alndom majaw cuane naneaj, cuane ngo majneaj. Pero pálwüx nipilan ngondom majawüw nguineay omeaats leaw ambeol nej Nangaj Espiritu.

<sup>16</sup> Atnej ajlüy tiül Mipoch Teat Dios, cos apiüng: “¿Jane alndom majaw leaw alwüx omeaats Teat Diosa? ¿Ngwüy, jane alndom maquiaach neje?” Nganüy icootsa leaw ajiüraats Nangaj Espiritu alndom maxomaats omeajtsaats wüx leaw apiüng Teat Cristo.

### 3

#### *Monbeol wüx minajiüt Teat Dios*

<sup>1</sup> Xecojow xechijquiaw, ninguinüt ngondom naquiaach icon matnej nipilan leaw ambeol nejw Nangaj Espiritu ocueaj Teat Dios, cos tealeámban merangan leaw indiüman icona, ngome leaw andiüm Teat Cristo. Pares taquiajchiüs icon atnej maquiajchich nop nine leaw nganaw majaw nicuajind.

<sup>2</sup> Cos icona tejlüyüün atnej nop nine tealeámban achech, nganaw ndom ombas üet, pares ngondom naquiaach icon matnej natang nipilan. Átan nganüy, nganaw ndom cos ngondom meyarüün.

<sup>3</sup> Tealeámban nganaw merangan leaw andiüm Teat Dios; naleaing temerangan leaw icona indiüman. Cos tealeámban ngo majneaj mejawan nop alinop, ijcüyüün icoyónan quiaj, at lambajcaron mejlüyüün palpálwüx. ¿Neol terangan atquiaja? Cos tealeámban merangan atnej arangüw pálwüx nipilan.

<sup>4</sup> Altiül icona apiüng: “Xique sandüüb teat Pablo”, aw. Altiül apiüng: “Xique sandüüb teat Apolos”, aw. ¿Pues neol terangan atquiaja? Cos nganaw merangan atnej andiüm Teat Cristo; aliün merangan atnej arangüw meáwan nipilan.

<sup>5</sup> ¿Cuane neje a Pablo? ¿Cuane neje Apolos? Xicona monrang minajiüt Teat Dios xicon, masey tasajasan icon meyarüün andeac Teat Cristo; cos Teat Dios tüüch xicon sanopnon aaga najiüt leaw netam narangan.

<sup>6</sup> Xique tapiüras Mipoch Teat Dios tiül icona; condom tüün Apolos tambeol icon alquiriw. Aag ayaj atnej wüx nop apmateow leaw landoj apiürüch. Condom Teat Dios tüüch icon metangan wüx Mipoch Nej.

<sup>7</sup> Aaga nepiür nicuajind nej; at neteow nicuajind nej. Leawa más nembea, aag ayaj Teat Dios, cos nej nerang meáwan, nej netangüch cuajantanej.

<sup>8</sup> Pues leawa nepiür, at leawa neteow atanej ajlüyiw. Teat Dios apmüüch anopnopoots leaw netam maxomaats wüx aaga najiüt tarangaats.

<sup>9</sup> Xicona monrang minajiüt Teat Dios, nganüy icona ijlüyüün atnej noic corrül ocueaj nej.

At ijlüyüün atnej nop iüm ocueaj Teat Dios leaw nej teamawitich.

<sup>10</sup> Teat Dios lamambeol xic narang minajiüt nej, najlüy atnej nop nerang iüm leawa neyac tiüt piedra witiow wüx iüm. Condom alinop tengual mambeol icon, aag ayaj atnej teamajüyich wüx alquiriw. Nganüy netam majaraw nguineay apmajüyicheran wüx alquiriw.

<sup>11</sup> Cos aaga najiüt lawitiow marangüch, aag ayaj minajiüt Teat Dios. Teat Cristo ajlüy atnej aaga piedra witiow wüx iüm. Naleaing nejingüind alinop ngondom mayac alinoic witiow wüx iüm.

<sup>12</sup> Jane tanaámb matangüüch aaga najiüt lawitiow quiaj, ich majaw cuane apmayac wüx. Cos sitiül apmayac oro, tengwüy plat, tengwüy natsüjyag ombas piedra, aag ayaj ngo mandaab. Pero sitiül apmayac xiül, tengwüy soex, tengwüy miolam naxiül, pues apmandaab.

<sup>13</sup> Nganüy apmajüic nguineay arangüw najiüt, cos wüx nüt Teat Dios apmajaw wüx asoeteran, quiaj aaga biümb apmajüiquich sitiül tarang najneaj. Condom apmajüic jane taüic minajiüt nej, jane tandaab ocueaj, cos biümb apmajüiquich.

<sup>14</sup> Sitiül aljane taüic minajiüt nej, ngo mandaab, nej apmüünd leaw netam maxom wüx.

<sup>15</sup> Pero sitiül aljane tandaab minajiüt nej, quiaj nej ngome apmaxom wüx nicuajind; masey nej apmaw wüx, biümb ngome apmabel nej.

<sup>16</sup> ¿Neol ngo mejawana, icona at icon noic templo ocueaj Teat Dios, at Nangaj Espiritu acül tiül imeajtsana?

<sup>17</sup> Sitiül aljane apmaquiaach icon ngo matnej apiüng Teat Dios, Teat Dios apmandrooch nej ombas, cos icona aaga templo ocueaj Teat Dios, aaga templo quiaj nangaj.

<sup>18</sup> Nde merwaiichayon icoyónan quiaj; cos sitiül aljane tiül icona mapüנג nej xeyay ajaw wüx cuajantanej leaw almajlüy nganüy cam, ich marang atnej ngo majaw nicuajind, cos quiaj alndom mambeol nej Teat Dios maxom omeaats wüx cuajantanej.

<sup>19</sup> Cos aaga fis leaw ajiür nipilan ningüy wüx iüt, Teat Dios ajaw aag ayaj chach miün. Atquiaj apiüng tiül Mipoch Teat Dios: “Teat Dios apmasap nejw wüx aaga fis apiüngwü

ajjiürw, aag ayaj nejeyéjan quiaj ayacayej tiül naél", aw.

<sup>20</sup> At apiüing: "Teat Dios ajaw nguineay apiüingüw ajcüw leaw apiüingüw xeyay ajawüw, aag ayaj ngo membeat nicuajind", aw.

<sup>21</sup> Nde merangrangayon mendüjpiün nipilan cos icona ineayiün meáwan cuajantanej almajlüy.

<sup>22</sup> Masey Pablo, masey Apolos, masey Pedro, masey a iüt cam, masey wüx nepacan nejneajiün, tengwüy masey mendeowan, masey leaw apmemongochiün nganüy, tengwüy leaw apmemongochiün alinoic nüt; pues najneaj meáwan aag ayaj.

<sup>23</sup> Cos icona micual icon Teat Cristo, at Teat Cristo naleaing Micual nej Teat Dios.

## 4

### *Minajütiüw apóstoles*

<sup>1</sup> Sandiüman majaw nipilan que xicona mimonrang minajüüt Teat Cristo; sajlüyiün wüx minajüüt nej naquiajchiün meáwan leaw Teat Dios lamüüch xicon najawan, leawa nomb ngo majüiquich.

<sup>2</sup> Nganüy ajawaats jangantanej ajlüy wüx minajüüt alinop, netam marang najneaj leaw asaj nej minatang nej.

<sup>3</sup> Xique ngo metam mesajan xic cuane sarang, at leaw apmapiüingüw monajüüt wüx xique. At xique aton ngondom napiüing nguineay sarang.

<sup>4</sup> Naleaing xique sayaag tiül ximeaaats ngo narang nicuajind ngo majneaj; pero ngome wüx aag ayaj alndom napiüing ngo najiür nisoet, cos Teat Dios ajaw meáwan leaw sarang.

<sup>5</sup> At icona nde meyacan asoet alinop wüx nganaw mandilil Teat Cristo, cos wüx nej lapeay, nej apmüüch majüic leaw naxoraad, leaw ngo majaraw. Aton apmajüiquich leaw altiül omeajtsaats anopnopoots. Condom Teat Dios apmandeac nguineay tarangaats anopnopoots.

<sup>6</sup> Xecojow xehijquiaw, aag ayaj teanasaj icon wüx xique, at wüx Apolos, nguineay sarangan, para mejawan nguineay netam merangan leaw apiüing tiül Mipoch Teat Dios. Ngondom mepiüangan pálwüx, nganandot aljane apmarang casa nop, tengwüy majcüy majaw alinop.

<sup>7</sup> Jow ique, ¿neol tepiüing ique irang najneaj, nganüy alinop ngwüye? Jow ique, ¿cuane almejüür sitiül ngo müüch ic Teat Dios? Ngwüy sitiül teand, ¿neol terangrangüy wüx atnej íquia quiaj texoma?

<sup>8</sup> Nganüy iyajcan ijiüran meáwan cuajantanej leaw netam icon wüx minajüüt Teat Dios; at iyajcan atnej ngo majlüy nicuajind leaw ngondom imbasan merangan; ajüic

atnej lango netaman. Malüy naleaing irangan atnej arang nop natang niüing ajlüy Teat Dios, cos quiaj alndom majlüyiüts nóiquian wüx minajüüt Teat Dios.

<sup>9</sup> Nguiay sapiüing Teat Dios tayac xicon narangan apóstoles para najarawan atnej ngo nembetiün nicuajind. Sajlüyiün atnej nipilan layacüch asoet mandeow. At lasajlüyiün atnej teasayacan majaw xicon nipilan; aton ángeles teamajawüw xicon.

<sup>10</sup> Pues apiürang wüx xicona atnej nechachasan cos sandüjpiün Teat Cristo; nganüy icona ajüic nerndüyiün wüx indüjpiün Teat Cristo. Apiürang xicona ngondom narangan nicuajind; nganüy icona ajüic alndom merangan cuajantanej, masey iconan quiaj. Icona najneaj mejarawan; nganüy xicona ngo majneaj majaw xicon nipilan.

<sup>11</sup> Masey tanaám nganüy saiündan lop, saiündan yow, ngo najiüran sapixan, sajtolan, ngo najiüran saniüngan.

<sup>12</sup> Aton sambichayon sapacan narangan najiüt naag xiwixan. Sitiül aljane andeac ngo majneaj wüx ximbasan, xicona sasajan Dios mambeol nej. Wüx ajlüy xeyay moncüy, xicona saiüncánan wüx.

<sup>13</sup> Masey nipilan andeacüw ngo majneaj wüx ximbasan, xicona ngo nangochiün ombeayiw cos sandiüman najneajiün naquiüjpan tanaám. Sajlüyiün at xicon nendeajndeaj, atnej nequiachquiach leaw nejinguind ngo metam nej.

<sup>14</sup> Ngo narang aaga nawiig cam para nüüch icon monxing, ngwüy sarang para nambeol icon cos sayaag atnej xecual icon, sandiüm icon xeyay.

<sup>15</sup> Masey lamejiüran agajpowüw mil (10,000) monquiaach icon wüx Teat Cristo, naleaing ngo mejiüran xeyay miteatiün, cos xiquian quiaj ombas naquiaach icon meyariün andeac Teat Cristo.

<sup>16</sup> Pares sasaj icon netam mendüjpiün wüx leawa sarang.

<sup>17</sup> Ág tujíchiüs mamb Timoteo majaw icon, cos sayaag nej ajlüy atnej xecual leaw sandiüm xeyay; aton nej tanaám andüüb Teat Cristo. Nej apmüüch leaam imeajtsan wüx nguineay netam mendüjpiün wüx leaw sarang cos sandüüb Teat Cristo. Aag ayaj saquiaach tiül meáwan cambaj tiül meáwan niüing ajlüy minipilan Teat Cristo.

<sup>18</sup> Naleaing sawaj altiül icona nganüy apac omeaaats, apiüingüw xique lasamb nómban, lango nandilil najaw icon, pares tengual alombojchayej timbasan.

<sup>19</sup> Nganüy sapiüing najen sanamb najaw icon sitiül Teat Dios mandiüm. Quiaj sanajaw nguineay arangüw ajcüwa monlombojchay quiaj, ngome ágan leaw andeacüw sanajaw, at sanajaw leaw arangüw.

<sup>20</sup> Cos najjiüt tiül micambaj Teat Dios, aag ayaj ngome anderac miün, ajüic wüx leaw Teat Dios arang.

<sup>21</sup> ¿Ngün indiüman? ¿Sanamb ninguiyaj nalic icona? ¿Ngwüy najneaj najaw icona najjiür icon lasta, ngo najcüyé?

## 5

### *Nop nerang xeyay ngo majneaj*

<sup>1</sup> Naleaing languiyaran lajlüy tiül icona nop nejjiür minajtaj nej, lamaquiiüb ingow mimüm nej. Aag ayaj ngondom marangüch masey tiül nipilan leaw ngo mayar andeac Teat Dios, pero tiül icona lajlüy.

<sup>2</sup> ¿Ngantüy icona irangan ngo mejawan, tanaámb erlomboochayon! ¿Neol, ngo metam mamix imeajtsana, mejiüntsana? Netam mewüniün tiül icona aaga nerang atquiay quiaj.

<sup>3</sup> Masey xique naleaing ngo najlüy niüing ijlüyiün, pero tiülan ximeaats sayaag atnej salniüing ijlüyiün. Áag tapiüngas nguineay netam marangüch wüx ombas aaga nerang atquiay quiaj.

<sup>4</sup> Cos xique lanapiüng netam canchiümeron metüniün mambeol icon Miteatiüts Jesucristo. Xique sayaag atanej najlüy naquiiüb icon, aton Miteatiüts Jesucristo apmambeol icon maw icueajiün najneaj leaw apmerangan.

<sup>5</sup> Condom, iyacan aaga naxey nerang atquiay quiaj teowix Satanás masey ndrom ombas micuerpo nej, cos miespíritu nej alndom maw wüx, wüx nüt aliüc Teat Cristo.

<sup>6</sup> ¿Cuane wüx apmelomboochayon sitiül lamitsoj icon aaga nerang atquiay quiaj? Cos aaga ngo majneaj quiaj arang atnej arang levadura wüx apmayacüch tiül ajtsaj marang pan. Masey quiripite ayacüch, ndoj apmambich majtüy tiül, müüch maxip meáwan ajtsaj.

<sup>7</sup> Pares netam mewüniün aaga ngo majneaj tiül icona para mejlüyiün najneaj. Condom apmejlüyiün at icon jayats ajtsaj ngo majjiür levadura. Aag ayaj apiüng wüx lajwan isoetiün, cos Teat Cristo tandeow atnej quichech sap marang ichechiüts wüx tamb wüx cruz, aag ayaj wüx nangos nüt pasqua.

<sup>8</sup> Netam marangaats aaga nangos nüt pasqua quiaj, naleaing atnej apiüng omeajtsaats. Aag ayaj atnej müetiüts pan ngo majmel levadura, cos aaga levadura quiaj apiüng wüx nisoet. Ngondom marangaats aaga pasqua wüx arangaats ngo majneaj, cos aag ayaj atnej müetiüts pan leaw ajjiür levadura.

<sup>9</sup> Tasajas icon tiül alinoic nawiig, nde mequiüjpan tiül leaw ajjiürwüw pálwüx najtaj tengwüy pálwüx naxey.

<sup>10</sup> Aag ayaj arang nasaj icon wüx meáwan nipilan leaw arangüw aaga nisoet quiaj, tengwüy leaw nerreech, tengwüy neneed, tengwüy monrang casa pálwüx dios. Cos sitiül apmerangan aag ayaj, quiaj netam meriowan ningüy wüx iüt.

<sup>11</sup> Tarangas aaga nawiig quiaj nasaj icon nde mequiüjpan nejinguind masey apiüng ayar andeac Teat Dios, sitiül tanaámb arang aaga nisoet quiaj; tengwüy nerreech, tengwüy nerang casa pálwüx dios, tengwüy andeac ngo majneaj wüx alinop, tengwüy nangün, tengwüy neneed. Pues aaga nerang atquiay quiaj, ngondom meretiün mequiüjpan.

<sup>12</sup> Ngo metam najaw wüx asoetiw nipilan leaw ngo mayar andeac Teat Dios, pero leaw ajlüyiw tiül icoots netam mejawan wüx asoetiw nejijw.

<sup>13</sup> Pares iwüniün tiül icona aaga nerang ngo majneaj quiaj. Pero leaw ngo mayar andeac Teat Dios, Teat Dios apmajaw wüx asoetiw nejijw.

## 6

### *Ngo metam masoic monajiüt wüx noic moncüy tiülan icona*

<sup>1</sup> ¿Jondot nop tiül icona apmajcüy aweaag alinop, neol tamb teombas monajiüt leaw ngo mandüüb Teat Diosa? Netam mamb teombas monyar andeac Teat Cristo.

<sup>2</sup> ¿Neol ngo mejawana, minipilan Teat Cristo apmajawüw wüx asoet meáwan nipilan wüx iüta? Sitiül icona apmejawan wüx ombasüw meáwan nipilan, ¿neol ngondom mejawan wüx leaw más ngo maéle?

<sup>3</sup> ¿Neol ngo mejawana, icootsa apmajawaats wüx ombasüw ángeles? ¿Neol ngondom majawaats wüx leaw más napateay ningüy wüx a iüt cama?

<sup>4</sup> Sitiül icona ijcüyiün merjawayon wüx cuajantanej leaw ajlüy nganüy cam; ¿neol teriümban teombas monajiüt leaw ngo majlüyiw tiül icona?

<sup>5</sup> Aag agüy sasaj icon cos netam mexinguiian wüx. ¿Neola, ngo majlüy tiül icona masey anop nexom omeaatsa, majaw wüx cuajantanej naél leaw ajlüy tiül monyar andeac Teat Cristo?

<sup>6</sup> ¿Neol nganüy netam nop icona mayac asoet alinop icona teombas jostis leaw ngo mandüjpiw Teat Cristo?

<sup>7</sup> Naleaing xeyay ngo majneaj wüx aljane icona apmayac alinop teombas jostis. ¿Neol ngome más najneaj meiücan wüx aaga ngo majneaj arangüch wüx imbasan quiaja? ¿Neol ngome más najneaj meiücan wüx leaw najnot icueajiün quiaja?

<sup>8</sup> Pero sanguiaiy altiül icona más ngo majneaj teamarang, cos awaijchaw y anojtiw ocueaj alinop.

<sup>9</sup> ¿Neol ngo mejawana, leaw nerang ngo majneaj ngome apmajlüy tiül micambaj Teat Diosa? Nde merwaiichayon wüx aag ayaj, mepiüangan masey marangüw nisoet monench tengwüx monüx. Nde mepiüangan najneaj marangüch casa pálwüx dios. Nde mepiüangan masey nop majiür minajtaj, tengwüx minaxey, tengwüx najtaj nejiür najtaj, tengwüx naxey nejiür naxey.

<sup>10</sup> At nde menejtiün, nde merangan reech, nde mengüniün, nde mendeacndeacan wüx ombas alinop, nde menojtüün aneay alinop. Cos meáwan leaw monarang atquiaj, ngome apmajlüyiw tiül micambaj Teat Dios.

<sup>11</sup> Altüül icona nomb tarang meáwan aag ayaj, pero nganüy Teat Dios lamawün icon wüx. Aag ayaj atnej lamajants icon müüch icon merangan najneaj. Lamawün isoetiün nómban cos teyariün andeac Teat Cristo, at cos Nangaj Espiritu ocueaj Teat Dios teamambeol icon.

*Minipilan Teat Cristo netam marangüw najneaj*

<sup>12</sup> Apiürang: “Nop alndom marang leaw andiüm, nejingüind ngo mapal”. Aag ayaj naleaing, pero ngome meáwan aag ayaj najneaj marangüch. Cos masey nop alndom marang meáwan, pero ngo majneaj sitiül apmarangüch leaw apmayac nej wüx marang ngo majneaj.

<sup>13</sup> Aljane tapiüng: “Nüeteran netam majmel tiül otüengueran, at otüengueran netam nej nüeteran”. Nganüy sasaj icon Teat Dios apmandrooch ombas miüjquiaw. Pares sasaj icon ngomeaag atam micuerpojaats merangayoots nisoet, pero naleaing tarangüchiiüts para marangaats casa Teat Dios, ndoj nej apmambeol icoots.

<sup>14</sup> Atnej Teat Dios tapacüüch alinomb Teat Jesús, atquiaj apmapacüüch icoots alinomb, cos nej cuajantanej alndom marang.

<sup>15</sup> ¿Neol ngo mejawana ajlüyüüts nóiquian maquiüjpaats Teat Cristo? ¿Nguineay apmüjchiiüts micuerpojaats majlüy nóiquian maquiüüb nop najüyjüy najtaja? ¡Ngwüy, aag ayaj niquimas!

<sup>16</sup> ¿Neol, ngo mejawana, leaw ajlüy aweaag nop najüyjüy najtaj ajlüy nóiquian maquiüüba? Cos apiüng tiül Mipoch Teat Dios: “Masey ajlüyiw ijpüw, pero atnej noic nej ajlüyiw”, aw.

<sup>17</sup> Nganüy leaw lajlüy nóiquian maquiüüb Teat Cristo lajlüy nóiquian wüx miespíritu nej aton.

<sup>18</sup> Nde mejiüran minajtajan tengwüx minaxeyiün. Cos cuajantanej alinoic nisoet leawa narangüch, aag ayaj andüy wüx ombas alinop; pero leaw ajiür najtaj tengwüx naxey, aag ayaj arang nisoet andüy miün wüx ombas nej.

<sup>19</sup> ¿Neol ngo mejawana, icootsa ajlüyüüts atnej templo ocueaj Nangaj Espiritu leaw Teat Dios tüüch miüna? Ngome icoyóotsan quiaj aneayayoots, marangaats leaw andiümaats.

<sup>20</sup> Cos Teat Dios lamangüy xowüy lambeat mawün icoots wüx asoetiüts. Nganüy netam marangaats casa Teat Dios wüx micuerpojaats at wüx miespíritujaats, cos ocueaj icoots Teat Dios.

## 7

*Andeac wüx angoch owixaran*

<sup>1</sup> Nganüy sanasaj icon wüx alacas poch leaw tetüniün menguiayüün xic tiül aaga nawiig terangan. Sapiüng naleaing najneaj sitiül nop naxey ngo majiür mintaj nej.

<sup>2</sup> Pero cos nots quiaj alndom marangüw ngo majneaj, pares najneaj anopnopo majiür mintaj nej, at montaj ich majiürüw minojow nejiw.

<sup>3</sup> Nanojaran ich marang leaw netam marang maquiüüb mintaj nej; at aton najtajaran ich marang leaw netam marang maquiüüb minoj nej.

<sup>4</sup> Najtajaran ngome aneay nej micuerpo nej, cos ocueaj minoj nej. At nanojaran ngome nej aneay micuerpo nej, cos ocueaj mintaj nej.

<sup>5</sup> Pero jondot tendecan mejlüyüünan acas nüt ngo mertüchayon, para metajcan orar mesajan Teat Dios wüx alcuane; aag ayaj najneaj sitiül ngome lercueatayon, nganandot aaga minatang nimeech Satanás mayac icon wüx merangan ngo majneaj.

<sup>6</sup> Meáwan leawa lanasaj icon quiaj, aag ayaj sasaj icon najneaj merangan; ngo napiüng netam merangan.

<sup>7</sup> Xique sapiüng najneaj sitiül meáwan monxey majlüy atnej sajlüy cam, cos ngo najiür xantaj; pero naleaing inopnophon ich marang leaw ayaag tiül omeaats Teat Dios lamüüch nej marang.

<sup>8</sup> Xique sapiüng leaw nganaw majiür mintaj nej, tengwüy leaw lemben omal, najneaj majlüy néjan quiaj atnej sajlüy cam.

<sup>9</sup> Pero sitiül ngondom maüüc wüx, pues najneaj ich mengoch owix ingow andiümdium alinop.

<sup>10</sup> Nganüy sasaj icon leawa landoj angoch iwixan, masey ngome xique sapiüng, aag agüy asaj icon Teat Dios: Najtajaran ngondom macueat minoj nej.

<sup>11</sup> Naleaing sitiül najtajaran apmacueat minoj nej nde maquiüüb alinop, ich majlüy néjan quiaj, tengwüy ich maquiüüb minoj nej alinomb. Átan nanojaran nde macueat mintaj nej.

<sup>12</sup> At aton meáwan aldemas, ich manguiayiw leawa sanapiüng, masey aag agüy ngome Teat Dios nesaj xic, ngwüy xiquiáyan

quiaj sapiüing: Sitiül nop neyar andeac Teat Cristo ajiür mintaj nej ngranaw mayar andeac Teat Cristo, pero aaga najtaj najneaj ajlüy maquiüüb nej, nde macueat.

<sup>13</sup> Átan nop najtaj neyar andeac Teat Cristo, sitiül ajiür minoj nej ngome neyar andeac Teat Cristo, pero sitiül aaga naxey najneaj ajlüy maquiüüb nej, nde macueat aton.

<sup>14</sup> Cos aaga naxey ngranaw mayar andeac Teat Cristo, nots quiaj apmandiüm wüx apmambeol nej mintaj nej. At nop najtaj leaw ngranaw mayar andeac Teat Cristo, nots quiaj apmandiüm sitiül minoj nej apmambeol nej. Cos sitiül apmecuetaeyej, micualüw nejüw naél mayariw andeac Teat Cristo. Nganüy sitiül tanaámb aqiiüübayej, nots quiaj Teat Dios apmambeol micualüw nejüw mandüjpiw nej.

<sup>15</sup> Sitiül aaga ngo mandüüb Teat Cristo quiaj, apmandiüm macueat minoj nej tengwüy mintaj nej, ich mecueataeyej. Condom aaga neyar andeac Teat Cristo, masey naxey tengwüy najtaj, apmajlüy néjan quiaj, cos Teat Dios ngo mandüüm majlüy moncüy.

<sup>16</sup> ¿Nguineay alndom mejaw ique najtajaran, sitiül alndom membeol minoj mayar andeac Teat Cristo alinoic nüte? ¿Jow ique nanojajaran, nguineay alndom mejaw sitiül alndom membeol mintaj mayar andeac Teat Cristo alinoic nüte?

<sup>17</sup> Pues wüx meáwan aag ayaj, inopnophon ich mayar marang leaw Teat Dios lamasaj nej marang. Atquiaj sasajüw marangüw tiül meáwan noicnoic ajlüy minipilan Teat Cristo.

<sup>18</sup> Sitiül aljane lajlüy circuncidado wüx tayar andeac Teat Cristo, ich majlüy atnej ajlüy. At sitiül aljane ngranaw majlüy circuncidado, ich majlüy atánan quiaj.

<sup>19</sup> Cos ngo membeol sitiül nop ajlüy circuncidado, sitiül ngwüy. Leaw netam xeyay, aag ayaj marangaats leaw lamapiüing Teat Dios.

<sup>20</sup> Pares inopnophon ich majlüy atnej tajlüy wüx tayar andeac Teat Dios.

<sup>21</sup> Sitiül aljane ajlüy najon mos nej wüx tayar andeac Teat Dios, nde mapiüing wüx. Pero naleaing sitiül axom nguineay alndom maw wüx aag ayaj, ich marang sitiül alndom.

<sup>22</sup> Cos jane tajlüy najon mos wüx tayar andeac Teat Dios, nganüy ngome najon mos ocueaj Teat Cristo. Aton leaw ngome najon mos wüx tayar andeac Teat Cristo, nganüy ajlüy atnej najon mos, cos Teat Cristo apmüüch nej cuane marang.

<sup>23</sup> Teat Cristo tangüy nembeol xeyay para mawün icoots wüx asoetiüüts; pares nde merangan atnej nop mos leaw netam

marang apiüing nipilan.

<sup>24</sup> Xecojow xechijquiaw, netam inopnophon tanaámb mejlüyüün atnej tejlüyüün wüx tapaj icon Teat Dios.

<sup>25</sup> Nganüy xique sanapiüing nguineay alndom marangüw leaw ngranaw mengoch owix. Pero naleaing ngome asaj xic Teat Dios; sanapiüing leaw sawaw cos Teat Dios lamajiür xic lasta, lamajaw xique sanandead leaw andiüm nej.

<sup>26</sup> Xique sapiüing najneaj sitiül nop nipilan alndom majlüy atnej ajlüy, sitiül nop ajiür mintaj nej, tengwüy ngo majiür; cos ajiüc tengual ajlüy xeyay naél nganüy cam.

<sup>27</sup> Pero leaw almajiür mintaj nej, nde mandüüm macueat; at leaw ngo majiür mintaj nej, nde mandüüm mayamb.

<sup>28</sup> Pero sitiül nop nench apmengoch owix, aag ayaj ngome nisoet. At sitiül nop nux apmengoch owix, aag ayaj ngome nisoet. Pero leaw apmengoch owixaw apmamongochiw naél. Aag ayaj sasaj icon, nganandot memongochiün aaga naél quiaj.

<sup>29</sup> Nganüy xecojow xechijquiaw, sanasaj icon: Aaga nüt cam latequechej, laliüc mümb. Pares leaw nejüw mintaj nej, nde mayac omeaats áagan wüx mintaj nej, netam mayac omeaats wüx minajiüt Teat Dios.

<sup>30</sup> Sitiül aljane ajiünts, amix omeaats, pues ich mapac omeaats; at sitiül aljane apac omeaats, netam majiünts, majlüy triste. Leaw nengalüy, nde mayac omeaats wüx leaw apmangal cos aag ayaj ngome apmafiüc meáwan nüt.

<sup>31</sup> At leaw nejüw cuajantanej wüx a iüt cam nde mayac omeaats wüx áagan, cos meáwan najlüy wüx a iüt cam apndrom ombas.

<sup>32</sup> Aag ayaj sasaj icon ngana meyacan imeajtsan wüx cuajantanej leaw alndom mapalpal icon. Cos leaw ngo majiür mintaj nej alndom mayac omeaats wüx minajiüt Teat Dios, wüx áagan leaw andiüm Teat Dios.

<sup>33</sup> Naleaing leaw nejüw mintaj nej netam mayac omeaats wüx cuajantanej leaw netam marang. At netam majaw nguineay alndom marang aag andiüm majaw mintaj nej; pares apalpal nej.

<sup>34</sup> Pues nop nux alndom mayac omeaats wüx nguineay alndom marang minajiüt Teat Dios, nguineay alndom marang áagan najneaj leaw andiüm Teat Dios. Pero nop nejüw minoj nej, netam mayac omeaats wüx cuajantanej leaw netam marang, para marang leaw minoj nej najneaj majaw.

<sup>35</sup> Aag ayaj sasaj icon nguineay alndom nambeol icon, ngo nandüüm napal icon nganandot mengoch iwixan. Sandiüm merangan áagan najneaj, ngo majlüy nicuajind merpalayon wüx merangan minajiüt Teat Dios atnej apiüing imeajtsan.

<sup>36</sup> Nop nateataran sitiül ayaag ngo majneaj cos micual nej nüx teatang nganaw majiür minoj nej, ich mengoch owix sitiül andiüm. At sitiül minench nej xeyay ayaag andiüm maquiiüb nej, mengoch owix aweaag, pues ich mengoch owixaw, aag ayaj ngome nisoet.

<sup>37</sup> Pero sitiül nateataran naleaing ayaag tiül omeaats, nejinguinđ ngo masaj nej, lamayac omeaats wüx micual nej macül marang nüx, pues najneaj aton, aag ayaj ngome nisoet.

<sup>38</sup> Wüx aag ayaj, leaw neech majiür minoj micual nej, najneaj arang. Naleaing leaw ngo müch majiür minoj micual nej, sapiüng más najneaj arang.

<sup>39</sup> Nop najtaj nejjiür minoj nej netam tanaám maquiiüb wüx aliün mapac minoj nej. Pero sitiül landeow minoj nej, nej alndom mengoch owix aweaag alinop leaw andiüb Teat Cristo sitiül andiüm.

<sup>40</sup> Pero xique sapiüng apmajlüy najneaj sitiül apmacül atánan quiaj, ngo mengoch owix alinomb. Xique sayaag Nangaj Espiritu ocueaj Teat Dios ambeol xic wüx sasaj icon aag ayaj.

## 8

### *Nüeteran najmel teombas narangüch dios*

<sup>1</sup> Nganüy sanasaj icon wüx nüeteran najmel teombas narangüch dios. Wüx aag ayaj apiürang ajawüw nguineay netam marangüch. Sitiül aljane apmapiüng aag ayaj, quiaj ajüic nej arangrangüy wüx leaw ajaw, aag ayaj ngo majneaj. Pero sitiül arangaats casa nop alinop, quiaj ajüic ajüürayoots lasta.

<sup>2</sup> Pues sitiül aljane apiüng nej najntsop wüx andüy, aag ayaj ngo majaw nicuajind atnej netam majaw.

<sup>3</sup> Sitiül aljane arang casa Teat Dios, Teat Dios najneaj majaw nej.

<sup>4</sup> Nganüy sanasaj icon wüx aaga nüeteran najmel teombas ajcüw narangüch dios quiaj; cos ajawaats ajcüw narangüch dios ngo membeat nicuajind; áagan nop Dios almajlüy.

<sup>5</sup> Masey anderac wüx dioses najlüyiw cawüx, tengwüy leaw najlüyiw wüx iüt, cos apiürang almajlüy xeyay dioses, masey chingüy masey natang.

<sup>6</sup> Naleaing icoots ajawaats áagan nop Dios almajlüy, aag ayaj Teat Dios. Imiün wüx nej almajlüy meáwan leaw almajlüy. Nej tayac icoots ningüy wüx iüt marangaats nej casa. At almajlüy nop Miteatiiüs Jesucristo, cos imiün wüx nej almajlüy cuajantanej leaw almajlüy. At aton nej tenguiäl mapacüch icoots.

<sup>7</sup> Ngome meáwan ajawüw aag ayaj. Cos aliün masap ombasüw wüx aaga ajlüyay

narangüch, cos ayacüch nüeteran teombas narangüch dios. Masey ngome nej neyac, nganüy wüx üet leaw najmel teombas dioses, aag ayaj ayaag tiül omeaats ngo majneaj arang.

<sup>8</sup> Teat Dios ngo mamb wüx leaw üetiiüs. Cos sitiül tetiiüs tengwüy ngo metiiüs, ngome wüx aag ayaj alndom majlüyüüs najneaj teombas Teat Dios.

<sup>9</sup> Ijawan wüx aag ayaj, cos masey aag ayaj ngo marang icon nicuajind wüx itean, pero cos alinop jayats nendüüb Teat Cristo nganaw majaw wüx meáwan aag ayaj; nots quiaj nej alndom mayaag ngo majneaj teamerangan.

<sup>10</sup> Masey lamejawan aag ayaj ngo majiür nicuajind; jondot alinop jayats nendüüb Teat Cristo leaw aliün mapateay ajaw apmajaw icon niüng arangüch casa dioses, alchetemeron tenguiäl meatiün leaw najwan teombas dioses, quiaj apmandiüm müet aton leaw najmel teombas dioses, ndoj ngo majneaj mayaag leaw tarang.

<sup>11</sup> Pares netam mejawan wüx, cos sitiül apmejchiün mamong ngana wüx alinop leaw nganaw maxom omeaats wüx mandüüb Teat Cristo, aag ayaj ngo majneaj, cos Teat Cristo tandeow mawün nej wüx aton.

<sup>12</sup> Wüx irangan atquiay majaw nop leaw nganaw maxom omeaats, aag ayaj ngo majneaj irangan, cos nej ngo majaw cuane najneaj marang tengwüy cuane ngo majneaj. Wüx irangan aag ayaj, Teat Cristo ngo majneaj majaw leaw irangan.

<sup>13</sup> Pares xique, sitiül sawaj xecoj tengwüy xechiig ngo majneaj majaw wüx süet cuajantanej, nómban sanacueat nüet leaw najmel teombas narangüch dioses, nganandot nayac wüx nisoet xecoj tengwüy xechiig.

## 9

### *Leaw netam marang nop apóstol*

<sup>1</sup> Cuane ipiüangan, ¿neol ngome apóstol xique? ¿Ngome sajlüye ndom narang leaw andiüm Teat Dios? ¿Neol ngome xiquiaj tajawas Miteatiiüs Teat Cristo? ¿Neol ngome icona teyariün andeac Teat Jesús cos tarangas najiüt wüx imbasana?

<sup>2</sup> Sitiül aljane apiüng xique ngome apóstol xic, pero icona lamejawan naleaing xique nop apóstol xic, cos teyariün andeac Teat Cristo wüx tasajas icon wüx nej. Quiaj tajüic nejay Teat Dios neyac xic narang apóstol.

<sup>3</sup> Sitiül aljane andiüm mayac sasoe, sanasaj:

<sup>4</sup> ¿Neol jow xicona, neol ngondom netiün, nanganeowan atnej irangana?

<sup>5</sup> ¿Neol ngondom najiüran xantajana atnej arangüw meáwan apóstoles, atnej arangüw



michiig Teat Jesús, atnej arang Teat Pedro aton?

<sup>6</sup> ¿Neol áagan a xique naquiüü b Bernabé netam narangan pálwüx najiüt para naxoman süetiüna? ¿Neol atquiay arangüw alde-mas apóstoles?

<sup>7</sup> ¿Nguiane ajlüy nop soldado ngo müünd majiür meáwan leaw netam neje? ¿Nguiane ajlüy nop naxey mapiür tiül micorrül nej cuajantanej xiül neóng, naleaing ngondom mapeed müete? ¿Nguiane ajlüy nop nejiür sap, ngondom mapats onts mijiw misap nej manganeowa?

<sup>8</sup> Áag sasaj icon quiaj ngome nandera-can cos atánan quiaj apiüing aton aaga poch tüünd a Moisés.

<sup>9</sup> Atcüy apiüing: “Nde meyac minchiüüts ombeay a boy leaw tearang najiüt teawüig osaab soex”, aw. ¿Teat Dios tapiüing aag ayaja wüxan boye;

<sup>10</sup> ngwüy, apiüing aag ayaj wüx icootsa? Naleaing, aag ayaj tandeac wüx icoots. Cos nop nechiüt iüt, nepiür, netam macül leaw ayac aóng aag apiür. Aton nop netaad osaab soex netam macül mawaag, cas taxaing na-neaaj.

<sup>11</sup> Pues xicona tapiürasan Mipoch Teat Dios tiül icon. ¿Jow nganüy, ngwüy iyajcana laxowüy saxoman wüxe, sitiül apmeajchiün xicon nüeterana?

<sup>12</sup> Sitiül alacas monquiaach icon ngo maxinguiaw wüx matüniw icueajiün leaw netam nejiw, cuantemas xicona alndom natüniün icueajiün.

Naleaing ngo narangan aag ayaj. Teana-mongochiün nguineayantanej cos ngo nandüman nüjchiün majcüy nejinguind. Tanaám sanarangan minajiüt Teat Cristo.

<sup>13</sup> ¿Ngo mejawana, miteaats ocueaj nipi-lan israel axomüw leawa netam nejiw wüx arangüw minajiüt Teat Dios? At wüx ajmel nichech wüx artül alndom mayariw mionij nimal najmel wüx artül.

<sup>14</sup> Cos atquiay tapiüing Teat Cristo: Meáwan leaw nerang minajiüt Teat Dios, wüx aaga najiüt quiaj alndom maxom leawa netam nej.

<sup>15</sup> Xique, wüx aag ayaj ngo natün nicua-jind. At ngo narang aaga nawüig cam nasaj icon meajchiün xic leaw netam xic. Cos sapiüing más najneaj nandeow wüx nganaw mapiürang xique satüntün leaw alnajiür.

<sup>16</sup> Masey sandeac Mipoch Teat Dios, ngo metam nerangrangüy wüx, cos sawaw ne-tam narang aag ayaj. ¡Ngo majneaj nayaag sitiül ngo nandeac Mipoch Teat Dios!

<sup>17</sup> Sitiül sanandeac Mipoch Teat Dios cos xique sandiüm narang, quiaj lanajiür leaw saxom wüx. Nganüy sitiül sanandeac Mipoch Teat Dios cos nej nesaj xic narang,

pues masey aton, cos aaga najiüt quiaj lanüünd narang.

<sup>18</sup> ¿Cuane saxom wüx, wüx sanandeac Mipoch Teat Diosa? Áagan agüy saxom: Apac ximeaats cos ngome alcuane saxom wüx. Cos masey alndom natün icueajiün wüx sarang minajiüt Teat Dios, naleaing ngo natün nicuajind.

<sup>19</sup> Xique sajlüy miün, masey nejinguind ngondom masaj xic leaw netam narang; naleaing sandiüm narang atnej najon mos ocueaj meáwan nipilan, para nasajüw mayariw andeac Teat Cristo.

<sup>20</sup> Wüx salnaquiüjpüw nipilan israel, sarang at xic nop nejiw para alndom nasajüw mandüjpiw Teat Cristo. At wüx alnaquiüjpüw ajcüwa nipilan ngome israel leaw nepiüing netam marangüch aaga poch tayac Moisés, xique aton sarang atnej arangüw, para alndom mayariw sandeac, masey xique lango metam narang aaga ajlüyay narangüch leawa tayac Moisés.

<sup>21</sup> Nganüy wüx salnaquiüjpüw leaw ngo mandüjpiw aaga poch tayac Moisés, xique aton sarang atnej arangüw nejiw, para alndom manguiayiw sandeac.

<sup>22</sup> Wüx salnaquiüjpüw leaw napateay ajawüw wüx Mipoch Teat Dios, xique teamteáman sasajüw. Xique sarang nguineayantanej cos sandiüm nawüniw alacas, mawüx wüx asoetiw nejiw.

<sup>23</sup> Meáwan aag ayaj sarang para manguiayaran wüx Teat Cristo, cos sandiüm nüünd aaga najneajay leawa Teat Dios lamapiüing apmüüch.

<sup>24</sup> ¿Ngo mejawana nguineay arangüw leaw monamb wüx apuesta? Cos meáwan andiümüw majntsopiw wüx, pero naleaing netam maw tiül áagan nop najntsop acüür. Áagan nop alndom mayar leaw apmüünd cos tajntsop wüx. Nganüy icona aton netam merangan leaw alndom wüx minajiüt Teat Dios, aag ayaj atnej mecuiüran napac para alndom meyariün aaga najneajay leaw Teat Dios apmüüch.

<sup>25</sup> Pues meáwan leaw andiüm mamb tiül cuajantanej apuesta netam maifünd wüx, macueat cuajantanej leaw ngo mambeol nej. Nejiw naleaing arangüw aag ayaj para mayariw noic corona arangüch naag op xiül, masey aag ayaj apndrom ombas najen. Nganüy icootsa netam marangaats leaw alndom, cos atquiay apmüjndiüts leaw Teat Dios lamapiüing apmüüch. Aag ayaj ngon-dom ndrom ombas.

<sup>26</sup> Pues xique leaw sarang, sacüür leaw alndom, cos sawaw nguiane sandüy. Sarang at xic nop natsoj ndoj ombas atsoj, ngome atnej nop atsojan.

<sup>27</sup> Más naleaing, ngo nejiürüy lasta, xique sasapüy nandand nganandot neyacüy wüx

naél. Cos ndot xeyay nipilan lanasaj wüx Teat Cristo, ndoj tarangas ngo majneaj, nots quiaj najcueat, ngo mambeol xic nicuajind meáwan aaga najiüt lanarang.

## 10

*Ngo metam marangüch casa narangüch dios*

<sup>1</sup> Xecojow xechijquiaw, sandiüm nüüch leaam imeajtsan nguineay tamongochiw tanomb mixejchiüts wüx tawüw tiül iüt Egipto, tawün nejiw Moisés. Cos Teat Dios tangoch nejiw, taquiüts nejiw ambüw tiül minden oic. At wüx tatüchiw nots ndec nenüt Nacants Ndec, nej tambaag noic ores aaga ndec quiaj, nguineay alndom mamongoj.

<sup>2</sup> Aag ayaj tajüiquich atanej mayariw yow, cos tamongoj tiül aaga ndec quiaj, at taquiüb nejiw mamb a oic. Tajlüyiw nóiquian cos tayaran andeac Moisés.

<sup>3</sup> At meáwan nejiw tüetiüw nüeteran leaw tüüch nejiw Teat Dios.

<sup>4</sup> Meáwan tanganeowüw aton aaga yow tüüch nejiw Teat Dios imiün tiül piedra wüx tiüc. Aaga piedra quiaj ajüiquich wüx Teat Cristo, cos nej taquiüb nejiw tiül wajchiüc.

<sup>5</sup> Naleaing xeyayiw ngo majneaj majaw nejiw Teat Dios; tandeowüw patayatójan tiül wajchiüc.

<sup>6</sup> Meáwan aag ayaj tajlüy para alndom leaam omeajtsaats wüx, nganandot mandüümaats marangaats ngo majneaj atnej tarangüw.

<sup>7</sup> Pares nde merangan casa narangüch dioses atnej altiül tarangüw, cos tiül Mipoch Teat Dios apiüng: "Nejiw chetetoj müetiüw, manganeowüw leaw ayacüw teombas midiosüw nejiw. Condom witiütoj mejiüngüw", aw.

<sup>8</sup> At ngondom mesapayoots marangaats nisoet atnej tarangüw altiül, ndoj tandeowüw nóiquian nimiow arojpuw mil (23,000) nipilan tiül noic nüt.

<sup>9</sup> Ngondom müchiiüts majcüy Teat Dios atnej tarangüw altiül; condom tapots andeowüw, tatsamb nejiw ndiüc.

<sup>10</sup> Ngondom mandeacaats wüx ombas Teat Dios atnej tandeacüw altiül; condom tambiy nejiw nop ángel ocueaj Teat Dios.

<sup>11</sup> Meáwan aag ayaj tamongochiw para majawaats icootsa aton nguineay tarangüw ngo majneaj. Tarangüch wüx nawwig para müüch icoots majawaats, nganandot mandüjpiüts wüx atnej tarangüw, cos nganüy cam ajlüyüüts tiül úmbwüx nüt.

<sup>12</sup> Pares leaw nepiüng tiül omal tiül omeaats nej ngondom majmiüc tiül nisoet netam majaw wüx, nganandot majmiüc.

<sup>13</sup> Cos meáwan leaw ngo majneaj arang nipilan, nots quiaj alndom malocooch icon

mendiüman merangan aton. Naleaing Teat Dios apmambeol icon atnej lamapiüng, ngo müüch malocooch icon cuajantanej leaw ngondom meüücan wüx. Cos wüx apmalocooch icon cuajantanej, quiaj Teat Dios apmüüch icon nguineay alndom meüücan wüx, nganandot merangan aag ayaj.

<sup>14</sup> Xecojow xechijquiaw, niqumas nde metepeayüün narangüch dios.

<sup>15</sup> Xique sasaj icon ayaj, cos saw alndom mexoman imeajtsan wüx. Nganüy netam mejawan leaw sanasaj icon, sitiül naleaing tengwüy ngo maleaing.

<sup>16</sup> Poes wüx anganeowaats vin wüx arangaats aaga Cena del Señor, aag ayaj ajüiquich ajlüyüüts nóiquian wüx miquiej Teat Cristo. At aton wüx ajineran a pan müetiüts, quiaj ajüiquichaats ajlüyüüts nóiquian maquiüjpaats Teat Cristo.

<sup>17</sup> Masey xeyayoots, nganüy ajlüyüüts nóiquian wüx üetiüts aaga pan quiaj. Aaga pan quiaj apiüng wüx micuerpo Teat Cristo.

<sup>18</sup> Ajawaats nguineay ajlüy tiül nipilan israel. Cos wüx atsambüw mionij nimal najmel wüx artül marang nichech müjchiw Teat Dios, quiaj ajüic nóiquian arangüw casa Teat Dios.

<sup>19</sup> At sasaj icon: Ajcüw narangüch dios ngo membeat nicuajind; at ngo membeat leaw ajmel teombas ajcüwa dioses quiaj.

<sup>20</sup> Sasaj icon, sitiül jangantanej nipilan leaw ngo mayariw andeac Teat Cristo ayacüw ichechiw wüx artül, aag ayaj nimeech üjchiw, ngome Teat Dios. Pares xique ngo nandüüm metsamban leaw najmel wüx artül ocueaj nimeech, cos aag ayaj ajüic ijlüyüün nóiquian mequiüjpan nimeech.

<sup>21</sup> Poes ngondom merangan ijquiaw, cos ngondom menganeowan aaga vin najlüy tiül Cena del Señor condom apmenganeowan leaw najmel wüx artül ocueaj nimeech. At ngondom meatiün aaga pan najlüy tiül Cena del Señor, condom apmeatiün leaw najmel wüx mes ocueaj nimeech.

<sup>22</sup> ¿Pues nguineay apmarangaatsa, masey müchiiüts majcüy Teat Diosa? ¿Ngwüy ipiüngana icootsa xowüy lapacaatsa, pero Teat Dios ngo majiür apaca?

*Minipilan Teat Cristo netam mandüümüw meáwan nipilan*

<sup>23</sup> Altiül apiüngüw nop alndom marang leaw andiüm, pero naleaing ngome meáwan leaw nandiüram najneaj marangüch. Masey nop alndom marang leaw andiüm, naleaing altiül ngome apmambeol nej matang wüx Mipoch Teat Cristo.

<sup>24</sup> Pares nejinguind nde mayac omeaats wüx mayamb ágan leawa néjan quiaj andiüm; ngwüy ich marang leawa najneaj, leaw apmambeol alinop.

<sup>25</sup> Nganüy sanasaj icon wüx onij najnap tiül plas. Nde metüniün menguiayiün nejingüind nguia naw aag ayaj.

<sup>26</sup> Naleaing Teat Dios tarang a iüt, ndoj meáwan leaw almajlüy wüx aaga iüt cam ocueaj nej.

<sup>27</sup> Pares sitiül aljane leaw ngo mayar andeac Teat Cristo mandium maquiiüb icon meamban meretiün aniüng nej, quiüran sitiül indiüman. Meáwan leaw apmayac metsamban, pues itsamban. Nde metüniün menguiayiün nejingüind nguia naw aag ayaj.

<sup>28</sup> Pero sitiül aljane apmasaj icon: “Aag ayaj nichech najmel teombas narangüch dios”, maj icon, pues nde metsamban. Cos nots quiaj nej ngo majneaj mayaag tiül omeaats sitiül apmetsamban.

<sup>29</sup> Pues aaga lanasaj icon ngome cos icona iyajcan ngo majneaj metsamban, ngwüy, pero cos alinop alndom mayaag ngo majneaj.

Jodot aljane tiül icona apmasaj xic: “¿Neol ngondom natsamb leaw sandiüma, neol netam mapal xic leaw ayaag alinop quiaja?”

<sup>30</sup> Cos sitiül süüch gracias Teat Dios wüx satsamb aag ayaj, ¿neol alinop nipilan apmapiüng ngo majneaj saranga?” maw.

<sup>31</sup> Sanasaj icon neol: Cos meáwan leaw irangan, masey wüx itsamban tengwüy inganeowan, netam merangan meáwan atnej najneaj majaw Teat Dios.

<sup>32</sup> Nde merangan nicuajind leaw alndom mayac wüx alinop narang leaw nej ayaag ngo majneaj; ngome wüx nipilan israel, tengwüy wüx pálwüx nipilan ngome israel, tengwüy wüx leawa neyar andeac Teat Dios.

<sup>33</sup> Xique sarang leaw alndom, nganandot majcüyw majawüw xic aljane. Ngo narang áagan leaw najneaj sawaw xique, sarang leaw najneaj majaw aldemas, cos sandiüm meáwan nipilan mayariw andeac Teat Cristo y mawüw wüx asoetiw.

## 11

<sup>1</sup> Indüjpiün wüx merangan atnej sarang, cos xique sandüüb wüx narang atnej tarang Teat Cristo.

### *Nguineay netam marangüw montaj*

<sup>2</sup> Xecojow xechijquiaw, xeyay apac ximeaats cos sawaw leaaw imeajtsan xic, at ngo ndrom imeajtsan leaw taquiajchiüs icon.

<sup>3</sup> Nganüy ajlüy alinoic sandiüm mejawan: Cos Teat Cristo ajlüy natang wüx meáwan monxey, at naxey netam majlüy natang wüx najtaj, at aton Teat Dios ajlüy natang wüx Teat Cristo.

<sup>4</sup> Sitiül nop naxey apooch omal wüx atag orar, tengwüy wüx aquiaach Mipoch Teat

Dios, aag ayaj monxing ocueaj minatang nej.

<sup>5</sup> Nganüy sitiül nop najtaj ngo mapooch omal wüx atag orar tengwüy wüx andeac leaw üüch nej mandeac Teat Dios, pues aag ayaj monxing ocueaj minoj nej, cos aag ayaj atanej majep omal nej nangwang.

<sup>6</sup> Sitiül nop najtaj ngo mapooch omal, más najneaj ich majerep omal nej nómban. Pero sitiül axing majerep omal nangwang, más najneaj ich mapooch omal nej.

<sup>7</sup> Nop naxey ngo metam mapooch omal nej, cos Teat Dios tarang naxey majlüy najneajay atnej mindiw nej, majüiquich nej natang. Nganüy najtaj tarangüch najneajay atnej mindiw naxey.

<sup>8</sup> Cos Teat Dios tarang a najtaj imiün wüx micostil naxey, ngome imiün wüx micostil najtaj tajlüy naxey.

<sup>9</sup> Teat Dios ngo marang a naxey ajcan lajlüy a najtaj; ngwüy, najtaj tarangüch cos ajcan lajlüy a naxey.

<sup>10</sup> Por aag ayaj nop najtaj netam mapooch omal, cos aag ayaj ajüic arang casa naxey, aton ángeles alndom majawüw aag ayaj.

<sup>11</sup> Teat Dios tayac a naxey, átan tayac a najtaj, cos naxey netam nej najtaj, aton najtaj netam nej naxey.

<sup>12</sup> Naleaing najtaj tajlüy imiün wüx micostil naxey, condom naxey micual nej najtaj, masey Teat Dios nerang meáwan leaw almajlüy.

<sup>13</sup> Cuane ipiüangan, ¿jow nop najtaj, najneaja sitiül mataag orar ngo mapooch omala?

<sup>14</sup> ¿Neol ngo mejawana nguineay netam majlüy omal nop naxey? Cos sitiül nop naxey matangüüch omal nej najaljal, aag ayaj monxing.

<sup>15</sup> Pero sitiül najtaj matangüüch omal nej najaljal aag ayaj ambeol nej mataag nej majneaj, cos aaga ondeats quiaj apooch nej omal.

<sup>16</sup> Sitiül aljane ngo majneaj majaw aag ayaj, pues xicono ngo najiüran alinoic poch wüx aag ayaj. At aton tiül meáwan noicnoic ajlüy minipilan Teat Cristo ngo majlüy alinoic leaw arangüw wüx aag ayaj.

### *Ngo marangüw Cena del Señor atnej netam*

<sup>17</sup> Nganüy leaw sanasaj icon cam, ngondom napiüng najneaj najaw leaw irangan. Cos sanguiaiy wüx canchiüron ingow mambeol icon müüch mapac imeajtsan, más naleaing ayac icon wüx ngo majneaj.

<sup>18</sup> Nganüy sanasaj icon, cos tanguiaiyüs wüx canchiüteron indeacan palpáwüx, ngo mejlüyiün nóiquian. Xique sapiüng nots quiaj naleaing atquiaj irangan.

<sup>19</sup> Jonde ngwa, atquiaj netam majlÿy para majiÿquich jane tiül icona naleaing almandüüb Teat Cristo.

<sup>20</sup> Pues aag irangan quiaj wüx canchiÿron, aag ayaj naleaing ngome Cena del Señor irangan.

<sup>21</sup> Cos wüx teretiün, inopnophon üet leaw aneay nej, at altiül angün wüx. Pero alinop leaw ngo majiÿr netam maifünd.

<sup>22</sup> ¿Cuane aag ayaja? ¿Neol, ngo mejiÿran iniüngana niüng alndom meretiün, menganeowan quiaja? Cos leaw irangan quiaj, ajüic ngo membeat mejawan nopnop nendüüß Teat Cristo, cos teajchiün monxing leaw ngo majiÿr nicuajind nüeteran. ¿Pues cuane sanasaj icon wüx aag ayaja? ¿Sanasaj icon najneaj najawa? ¡Ngwüty niquimas!

*Teat Cristo tayac Cena del Señor*

(Mt. 26:26-29; Mr. 14:22-25; Lc. 22:14-

20)

<sup>23</sup> Teat Cristo tüüch xic najaw nguineay netam marangaats aaga Cena del Señor. Lanasaj icon nguineay tarang Teat Jesús wüx aaga ongwiiüts apmayacüch teowix monajiüt, cos taxaing a pan mandeaand.

<sup>24</sup> Condom wüx landoj müüch gracias Teat Dios, quiaj tambaag. Tapiüng: “Iyariün, itean, cos aag agüy xecuervo, saneyacüy mangüy asoeteran. Wüx itean aag ayaj netam leaam imeajtsan xic”, aw.

<sup>25</sup> Condom wüx landoj müetiw, taxaing a vas, tapiüng: “Aaga vin tiül a vas cam apiüng wüx jayats poch üüch Teat Dios, cos xequej apmajünch tiüt wüx sanandeow. Wüx aag ayaj Teat Dios apmawün isoetiün. Meáwan nüt wüx apmenganewan aag ayaj ich leaam imeajtsan wüx xique”, aw.

<sup>26</sup> Pares wüx apmetiün aaga pan, menganeowan aaga vin, aag ayaj ijiüquichan nguineay Teat Jesús tandeow. Atquiaj netam merangan tanaám, leaw nej andiüil miün alinomb.

*Leaw ngo metam marangüch wüx ayarich Cena del Señor*

<sup>27</sup> Wüx aag ayaj, jangantanej leaw apmüet aaga pan quiaj, leaw apmanganeow aaga vin quiaj, naleaing sitiül ngo marang atnej apiüng Teat Jesús netam marang, pues aag ayaj lamajiÿr xeyay nisoet, cos atnej ngo marang casa leaw tamongoch Teat Jesús wüx taw miquiej nej, tandeow wüx cruz.

<sup>28</sup> Pares wüx apmerangan aaga Cena del Señor netam meyamban imeajtsan nganandot terangan alngün ngo majneaj, para alndom metüniün mesajan Teat Dios mawün wüx omeaats leaw terangan. Quiaj alndom metiün aaga pan quiaj, menganeowan aaga vin.

<sup>29</sup> Cos jangantanej leaw apmüet, leaw apmanganeow, ndot ngo leaam omeaats wüx

nguineay tamongoch Teat Jesús, Teat Dios apmajaw wüx aaga nisoet quiaj.

<sup>30</sup> Por aag ayaj ajlÿy tiül icona xeyay moniün andeow, altiül ngo majiÿr monapacüy, at altiül landeowwü.

<sup>31</sup> Nganüy sitiül icootsa apmapiüngaats cuane nisoet ajiÿraats, quiaj Teat Dios apmawün wüx omeaats aaga nisoet quiaj.

<sup>32</sup> Naleaing sitiül ajiÿraats nisoet, más najneaj Teat Dios majaw wüx aag ayaj nganüy nómban, quiaj langome apmajlÿyüüts tiül, wüx aaga nüt Teat Dios apmajaw wüx asoet meáwan nipilan wüx iüt.

<sup>33</sup> Xecojow xechijquiw, wüx apcanchiÿmeron merangan aaga Cena del Señor, ercülasyon merangan nóiquian.

<sup>34</sup> Sitiül aljane ayáagan apmind üet, ich met aniüng nej, cos atquiaj mbich ngome apmejiÿran naél wüx apmerangan aaga Cena del Señor niüng canchiÿron. Sanasaj icon wüx leaw aliün majlÿy wüx sanamb najaw icon.

## 12

*Nangaj Espiritu üüch anopnop leaw alndom marang*

<sup>1</sup> Xecojow xechijquiw, sandiüm mejawan wüx leaw üüch icoots anopnopoots Nangaj Espiritu ocueaj Teat Dios nguineay marangaats minajiüt nej.

<sup>2</sup> Lamejawan wüx nganaw meyariün andeac Teat Cristo, nimeech tayac icon wüx merangan casa ajcüwa dios narangüch leaw ngondom mendeac.

<sup>3</sup> Naleaing sandiüm mejawan: Nangaj Espiritu ocueaj Teat Dios ngo müüch nejingund mapaiich Teat Jesús. Átan nejingund ngondom mapiüng Teat Jesús miteatiüts, sitiül Nangaj Espiritu ngo müüch nej mandeac aag ayaj.

<sup>4</sup> Leaw üüch icoots Teat Dios anopnopoots para alndom marangaats minajiüt nej, pues Nangaj Espiritu neech icoots aag ayaj.

<sup>5</sup> Masey Teat Dios lamüüch icoots palpáwüx najiüt marangaats ocueaj nej, naleaing aaga najiüt arangaats quiaj, wüx minüt nej Teat Dios arangaats.

<sup>6</sup> At meáwan cuajantanej najiüt leaw üjndiüts anopnopoots marangaats, nej Teat Dios neech icoots ndom ombasaats marangaats aaga najiüt quiaj.

<sup>7</sup> Pues meáwan leaw Nangaj Espiritu üüch anopnopoots marangaats, aag ayaj üüch para alndom mambeolaats meáwan minipilan Teat Cristo.

<sup>8</sup> Cos Nangaj Espiritu ocueaj Teat Dios üüch altiül maxom omeaats mandeac wüx cuajantanej najneaj. At Nangaj Espiritu üüch altiül majaw cuajantanej para maquiaach alinop.

<sup>9</sup> Átan Nangaj Espíritu üüch altiül majaw xeyay wüx leawa nej andiüm, ngo machiw omeaats wüx. At nejay Nangaj Espíritu üüch alinop ndom ombas mamongoch iün andeow moniün andeow.

<sup>10</sup> At alinop üünd ndom ombas marang ateócan leaw ngomeaag ajaraw. Alinop üünd maxom omeaats mandeac leaw lamasaj nej Teat Dios. Alinop üüch nej Teat Dios majaw jane teamambeol nej, sitiül Nangaj Espíritu ocueaj Teat Dios, tengwüy ambeol nej nimeech. Alinop üünd mandeac alinoic ombeayiün leaw nej ngo majaw; alinop üünd maxom omeaats mapiüng cuane andeac aaga nendeac alinoic ombeayiün quiaj.

<sup>11</sup> Pues meáwan aag ayaj Nangaj Espíritu ocueaj Teat Dios aag cuane nej andiüm müüch, cos nej üüch icoots anopnopoots palpálwüx leaw alndom marangaats.

*Meáwan monyar andeac Teat Cristo ajlüyiw noic miün*

<sup>12</sup> Nop nipilan ajiür omal, owix, oleaj, meáwan ajiür, pero aag ayaj nop nej. Atquiaj aton ajlüy monyar andeac Teat Cristo. Cos masey ajlüyüüts xeyay, ajlüyüüts nóiquian maquiüjpaats Teat Cristo.

<sup>13</sup> Aaga Nangaj Espíritu ocueaj Teat Dios tayac icoots majlüyüüts nóiquian maquiüjpaats atnej nop nipilan, masey nipilan israel, masey nipilan griego; masey nipilan arang najon mos teombas alinop, masey nipilan ngome mos nejw. Nganüy meáwan icootsa tündiiüts aaga Nangaj Espíritu ocueaj Teat Dios.

<sup>14</sup> Noic cuerpo ngome noic quiriw ajlüy, cos ajiür palpálwüx.

<sup>15</sup> Jondot oleajaran mapiüng: “Xique ngome owixaran xic, pares ngome sajlüy wüx cuerpo”, maw. Masey mapiüng ayaj, naleaing nej tanaám alwüx cuerpo.

<sup>16</sup> Jondot olaagaran mapiüng: “Xique ngome oniügaran xic, pares ngome sajlüy wüx ombasaran”, maw. Masey mapiüng aag ayaj, naleaing tanaám alwüx cuerpo.

<sup>17</sup> Cos sitiül nop nipilan palüy miün oniügaran alwüx, ¿ngwineay alndom manguiyarana? Jondot nop nipilan palüy miün olaagaran alwüx, ¿ngwineay alndom maximarana?

<sup>18</sup> Cos Teat Dios tayac meáwan niüng neta majlüy wüx cuerpo atnej andiüm nej.

<sup>19</sup> Sitiül ndot áagan oniügaran ajiür, tengwüy áagan olaagaran ajiür, quiaj apmajüic ngo palam aaga cuerpo.

<sup>20</sup> Pero masey xeyay palpálwüx ajiür, naleaing nop nej.

<sup>21</sup> Pares oniügaran ngondom masaj owixaran: “Ngo metam xic ic”, maj. Aton omalaran ngondom masaj oleajaran: “Ngo metam xic icona”, maj.

<sup>22</sup> At leaw ajawaats najlüy wüx cuerpo leaw ajüic ngo majiür apac, naleaing xeyay netamüw.

<sup>23</sup> Ajawaats wüx noic cuerpo leaw ajüic ngo membeat, aag ayaj atajcaats majneaj atnej xeyay nemeat. Pero leaw axinguaats majawaats najlüy wüx cuerpo, aag ayaj ayambaats nguineay alndom maxotaats.

<sup>24</sup> Naleaing leaw ngo maxinguaats majawaats wüx cuerpo, ngo metam maxotaats. Atquiaj ajawaats Teat Dios tüüch majlüy xeyay nemeat leaw ajüic ngo membeat.

<sup>25</sup> Atquiaj tarangüchiiüts, ngo majüic noic quiriw xeyay netam, alinoic ngwüy, ajlüyiw atotow, meáwan ambeolayej.

<sup>26</sup> Pares sitiül algün maxom nej necoy, meáwan apmayaag acoy. Nganüy sitiül apmajneaj nop, meáwan aton apmbixiüm.

<sup>27</sup> Nganüy icootsa ajlüyüüts at icoots micuerpo Teat Cristo; at anopnopoots ajiüraats atamaats wüx nej.

<sup>28</sup> Teat Dios tayac anopnopoots marangaats leawa nej andiüm tiül noicnoic ajlüy minipilan Teat Cristo. Leaw natangüw, ajcüw ayaj apóstoles. Condom andüüban mondeac andeac Teat Dios. Andüüban marangüw natang monquiaach. Condom andüüban leaw üüch nejw Teat Dios marangüw ateócan. Condom ajcüw mon-eech majneaj moniün andeow. Condom monbeol jangantanej tiül monyar andeac Teat Cristo. Andüüban nejw monlüy wüx cuajantanej najiüt. Ndójwüx ajcüw ayaj mondeac alinoic ombeayaran leaw Teat Dios üüch nejw mandeacüw.

<sup>29</sup> ¿Jow nganüy cuane ipiüngana, jangantanej alndom marang apóstol? ¿Ngwa, palüyan mondeac andeac Teat Dios? ¿Ngwa, palüyan monquiaach tiül noicnoic ajlüy minipilan Teat Cristo? ¿Ngwa, meáwan leawa neech nejw Teat Dios ndom ombasüw marangüw ateócana?

<sup>30</sup> ¿Ngwüye, jangantanej alndom müüch majneaj moniün andeowa? ¿Ngwüye, jangantanej alndom mandeac alinoic ombeayarana? ¿Ngwüye, jangantanej alndom mapiüng cuane amb apiüng alinop wüx andeac alinoic ombeayarana? ¡Ngwüy ngondom!

<sup>31</sup> Netam mandiüm imeajtsan leawa más najneaj, quiaj Teat Dios apmüüch icon aaga najiüt leawa más xeyay atam. Pero nganüy sanasaj icon wüx leaw ajntsop wüx ajneaj merangan.

## 13

*Netam mandüümaats nop alinop*

<sup>1</sup> Jondot xique lanüünd nandead ombeay pälwüx nipilan, at lanüünd nandead andeacüw ángeles aton, naleaing sitiül ngo nandiüm nop alinop, sanajlüy at

xic manchiüc nentsasar ajiünts, tengwüy sanajlüy at xic platilla ngo majneaj ajiünts wüx atsünderan.

<sup>2</sup> Masey lanüünd nandeaç leaw asaj xic Teat Dios, at lanüünd najaw wüx leaw nomb ngo majüic nguineay ajlüy, at lanüünd najaw wüx meáwan leaw almajlüy; masey saw Teat Dios alndom maxaing noic tiüc mawün mayac niüng andiüm nej, ngo nachiw ximeaaç wüx; pero sitiül ngo nandiüm nop alinop, pues ngo nembeat nicuajind.

<sup>3</sup> Sitiül sanüüch meáwan leawa sajiür nambeol nipilan leaw ngo majiür nicuajind; at sitiül sanüüch xecuerpo mandaab atnej noic nichech, pero naleaing sitiül ngo nandiüm nop alinop, cuane saxom tiül, nicuajind.

<sup>4</sup> Cos sitiül aljane andiüm nop alinop apmaiüc wüx cuajantanej, xeyay ajneaj omeaaç. At ngome apmandiümdiüm majiür leaw ajiür alinop, ngo merangrangüy, ngome lombojchay,

<sup>5</sup> ngome itsojüyan, ngo mayambymb marangüch leaw andiüm nej, ngome najen ajcü, ngo mayac wüx omeaaç mapalüch ombas cuajantanej.

<sup>6</sup> Ngo mapac omeaaç wüx leaw ngo majneaj arangüw nipilan; naleaing apac omeaaç wüx nipilan arangüw najneaj.

<sup>7</sup> Jane naleaing ajiür lasta alinop, ngo mapiüng wüx nicuajind, masey ngo majneaj apmamogoch. At ngo machiw omeaaç wüx cuajantanej, ayar meáwan leaw najneaj asoic. Tiül omeaaç nej apiüng nipilan apmarangüw najneaj. At afüc wüx cuajantanej masey naél, nej tanaám arang najneaj.

<sup>8</sup> Sitiül andiümaaç nop alinop, aag ayaj ngo mamong. Alinoic nüt ngome apmetam aljane mandeaç andeaç Teat Dios; ngome apmetam aljane mandeaç pálwüx ombeayaran; at Teat Dios langome apmetam müüch aljane majaw wüx cuajantanej.

<sup>9</sup> Cos leaw ajawaaç nğanüy, aag ayaj ngome palan ajlüy; at leaw lamasaj icoaç Teat Dios, aag ayaj quiripite ajawaaç, ngome palan.

<sup>10</sup> Naleaing wüx apmatüch a nüt apmajaawaaç palan wüx meáwan cuajantanej, quiaj langome apmetam leaw ngome palan.

<sup>11</sup> Pues wüx nine xic, tandeaç atnej andeaç nine monguich, tapiüngas tiül ximeaaç atnej arang nop nine, xefis atnej mifis nop nine. Nğanüy wüx lasatang lanarang naxey, quiaj tacueatiüs narang atnej arang nop nine.

<sup>12</sup> Nğanüy ngondom maxomaaç majawaaç nicuajind palan; aag ayaj atnej majawaaç teomasaaç tiül noic nesomom cheeg. Nğanüy ngo nambich najaw meáwan, pero alinoic nüt sanajaw meáwan

cuajantanej atnej Teat Dios aaw tiül ximeaaç nğanüy nguineay sarang.

<sup>13</sup> Pero ajlüy arej sanasaj icon wüx leaw netam meyaçan wüx imeajtsan meáwan nüt. Netam meyaçan imeajtsan wüx leaw apiüng Teat Dios, ngondom mechiwean imeajtsan wüx. Alinoic: Netam meyaçan tiül imeajtsan Teat Dios apmarang meáwan leawa lamapiüng apmarang. At alinoic: Netam mejiüran lasta nop alinop. Pero leaw ajntsop wüx atam tiül ajcüw arej quiaj, aag ayaj merndiümayon, merjiürayon lasta.

## 14

### *Wüx anderac alinoic ombeayaran*

<sup>1</sup> Irangan leaw niüng alndom mendüman nop alinop. At aton iyacan imeajtsan wüx leaw alndom müüch icon Nangaj Espiritu merangan. Cos leaw xeyay netam meyaçan imeajtsan wüx, aag ayaj ndom imbaçan mesajan nipilan leaw andeaç Teat Dios.

<sup>2</sup> Wüx nop apmandeaç alinoic ombeayaran, aag ayaj ngo mambeol alinop, cos Teat Dios aaw cuane; nejingüind alinop ngo manguiay cuane teamapiüng. Masey Nangaj Espiritu ambeol nej mandeaç aag ayaj, nipilan ngondom majawüw cuane.

<sup>3</sup> Pero leaw üünd mandeaç leaw asaj nej Teat Dios, aag ayaj andeaç manguiay nipilan, ambeol nejiw mapacüw wüx mandüjpiw Teat Cristo, üüch mapac omeajtsüw, at üüch nejiw mambeolüw aljane mamong amix omeaaç.

<sup>4</sup> Cos leawa nendeaç alinoic ombeayaran, aag ayaj nejáyan quiaj ambeolüy. Pero leaw nendeaç leaw asaj nej Teat Dios, aag ayaj ambeol meáwan noicnoic ajlüy minipilan Teat Cristo.

<sup>5</sup> Xique malüy sapiüng meawarónan mendeaçan alinoic ombeayaran, pero más xeyay sandiüm sitiül alndom mendeaçan mesajan nipilan leaw asaj icon Teat Dios, cos aag ayaj xowüy latam. Nğanüy sitiül aljane üünd mandeaç cuane apiüng aaga nendeaç alinoic ombeayaran quiaj, aag ayaj alndom mambeol monyar andeaç Teat Cristo matangüw wüx Mipoch Teat Dios.

<sup>6</sup> Xecojow xechijquaw, jondot xique nğanüy sanamb niüng ijlüyiün nandeaç alinoic ombeayaran, ¿cuane apmambeol icon wüx? ¡Nicuajind! Pero sanambeol icon sitiül sanandeaç nasaj icon leaw tasaj xic Teat Dios, tengwüy sitiül sanasaj icon leaw tündiüs najaw, tengwüy sitiül sanasaj icon leaw tasoiquiüs nandeaç, asaj xic Teat Dios, tengwüy sitiül sanaquiaach icon leaw apiüng tiül Mipoch Teat Dios.

<sup>7</sup> Jondot cuajantanej natsünderan tengwüy nainderan ngo mayambüch onic, ngondom mawün najneaj ton. ¿Nguineay apmajüic cuane soen tawüne?

<sup>8</sup> Sitiül a trompet ngo maw onic, nguineay apmapaj soldados mambüw tiül montsoj. ¿Jane apmetajquaiy majneaj mamb tiül montsoja?

<sup>9</sup> Pues atquaiy icona aton wüx indeacan sitiül ngo mendeacan ranüy, ¿nguineay apmajüic cuane teamendeacana? Aag ayaj atnej mendeacndeacan tiül nepepep.

<sup>10</sup> Naleaing, masey ajlüy xeyay ombeayaran ningüy wüx iüt, meáwan nanderac ajiür cuane amb apiüng.

<sup>11</sup> Sitiül xique ngo nanguiay aaga ombeayaran leaw andeac alinop, sanajlüy at xic napeayüis miün; at aaga nendec masaj xic quiaj, apmajlüy atnej napeay miün.

<sup>12</sup> At icona aton cos lamendiüman mejiüran meáwan leaw apmüüch icon Nangaj Espiritu ocueaj Teat Dios, netam merangan aaga najiüt leaw apmambeol meáwan monyar andeac Teat Cristo mapacüw wüx minajiüt nej.

<sup>13</sup> Pares sitiül aljane andeac alinoic ombeayaran, ich matün ocueaj Teat Dios müüch nej majaw nguineay alndom masaj alinop cuane landoj mapiüng quiaj.

<sup>14</sup> Jondot sitiül xique sanataag orar wüx alinoic ombeayaran, masey Nangaj Espiritu üüch xic narang, jondot ngo najaw cuane teanandeac, pues ngondom mambeol nejingüind.

<sup>15</sup> Pero, ¿nguineay netam naranga? Cos alndom nataag orar wüx alinoic ombeayiün leaw üüch xic Nangaj Espiritu, pero aton netam nataag orar leaw alndom najaw cuane sandeac. At aton alndom nataag cantar himnos leaw üüch xic Nangaj Espiritu, pero netam najaw cuane sataag cantar.

<sup>16</sup> Pero icona sitiül isajan Teat Dios leaw najneajay lamarang wüx icona wüx alinoic ombeayiün, ¿nguineay alndom alinop jayats leaw ngo majaw mapiüng “amén” nóiquian maquüüb icona wüx aag leaw ipiüangan quiaja, sitiül ngo manguiy cuane temendeacana?

<sup>17</sup> Naleaing icona alndom meajchiün gracias Teat Dios najneajay, pero alinop leaw ngo manguiy ngo mambeol nej nicuajind.

<sup>18</sup> Xique süüch palpacs Teat Dios cos más alndom nandec palpáwüx ombeayaran ngo matnej icona.

<sup>19</sup> Pero wüx sajlüy niüng canchiüjow monyar andeac Teat Cristo, sandiüm nandec masey acoquiaw poch leaw alndom manguiyaw, leaw apmambeol nejiw; ngo nandiüm nandec agajpowüw mil (10,000) poch wüx alinoic ombeayaran leaw ngo mambeol nejingüind.

<sup>20</sup> Xecojow xechijquaiw, nde mepiügan tiül imalan atnej apiüngüw naliw monguich. Netam mepiügan atnej natang nipilan, menguiayiün leaw sasaj icon quiaj. Pero wüx cuajantanej ngo majneaj, netam

mejlüyiün atnej naliw monguich leaw nganaw majaw cuane ngo majneaj.

<sup>21</sup> Tiül aaga ajlüyay poch tarang Isaías apiüng nipilan israel apmasoiquiw wüx alinoic ombeayaran, cos Teat Dios tapiüng: “Xique sanüüch mambüw niüng ijlüyiün nipilan mondeac palpáwüx ombeayaran. Sanandec nasaj icon wüx ombeayiw. Masey atquaiy sanarang, nejiw ngome apmayariw sandeac”, aw Teat Dios.

<sup>22</sup> Atquaiy ajlüy nganüy aton, cos sitiül aljane apmandeac alinoic ombeayaran wüx canchiüron, aag ayaj alndom mambeol leaw nganaw mayariw andeac Teat Cristo, ngome apmambeol leaw lamayariw andeac Teat Cristo. Nganüy wüx aljane apmandeac noic poch leaw asaj nej Teat Dios, aaga andeac quiaj apmambeol monyar andeac Teat Cristo, ngome apmambeol leaw nganaw mayar andeac Teat Cristo.

<sup>23</sup> Sitiül meáwan monyar andeac Teat Cristo apcanchiüm, condom teamandeacüw alinoic ombeayaran, jondot mapeayiw acas jayats leaw ngo majawüw xeyay, tengwüy mapeayiw alacas leaw ngo mayariw andeac Teat Cristo, ¿cuane apmapiüngüwa? ¿Ngome apmapiüngüw nerchachiün wüx indeacan aag ayaja?

<sup>24</sup> Nganüy sitiül meáwan teamandeacüw leaw asaj nejiw Teat Dios, pues masey apmapeay nop ngo mayar andeac Teat Cristo, tengwüy nop jayats leaw nganaw majaw xeyay, pero wüx apmanguiyaw leaw indeacan, apmayaag tiül omeaats nej ngo majneaj arang, apleaam omeaats netam macueat arang ngo majneaj.

<sup>25</sup> Wüx apleaam omeaats leaw ngo majneaj lamarang, pues quiaj apmaquieel micos nej marang casa Teat Dios, mapiüng naleaing Teat Dios alniüng ijlüyiün.

*Wüx apcanchiümeron netam merangan meáwan najneaj*

<sup>26</sup> Xecojow xechijquaiw, nganüy sanasaj icon nguineay netam merangan. Wüx apcanchiümeron, jangantanej tiül icona alndom majiür cuane aparang. Nop alndom mapiüng matajüch cantar noic salmo, alinop alndom maquiaach, alinop alndom mapiüng cuane lamüüch nej Teat Dios majaw, alinop alndom müüch nej Teat Dios mandeac alinoic ombeayaran, alinop alndom müünd mapiüng cuane tapiüng aaga nendec alinoic ombeayaran quiaj. Meáwan leaw irangan quiaj, aag ayaj apmembeolayon mapac imeajtsan, metangan wüx Mipoch Teat Dios.

<sup>27</sup> Sitiül almajlüy acas alndom mandeacüw alinoic ombeayaran, pues ich mandeacüw masey ijpüw tengwüy arojüpüw, pero nopnopoich mandeacüw; aton alinop ich mapiüng cuane teamapiüngüw.

<sup>28</sup> Sitiül ngo majlüy aljane alndom mapiüng wüx cuane teamapiüngüw, más najneaj ich ndijchiümoj, nde mandeacüw niüng canchiowaran. Ich mandeacüw tiülan omeajtsüw nejw, at masajüw Teat Dios, ngome tiül nipilan.

<sup>29</sup> At aton leaw mondeac leaw asaj nejw Teat Dios, pues leaw wüx jipüw tengwüy arojpw alndom mandeacüw. Aldemas ich müjchiw olajcüw manguiayiw sitiül aag ayaj naleaing tengwüy ngo maleaing.

<sup>30</sup> Sitiül aljane ajcüwa moncheten quiaj, lamasaj nej Teat Dios cuane alndom mapiüng, pues ich tiünd mendeac; pero alinop ich macueat andeac.

<sup>31</sup> Icona alndom mendeacan inopnopen leaw lamasaj icon Teat Dios, cos atquiaj alndom merquiaachayon, at apmapac imeajtsan wüx Teat Cristo.

<sup>32</sup> Meáwan leaw nendeac leaw asaj nej Teat Dios alndom ndijchiüm wüx andiüm.

<sup>33</sup> Cos leaw andiüm Teat Dios aag ayaj majlüy najneajan tiül moncanchiün, ngome aolüyan andeacüw.

Meáwan niüng apcanchiümoj monyar andeac Teat Cristo, atquiaj netam majlüy.

<sup>34</sup> Cos montaj netam ndijchiümójan wüx canchiowaran; ngo metam mendeacüw, netam mayariw andeac minojow nejw atnej apiüng tiül ajlüyay Mipoch Teat Dios.

<sup>35</sup> Sitiül andiümüw manguiayiw leaw ngo majawüw, ich matüniw manguiayiw minojow nejw aniüngüw nejw, cos monxng sitiül nop najtaj apmandeac tiül moncanchiün.

<sup>36</sup> Ich leaam imeajtsan Mipoch Teat Dios ngome tiülan icona witiüt, at ngome ágan icona lameyariün.

<sup>37</sup> Sitiül aljane tiül icona apiüng nej alndom mandeac leaw asaj nej Teat Dios, tengwüy apiüng Nangaj Espiritu lamüüch nej marang cuajantanej, nej netam mayaag mapiüng leaw sarang wüx nawüig cam, aag ayaj asaj xic Teat Cristo.

<sup>38</sup> Pero sitiül aljane ngo mandiüm mayar aag ayaj, nde merangan casa.

<sup>39</sup> Xecojow xechijquaiw, indeacan leaw lameajndiün mendeacan, leawa lamasaj icon Teat Dios; at nde mepalan leaw nendiüm mandeac alinoic ombeayaran.

<sup>40</sup> Pero irangan meáwan najneaj, nendüübnüjpeay, nde meolüyan.

## 15

### *Wüx Teat Cristo tapac alinomb*

<sup>1</sup> Nganüy xecojow xechijquaiw, sanasaj icon alinomb para alndom leaam imeajtsan leawa landoj nasaj icon, nguineay lamawün icon wüx isoetiün Teat Cristo. Aag ayaj icona teyariün, at nganüy tanaám temendüjpiün.

<sup>2</sup> Cos wüx aaga poch tasajas icon quiaj, landoj leriowan wüx isoetiün sitiül temeyacan wüx imeajtsan. Pero sitiül ngo meyacan wüx imeajtsan, ajüic ipiüngánan iyariün andeac Teat Cristo.

<sup>3</sup> Xique taquiajchiüs icon wüx leawa xeyay atam menguiayüün atnej tasoiquiüs, cos tiül Mipoch Teat Dios apiüng Teat Cristo tandeow mawün asoetiüts.

<sup>4</sup> Ndoj tamiüraad, pero tapac alinomb wüx er nüt, atnej lapiürang wüx nej tiül Mipoch Teat Dios.

<sup>5</sup> Condom tejüiquichay majaw nej néjan teat Pedro nasoic Cefas. Ndoj tejüiquichay majawüw nej meáwan gajpiüp (12) miapóstoles nej aton.

<sup>6</sup> Ndoj tejüiquichay majawüw nej among acoquiaw acoic miow (500) minipilan Teat Cristo nóquiän. Ajcüw ayaj xeyayiw aliünüw mapacüw nganüy, altiül acas landeowüw.

<sup>7</sup> Condom tejüiquichay majaw nej teat Jacobo. Ndoj tejüiquichay majawüw nej alinomb meáwan miapóstoles nej.

<sup>8</sup> Ndojwüx tejüiquichay najaw aton, masey xique atnej wijquiatos úmbwüx, atnej nop nine nganaw matüch a nüt wijquiam.

<sup>9</sup> Xique chingüy tiül meáwan apóstoles, ngo nembeat nicuajind, ngo metam nasoic apóstol xic, cos tanomb xeyay tajcüyiüs najawüw; tayambas ombasüw monyar andeac Teat Cristo.

<sup>10</sup> Cos Teat Dios tajiür xic lasta xeyay, pares tajlüyiüs atnej nganüy sajlüy cam. Ngome por gana miün tajiür xic lasta, cos sarang xeyay najiüt, ngo matüchiw xic meáwan apóstoles. Naleaing aag ayaj ngome xíquian quiaj sarang, cos Teat Dios nembeol xic narang.

<sup>11</sup> Ngo metam mandeacaats wüx jane tarang aaga najiüt tiül icona, sitiül xique tengwüy nejw. Naleaing leaw xeyay nembeat, aag ayaj cos lameyariün andeac Teat Cristo.

*Wüx apmapacüw alinomb leawa landeowüw*

<sup>12</sup> Sitiül lamapiüngaats Teat Cristo tapac alinomb, ¿nguineay altiül apiüngüw leaw landeow langome apmapacüw alinomba?

<sup>13</sup> Cos sitiül naleaing leaw landeow langome apmapacüw alinomb, aton Teat Cristo ngome tapac alinomb.

<sup>14</sup> Sitiül Teat Cristo taton ngo mapac alinomb, por gana miün andeacaats wüx, at por gana miün ayariüts andeac Teat Cristo.

<sup>15</sup> At xicona ajüic atnej monwaiich xicon wüx tandeacasan nguineay tarang Teat Dios, cos tapiüngasan Teat Dios tapacüch Teat Cristo. Sitiül naleaing mondeow ngo mapacüw alinomb, quiaj Teat Dios taton ngome tapacüch Teat Cristo.



<sup>16</sup> Cos sitiül mondeow ngo mapacüw, at aton Teat Cristo ngome tapac alinomb.

<sup>17</sup> Átan sitiül Teat Cristo ngome tapac alinomb, por gana iyariün andeac nej, aliün mejiüran isoetiün.

<sup>18</sup> At aton sitiül atquiaj ajlüy, nipilan leaw tayariw andeac Teat Cristo ndoj tandeowüw, ngo maw asoetiwi, lambüw tiül castigo.

<sup>19</sup> Jondot niüngancüy wüx iüt cam ambeat andüjpiüts Teat Cristo, nots quiaj ngo membeat leaw arangaats, quiaj ajüic najntsop tiül michachiüts.

<sup>20</sup> Naleaing Teat Dios tapacüch alinomb Teat Cristo. Cos Teat Cristo ombas mapac tiül mondeow, pares ajawaats Teat Dios apmapacüch alinomb meáwan nipilan leaw ayar nej andeac.

<sup>21</sup> Tamelich andeowaran wüx leaw tarang nop naxey; at naw wüx leawa tarang nop naxey tamelich apacaran tiül mondeow.

<sup>22</sup> Meáwan nipilan wüx iüt tengual andeowaats cos acualaats icoots Adán; pero meáwan nipilan leaw lamayariw andeac Teat Cristo apmapacüw alinomb.

<sup>23</sup> Andüübndüjpeay apmapacüw, cos Teat Cristo ombas mapac. Condom wüx nüt apmandilil Teat Cristo, apmapacüw meáwan leaw minipilan nej.

<sup>24</sup> Condom aliüc miün nüt apmümb aaga iüt cam wüx Teat Cristo landoj mandrooch ombas meáwan montangtang monajiüt, at meáwan moncüy majaw nej. Condom apmayac teowix Teat Dios meáwan leaw almajlüy.

<sup>25</sup> Cos naleaing nej Teat Cristo netam majlüy wüx meáwan leaw almajlüy, leaw ndoj mayac teoleaj nej meáwan moncüy majaw nej.

<sup>26</sup> Condom aaga úmbwüx ngo majneaj leaw nej apmandrooch ombas, aag ayaj andeowaran.

<sup>27</sup> Lajlüy tiül Mipoch Teat Dios niüng apiüng: “Meáwan leaw almajlüy, Teat Dios tayac teoleaj Teat Cristo, cos nej netam majlüy wüx meáwan”, aw. Naleaing wüx tapiüng aag ayaj ajüic ngome teandeac wüx Teat Dios cos nejay Teat Dios tayac meáwan teoleaj Teat Cristo.

<sup>28</sup> Condom wüx Teat Cristo lajlüy wüx meáwan leaw almajlüy, nej aton quiaj apmeyacüy teowix Teat Dios, cos Teat Dios tayac teowix nej meáwan. Quiaj Teat Dios apmajlüy wüx meáwan leaw almajlüy.

<sup>29</sup> Nganüy sanasaj icon alinoic. Sitiül naleaing mondeow ngo mapacüw alinomb, ¿cuajpar altiül icona ayariw yow ingow ayar yow nop leaw landeowa?

<sup>30</sup> Aton sitiül mondeow ngo mapacüw alinomb, ¿cuane saxoman wüx sitiül ajcüyiw

majawüw xicon nipilana?

<sup>31</sup> Nganüy xique, xecojow xechijquiw, sayaag ngünantanej nüt aljane alndom mambiy xic. Aag ayaj naleaing sasaj icon cos xeyay apac ximeaats lameyariün andeac Miteatiüts Jesucristo.

<sup>32</sup> Sitiül wüx xique tambas natsoj anaag napat nimal tiül Efeso, ¿cuane ambeol xic wüx sitiül mondeow ngo mapacüw alinomba? ¡Nicuajind! Más najneaj marangaats atnej apiürang, cos apiüng: “Metiüts manganeowaats, cos ngünantanej nüt alndom mandeowaats”, aw.

<sup>33</sup> Nde mawaiich icon nejinguind, cos ajawaats atnej apiürang: “Nipilan monrang ngo majneaj apmayacüw wüx alinop marang ngo majneaj aton sitiül ajlüyay maquiüb nguajantanej”, maw.

<sup>34</sup> Ich leaam imeajtsan, indüyiün wüx alinomb irangan najneaj, nde merangan ngo majneaj. Cos almajlüy nipilan tiül icona nómban nganaw maxomüw omeajtsüw majawüw nguineay apiüng Teat Dios. Aag ayaj sasaj icon nguineay alndom mexinguian.

*Nguineay apmapacüw alinomb leaw landeowüw*

<sup>35</sup> Aljane apmapiüng: “¿Nguineay alndom mapacüch mondeow alinomb Teat Diosa? ¿Nguineay apmajlüyiw nejw wüx apmapacüw alinomba?” apmaw.

<sup>36</sup> ¡Nechach leaw nepiüng atquiaj! ¿Neol ngo mejaw nguineay arang osaab soex wüx apiürüche? Cos cuajantanej osaab leaw apmapiürüch, sitiül ngo majtex mipang, ngo majntsop.

<sup>37</sup> Aton ngo mapiürüch natang soex, aag miün osaab apiürüch, masey os masey trigo, tengwüy cuajantanej osaab leaw napiürüch.

<sup>38</sup> Pero Teat Dios üch majntsop noicnoic osaab majlüy atnej andiüm nej; wüx ajntsop, Teat Dios üch nej majlüy atnej netam majlüy.

<sup>39</sup> Aton ngome meáwan cuerpo atanej ajlüy, cos palpáwüx ajlüy. Cos ajlüy noic micuerpo nipilan, alinoic ajlüy nimal, alinoic ajlüy quieac, at alinoic ajlüy cüet.

<sup>40</sup> Aton pálwüx leaw najlüyiw cawüx tiül cielo, at pálwüx leaw najlüy ningüy wüx iüt. Leaw najlüy cawüx tiül cielo tarangüch najneajay para majlüy cawüx. Aton leaw najlüy wüx iüt tarangüch najneajay para majlüy wüx iüt.

<sup>41</sup> Ajawaats aaga nüt alinoic arraj, at a caaw alinoic arraj, ocas alinoic arrajüw; nganüy tiülan ajcüw ocas alinoic arrajüw anoicnoiquiw.

<sup>42</sup> Atquiaj wüx meáwan mondeow apmapacüw alinomb, cos wüx amiüraad a nandeow apndrom ombas; pero wüx apmapacüw alinomb langondom ndrom ombas.

<sup>43</sup> Pues aaga nandeow wüx amiüraad ngo metam, cuane ajar. Pero wüx apmapac alinomb, quiaj apmajlüy najneajay. Wüx amiüraad lajlüyan, ngondom marang nicuajind; pero wüx apmapac alinomb, quiaj apndom marang cuajantanej.

<sup>44</sup> At wüx amiüraad, ajlüy atnej meáwan mondeow; pero wüx apmapac alinomb lami alinoic, cos Teat Dios lamangowüch marang jayats. Nganüy ajlüy micuerpojaats atnej ajlüy meáwan nipilan. Pero alinoic nüt apmajlüy pálwüx, cos Teat Dios apmangowüch marang jayats.

<sup>45</sup> Atquiaj apiüng tiül Mipoch Teat Dios, cos apiüng: “Teat Dios ombas marang Adán, tüüch mapac”, aw. Condom tajlüy alinop atnej Adán, aag ayaj Teat Cristo; Miespíritu nej apacüch nipilan alinomb.

<sup>46</sup> Nganüy micuerpojaats cam ajlüyay nipilan nej, pero alinoic nüt apmajlüy jayats. Quiaj ajüiquich ngome aaga jayats cuerpo espiritual ombas tajlüy, cos aaga ajlüyay cuerpo ombas majlüy.

<sup>47</sup> Aaga naxey ombas marangüch ningüy wüx iüt, Teat Dios tarang iüt nej. Condom tajlüy alinop naxey imiün tiül cielo, aag ayaj Teat Cristo.

<sup>48</sup> Atnej tajlüy micuerpo aaga naxey ombas marangüch iüt nej, atnej ajlüy micuerpojaats nganüy. At aton atnej ajlüy micuerpo aaga naxey imiün tiül cielo, atnej apmajlüy micuerpojaats alinoic nüt wüx apmajlüy iüts tiül cielo.

<sup>49</sup> Cos ajlüy iüts atnej tajlüy aaga naxey ombas marangüch iüt nej, at aton apmajlüy iüts atnej aaga naxey tajlüy imiün cielo.

<sup>50</sup> Xecojow xechijquiaw sanasaj icon, aaga micuerpojaats ajüüraats nganüy cam ngondom majmel tiül micambaj Teat Dios tiül cielo; cos leaw apndom ombas ngondom majmel niüng lango ndrom ombas nicuajind.

<sup>51</sup> Nganüy sanasaj icon leaw nomb ngo majaraw. Ngome meáwan icoots apmandeowaats; naleaing Teat Dios apmangowüch micuerpojaats.

<sup>52</sup> Apmarang najénan, atnej noic ameecharan oniiügaran wüx ndóiwüx ajüünts trompet ocueaj Teat Dios. Quiaj apmapacüw alinomb meáwan monyar andeac Teat Cristo leawa tandeowüw, apmajiürüw jayats micuerpojüw nejüw, langondom ndrom ombasüw alinomb. At icootsa leaw aliün mapacaats, Teat Dios apmangowüch micuerpojaats aton.

<sup>53</sup> Aaga micuerpojaats leaw apndrom ombas netam mangowücharan cos langondom ndrom ombas. Nganüy alndom mandeowaats, áag netam mangowücharan micuerpojaats, quiaj langondom mandeowaats.

<sup>54</sup> Cos wüx langowücharan micuerpojaats majlüy jayats, quiaj langondom ndrom ombas; apmajlüy atnej apiüng tiül Mipoch Teat Dios, cos apiüng: “Ninguiaj ndoj andeowaran, langondom mandeowaran alinomb”, aw.

<sup>55</sup> ¿Wül nganüy andeow nipilana? ¿Nguiane ajlüye? ¿Wül nganüy oxiiüta? ¿Nguiane ajlüye?

<sup>56</sup> Cos ajlüy nisoet, quiaj netam mandeowaran; at cos aaga ajlüyay poch ayac Teat Dios, aag ayaj ajüiquich ajüüraats nisoet.

<sup>57</sup> Nganüy netam müjchiiüts gracias Teat Dios, cos lamüch icoots majtsopiüts wüx meáwan cuajantanej. Aag ayaj tarang Miteatiiüts Jesucristo.

<sup>58</sup> Pares xecojow xechijquiaw, irangan tanaamb leaw alndom merangan, nde paxiüm icueajiün wüx iyariün andeac Teat Cristo. Irangan minajiüt Teat Dios meáwan nüt, cos lamejawan wüx irangan minajiüt Teat Dios ngome irangan.

## 16

*Amiüücharan tomiün mambeol minipilan Teat Cristo*

<sup>1</sup> Nganüy sanasaj icon guineay alndom mecanchican aaga tomiün leaw apmeyacan membeolan monyar andeac Teat Cristo tiül Jerusalén. Irangan atnej tasajasüw noicnoic ajlüy minipilan Teat Cristo tiül Galacia.

<sup>2</sup> Wüx noic nüt doming iwüniün quiriw leaw ixoman tiül namong seman; quiaj ngo metam memiüüchiün nicuajind wüx sanapeay quiaj.

<sup>3</sup> Wüx sanapeay niüng ijlüyiün, quiaj sanarang nawiig majoyiw ajcüwa monxey leaw lamepiüangan alndom mambüw mayacüw tiül Jerusalén leaw najmiüc.

<sup>4</sup> Sitiül sapiüng najneaj namb a xique aton, quiaj sanamb naquiiüjpüw.

*Pablo apiüng nguineay apmarang*

<sup>5</sup> Ombas netam namb namong tiül Macedonia, condom sanamb tiül Corinto najaw icon.

<sup>6</sup> Nots quiaj nacül acas nüt niüng ijlüyiün, tengwüy sanacül ninguij tiül meáwan nüt wüx aquind. Condom quiaj alndom membeolan xic meajchiün xic namb niüng sanandüy quiaj.

<sup>7</sup> Naleaing ngo nandüüm namórgan niüng ijlüyiün, cos sitiül Teat Dios mandüüm, sanacül naquiiüb icon xeyay nüt.

<sup>8</sup> Sanacül tiül cambaj Efeso leaw ndoj nanggos nüt Pentecostés.

<sup>9</sup> Cos ningüy lanaxom xeyay najiüt ocueaj Teat Dios leaw alndom narang; áag sanarang wüxan alndom, masey almajlüyiw xeyay leaw ajcüyiw majawüw xic.

<sup>10</sup> Wüx apmapeay niüng ijlüyiün a Timoteo, imbeolan para alndom mapac omeaats

macül maquiiüb icon, cos nej arang mina-  
jiüt Teat Dios atnej xique sarang.

<sup>11</sup> Pares nde mepiüangan nej ngo metam,  
imbeolan mapeay ningüy najneajay ma-  
pac omeaats, cos teanacül mapeay nóiquian  
maquiiüb alacas micojoots michijquiaats.

<sup>12</sup> Nganüy sanasaj icon wüx michijquiaats  
teat Apolos. Xeyay tasajas sitiül alndom  
mamb niüng ijlüyiün maquiüjpüw alacas  
monyar andeac Teat Cristo wüxan ambüw.  
Pero ngo mandüüm mamb nganüy; apmamb  
wüx apmatüch ocueaj.

*Ndójwüx atepeay*

<sup>13</sup> Netam mepacan wüx merangan na-  
jneaj; tanaámb indüjpiün leaw lameyariün  
ocueaj Teat Cristo, nde mermbolan, iyacan  
imeajtsan wüx merangan leaw andiüm nej.

<sup>14</sup> At meáwan leaw irangan, ijüiquichan  
naleaing indümayon nop alinop.

<sup>15</sup> Nganüy xecojow xechijquiaw, icona  
lamejawan meáwan acualaats teat Estéfanas,  
nejiw ombas mayariw andeac Teat Cristo  
tiül iüt Acaya. Nejiw tanaámb ayacüw omea-  
jtsüw wüx mambeolüw monyar andeac Teat  
Cristo.

<sup>16</sup> Xique xowüy satün icueajiün meyariün  
andeacüw nejiw, at netam meyariün an-  
deacüw meáwan monarang atnej arangüw  
nejiw, cos ambeolüw icon wüx aaga najiüt  
quiaj.

<sup>17</sup> Pues wüx tapeayiw ajcüw teat Estéfanas,  
teat Fortunato, at teat Acaico, xeyay tapac  
ximeaats, cos nejiw tajlüyiw ningüy mambe-  
olüw xic ingow ijlüyiün ningüy.

<sup>18</sup> Nejiw xeyay tujchiw mapac ximeaats, at  
sajaw nejiw tujchiw mapac imeajtsan. Ne-  
tam meyajcan mesajan najneaj arangüw.

<sup>19</sup> Meáwan noicnoic ajlüy monyar an-  
deac Teat Cristo monlüy tiül iüt Asia ate-  
peayiw icon. At teat Aquila, aton müm  
Priscila mintaj nej, y meáwan monyar an-  
deac Teat Cristo leaw canchiüjow aniüngüw  
nejiw, xeyay andiümüw matepeayiw icon  
wüx minüt Teat Cristo.

<sup>20</sup> At atepeayiw icon meáwan monyar an-  
deac Teat Cristo leaw alningüy. At icona  
itepeayüün nop alinop najneájan.

<sup>21</sup> Nganüy xiquiay sarang aaga úmbwüx  
poch cam naag xiwix natepeay icon.

<sup>22</sup> Sitiül aljane ngo mandüüm Teat Cristo,  
ich maw ningüiün nómban mamb tiül cas-  
tigo. ¡Teat Cristo aliüc najen!

<sup>23</sup> Miteatiüts Jesucristo mambeol icon  
tamtámban.

<sup>24</sup> Xique xeyay sandiüm icon, cos nóiquian  
teamandüjpiiüts Teat Cristo Jesús. Amén.

**Amb iwic nanderac arang  
wüx nawiiḡ San Pablo müüch  
minipilan Teat Cristo moncül  
tiül Corinto  
2ª CORINTIOS**

*Atepeay*

<sup>1</sup> Xique Pablo sajlüy miapóstol Teat Jesucristo cos Teat Dios tayac xic. At alningüy michijquiaats Timoteo alnaquiüüb. Xique sarang aaga nawiiḡ cam nüüch monyar andeac Teat Cristo monlüy tiül cambaj Corinto. At aton süüch mamb manguiayiw meáwan micual Teat Dios moncül tiül iüt Acaya.

<sup>2</sup> Sandiüm Miteatiüts Dios at Miteatiüts Jesucristo müjchiw icon mimonajneajiw, at mejlüyiün najneájan tiül imeajtsan.

*Teat Pablo tamongoch xeyay*

<sup>3</sup> Najneajay ajlüy Teat Dios, miteat Miteatiüts Jesucristo. Nej andiüm meáwan nipilan, at tanaám teamüüch majneaj omeaatsaran.

<sup>4</sup> Nej üüch majneaj omeajtsaats wüx meáwan naél amongochiüts. Atquiaj alndom icootsa aton müjchiüts majneaj omeajtsüw jangantanej teamamongoch naél. Cos atnej tambeol icoots Teat Dios, atnej alndom müjchiüts majneaj omeajtsüw jangantanej aton.

<sup>5</sup> Masey teamamongochiüts xeyay ngo majneaj atnej tamongoch Teat Cristo, atquiaj nej apmüüch majneaj omeajtsaats xeyay.

<sup>6</sup> Xicona samongochiün xeyay naél cos atquiaj alndom nambeolan icon necamb wüx imongochiün naél. Tamongochasan xeyay naél alndom nasajan icon nguineay Teat Cristo alndom mawün icon wüx isoetiün. Cos Teat Dios teamambeol xicon, pares xicona aton alndom nambeolan icon meücan wüx cuajantanej apmemongochiün atnej xicona saiücan wüx leaw samongochiün.

<sup>7</sup> Xicona sawawan icona apmeiücan wüx meáwan leaw apmemongochiün, cos sawawan sitiül apmemongochiün ngo majneaj atnej samongochiün, quiaj Teat Dios apmambeol icon atnej ambeol xicon.

<sup>8</sup> Xecojow xechijquiaw, nganüy sanasaj icon menguiayiün nguineay tamongochasan tiül iüt Asia. Cos xeyay tamongochasan ngo majneaj quiaj, langondom narangan nicuajind, lanüjchiün ximeajtsan sanandeowan quiaj.

<sup>9</sup> Lanapiüangan landoj, sanandeowan. Nganüy sawaw aag ayaj tamongochasan niüḡ ngondom napiüangan sanawan wüx

xicónan quiaj. Naleaing nejay Teat Dios áag nepactüüch mondeow tawün xicon wüx.

<sup>10</sup> Najneaj tarang Teat Dios cos tawün xicon wüx, tajlüy nandeowan; at nganüy tanaám teamawün xicon wüx. Sawawan naleaing nej apmawün xicon wüx alinomb.

<sup>11</sup> Naleaing netam membeolan xicon metüniün mambeol xicon Teat Dios. Cos atquiaj xeyay nipilan leaw atüniw ocueaj Teat Dios mambeol xicon, apmüjchiw gracias Teat Dios cos nej xeyay tambeol xicon.

*Pablo tequiy mamb andüy Corinto*

<sup>12</sup> Xicona xeyay apac ximeajtsan cos sayajcan tiül ximeajtsan sarangan najneaj tiül nipilan, sarangan áagan leaw andiüm Teat Dios; ngo nawajchan nejingüind, cuantemas te icona ngo nawajchan icon. Teat Dios teamambeol xicon narangan aag ayaj, ngome xicónan quiaj alndom narangan.

<sup>13</sup> Xique sarang wüx nawiiḡ áagan ngo maél leaw alndom meteowan mexoman imeajtsan wüx. Malüy naleaing apmexoman imeajtsan wüx meáwan leaw sarang wüx aaga nawiiḡ cam.

<sup>14</sup> Sapiüḡ icona lamejawan quiriw. Wüx aaga nüt Teat Jesús apmandilil sandiüm mapac imeajtsan wüx xique; at sandiüm mapac ximeats wüx icona cos xique tambeolas icon meyariün andeac Teat Cristo.

<sup>15</sup> Cos tapiüḡas atquiaj ipiüḡan wüx xique; pares tandiümas ombas namong quiaj, nambeol icon amb ijbüw.

<sup>16</sup> Tapiüḡas naw quiaj sanandüy tiül Macedonia, ndoj nawas Macedonia tapiüḡas sanandilil alinomb najaw icon amb ijbüw. Condom tapiüḡas alndom membeolan xic namb sandüy tiül iüt Judea. Nganüy naleaing ngondom namb ombas najaw icon atnej tapiüḡas.

<sup>17</sup> Cuane ipiüḡan, ¿jow wüx tapiüḡas sanamb najaw icon, aag ayaj sapiüḡan, lango narang leaw tapiüḡasa? Ngwüy, naleaing sapiüḡ, cos ngo narang atnej arang jangantanej nipilan. Xique leawa lanapiüḡ sanarang, pues netam narang, ngondom napiüḡan.

<sup>18</sup> Teat Dios ajaw leaw sasaj icon ngo napiüḡan, naleaing sanarang.

<sup>19</sup> Xicona, xique, teat Silvano at teat Timoteo tasajasan icon wüx Teat Cristo, Micual Teat Dios. Nej mbójan marang leaw lamapiüḡ, ngo mapiüḡan.

<sup>20</sup> Teat Cristo tarang meáwan leaw lamapiüḡ Teat Dios, pares apiüḡaats “Amén, aag ayaj naleaing” wüx arangaats casa Teat Dios, cos najneaj lamarang Teat Cristo.

<sup>21</sup> Nejay Teat Dios neech icoots lembe-moots nandand mandüjpiüts Teat Cristo, cos nej nerriiüd icoots.

<sup>22</sup> Aton nej tayac tiül omeajtsaats aaga Nangaj Espiritu ocueaj Teat Dios, majlüy tiül omeajtsaats, majüiquich ajlüyüüts micual nej icoots.

<sup>23</sup> Nganüy sanasaj icon neol ngo namb tiül cambaj Corinto najaw icon wüx aaga nüt tapiungas. Teat Dios ajaw ngo nawai-ich. Naleaing ngo namb najaw icon cos ngo nandüüm nalic icon xeyay.

<sup>24</sup> Xicona lango metam nasajan icon más wüx Teat Cristo cos lamejawan wüx aag ayaj. Más naleaing, sandiüman nambeolan icon nüjchiün mapac imeajtsan.

## 2

<sup>1</sup> Xique taton ngo nandilil najaw icon, cos ngo nandüüm nüüch icon mamix imeajtsan alinomb.

<sup>2</sup> Sitiül xique nüüch mamix imeajtsan, ¿pues jane apmeech mapac ximeaaatsa? Ne-jiungind, cos icónan quiaj alndom müüch mapac ximeaaats. ¿Pero nguineay alndom, ndot nüüch icon mamix imeajtsana?

<sup>3</sup> Tarangas alinoic nawiig cos ngo nandüüm mamix ximeaaats wüx sanatüch nüüng ijlüyüün. Cos áagan icona alndom meajchiün mapac ximeaaats; sawaw ngon- dom mapac imeajtsan sitiül xique amix ximeaaats.

<sup>4</sup> Xique xeyay ngo majneaj ximeaaats, tajiüntsas wüx tarangas aaga alinoic nawiig nüüch icon. Ngo narang aag ayaj nüüch mamix imeajtsan, naleaing tarangas para mejawan nguineay sajiür icon lasta.

*Pablo awün wüx omeaaats leaw tarang alinop*

<sup>5</sup> Naleaing sitiül aljane tiül icona tüüch mamix ximeaaats, ngome xiquian quiaj, cos meáwan icona aton tüüch mamix imeajtsan. Malüy naleaing meawarónan tamix imeajtsan.

<sup>6</sup> Sapiüing ngocháyan aaga naél leaw icona teajchiün mamongoch aaga naxey quiaj, cos lamamongoch xeyay.

<sup>7</sup> Nganüy netam mewüniün wüx imeajtsan leaw tarang, netam membeolan, nganandot mamix omeaaats nómban.

<sup>8</sup> Nganüy sasaj icon mejüiquichan alinomb ijiüran lasta.

<sup>9</sup> Tarangas aaga nawiig nasaj icon wüx aag ayaj cos tandiümas nambich najaw sitiül icona naleaing apmerangan meáwan leaw sasaj icon.

<sup>10</sup> Sapiüing najneaj mewüniün wüx imeajtsan leaw tarang aaga naxey quiaj, cos xique aton lanawün wüx ximeaaats. Sitiül aleaic aliün majlüy netam nawün wüx ximeaaats, Teat Cristo ajaw sanarang para alndom nambeol icon.

<sup>11</sup> Sitiül atquiaj apmarangaats, quiaj Sa- tanás ngondom mayac icoots wüx naél, cos lamajawaats nguineay mbójan arang.

*Pablo ngo majneaj omeaaats tiül cambaj Troas*

<sup>12</sup> Wüx tapeayiüs tiül cambaj Troas, Teat Dios tambeol xic xeyay nasaj nipilan wüx Teat Cristo.

<sup>13</sup> Pero naleaing xique ngo majneaj ximeaaats, cos ngo naxom quiaj teat Tito. Por aag ayaj tasajasüw sanaw quiaj; tambas tandüyüs tiül iüt Macedonia.

*Teamambeol xicon Teat Cristo*

<sup>14</sup> Nganüy süüch gracias Teat Dios, nej teamambeol xicon nasajan meáwan nipilan nguineay Teat Cristo tandeow mawün wüx asoetaran. Aaga süjndiün nandecan quiaj, najen ajüy miünquiaj atnej ajüy noic najm- boc angan.

<sup>15</sup> Xicona sajlüyüün atnej najmboc angan pom leaw Teat Cristo teamayac müüch Teat Dios. Aaga najmboc angan quiaj, ajüic tiül jane laáw wüx asoetiwi nejwi, at ajüic masey tiül nipilan apndrom ombasüw tiül aaga xeyay ngo majneaj.

<sup>16</sup> Jane ngo mayariw andeac Teat Cristo, wüx apmaximeaw aaga najmboc angan quiaj, ayajcüw ngo majneaj cos apmambüw tiül aaga xeyay ngo majneaj. Pero mon- yar andeac Teat Cristo, wüx aximeaw aaga najmboc angan quiaj, ayajcüw najneaj cos ajawüw Teat Dios apyacüüch nejwi ma- pacüw meáwan nüt. ¿Jane alndom marang aaga najiüt cama? Xicona alndom, cos Teat Dios teamambeol xicon.

<sup>17</sup> Pero ngo narangan atnej arangüw ajcüwa mondeac Mipoch Teat Dios mex- omxomayej wüx. Xicona sandeacan naleaing, ngo nawaijchan, cos Teat Dios tayac xicon wüx narangan aag ayaj, nej teamajaw naleaing aaga sandeacan quiaj, cos minipilan Teat Cristo xicon.

## 3

*Monrang minajiüt Teat Cristo*

<sup>1</sup> Jow nganüy, ¿cuane ipiüngana? ¿Netam natüniün noic nawiig mapüing jane xicon, mejawan nguineay sarangana? ¿Ngwüye, netam najoyiün nawiig atnej ajoyiw altiül, para alndom natüchiün nüüng ijlüyüüna? ¿Ngwüy netam natüniün icueajiün noic nawiig atnej arangüw altiüla?

<sup>2</sup> Ngwüy, ngo metam xicon alngün nawiig; cos áagan leaw netam xicon, aag ayaj icona. Cos wüx nipilan ajawüw nguineay Teat Dios tangowüüch imeajtsan wüx taquiaachasan icon wüx Mipoch Teat Dios, quiaj alndom majawüw nguineay tarangasan najneaj tiül icona.

<sup>3</sup> Nipilan alndom majawüw icon at icon nawiig imiün tiül owix Teat Cristo, tajiümasan. Aag ayaj ngome noic nanderac tarangüch naag tinta, at ngome wüx piedra; pero Nangaj Espiritu ocueaj Teat Dios alma-pac tarang wüx imeajtsan aag ayaj.

<sup>4</sup> Sajawan aag ayaj naleaing, Teat Dios tambeol xicon ajcan teyariün andeac Teat Cristo.

<sup>5</sup> Meáwan leaw sarangan ngome xicónan quiaj sarangan, Teat Dios nembeol xicon narangan meáwan.

<sup>6</sup> Nej lamüüch xicon naxoman ximeajtsan nasajan nipilan nguineay Teat Cristo awün wüx asoeteran. Jane ngo marang palan meáwan leaw apiüing tiül aaga poch tüünd Moisés, nej apmamb tiül castigo. Pero nganüy sasajan icon, aaga Nangaj Espiritu ocueaj Teat Dios üüch mapacaran meáwan nüt.

<sup>7</sup> Cos aaga poch narangüch wüx piedra tapiüing apmamb tiül castigo meáwan leaw ngo mandüüb leaw apiüing. Wüx Moisés tüünd aaga poch quiaj, nipilan Israel ngon-dom majawüw teombas nej cos xowüy lal-itlit, condom aag ayaj tamong.

<sup>8</sup> Sitiül xowüy lajneaj aaga poch quiaj, cuantemas nganüy aaga nanderac leaw Nangaj Espiritu üüch, aag ayaj más najneaj ajlüy.

<sup>9</sup> Pues sitiül xowüy lajneaj aaga poch tüünd Moisés, masey tarangüch majüiquich jane nejiw apmambüw tiül castigo, pues más xeyay najneaj arang nganüy Nangaj Espiritu, cos nej apiüing nguineay alndom mawün asoetiüts Teat Dios, lango mam-baats tiül aaga xeyay ngo majneaj quiaj.

<sup>10</sup> Cos aaga poch leaw nomb tajlüy najneajay, aag ayaj tayac Moisés, nganüy lajüic atnej ngo majneaj cos ngo matüch matnej leaw lajlüy nganüy.

<sup>11</sup> Sitiül aaga ajlüyay arangüch leaw tayac Moisés xeyay najneaj tajlüy, masey nganüy lamong, pues más xowüy lajneaj leaw tüüch icoots Teat Cristo cos aag ayaj apmajlüy meáwan nüt.

<sup>12</sup> Xicona sajawan aag ayaj naleaing, pares ngo nimbolan nasajan nipilan.

<sup>13</sup> Xicona ngo nexotayon wüx sandeacan Mipoch Teat Dios, ngo mat xicon Moisés, cos taxot teombas nej naag noic püy nganandot majawüw nej nipilan israel nguineay teámb ndroj alitlit teombas nej.

<sup>14</sup> Ngo maxomüw omeajtsüw cos tanaámb nganüy cam nadam omeajtsüw. Pares nganüy wüx ateowüw aaga ajlüyay Mipoch Teat Dios, ngo majawüw cuane, cos atnej aliün teombasüw püy. Néjan Teat Cristo alndom mawün aag ayaj.

<sup>15</sup> Pares nganüy nipilan israel wüx apmateowüw aaga ajlüyay poch tüünd Moisés,

ngo majawüw cuane wüx apiüing, cos atnej aleaic nexot nej oniüjcüw.

<sup>16</sup> Nganüy wüx aljane nejiw apmayar andeac Teat Cristo, quiaj apmaw aaga nexot nej oniüjcüw quiaj.

<sup>17</sup> Aaga Nangaj Espiritu ocueaj Teat Dios ajlüy nóiquan maquiüüb Teat Cristo. Pares jangantanej leaw ajüür Nangaj Espiritu lango metam mayac omeaats wüx marang leaw apiüing tiül aaga ajlüyay poch tüünd Moisés.

<sup>18</sup> Icootsa leaw lamayariüts andeac Teat Cristo lango majiüraats alcuane mexot teombasaats; cos Nangaj Espiritu üüch icoots majawaats nguineay Teat Cristo xowüy lajneajay ajlüy. Quiaj nütnútan teajlüyüts najneaj atnej ajlüy nej.

## 4

<sup>1</sup> Teat Dios tayac xicon najlüyiün wüx aaga najiüt teanarangan cam. Nej ajüür xicon lasta, áag ngo paxiüm xicueajiün.

<sup>2</sup> Xicona ngo narangan nexotayon wüx nicuajind; ngo narangan nicuajind müüch monxing. At ngo nawajchan, ngo nam-biülüljchiün andeac Teat Dios. Sandeacan áagan naleaing manguiay meáwan nipilan. Wüx aag ayaj nipilan ajawüw, at Teat Dios teamajaw xicon sandeacan naleaing, ngo nawajchan.

<sup>3</sup> Nganüy sitiül aljane ngo majaw nguineay ajlüy aaga Najneaj Nanderac wüx Teat Cristo, aag ayaj ngome cos ngondom majaw, pero cos ngo mandüüm mayar andeac Teat Cristo; por aag ayaj apmamb tiül castigo.

<sup>4</sup> Ajcüwa nipilan quiaj ngo mandüümw mayariw andeac Teat Cristo, cos minatangüw nimeech leaw ajlüy wüx a iüt cam apal nejiw nganandot mayariw. Teat Cristo najneajay ajlüy; nej ajlüy atanej Teat Dios.

<sup>5</sup> Xicona sandeacan áagan wüx Teat Cristo; ngo nandecan leawa sarangan xicona para narangüchiün casa. Sandeacan wüx áagan leawa lamarang Miteatiüts Jesucristo. Xicona sajlüyiün atnej mimos nej para alndom nambeolan icon, cos sandiüman Teat Jesús.

<sup>6</sup> Teat Dios ombas mapiüing majlüy ran masey áagan pojniün tajlüy. Pues nejay nganüy lamüüch icoots maxomaats omeajtsaats majawaats nguineay ajneaj ajlüy Teat Dios wüx ajawaats Teat Cristo xeyay najneaj ajlüy.

*Mayacaats omeajtsaats wüx mandüjpiüts Teat Cristo*

<sup>7</sup> Masey xicona atnej nop xor narangüch iüt cos ngo nembeatiün, pero Teat Dios lamüüch xicon nandecan leaw nembeat xeyay. Leaw sarangan, aag ayaj ocueaj Teat Dios, ngome sarangan xicona.

<sup>8</sup> Masey apalpal xicon nipilan cos ajcüyiw majawüw xicon, pero Teat Dios awün xicon wüx meáwan aaga naél quiaj. Nguiaj ngo najawan cuane sanarangan, pero ngo mamix ximeajtsan dedaám.

<sup>9</sup> Masey ayamb ximbasan nipilan, naleaing Teat Dios ngo macueat xicon. Masey awüjchiw xicon tiüt, ngo nandeowan.

<sup>10</sup> Xicona nguiajnguiaj laliüc nandeowan atnej almongoch Teat Cristo; cos Teat Dios neech xicon namongochiün aag ayaj majüic Teat Cristo almapac, tenguijal mambeol xicon.

<sup>11</sup> Wüxan saliünan napacan samongochiün xeyay, sayajcan laliüc nandeowan, cos wüx Teat Jesús sasajan nipilan. Samongochiün aag ayaj para majüic nguineay Teat Jesús almapac, teamambeol xicon masey aliün najiüran aaga cuerpo leaw apndrom ombas.

<sup>12</sup> Xicona samongochiün xeyay ngo majnej, laliüc nandeowan; cos atquiaj alndom nambeolan icon nasajan icon nguineay alndom mepacan meáwan nüt.

<sup>13</sup> Xicona lanayariün andeac Teat Dios atnej apiüng tiül Mipoch Nej niüng apiüng: “Xique tayariüs andeac Teat Dios, nganüy alndom nandeac wüx”, maw. At xicona aton sayariün andeac Teat Dios, pares nandecan.

<sup>14</sup> Cos sajawan Teat Dios nepacüch alinomb Teat Jesús, nejay apmepacüch xicon aton, cos sanajlüyiün nöiquian naqüijpan Teat Jesús. Quiaj apmaqüiüb icoots nöiquian andüy niüng ajlüy nej.

<sup>15</sup> Pues meáwan leaw samongochiün, aag ayaj ajlüy para alndom mejlüyiün más najnej, cos wüx Teat Dios ambeol xeyay nipilan, quiaj apmayajcüw masajüw najnejay lamarang, marangüw nej casa.

<sup>16</sup> ¡Pares ngo paxiüm xicueajün! Masey tenguijal satangan, laümb sapacan; pero tiül ximeajtsan sayajcan nütütan xeyay sandiüman narangan minajüit Teat Dios.

<sup>17</sup> Cos leawa ngo majnej amongochiüts ningüy wüx aaga iüt cam, aag ayaj amóngan, ngome apmaüc. Naleaing wüx aag ayaj apmarangüchiüts casa xeyay ninguiün tiül cielo, ngo majiür ümb.

<sup>18</sup> Pues atquiaj apmajlüyiüts, cos ngo mayacaats omeajtsaats wüx leaw axomaats majawaats ningüy wüx iüt cam; pero naleaing ayacaats omeajtsaats wüx leaw altiül cielo, leaw ngondom maxomaats majawaats nganüy. Cos meáwan leaw almajlüy naxoram majaraw nganüy, aag ayaj apndrom ombas; pero leaw ngo maxoram majaraw, aag ayaj apmajlüy meáwan nüt.

## 5

*Aniüngaats ninguiün tiül cielo*

<sup>1</sup> Ajawaats micuerpojaats ajlüy atnej nop iüm ningüy wüx iüt, ngome apmaüc xeyay. Pero wüx apmandeowaats, quiaj micuerpojaats apmajlüy jayats atnej nop jayats iüm. Aag ayaj Teat Dios apmarang, ngome nipilan apmerang, lango ndrom ombas nómban cos tiül cielo almajlüy.

<sup>2</sup> Nganüy aiümaats, cos teamamongochiüts xeyay naél wüx aaga cuerpo cam. Pares xeyay andiümaats majiüraats aaga jayats cuerpo leaw apmüjndiüts ninguiün tiül cielo.

<sup>3</sup> Atquiaj ngome apmajlüyiüts ninguiün tiül cielo atnej miotajcáatsan, apmajiüraats jayats micuerpojaats.

<sup>4</sup> Pero nganüy wüx ajlüyiüts ningüy tiül micuerpojaats cam aiümaats cos amongochiüts xeyay ngo majnej. Pares xeyay andiümaats majlüyiüts tiül jayats micuerpojaats leaw ngome apmandeow; más naleaing andiümaats mangowüjchiüts micuerpojaats leaw apmandeow, para majiüraats jayats micuerpojaats leaw ngome apmandeow.

<sup>5</sup> Ajawaats apmajiüraats jayats micuerpojaats tiül cielo. Aag ayaj ajawaats, cos nej lamüch icoots majiüraats Nangaj Espíritu tiül omeajtsaats.

<sup>6</sup> Ajawaats wüx ajlüyiüts tiül micuerpojaats cam ningüy wüx iüt, miünquiaj ajlüyiüts niüng ajlüy Teat Dios, cos nganaw majlüyiüts tiül cielo niüng ajlüy nej.

<sup>7</sup> Aag ayaj ajawaats naleaing cos ayariüts andeac Teat Cristo, masey ngome axomaats majawaats.

<sup>8</sup> Apac omeajtsaats cos ajawaats más najnej sitiül apmacueatiüts aaga cuerpo cam para mambaats tiül cielo niüng ajlüy Teat Dios.

<sup>9</sup> Pares netam marangaats atnej andiüm Teat Dios, masey aliünaats ningüy, tengwüy lapeayiüts tiül cielo.

<sup>10</sup> Cos meáwan icoots netam matüchiüts teombas Teat Cristo manguiayiüts nguineay tarangaats, sitiül tarangaats najnej tengwüy tarangaats ngo majnej wüx aliün mapacaats. Quiaj apmüjndiüts leaw nej andiüm müch icoots.

### *Teat Dios lajnej majaw icoots*

<sup>11</sup> Cos lanajawan nguineay Teat Dios apmajaw wüx asoeteran, pares xicona sasajan nipilan mayariw andeac Teat Cristo. Teat Dios ajaw nguineay sarangan. Malüy icona aton mejawan nguineay sarangan.

<sup>12</sup> Xicona ngo metam narangan nawiiig menguiayiün jane xicon cuane sarangan, cos lamejawan nguineay sarangan. Nganüy sasajan icon ich leam imeajtsan nguineay

sarangan, para mejiüran cuane apmesajan ajcüwa nipilan monrangrangüy teombas nipilan, ngo metam nejiw leaw altiül omeaatsaran.

<sup>13</sup> Sitiül ajüic xicona nechachasan, aag ayaj cos sandiüman narangan xeyay najiüt ocueaj Teat Dios. Tengwüy sitiül ajüic saxoman ximeajtsan wüx cuajantanej, aag ayaj cos sandiüman nambeolan icon.

<sup>14</sup> Xicona sandiüman narangan áagan andiüm Teat Cristo, cos nej xeyay ajüür icoots lasta. Sajawan nej tandeow ingow andeow meáwan nipilan; pares ajüic atnej meáwan icoots tandeowaats nóiquian maquiüjpaats.

<sup>15</sup> Naleaing nej tandeow ingow andeowaats, pares jane apmayar nej andeac apmapac meáwan nüt níüng ajlüy Teat Dios; pero naleaing langondom marangüw leaw andiümüw. Netam marangüw leaw andiüm Teat Cristo, áag tandeow ingow andeowaats, y tapac alinomb.

<sup>16</sup> Xicona nganüy ngondom nateotsan wüx ombas alinop atnej arangüw altiül, masey nomb atquiaj tateotsasan wüx ombas Teat Cristo, nganüy ngo narangan atquiaj.

<sup>17</sup> Pares sitiül aljane ajlüy nóiquian maquiüb Teat Cristo, pues nej lajlüy atnej jayats wijquiam; lango mapiüng tiül omeaats atnej tapiüng nomb, cos nej jayats ajlüy, lami alinoic.

<sup>18</sup> Meáwan aag ayaj Teat Dios nerang, cos nganüy lajneaj omeaats, lango majcüy majaw icoots, cos Teat Cristo tiün mandeow mangüy asoetiüts. At tasaj xicon namban nasajan nipilan mandilileaw mayambüw nej, cos nej lango majcüy majaw nejiw.

<sup>19</sup> Teat Dios tajneaj majaw nipilan cos Teat Cristo tiün mangüy asoet nipilan, pares nej nganüy lango leaam omeaats wüx asoetiüts. Nej tasaj xicon namban nasajan meáwan nipilan nganüy lajneaj majaw nejiw wüx apmayambüw nej.

<sup>20</sup> Naleaing tasaj xicon Teat Cristo namban nasajan nipilan, napiüngan leaw apiüng nej. Xeyay sasajan icon wüx minüt Teat Cristo, netam mendililean meyamban Teat Dios.

<sup>21</sup> Teat Cristo masey ngo majiür nicuajind nisoet, condom tajlüy atnej tajiür nisoet, cos Teat Dios tacanchich wüx ombas nej meáwan asoetiüts. Atquiaj tarang para majlüyüts najneaj atnej andiüm Teat Dios. Aag ayaj tajlüy cos Teat Cristo tandeow mangüy asoetiüts.

## 6

<sup>1</sup> Xicona sarangan najiüt ocueaj Teat Dios nüjchiün icon menguiayüin, pares sasajan icon nde mecueatiün, nde ndrom imeajtsan leaw najneajay lamüüch icon Teat Dios.

<sup>2</sup> Cos tiül Mipoch Teat Dios apiüng:

Wüx tatüch a nüt tanguiayüis indeacan; wüx tatüch a nüt meriowan wüx isoetiün, quiaj tambeolas icon, aw.

Nganüy lamatüch aaga nüt wüx Teat Dios andiüm mambeol icon; lamatüch a nüt mawaran wüx asoeteran.

<sup>3</sup> Xicona ngo narangan nicuajind ngo majneaj, para maxomüw nguineay mandeactüw ngo majneaj wüx aaga najiüt sarangan ocueaj Teat Dios.

<sup>4</sup> Meáwan leaw sarangan, sarangan najneaj, majüic xicona nerangasan minajiüt Teat Dios. Ajüic aag ayaj naleaing, cos saiücan wüx samongochiün ngo majneaj, wüx ngo najiüran nicuajind, at wüx sajlüyüin wüx naél.

<sup>5</sup> Nguiaj sawüchiün, nguiaj sajmelüin tiül manchiüc, nguiaj sajlüyüin tiül nadam moncüy, nguiaj xeyay ümb sapanam cos xeyay najiüt sarangan, nguiaj ngo nameayüin, nguiaj saiündan lop wüx ngo majlüy.

<sup>6</sup> Ajüic sarangan minajiüt Teat Dios cos sarangan palüyan najneaj. Saxoman ximeajtsan wüx cuajantanej, saiücan wüx leaw arang jangantanej nipilan, sambeolan jangantanej, sarangan leaw andiüm Nangaj Espíritu, y xeyay sandiüman nop alinop.

<sup>7</sup> At wüx sasajan nipilan wüx Teat Cristo sandeacan naleaing, ngo nawaijchan. Meáwan leaw alndom narangan, aag ayaj cos Teat Dios ambeol xicon, üüch xicon najiüran xengochayon jane apmajngot amb wüx xecan at wüx xequiambiün.

<sup>8</sup> Nguiaj sarangüchiün casa; nguiaj anderac wüx ximbasan ngo majneaj, nguiaj anderac najneaj; nguiaj anderac xicona newaiichasan, pero xicona sandeacan leaw naleaing.

<sup>9</sup> Nguiaj sajlüyüin atnej ngo nembeatiün; nguiaj sajlüyüin atnej nembeatasan. Nguiaj laliüc nandeowan, pero tapacasan. Nguiaj xeyay sayacüchiün wüx naél, pero ngo nandeowan.

<sup>10</sup> Nguiaj amix ximeajtsan, nguiaj xeyay apac ximeajtsan. Masey ngo najiüran nicuajind, naleaing süjchiün xeyay nipilan majiürüw leaw Teat Dios üüch nejiw. Masey ajüic ngo najiüran nicuajind ningüy, naleaing alnajiüran meáwan leaw almajlüy.

<sup>11</sup> Xecojow xechijiquaw monlüy tiül cambaj Corinto, xicona lanasajan icon meáwan leaw alwüx ximeajtsan cos sajiüran icon lasta.

<sup>12</sup> Pues xicona najneaj ximeajtsan najawan icon, pero icona ngo mendüman najawan xicon.

<sup>13</sup> Sanasaj icon atnej nateataran asaj micual nej; Ijiüran xic lasta atnej sajiür icon lasta.



*Teat Dios acül tiül omeajtsaats*

<sup>14</sup> Nde mejlüyiün wüx yugo mequiüjpan jangantanej leaw ngo mayar andeac Teat Cristo, cos ngo marangüw atnej irangan. ¿Nguineay alndom nop nerang najneaj majlüy maquiiüb nop nerang ngo majneaja? ¿Nguineay alndom a ran maquiiüb pojniün nóiquian?

<sup>15</sup> At, ¿nguineay alndom majlüy Teat Cristo nóiquian maquiiüb nimeeche? ¿Nguineay alndom nop neyar andeac Teat Cristo majlüy nóiquian maquiiüb nop leaw ngo mayar andeac Teat Cristo?

<sup>16</sup> ¿Nguineay alndom macül Teat Dios nóiquian maquiiüb niüng ajlüyiw narangüch dios? Cos aaga Teat Dios almapac ajlüy tiül omeajtsaats. Aag ayaj apiüng Teat Dios tiül Mipoch nej:

Sanacül tiül omeajtsüw, sanaquiüjpüw;  
xique Midiosüw nejiw,  
nejiw apmajlüyiw xecambaj.

<sup>17</sup> Pares Teat Dios tapiüng aton:

Iriowan niüng ajlüy nipilan ngo marang xic casa, icueatiün;

nómban nde merangan ngo majneaj.

Quiaj xique sanaquiüüb icon;

<sup>18</sup> sanajlüy Miteatiün,

icona apmejlüyiün xecual, aw Teat Dios nerang meáwan cuajantanej.

**7**

<sup>1</sup> Xecojow xechijquiaw, lamanguiyiüts nguineay Teat Dios lamapiüng apmarang; pares netam macueatiüts arangaats meáwan ngo majneaj, masey leaw icóotsan quiaj andiümaats marangaats, tengwüy leaw omalaats andiüm mayac icoots wüx. Netam marangaats najneaj atnej andiüm Teat Dios, mäjchiüts omeajtsaats.

*Pablo apac omeaats cos arangüw najneaj alinomb*

<sup>2</sup> Xeyay sandiüm mejiüran xicon lasta, cos xicona nejingüind ngo narangan ngo majneaj wüx ombas; nejingüind ngo näjchiün macueat andüüb Teat Cristo; nejingüind ngo nawajjchan nawüniün ocueaj alcuane.

<sup>3</sup> Ngo nasaj icon aag ayaj para nayac isoetiün, cos lanasaj icon xique xeyay sajiür icon lasta. Nique mandeowaats, nique mapacaats, pero ajlüyiüts nóiquian.

<sup>4</sup> Xique sawaj apmerangan najneaj atnej lanasaj icon. Aton xeyay apac ximeaats wüx icona, xeyay ajneaj ximeaats, masey samongochiün xeyay ngo majneaj.

<sup>5</sup> Naleaing, nde wüx tapeayasan ningüy tiül iüt Macedonia ngondom naxojtan. Xeyay samongochiün ngo majneaj, ajlüy xeyay moncüy. Tiül ximeajtsan ximbolan xeyay cos ngo najawan nguineay apmajlüy.

<sup>6</sup> Naleaing Teat Dios, áag neech majneaj omeaats jane namix omeaats, tüüch majneaj ximeajtsan, cos tapeay niüng sajlüyiün michijquiaats Tito.

<sup>7</sup> Pues ngome áagan wüx apeay a Tito najneaj ximeajtsan, nganüy cos tapiüng nguineay teajchiün majneaj omeaats nej aton wüx tapeay niüng ijlüyiün. Tasaj xicon nguineay tendiüman mejawan xic alinomb, nguineay amix imeajtsan wüx leawa terangan. Wüx tapiüng nguineay ijiüran xic lasta, quiaj más xeyay tapac ximeaats.

<sup>8</sup> Masey täjchiüs icon mamix imeajtsan wüx aaga nawiiig tarangas, nganüy lajneaj ximeaats wüx icona. Masey tamix ximeaats quiriw wüx tarangas aaga nawiiig, cos tawawas wüx aag ayaj apmamix imeajtsan acas nüt.

<sup>9</sup> Nganüy apac ximeaats ngome por aaga amix imeajtsan, pero cos tamix imeajtsan wüx leaad imeajtsan cuane terangan. Quiaj terangan leaw andiüm Teat Dios. Pares aaga nawiiig tarangas tambeol icon.

<sup>10</sup> Wüx amix omeajtsaats atnej andiüm Teat Dios, aag ayaj üüch mandiümaats macueatiüts arangaats ngo majneaj; atquiaj alndom mawün icoots wüx asoetiüts Teat Dios. Pero masey amix omeaats jangantanej leawa ngo mandüüb Teat Cristo aag ayaj andüy wüx ayac nejiw tiül castigo.

<sup>11</sup> Nganüy ajüic terangan leaw andiüm Teat Dios, cos tamix imeajtsan wüx aaga naél tejüüran. At alndom mejawan leaw ixoman wüx nganüy, cos nejay Teat Dios tüüch icon membeolan xic, tüüch icon mejcüyiün, at mermbolan; condom tendiüman mejawan xic alinomb. Quiaj aton tendiüman meajchiün mamongoch ngo majneaj aaga naxey nerang a nisoet quiaj. Wüx aag ayaj ajüic ngo mequiüjpan wüx leaw tarang.

<sup>12</sup> Wüx tarangas aaga alinoic nawiiig nüüch icon, ngome tarangas wüxan nej aaga naxey nequiüüb ingow mimüm nej, aton ngome wüx nej aaga naxey najnot mintaj nej. Naleaing tarangas aaga nawiiig näjchiün leaam imeajtsan wüx leaw andiüm Teat Dios; at sandiüman najjüquichan nguineay sajiüran icon lasta.

<sup>13</sup> Xeyay tajneaj ximeajtsan nanguiyiün nguineay irangan. At tapac ximeajtsan wüx tanguiayasan nguineay teat Tito xeyay tapac omeaats cos icona teajchiün majneaj omeaats.

<sup>14</sup> Xique tasajas teat Tito nguineay irangan najneaj, pares nganüy ngo naxing nicuajind, cos terangan atnej tapiüngas. Meáwan leaw tasajas icon wüx tajlüyiüs niüng ijlüyiün, aag ayaj naleaing ngo nawaiich. At leaw tasajas teat Tito wüx icona, aag ayaj naleaing.

<sup>15</sup> Pues teat Tito xeyay ajiür icon lasta wüx leaad omeaats nguineay terangan, cos tengochiün najneaj wüx tapeay quiaj, terangan casa. Tajüic tendiüman merangan meáwan leaw tapiüng merangan.

<sup>16</sup> Nganüy xeyay apac ximeaats cos najneaj terangan, ngo nachiw ximeaats wüx icona.

## 8

### *Apac omeajtsüw tayacüw tomiün*

<sup>1</sup> Xecojow xechijquiaw, nganüy sanasaj icon nguineay ambeol nejiw Teat Dios ajcüw noicnoic ajlüy monyar andeac Teat Cristo moncanchiün tiül iüt Macedonia.

<sup>2</sup> Cos masey teamamogochiw xeyay naél, at ngo majiürüw nicuajind, pero xeyay apac omeajtsüw, tayacüw leaw alndom mayacüw.

<sup>3</sup> Xique tajawas naleaing tayacüw leaw alndom mayacüw, ngome aleaw wüx tayacüw, tayacüw más xeyay.

<sup>4</sup> Tasajüw xicon sitiül alndom nüjchiün mambeolüw leaw ngo majiür tiül ajcüw minipilan Teat Cristo.

<sup>5</sup> Pues ngome áagan ayaj tarangüw, naleaing tarangüw alwüx leaw ngo na-teotsan apmarangüw. Cos ombas müjchiw omeajtsüw Teat Dios, condom tapiüngüw nejiw apmarangüw leawa sandiüman, cos aag ayaj andiüm Teat Dios.

<sup>6</sup> Pares tasajas teat Tito najneaj mamb majaw icon para alndom mendondochiün meyacan leaw apmeajchiün, cos ninguinüt nej najlüy wüx maxaing aaga tomiün tiül icona.

<sup>7</sup> Sajawan icona tengual ijntsopiün wüx meáwan cuajantanej: Ijntsopiün wüx iyariün andeac Teat Cristo; at ijntsopiün wüx mesajan nipilan wüx Teat Cristo; aton ijntsopiün wüx leaw nipilan alndom majawüw wüx cuajantanej; ijntsopiün wüx indiüman merangan leaw andiüm Teat Dios; aton ijntsopiün wüx mejiüran xicon lasta. Pares nganüy sandiüman aton mejntsopiün wüx meyacan leaw apmeyacan.

<sup>8</sup> Xique ngo napiüng netam merangan aag ayaj, pero sasaj icon para menguiayiün nguineay arangüw altiül. Aag ayaj sasaj icon nguineay alndom mejiüquichan naleaing ijiüran lasta nipilan.

<sup>9</sup> Icona lamejawan nguineay lamambeol icoots Miteatiüts Jesucristo. Masey nej neneay meáwan leaw almajlüy tiül cielo, tacueat meáwan aag ayaj para mambeol icoots. Nganüy cos nej tarang aag ayaj, pares icootsa apmajlüyüts tiül cielo alinoic nüt.

<sup>10</sup> Nganüy sandiüm nasaj icon wüx aaga leaw iyacan membeolan nipilan leaw ngo majiür. Sapiüng najneaj mernguialeatayon meyacan aag ayaj, cos nde namong neat

tapots meyacan tomiün cos icona xeyay tendiüman merangan.

<sup>11</sup> Najneaj sitiül apmendondochiün aag ayaj, pero naleaing irangan nde ajneaj imeajtsan atnej terangan ninguinüt. Nganüy irangan atnej, indondochiün najen meyacan leaw alndom meyacan.

<sup>12</sup> Sitiül aljane andiüm mayac, ich mayac leaw almajiür, masey quiripite, cos Teat Dios ajneaj majaw; nej ngo matün ocueaj aljane mayac xeyay sitiül ngo majiür.

<sup>13</sup> Ngome samb wüx aag ayaj para majiürüw xeyay ajcüw leaw apmembeolan, nganüy icona mecüliün ngo mejiüran leaw netam icon.

<sup>14</sup> Naleaing sandiüm mejlüyiün atotow. Pero cos icona almejiüran, pares alndom meajchiün leaw netam wüx nüt nejiw ngo majiürüw. Masey alinoic nüt nejiw sitiül apmajiürüw, quiaj alndom müjchiw mambeolüw icon wüx nüt ngo mejiüran. Atquiaj apmejiüyüün atotow.

<sup>15</sup> Ich leeam imeajtsan nguineay apiüng tiül Mipoch Teat Dios, cos apiüng: "Leaw nexaing xeyay ngome apmenaw ocueaj, at leaw nexaing napateay apmatüch ocueaj majiür meáwan leaw netam", aw.

### *Teat Tito y ajcüw monbeol nej*

<sup>16</sup> Süüch gracias Teat Dios cos nej tayac wüx omeaats teat Tito mandiüm mamb mambeol icon atnej tarangas.

<sup>17</sup> Cos nej andiüm marang leaw tasajas; at nejáyan quiaj xeyay andiüm; pares nganüy apmamb majaw icon.

<sup>18</sup> Sanüjchiün mamb maquiüüb teat Tito nop teat naxey naw tiül icootsa leaw ajaraw najneaj arang nguiajantanej niüng ajlüy noicnoic ajlüy minipilan Teat Cristo. Nej amb nguiajantanej mandeac wüx nguineay lamawün asoetiüts Teat Cristo.

<sup>19</sup> Ngome áagan ayaj, cos lamarriüjtüw nej monyar andeac Teat Cristo mambeol xicon tiül tiüd naquüjpan mamb najoyiün leaw sanajoyiün nayacan. Aag ayaj sarangan cos sandiüman narangan casa Teat Dios, at para majüic icona naleaing wüx imeajtsan iyacan leaw ijchan.

<sup>20</sup> Atquiaj sarangan, nganandot majlüy aljane mandeacndeac ngo majneaj wüx aaga najiüt sarangan, cos sajlüyiün wüx aaga xeyay tomiün leawa najmel.

<sup>21</sup> Sandiüman narangan najneaj, ngome áagan wüx Teat Dios teamajaw, naleaing meáwan nipilan aton netam mambichaw majawüw sarangan najneaj wüx aag ayaj.

<sup>22</sup> At sanüjchiün maquiüjpüw mamb alinop mihermanojaats. Lanajawan meáwan leaw sasajan marang, apmarang najneaj. At nganüy xeyay andiüm mamb majaw icon, cos ajaw nguineay imeajtsan.

<sup>23</sup> Pues sitiüj aljane apmatün manguiyane ne j teat Tito, isajan nop saquiüü, nej nembéol xic wüx sambéol icon. Nganüy aljipüw quiaj, tarriüüd nejiw noicnoic ajlüy minipilan Teat Cristo cos nejiw aton xeyay arangüw casa Teat Cristo.

<sup>24</sup> Nganüy ijüiquichan icona naleaing irangan casa, para alndom manguiyiw meáwan noicnoic ajlüy monyar andeac Teat Cristo; at netam majüic naleaing icona irangan najneaj atnej lanapiüangan wüx icona.

## 9

*Leaw najmel müjndiw monyar andeac Teat Cristo*

<sup>1</sup> Pues wüx aaga tomiün leaw teameyacan membeolan monyar andeac Teat Cristo, ngo metam narang wüx nawüig alinomb nasaj icon.

<sup>2</sup> Cos lanajaw icona aliün wüx imeajtsan indüüman meyacan. Wüx aag ayaj apac ximeaaats nasajüw nipilan tiül iüt Macedonia nguineay icona tiül iüt Acaya tendüüman meyacan tomiün nde tajneat. Pares xeyay monyar andeac Teat Cristo andiüümüw müjchiw aton, cos lamanguiyiw nguineay icona indüüman mepalüchiün meyacan najen.

<sup>3</sup> Nganüy sanüüch mambüw ajcüw ayaj, mambüw masajüw icon alinomb mernguialeatayon wüx aag ayaj, cos ngo nandiüm manderac ndeac mbeay xic cos lanasajan nipilan nguineay lamerangan icona.

<sup>4</sup> Jondot apmambüw acas monaw Macedonia maquiüjpüw xic wüx sanamb najaw icon, ndoj apmajawüw icona nganaw membichan meyacan aaga tomiün, quiaj sanaxinguian xeyay, cuantemas icona. Cos lanandeadandean xeyay wüx icona nguineay tengual meyacan aaga tomiün.

<sup>5</sup> Pares tapiüngas sanüjchiw mamb ajcüwa hermanos quiaj, mambüw ombas quiriw masajüw icon meyacan leaw lamepiüangan apmeajchiün. Quiaj apmejüiquichan naleaing irangan nde ajmiüc imalan imeajtsan, ngome cos sasajan icon.

<sup>6</sup> Ich leeam imeajtsan, leaw nepiür xeyay apmaxaing xeyay; nganüy leaw napateay apiür, napateay apmaxaing.

<sup>7</sup> Meawarónan ich mayac leawa lamapiüng tiül omeaats mayac, ngo mapiüng wüx; at nde mapiüng netam mayac, cos Teat Dios andiüm meyacan nde apac imeajtsan.

<sup>8</sup> Teat Dios alndom müüch icon cuajantanej leaw netam mejiüran. Atquiaj alndom mejiüran leaw netam para alndom mermbeolayon leaw ngo majiür. At apmajlüy leaw netam para mermbeolayon wüx meáwan najneaj najiüt.

<sup>9</sup> Pues atanquiaj apiüng tiül Mipoch Teat Dios, cos apiüng:

Teat Dios apac omeaats majaw leaw ngo majiür, üüch leaw netam, ngo masap owix.

Nej arang palan, ngo majiür ümb.

<sup>10</sup> Teat Dios neyac osaab leaw napiürüch, at neyac meáwan nüeteran leaw netam; nejay apmüüch mexeyay icueajiün leaw ijiüran. Quiaj apmejiüran leaw netam para membeolan jangantanej leaw ngo majiür.

<sup>11</sup> Nej apmüüch icon mejiüran cuajantanej, para membeolan jangantanej aton. Cos wüx atquiaj imbeolan, xeyay nipilan apmüjchiw gracias Teat Dios wüx sanüjchiün nejiw leawa tengual meajchiün.

<sup>12</sup> Wüx aaga leaw ijchan quiaj, aag ayaj ngome áagan membeolan monyar andeac Teat Cristo leaw ngo majiürüw, pero wüx aag ayaj apmayajcüw ambeol nejiw Teat Dios, apmüjchiw gracias.

<sup>13</sup> Wüx aaga leaw ijchan quiaj, ajcüwa nipilan leaw ngo majiür apmarangüw casa Teat Dios, cos por aag ayaj ijüiquichan irangan atnej apiüng Teat Cristo. Aparangüw casa Teat Dios cos icona xeyay membeolan; at aton tembeolan pálwüch nipilan.

<sup>14</sup> Nejiw apmatüniw ocueaj Teat Dios mambéol icon, apmajiürüw icon lasta xeyay, cos Teat Dios lamayac mimonajneaj nej tiül imeajtsan.

<sup>15</sup> Netam mapiüngaats najneajay arang Teat Dios cos nej tüüch miün micual nej Teat Cristo. Aag ayaj lamong wüx ajneaj, ngondom mapiüngaats nguitow ajneaj.

## 10

*Pablo apac wüx aaga najiüt arang*

<sup>1</sup> Nganüy xique Pablo satün icueajiün nde ajneaj ximeaaats, atnej Teat Cristo tasaj nipilan. Altiül apiüngüw, wüx xique sajlüy niüng ijlüyiün xeyay ajneaj sandeac, pero wüx sarang nawüig nasaj icon, ajüic atnej napatas.

<sup>2</sup> Pues xique sasaj icon meyacan wüx imeajtsan merangan najneaj, cos ngo nandiüm nalic icon wüx sanapeay niüng ijlüyiün. Naleaing sanarang sapat najawüw ajcüwa leawa monpiüng xicona sarangan atnej jangantanej nipilan leaw ngo mandüüb Teat Cristo.

<sup>3</sup> Masey sajlüyiün ningüy wüx iüt atnej meáwan nipilan, naleaing meáwan leaw sarangan ngo narangan atnej arang nipilan leaw ngo mandüüb Teat Cristo.

<sup>4</sup> Pues xicona satsojon naquiüjpan nimeech cos ambeol xicon Teat Dios. Ngome xicónan quiaj satsojon, pares alndom najntsopiün wüx, ngondom majntsop wüx xicona nimeech.

<sup>5</sup> Teat Dios ambeol xicon nangochiün ombeay leaw ngo mayar andeac Teat Cristo; at ambeol najntsopiün wüx jane nepiüng nej más xeyay ajaw, at leaw nepiüng ngo maleaing leaw lamapiüng Teat Dios. Aton ambeol xicon nūjchiün nipilan maxomüw omeajtsüw marangüw leaw andiüm Teat Cristo.

<sup>6</sup> Sandiüman ombas najawan sitiül icona apmerangan meáwan najneaj, condom quiaj alndom nalic jane ngo marang najneaj.

<sup>7</sup> Icona netam membichan mejawan nguineay irangan inopnolon. Cos sitiül aljane apiüng tiül omeaats ocueaj nej Teat Cristo, ich leam omeaats xicona aton ocueaj Teat Cristo xicon.

<sup>8</sup> Masey ajüic atnej sarangrangüw quiripite wüx sasaj icon, aag ayaj cos sajlüy wüx icon. Naleaing ngo naxing, cos Teat Dios neech xicon nambeolan icon mepacan wüx áag andjpiüts, ngo nandiüm nandariich icon.

<sup>9</sup> Ngo nandiüm mepiüangan xique sarang aaga nawiig cam nambolooch icon.

<sup>10</sup> Naleaing altiül apiüngüw xique napatás, ngo najiür lasta wüx sarang wüx nawiig; pero wüx sajlüy niüng ijlüyiün xiquaiy, ajüic atnej ngo najiür sapac, atnej ngo naxom ximeaats nandeaac.

<sup>11</sup> Leaw nepiüng atquiaj, ich majaw leaw sarang wüx nawiig atnej sanarang aton wüx sanajlüyiün niüng ijlüyiün.

<sup>12</sup> Xicona ngo najlüyiün tiül ajcüwa monrangüyan casa, apiüngüw najneajay arangüw. Ninguiay ajüic nechachiw, cos mbójan ajawayej nguineay najneaj arang nop alinop tiülan nejw.

<sup>13</sup> Pero xicona ngo nelomboochayon wüx nayacan wüx leaw sarangan, sarangan aleaw wüx asaj xicon Teat Dios. Pares tatüchasan niüng ijlüyiün.

<sup>14</sup> Xicona ngo namban najmeliün leaw niüng Teat Dios ngo mapiüng. Pares alndom nasajan icon, cos xicona ombas namban niüng ijlüyiün nasajan icon wüx Teat Cristo nguineay tandeow mawün asoetiüts.

<sup>15</sup> Xicona ngo nelomboochayon wüx leaw lamarang alinop wüx minajiüt Teat Dios. Pero sandiüman mepacan wüx leaw andiüm Teat Dios, cos atquiaj alndom membeolan xic namb nguajantanej,

<sup>16</sup> nandeaacan nguineay alndom maw wüx asoetiüw nipilan leaw acül miünquaij necamb niüng ijlüyiün. Cos ngo nandiüm najmeliün niüng alinop lamarang najiüt, nerangrangayon wüx leawa nej lamarang.

<sup>17</sup> Pares sitiül aljane nind mandeaac nguineay arang, nde mandeaac leaw arang nej, ich mandeaac leaw arang Teat Dios.

<sup>18</sup> Cos leaw arangrangüw wüx leaw arang nej, aag ayaj nicuajind ngo membeat; pero

sitiül Teat Dios najneaj majaw leaw arang aljane, aag ayaj membeat.

## 11

*Pablo andeac wüx leaw monpiüangan apóstoles nejw*

<sup>1</sup> Maltiüw meiündan wüx leaw sanapiüng, cos sanasaj icon quiriw atnej andeac nop chach. Netam meiündan, nde mejcüyiün.

<sup>2</sup> Xique xeyay ajüüts ximeaats wüx imbanas, atnej Teat Dios ajüüts omeaats wüx imbanas. Cos xique lanasaj icon apmecüliün nóiquian mequiüjpan Teat Cristo, atnej nop nüx nayambüch, awün nej miteat nej, apmacül nóiquian maquiüüb minench nej.

<sup>3</sup> Nganüy ngo majneaj ximeaats, ndot aljane lamawaiich icon ngo mendjpiün Teat Cristo con imeajtsan, atnej tanomb Eva ngo mayar andeac Teat Dios, cos tawaiich nej ndiüw.

<sup>4</sup> Icona aton wüx aljane amb niüng ijlüyiün, masey mandeaac wüx Teat Jesús pálwüx ngo matnej sasajan icon; tengwüy wüx aljane apmasaj icon meajndiün alinoic espíritu ngo matnej aaga Nangaj Espíritu ocueaj Teat Dios leaw teajndiün wüx tasajan icon; tengwüy wüx aljane apmasaj maquiaach icon pálwüx ngo matnej taquiaachasan icon wüx Teat Cristo nguineay awün asoetiüts, pero naleaing icona temeyariün meáwan aag ayaj.

<sup>5</sup> Xique sapiüng nejw ajcüwa monwaiich monpiüng xeyay netamüw, aag ayaj ngo maleaing cos xique ngome chingüy xic.

<sup>6</sup> Nots quiaj naleaing ngo ndeac najneajay ngo matnej andeac altiül. Masey, cos lamejawan nguineay saxom ximeaats naquiaach icon.

<sup>7</sup> ¿Cuane ipiüangan, jow wüx tarangas najiüt quiaj para naxom ombeat süet, aag ayaj ngo majneaj tarangas cos ngo nayar icueajiün nicuajind wüx tasajas icon nguineay lamawün icon wüx Teat Cristo? Ngwüy niquimas, aag ayaj ngome ngo majneaj, cos aag ayaj tarangas para nambeol icon me-yariün andeac Teat Cristo.

<sup>8</sup> Xique tayariüs tomiün ocueaj palpálwüx noicnoic ajlüy minipilan Teat Cristo, cos atquiaj alndom naquiaach icon.

<sup>9</sup> Wüx tajlüyiüs ninguiay niüng ijlüyiün masey xeyay ngo najiür leaw tetam xic, nejingüind icon ngo natün ocueaj mambeol xic. Cos wüx alcuane tetam xic tambeolüw xic minipilan Teat Cristo monaw Macedonia. Pues wüx meáwan aag ayaj taiüandas wüx, ngo nasaj icon nicuajind. At aton nganüy ngome sanasaj icon membeolan xic.

<sup>10</sup> Teat Cristo ajaw meáwan leaw sandeaac ngo nawaiich, pares ngo nacueat nasaj

meáwan nipilan tiül iüt Acaya, xique ngo metam nangüyan.

<sup>11</sup> ¿Neol tapiüngas sarang atquiaja, cos ngo najiür icon lasta? Ngwüny niquimas, Teat Dios ajaw sajiür icon lasta xeyay.

<sup>12</sup> Xique tanaám sarang atnej tenguiäl narang, cos atquiaj ngome apmajiürüw andeacüw ajcüwa monpiüangan apóstoles nejiw, aton ngondom mapiüngüw nejiw arangüw atnej sarangan.

<sup>13</sup> Nejiw ngome naleaing apóstoles nejiw, cos awaijchaw, arangüwan at nejiw apóstoles ocueaj Teat Cristo.

<sup>14</sup> Ngo metam mbayameron wüx aag ayaj, cos aaga minatangüw nimeech nenüt Satanás alndom mawaiich mejüiquichaw atanej nop ángel ocueaj Teat Dios.

<sup>15</sup> Pares nejiingind ngo metam mbayameron wüx aag ayaj, cos mimonrang najiüt Satanás alndom majüiquichaw arangüw atnej monrang najneaj. Naleaing wüx ümbwüx nüt, quiaj apmaxomüw leaw netam nejiw.

*Pablo tamongoch xeyay cos apóstol nej*

<sup>16</sup> Nganüy sanasaj icon alinomb, pero nejiingind nde mapiüng xique nechachiüs wüx leaw sanandec. Cos sitiül aljane apiüng nechachiüs, masey ich mapiüng, pero ich manguiay leaw sanapiüng majüic xique aton alndom nerangrangüy, masey quiriw.

<sup>17</sup> Nganüy leaw sanapiüng aag ayaj ngome leaw asaj xic Teat Dios; sanapiüng atnej nechachiüs cos sanerangrangüy.

<sup>18</sup> Cos almajlüy xeyay leaw tearangrangayej wüx leaw arangüw, ata xique aton sanerangrangüy wüx leaw sarang.

<sup>19</sup> Icona ipiüangan xeyay ixoman imeajtsan, pares apac imeajtsan menguiayiyün andeac leaw nechach.

<sup>20</sup> Wüx nejiw asajüw icon merangan leaw andiümüw nejiw, icona terangan. At wüx tandiümüw mambichaw leaw ijiüran, icona teajchiün. Wüx tandiümüw mawaijchaw icon, teyariün andeacüw. At sitiül arangrangayej, ngo mepiüangan nicuajind. Masey apmaleambüw icon, icona ngo mejcüiyün.

<sup>21</sup> Masey saxing nasaj icon timbasan, pero ximbol narang atnej nejiw arangüw.

Nejiw arangrangayej wüx leaw tarangüw. Pues ata xique nganüy sanerangrangüy wüx leaw tarangas, masey apmajüic teanandec atnej nechachiüs.

<sup>22</sup> Pues sitiül nejiw hebreos nejiw, ¿jow xique, ngome hebreo xic? Sitiül nipilan israel nejiw, ¿jow xique, ngome nipilan israel xic? Sitiül nejiw monaw tiül acualaats teat Abraham, ¿jow xique, ngome nawas tiül acualaats teat Abraham atona?

<sup>23</sup> Sitiül nejiw apiüngüw monrang najiür ocueaj Teat Cristo nejiw, nganüy xique najntsop wüx sarang, masey atnej nechachiüs sandeac. Xeyay najiüt lanarang, ngo matnej nejiw. Najntsop wüx sawjüch, najntsop wüx sajmel tiül manchiüc, najntsop wüx ajlüy nandeow.

<sup>24</sup> Nipilan israel tawüjchaw xic acoquiaw awüjchaw, nimioiw gajpoquey (39) tawüjchaw noicnoic.

<sup>25</sup> Arojmbüw tajwüchiüs naag xiül. Alinoic tajlosas. Arojmbüw ajlüy nandeow tiül ndec wüx tajmbaj a nadam müx. Alinoic tajlüiyüs pinawan nadam ndec noic nüt noic ong-wiiüts.

<sup>26</sup> Xeyay tambas tiül tiüüd namb nguiajantanej. Nguiaj tajlüy nandeow tiül lam. Nguiaj tajlüy mambiy xic need. Nguiaj tajlüy mambiyaw xic micual xefüt. Nguiaj tajlüy mambiy xic pálwüx nipilan ngome israel. Nguiaj tajlüy nandeow tiül alinoic cambaj. Nguiaj tajlüy nandeow tiül wajchiüc. Nguiaj tajlüy nandeow tiül ndec. Nguiaj tajlüy mambiyaw xic leaw monpiüangan ayariw andeac Teat Dios.

<sup>27</sup> Nguiajnguiaj xeyay laumb sapaç cos xeyay najiüt sarang. Nguiaj ngo nameay, nguiaj safünd lop, nguiaj safünd yow, nguiaj ngo net cos ngo majlüy, nguiaj ambiy xic naquind, nguiaj ngo najiür sapix.

<sup>28</sup> Aliün majlüy xeyay alndom napiüng, pero leaw xeyay amb wüx ximeats meáwan nüt, aag ayaj nguineay teajlüyiw noicnoic ajlüy minipilan Teat Cristo.

<sup>29</sup> Sitiül aljane ngo majiür apac, tengwüy ngo mayac omeats wüx mandüüb Teat Cristo, xique ngo majneaj ximeats nanguiay. At sitiül aljane ayac wüx alinop marang ngo majneaj, xique aton xeyay sajcüy wüx aag ayaj.

<sup>30</sup> Más najneaj nerangrangüy wüx leaw arang Teat Dios, aag ayaj leaw ngondom narang xiquiáyan quiaj.

<sup>31</sup> Teat Dios, miteat Miteatiüts Jesucristo, aaga almajlüy meáwan nüt, nej ajaw naleaing meáwan leawa lanapiüng quiaj, ngo nawaiich.

<sup>32</sup> At aton wüx tajlüiyüs tiül cambaj Damasco, aaga natang nenajiüt ocueaj aaga rey Aretas tapiüng majiürjürüch niüng ajmeleran. Tajiüraran a cambaj masapüw xic.

<sup>33</sup> Pero tajwanas samb tiül noic ventana tiül muro leaw ayey nej tiüt a cambaj. Samb tiül noic nadam nchep, quiaj tawas wüx.

## 12

*Teat Dios tüüch nej majaw atnej maüm*

<sup>1</sup> Ngo metam nerangrangüy cos ngo naxom wüx nicuajind. Naleaing sanapiüng nguineay tündiüs najaw atnej saüm, at nguineay tasaj xic Teat Dios.

<sup>2</sup> Sajaw nop naxey leaw andüüb Teat Cristo, lamajiür gajpopeic (14) neat taquiiüb nej mamb Teat Dios matüch tiül amb arej cielo. Ngo najaw sitiül tajiür micuerpo nej tiül cielo, tengwüy ngo majiür, néjan Teat Dios ajaw.

<sup>3</sup> Xique sawaw naleaing aaga naxey quiaj taquiiüb nej mamb Teat Dios andüy tiül cielo, pero ngo najaw sitiül tajiür micuerpo nej tiül cielo, tengwüy ngo majiür, áagan Teat Dios ajaw.

<sup>4</sup> Quiaj tiül cielo tanguiaj xeyay nanderac leaw naleaing, ngondom mapiüing wüx nguineay amb leaw tanguiaj, cos aag ayaj nejingüind nipilan ngo müünd mandeac wüx.

<sup>5</sup> Pero leaw tajaw tiül cielo aaga naxey, xique wüx aag ayaj alndom nerangrangüy. Pero wüx leaw sarang xique nganüy ngo metam nandeadcdeac wüx. Sanandead wüx áagan leaw tambeol xic wüx Teat Dios, cos ngondom narang nicuajind xiquiáyan quiaj.

<sup>6</sup> Sitiül nandiüm nerangrangüy, aag ayaj ngome nechachiüs, cos naleaing meáwan leaw sanapiüing. Pero ngo nandiüm nandead wüx aag ayaj, nganandot mayacüw wüx leaw sarang, at leaw sandeac, cos ngo nandiüm malombüw xic nipilan.

<sup>7</sup> Nganandot nerangrangüy wüx leaw tüüch xic najaw Teat Dios, pares taxom xic noic necoy, atnej sayaag altiül sats. Aag ayaj tüüch xic minatangüw nimeech nenüt Satanás para mambiy xic, müüch mecoy nayaag.

<sup>8</sup> Pues wüx aag ayaj, arojmbüw tasajas Teat Dios sitiül alndom mawün aag ayaj wüx ximbas.

<sup>9</sup> Pero Teat Dios tasaj xic: “Ich mapac imeaats cos ijaw sandiüm ic. Wüx ique ngondom merang nicuajind, quiaj xique alndom najüiquich leaw alndom narang”, aj xic. Pares apac ximeaats masey langondom narang nicuajind, cos quiaj apmajüic meáwan leaw sarang ngome xique sarang, Teat Cristo nerang.

<sup>10</sup> Por aag ayaj apac ximeaats wüx samongoch ngo majneaj wüx sandüüb Teat Cristo, masey wüx sayaag langondom narang nicuajind, masey wüx aljane asaj xic ngo majneaj, masey ngo najiür leaw sapiüing netam, masey wüx ajlüy moncüy, masey wüx sajlüy tiül naél. Pares wüx lango najaw nguineay sanarang, quiaj ambeol xic Teat Dios narang cuajantanej.

*Xeyay amb wüx omeaats teat Pablo wüx minipilan Teat Cristo tiül Corinto*

<sup>11</sup> Lanarang at xic nop chach, cos lasarangrangüy wüx nguineay tarangas najneaj, pero tarangas aag ayaj cos icona teyacan xic wüx nandead. Icona netam

mendeacan wüx xique nguineay tambeol xic Teat Dios narang najneaj. Masey ajüic ngo nembeat nicuajind, pero ajcüwa monpiüangan apóstoles nejwüw ngome más nembeatiw.

<sup>12</sup> Tajiüc xique naleaing apóstol xic, cos wüx tajlüyiüs niüing ijlüyiün tarangas xeyay najiüt ocueaj Teat Dios, ngo nacueat. At tarangas xeyay ateócan y tarangas cuajantanej leaw ngome aag ajaraw.

<sup>13</sup> Xique tambeolas icon atanej tambeolas minipilan Teat Cristo nguiajantanej, pero naleaing ngo natün icueajiün nicuajind, ngo matne tarangas nguiajantanej. Ajcan ngo natütün icueajiün nicuajind, aag ayaj ngo majneaj tarangas. Iwüniün wüx imeajtsan aaga ngo majneaj tarangas quiaj.

*Teat Pablo apiüing apmamb majaw nejwüw amb iwear*

<sup>14</sup> Nganüy lanapiüing amb arojmbüw sanamb najaw icon. Naleaing ngo natün membeolan xic, cos ngo namb wüx leaw ijiüran, samb wüx icona. Cos nop nacualaran ngome nej netam müüch miteat nej cuajantanej; nateataran netam mambeol micual nej.

<sup>15</sup> Xique apac ximeaats masey sanüüch icon meáwan leaw sajiür, at masey sanembichay sapac wüx imbasan para alndom metangan wüx Teat Cristo. Masey ajüic ngo mejiüran xic lasta nicuajind, xique xeyay sandiüm icon.

<sup>16</sup> Masey xique ngo nayar icueajiün nicuajind, pero altiül apmapiüing wüx xique xeyay sayambyamb nguineay alndom nawaiich icon.

<sup>17</sup> ¿Jow, wüx tujúchiüs mamb niüing ijlüyiün aljane, tatüniw icueajiün leaw ijiürana, majoyiw müjchiw xique? ¿Ngwüy, ngo narang!

<sup>18</sup> Pues wüx tasajas teat Tito mamb niüing ijlüyiün, tujúchiüs mamb alinop aton maquiiüb mamb. Ngo matüniw icueajiün nicuajind, cos teat Tito aton apiüing tiül omeaats atnej sapiüing, aton arang atnej xique sarang.

<sup>19</sup> ¿Ngwüy icona ipiüangan xicona sandeacan atquiaja para mewüniün wüx imeajtsan leawa tarangasana? Ngwüy, cos Teat Dios ajaw leaw sandeacan, aag ayaj cos sandüjpiün Teat Cristo. Meáwan leawa sandeacan, aag ayaj alndom müüch icon mejiüran ipacan wüx indüjpiün Teat Cristo.

<sup>20</sup> Ximbol, jondot wüx sanapeay niüing ijlüyiün sanaxom icon ngome teamerangan atnej sandiüm; at icona ngome apmexoman xic atnej indüman. Cos ximbol naxom icon majlüy mondeacndead tiül icona, tengwüy indüman leaw ocueaj alinop, tengwüy ijcüyiün, tengwüy nerrejchiün, tengwüy nerndeacayon wüx imbasan ngo majneaj, tengwüy nerndeacndeadcayon, tengwüy

nerlomboochayon, tengwüy ngo mejlüyiün nöiquian.

<sup>21</sup> Ximbol aton, jondot wüx sanamb niüing ijlüyiün alinomb, Xeteat Dios apmüüch xic naxing wüx leaw irangan. Nots quiaj najiünts wüx ajcüw leaw tanaám arangüw ngo majneaj, cos nganaw leaam omeajtsüw cuane teamarangüw, nganaw macueatiw. Altiül monxey ngo macueatiw ajjüürüw minajtajüw nejiw, aton montaj ngo macueatiw ajjüürüw minaxeyiw nejiw, at tanaám teamarangüw ngo majneaj leaw andiümüw.

## 13

### *Ndóiwüx apaj ocueajiw*

<sup>1</sup> Pues nganüy amb arojmbüw sanamb niüing ijlüyiün. Ich leaam imeajtsan, wüx ajlüy alcuane majaraw, netam ijpüw tengwüy arojpw monjaw mapiüngüw nguineay tajlüy.

<sup>2</sup> Cos atnej lanasaj icon ninguinüt, nganüy sanasaj icon alinomb atanej tasajas icon wüx xiün quiaj amb ijmbüw. Wüxan nganaw napeay niüing ijlüyiün sandiüm nasajüw leaw tealeámban arangüw ngo majneaj, at meáwan icona, sitiül tapeayiüs niüing ijlüyiün alinomb, langome sanajiür lasta leaw tealeámban arang ngo majneaj.

<sup>3</sup> Atquiaj sanarang, cos indiüman mejawan sitiül Teat Cristo naleaing teamasaj xic nguineay netam narang. Nej lamajüiquich mejawan nguineay alndom marang cuajantanej tiül icona.

<sup>4</sup> Naleaing Teat Cristo tajüic atnej ngondom marang nicuajind wüx tajmel wüx cruz mandeow, pero nganüy lapac, cos Teat Dios tapacüüch nej alinomb. Ata xique aton masey ajüic atnej ngondom narang nicuajind, atnej tajüic wüx Teat Cristo wüx tandeow. Cos xique nganüy teanarang atnej tarang Teat Cristo, pares wüx sanapeay niüing ijlüyiün, quiaj apmajüic Teat Dios neech xic najaw wüx cuajantanej wüx icona.

<sup>5</sup> Pues icónan quiaj netam meyajcan sitiül naleaing lameyariün andeac Teat Cristo. ¿Ngwüy ngo meyajcana, Teat Cristo ajlüy tiül icona? Tengwüy sitiül altiül ngo mandüüb Teat Cristo, quiaj naleaing ngo majlüy tiül icon Teat Cristo.

<sup>6</sup> Malüy mejawan xicona ngo nawajchan, cos naleaing xicona miapóstol Teat Cristo xicon.

<sup>7</sup> Satüniün mambeol icon Teat Dios nganandot merangan ngo majneaj. Atquiaj satüniün cos sandiüman icon, ngome cos sandiüman najüiquichan nguineay tarangasan najneaj najiüt tiül icona. Más najneaj, irangan leaw najneaj masey altiül apiüngüw ngo narangan leawa netam narangan tiül icona.

<sup>8</sup> Xicona ngo nandiüman narangan nicuajind leaw ngo mambeol nipilan mandüjpw Teat Cristo, ngo nandiüman napalan nejinguind.

<sup>9</sup> Xicona apac ximeajtsan wüx ngo metam napaj icueajiün cos teamerangan najneaj. Tanaám teanasajan Teat Dios mambeol icon merangan más najneaj.

<sup>10</sup> Pares tarangas aaga nawiig cam wüx nganaw napeay niüing ijlüyiün, cos ngo nandiüm nalic icon wüx sanapeay quiaj, masey alndom nalic icon cos apóstol xic. Sandiüm nambeol icon metangan wüx Mipoch Teat Dios; ngo nandiüm nüüch mamix imeajtsan, nasarriich icon.

### *Ndóiwüx atepeay*

<sup>11</sup> Ndóiwüx sasaj icon xecojow xechijquaw, lasamb. Ich mapac imeajtsan irangan najneaj atnej lanasaj icon, ermbeolayon nop alinop para alndom mejlüyiün nöiquian; nde merneocayon imbasan. Quiaj apmajlüy tiül icon Teat Dios, aaga neech icon monajneaj, merjiürayon lasta.

<sup>12</sup> Itepeayiün nop alinop cos ijlüyiün nöiquian wüx Teat Cristo. Tamtámban ijlüyiün.

<sup>13</sup> Meáwan minipilan Teat Cristo leaw alningüy atepeayiw icon.

<sup>14</sup> Sandiüm mambeol icon Teat Jesucristo, majiür icon lasta Teat Dios, tanaám majlüy nöiquian mequiüjpan aaga Nangaj Espiritu ocueaj Teat Dios. Amén.

**Noic nanderac tarang wüx  
nawiig San Pablo müüch  
minipilan Teat Cristo moncül  
tiül Galacia  
GÁLATAS**

*Pablo atepeay nejiv*

<sup>1</sup> Xique Pablo nop apóstol, ngome ayac xic nipilan, at ngome nipilan tarriiud xic. Teat Jesucristo nejay tarriiud xic, at miteatiüts Teat Dios tarriiud xic aton. Nej tapacüch Teat Cristo tiül mondeow.

<sup>2</sup> Xique naquiüjpüw ajcüw mondüüb Teat Cristo leaw aliw ningüy, satepeayiün icon noicnoic ajlüy minipilan Teat Cristo tiül iüt Galacia.

<sup>3</sup> Tanaám ich mambeol icon Miteatiüts Dios at Teat Jesucristo müüch icon mejüüran monajneaj.

<sup>4</sup> Cos Teat Jesucristo tiün mandeow mawün asoetiüts, ngo mapiüng wüx nicuajind, tarang atnej andiüm Miteatiüts Dios alndom mawün icoots wüx tiül aaga ngo majneaj najlüy nganüy nüt cam.

<sup>5</sup> Teat Dios netam masoic najneaj arang meáwan nüt. ¡Amén!

*Ngo majlüy alinoic najneaj nanderac alndom mawün asoeteran*

<sup>6</sup> Xeyay mbayajos wüx sanguiay nguineay icona najen teamecueatiün Teat Dios, aaga nepaj icon mexoman aaga monajneaj arang Teat Cristo. Nganüy tengual meyariün mipoch pálwüx nipilan, ngo matnej aaga najneaj nanderac wüx Teat Cristo.

<sup>7</sup> Ngo majlüy alinoic najneaj nanderac wüx Teat Cristo. Naleaing aljane lamitsoj imalan, andiümüw mambitüljchiw leaw tapiüng Teat Cristo nguineay alndom mawaran wüx asoeteran.

<sup>8</sup> Sitiül aljane maquiaach icon alinoic ngo matnej lanaquiajchiün icon wüx aaga najneaj nanderac wüx Teat Cristo, aaga nipilan quiaj ich mayac nej tiül aaga xeyay ngo majneaj Teat Dios; masey sitiül ndot xicona, masey nop ángel imiün tiül cielo.

<sup>9</sup> Atnej nomb tasajas icon wüx aag ayaj, nganüy sandilil nasaj icon alinomb: Sitiül aljane teamandiüm maquiaach icon pálwüx poch wüx aaga najneaj nanderac wüx Teat Cristo, ngo matnej lamenguiayiün, jich mayac tiül aaga xeyay ngo majneaj Teat Dios!

<sup>10</sup> Jow nganüy, ¿jane sayamb monajneaj wüx ombas? ¿Nipilan, ngwüy Teat Dios? ¿Ngwüy ajüic sayamb nguineay majneaj majawüw xic nipilana? Cos sitiül aliün narang leaw andiüm nipilan ngondom narang minajiüt Teat Cristo.

*Pablo tüünd majlüy nop apóstol*

<sup>11</sup> Xecojow xechijquiaw, xique sandiüm menguiayiün aaga najneaj nanderac wüx Teat Cristo leawa xic saquiaach, aag ayaj ngome nipilan taxom omeaats mandeac.

<sup>12</sup> Ngo nayar ocueaj nipilan, aton ngo maquiaach xic aljane; nejay Teat Jesucristo tüüch xic najaw.

<sup>13</sup> Icona lamenguiayiün nguineay sarang nomb wüx saquiüjpüw nipilan judío, nguineay tayambas ombasüw mondüüb Teat Cristo, at tandarriichasüw.

<sup>14</sup> Xique tajntsopiüs wüx sandüy tiül nipilan judío, ngo matnej saquiüjpüw, cos xeyay tandiümas narang leaw tarangüw xexejchiün.

<sup>15</sup> Naleaing Teat Dios tarriiud xic wüx nganaw wüjquian; xeyay tajiür xic lasta, pares tayamb xic,

<sup>16</sup> müüch xic najaw Teat Cristo. Atquiaj alndom nandeac wüx nej nasaj wüx nipilan ngome judío. Wüx ndoj aag ayaj ngo namb najaw nejingüind.

<sup>17</sup> Ngome tambas Jerusalén najawüw ajcüw ombas marangüw apóstoles; tambas sandüy tiül iüt Arabia; condom tandilileas sandüy tiül cambaj Damasco alinomb.

<sup>18</sup> Condom wüx laümb aroomb neat, quiaj tambas sandüy Jerusalén najaw a Teat Pedro, tacüliüs anaag gajpacoic (15) nüt.

<sup>19</sup> Naleaing ngo naxom najaw altégüy apóstoles; áagan Jacobo michiig Teat Jesús taxomas.

<sup>20</sup> Naleaing sasaj icon, Teat Dios ajaw meáwan aaga poch teanasaj icon cam, aag ayaj naleaing.

<sup>21</sup> Condom tambas tiül iüt Siria at tiül iüt Cilicia.

<sup>22</sup> Pero nganaw majawüw jane xic ajcüw noicnoic ajlüy minipilan Teat Cristo monlüy tiül Judea.

<sup>23</sup> Nejiv tanguiaiyw teombeay miün nipilan, tanderac: “Áaga naxey leaw nomb xowüy tayamb ombasaats, nganüy tengual maquiaach nipilan wüx mipoch Teat Cristo, masey nomb xowüy tandiüm masarriich icoots”, awüw.

<sup>24</sup> Condom xeyay tapac omeajtsüw majawüw leaw Teat Dios lamarang wüx xique, tapiüngüw najneaj lamarang Teat Dios.

**2**

*Altégüy apóstoles ajneéjan majawüw leaw arang a Pablo*

<sup>1</sup> Ndoj, wüx laümb gajpopeic (14) neat, quiaj tandilileas sandüy Jerusalén alinomb saquiüt teat Bernabé; at teat Tito aton salnaquiüjpan.

<sup>2</sup> Xique tambas, cos Teat Dios tüüch xic najaw netam nomb. Condom tiül Jerusalén, wüx tajlüyasan xicónan quiaj naquiüjpan



monajiüt tiül minipilan Teat Cristo, quiaj tapots nasajüw nguineay saquiaach wüx aaga najneaj nanderac wüx Teat Cristo tiül nipilan ngome judío. Xique tarangas aag ayaj cos ngo nandiüm mapiürang ngo metam meáwan leaw lanarang, at leaw teanarang nganüy.

<sup>3</sup>Naleaing, masey teat Tito aag alnaquiiüb ningüy, nipilan griego nej, ngo mapiüngüw wüx sitiül netam marangüch wüx ombas nej aaga circuncisión.

<sup>4</sup> Pero nganüy ajcüwa leaw ngome naleaing andüjpiw Teat Cristo axotayej ajmeliw tiül icoots. Tajmeliw mandacüwiw nguineay ajlüyüüts nóiquian wüx Teat Cristo, cos andiümüw mayacüw icoots alinomb wüx meáwan leaw nipilan judío ajlüyay marangüw.

<sup>5</sup> Naleaing xicona ngo mbiüjlanon wüx narangan leaw apiüngüw masey noic ores, cos sandiüman mejüüran tiül imeajtsan leawa naleaing wüx aaga najneaj nanderac wüx Teat Cristo.

<sup>6</sup> Leawa natangtang monjiür najiüt tiül minipilan Teat Cristo, nicuajind jayats ngo masajüw xic nguineay netam narang. Xique ngo napiüng wüx jane nejijw cos Teat Dios ngo marriiüd jane netam ajlüy, jane ngwüy.

<sup>7</sup> Nejijw iünan mapiüngüw Teat Dios lamüüch xic aaga najiüt quiaj, para naquiaach nipilan ngome judío nguineay alndom mawüw wüx asoetiw. Aag ayaj atnej najiüt tüünd teat Pedro masaj wüx nipilan judío.

<sup>8</sup> Cos nejay Teat Dios neech mamb teat Pedro maquiaach nipilan judío, aton nejay Teat Dios tüüch xic namb naquiaach nipilan ngome judío.

<sup>9</sup> Ndoj ajcüwa montangtang monajiüt tiül minipilan Teat Cristo, ajcüwa teat Jacobo, teat Pedro, ata teat Juan, tapiüngüw naleaing Teat Dios lamüüch xic narang aaga najiüt quiaj; ndoj tesapasayon xiwxan naquiiüpanüw, xique naquiiüb a teat Bernabé. Tarangasan aag ayaj najüiquichan sajiüran monajneaj. Quiaj tapiüngüw najneaj namban narangan najiüt tiül nipilan ngome judío; pero nejijw apmarangüw najiüt tiül nipilan judío.

<sup>10</sup> At tasajüw xicon leam ximeajtsan wüx nipilan leaw ngo majiür; pero xique meáwan aag ayaj ngo nacueat narang.

*Pablo apaj ocueaj teat Pedro tiül Antioquia*

<sup>11</sup> Naleaing noic nüt wüx teat Pedro tamb tiül cambaj Antioquia, quiaj tasajas teombas nguineay arang, cos tarang leaw ngo metam marang.

<sup>12</sup> Cos nej tet aweaag nipilan ngome judío wüx nganaw mapeay nejinguind imiün

niüng ajlüy teat Jacobo. Condom wüx lapeayiüw, quiaj tacueat üet maquiiüjpüw, cos imbol majawüw nej ajcüwa nipilan monpiüng netam majlüy circuncidado meáwan minipilan Teat Cristo.

<sup>13</sup> Ategüy minipilan Teat Cristo tiül nipilan judío tarangüw atnej arang teat Pedro. Ata teat Bernabé tandiüb wüx aton, tarangüw aaga ayaj masey ajawüw nguineay netam marangüw.

<sup>14</sup> Wüx tajawas lamarangüw pálwüx ngome atnej aquiaach aaga najneaj nanderac wüx Teat Cristo, quiaj tapots nasaj a teat Pedro niüng ajlüyeran: "Sitiül ique masey nipilan judío ic, pero temerang atnej nop nipilan ngome judío, ¿neol tesajüw nipilan ngome judío netam marangüw atnej arangüw nipilan judío?" saj.

*Atotow alndom mawaats wüx asoetiüüts por Teat Cristo*

<sup>15</sup> Xicona wijquiatason nipilan judío xicon, ngome nawasan tiül pálwüx nipilan monrang ngo majneaj.

<sup>16</sup> Pero nganüy ajawaats nejinguind ngondom maw asoet nej ajcan arang leaw apiüng aaga poch tüünd Moisés. Ajcüwan monyar andeac Teat Jesucristo apmawüw wüx asoetiw. Ata xicona aton lanayariün andeac Teat Jesucristo, pares alndom majaw icoots Teat Dios ngo majiüraats nisoet ajcan ayariüüts andeac Teat Cristo, ngome ajcan sarangan leaw apiüng tiül aaga poch tüünd Moisés.

<sup>17</sup> Nganüy sitiül xicona masey judío xicon, sayamban aton nguineay alndom najlüyiün najneaj naquiiüpan Teat Dios por leaw tarang Teat Cristo; quiaj ajüic xicona sajiüran nisoet aton. ¿Wüx aag ayaj alndom mapiürang Teat Cristo ayac icoots wüx nisoete? ¡Ngwüy ngo matquiaj!

<sup>18</sup> Cos sitiül tapiüngas ngo metam narang leaw apiüng aaga poch tüünd Moisés, condom tandilileas narang aag ayaj alinomb, quiaj lanajiür sasoet.

<sup>19</sup> Cos xique sayaag tajlüyüis atnej tüüch xic nandeow aaga poch tüünd Moisés, cos apiüng netam nandeow por sasoet. Nganüy lango metam xic aag ayaj, cos sayaag lamapacüüch xic Teat Dios nguineay alndom narang leaw andiüm nej.

<sup>20</sup> Nganüy xique sajlüy atnej laxiün wüx sandeow nóiquian naquiiüb Teat Cristo wüx tamb wüx cruz. Aaga nganüy cam ngome xique salnapac, cos Teat Cristo almapac tiül ximeaats. Leaw sarang nganüy ngo narang leaw sandiüman xique, cos sayar andeac Micual Teat Dios. Nej tandiüm xic xeyay, tiün nejáyan quiaj mandeow ingow sandeow.

<sup>21</sup> ¿Nguineay alndom napiüng ngo metam xic aaga najneajay lamarang Teat Diosa?

Cos sitiül aljane alndom majlüy najneaj maquiüüb Teat Dios ajcan arang leaw apiüing tiül aaga poch tüünd Moisés, quiaj ajüic andeówan Teat Cristo, atnej ngo metam.

### 3

*¿Ngün alwüx ambeat, aaga poch tüünd Moisésa, ngwüy mipoch Teat Cristo?*

<sup>1</sup> ¡Nguitow merchachiün monaw Galacia! ¿Jane netsoj imalan mecueatiün mendüjpiün leawa lamenguiayiüna? Cos leawa lamenguiayiün aag ayaj naleaing. Xicona tasajanan icon naleaing nguineay Teat Jesucristo tamb wüx cruz.

<sup>2</sup> Nganüy sandiüm mesajan xic wüx aag ayaj. ¿Teyariün Nangaj Espiritu ocueaj Teat Dios ajcan irangan leaw apiüing tiül aaga poch tüünd Moisésa? ¿Ngwüy, ajcan teyariün leaw inguiayiün wüx Teat Cristo?

<sup>3</sup> ¿Neol terchachiüna? Cos wüx temelichan indüjpiün Teat Cristo, quiaj teajndiün Nangaj Espiritu mambeol icon. ¿Nguineay tendililean alinomb mendüyiün wüx merangan leaw alndom merangan icona?

<sup>4</sup> Ajüic atnej ngo mambeol icon nicuajind meáwan leawa temongochiün. ¡Ngwüy, ngome por ngana miün temongochiün aag ayaj!

<sup>5</sup> Wüx Teat Dios üüch icon Nangaj Miespíritu nej, at wüx arang ateócan tiül icona, ¿nej arang aag ayaj ajcan irangan leaw apiüing tiül aaga poch tüünd Moisésa, ngwüy arang ajcan iyariün leawa lamenguiayiün wüx Teat Cristo?

<sup>6</sup> Atquiaj teat Abraham tayar andeac Teat Dios, quiaj Teat Dios tajneaj majaw nej.

<sup>7</sup> Nganüy icona netam mejawan leaw naleaing ayariw andeac Teat Dios, ajcüw ayaj atnej acualaats teat Abraham.

<sup>8</sup> Tiül Mipoch Teat Dios lamapiüing tanomb nguineay Teat Dios apmawün wüx asoetiw nipilan ngome judío leaw apmayariw nej andeac. Áag Teat Dios tasaj a teat Abraham tanomb wüx aaga najneajay nanderac, tapiüing: “Meáwan nipilan wüx iüt apmajlüyiw najneaj sitiül apmayariw sandeac atnej ique teyar sandeac”, aw.

<sup>9</sup> Atquiaj meáwan leaw apmayariw andeac Teat Dios, najneajay apmajlüyiw maquiüjpüw teat Abraham cos nej aton tayar andeac Teat Dios.

<sup>10</sup> Leaw nepiüing alndom maw wüx asoet nej cos arang leaw apiüing tiül aaga poch tüünd Moisés, aag ayaj apmamongoch xeyay ngo majneaj. Cos Mipoch Teat Dios apiüing: “Apmamb tiül castigo jane ngo marang palan atnej apiüing tiül aaga poch tüünd Moisés”.

<sup>11</sup> Cos naleaing nejinguind ngondom majneaj majaw Teat Dios ajcan arang leaw apiüing minawiig Moisés, cos Mipoch Teat

Dios apiüing: “Jane ayac omeaats wüx Teat Dios apmapac meáwan nüt cos lamayar nej andeac”.

<sup>12</sup> Aaga poch tüünd Moisés ngo mapiüing netam mayacüch wüx omeaatsaran. Apiüing: “Leaw arang palan, nej apmapac majlüy najneaj cos arang palan”.

<sup>13</sup> Teat Cristo lamawün icoots tiül aaga ngo majneaj atnej apiüing tiül minawiig Moisés, cos apiüing netam mamongochiüts aaga ngo majneaj ajcan ngo marangaats palan. Cos Teat Cristo tamongoch meáwan ngo majneaj ingow amongochiüts, alndom mawün icoots wüx asoetiüts. Cos apiüing tiül Mipoch Teat Dios: “Leaw najntsop arang ngo majneaj aag ayaj apmamb wüx cruz”.

<sup>14</sup> Atquiaj tajlüy alndom mayariw nipilan ngome judío aaga monajneaj leawa Teat Dios tüüch teat Abraham. At apmüjndiüts Nangaj Miespíritu nej leaw Teat Dios lamapiüing apmüjndiüts ajcan ayariüts andeac Teat Cristo.

*Mipoch Moisés y leaw Teat Dios lamapiüing apmüüch*

<sup>15</sup> Xecojow xehijquiaw, sanasaj icon menguiayiün wüx leaw nipilan alndom marang. Wüx alngün nipilan mayac mipoch nej mapiüing apmarang alcuane, nejinguind ngondom mapiüing ngo membeac aag ayaj, tengwüy mapiüing mayac wüx alquiriw.

<sup>16</sup> Teat Abraham tasoic, nej apmüünd leaw Teat Dios lamapiüing apmüüch nej at micual nej. Nej ngo masoic andüy wüx meáwan micual nej, pares tasoic: “Micual”, ajow. Aag ayaj andeac wüx nop, aag ayaj Teat Cristo.

<sup>17</sup> Nganüy atcüw sapiüing: Wüx Teat Dios tasaj Abraham leaw apmüüch nej, nganaw majlüy aaga poch tüünd Moisés. Aaga poch quiaj tajlüy wüx lamajüür piquiw acoic miow nimiow gajpowüw (430) neat. Aaga poch tüünd Moisés quiaj, ngondom mangowüüch leaw Teat Dios lamapiüing apmarang.

<sup>18</sup> Cos sitiül aaga leaw apmaxomüw ali-noic nüt apmaxoram wüx arangüch leaw apiüing tiül aaga poch tüünd Moisés, quiaj ajüic ngo membeac leaw tapiüing Teat Dios apmüüch. Pero Teat Dios tapiüing apmüüch, üüchan teat Abraham aag ayaj.

<sup>19</sup> Jow nganüy, ¿neol tajlüy aaga poch tayac Moisésa? Aag ayaj tajmel majüiquich arangüch nisoet. Teat Dios tüüch ángeles mandeacüw aaga poch quiaj manguiay Moisés, condom Moisés tajlüy wüx masaj nipilan judío. Aaga poch tüünd Moisés quiaj tetam leaw apeay aaga nacularan leaw lamapiüing Teat Dios apmüüch miün.

<sup>20</sup> Wüx Teat Dios tayac mipoch nej masaj a Abraham leaw apmüüch, nejay tarang, ngo metam mambeolaran, ngo matnej wüx tüüch poch a Moisés.

*¿Neol tajlüy aaga poch tüünd Moisésa?*

<sup>21</sup> ¿Jow nganüy ngo majlüyiw nóiquian aaga poch tüünd Moisésa maquiiüb leaw Teat Dios tasaj a Abraham apmüüche? Ngwüy ngo matquiaj, cos sitiül aaga poch tayac Moisés alndom mawün asoeteran, quiaj naleaing alndom majneaj ajlüyüüts teombas Teat Dios wüx arangaats palan leaw apiüng.

<sup>22</sup> Cos lamapiüng tiül Mipoch Teat Dios meáwan nipilan ajlüyiw tiül nisoet. Atquiaj ajlüy alndom münjidiw leaw apmayar andeac Teat Jesucristo aaga leaw Teat Dios lamapiüng apmüüch.

<sup>23</sup> Wüx nganaw mapeay Teat Cristo, aaga poch tüünd a Moisés tapal icoots atnej ajpal tiül manchiüc aljane, cos netam macüliiüts mapeay Teat Cristo mayacaats omeajtsaats wüx nej.

<sup>24</sup> Aaga poch tüünd Moisés tajlüy atnej nop new nine. Cos tajiür icoots, tambeol icoots dedacasap; tiün macueat wüx tapeay Teat Cristo, cos alndom majlüyüüts najneaj teombas Teat Dios sitiül ayariiüts andeac Teat Cristo.

<sup>25</sup> Nganüy cos lapeay Teat Cristo, lango membeat aaga poch tayac Moisés, aaga atnej new nine.

<sup>26</sup> Nganüy meáwan icootsa micual icoots Teat Dios icoots cos ayariiüts andeac Teat Cristo Jesús.

<sup>27</sup> Meáwan icona leaw lameyariün yow mejüiquichan ijlüyüün nóiquian wüx Teat Cristo, nganüy ijlüyüün noic nej imeajtsan mequiiüpan Teat Cristo.

<sup>28</sup> Nganüy lango metam mepiüangan jane nipilan judío, jane nipilan ngome judío, jane najon nipilan marang najiüt, jane nangüyeran minajiüt nej, jane monxey, jane montaj; cos meáwan icootsa nóiquian ajlüyüüts, atowtowüüts ajlüyüüts wüx Teat Cristo.

<sup>29</sup> Pero sitiül icona ocueaj icon Teat Cristo, átan ijlüyüün micual icon teat Abraham, quiaj apmeajdiün leaw Teat Dios lamapiüng apmüüch.

#### 4

<sup>1</sup> At aton sasaj icon: Wüx nop nacualaran aliün mapateay, ajlüy atnej nop najon marang najiüt, masey alinoic nüt nej apmeneay meáwan leaw almajiür miteat nej. Ngo majüic sitiül nej apmeneay meáwan.

<sup>2</sup> Nej netam mayar andeac monbeol nej, at netam mayar andeacüw jane ajlüyiw wüx minajiüt nej, leaw atüch a nüt mapiüng

miteat nej müünd meáwan leaw almajlüy najcueat cam.

<sup>3</sup> Atquiaj tajlüyüüts icoots aton, tajlüyüüts atnej namix nine monguich. Cos tarangaats cuajantanej atnej ajlüyayej wüx marangüw jangantanej nipilan.

<sup>4</sup> Wüx tatüch a nüt, Teat Dios tüüch miün Micual nej, mawiquiach nej nop nüx nipilan judío nej, wijquiat wüx aaga nüt tealeámban atam marangüch leaw apiüng tiül aaga poch tüünd Moisés.

<sup>5</sup> Nej tiün mawün icoots tiül meáwan leawa mipoch Moisés apiüng netam marangüch, atquiaj alndom majlüyüüts alinomb macual icoots Teat Dios.

<sup>6</sup> Nganüy micual nej icoots, pares tüüch miün Miespíritu Micual nej macül tiül omeajtsaats, alndom masajaats Teat Dios: "¡Xeteat, necual xic!" majaats.

<sup>7</sup> Nganüy ique ijlüy micual ic Teat Dios, lango mejlüy at ic nop najon nerang najiüt. Sitiül micual nej ic, aton apmüüch ic aaga leaw lamapiüng apmüüch por Teat Cristo.

*Pablo xeyay ayac wüx omeaats meáwan mondüüb Teat Cristo*

<sup>8</sup> Naleaing icona nomb wüx nganaw mejawan jane Teat Dios, teajchiün imeajtsan leaw ngome naleaing dios nejw.

<sup>9</sup> Pero nganüy lamejawan jane Teat Dios, aton alndom napiüng Teat Dios lamüüch leaam imeajtsan wüx nej. Jow nganüy, ¿nguineay tendiüman mendililean meajchiün imeajtsan merangan alinomb cuajantanej leaw ngo metam, leaw ngo membeate?

<sup>10</sup> ¿Neol tendüyüün wüx leaw tanomb terangan wüx atüch nüt, wüx atüch caaw, wüx atüch neat, at alacas nüt leaw mixejchiün tarangüwa?

<sup>11</sup> Sateow ximeaats wüx icona cos jondot aaga najiüt tarangas wüx imbasan ngome tembeat.

<sup>12</sup> Xecojow xechijquiw, xique satün icueajüün mejlüyüün atnej xique sajlüy nganüy cam, cos xique lango nandüüb leaw apiüng tiül aaga poch tüünd Moisés, sajlüy atnej icona tejlüyüün nomb; icona ngome alngün ngo majneaj teyacan xic wüx.

<sup>13</sup> Icona lamejawan nguineay tamelichas nasaj icon wüx a najneaj nanderac wüx Teat Cristo, masey axom xic noic monandeow wüx aaga nüt quiaj.

<sup>14</sup> Masey aaga monandeow tajiüras quiaj, aag ayaj tajiüras majaraw nguitow sanaiüc wüx. Naleaing icona ngo mepiüangan ngo mind mejawan xic, ngo mepiüangan ngo netam ajcan sajiür monandeow. Ingow aag ayaj icona teajchiün ilajcan menguiayüün saquiaach, atnej nejay nop ángel ocueaj Teat Dios, atnej nejay Teat Jesucristo xic.

<sup>15</sup> Jow nganüy, ¿wül apac imeajtsan tejiüran nomba? Cos tiül aaga nüt quiaj sayaag sitiül ndot alndom icona apmesojndiün osaab iniüjcan meajchiün xic.

<sup>16</sup> Jow nganüy, ¿jicüyüin mejawan xic aag sasaj icon leaw naleaingue?

<sup>17</sup> Nejiw ajcüwa nipilan quiaj awüywüyüwan icon; ngome arangüw leawa alndom mambeolüw icon. Nejiw andiümüw mecueatiün leaw saquiajchiün, para mendüjpiün leaw andiümüw.

<sup>18</sup> Najneaj xeyay mawüywüyaran jangantanej sitiül naleaing apmayac nej wüx leaw najneaj. Xique meáwan nüt sandiüm nüüch mapac imeajtsan, ngome áagan wüx salnaquiiüb icon.

<sup>19</sup> Xecualüw, xeyay ngo majneaj nayaag. Sayaag atnej necoy, sapiüing atnej ayaag necoy montaj wüx apwijiuiam micual nej. Aag ayaj sanayaag tanaám sitiül icona ngome apmendiüman merangan leaw andiüm Teat Cristo.

<sup>20</sup> Malüy sapiüing alndom najlüy ninguiaj niüing ijlüyüin nganüy cam, para nasaj icon xiquaiy, cos lango najaw cuane alinoic sanasaj icon.

*Nguineay tajlüy wüx Agar; at wüx a Sara*

<sup>21</sup> Jow icona leaw indiüman mendüjpiün aaga poch tüünd Moisés, nganüy isajan xic: ¿Ngwa nganaw mejawana cuane apiünga?

<sup>22</sup> Cos apiüing Abraham tajüür ijpüw micual nej. Nop micual aweaag nop najon najtaj nerang najiüt, alinop micual aweaag mintaj nej ngome najon.

<sup>23</sup> Aaga micual aweaag najtaj najon marang najiüt, aag ayaj wijquian atnej jangantanej. Pero aaga micual aweaag mintaj nej, aag ayaj tajüürüw cos Teat Dios lamapiüing apmüüch majiürüw micualüw nejüw.

<sup>24</sup> Aag ayaj ajiür cuane amb apiüing. Ajcüwa ijpüw montaj quiaj, apiüing wüx ijqüiaw ajlüy poch leaw Teat Dios tayac müüch nipilan. Noic aag ayaj leaw tayac müüch nejüw wüx tiüc Sinaí, aag ayaj tüüch a Moisés. Leaw andiüb aaga poch quiaj, ajlüyiw atnej ajcüwa najon monrang najiüt, atnej aaga Agar quiaj.

<sup>25</sup> Cos Agar, aag ayaj apiüing wüx a tiüc Sinaí tiül iüt Arabia; at apiüing wüx aaga cambaj Jerusalén, at wüx meáwan nipilan judío, cos ajlüyiw at nejüw najon nipilan marang najiüt.

<sup>26</sup> Pero icootsa ajlüyüüts najneajay, ngo matnej ajcüwa najon monrang najiüt quiaj, cos micual icoots aaga Jerusalén najlüy tiül cielo.

<sup>27</sup> Altüül Mipoch Teat Dios apiüing: Ich mapac imeaats najtaj leaw ngondom mejüür micual;

erparapac najüic apac imeaats, ique nganaw meyaag necoy wüx wijquiaw nop nine.

Cos aaga najcuaeat najtaj nganüy apmajiür más xeyay micual nej, ngo matnej nop najtaj nejüür minoj nej.

<sup>28</sup> Xecojw xechijquaiw, icona ijlüyüin atnej tajlüy teat Isaac, cos ijlüyüin necularanan leawa Teat Dios lamapiüing apmüüch.

<sup>29</sup> Pero icootsa wijquajoots, tüüch icoots wijquiameots Nangaj Espiritu ocueaj Teat Dios, ayambüw ombasaats ajcüwa monopüing netam mandüjpich aag arangüw nipilan judío. Aag ayaj atnej tajlüy wüx teat Isaac, cos micual Agar tayamb nej ombas nej.

<sup>30</sup> ¿Cuane apiüing tiül Mipoch Teat Dios? Teat Dios tasaj teat Abraham: "Iwün iniüing aaga najon nerang minajiütan maquiiüb micual nej, cos micual nej ngondom müünd nicuajind leawa apmaneay micualan", aw.

<sup>31</sup> Atquiaj icootsa xecojw xechijquaiw, ngo majlüyüüts matnej micual aaga najon nerang najiüt quiaj; icootsa ajlüyüüts atnej micual mintaj teat Abraham.

## 5

*Nde mendüyüin wüx mendüjpiün aaga poch tüünd Moisés*

<sup>1</sup> Pero cos Teat Cristo lamawün icoots tiül arangaats leaw apiüing tiül aaga poch tüünd Moisés, tanaám netam mendüjpiün Teat Cristo; nde mendüyüin wüx alinomb mejlüyüin at icon najon monrang najiüt.

<sup>2</sup> Nganüy inguiayüin, xique Pablo sanasaj icon, cos sitiül icona mendüjpiün wüx merangan aaga circuncisión, quiaj ijüiquichan atnej ngo membeat tandeow Teat Cristo, ngo metam.

<sup>3</sup> Sandiüm nasaj icon alinomb menguiayüin, sitiül nop naxey andiüm majlüy circuncidado, at netam marang palan leaw apiüing tiül aaga poch tüünd Moisés.

<sup>4</sup> Sitiül aljane tiül icona apiüing wüx nop lamarang leaw apiüing tiül aaga poch tüünd Moisés, quiaj Teat Dios apmawün nej asoet, pues quiaj ajüic nej tengual macueat andiüb Teat Cristo; at tengual macueat aaga monajneaj leaw andiüm müüch nej Teat Dios.

<sup>5</sup> Pero icootsa ambeol icoots Nangaj Espiritu macüüüts a nüt wüx apmajlüyüüts najneajay, cos ayacaats omeajtsaats wüx Teat Cristo.

<sup>6</sup> Cos sitiül apmayariüts andeac Teat Cristo Jesús, quiaj ngo membeat sitiül ajlüyüüts circuncidado, tengwüy ngwüy. Leaw nemebeat aag ayaj mayacaats omeajtsaats wüx Teat Cristo, cos tüüch icoots mapac omeajtsaats majawaats nop alinop.

<sup>7</sup> Icona ninguiün nüt terangan najneaj. Jow nğanüy, ¿jane tepal icon mecueatiün mendüjpiün leaw ijawan naleaingue?

<sup>8</sup> Aag ayaj ngome Teat Dios nerang, cos tasaj icon mendüjpiün wüx merangan leawa nej andiüm.

<sup>9</sup> Ich leaam imeajtsan noic nanderac: quiripite nine levadura alndom majüy tiül ajtsaj, müüch maxip, mexeyay.

<sup>10</sup> Xique sawej Teat Dios apmambeol icon, ngome apmecueatiün mendüjpiün. Pero jangantanej teamandiüm mitsoj imalan, Teat Dios apmüüch nej mamongoch xeyay ngo majneaj alinoic nüt.

<sup>11</sup> Xecojow xechijquiaw, jondot xique aliün naquiaach netam marangüch aaga circuncisión quiaj wüx ombas aljane andiüm mandüüb Teat Cristo, nipilan judío ngome apmayambüw ximbax; at lango mayajcüw necoy wüx apmanguaiyiw aaga najneaj nanderac wüx Teat Cristo tandeow wüx cruz.

<sup>12</sup> Nejw ajcüwa mondiüm mayacüw icon wüx circuncisión quiaj, ¿neol ngo marangüw wüxan ombasüw nejw mandoijquiw nómbana?

<sup>13</sup> Cos icona xecojow xechijquiaw, tepajaranan meriowan tiül indüjpiün aaga poch tüünd Moisés. Naleaing netam mejawan wüx, nde mepiungan ijlüyiünan mendüjpiün merangan leaw icona indüüman. Leaw netam merangan aag ayaj mejiürayon lasta, membeolan nop alinop.

<sup>14</sup> Cos meáwan apiung tiül a poch tüünd Moisés alndom marangüch palan sitiül apmarangüch atcüy, cos apiung: "Ijiür lasta jangantanej atnej erjiürüy lasta."

<sup>15</sup> Nde merangan atnej arangüw napat nimal leaw acüüchcüchayej, atsambayej. Ijawan wüx, nde mejcüyiün mejawan nop alinop, nğanandot mümb ndajrriümeron.

#### *Leaw ngo mandüüm Nangaj Espiritu*

<sup>16</sup> Xique sandiüm nasaj icon: Irangan leaw andiüm Nangaj Espiritu ocueaj Teat Dios, quiaj ngome apmerangan leaw indüüman.

<sup>17</sup> Cos leaw nipilan andiüm, Nangaj Espiritu ocueaj Teat Dios ngo mandüüm. Pero leaw andiüm Nangaj Espiritu, nipilan ngo mandüüm. Wüx aag ayaj ngondom mejlüyiün nóiquian; pares ngondom merangan leaw najneaj iün tiül imeajtsan.

<sup>18</sup> Sitiül apmeajchiün a Nangaj Espiritu matiib icueajiün nguineay netam merangan, quiaj lango metam mendüjpiün aaga poch tüünd Moisés.

<sup>19</sup> Ngo maél mejaw nguineay ajlüyiw nipilan leaw andüjpiw leaw nejíwan quiaj andiümüw: aag ayaj leawa nejüür minajtaj, nejüür minaxey, leaw aquiüübayéjan ngo

mengoch owixaw, at leaw arang cuajantanej ngo majneaj wüx aag ayaj.

<sup>20</sup> At monyac omeaats wüx narangüch dios, monsüet, monwüney, monyambüy ombas, moncüy, moneocüy ombas, monbiyay, monsojnongüy majcüyiw, leaw ngo majlüyiw nóiquian, at monquiaach leaw ngo mandüüm Teat Dios.

<sup>21</sup> At leaw moncüy wüx ajaw alinop ajiür, at monbiy nipilan, mongün, monétan, at almajlüy xeyay cuajantanej ngo majneaj arangüw. Áag sasaj icon atnej landoj napiung, leaw teamarang aag ayaj ngondom majlüy tiül micambaj Teat Dios.

<sup>22</sup> Pero leaw Nangaj Espiritu üüch marangaats, aag ayaj majneaj majawaats nop alinop, majiüraats apac omeajtsaats, majiüraats monajneaj, at maiücaats wüx cuajantanej, marangaats najneaj wüx alinop, majneaj omeajtsaats ngo merrejchiüts wüx nicuajind, nde macueatiüts marangaats leaw netam marangaats.

<sup>23</sup> Nde merangrangayoots, nde marangaats leaw andiüm micuerpojaats. Jane apmarang meáwan aaga najneaj quiaj, ngo majlüy alngün poch mayac nej asoet.

<sup>24</sup> Jane ocueaj Teat Cristo ngo metam marang andiüman nej. Cos wüx tandeow wüx cruz Teat Cristo, quiaj tajlüy atnej tandeowaats nóiquian maquiüjpaats.

<sup>25</sup> Sitiül Nangaj Espiritu ajlüy wüx icootsa, ambeol icoots marangaats leaw andiüm Teat Dios, netam müjchiüts mayac icoots wüx leaw andiüm nej.

<sup>26</sup> Ngo majneaj sitiül merangrangayoots, müjchiüts majcüy nop alinop; aton ngo majneaj meyambayoots ombasaats.

## 6

### *Netam merembeolayon*

<sup>1</sup> Xecojow xechijquiaw, sitiül aljane majaraw wüx arang ngo majneaj, icona leawa xowüy ipacan wüx iyariün andeac Teat Cristo netam meyamban nguineay meajchiün majaw cuane ngo majneaj teamarang, nde mejcüyiün mequiüjpan. Netam mejawan wüx, nde merangrangayon wüx mepiungan icona najneaj irangan, nğanandot alndom wüx imalan icona mejiüran naél.

<sup>2</sup> Netam membeolan nop alinop wüx aljane ajiür naél, cos sitiül apmembeolan alinop, quiaj irangan leaw andiüm Teat Cristo.

<sup>3</sup> Sitiül aljane ayaag nej alwüx ajaw matnej alinop, nicuajind nej, aag ayaj nejáyan quiaj teawajchay.

<sup>4</sup> Meáwan anopnop ich mayamb omeaats wüx majaw nguineay arang, quiaj alndom mapac omeaats nejáyan quiaj, ngo metam mayambayamb nguineay arang alinop.

<sup>5</sup> Cos meáwan anopnopoots netam mayaj-caats áagan asoetiüts.

<sup>6</sup> Leawa naquiaacharanüw wüx Mípoche Teat Dios, nejiw netam mambeolüw wüx cuajantanej ajcüwa monquiaach nejiw.

<sup>7</sup> Nde merwaiichayon icoyónan quiaj, cos nejingüind ngondom mitsoj Teat Dios. Ajawaats atnej arang nop nepiür wüx apmatüch a nüt maxaing omeaats micorrül nej, apmaxaing leaw tapiür.

<sup>8</sup> Sitiül aljane arang andiüman nej, nejáyan quiaj apmendorjchay ombas. Pero jane arang leaw andiüm Nangaj Espiritu, Nangaj Espiritu apmüch mapac meáwan nüt tiül cielo.

<sup>9</sup> Nde paxiüm ocueajiiüts marangaats najneaj. Cos sitiül ngo paxiüm ocueajiiüts, wüx lamatüch a nüt apmüjndiiüts leaw axomaats wüx leaw tarangaats.

<sup>10</sup> Atquiaj wüx alndom, netam mayambaats nguineay mambeolaats jangantanej nipilan; pero leaw micojoots michijquiaats monyar andeac Teat Cristo, netam mambeolaats alwüx quiriw.

#### *Andondoch atepeay*

<sup>11</sup> Ijawan nganüy nguitoptop adam a poch. Aag agüy xiquiay sarang naag xiwix nüüch icon.

<sup>12</sup> Ajcüw leawa andiümüw majlüyiw najnéajan maquiüjpüw nipilan judío, ajcüw ayaj mondiüm mayacüw icon wüx merangan aaga circuncisión quiaj, nganandot mayambüch ombasüw cos áag andüjpiw Teat Cristo leawa tandeow wüx cruz.

<sup>13</sup> Nejiw ajcüwa monjiür circuncisión quiaj, ngo marangüw meáwan leaw apiüng tiül a poch tüünd Moisés; nejiw andiümüw mejiüran circuncisión para merangrangayej wüx mapiüngüw icona aton almejoiüün aag ayaj wüx imbasan.

<sup>14</sup> Pero xique ngo nandiüm nerangrangüy wüx nicuajind. Leaw sandiüm, aag ayaj mapac ximeaats wüx Teat Cristo cos tandeow wüx cruz mawün asoetiiüts. Cos atquiaj tajlüy, pares nganüy lango metam xic meáwan ngo majneaj leaw arang nipilan wüx iüt, at nejiw lango metam nejiw xic.

<sup>15</sup> Cos sitiül ajlüyüts nóiquian wüx Teat Cristo Jesús, lango membeat sitiül ajiüraats circuncisión tengwüy ngwüy. Pero leaw nembeat aag ayaj macueatiiüts meáwan ngo majneaj, marangaats leaw najneaj.

<sup>16</sup> Meáwan icona leaw irangan atquiaj, ich müüch icon Teat Dios xeyay monajneaj, majiür icon lasta, at meáwan nipilan judío leaw naleaing ayariw andeac Teat Dios, cos nejiw aton micambaj Teat Dios.

<sup>17</sup> Pero naw ningüy andüy ningüün nde mayac xic wüx naél nejingüind. Cos ajcüwa ndooch alwüx ximbas, aag ayaj ajüiquich

xique nop xic nerang minajiüt Teat Jesús, cos wüx sarang minajiüt nej saxom aag ayaj.

<sup>18</sup> Xecojow xechijquiaw, tanaámb ich mambeol icon Miteatiiüts Jesucristo. Amén.

**Noic nanderac tarang wüx  
nawiig San Pablo müüch  
minipilan Teat Cristo moncül  
tiül Efeso  
EFESIOS**

*Pablo atepeay minipilan Teat Cristo tiül Efeso*

<sup>1</sup> Xique Pablo miapóstol Teat Jesucristo, cos Teat Dios andiüm. Xique sarang aaga nawiig cam nüjchiw monyar andeac Teat Jesucristo monlüy tiül cambaj Efeso, leaw tanaám ngo macueatiw nej.

<sup>2</sup> Tanaám ich mambeol icon Miteatiiüts Dios at Teat Jesucristo müüch icon mejiüran monajneaj.

*Teat Dios lamüüch icoots mimonajneaj Teat Cristo*

<sup>3</sup> Najneajay ajlüy Teat Dios miteat Miteatiiüts Jesucristo, cos lamüüch icootsa majlüyüüts nóiquian maquiüjpaats Teat Cristo. Lamüüch majiüraats meáwan najneaj leaw üüch Nangaj Espiritu ocueaj Teat Dios cos ayariiüts andeac Teat Cristo; lamüüch majneaj omeajtsaats najneajay atnej wüx apmajlüyüüts tiül cielo.

<sup>4</sup> Cos Teat Dios tarriiüd icoots wüx nganaw majlüy a iüt cam, para alndom majlüyüüts najneajay, ngo majiüraats nicuajind nisoet.

<sup>5</sup> Teat Dios tajneaj majaw icoots, pares tarriiüd icoots wüx nganaw wijquiamoots, majlüyüüts atnej micual nej por Teat Jesucristo, cos atquiaj tandiüm marang.

<sup>6</sup> Pares tanaám apmandeacaats najneajay tarang Teat Dios wüx icoots, cos ajlüyüüts nóiquian maquiüjpaats Micual nej, aag xowüy andiüm.

<sup>7</sup> Nganüy por micual nej alndom mawaats wüx asoetiüts cos tajünch tiüt miquiej nej. Quiaj tarang xeyay najneaj wüx icoots; tawün wüx omeaats meáwan nisoet leaw tajiüraats.

<sup>8</sup> Lamajüiquich xeyay andiüm icoots cos tüüch icoots mendüyüüts, maxomaats omeajtsaats xeyay;

<sup>9</sup> at lamüüch icoots majawaats leaw nómban ngomeaag ajaraw, leaw tapiüng apmarang.

<sup>10</sup> Teat Dios lamapiüng wüx apmatüch a nüt meáwan apmajlüy atnej lamapiüng. Quiaj Teat Cristo apmajlüy wüx meáwan leaw almajlüy tiül cielo, at meáwan leaw almajlüy wüx a iüt cam.

<sup>11</sup> Nganüy ajlüyüüts nóiquian maquiüjpaats Teat Cristo, cos Teat Dios tarriiüd icoots wüx nganaw majlüyüüts, nguineay alndom müjndiüts leaw tapiüng apmüüch icoots.

Meáwan aag ayaj tajlüy atnej lamapiüng apmajlüy, cos arang meáwan atnej andiüm nej.

<sup>12</sup> Atquiaj tarang para meáwan icootsa leawa ombas majlüyüüts minipilan icoots Teat Cristo alndom marangaats najneaj, cos atquiaj nipilan apmapiüngüw najneajay tarang Teat Dios.

<sup>13</sup> At icona wüx tenguiayüün aaga poch leawa naleaing, at tenguiayüün nguineay alndom meriowan wüx isoetiün, teyariün andeac Teat Cristo. Quiaj Teat Dios tüüch icon Nangaj Miespíritu nej atnej lamapiüng, majüic minipilan nej icon.

<sup>14</sup> Aaga Nangaj Miespíritu nej quiaj, aag ayaj nejüiquich naleaing apmüjndiüts aaga lamapiüng apmüüch icoots, leaw apmatüch a nüt mawün wüx jane lamarriiüd, quiaj apmandeacüw najneajay arang Teat Dios.

*Pablo atün ocueaj Teat Dios mambeol montaag creer monaw Efeso*

<sup>15</sup> Nganüy xique aton, wüx tanguiayüüs nguineay icona ngo mechiwean imeajtsan wüx Teat Jesús, nguineay apac imeajtsan mejawan monyar andeac nej cos indiüman nop alinop,

<sup>16</sup> quiaj ngo nacueat nasaj Teat Dios najneajay arang cos lamambeol icon. Ajlüyay leaaw ximeaats icona wüx sataag orar.

<sup>17</sup> Satün ocueaj Teat Dios, Midos Miteatiiüts Jesucristo, aaga najneaj Nateataran najlüy tiül cielo, müüch icon merndüyüün mexoman imeajtsan nguineay amb apiüng, müüch icon mejawan ranüy jane nej.

<sup>18</sup> Aton satün ocueaj nej müüch ram imalan mejawan cuane aaga najneajay temecüliün apmejawan alinoic nüt, at mejawan cuane aaga najneajay nembeat leawa Teat Dios apmüüch meáwan monyar nej andeac.

<sup>19</sup> Átan satün mejawan nguineay Teat Dios alndom marang xeyay cuajantanej ngomeaag ajaraw, para mambeol meáwan monyar andeac nej. Nej cuajantanej alndom marang, ngo majiür ümb;

<sup>20</sup> atnej wüx tapacüüch alinomb Teat Cristo tiül mondeow, ndoj tüüch chetem amb wüx miác nej tiül cielo.

<sup>21</sup> Nganüy Teat Cristo lamarang natang tiül meáwan montangtang, tiül meáwan monjiür najiüt, tiül meáwan monlüy wüx alngün cambaj. Nejingüind alinop ngondom matüch ajneaj ajlüy, ngome ágan nganüy nüt cam, at meáwan nüt aliüc miün.

<sup>22</sup> Teat Dios tayac meáwan leaw almajlüy tiül owix Teat Cristo marang wüx leaw andiüm. At tüüch Teat Cristo majlüy natang wüx meáwan noicnoic ajlüy monyar andeac nej.

<sup>23</sup> Pues minipilan Teat Cristo ajlüyiw atnej micuerpo nej, y Teat Cristo ajlüy tiül nejiw

meáwan nüt para ndom majlüyiw palanüy, cos nej ajlüy nguajantanej, y aton ajlüy wüx cuajantanej leaw almajlüy.

## 2

*Teat Dios tawün icoots wüx asoetiüts cos ajüür icoots lasta*

<sup>1</sup> Teat Dios tapacüüch icon cos nomb tejlüyüün atnej lerndeowan tiül meáwan ngo majneaj leaw terangan, tiül meáwan nisoet.

<sup>2</sup> Aga nüt quiaj wüx icona aliün mendüjpiün meáwan ngo majneaj leawa narangüch ningüy wüx iüt, tendüjpiün leaw andiüm nimeech, aaga minatangüw meáwan jane ngo mandiüm marang leaw andiüm Teat Dios.

<sup>3</sup> Nomb icootsa aton tajlüyüüts tiül ajcüwa nipilan quiaj. Cos tarangaats ngo majneaj atnej tandiümaats; tarangaats leawa ngo majneaj aw tiül omeajtsaats. Icootsa aton netam majcüy majaw icoots Teat Dios atnej meáwan nipilan leaw ngo mayar andeac.

<sup>4</sup> Pero Teat Dios xeyay ajneaj omeaats, xeyay tandiüm icoots.

<sup>5</sup> Masey icootsa tajlüyüüts atnej landeowaats cos xeyay asoetiüts tajiüraats. Naleaing Teat Dios tajiür icoots lasta, tawün icoots wüx asoetiüts, tüüch icoots mapacaats nóiquian maquiüjpaats Teat Cristo.

<sup>6</sup> Teat Dios tapacüüch icoots tiül mondeow nóiquian maquiüjpaats Teat Cristo, átan tüüch icoots chetemoos tiül cielo nóiquian maquiüjpaats Teat Cristo Jesús.

<sup>7</sup> Atquiaj tarang Teat Dios para müüch majaraw alinoic nüt nej lamambeol icoots xeyay, at najneaj omeaats majaw icoots cos ajlüyüüts nóiquian maquiüjpaats Teat Cristo Jesús.

<sup>8</sup> Teat Dios xeyay andiüm icoots, pares tawün icoots wüx asoetiüts, aag ayaj cos ayacaats omeajtsaats wüx nej, ngome alcuane najneaj tarangaats. Aag ayaj mimonajneaj Teat Dios üjndiütsan.

<sup>9</sup> Atquiaj nejingund ngondom merangrangüw wüx, cos aag ayaj ngome por arangaats najneaj.

<sup>10</sup> Teat Dios tarang icoots atnej nganüy ajlüyüüts, ndoj tayac icoots nóiquian maquiüjpaats Teat Cristo para marangaats najneaj atnej lamapiüng.

*Teat Cristo neech majlüyüüts najneájan*

<sup>11</sup> Icona netam leaam imeajtsan jane icon, nguineay tejlüyüün nomb. Cos ngome nipilan judío icon, at ngo mejlüyüün circuncidado; pares tesoiqüiün ngome circuncidado icon. Atquiaj tasajüw icon leaw monlüy circuncidado, pero naleaing nejw arangüw aag ayaj wüxan a cuerpo.

<sup>12</sup> Tiül aaga nüt quiaj, icona ngome tejlüyüün nóiquian mequiüjpan Teat Cristo,

at aton ngo mejlüyüün tiül micualw micualw Israel. Pares ngo mejlüyüün tiül aaga najneajay leawa Teat Dios tapiüng apmarang wüx nipilan judío. Ngo mejawan nguineay apmeriowan wüx isoetiün, at ngo meyajcan jane Teat Dios.

<sup>13</sup> Nganüy ijlüyüün nóiquian mequiüjpan Teat Cristo Jesús, masey icona nomb tejlüyüün miünquiaj, cos ngo mejawan jane Teat Dios. Nganüy Teat Dios lamüüch icon metüchiün niüng ajlüy nej, cos Teat Cristo tandeow tajüch tiüt miqüej nej.

<sup>14</sup> Nganüy Teat Cristo lamüüch nipilan judío at nipilan ngome judío majlüyiw nóiquian, majlüyiw najneájan, lango majcüyiw mejawayej. Tawün aaga nepal noicnoic ajlüy nipilan quiaj.

<sup>15</sup> Teat Cristo wüx tandeow, tandarriich nómban aaga poch tüünd Moisés, maquiüüb meáwan leaw nipilan judío tapacüw wüx marangüw. Condom tüüch judíos y nipilan ngome judíos majlüyiw nóiquian maquiüjpüw nej, lango majcüyiw mejawayej.

<sup>16</sup> Wüx Teat Cristo tamb wüx cruz, quiaj tüüch majlüyiw najneájan miüjquiaw ajlüy palpáwüx nipilan. At tüüch majlüyiw nóiquian maquiüjpüw Teat Dios, majlüyiw atnej nop nejw.

<sup>17</sup> Teat Cristo tiün masaj meáwan nipilan nguineay alndom majlüyiw najneájan maquiüjpüw Teat Dios. Aag ayaj tasaj nipilan leaw aliw miünquiaj cos ngo mayambüw Teat Dios, ngo majawüw jane Teat Dios. At aton tasaj nipilan judío leawa ngo majlüyiw miünquiaj, cos ajawüw jane Teat Dios.

<sup>18</sup> Por leaw tarang Teat Cristo alndom matüchiüts niüng ajlüy Miteatiüts Dios, noic nej Nangaj Espíritu apmambeol icoots, masey nipilan judío masey nipilan ngome judío icoots.

<sup>19</sup> Nganüy icona leaw ngome judíos lango mejlüyüün atnej nerpeayüün miün nipilan, langome atnej nermongon miün; nganüy icona ijlüyüün tiül minipilan Teat Dios, lamequiüjpan tiül micualw Teat Dios.

<sup>20</sup> Icona at icon nop iüm witiow tiüt wüx piedra. Aaga piedra apiüng wüx leaw tapiüngüw apóstoles y mondeac andeac Teat Dios. Aaga piedra leaw üüch metotow iüm, aag ayaj apiüng wüx Teat Cristo.

<sup>21</sup> Wüx aaga piedra quiaj, leaw apiüng wüx Teat Cristo, imiün wüx witiow a iüm, meáwan nesooig najneajay ajlüy, andüy quiaj teadam najneajay, macül nangaj ocueaj Teat Dios.

<sup>22</sup> Atquiaj ijlüyüün aton nóiquian mequiüjpan Teat Cristo mejlüyüün nop iüm icon niüng acül Miespíritu Teat Dios.

## 3



*Teat Dios tayac a Pablo mandeac mipoch nej masaj nipilan ngome judío*

<sup>1</sup> Xique Pablo sajlüy tiül manchiüc ajcan saquiaach icon wüx Mipoch Teat Cristo, icona nipilan ngome israel.

<sup>2</sup> Xique sawaw lamenguiayüün nguineay Teat Dios tajiür xic lasta, cos tayac xic najlüy wüx nasaj icon wüx mimonajneaj Teat Cristo.

<sup>3</sup> Teat Dios tüüch xic najaw aaga leawa nejingüind nganaw majaw, nguineay lamapiüng apmarang, cos tasaj xic sanopüyan. Aag ayaj lanarang wüx nawüig quiriw nasaj icon.

<sup>4</sup> Wüx apmeteowan aag ayaj, quiaj apmejawan naleaing xique lanajaw nguineay apiüng Teat Cristo apmarang, aaga leawa nejingüind ngo majaw nomb.

<sup>5</sup> Aag ayaj tanomb ngo müjndiw nipilan majawüw. Nganüy Nangaj Espiritu ocueaj Teat Dios lamüüch majawüw aag ayaj mipóstoles nej, at mondeac andeac nej.

<sup>6</sup> Cos aaga leaw nejingüind nganaw majaw nomb quiaj, aag ayaj apiüng wüx nganüy masey nipilan ngome judío apmüjndiw aton majlüyiw minipilan Teat Dios; at apmajlüyiw nóiquian maquiüjpüw nipilan judío, noic ajlüy monyar andeac Teat Cristo. Aton nejiw apmüjndiw aaga leaw Teat Dios lamapiüng apmüüch nipilan judío, cos ayariw apiüng Teat Cristo leaw aldom mawün nejiw wüx asoetiw.

<sup>7</sup> Nejay Teat Dios tayac xic nandeac wüx aag ayaj, cos xeyay tajiür xic lasta. Aag ayaj tarangas cos Teat Dios tambeol xic.

<sup>8</sup> Masey xique sayaag ngo nembeat nicua-jind tiül meáwan minipilan Teat Dios, pero Teat Dios tambeol xic xeyay para nasaj nipilan ngome judío nguineay xowüy lajneaj tarang Teat Cristo, aag ngo majiür ümb.

<sup>9</sup> Teat Dios tasaj xic nüüch majawüw meáwan nipilan wüx aag lamapiüng apmarang, aag leawa nejingüind ngo majaw nomb; cos masey Teat Dios nerang meáwan leaw almajlüy, pero nomb ngo majüiquich nguineay apmarang.

<sup>10</sup> Atquiaj tajlüy nguineay ndom meáwan montangtang ángeles at monjiür najiüt monlüy tiül cielo, majawüw nguineay Teat Dios axom omeaats xeyay, wüx apmajawüw nguineay ajlüyiw najneajay meáwan minipilan Teat Cristo.

<sup>11</sup> Meáwan aag ayaj Teat Dios tarang, cos atquiaj lamapiüng tanomb apmarang. Meáwan aag ayaj tajlüy wüx Teat Cristo Jesús tiün mandeow.

<sup>12</sup> Nganüy cos ayariiüts andeac Teat Cristo, quiaj aldom matüchiiüts niüng ajlüy Teat Dios ngo mimbolaats.

<sup>13</sup> Áag sasaj icon nde paxiüm icueajiün masey mejawan samongoch xeyay ngo ma-

jneaj wüx icona, cos wüx aag ayaj ambeol icon mejlüyüün najneaj.

*Teat Cristo xeyay andiüm icoots*

<sup>14</sup> Wüx aag ayaj xique saquieel xecos teombas Miteatiüts Dios, Miteat Miteatiüts Jesucristo,

<sup>15</sup> cos xeyay netam ajlüy, majawüw nej micual nej monlüy tiül cielo at monlüy ningüy wüx iüt, cos Teat Dios miteat meáwan nipilan.

<sup>16</sup> Satün ocueaj Teat Dios müüch icon Nangaj Miespíritu nej para mejiüran meáwan mimonajneaj nej, mepacan wüx merangan cuajantanej andiüm nej.

<sup>17</sup> At aton satün ocueaj Teat Dios nguineay aldom macül tiül imeajtsan Teat Cristo cos iyariün andeac nej, mejiürayon lasta meáwan nüt.

<sup>18</sup> Satün mexoman imeajtsan tiül aag ayaj, mejawan mequiüjpan meáwan monyar andeac nej nguitow adam tiüt mimonajneaj Teat Dios, nguitow ajal tiüt, nguitow ajmiüc tiüt, nguitow ajtep andüy cawüx xeyay ajjiür icoots lasta Teat Cristo.

<sup>19</sup> Satün mejawan nguineay andiüm icoots Teat Cristo, masey ngondom maya-jcaats nguitow axeyay andiümaranaats. Satün majlüy tiül imeajtsan Teat Dios.

<sup>20</sup> Nganüy xeyay netam mayambaats Teat Dios; nej aldom marang xeyay cuajantanej, meáwan leaw icootsa apmatüniüts. Nej apmayac más xeyay, masey icootsa ngo maxomaats omeajtsaats tiül. Nej apmambeol icoots marangaats cuajantanej.

<sup>21</sup> Néjan quiaj netam manderac najneajay wüx ombas nej meáwan monyar andeac Teat Cristo meáwan nüt ngo majiür ümb. Amén.

## 4

*Nangaj Espiritu ocueaj Teat Dios üüch majlüyüüts nóiquian*

<sup>1</sup> Xique sal tiül manchiüc cos sarang minajiüt Teat Jesús. Satün icueajiün merangan atnej netam marang meáwan leawa Teat Dios lamapaj, cos tayamb icon.

<sup>2</sup> Nde merangrangayon mepiüangan alwüx ijawan ngo matnej alinop. Netam mejiüran najneaj imeajtsan; netam meüücan wüx cuajantanej, inguiayüün andeac nop alinop con najneajay imeajtsan.

<sup>3</sup> Netam meyamban nguineay mejlüyüün nóiquian, cos Nangaj Espiritu ocueaj Teat Dios andiüm mambeol icon mejiüran monajneaj.

<sup>4</sup> Meáwan monyar andeac Teat Dios ajlüy atnej majlüy noic cuerpo, y noic Nangaj Espiritu almejiüran. At meáwan icona temecüliün aaga najneajay apmejawan alinoic nüt.

<sup>5</sup> Átan nop Teat Cristo almajlüy, at nop ayariiüts andeac nej, y noic ayarich yow.

<sup>6</sup> Áagan nop Dios almajlüy, aag ayaj miteat meáwan monyar andeac Teat Cristo. Nej ajlüy wüx meáwan monyar nej andeac, tanaám almaquiüüb nej.

<sup>7</sup> Pero meáwan anopnoots tündiiüts leaw alndom marangaats, atnej Teat Cristo lamajaw alndom marangaats.

<sup>8</sup> Pares, tiül Mipoch Teat Dios atcüy apiüing:

Teat Cristo wüx tamb andüy cawüx, taquiüüb mamb andüy tiül cielo jane ndeajnoj,

nej tüüch nopnop nipilan leaw ndoj ombas marang.

<sup>9</sup> Aaga tamb andüy cawüx quiaj, ¿cuane apiüing wüx aag ayaja? Aag ayaj apiüing wüx nej ombas tamb tiüt tiül iüt (Hades).

<sup>10</sup> Aaga leawa tamb tiüt tiül iüt quiaj, nej jay tamb andüy cawüx tiül meáwan cielo; nganüy nej almajlüy nguiajantanej.

<sup>11</sup> Teat Cristo tüüch nipilan leaw alndom marangüw. Nej tayac acas apóstoles, aton tayac acas mondeac andeac Teat Dios, at tayac acas mondeac masajüw nipilan nguineay alndom mawüw wüx asoetiw. Aton tayac acas pastor, at monquiaach tiül minipilan nej.

<sup>12</sup> Atquiaj tarang Teat Cristo, tüüch marangüw minajiüt nej meáwan monyar nej andeac, para müüch matangüw wüx nej.

<sup>13</sup> Atquiaj netam majlüy, leaw apmajlüyüüts nóiquian wüx ayariiüts andeac nej, at najawaats meáwan nguineay ajlüy Micual Teat Dios. Quiaj apmajlüyüüts atnej nop natang nipilan; apmatüchiiüts majlüyüüts más atnej ajlüy Teat Cristo.

<sup>14</sup> Quiaj langome apmajlüyüüts at icoots nop nine, leaw najénan apmayar cuajantanej asoic, camüm najénan apmbiüjlam wüx mayar leaw apmaquiaach nej nipilan monxom omeaats nguineay mawaiich, maquiaach nej leaw ngo maleaing.

<sup>15</sup> Icootsa tanaám netam mandüjpiiüts leawa naleaing, mejiürayoots lasta. At netam mayambaats nguineay alndom majlüyüüts atnej ajlüy Teat Cristo, cos nej natang, y ajlüy atnej ajlüy omalaran ocueaj cuerpo.

<sup>16</sup> Aaga cuerpo quiaj apiüing wüx meáwan monyar andeac nej cos cuerpo ajlüy nóiquian, ajiür niüing asapüy para alndom membeolüy, meáwan anoicnoic ajiür cuane marang. Wüx meáwan arang najiüt najneaj, quiaj apmatang. At icootsa aton wüx apmajlüyüüts najneajan apmejiürayoots lasta.

*Nganüy alinoic ajlüyüüts*

<sup>17</sup> Nganüy sanasaj icon wüx minüt Teat Cristo nguineay netam merangan. Pero nde

merangan atnej arangüw nipilan leaw ngo mandüjpiw Teat Dios, cos nejw palüyan ngo majneaj alwüx omeajtsüw.

<sup>18</sup> Ajlüyiw atnej aliw tiül pojniün, ngo ram omalüw; Teat Dios ngo müüch nejw mapacüw. Nadam omeajtsüw cos ngo mandüümüw majawüw nguineay apiüing Teat Dios marangüch.

<sup>19</sup> Ajcüw ayaj lango mayajcüw sitiül ngo majneaj teamarangüw, cos nómban lambiüjlaw wüx, palüyan arangüw ngo majneaj leaw andüümüw.

<sup>20</sup> Icona ngo matquiaj tequiaacharanan wüx Teat Cristo,

<sup>21</sup> sitiül ndot tenguiayüün naleaing wüx nej, atnej aquiajchiw monrang minajiüt nej, cos meáwan aag ayaj naleaing.

<sup>22</sup> Netam mecueatiün meáwan leaw ngo majneaj terangan nomb, cos aag ayaj andüy wüx apmandrooch imbasan.

<sup>23</sup> Ingowüchiiün ijchan majlüy jayats meáwan leaw alwüx imeajtsan, leaw altiül imalan aton.

<sup>24</sup> Netam mejlüyüün atnej nop jayats nipilan, arang nej Teat Dios; cos apmarang palan, apmajlüy najneaj atnej Teat Dios andüüm.

<sup>25</sup> Pares nganüy netam mecueatiün iwaijchan, netam mendeacan áagan naleaing mequiüjpan nop alinop, cos nóiquian ajlüyüüts.

<sup>26</sup> Wüx apmejcüyüün nde meyacan wüx imeajtsan pal nüt, cos alndom mayac icon wüx nisoet.

<sup>27</sup> Nde merangan leaw andüüm nimeech.

<sup>28</sup> Sitiül aljane teneed, ich macueat, nde mandüy wüx marang; ich marang najiüt para majiür cuane apmüüch nop ngo majiür.

<sup>29</sup> At nde mendeacan ngo majneaj poch, indeacan leaw najneaj, leaw netam, cos atquiaj alndom meajchiün mapac omeajtsüw mandüjpiw Teat Dios. Apmembeolan meáwan leaw apmanguaiyiw indeacan.

<sup>30</sup> Nde merangan ngo majneaj meajchiün mamix omeaats Nangaj Espiritu ocueaj Teat Dios, cos nej ajüiquich micual Teat Dios icon, leaw atüch a nüt mejiüran jayats micuerpojan.

<sup>31</sup> Icueatiün ipatan, nde mejcüyüün, nde merpajpajan mendeacan ngo majneaj, nde merpajchan, nde mendeacan ngo majneaj wüx ombas alinop.

<sup>32</sup> Ich majneaj imeajtsan mequiüjpan nop alinop, merjiürayon lasta; iwüniün wüx imeajtsan aaga ngo majneaj tarang alinop, atnej Teat Cristo tawün wüx omeaats isoetiün.

## 5

*Nguineay netam majlüyiw micual Teat Dios*

<sup>1</sup> Nganüy cos icona micual icon Teat Dios, netam merangan atnej arang nej.

<sup>2</sup> Netam merjiürayon lasta atnej Teat Cristo ajiür icoots lasta, cos ngo menojteay wüx tandiümüw mambiyaw nej; tandiüm marang nichech mawün asoetiüts. Aaga nichech quiaj xeyay najneaj majaw Teat Dios.

<sup>3</sup> Cos icona micual icon Teat Dios, pares monxey ngondom majiürüw minajtajüw nejiw, at montaj ngondom majiürüw minaxeyiw nejiw. Átan ngondom majlüy tiül micual Teat Dios cuajantanej ngo majnej arangüch, at meáwan nerreech, nendiümdüüm ocueaj alinop.

<sup>4</sup> Nde mendeacan ngo majneaj wüx ombas alinop mereechayon monxing. Nde mendeacan cuajantanej ngo metam mendeacan; nde mertsoj alinop. Meáwan aag ayaj ngo metam; leaw netam aag ayaj meajchiün gracias Teat Dios, mesajan najneaj arang.

<sup>5</sup> Cos icona netam mejawan sitiül aljane ajiür minajtaj nej tengwüy minaxey nej, at meáwan nerang ngo majneaj atquiaj; aton leawa nendiümdüüman tomiün atnej lamayac marang midios nej a tomiün. Ajcüw ayaj ngome apmajmeliw tiül micambaj Teat Dios maquiüüb Teat Cristo.

<sup>6</sup> Nde mawaiich icon nejingüind wüx aaga ngo majneaj quiaj, masajüw icon najneaj merangan aag ayaj. Cos imiün wüx aaga ngo majneaj quiaj, Teat Dios xeyay apmajcüy majaw jane ngo mayar nej andeac.

<sup>7</sup> Icona nde mequiüjpan tiül.

<sup>8</sup> Cos nomb tejlüyiün atnej ilean tiül pojniün, ajcan terangan ngo majneaj, nganüy atnej ilean tiül ran, cos ijlüyiün nóiquian mequiüjpan Teat Cristo. Netam merangan najneaj cos micual Teat Dios icon.

<sup>9</sup> Leawa micual Teat Dios, aag ayaj ambeol alinop, andeac naleaing, arang najneaj.

<sup>10</sup> Iyamban cuane najneaj merangan atnej Teat Dios andiüm.

<sup>11</sup> Nde mequiüjpan tiül ajcüwa monrang ngo majneaj quiaj, cos ajlüyiw atnej aliw tiül pojniün. Icona netam mesajan macueatiw arangüw ngo majneaj.

<sup>12</sup> Naleaing monxing manderac wüx leawa nejiw arangüw axotayéjan.

<sup>13</sup> Mipoch Teat Dios ajlüy atnej ran; pares meáwan cuajantanej ngo majneaj narangüch, nej apmüüch majiüc.

<sup>14</sup> Wüx aag ayaj atcüy apiürang:

Ique leaw almemeay, ipac,

witiür tiül mondeow,

ndoj apmarraj ic Teat Cristo.

<sup>15</sup> Pares sasaj icon, ijawan nguineay netam merangan; nde merangan atnej nop

ngo majaw nicuajind, irangan atnej nop nendüy.

<sup>16</sup> At irangan najneaj wüxan aldom, masey tiül aaga nüt cam teajlüy xeyay ngo majneaj.

<sup>17</sup> Nde merangan atnej nop ngo majaw nicuajind, iyamban imeajtsan ijawan cuane andiüm Teat Cristo majaw merangan.

<sup>18</sup> Aton nde mengüniün, cos aag ayaj apmayac icon wüx merangan ngo majneaj. Ingow irangan aag ayaj, ijchan imeajtsan Nangaj Espiritu ocueaj Teat Dios mambeol icon.

<sup>19</sup> Indeacan mequiüjpan nop alinop wüx salmos, wüx himnos, wüx atajcüch cantar müünd Teat Dios. Icona itajcan cantar con imeajtsan; isajan najneajay arang Teat Dios.

<sup>20</sup> Meáwan nüt ijchan gracias Teat Dios wüx meáwan cuajantanej, wüx minüt Miteatiüts Jesucristo.

*Nguineay netam mejiürayej lasta tiül nden*

<sup>21</sup> Irangan con najneaj imeajtsan leaw atün icueajiün alinop, cos atquiaj apmajüic indüjpiün Teat Dios.

<sup>22</sup> Montaj ich mayariw andeac minojow nejiw, atnej ayariw andeac Teat Cristo.

<sup>23</sup> Cos nanojaran ajlüy minatang ocueaj mintaj nej atnej Teat Cristo ajlüy minatangüw monyar andeac nej, cos ajcüw ayaj atnej micuerpo nej, nej newün nejiw wüx.

<sup>24</sup> Cos monyar andeac Teat Cristo ajlüyiw nóiquian maquiüjpw Teat Cristo, pares nantajaran aton ich majiür noic nej omeaats maquiüüb minoj nej.

<sup>25</sup> At nanojaran ich majiür lasta mintaj nej, atnej Teat Cristo ajiür lasta monyar nej andeac, pares tiün mandeow ingow andeowüw.

<sup>26</sup> Nej tarang aag ayaj para majlüyiw pálwüx monyar andeac nej, ndoj müüch nejiw majneaj ajlüyiw atnej ajants nejiw naag yow, cos lamayariw mipoch nej.

<sup>27</sup> Atquiaj tarang Teat Cristo para majiür noic ajlüy minipilan nej najneajay, ngo manchom nejiw nicuajind nisoet, majlüy najneajay, ngo majlüy cuane wüx manderac ngo majneaj wüx ombasüw nejiw.

<sup>28</sup> Atquiaj nanojaran netam majiür lasta mintaj nej, atnej mejiürüy lasta nejáyan quiaj. Leaw nejiür lasta mintaj nej, nejáyan quiaj ajiürüy lasta.

<sup>29</sup> Cos nejingüind ngo mandiüm marang ngo majneaj wüx micuerpo nej, ingow aag ayaj nej üüch meáwan leaw netam. Atquiaj Teat Cristo ajaw wüx monyar andeac nej.

<sup>30</sup> Cos icoots ajlüyüts atnej micuerpo Teat Cristo, atnej mionij nej atnej miolaats nej.

<sup>31</sup> Apiürang: “Wüx aag ayaj nop naxey apmacueat miteat nej, mimüm nej, apmaquiüüb mintaj nej majlüyw noic nej omeajtsüw”.

<sup>32</sup> Aag ayaj nejinguind ngo majaw nomb, pero xique teanasaj icon aag ayaj andüy wüx nguineay ajlüy Teat Cristo maquiüüb monyar nej andeac.

<sup>33</sup> At apiüng wüx nguineay inopnopen netam mejiüran lasta mintajan, atnej merjiürayon lasta icyónan quiaj. Aton montaj ich mayariw andeac minojow nejw.

## 6

<sup>1</sup> Nganüy icona nacualaranüw, iyariün andeacüw miteatiün mimüman, atnej andiüm Teat Dios; cos aag ayaj najneaj y netam merangan.

<sup>2</sup> Tiül aaga poch leaw Teat Dios ombas tayac, apiüng wüx nguineay apmajlüy nop sitiül apmarang atnej apiüng, cos atcüy apiüng: “Iyariün andeacüw miteatiün, mimüman;

<sup>3</sup> atquiaj alndom mejlüyiün najneajan, mejüran xeyay minütiün ningüy wüx iüt”.

<sup>4</sup> At icona nateataranüw, nde meajchiün majcüy micualan, itangüjchiün najneaj, ipajan ocueaj, iquajchiün wüx marangüw atnej andiüm Teat Cristo.

<sup>5</sup> At icona najon monrang minajiüt alinop, netam meyariün andeacüw moneay najiüt ningüy wüx a iüt cam; irangan leaw apmasajüw icon, iyacan wüx imeajtsan minajiütan majüc najneaj irangan, atnej merangan minajiüt Teat Cristo.

<sup>6</sup> Nde merangan najiüt áagan wüx tengual iarawan para mexoman monajneaj, ngwüy icona irangan najneaj mimonrang najiüt Teat Cristo, irangan con imeajtsan cos atquiaj andiüm Teat Dios.

<sup>7</sup> Aton irangan minajiütan wüx monajneaj. Iyacan imeajtsan wüx atnej temerangan minajiüt Teat Dios, ngome minajiüt nipilan.

<sup>8</sup> Cos lamejawan inopnopen meáwan najneaj temerangan ningüy, alinoic nüt Teat Dios apmüüch icon atanej. Masey najon monrang najiüt icon, masey nangüyeran monrang najiüt.

<sup>9</sup> At icona aton moneay najiüt, irangan najneaj wüx monrang minajiütan, nde meajchiün mamix omeajtsüw. Netam leaam imeajtsan jane minatangüw nejw, jane minatangan aton. Aag ayaj Teat Dios najlüy tiül cielo. Nej ngome amb wüx majaw jane nejüür, jane ngo majiür.

*Leaw nembeol monyar andeac Teat Dios*

<sup>10</sup> Xecojow xechijquiaw, nganüy sanasaj icon, iyamban Teat Cristo müüch icon mepacan wüx mipoch nej, cos alndom mambeol icon.

<sup>11</sup> Netam merangan meáwan leaw Teat Dios apiüng, ngana mawaiich icon nimeech. Cos sitiül irangan apiüng Teat Dios, quiaj apmejlüyiün atnej nöp soldado leaw asooig apix nej manchiüc ngana mambiy nej moncüy majaw nej tiül montsoj.

<sup>12</sup> Cos ngome teambiyayoots maquiüjpaats nipilan; nimeech teambiyayoots maquiüjpaats, ajcüw monrang xeyay ngo majneaj, ajcüw monlüy nquiajantanej wüx iüt at tiül cielo. Ajcüwa nimeech arangüw leaw andiüm minatang nimeech najlüy tiül pojniün najlüy aaga nüt cam.

<sup>13</sup> Netam merangan meáwan leawa Teat Dios lamapiüng, cos atquiaj alndom meiücan wüx cuajantanej wüx nüt apmandiüm mayac icon tiül naél minatang nimeech. Condom wüx landoj memongochiün meáwan aag ayaj, quiaj apmeyacan nejinguind ngondom müüch icon mecueatiün Teat Dios.

<sup>14</sup> Tanaámb nde mecueatiün indüjpiün Teat Dios. Netam mesapayon nandand atnej arang nop soldado wüx ajlüy tiül montsoj. Tanaámb irangan najneaj, ideacan naleaing, cos aag ayaj atnej nop soldado asooig noic camix manchiüc para mambeol nej tiül montsoj.

<sup>15</sup> Itaagayon majneaj cos netam meamban najénan mesajan nipilan nguineay lamarang Teat Cristo para müüch nejw mimonajneaj nej. Irangan atnej arang soldado wüx asooig apaj nej mamb nguiajantanej.

<sup>16</sup> Netam meyacan imeajtsan wüx Teat Dios mambeol icon, ngana merangan leawa nimeech apmayac icon wüx mendüüman merangan; cos wüx apmeyacan imeajtsan wüx Teat Dios nej apmambeol icon atnej ambeol soldado aaga nengoch nitil, ngana malood nej nitil wüx apmatileran.

<sup>17</sup> At aton iyacan imeajtsan wüx nguineay Teat Dios lamawün icon wüx isoetiün. Cos aag ayaj apmambeol icon, atnej nop soldado ambeol nej aaga sombrer manchiüc amooq wüx omal. At iyacan wüx imeajtsan leawa Teat Dios lamapiüng tiül Mipoch nej, quiaj aaga Nangaj Espiritu apmambeol icon atnej nop soldado ambeol nej miespada nej tiül montsoj.

<sup>18</sup> Icona netam metajcan orar, metüniün ocueaj Teat Dios meáwan nüt, cos atquiaj andiüm Nangaj Espiritu. Ipacan wüx, nde paxiüm icueajiün; netam tanaámb metüniün ocueaj Teat Dios mambeol meáwan monyar andeac nej.

<sup>19</sup> At aton itüniün mambeol xic Teat Dios, müüch xic a poch netam nandac, nde nimbol wüx sandeac manguiayiw meáwan nipilan nguineay alndom maw asoetiw nejw. Cos aag ayaj Teat Cristo tarang y nejinguind ngo manguiay wüx aag ayaj nomb.

<sup>20</sup> Teat Dios tayac xic nasaj nipilan aaga poch cam, pares sal tiül manchiüc nganü. Itüniün nguineay alndom nandeac ngo nimbol atnej netam nandeac.

*Ndójuix atepeay*

<sup>21</sup> Teat Tíquico apmasaj icon menguiayiün cuane teanarang, nguineay teanamongoch. Nop nej najneaj nerang minajiüt Teat Cristo, xowüy sajiür lasta.

<sup>22</sup> Xique tujchiüs mamb niüng ijlyüün menguiayiün cuane sarangan, aton cos apmüüch icon mapac imeajtsan.

<sup>23</sup> Miteatiiüts Teat Dios at Teat Jesucristo müüch monajneaj meáwan monyar nej andeac, at mejiürayej lasta, nde machiweaw omeajtsüw.

<sup>24</sup> Teat Dios tanaámb mambeol meáwan leawa andiümüw Miteatiiüts Jesucristo con omeajtsüw, para ngo macueatiw mandiümüw nej. Amén.

## Noic nanderac tarang San Pablo müüch minipilan Teat Cristo moncül tiül Filipos FILIPENSES

*Altiül manchiüc Teat Pablo, atepeay ne-  
jiw*

<sup>1</sup> Xique Pablo naquiüb Timoteo, sarangan najiüt ocueaj Teat Jesucristo, satepeayiün meáwan minipilan Teat Cristo Jesús moncül tiül cambaj Filipos. At satepeayiün meáwan montangtang monajiüt y diáconos tiül minipilan Teat Cristo.

<sup>2</sup> Tanaámb ich mambeol icon Miteatiüts Dios at Teat Jesucristo müüch icon mejiüran monajneaj.

*Pablo ataag orar wüx minipilan Teat Cristo*

<sup>3</sup> Xique süüch gracias Teat Dios wüx leaaw ximeaats icon.

<sup>4</sup> At meáwan nüt wüx sasaj Teat Dios wüx icona, núngan apac ximeaats xeyay.

<sup>5</sup> Cos naw wüx aaga nüt tamelichaats marangaats najiüt nóiquian masajaats nipi-lan mayariw andeac Teat Cristo;

<sup>6</sup> sawaw naleaing Teat Dios nembeol icon meyariün andeac nej. Nej aton tanaámb apmambeol icon wüx aaga najneaj najiüt, leaw atüch a nüt mandilil Teat Jesucristo.

<sup>7</sup> Xique apac ximeaats wüx icona, sajiür icon lasta xeyay. Teat Dios ambeol meáwan icoots majlüyiiüts nóiquian, masey wüx sal tiül manchiüc, tengwüy wüx sajlüy nüñg ajlüy monajiüt, alndom napiüñg nguineay xique saquiaach nipilan aaga Najneajay Nanderac wüx Teat Cristo.

<sup>8</sup> Teat Dios ajaw xique xeyay sajiür icon lasta atnej xeyay ajiür icon lasta Teat Jesu-cristo.

<sup>9</sup> At satün ocueaj Teat Dios wüx icona, merjiürayon lasta xeyay. At satün mexo-man imeajtsan wüx cuajantanej, mejawan nguineay netam merangan.

<sup>10</sup> Cos netam merriüjtan cuane najneaj, quiaj apmejlüyiün najneajay, ngo majlüy cuane apmesoiquian wüx nüt apmandilil Teat Cristo.

<sup>11</sup> Teat Cristo apmüüch icon merangan cuajantanej najneaj. Wüx aag ayaj Teat Dios apmarangüch casa, apmaderac wüx nej xeyay najneaj.

*Wüxan salnapac sanarang atnej andiüm Teat Cristo*

<sup>12</sup> Xecojow xechijquaw, sandiüm men-guiayiün meáwan leawa samongoch, cos wüx aag ayaj naleaing xeyay teanderac wüx nguineay Teat Cristo awün asoet nipilan.

<sup>13</sup> Meáwan soldados leaw ajlüyiw ningüy, at pálwüx nipilan, lamanguiayiw xique sal tiül manchiüc cos sandüüb Teat Cristo.

<sup>14</sup> Cos sal ningüy tiül manchiüc, pares xeyay minipilan Teat Cristo ngo mimboloj, ngo maxinguiaw mandeacüw wüx nej nganüy.

<sup>15</sup> Altiül monquiaach wüx Teat Cristo nind ajcüyiw majawüw xic cos andiümüw mal-ombaranüw. Masey, cos álan tiül nejw asajüw nipilan wüx Teat Cristo con omea-jtsüw, ngome aleaic ambüw wüx.

<sup>16</sup> Naleaing ajcüwa leaw mondiüm man-derac najneaj wüx ombasüw, ajcüw ayaj arangüw wüx omeajtsüw, cos andiümüw müjchiw mamix ximeaats wüx nganüy sal tiül manchiüc cam.

<sup>17</sup> Masey, cos alacas andeacüw wüx Teat Cristo nde ajneaj majawüw xic, ajawüw Teat Dios neyac xic nasaj nipilan nguineay lamawün asoetiüts Teat Cristo.

<sup>18</sup> ¿Jow nganüy cuane ajiür aag ayaja? Masey altiül andeacüw con omeajtsüw wüx Teat Cristo, altiül ngwüy. Naleaing Teat Cristo tanaámb teanderac wüx nej; aag ayaj üüch mapac ximeaats.

<sup>19</sup> Apac ximeaats xeyay cos sawaw wüx ita-jcan orar, quiaj aaga Nangaj Espiritu ocueaj Teat Dios leaw Teat Jesucristo tüüch miün, nej apmambeol xic namongoch najneajay leawa naél sal wüx cam.

<sup>20</sup> Xique nganüy leawa teanandiüm, malüy ngo naxing wüx nicuajind leaw teanarang, nandeac najneajay leaw netam nandeac nde nganüy cam, at meáwan nüt alndom marangüch casa Teat Cristo, masey nganüy wüx salnapac, tengwüy alinoic nüt wüx lasandeow.

<sup>21</sup> Wüxan salnapac sandiüm narang meáwan leaw andiüm Teat Cristo; at wüx sanandeow, quiaj más najneajay sanajlüy.

<sup>22</sup> Masey sitiül tealeámban aliün napac, quiaj alndom narang najiüt leaw andiüm Teat Dios; pues ngo najaw ngün sanarriüü.

<sup>23</sup> Xique ngo najaw ngün más najneaj, Cos noic sandiüm nandeow namb naquiüb Teat Cristo, aag ayaj najntsop ajneaj najaw a xique.

<sup>24</sup> Alinoic aton leaw netam icon xeyay, aag ayaj malüy ngo nandeow, nacül ningüy wüx iüt tanaámb nambeol icon.

<sup>25</sup> Pares sawaw naleaing sanacül ningüy wüx iüt alacas nüt naquiüb icon, para nam-beol icon metangan wüx Teat Cristo, nüüch mapac imeajtsan xeyay wüx indüjpiün nej.

<sup>26</sup> Sapiüñg apmapac imeajtsan xeyay wüx sanajlüy naquiüb icon alinomb. Quiaj ap-merangan casa Teat Cristo, cos lamambeol xic.

<sup>27</sup> Nganüy aag agüy sandiüm nasaj icon: netam meyamban nguineay alndom mejlüyiün atnej apiüñg aaga najneaj

nanderac wux Teat Cristo. Masey sanamb najaw icon, tengwüy ngo namb, xique sandiüm nanguiay icona tan iriümban mejlüyiün nöiquian wux merangan leaw andiüm Nangaj Espiritu; tanaamb mendüjpiün nöiquian wux aaga leaw lameajndiün meyajcan tiül imeajtsan, wux tenguiayiün nguineay alndom meriowan wux isoetiün.

<sup>28</sup> Nde mermbolan mendüyiün jane ajcüyiw majawwü icon, cos aaga leaw arangwü quiaj ajüiquich apmambwü tiül castigo alinoic nüt. Pero icona leriowan wux isoetiün, ngome apmeamban tiül aaga xeyay ngo majneaj quiaj. Atquiaj apmarang Teat Dios.

<sup>29</sup> Naleaing icona ngome áagan meyariün andeac Teat Cristo, at netam memongochiün ngo majneaj wux minüt nej.

<sup>30</sup> Tanaamb tenguiay memongochiün atnej tamongochiüs wux tajlüyiüs niüng ijlüyiün; nganüy aton temenguiayiün nguineay teanamongoch.

## 2

*Teat Cristo tajüic atnej ngo membeat, ndöjwix tembeat*

<sup>1</sup> Teat Cristo üüch icon mbixiüm imeajtsan; nej ambeol icon üüch majneaj imeajtsan cos andiüm icon; aton Nangaj Espiritu üüch icon mejlüyiün nöiquian. Lamejawan nguineay mimonajneaj Teat Cristo cos ajüür icon lasta.

<sup>2</sup> Pares netam meajchiün mapac ximeeats. Atquiaj apmajlüy sitiül apmejlüyiün noic nej imeajtsan merjiüran monajneaj nop alinop, aton mejlüyiün nöiquian wux cuajantanej.

<sup>3</sup> Wux irangan cuajantanej, nde merangan para mexoman wux alcuane, tengwüy merangrayon wux; ngwüy irangan najneaj, nde merlomboochayon wux. Meáwan inopnophon ich mayaag nej ngome alwüx atam.

<sup>4</sup> Nejingund nde mayamb wüxan nej majlüy najneaj, ngwüy ich mayamb aton nguineay alndom meáwan majlüyiw najneaj.

<sup>5</sup> Netam meyajcan tiül imeajtsan atnej Teat Cristo aton tayaag tiül omeaats nej.

<sup>6</sup> Masey Dios nej, ngome tapac wux mapiüng nej ngondom masüüd macueat majlüy atnej ajlüy Teat Dios.

<sup>7</sup> Tacueat meáwan leaw tajiür tiül cielo; tiün majlüy atnej nop nerang minajiüt nipilan wux tiün wijquiam wux iüt cam marang nipilan.

<sup>8</sup> Wux tajlüy atnej nipilan, nej ngome telombojchay; tarang najneaj atnej andiüm Teat Dios; tiün mandeow wux cruz, masey xeyay monxing tamongoch.

<sup>9</sup> Pares Teat Dios tüüch nej majlüy más natang wux meáwan leaw almajlüy, meáwan montangtang monajiüt tanguerjriw omalwü teombas nej; at tüüch nej minüt nej najneaj tiül meáwan minüteran leaw almajlüy.

<sup>10</sup> Cos wüxan apmanguiayiw minüt Teat Jesús apmaqueijliw micoswü nejiw marangwü casa minüt nej meáwan monlüy tiül cielo, meáwan monlüy wux iüt, at meáwan ajcüw aliw tiüt landeowwü.

<sup>11</sup> Quiaj meáwan nipilan apmapiüngwü Teat Jesucristo natang tiül meáwan almajlüy, quiaj apmarangüch casa Teat Dios.

*Minipilan Teat Cristo ajlüyiw atnej ran ningüy wux iüt*

<sup>12</sup> Nganüy xecojow xechijquiaw, tilüy nüt tilüy ores wux sal ninguiay naquiüüb icon, terangan najneaj atnej tasajas icon. Nganüy wux lango najlüy cos sal miünquiaj, sandiüm najaw merangan alwüx alquiriw. Netam mejawan wux, nde tegüy ndrom imeajtsan nguineay laaw isoetiün.

<sup>13</sup> Cos Teat Dios ambeol icon meáwan nüt, nej üüch mendüüman merangan najneaj atnej andiüm nej.

<sup>14</sup> Meáwan leaw irangan, irangan najneaj, ngo metam majlüy wux mondeac, tengwüy moncüy.

<sup>15</sup> Quiaj nejingund ngondom mapiüng ngo merangan palan. Netam merangan najneaj, cos icona mical icon Teat Dios masey ijlüyiün tiül nipilan monrang ngo majneaj. Quiaj alndom majüic at icon ran para membeolan meáwan nipilan wux aaga iüt cam,

<sup>16</sup> mesajan wux meáwan nipilan nguineay alndom mawwü wux asoetiw. Wux aag ayaj apmapac ximeeats xeyay wux nüt aliüc Teat Cristo, cos quiaj apmajüic ngome tembichayos miün sapac, aton ngome tarangrangas miün najiüt tiül icona.

<sup>17</sup> Masey netam maw xequej nandeow nambich napalüch erchechiün, meajchiün Teat Dios ajcan lanambeol icon menguiayiün andeac nej. Wux aag ayaj ngo mamix ximeeats, apac ximeeats nöiquian naquiüüb icon.

<sup>18</sup> At aton icona ich mapac imeajtsan nöiquian mequiüjpan xic.

*Timoteo y Epafrodito*

<sup>19</sup> Sitiül Teat Jesús mandiüm, xique tenguiay nandiüm nüüch mamb Timoteo najen majaw icon, para mapac ximeeats wux apmandilil masaj xic cuane terangan.

<sup>20</sup> Cos ngo majlüy alinop mandiüm mayac wux omeaats mambeol icon atnej arang teat Timoteo.

<sup>21</sup> Meáwan ayambwü leaw nejüwan quiaj andiümwü marangwü, ngo mayambwü leaw andiüm Teat Cristo Jesús.

<sup>22</sup> Icona lamejawan nguineay arang Timoteo; xeyay najneaj arang cos ambeol

xic wüx minajiüt Teat Dios atnej nop nacualaran ambeol miteat nej.

<sup>23</sup> Tengual napiüng sanüüch mamb majaw icon, wüx landoj najaw nguineay sanajlüy ningüy.

<sup>24</sup> Sajaw Teat Jesús apmambeol xic aton namb najaw icon najen.

<sup>25</sup> Tapiüngas netam nüüch mandilil andüy niüng ijlüiyün michijquiaats Epafrodito, aag ayaj icona teajchiün miün mambeol xic wüx meáwan leawa netam. Tembeolasayon xeyay atnej arangüw tiül soldados.

<sup>26</sup> Sajaw xeyay andüüm mamb majaw icon, xeyay leaaw omeaats icon. Ninguinüt tenguiayün niün andeow.

<sup>27</sup> Naleaing tiün andeow, tajlüy mandeow. Apmandeow jondot Teat Dios ngo majüiquich mimonajneaj nej wüx nej, at wüx xique, cos apmamix ximeaats xeyay, ngome quiriw.

<sup>28</sup> Wüx aag ayaj ayac xic wüx nüüch mamb majaw icon najen, müüch mapac imeajtsan wüx apmejawan alinomb; ata xique lango mamix ximeaats xeyay.

<sup>29</sup> Nganüy ich mapac imeajtsan wüx apmengochiün, cos arang najiüt ocueaj Teat Dios. At ich mapac imeajtsan mejawan meáwan monrang najneaj atnej nej arang.

<sup>30</sup> Cos wüx minajiüt Teat Cristo tajlüy mandeow. Nej ngo mapiüng wüx, masey mandeow cos nind mambeol xic, cos icona ngondom mewüünan membeolan xic.

### 3

*Nejan quiaj Teat Cristo alndom mawün asoetiüts*

<sup>1</sup> Nganüy xecojow xechijquiaw, sanasaj icon alinomb, ich mapac imeajtsan wüx Teat Jesús. Xique ngo paxiüm narang wüx nawiig alinomb leaw landoj lanasaj icon, cos sajaw aag ayaj netam menguiayün; quiaj ngome apmechiwean imeajtsan wüx aaga landoj menguiayün.

<sup>2</sup> Netam mepacan wüx ajcüwa nipilan leaw arangüw ngo majneaj, at nejiw pet. Cos ngo maquiajchiw atnej apiüng Teat Dios; apiüngüw nejiw arangüw atnej apiüng Teat Dios ajcan ajlüyiw circuncidado.

<sup>3</sup> Icootsa lajlüyüüts tiül minipilan Teat Dios cos ayambaats Teat Dios, ngome cos ajlüyüüts circuncidado. Nangaj Espiritu ambeol icoots mandüümaats Teat Dios; üüch mapac omeajtsaats cos ajlüyüüts ocueaj icoots Teat Cristo Jesús. Icootsa ngo mayajcaats más netam cuajantanej leaw alndom marangaats icóotsan quiaj.

<sup>4</sup> Sitiülme aljane alndom mapiüng nembeat leawa tarang, ndot aag apmambaran wüx, xique najntsopiüs tiül.

<sup>5</sup> Cos xique tajlüyüis circuncidado wüx tajiüras opeacüw nüt. Xique nacualaranas

tiül cambaj Israel, nawas tiül acualaats Benjamín. Xeteatiün palüyan hebreo nejiw, at a xique. Tajlüyüis tiül noic ajlüy nipilan nasoiqüiw fariseos, leaw xowüy andüjpiw aaga poch tüünd Moisés.

<sup>6</sup> Tapacas wüx xeyay leaw taquiaachasan, cos tayambas ombasüw minipilan Teat Cristo. Tarangas meáwan palan atnej apiüng tiül aaga poch tüünd Moisés; ngo majlüy cuane alndom nasoiw wüx.

<sup>7</sup> Pero meáwan leawa tarangas quiaj, leawa tayajcas nembeat xeyay, nganüy sapiüng ngo membeat nicuajind, cos nganüy sandiüm Teat Cristo.

<sup>8</sup> Naleaing meáwan leaw tarangas nomb, nganüy lango membeat nicuajind najaw. Leaw sarang nganüy aag ayaj xeyay nembeat cos teanandüüb Teat Cristo Jesús Xeteat Dios. Ajcan sandiüb Teat Cristo lanacueat meáwan leawa tajiüras nomb, at leawa tarangas. Lanawiich ningiün aag ayaj atnej nendaeaj. Nganüy leaw xeyay sandiüm, aag ayaj naxom monajneaj wüx ombas Teat Cristo,

<sup>9</sup> najlüy nóiquian naquüüüb. Nganüy Teat Dios lamawün sasoiw wüx tarangas apiüng Teat Cristo, ngome wüx sarang apiüng tiül aaga poch tüünd Moisés. Cos aaga awaran wüx quiaj, Teat Dios tarang wüx tujchiüs ximeaats Teat Cristo.

<sup>10</sup> Nganüy leaw sandiüm, najaw xeyay wüx Teat Cristo, y nayaag tiül ximeaats nguineay Teat Dios tapacüüch nej tiül mandeow. Sandiüm naquüüüb wüx namongoch atnej nej tamongoch, masey nandew atnej tandeow.

<sup>11</sup> Nganüy leawa teanacül, matüch a nüt mapacaran tiül mondeow.

*Netam marangaats leaw niüng alndom*

<sup>12</sup> Xique ngo napiüng lanatüch meáwan aag ayaj, at ngo napiüng lanarang palan; ngwüy xique sandiüm sitiül alndom natüch narang leaw apaj xic wüx Teat Cristo. Cos tawün xic wüx para najlüy micual nej.

<sup>13</sup> Xecojow xechijquiaw, xique ngondom napiüng lanapalüch leaw niüng netam natüch. Ngwüy, leawa xique sarang, aag ayaj ndrom ximeaats leawa lamong; sayac ximeaats wüx leaw aliüc miün,

<sup>14</sup> para alndom natüch niüng netam natüch. Cos quiaj sanüünd aaga najneajay leaw apmüüch icoots Teat Dios tiül cielo wüx ajlüyüüts nóiquian maquiüjpaats Teat Cristo.

<sup>15</sup> Meáwan icootsa leawa latangaats wüx aaga leawa Teat Dios lamüüch icoots majawaats, netam mayajcaats atquiaj aton. Nganüy sitiül aljane ayaag alinoic tiül aaga les ndot napiüng quiaj, Teat Dios apmüüch maxom omeaats wüx aag ayaj.



<sup>16</sup> Pares netam mandüjpiüts leawa niüng lamanguaiyiüts wüx Teat Cristo.

<sup>17</sup> Xecojow xechijquiaw, indüjpiün wüx leawa sarang. At leaw ijawan arangüw atnej sarangan, indüjpiün wüx aton.

<sup>18</sup> Cos almajlüy xeyay leaw apiüngw arangüw leaw andiüm Teat Cristo, pero naleaing ajcüyiw majawüw Teat Cristo, aag tandeow wüx cruz mawün asoetiüts. Lanasaj icon xeyay wüx ajcüw ayaj, y nganüy sajiünts wüx nasaj icon alinomb.

<sup>19</sup> Alinoic nüt ajcüw ayaj apmambüw tiül castigo cos pälwüx arangüw, áagan leaw andiümüw marangüw; ayacüw aag ayaj atnej midiosüw nejiw. At leawa netam maxinguiaw wüx, aag ayaj arangrangayej wüx. Nejiw a nipilan quiaj palüy miün ayacüw omeajtsüw wüx leawa najlüy ningüy wüx iüt cam.

<sup>20</sup> Pero icootsa, micambajaats ajlüy tiül cielo. Imiün quiaj teamacüliüts mapeay Miteatiüts Jesucristo, aaga newün icoots wüx asoetiüts.

<sup>21</sup> Wüx nej aliüc, quiaj apmangowüch micuerpojaats cam leaw ngo membeat; apmajüraats alinoic najneajay atnej micuerpo nej. Cos nej alndom marang ayaj, atnej arang wüx cuajantanej leaw almajlüy.

#### 4

*Meáwan nüt ich mapac imeajtsan wüx Teat Cristo*

<sup>1</sup> Xecojow xechijquiaw, xowüy apac ximeaats wüx icona, xeyay sandiüm najaw icon. Meáwan nüt apac ximeaats wüx icona, cos wüx icona saxom sarang xenajüt. Nganüy sandiüm tanaámb mapac imeajtsan wüx Teat Jesús, nde mecueatiün.

<sup>2</sup> Sandiüm nasajüw müm Evodia at müm Sintique majlüyiw nóiquian wüx Teat Cristo, macueatiw ajcücüyiw.

<sup>3</sup> Átan sandiüm nasaj ic xechiig, imbeolüw ajcüwa montaj quiaj, cos nejiw naleaing tambeolüw xic xeyay wüx tarangas minajüt Teat Dios maquiüjpüw xechiig Clemente, y alacas leawa tambeolüw xic. Minütiw nejiw altiül aaga nawiig niüng ajmel minüt leaw apmapacüw meáwan nüt tiül cielo.

<sup>4</sup> Ich mapac imeajtsan meáwan nüt wüx Teat Cristo. Sasaj icon alinomb ich mapac imeajtsan.

<sup>5</sup> At nde mejcüyiün najen, ijüiquichan ijiüran lasta; atquiaj alndom majaw meáwan nipilan nguineay irangan najneaj. Teat Jesús laliüc mandilil.

<sup>6</sup> Nde meyacan wüx imeajtsan alcuane naél leaw ijlüyiün tiül; aleáingan itüniün ocueaj Teat Dios leawa indüüman metüniün; y wüx itüniün isajan Teat Dios apac imeajtsan wüx leaw ixoman.

<sup>7</sup> Quiaj Teat Dios apmüüch majneaj imeajtsan leawa nejingüind wüx cambajüt ngondom maxom omeaats wüx. Aaga monajneaj quiaj apmambeol icon wüx leawa iyajcan tiül imeajtsan, at apmüüch mexoman imeajtsan cos ijlüyiün nóiquian mequiüjpan Teat Cristo Jesús.

*Iyacan imeajtsan wüx leawa najneaj*

<sup>8</sup> Xecojow xechijquiaw, sandondoch leaw sandiüm nasaj icon. Iyacan imeajtsan wüx meáwan leawa naleaing, leawa najneaj majaraw, leawa najneaj marangüch atnej netam, leawa palüyan najneaj, leawa najneaj nandiüram, leawa najneaj anderac wüx. Meáwan cuajantanej leawa najneaj, leaw alndom marangüch casa, wüx aag ayaj iyacan imeajtsan.

<sup>9</sup> Leawa taquajchiüs icon at leaw teyariün, leaw tenguiayiün, aton leaw tejawan nguineay sarang, atquiaj irangan. Quiaj Teat Dios, aaga neech monajneaj apmajlüy maquiüb icon.

*Hermanos monaw tiül cambaj Filipos ambeolüw a Pablo*

<sup>10</sup> Nganüy xeyay apac ximeaats sarang casa Teat Dios, cos sawaw icona laleaaw imeajtsan wüx xique alinomb. Ngome teanapiüng nómban ndrot imeajtsan xic, cos tajawas ngondom membeolan xic masey tendiüman.

<sup>11</sup> Xique ngo nasaj icon aag ayaj ajcan ngo najiür; ngwüy, cos lasap ximbas wüx leaw alnajiür.

<sup>12</sup> Lanajaw nguineay alndom namongoch, masey ngo najiür nicuajind, tengwüy masey sajiür xeyay. Cuajantanej majngot, xique lanajaw nguineay sanarang, masey netiüs paxiün, tengwüy ngo naxom nicuajind; masey sajiür xeyay, tengwüy masey ngo najiür nicuajind.

<sup>13</sup> Cuajantanej alndom namongoch, cos Teat Cristo ambeol xic, üüch xic sapac.

<sup>14</sup> Masey atquiaj ajlüy, icon najneaj terangan cos tembeolan xic wüx samong tiül naél.

<sup>15</sup> Icona monaw Filipos, icyóyan quiaj lamejawan nguineay tembeolan xic wüx tawas ninguiaj tiül Macedonia; tamelichas nasaj wüx nipilan nguineay tandeow Teat Cristo mawün asoeteran. Icónan quiaj tiül Filipos teajchiün xic tomiün membeolan xic wüx aaga najiüt sarang.

<sup>16</sup> At wüx tajlüyiüs tiül cambaj Tesalónica, teajchiün mamb tomiün nomb iwic, meajchiün xic leawa netam.

<sup>17</sup> Xique ngo namb wüx sitiül alndom meajchiün xic alcuane; ngwüy, cos xique sandiüm najaw mexoman wüx xeyay leaw irangan quiaj ninguiün tiül cielo.

<sup>18</sup> Meáwan leaw teajchiün miün lapeay tiül xiwix, tüüch xic teat Epafrodito. Nganüy lamong wüx alnajiür. Leaw teajchiün xic, aag

ayaj atnej najmboc angan pom, atnej noic najneaj nichech leawa Teat Dios najneajay majaw.

<sup>19</sup> Midiosaats apmüüch icon meáwan leaw ngo mejiüran, cos Teat Cristo ajiür xeyay cuajantanej tiül cielo.

<sup>20</sup> Miteatiiüts Dios netam marangüch casa meáwan nüt ngo majiür ümb.

*Ndópwüx atepeay*

<sup>21</sup> Itepeayiün quiaj meáwan minipilan Teat Cristo Jesús. Atepeayiw icon meáwan minipilan Teat Cristo leawa aliw ningüy naquiüjpüw.

<sup>22</sup> Ningüy meáwan monyar andeac Teat Cristo atepeayiw icon, aton andiümüw matepeayiw icon xeyay ajcüwa monlüy aniüng a César, natang nenajiüt ningüy tiül Roma.

<sup>23</sup> Tanaám mambeol icon Miteatiiüts Jesucristo, müüch icon mimonajneaj nej. Amén.

## Noic nanderac tarang San Pablo müüch minipilan Teat Cristo moncül tiül cambaj Colosas COLOSENSES

*Pablo atepeay minipilan Teat Cristo moncül tiül Colosas*

<sup>1</sup> Xique Pablo miapóstol Teat Jesucristo, ayac xic Teat Dios. Alnaquiüüb michi-jquiaats Timoteo.

<sup>2</sup> Xique sarang aaga acas poch wüx nawiig cam nüüch meáwan micual Teat Dios monyar andeac nej moncül tiül cambaj Colosas, cos tanaámb andüjpiw Teat Cristo. Ich mambeol icon Miteatiüüts Dios y Miteatiüüts Jesucristo, müüch icon mejiüran monajneaj.

*Pablo atün ocueaj Teat Dios mambeol moncül Colosas*

<sup>3</sup> Xicon a meáwan nüt wüx satüniün ocueaj Teat Dios mambeol icona, süjchiün gracias Teat Dios, miteat Miteatiüüts Jesucristo.

<sup>4</sup> Cos xicon lananguiyaiün ngo mech-wean imeajtsan wüx Teat Cristo Jesús, y sanguiyaiün nguineay indüüman meáwan monyar andeac nej.

<sup>5</sup> Aag ayaj teamerangan cos aton icülüün aaga leawa lamejawan apmeajndiün tiül cielo. Aag ayaj landoj lameneayiün nde wüx tenguiaiüün aaga najneajay poch, aaga naleaing wüx Teat Cristo.

<sup>6</sup> Aaga nanderac wüx Teat Cristo leawa tenguiaiüün, tenguial ajüü meáwan wüx iüt. Atquiaj teajlüy xeyay mondüüb Teat Cristo. At icona aton teyariün andeac nej, cos wüx nüt tenguiaiüün tejawan naleaing Teat Dios lamawün icon wüx.

<sup>7</sup> Aag ayaj tenguiaiüün wüx taquiaach icon teat Epafras, aaga nerang najiüt nóiquian naquiüjpan. Nej nop najneaj nerang minajiüt Teat Cristo, teamambeol icon.

<sup>8</sup> Nej nesaj xicon nguineay erjiürayon lasta, cos ambeol icon Nangaj Espiritu ocueaj Teat Dios.

<sup>9</sup> Xicon a aton wüx nüt tenguiaayan aag ayaj, ngo nacueatiün natüniün ocueaj Teat Dios mambeol icon. Satüniün müüch icon mejawan nguineay andiüm Teat Dios merangan; y müüch icon mexoman imeajtsan leaw andiüm Nangaj Espiritu ocueaj Teat Dios.

<sup>10</sup> Satüniün merangan atnej netam marangüw monyar andeac Teat Dios, merangan leawa najneaj majaw Teat Dios. Meáwan leaw irangan netam merangan atnej Teat Dios andiüm, y metangan wüx Mipoch nej.

<sup>11</sup> Satüniün ocueaj Teat Dios müüch icon mejiüran xeyay ipacan wüx nej, müüch icon ndoj imbasan merangan leawa nej andiüm, y meücan wüx meáwan leaw aliüc miün apmajlüy, mapac imeajtsan wüx.

<sup>12</sup> Isajan Teat Dios najneajay lamarang cos lamambeol icoots mayariüüts aaga apmüjndiüüts, leaw Teat Dios apmüüch meáwan micual nej.

<sup>13</sup> Teat Dios lamawün icoots tiül pojniün niüng nimeech arang natang; lamayac icoots tiül niüng Micual nej arang natang, áag xowüy lamajiür lasta.

<sup>14</sup> Cos aaga Micual nej quiaj, lamangüy naag miquiej nej leaw ngo majneaj tarangaats, lamawün wüx omeaats meáwan asoetiüüts.

*Teat Dios tajneaj majaw icoots wüx tandeow Teat Cristo*

<sup>15</sup> Teat Cristo ajlüy atnej mejaw Teat Dios, cos Teat Dios ngo maxoram majaraw. Nej a Teat Cristo mbas majlüy, teoj majlüy meáwan leaw almajlüy.

<sup>16</sup> Meáwan leaw almajlüy, Teat Cristo tarang atnej tapiüng Teat Dios, meáwan leaw almajlüy tiül cielo, leaw almajlüy wüx iüt, leaw aldom maxoram majaraw, aton leawa ngondom maxoram majaraw; masey montangtang monajiüt, masey ángeles, masey jangantanej monajiüt. Meáwan leaw almajlüy, Teat Cristo tarang ocueaj nej.

<sup>17</sup> Teat Cristo lajlüy wüx nganaw majlüy meáwan leaw almajlüy nganüy. Nej ajaw nguineay netam majlüy, nguiane netam majlüy.

<sup>18</sup> At aton nej ajlüy atnej omal, nganüy monyar andeac nej ajlüyiw atnej micuerpo nej. Nej newitich majlüy meáwan cuajantanej. Nej ombas mapac tiül mondeow, atquiaj ajüic naleaing nej ombas nej wüx meáwan cuajantanej.

<sup>19</sup> Miteatiüüts Dios tapac omeaats cos Teat Cristo meáwan nüt ajlüy atnej nej ajlüy.

<sup>20</sup> Teat Dios najneaj majaw meáwan leaw almajlüy, masey leawa almajlüy wüx iüt, masey leawa almajlüy tiül cielo. Meáwan tajlüyiw najneajan maquiüjpüw Teat Dios nde wüx tandeow Teat Cristo wüx cruz, tajüch tiüt miquiej nej.

<sup>21</sup> Icona aton nomb ngo mejlüyiün nóiquian mequiüjpan Teat Dios. Tejcüyiün mejawan nej cos ngo majneaj terangan; pero nganüy ijlüyiün najneaj mequiüjpan Teat Dios,

<sup>22</sup> cos Teat Cristo tandeow wüx cruz para maquiüüb icon niüng ajlüy Teat Dios mejlüyiün ocueaj nej, ngo mejiüran nicuajind nisoet.

<sup>23</sup> Nganüy tanaámb netam meyacan imeajtsan wüx indüjpiün Mipoch Teat Dios. Nde

mbiüjlameron wüx alcuane, cos aag ayaj alndom mawün wüx imeajtsan leawa lamenguiaiyün wüx tenguiayiyün aaga najneaj nanderac wüx Teat Cristo. Aag ayaj teanderac tiül meáwan cambaj ningüy wüx iüt. Xique Pablo tündiüs nambeol y nandead wüx aag ayaj aton.

*Teat Pablo tüünd mambeol monyar andead Teat Cristo*

<sup>24</sup> Xique nganüy apac ximeaats wüx meáwan necoy leaw samongoch wüx icona, cos nganüy tengual nambich namongoch atnej Teat Cristo tamongoch para mawün wüx asoetiw minipilan nej, ajcüwa monyar andead nej.

<sup>25</sup> Teat Dios tayac xic narang najiüt tiül minipilan nej, nambeol icon namb nasaj nipilan manguiayiw meáwan leawa tapiüng.

<sup>26</sup> At netam nüüch icon mejawan aaga leaw nejingüind ngo majaw nde wüx tajlüy aaga iüt cam. Pero nganüy Teat Dios lamajüiquich manguiayiw monyar andead nej.

<sup>27</sup> Teat Dios tandiüm müüch majawüw ajcüwa nipilan leaw ngome israel nguineay xeyay ajneaj ajlüy áag leawa nomb ngo manguiyaran. Pero nipilan leaw ngome israel alndom majawüw aton. Aaga ngo manguiyaran quiaj, apiüng wüx Teat Cristo ajlüy tiül imeajtsan, wüx nej nganüy temecüliün mejlüyiyün xeyay najneajay alinoic nüt tiül cielo.

<sup>28</sup> Xicona sandeacan wüx Teat Cristo, sapajan ocueajiw meáwan nipilan, saquiajchiün wüx atnej Teat Dios tüüch xicon najawan, para alndom marangüw palan meáwan leaw andiüm Teat Cristo.

<sup>29</sup> Wüx aag ayaj xique sarang xeyay najiüt, sambichay sapac wüx narang leaw lamüüch xic Teat Cristo narang, cos nej teamambeol xic.

## 2

<sup>1</sup> Xique sandiüm menguiayiyün nguineay sapac wüx nambeol icon, y meáwan monlüy tiül cambaj Laodicea, at meáwan leaw nganaw nejawayon naquiüjpüw.

<sup>2</sup> Sapac wüx para mapac omeajtsüw, mejüürayej lasta nóiquian, matüchiw majawüw meáwan leaw andiüm Teat Cristo marangüch. At para majawüw wüx aaga leaw nomb Teat Dios taxot ngo majaraw; aag ayaj wüx Teat Cristo.

<sup>3</sup> Cos wüx Teat Cristo almajlüy meáwan fis, meáwan leaw ngomeaag maxom omeaats wüx nipilan, nej ajaw meáwan.

<sup>4</sup> Aag ayaj sasaj icon ngana mawaiich icon aljane masey ajüic xowüy lajneaj andead.

<sup>5</sup> Cos masey ngo najlüy niüng ijlüyiyün mejawan xic, naleaing xique sayaag atnej

sal niüng ijlüyiyün, apac ximeaats, cos saw jaw nguineay irangan najneaj, tanaám ngo mecueatiün indüjpiün Teat Cristo.

<sup>6</sup> Nganüy cos lameyariün andead Miteatiüts Jesucristo, netam merangan atnej apiüng nej.

<sup>7</sup> Nde mechiwean imeajtsan wüx Teat Cristo y mecueatiün. Irangan atnej noic owil xiül nemiücüch tiüt mioxiich, aplombom nandand. Atquiaj netam meyacan imeajtsan wüx Teat Dios, atnej lerquiaacharanan wüx. Ich majüic apac imeajtsan wüx ijchan gracias Teat Dios.

*Nganüy alinoic arangaats cos andüjpiüts Teat Cristo*

<sup>8</sup> Ijawan wüx, nde mawaijchaw icon ajcüwa leaw monquiaach pálwüx poch masey ajüic atnej naleaing. Nejiw ngo maquiajchiw leaw apiüng Teat Cristo; aquiajchiw atnej ajlüyayej wüx marangüw, leawa axomüw omeajtsüw.

<sup>9</sup> Pues Teat Cristo masey nipilan nej, tanaám Dios nej aton.

<sup>10</sup> Ngo metam icon alcuane, cos wüx Teat Cristo ijiüran meáwan. Nej ajlüy wüx meáwan montangtang monajiüt wüx iüt, átan tiül cielo.

<sup>11</sup> Wüx teyariün andead Teat Cristo, quiaj atnej tejlüyiyün circuncidado; pero naleaing aag ayaj ngo matnej leaw arangüw wüx ombas nipilan. Aag ayaj apiüng wüx icona lamewüniün ninguiün ngo majneaj, lango mendiüman merangan leaw terangan nomb.

<sup>12</sup> At wüx teyariün yow, aag ayaj atnej temiürajtan nóiquian mequiüjpan Teat Cristo. Aton tepacan mequiüjpan nóiquian, cos lamepiüangan naleaing Teat Dios alndom mapacüch mondeow atnej tapacüch Teat Jesús.

<sup>13</sup> Icona wüx nganaw meyariün andead Teat Cristo, tejlüyiyün atnej lerndeowan cos irangan ngo majneaj; nganaw maw wüx imeajtsan meáwan ngo majneaj leaw tendiüman merangan. Pero Teat Dios lamawün wüx omeaats isoetiün, atnej lerpacan alinomb nóiquian mequiüjpan Teat Cristo.

<sup>14</sup> Teat Dios tandarriich meáwan asoetiüts tajlüy wüx nawüig, cos aag andead wüx ngo marangaats palan leaw apiüng tiül aaga poch tüünd Moisés. Pero Teat Cristo tangüy aaga nisoet quiaj wüx tandeow wüx cruz.

<sup>15</sup> Teat Cristo talox tiüt meáwan nimeech leaw arangüw natang, langondom marangüw leaw andiümüw. Teat Cristo tüüch majaw nipilan nguineay tajntsop wüx nejiw wüx tandeow wüx cruz.

*Iyamban ocueaj Teat Dios*

<sup>16</sup> Nganüy nejingüind ngondom mayac isoetiün wüx leaw itean, leaw inganeowan;

at wüx nangos nüt, wüx aliw caaw, tengwüy wüx nüt axoodaran, sitiül irangan tengwüy ngo merangan.

<sup>17</sup> Cos meáwan aag ayaj atnej minden leawa lapiürang aliüc apmajlüy. Aaga lapiürang aliüc quiaj nganüy lapeay; aag ayaj Teat Cristo.

<sup>18</sup> Nde meajchiün nejingüind mawün icueajiün leaw apmeajndiün tiül cielo, cos altiül apiüngüw netam majtan ocueajiw ángeles matüniw ocueaj Teat Dios mambeol icoots. Nejiw apiüngüw ajawüw alcuane atnej aümiw, arangrangayej wüx leaw axomüw omeajtsüw wüx nejiwan quiaj.

<sup>19</sup> Nejiw ngo majlüyiw nóiquian maquiüjpüw Teat Cristo, aaga minatangaats. Cos Teat Cristo asaj icoots cuane netam marangaats, üch icoots matangaats wüx Mipoch Teat Dios, ambeol icoots majlüyüüts nóiquian, matangaats atnej Teat Dios andiüm.

<sup>20</sup> Sitiül naleaing atnej lerndeowan nóiquian mequiüjpan Teat Cristo, icona lamecueatiün meáwan ngo majneaj leaw arangüw nipilan. Jow nganüy çneol tendüyüün wüx alinomb merangan atnej nipilan ajlüyayej wüx marangüwa?

<sup>21</sup> Cos apiüngüw: “Nde merreeg ayaj, nde meat afün, nde mexaing mendeaand ayaj”.

<sup>22</sup> Meáwan aaga ajlüyay arangüch quiaj, apndrom wüx landoj atam, cos meáwan aag ayaj nipilan monyac, maquiajchiw wüx.

<sup>23</sup> Aaga ajlüyay narangüch quiaj naleaing ajüic atnej najneaj. Nejiw arangüw ayaj majüic naleaing ayambüw Teat Dios, atnej ngo merangrangayej, ngo majiürüw lasta micuerpojüw nejiw. Pero meáwan aag ayaj ngo membeat, cos ngondom mambeol nejiw macueatiw aaga ngo majneaj leaw andiümüw marangüw.

### 3

<sup>1</sup> Atquiaj sitiül icona naleaing lerpacan alinomb mequiüjpan Teat Cristo, iyamban leaw najlüy cawüx tiül cielo niüng alchetem Teat Cristo amb wüx miác Teat Dios.

<sup>2</sup> Iyacan imeajtsan wüx leaw altiül cielo, ngome leaw alningüy wüx iüt.

<sup>3</sup> Cos icona atnej tendeowan mequiüjpan Teat Cristo wüx nej tandeow; nganüy almepacan almequiüjpan niüng ajlüy Teat Dios.

<sup>4</sup> Wüx aliüc Teat Cristo alinomb, aaga neech icoots mapacaats, quiaj icona aton apmequiüjpan, apmejlüyüün najneajay atnej ajlüy nej.

*Alinoic arangaats nganüy ngo matnej nomb*

<sup>5</sup> Iwüniün wüx imeajtsan meáwan ngo majneaj leaw almajlüy ningüy wüx iüt cam. Aag ayaj apiüng wüx: nde merangan

nisoet mejlüran minajtajan, nde mejlüran minaxeyiün; nde mendiüman leaw ngo majneaj; nde mendiümdüman merangan leaw ijawan; at nde mendiümdüman cuajantanej leaw almajlüy ningüy wüx iüt cam, meyacan atnej midiosan.

<sup>6</sup> Cos ajcüwa nipilan ngo mayamb Teat Dios, ajcüw monrang aaga ngo majneaj quiaj, Teat Dios apmüüch nejiw mamon-gochiw xeyay ngo majneaj tiül Castigo.

<sup>7</sup> Icona wüx nganaw meyamban Teat Cristo terangan meáwan aag ayaj aton.

<sup>8</sup> Nganüy netam mecueatiün meáwan aaga teanasaj icon cam: aag ayaj moncüy, monteots ngo majneaj wüx ombas alinop, mondeac ngo majneaj wüx Teat Dios; aton meáwan ngo majneaj poch leaw alndom maw teombeayaran.

<sup>9</sup> At nde merwaiichayon, cos lamecueatiün merangan leaw terangan nomb.

<sup>10</sup> Nganüy lame alinoic ijlüyüün. Meáwan nüt Teat Dios tenguiäl mawün wüx imeajtsan ngo majneaj, para mejlüyüün najneajay atnej ajlüy nej.

<sup>11</sup> Quiaj nganüy ngo metam sitiül nipi-lan griego icon, tengwüy nipilan judío icon; sitiül ijlüyüün circuncidado, tengwüy ngo mejlüyüün; sitiül icona nipilan icon naw alinoic iüt, tengwüy sitiül icona nerowan tiül noic cambaj ocueajiw nemechmeech nipilan; tengwüy sitiül icona nipilan najon marang minajiüt alinop, tengwüy sitiül icona nipilan leaw ngo metam merangan minajiüt alinop. Aag ayaj lango metam, cos nganüy nóiquian ajlüyüüts wüx Teat Cristo; néjan quiaj más nembeat nguajantanej.

<sup>12</sup> Cos Teat Dios lamajiür icon lasta, nej lamarriüid icon mejlüyüün minipilan nej. Pares netam merjiürayon lasta, mermbeolayon. Lango merlomboochayon; netam majneaj imeajtsan, y netam meiücan wüx cuajantanej.

<sup>13</sup> Netam meiücan wüx leaw arang nop alinop; sitiül aljane tarangüch alcuane wüx ombas alinop, ich mawün wüx omeaats. Atnej Teat Cristo tawün wüx omeaats leaw ngo majneaj terangan, atquiaj icona aton netam merangan.

<sup>14</sup> Pero leaw más xeyay netam, aag ayaj merjiürayon lasta, cos atquiaj alndom mejlüyüün nóiquian najneajay.

<sup>15</sup> Aaga monajneaj ocueaj Teat Cristo majlüy tiül imeajtsan müüch icon meyajcan cuane netam merangan, cos áag tarrüüid icon Teat Dios para mejlüyüün nóiquian atnej majlüy nop nipilan. Netam meajchiün gracias Teat Dios cos najneajay arang.

<sup>16</sup> Meáwan leaw apiüng Teat Cristo, ich macül wüx imeajtsan meáwan nüt. At iquiajchiün, ipajan ocueaj nop alinop atnej netam. Ijchan imeajtsan Teat Dios, ijüiquichan apac imeajtsan wüx itajcan cantar salmos,

himnos, y leaw üüch icon Nangaj Miespíritu nej metajan cantar.

<sup>17</sup> Meáwan leaw irangan, masey wüx indeacan, tengwüy wüx cuajantanej irangan, netam merangan meáwan wüx minüt Teat Cristo. Ijchan gracias Teat Dios wüx minüt Teat Cristo.

*Nguineay netam marang nop minipilan Teat Cristo*

<sup>18</sup> Nganüy sanasaj icon montaj, irangan leaw apiüng minojon. Aag ayaj netam merangan cos iyariün andeac Teat Cristo.

<sup>19</sup> At icona nanojaran, netam mejiüran lasta mintajan, nde mejcüyiün mejawan.

<sup>20</sup> At icona monguich, iyariün andeac miteatiün wüx meáwan leaw netam merangan, cos Teat Dios aag ayaj najneaj majaw.

<sup>21</sup> Aton icona nateateran, nde meajchiün majcüy micualan ngana paxiüm ocueajiw.

<sup>22</sup> At icona najonüw monrang najiüt, irangan leaw asaj icon neneay najiüt. Nde merangan áagan wüx tengual ijawan, majüic najneaj irangan. Irgan meáwan con imeajtsan, majüic naleaing iyariün andeac Teat Dios.

<sup>23</sup> Meáwan leaw irangan, irangan con imeajtsan atnej merangan ocueaj Teat Dios, ngome ocueaj nipilan.

<sup>24</sup> Cos lamejawan Teat Dios apmüüch icon alinoic nüt noic najneajay, cos temerangan minajiüt Teat Cristo.

<sup>25</sup> Pero leawa nerang ngo majneaj apmüünd mamongoch ngo majneaj atnej tarang, cos Teat Dios ngo marriüüd jane nembeat, jane ngo membeat.

#### 4

<sup>1</sup> At icona moneay najiüt, irangan najneaj wüx ijchan najiüt monrang minajiütan, cos lamejawan icona aton almejiüran tiül cielo nop minatangan.

<sup>2</sup> Pero tanaámb itajcan orar nde mecueatiün. Wüx itajcan orar ijchan gracias Teat Dios cos najneajay lamarang.

<sup>3</sup> At isajan Teat Dios mambeol xicon nüjchiün manguiayiw nipilan wüx aaga poch ngomeaag anguiayaran tanomb, nguineay Teat Cristo apmawün nipilan wüx asoetiw. Nganüy sal tiül manchiüc cos ajcan sandeac wüx nej.

<sup>4</sup> Itüniün ocueaj Teat Dios para alndom nandea ranüy leaw netam nandea.

<sup>5</sup> Irgan najneaj wüx ajcüwa nipilan ngo mayambüw Teat Dios, cos atquiaj apmajawüw icon naleaing irangan najneaj. Iyamban nguineay alndom mesajan wüx Teat Cristo.

<sup>6</sup> Wüx indeacan mequiüjpanüw, indeacan najneaj; atquiaj jangantanej apmandiüm

manguiay leaw ipiüangan. At netam mejawan wüx leaw indeacan, nguineay apmesajan anopnop nipilan wüx cuajantanej apmatüniw manguiayiw icon.

*Ndójwüx atepeay*

<sup>7</sup> Teat Tíquico apmasaj icon meáwan cuane teanarang, nguineay teanamogoch. Nej nop najneaj nerang minajiüt Teat Dios, sarang najiüt naquiiüb.

<sup>8</sup> Xique süüch nej mamb majaw icon masaj icon cuane sarangan, nguineay samogochiün, para majneaj imeajtsan.

<sup>9</sup> At apmaquiiüb mamb teat Onésimo; nej aton nop nej najneaj nerang minajiüt Teat Dios. Aag ayaj micual micambajan. Nejiw apmasajiw icon cuane teajlüy ningüy.

<sup>10</sup> At teat Aristarco, áag salnaquiiüb ningüy tiül manchiüc atepeay icon. At atepeay icon teat Marcos micual michiig teat Bernabé. Xique lanasaj icon wüx teat Marcos cuane apmarang. Sitiül apmamb majaw icon, ingochiün najneaj.

<sup>11</sup> At a Jesús, áag nenüt Justo aton, atepeay icon. Cos nejiwan quiaj nipilan judío mondüüb Teat Cristo leawa tambeolüw xic wüx minajiüt Teat Dios; nejiw nejchiw majneaj ximeaats.

<sup>12</sup> At atepeay icon teat Epafras. Nej aton micual micambajan, arang minajiüt Teat Cristo. Nej ngo macueat mataag orar matün ocueaj Teat Dios mambeol icon mendüjpiün Teat Cristo tanaámb, y merangan palan meáwan atnej andiüm Teat Dios.

<sup>13</sup> Xique sawaw nguineay nej naleaing arang xeyay najiüt mambeol icona, at mondüüb Teat Cristo monlüy tiül cambaj Laodicea, y monlüy tiül Hierápolis.

<sup>14</sup> At atepeay icon teat Lucas, aaga nejaw moniün andeow, nej xeyay andiümaats. At teat Demas aton atepeay icon.

<sup>15</sup> Itepeayiün meáwan minipilan Teat Cristo moncül tiül Laodicea. Itepeayiün teat Ninfas aton, y meáwan minipilan Teat Cristo leawa canchiüjow aniüng nej.

<sup>16</sup> Wüx landoj meteowan aaga nawiiig cam, ijoyiün ijchan mateowüw minipilan Teat Cristo monlüy Laodicea aton. At a nawiiig süüch mamb andüy tiül Laodicea, at icona iteowan aton.

<sup>17</sup> Isajan teat Arquipo mayac omeaats wüx aaga najiüt tüüch nej Teat Dios marang.

<sup>18</sup> Xique Pablo sarang naag xiwix aaga acas poch ndójwüx satepeay icon cam. Ich leaam imeajtsan wüx xique cos sal tiül manchiüc. Teat Dios tanaámb mambeol icon, müüch icon mimonajneaj nej. Amén.

**Anoic nanderac arang wüx  
nawiig San Pablo müüch  
minipilan Teat Cristo moncül  
tiül Tesalónica  
1ª TESALONICENSES**

*Atepeay*

<sup>1</sup> Xique Pablo saquiüjpüw Silvano y Timoteo, sarang aaga acas poch cam natepeayiün icon meáwan moncül tiül cambaj Tesalónica, monlüy nóiquian mequiüjpan Teat Dios at Miteatiüts Jesucristo. Sandiüman Teat Dios müüch icon mimonajneaj nej, at mejlüyiün najneajan.

*Monaw Tesalónica ajüiquichaw nguineay ayaciw omeajtsiw wüx Teat Jesucristo*

<sup>2</sup> Meáwan nüt süjchiün gracias Teat Dios, y leaam ximeats icon meawaron wüx satajcan orar.

<sup>3</sup> At meáwan nüt leaaw ximeajtsan nasajan Miteatiüts Dios wüx aaga najiüt teamerangan, cos aag ayaj ijüiquichan lameyariün Mipoch Teat Dios, at ijiürayon lasta. Masey imongochiün xeyay ngo majneaj, tengual meücan wüx meáwan aag ayaj cos teamecüliün mandilil Teat Jesucristo.

<sup>4</sup> Xecojow xechijquiaw, sajawan Teat Dios xeyay andiüm icon, y lamarriiüd icon.

<sup>5</sup> Wüx tasajasan icon wüx aaga najneaj nanderac wüx Teat Jesucristo, aag ayaj ngo nandéacan, naleaing tayaagasan Nangaj Espiritu ocueaj Teat Dios xeyay tambeol xicon, cos tajawasan meáwan aag ayaj naleaing. Lamejawan nguineay tarangasan wüx ajlüyiüts nóiquian naquiüjpan icon, cos sandiüman nambéolan icon.

<sup>6</sup> Icona tendüjpiün wüx leaw sarangan, at tendüjpiün wüx leaw arang Teat Jesucristo. Teyariün aaga najneaj nanderac wüx Teat Cristo, masey xeyay tajcüyw majawüw icon nipilan, cos naleaing aaga Nangaj Espiritu ocueaj Teat Dios tüüch icon mapac imeajtsan xeyay.

<sup>7</sup> Por aag ayaj tejüiquichan irangan najneaj; tajawüw icon meáwan monyar andeac Teat Jesús monlüy tiül iüt Macedonia at moncül tiül Acaya.

<sup>8</sup> Atquiaj tajüiquichay aaga nanderac wüx Teat Jesús manguiayaran ngome áagan tiül Macedonia y tiül Acaya, pero at aton tiül meáwan cambaj teajaraw nguineay indüjpiün Teat Dios. Pares ngo metam nandéacan wüx nguineay indüjpiün Teat Dios.

<sup>9</sup> Cos nipilan teamandéacüw wüx nguineay tapac imeajtsan mengochiün xicon wüx tasajasan icon wüx Teat Jesús; nguineay tecueatiün ajcüwa narangüch

dios, mendüjpiün aaga naleaing Teat Dios almapac.

<sup>10</sup> Aton apiüngüw icona teamecüliün Micual Teat Dios, aaga Teat Jesús aliüc imiün tiül cielo, aaga leaw Teat Dios tapacüüch tiül mondeow. Nej apmawün icoots wüx aaga ngo majneaj leaw aliüc miün apmajlüy wüx Teat Dios apmajaw wüx asoeteran.

**2**

*Leaw tarang teat Pablo tiül Tesalónica*

<sup>1</sup> Xecojow xechijquiaw, icona lamejawan wüx tambasan quiaj niüng ijlüyiün ngome sambánan.

<sup>2</sup> Lamejawan nguineay tamongochasan xeyay ngo majneaj, nguineay tandéacüw ngo majneaj wüx ximbasan nipilan monaw tiül cambaj Filipos. Aag ayaj tajlüy wüx nganaw namban najawan icon. Masey teajlüy nadam moncüy tiül micambajan aton, pero Teat Dios tambeol xicon nasajan icon aaga najneaj nanderac, nguineay aldom mawaats wüx asoetiüts.

<sup>3</sup> Cos leawa taquiaachasan icon, aag ayaj palanüy naleaing; ngo narangan nicuajind ngo majneaj, ngo nawaijchan icon.

<sup>4</sup> Teat Dios tajaw sanarangan meáwan leaw apiüng, quiaj tüüch xicon namban naquiajchiün aaga najneaj nanderac wüx Teat Jesús. Aag sandéacan, ngome leaw nipilan andiüm manguiay, sandéacan áagan leaw andiüm Teat Dios, cos nej lamajaw nguineay ximeajtsan.

<sup>5</sup> Icona lamejawan xicona ngo nawüywüyiün aljane; at Teat Dios ajaw xicona ngo newüyayon wüx saquiajchiün para naxoman wüx alcuane.

<sup>6</sup> At ngo nayamban malomb xicon aljane, ngome icona tengwüy pálwüx nipilan. Masey xicona aldom narangan, cos miapóstoles Teat Cristo xicon.

<sup>7</sup> Tarangasan najneaj wüx imbasan, atnej nop namüman ajiür lasta micual nej.

<sup>8</sup> Atquiaj xicona aton xeyay leaw ximeajtsan icon. Ngome áagan tandiümasan nasajan icon wüx aaga najneaj nanderac leawa tüüch Teat Dios; at tajlüyasan nandéowan ingow indeowan sitiül netam, cos xeyay sandiüman icon.

<sup>9</sup> Xecojow xechijquiaw, sajawan nganaw ndrom imeajtsan nguineay tumb sapacan wüx tarangasan xeyay najiüt tiül icona. Nüt ongwüiüts sarangan najiüt cos ngo nandiüman natüniün icueajiün nicuajind wüx tasajasan icon wüx aaga najneaj nanderac tüüch Teat Dios.

<sup>10</sup> Icona ijawan, at Teat Dios ajaw nguineay tarangasan wüx tajlüyasan ninguij tiül icona. Tarangasan leaw andiüm Teat Dios, nejinguid ngondom mayac sasoetiün.

<sup>11</sup> At lamejawan nguineay taquiaachasan icon, y tambeolasan icon inopnophon wüx amix imeajtsan. At tapajasan icueajiün xeyay atnej nop nateataran arang wüx micual nej.

<sup>12</sup> Atquiaj tasajasan icon merangan najneaj, atnej netam marang jane ocueaj Teat Dios, cos lamapaj icon mejlüyiün tiül aaga najneajay cambaj niüng ajlüy nej.

<sup>13</sup> Pares ngo nacueatiün nüjchiün gracias Teat Dios, cos wüx tenguiayiün sasajan icon wüx aaga najneaj nanderac, icona ngome tenguiayiünan, teyariün aag ayaj cos aag ayaj naleaing Mipoch Teat Dios, ngo matnej poch andeac nipilan. Aaga najneaj nanderac ocueaj Teat Dios quiaj, ayac icon wüx merangan najneaj.

<sup>14</sup> Xecojow xechijquiaj, icona temongochiün atnej tamongochiw noicnoic ajlüy mondüüb Teat Dios tiül iüt Judea wüx tayariw andeac Teat Cristo Jesús. Pues ajcüw micual miütan tayambüw imbasan aton, atnej ajcüwa judíos tayambüw ombasüw minipilan Teat Cristo tiül Judea.

<sup>15</sup> Ajcüwa judíos tambiyaw Teat Jesús. Átan nde tanomb tambiyaw temdeac andeac Teat Dios monáwan tiül nejijw; y aton tawüniw xicon quiaj. Nejijw ngo marangüw leaw andiüm Teat Dios, y ajcüyiw majawüw meáwan nipilan.

<sup>16</sup> Andiümüw mapalüw xicon para ngo nasajan wüx Teat Jesucristo pálwüx niplan ngome judíos, nganandot mawüw wüx asoetiw. Atquiaj teaxeyay asoetiw nejijw; Teat Dios lajcüy majaw nejijw xeyay.

*Pablo andiüm mamb majaw alinomb moncül Tesalónica*

<sup>17</sup> Xecojow xechijquiaj, masey ngo mexomayoots acas nüt, ngo ndrom ximeajtsan icon. Nganüy xeyay lanandiüman mejawayoots alinomb.

<sup>18</sup> Naleaing xicona tandiümasan namban najawan icon. Masey xique Pablo tajlüy namb nomb ijmbüw, pero aaga Satanás tayac naél mapal xicon.

<sup>19</sup> ¿Jane apmüüch xicon xeyay apac ximeajtsan wüx aliüc alinomb Miteatiüts Jesucristo majlüyiüts nóiquian maquiüjpaatsa? ¿Jane üüch xicon nayajcan najneaj tarangasan minajiüt Teat Dios tiül icona? Pues iconan quiaj.

<sup>20</sup> Naleaing, icona apmeajchiün xicon nayajcan xeyay apac ximeajtsan.

### 3

<sup>1</sup> Lango naiündan wüx cos laínd nanguiayiün wüx icona, quiaj tandeacasan sanacüliün xicónan quiaj tiül cambaj Atenas,

<sup>2</sup> condom sanüjchiün mamb michiquiaats Timoteo mambeol icon. Cos

nej nop nerang minajiüt Teat Dios, at nop nembeol xicon wüx sandeacan aaga najneaj nanderac wüx Teat Cristo. Tasajas maquiaach icon cuane najneaj merangan, mambeol icon müüch mejlüyiün nandand wüx indüjpiün Teat Cristo.

<sup>3</sup> Atquiaj tarangasan nganandot mbayameron wüx aaga naél imongochiün quiaj. Cos icona lamejawan aag ayaj netam mamongochiüts.

<sup>4</sup> Cos wüx saliünan ninguiaj naquiüjpan icon tasajasan icon apmamongochiüts naél. Nganüy mbich lamejawan atquiaj teajlüy.

<sup>5</sup> Wüx xique lango naíünd wüx, quiaj tujchiüs mamb teat Timoteo cos sandiüm nanguiay cuane terangan, nguineay temendüjpiün Teat Dios, nganandot nimeech mayac icon wüx merangan ngo majneaj, ndot cuajpar sarangan aaga najiüt tiül icona.

<sup>6</sup> Pero wüx tandilil teat Timoteo imiün niüng ijlüyiün, taquiüüb miün najneaj poch nguineay icona tanaám temendüjpiün Teat Cristo. At tapiüng nguineay indiüman nop alinop, y tanaám leaw imeajtsan xicon. Apiüng indiüman mexomayoots mejawayoots atnej xicona teanandiüman najawan icon aton.

<sup>7</sup> Wüx aag ayaj xecojow xechijquiaj, tajneaj ximeajtsan wüx tanguiayasan icona tanaám temeyacan imeajtsan wüx Teat Cristo, masey xicona sajlüyiün tiül xeyay naél cos ajcüy majaw xicon nipilan.

<sup>8</sup> Nganüy apac ximeajtsan wüx icona cos tanaám ersapayon nandand wüx Teat Jesucristo.

<sup>9</sup> Xeyay süjchiün gracias Teat Dios wüx icona; nej ajaw xeyay apac ximeajtsan cos tanaám teamendüjpiün Teat Cristo.

<sup>10</sup> Nüt ongwüüts satüniün ocueaj Teat Dios sitiül alndom mejawayoots alinomb, para nasajan icon meáwan leaw nganaw mejawan wüx indüjpiün Teat Cristo.

<sup>11</sup> Sandiüman Teat Dios y Miteatiüts Jesucristo mambeol xicon natüchiün niüng ijlüyiün.

<sup>12</sup> Sandiüman Teat Jesucristo müüch mejiüran xeyay monajneaj, müüch mejiürayon lasta, at mendiüman meáwan nipilan aton, atnej sajiüran icon lasta.

<sup>13</sup> Tanaám nde mechiwean imeajtsan; irangan leaw andiüm Miteatiüts Dios, cos atquiaj apmaxom icona tengual merangan najneaj wüx nüt apmandilil Miteatiüts Jesucristo maquiüüb miün meáwan minipilan nej.

### 4

*Netam marangüch leaw andiüm Teat Dios*



<sup>1</sup> Nganüy xecojow xechijquaw, sasajan icon alinomb, satüniün wüx minüt Teat Jesús tanaámb merangan leaw andiüm Teat Dios atnej tenguiayiün wüx taquiaachasan icon. Masey sajawan temerangan atquiaj, nganüy sandiüman tanaámb merangan más xeyay najneaj.

<sup>2</sup> Tenguiayiün nguineay tasajasan icon merangan leaw andiüm Teat Jesús, cos nej atquiaj tasaj xicon.

<sup>3</sup> Leawa Teat Dios andiüm, aag ayaj irangan palan najneaj. Pues naxey ngondom maquiüban najtaj, at aton najtaj ngondom maquiüban naxey sitiül nganaw mengoch owixaw; at monguich ngondom marangüw aag ayaj.

<sup>4</sup> Pues inopnophon netam mequiüjpan mintajan najneajay mejiürayon lasta;

<sup>5</sup> ngondom merangan wüx ombas leaw indiiüman atnej arangüw altiül nipilan leawa ngo mandüjpiw Teat Dios.

<sup>6</sup> Nejinguind ngo metam mitsoj alinop wüx aag ayaj, cos Teat Dios apmapalüch ombas jane arang atquiaj, atnej lanasajan icon.

<sup>7</sup> Cos Teat Dios ngo marriiüd icoots marangaats aaga ngo majneaj quiaj; nej andiüm marangaats palüyan najneaj.

<sup>8</sup> Leaw itsojüyan aag ayaj ngome nipilan itsoj, Teat Dios itsoj, aaga neech icoots aaga Nangaj Espiritu.

<sup>9</sup> Xecojow xechijquaw, ngo metam nasajan icon nguineay netam mejiürayon lasta, cos lamenguiayiün nguineay apiüng Teat Dios.

<sup>10</sup> Sanguiaiüün atquiaj temerangan wüx meáwan minipilan Teat Cristo moncül tiül iüt Macedonia. Pero sandiüman tanaámb mejiüran lasta más xeyay.

<sup>11</sup> Iyamban nguineay alndom mejlüyiün najneajan, merangan leawa netam merangan; irangan minajiütan con iwixan, atnej lanasajan icon.

<sup>12</sup> Atquiaj pálwüx nipilan apmajawüw nguineay irangan najneaj; ngome apmaxomüw cuane wüx mandeacndeacüw wüx imbasan, aton ngome apmetam meyariün nicuajind ocueaj alinop.

### *Wüx apmandilil Teat Jesús*

<sup>13</sup> At aton xecojow xechijquaw, ngo nandiüman mejlüyiünan ngo mejawan nguineay ajlüy wüx mondeow. Ngo metam mamix imeajtsan atnej nipilan ngo mandüjpiw Teat Cristo, cos ngo majawüw nguineay apmajlüyiw alinoic nüt.

<sup>14</sup> Ajawaats Teat Jesús tandeow, ndoj tapac alinomb. At ajawaats Teat Dios apmüch miün mandilileaw nöiquian maquiüjpüw Teat Jesús meáwan monyar andeac nej leawa landeow.

<sup>15</sup> Nganüy sasajan icon aag agüy leaw tapiüng Teat Jesucristo, cos icootsa leaw aliünaats mapacaats lapeay Teat Jesucristo, ngondom mamongoots ombas nejiw leawa landeowüw.

<sup>16</sup> Cos nejay Teat Jesucristo aliüc imiün cielo, apmandeac napac müüch manguiayaran. Aaga natang ángel apmandeac napac, y nots trompet ocueaj Teat Dios apmajünts. Quiaj ombas apmapacüw meáwan mondeow leawa tayariw andeac Teat Cristo.

<sup>17</sup> Condom icootsa leawa aliünaats mapacaats ningüy wüx iüt, aton apxaijnguiamoots nöiquian maquiüjpaats tiül oic mangochiüts Teat Jesucristo. Quiaj apmajlüyüts nöiquian maquiüjpaats Teat Jesús meáwan nüt.

<sup>18</sup> Nganüy ijchan mapac imeajtsan nop alinop wüx aaga poch quiaj.

## 5

<sup>1</sup> Xecojow xechijquaw, ngo narangan wüx nawiiig ngün neat ngün nüt apmajlüy aag ayaj, cos ngo metam majawaats ngow.

<sup>2</sup> Cos icona lamejawan wüx nüt aliüc Teat Jesucristo, aag ayaj wüx ngo mateotsaran, atnej arang nop need wüx apmajmel ongwiüts maneed.

<sup>3</sup> Wüx nipilan apmapiüngüw: “Nganüy najneajay ajlüyüts ngo majlüy nicuajind naél”, mawüw, quiaj aliüc miün najénan androm ombasüw. Aag ayaj atnej arang nop najtaj, cos ngondom mewüneay wüx, netam mamongoch aaga necoy wüx apwijquiam micual nej.

<sup>4</sup> Nganüy icona xecojow xechijquaw, langome apmejlüyiün tiül aaga ngo majneaj atnej pojniün quiaj. Aaga nüt wüx aliüc Teat Jesucristo ngome apmasap icon wüx, ngome atnej arang nop need wüx ngo mateotsaran.

<sup>5</sup> Meawarónan ijlüyiün tiül ran, ngo mejlüyiün tiül pojniün. Lango majlüyüts tiül pojniün, at aton ngo majlüyüts tiül ongwiüts.

<sup>6</sup> Pares ngondom marangaats atnej arangüw jangantanej nipilan, cos ajlüyüwan at nejiw monneay. Nganüy icoots netam mapacaats wüx leaw aliüc miün, marangaats palanüy najneaj. Netam majiüraats fis, ngo matnej mongün.

<sup>7</sup> Ajawaats ameyaran ongwiüts. At aton mongün ongwiüts más angüniw.

<sup>8</sup> Pero icootsa ajlüyüts tiül ran, cos ayariüts andeac Teat Dios. Netam maxomaats omeajtsaats wüx marangaats najneaj, ngo matnej arang mongün. Cos sitiül ajawaats naleaing teamandüjpiiüts Teat Jesucristo, at sitiül ajjürayoots lasta, aag ayaj apmambeol icoots atnej camix manchiüc ambeol soldados tiül montsoj.

Aton cos ajawaats naleaing apmawaats wüx meáwan ngo majneaj; aag ayaj apmambeol icoots atnej sombrero manchiüc ambeol soldados.

<sup>9</sup> Cos Teat Dios ngo marriiüd icoots mayac icoots tiül ngo majneaj, nej tüüch miün Miteatiiüts Jesucristo mawün icoots wüx asoetiüts.

<sup>10</sup> Nej tandeow ingow andeowaats. Masey almapacaats masey landeowaats, almajlüyiiüts nóiquian maquiüjpaats meáwan nüt.

<sup>11</sup> Pares ich mapac imeajtsan nop alinop wüx leaw indüjpiün atnej tanaámb teamerangan quiaj. Aton ermbeolayon membichan mejawan wüx Mipoch Teat Dios.

*Pablo asaj nejiw nguineay netam marangüw*

<sup>12</sup> Xecojow xechijquiaw, sasajan icon netam merangan casa ajcüwa monajiüt leaw Teat Dios ayac marangüw minajiüt nej tiül icona, mambeolüw icon y mapaj icueajiün.

<sup>13</sup> Netam merangan nejiw casa mendiüman, cos arangüw minajiüt Teat Dios tiül icona; najneájan mejawan nop alinop tiülan icona, nde mejcüjiün.

<sup>14</sup> At aton sasajan icon xecojow xechijquiaw, ipajan ocueaj leaw neánch, isajan netam marang najiüt. Netam meajchiün mapac omeaats monmix omeaats, at imbelolan leaw napateay ajaw. Netam meiücan wüx cuajantanej arangüw nipilan.

<sup>15</sup> Ijawan wüx, nde mepalüchiün ombas jane arang ngo majneaj wüx imbasan, iyamban merangan najneaj wüx nop alinop, at wüx meáwan nipilan.

<sup>16</sup> Netam mapac imeajtsan meáwan nüt.

<sup>17</sup> Itajcan orar Teat Dios, itüniün ocueaj, nde paxiüm.

<sup>18</sup> Ijchan gracias Teat Dios wüx meáwan cuajantanej. Aag ayaj andiüm Teat Dios merangan, cos lameyariün andeac Teat Cristo Jesús.

<sup>19</sup> Nde mepalan Nangaj Espíritu ocueaj Teat Dios; ijchan marang leaw andiüm tiül icona.

<sup>20</sup> Nde mepiüangan ngo membeat leaw Nangaj Espíritu üüch nop alinop mequiaachayon wüx.

<sup>21</sup> Pero naleaing netam mejawan wüx meáwan leaw aquiajchich, meyariün áagan leaw naleaing najneaj.

<sup>22</sup> Leawa ngo majneaj nde meyariün merangan.

<sup>23</sup> Nejay Teat Dios, aaga neech majlüy monajneaj, alndom müüch icon merangan palan najneaj. Nej apmajaw wüx miespíritujan, imeajtsan, at micuerpojan. Quiaj alndom mejlüyiün najneajay, ngo mejiüran nisoet wüx aliüc alinomb Miteatiiüts Jesucristo.

<sup>24</sup> Cos aaga nerriiüd icon quiaj, najneajay ajlüy, apmarang leawa lamapiüng.

*Ndójwüx atepeay*

<sup>25</sup> Xecojow xechijquiaw, itüniün Teat Dios mambeol xicon.

<sup>26</sup> Aton itepeayiün tamtámban meáwan minipilan Teat Cristo.

<sup>27</sup> Sasaj icon wüx minüt Teat Dios, netam meteowan aaga nawiiig cam manguiaiyw meáwan minipilan Teat Cristo.

<sup>28</sup> Sandiüman Miteatiiüts Jesucristo tanaámb mambeol icon, tambtámban ijlüyiün. Amén.

**Amb iwic nanderac arang  
wüx nawiiḡ San Pablo müüch  
minipilan Teat Cristo moncül  
tiül Tesalónica  
2ª TESALONICENSES**

*Atepeay*

<sup>1</sup> Xique Pablo salnaquiüjpüw Silvano y Timoteo, sarang aaga acas poch cam, natepeayüün icon meáwan hermanos moncül tiül cambaj Tesalónica, cos icona ijlüyüün nóiquan mequiüjpan Teat Dios at Miteatiüts Jesucristo.

<sup>2</sup> Sandiüman Teat Dios at Miteatiüts Jesucristo müjchiw icon mimonajnejaw, at mejlüyüün najneján tiül imeajtsan.

*Teat Dios apmajaw wüx asoeteran wüx aliüc Teat Cristo*

<sup>3</sup> Xecojow xechijquiaw, meáwan nüt netaam nüjchiün gracias Teat Dios cos icona al-mendüjpiün Teat Cristo. Icona ajüic tengual itangan xeyay wüx indüjpiün Teat Jesucristo cos xeyay ijiürayon lasta.

<sup>4</sup> Por aag ayaj sandeacan najnej wüx icona tiül meáwan noicnoic ajlüy mondüüb Teat Dios. Sandeacan nguineay iücan wüx cuajantanej, at tanaám indüjpiün Teat Jesús, masey tengual memongochiün xeyay naél, xeyay moncüy.

<sup>5</sup> Meáwan aaga imongochiün quiaj ajüiquich Teat Dios najnej arang, teambeol icon, mejlüyüün najnejay wüx apmejmeliün tiül micambaj nej.

<sup>6</sup> Teat Dios apmepalüch ombas jane nerang ngo majnej wüx imbasan, cos nej atquiaj arang, apalüch ombas jane arang ngo majnej.

<sup>7</sup> Icona, cos atquiaj tememongochiün, apmeajndiün mejlüyüün najnej alinoic nüt, ata xicon aton. Apmajlüy aag ayaj wüx Teat Jesús apmandilil imiün tiül cielo tiül oniw biümb, maquiüüb miün napac miángeles nej.

<sup>8</sup> Cos nej aliüc mapalüch ombas wüx ombasüw jane ngo mandium Teat Dios, aton jane ngo mayar aaga najnej nanderac wüx Miteatiüts Jesucristo.

<sup>9</sup> Ajcüwa nipilan quiaj apmambüw tiül xeyay ngo majnej, tiül castigo niüng apmajlüyiw meáwan nüt, ngondom mawüw mambüw niüng ajlüy Teat Dios; at ngondom majawüw nguineay ajnej niüng ajlüy Teat Dios, nguineay Teat Dios arang cuajantanej najnej.

<sup>10</sup> Aag ayaj apmajlüy wüx nüt aliüc Teat Jesucristo maxejneng minipilan nej, apmapac omeajtsüw xeyay, apmandeacüw najnej wüx nej, apmarangüw nej casa meáwan mondüüb nej. At icon aton

apmequiüjpan cos teyariün sandeacan wüx nej.

<sup>11</sup> Por aag ayaj xicona tanaám satajcan orar por icona. Satüniün ocueaj Teat Dios mambeol icon merangan aaga najnej leawa nej lamarriüüd icon para merangan. Satüniün mambeol icon, müüch icon ndoj imbasan merangan meáwan najnej leaw indüman merangan, at meáwan najiüt leaw alndom merangan cos iyariün andeac Teat Cristo.

<sup>12</sup> Por aag ayaj meáwan nipilan apmandeacüw xeyay najnej wüx minüt Miteatiüts Jesucristo, cos ajawüw nej teamambeol icon merangan najnej. At apmandeacüw najnej wüx imbasan cos ajawüw icona ocueaj icon Teat Jesucristo. Aag ayaj apmajlüy cos Teat Dios y Miteatiüts Jesucristo üüch icon mimonajnejaw.

**2**

*Apmajüiquich nop nerang xeyay ngo majnej*

<sup>1</sup> At aton xecojow xechijquiaw, sanasaj icon wüx nguineay aliüc Miteatiüts Jesucristo maxejneng icoots majlüyüits niüng nej ajlüy.

<sup>2</sup> Sasajan icon nde meajchiün aljane mitsoj imalan, nde mbayameron. Cos sitiül aljane mapiüng algün espíritu tüüch nej majaw lamatüch a nüt lapeay Teat Cristo alinomb, tengwüy aljane tasaj nej, tengwüy mapiüng xique tarangas nawiiḡ napiüng aag ayaj, nde mepiüangan naleaing.

<sup>3</sup> Ndeme aljane mawaiich icon, cos ngondom mapeay aaga nüt quiaj sitiül ngome ombas majlüy nadam moncüy, at xeyay nipilan apmacueatiw mandüjpiw Teat Dios. Apmejüiquichay nop naxey nerang xeyay ngo majnej; aag ayaj nerang minajiüt nimeech; alinoic nüt apmamb tiül castigo.

<sup>4</sup> Nej ajcüy majaw Teat Dios, at ajcüy majaw meáwan cuajantanej leaw ajüür minüt dios, y cuajantanej leaw arangüch casa. Nej apmajmel tiül aaga nadam nangaj iüm ocueaj Teat Dios, apchetem quiaj mapiüng dios nej.

<sup>5</sup> ¿Ngo leaam imeajtsana, tasajas icon aag ayaj wüx sal ninguiaja?

<sup>6</sup> Nganüy icona ijawan cuane teamepal aaga nerang minajiüt nimeech quiaj; condom leaw atüch a nüt, quiaj apmejüiquichay.

<sup>7</sup> Masey minajiüt aaga ngo majnej naxey quiaj tearangüch nganüy, pero nganaw mejüiquichay. Wüx Teat Dios apmawün aaga nepal nej,

<sup>8</sup> quiaj aaga ngo majnej naxey apmejüiquichay nómban. Condom wüx apmandilil Teat Jesús con xeyay najnejay,

quiaj apmambiy nej wüx apmapep miifünd nej, quiaj apndrom ombas aaga naxey.

<sup>9</sup> Aaga naxey nerang ngo majneaj quiaj, minatängwü nimeech nenüt Satanás tüüch nej miün. Pares ndot ombas marang xeyay cuajantanej, at alndom marang ateočan mawaiich nipilan.

<sup>10</sup> Apmayambiy xeyay cuajantanej nguineay alndom mawaiich ajcüwa leaw apndrom ombasüw, apmambiw tiül castigo cos ngo mandiumüw mayariw aaga naleaing poch leaw alndom mawün nejwü wüx asoetiw nejwü.

<sup>11</sup> Quiaj Teat Dios apmüüch mawaiicharanüw xeyay, apmandüjpiw leaw ngo maleaing, leaw apiüng aaga newaiich quiaj.

<sup>12</sup> Por aag ayaj apmambiw tiül castigo meáwan nejwü leawa ngo mandiumüw mayariw aaga poch naleaing leawa taquiaach Teat Jesucristo, cos xeyay apac omeajtsüw marangüw ngo majneaj.

#### *Lamarriüd icon Teat Dios*

<sup>13</sup> Xecojow xechijquiaw, netam müjchiüts gracias Teat Dios cos sawanan xeyay andiumüw icon. Nde tanomb lamarrüüd icon mawün icon wüx isoetiün; tüüch icon Nangaj Miespiritu nej mejneajiün, müüch mendüjpiün leawa naleaing.

<sup>14</sup> Wüx tasajasan icon wüx aaga najneaj nanderac nguineay alndom maw nisoet, quiaj Teat Dios tarriüüd icon mejlüyiün najneajay, mejlüyiün nöiquian mequüjpan Teat Jesucristo alinoic nüt.

<sup>15</sup> Nganüw xecojow xechijquiaw, irangan leaw alndom imbasan, nde mecueatiün leaw taquiaachasan icon, masey leaw lanasajan icon wüx tajlüyasan niüng ijlüyiün, tengwüw leaw sarangan wüx nawüig.

<sup>16</sup> Sandiüman Miteatiüts Jesucristo y Miteatiüts Dios, áag nejür icoots lasta, neech majneaj omeajtsaats meáwan nüt, áag nembeol icoots neech majlüyiüts najneajan wüx teamacüliüts mandilil Teat Cristo.

<sup>17</sup> Sandiüman nej müüch mapac imeajtsan, mambeol icon mendeacan najneaj wüx nej, tanaám merangan meáwan minajiüt nej.

### 3

#### *Itüniün ocueaj Teat Dios mambeol xicon*

<sup>1</sup> Nganüw xecojow xechijquiaw, itüniün ocueaj Teat Dios mambeol xicon. Isajan Teat Dios müüch majü najen aaga najneaj nanderac wüx Teat Jesucristo manguiyaran tiül meáwan cambaj, müüch mayarich aaga najneaj nanderac atnej icona tenguiayiün, ndoj teyariün.

<sup>2</sup> Itüniün aton ocueaj Teat Dios mambeol xicon nganandot aleaic marangüw wüx ximbasan nipilan monrang ngo majneaj,

cos ngome meáwan nipilan andiumüw mayariw andeac Teat Dios.

<sup>3</sup> Nganüw ich leaam imeajtsan, Teat Jesucristo ngome apmacueat icon; apmajiüt icon nganandot matüch icon nimeech.

<sup>4</sup> Teat Dios lamüüch mapac ximeajtsan wüx icona cos sawanan tanaám teamerangan leaw saquiajchiün icon; at sawanan tan iriümban apmerangan aag ayaj.

<sup>5</sup> Aton satüniün Teat Dios mambeol icon meyajcan tiül imeajtsan nej xeyay andiumüw icon, müüch meücan wüx cuajantanej naél atnej tarang Teat Cristo.

#### *Netam merangan najiüt*

<sup>6</sup> Xecojow xechijquiaw, sasajan icon wüx minüt Miteatiüts Jesucristo, nde mequüjpan nop leawa neánc ngo mandiumüw marang najiüt, tengwüw nop leawa ngo mandiumüw marang leawa saquiajchiün icon.

<sup>7</sup> Icona lamejawan netam merangan atnej tarangasan, cos wüx tacülasan ninguiaj naquüjpan icon, ngo neanchiün.

<sup>8</sup> Ngo nayariün ocueaj nejingüind netetiün anüüng nej. Ngwüw tarangasan xeyay najiüt, sambichayon sapacan nüt ongwiüts, ngana nüjchiün icon mejüran naél.

<sup>9</sup> Masey alndom natüniün nawiülaranan, ngwüw xicona tarangasan najiüt mejawan nguineay netam merangan aton.

<sup>10</sup> Cos wüx tajlüyasan ninguiaj tasajasan icon sitiül aljane ngo mandiumüw marang najiüt, ich maifünd.

<sup>11</sup> Sanguaiyiün altiül acas icona ajlüyan, ngo marangüw nicuajind najiüt, pero apalpalüwan alinop.

<sup>12</sup> Ajcüwa nipilan quiaj, sasajan y sapajan ocueajiw wüx minüt Miteatiüts Jesucristo, marangüw najiüt najneajan para maxomüw üetiw.

<sup>13</sup> Xecojow xechijquiaw, nde paxiüm icueajiün merangan najneaj.

<sup>14</sup> Sitiül aljane ngo mayar leawa teanasajan icon tiül aaga nawüig cam, iyacan wüx iniüjcan, nde mequüjpan, para maxing.

<sup>15</sup> Nde mejcüyiün mejawan, pero ipajan ocueaj cos nej aton ayamb Teat Dios.

#### *Ndójwüx atepeay*

<sup>16</sup> Sandiüm nejay Teat Jesucristo, aaga neech monajneaj, tanaám müüch icon monajneaj wüx meáwan cuajantanej irangan, maquiüb icon nguiajantanej.

<sup>17</sup> Nganüw xique Pablo sarang naag xiwix satepeay icon cam. Aag agüw sarang tiül meáwan xenawiig.

<sup>18</sup> Miteatiüts Jesucristo mambeol icon meawarónan. Amén.

## Anoic nanderac tarang San Pablo müüch Timoteo 1<sup>a</sup> TIMOTEO

*Teat Pablo atepeay teat Timoteo*

<sup>1</sup> Miteatiüts Dios aaga newün icoots wüx asoetiüts, aton Miteatiüts Jesucristo aaga teamacüliüts, tayacüw xique Pablo narang nop apóstol ocueajiw.

<sup>2</sup> Timoteo, xique sarang aaga acas poch cam nüüch ique, cos sayaag atnej naleaing xecual ic cos lamayariüts andeac Teat Dios. Tanaám ich mambeol ic Miteatiüts Dios y Miteatiüts Cristo Jesús, majiür ic lasta, müüch ic xeyay monajneaj.

*Jawan wüx ajcüwa monquiaach ngo maleaing*

<sup>3</sup> Nganüy sanasaj ic alinomb aag atnej tasajas ic wüx nganaw namb sandüy tiül iüt Macedonia. Cos tasajas ic mecúlan tiül cambaj Efeso mesajüw ajcüwa monquiaach quiaj ngo metam maquiajchiw leawa tea-maquiajchiw, cos altiül aquiajchiw ngo maleaing.

<sup>4</sup> Isajüw macueatiw andeacndeacüw leaw ngo metam; nde mayambüw mandeacüw wüx mixejchiw nde tanomb. Cos aag ayaj ngo mambeol icon nicuajind mejawan leaw Teat Dios andiüm merangan wüx indüjpiün Teat Cristo; más naleaing para miün majlüy wüx mondeacndeac.

<sup>5</sup> Sasaj ic aaga poch quiaj, cos sandiüm merjiürayon lasta, meyajcan tiül imeajtsan irangan najneaj, y mejawan naleaing indüjpiün Teat Cristo.

<sup>6</sup> Cos altiül lamambiülüjchiw ayaj, andeacndeacüw pálwüx leaw ngo metam.

<sup>7</sup> Masey nejiw apiüngüw nendüyiw wüx aquiajchiw aaga poch tüünd Moisés, pero nejiw ngo majawüw cuane aquiajchiw, ngo majawüw cuane naleaing.

<sup>8</sup> Icootsa ajawaats aaga poch tüünd Moisés, aag ayaj najneaj cos ajawaats cuane ajar, neol tajlüy.

<sup>9</sup> Ajawaats Teat Dios ngo müüch Moisés aaga poch para nipilan arang najneaj. Ngwüy, tayac majüquich asoet jane nerang ngo majneaj, jane nepiüng ngo metam nej monajiüt, nemal nipilan, leawa xowüy arang ngo majneaj, jane ngo metam nej Teat Dios, jane ngo mayar andeac Teat Dios, jane nembiy miteat nembiy mimüm, at meáwan monbiy nipilan.

<sup>10</sup> At Moisés tüünd aaga poch majüquich ngo majneaj arang leaw monjiür minajtaj, leaw monjiür minaxey, leaw naxey aquiüüb naxey, leaw najtaj aquiüüb najtaj, leaw ne-nneed nipilan manüüb, leaw newaiich wüx cuajantanej, leaw newaiich apaj wüx minüt

dios, leaw ngo mayar leaw apiüng Mipoch Teat Dios.

<sup>11</sup> Meáwan aag ayaj lamapiüng tiül aaga najneajay nanderac wüx Teat Cristo, nguineay awün asoetiüts. Aaga nanderac quiaj tündiüs nandeac, tüüch xic najneajay Miteatiüts Dios.

*Teat Pablo iüch gracias*

<sup>12</sup> Süüch gracias Miteatiüts Jesucristo, aaga nembeol xic narang aag ayaj, cos tajaw xique sanarang leaw apmapiüng. Áag tayac xic narang minajiüt nej.

<sup>13</sup> Masey nomb titsojos Teat Cristo, tayambas ombasüw monyar nej andeac, tandeacas xeyay ngo majneaj wüx nej. Pero tajiürüchiüs lasta cos tarangas ayaj wüx ngo najaw nicuajind, wüx nganaw nandüüb Teat Cristo.

<sup>14</sup> Miteatiüts Dios tüüch xic xeyay mimonajneaj nej, xeyay tajiür xic lasta, tambeol xic nandüüb Teat Cristo Jesús.

<sup>15</sup> Aaga poch cam naleaing, netam mayar meáwan nipilan: Teat Cristo Jesús tiün wüx iüt mawün wüx asoetiw nipilan, cos meáwan nipilan arangüw ngo majneaj. Sayaag xique najtsop sarang ngo majneaj, cos xeyay ngo majneaj tarangas.

<sup>16</sup> Masey najtsop sarang xeyay ngo majneaj, tajiürüchiüs lasta cos atquiaj alndom majüic nguineay Miteatiüts Jesucristo xeyay aiüc wüx leaw arangüw nipilan. Wüx aag ayaj nipilan alndom majawüw nguineay tajiürüchiüs lasta. Quiaj apmandiümüw mayariw andeac nej, mapacüw meáwan nüt majlüyiw najneaj niüng ajlüy Teat Dios.

<sup>17</sup> Najneajay ajlüy Minatang Nenajiüt, nej aaga Rey almapac meáwan nüt, nej ngo majiür ümb, masey ngondom maxomaats majawaats. Néjan Teat Dios, ngo majlüy alinop dios. Netam najchiüts gracias meáwan nüt, masajaats najneajay ajlüy meáwan neat, ¡Amén!

<sup>18</sup> Timoteo, sayaag ique ijlüy atnej xecual. Sasaj ic netam merang atnej tanderac tanomb wüx imbas. Nganüy irang atnej tesoic, irang con imeaats atnej arang nop soldado wüx ajlüy tiül montsoj.

<sup>19</sup> Tanaám indüüb leawa lameyar ocueaj Teat Dios. Irang leaw iyaag tiül imeaats najneaj. Cos ajlüy acas masey ayajcüw cuane najneaj, ngo marangüw leaw ayajcüw quiaj, arangüw leaw andiümüw nejiw. Ngo mayacüw omeajtsüw wüx mayariw andeac Teat Dios.

<sup>20</sup> Atquiaj tarangüw Himeneo y Alejandro. Condom xique tayacasüw teowix a Satanás majawüw ngondom mitsojow Teat Dios.

## 2

*Aquiaach wux atajcüh orar*

<sup>1</sup> Nğanüy sanasaj ic wux leawa más netam. Itün ocueaj Teat Dios mambeol meáwan nipilan, isaj Teat Dios müüch leawa netam nej popnop nipilan nguiajantanej ajlüyiw. At netam müünd gracias Teat Dios wux leaw lamarang.

<sup>2</sup> Netam metün ocueaj Teat Dios mambeol meáwan montangtang monajiüt. Itün Teat Dios mambeol monajiüt nguiajantanej ajlüyiw, cos atquiaj alndom majlüyüüts najneájan, ngo majlüy xeyay naél, ngo majlüy monstoj y monbiy. Atquiaj alndom mayajcaats, marangaats leaw andiüm Teat Dios, cos aag ayaj más xeyay netam.

<sup>3</sup> Miteatiüts Dios newün icoots wux asoetiüts, najneaj majaw aag ayaj.

<sup>4</sup> Teat Dios andiüm mawün wux asoetiw meáwan nipilan, müüch majawüw naleaing leawa nej tapiüng.

<sup>5</sup> Áagan nop Teat Dios almajlüy, aton áagan nop ajlüy de teat mambeol nipilan niüng ajlüy Teat Dios. Aag ayaj Teat Jesucristo cos nipilan nej aton.

<sup>6</sup> Nejáyan quiaj teyacüy mandeow mawün wux asoetiw meáwan nipilan. Cos wux tatüch a nüt, quiaj tejüiquichay, tajüic jane nej.

<sup>7</sup> Wux aag ayaj tarriüd xic Teat Dios nandeaac andeaac nej, najlüy apóstol, naquiajchiw pálwux nipilan ngome judíos majawüw cuane naleaing, mayariw andeaac Teat Dios. Xique aag ayaj sandeaac wux, aag ayaj naleaing, ngondom nawaiich.

<sup>8</sup> Sandiüm nipilan nguiajantanej matajcüw orar, mandeaacüw maquiüjpüw Teat Dios. Wux aljane andic cawüx owix mataag orar netam mayaag tiül omeaats ngo majiür nisoet, ngondom majcüy majaw aljane, at ngondom masajsaj aljane wux cuajantanej.

<sup>9</sup> At montaj netam masoijquiw apixaw nejiw asjneaj, ngo merangrangayej wux leaw asoijquiw, ngome para majarawüw. At ngo metam merangrangayej wux mapeatiw omalüw nejiw atnej arangüw altiül. Ngo metam mandijquiaw xeyay oro, tengwüy xeyay perla, tengwüy masooiq xeyay nembeat napixeran melombochayej wux.

<sup>10</sup> Cos montaj leaw ayariw andeaac Teat Dios, ingow merangrangayej wux napixeran netam marangüw najneaj, majüiquichaw naleaing andüjpiw Teat Dios.

<sup>11</sup> Montaj ich ndijchiümójan manguiyayiw leawa teaquiajchich; nejiw ngondom marangüw natang.

<sup>12</sup> Xique ngo nüüch montaj maquiajchiw tiül nipilan; at sapiüng ngondom majlüyiw wux masajüw monxey nguineay netam marangüw. Naleaing ich manguiyayiw ndijchiümójan.

<sup>13</sup> Sandeaac atquiaj cos Adán ombas tarangüch, tarang nej Teat Dios, ndoj tarang a Eva.

<sup>14</sup> Condom aaga müm najtaj quiaj ombas mawaiicheran, ngome Adán. Ndoj aaga najtaj quiaj tarang nisoet.

<sup>15</sup> Masey tarang xeyay ngo majneaj, Teat Dios apmawün nej wux, ngo mandeow wux apmawiquiach micual nej sitiül tanaámb andiüm Teat Dios, ajiür lasta jangantanej, arang najneaj, y ngo merangrangüy wux nicuajind.

## 3

*Nguineay netam marangüw natang monajiüt tiül noic ajlüy minipilan Teat Cristo*

<sup>1</sup> Naleaing leaw anderac: Sitiül aljane andiüm marang natang nenajiüt, aag ayaj najneaj, ich marang.

<sup>2</sup> Sitiül aljane apmarang natang nenajiüt tiül icona, netam mayac wux omeaats marang palanüy najneaj. Netam majiür áagan nop mintaj nej, majlüy najneájan, majaw cuane najneaj netam marang. Netam mapac omeaats majaw jangantanej masey müüch maxood aniüng nej; netam majlüy nop ndoj ombas maquiaach najneaj.

<sup>3</sup> Ngondom mangün, ngondom mayambyamb moncüy, ngondom mayac omeaats wux mandüümdiüm tomiün. Netam majiür lasta nipilan, majüic ajneaj omeaats.

<sup>4</sup> At netam majaw wux aniüng nej, mambeol mintaj nej micual nej, cos atquiaj apmayariw nej andeaac, marangüw leawa apmapiüng.

<sup>5</sup> Sitiül aljane ngondom majaw wux aniüng nej, nguineay alndom majaw wux noic ajlüy monyar andeaac Teat Dios.

<sup>6</sup> Nop jayats ngondom marang natang nenajiüt tiül monyar andeaac Teat Dios, jondot merangrangüy wux atnej nimeech tarang, ndoj apmajmiüc tiül xeyay nisoet.

<sup>7</sup> Nop natang nenajiüt tiül icona netam mayamb nguineay alndom majiür monajneaj maquiüüb nipilan leawa ngo mayariw Mipoch Teat Dios. Cos sitiül apmandeaacndeaacüw wux leawa nej arang, ajan wux aag ayaj nimeech alndom malox nej tiüt.

*Nguineay netam marang diáconos*

<sup>8</sup> At ajcüwa diáconos aton netam majlüyiw najneájan, ngondom marangüw ndeaac mbeay, ngondom mangünüw, ngondom mayacüw wux omeajtsüw mawaijchaw maxomüw tomiün.

<sup>9</sup> At aton netam mandüjpiw aaga najneaj poch leaw Teat Dios tüüch icoots mayariüts, mayajcüw tiül omeajtsüw arangüw najneaj.

<sup>10</sup> Ombas netam majarawüw nguineay arangüw, condom sitiül ngo maxoram ngo majneaj wux aag ayaj, ich marangüw diáconos.

<sup>11</sup> Átan mintajűw nejiw netam majlűyiw najneajan, nde mandeacűw wűx ombas aljane. Nde marangűw nicuajind arangűwan; ich marangűw leaw asoiquiw najneaj miűn.

<sup>12</sup> At aton ajcűwa diáconos alndom majiűrűw áagan nop mintajűw nejiw. Netam ndom ombasűw majawűw wűx, mambeolűw mintajűw nejiw, micualűw nejiw, y mimosűw nejiw.

<sup>13</sup> Cos sitiűl ajcűwa diáconos arangűw minajiűtűw nejiw najneaj, quiaj apmarangűchiw casa, at apmajiűrűw andeacűw nguineay andűjpiw Teat Cristo Jesús.

*Lamajawaats nganűy leawa nomb ngo mejűiquichay*

<sup>14</sup> Tarangas aaga nawiiig cam masey tealeámban napiűng sanamb najaw ic najen.

<sup>15</sup> Cos nganandot nequiy namb, lamenguaiy tam nguineay netam marangűch tiűl noic ajlűy monyar andeac Teat Dios, ajcűw ayaj iglesia ocueaj Teat Dios almapac; cos ajiűrűw aaga naleaing poch, y aquiajchiw áagan leawa naleaing.

<sup>16</sup> Ajawaats nejinguid nejáyan quiaj ngondom mambich majaw nguineay Teat Jesús lamawűn icoots wűx asoetiűts. Pero naleaing ajawaats leawa tarang:

Cos tejűiquichay marang nipilan;  
Nangaj Espiritu tajűiquich Teat Jesucristo palűyan najneaj arang,

tajawűw nej nangaj ángeles.  
Tanderac wűx nej tiűl meáwan palpálwűx nipilan;

tayariw mipoch nej meáwan wűx a iűt cam;  
ndoj tandilil najneajay andűy cawűx tiűl cielo.

## 4

*Altiűl apmandűjpiw monquiaach ngo majneaj*

<sup>1</sup> Pero aaga Nangaj Espiritu ranűy apiűng laliűc úmbwűx nűt, wűx altiűl apmacueatiw mandűjpiw leawa naleaing, apmandűjpiw monquiaach leaw ajiűrűw ngo majneaj espiritu, aton altiűl apmandűjpiw leawa lamawaiich nejiw nimeech.

<sup>2</sup> Ajcűwa monquiaach quiaj apmelomboochayej, apmewajchaw, cos xowűy ladam omeajtsűw.

<sup>3</sup> At apmaquiajchiw ngondom majiűrűch mintajaran. Átan apmapiűngűw altiűl nűeteran ngondom műeteran. Pero Teat Dios andiűm monyar andeac nej műjchiw nej gracias cos nejiw ajawűw naleaing meáwan aaga nűeteran quiaj nej neyac.

<sup>4</sup> Meáwan leawa Teat Dios lamarang, aag ayaj najneaj. Nicuajind nűeteran ngondom mapiűrang wűx ngo majneaj ajlűy sitiűl apmayajcaats Teat Dios neyac meáwan y műjchiűts gracias.

<sup>5</sup> Aaga nűeteran quiaj najneaj cos Mipoch Teat Dios apiűng najneaj; aton najneaj cos űjchiűts gracias Teat Dios.

*Nop najneaj nerang najiűt ocueaj Teat Cristo*

<sup>6</sup> Sitiűl aag ayaj apmequiajchiw wűx meáwan monyar andeac Teat Dios, apmejlűy nop najneaj nerang minajiűt Teat Jesucristo. Tanaámb apmewaw más, aton apmepac wűx aaga poch leawa lamendűűb.

<sup>7</sup> Nde meyac wűx imeaats andeacűw mondeacdeac; aag ayaj ngo mambeol nicuajind. Pero iyac imeaats wűx mendiűm leaw andiűm Teat Dios.

<sup>8</sup> Cos wűx iwind xiűt merang cuajantanej, aag ayaj ngo mambeol ic xeyay; nganűy wűx irang leaw andiűm Teat Dios aag ayaj apmambeol ic xeyay, cos aag ayaj meáwan nűt apmambeol ic, ngome áagan nganűy.

<sup>9</sup> Aaga poch quiaj naleaing, meáwan nipilan netam mayariw.

<sup>10</sup> Wűx aag ayaj icoots arangaats xeyay najiűt masey ajlűy naél, cos teamandűjpiiűts Teat Dios. Nej almapac, alndom mawűn wűx asoetiw meáwan nipilan jane ayariw andeac nej.

<sup>11</sup> Ajcűwa poch quiaj netam mequiajchiw wűx nipilan, mesajűw mayacűw wűx omeajtsűw marangűw.

<sup>12</sup> Nganűy ique Timoteo, ijaw wűx leaw irang, irang najneaj nganandot ngo mayariw iquiaach cos monguich ic. Irang najneaj majawűw meáwan monyar andeac Teat Dios nguineay indeac, mejűiquich nguineay mimonajneaj, nguineay ijiűr lasta nop alinop, nguineay ambeol ic Nangaj Espiritu meyar andeac nej, nguineay irang palűyan najneaj.

<sup>13</sup> Masey nganaw napeay ninguij, ique tanaámb iteow Mipoch Teat Dios manguiayiw, iquiajchiw, isajűw nguineay netam marangűw.

<sup>14</sup> Ijaw wűx, tanaámb indűűb opech irang leawa landerac wűx imbas nomb nguineay apmerang. Aag ayaj wűx tayacűw owixaw wűx imal ajcűwa montangtang monajiűt tiűl monyar andeac Teat Dios, ndoj tatűniw Teat Dios mambeol ic.

<sup>15</sup> Irang aaga najiűt quiaj najneaj, quiaj apmajűic ique tengual ijntsop wűx minajiűt Teat Dios.

<sup>16</sup> Ijaw wűx iquiáyan quiaj, y wűx leawa iquiaach. Tanaámb indűűb wűx aag ayaj, cos sitiűl atquiaj irang, apmeriow wűx iquiáyan quiaj, y apmewűniw wűx leawa anguiayiw iquiaach.

## 5

*Nguineay netam merang tiűl noic ajlűy mondűűb Teat Cristo*

<sup>1</sup> Nde melic nop natang ombas naxey, isaj najneaj atnej mesaj miteat. At jane chingüy ipaj ocueaj atnej mesaj michiig.

<sup>2</sup> Átan montang ombas montaj isajüw najneaj atnej mesaj mimüm. At monüx aton isajüw atnej mesaj michiig, pero nde aleaic mepiüng wüx ombasüw.

<sup>3</sup> Imbeol ajcüwa lemben omal montaj jane naleaing landeow minojow nejiw.

<sup>4</sup> Pero sitiül aljane najtaj lemben omal almajiür micual nej tengwüy micual micual nej, nejiw a monguich quiaj ich mambeolüw mimümüw nejiw atnej tambeolaranüw wüx almapac miteatiw nejiw, cos atquiaj najneaj majaw Teat Dios.

<sup>5</sup> Nganüy jane naleaing lemben omal najtaj tiül mondüüb Teat Dios sitiül néjan ajlüy, ngo majiür nejingüind, nej naleaing áagan Teat Dios apmayac wüx omeaats matün ocueaj nüt ongwüüts.

<sup>6</sup> Pero jane lemben omal ndoj apmajüyjüy marang leaw andiüm, masey almapac, ajlüy atnej nop nandeow.

<sup>7</sup> Isajüw meáwan mondüüb Teat Dios wüx aaga sasaj ic quiaj, cos atquiaj ngome apmeliqüiaw.

<sup>8</sup> Sitiül aljane ngo mambeol acualaats nej, ngo mambeol moncül aniüng nej, aag ayaj xeyay ngo majneaj arang, atnej lango mayar Mipoch Teat Dios, lango leaam omeaats nguineay apiüng tiül Mipoch Teat Dios.

<sup>9</sup> Leawa lemben omal najtaj lamajiür er miow (60) mineat nej, y áagan nop minoj nej tajiür, alndom majmel minüt nej wüx noic nawiig mambeolaranüw.

<sup>10</sup> Pero netam majiüc nej mbójan arang najneaj. Sitiül najneaj tatangüüch micual nej, sitiül apac omeaats müüch maxood aniüng nej napeay miün nipilan; sitiül ajants oleajiw napeay miün monyar andeac Teat Cristo; sitiül ajüür lasta mambeol jane teamongoch ngo majneaj; sitiül ayac omeaats wüx marang meáwan najneaj; quiaj alndom majmel wüx aaga nawiig ocueajiw monlemben omal montaj leaw netam mambeolaran.

<sup>11</sup> Pero monguich montaj lemben omal nde meyac minütiw nejiw wüx aaga nawiig, nganandot marangüw leawa nejiw andiümüw, apmengoch owixaw alinomb. Nots quiaj ngome apmayac omeajtsüw wüx marangüw leaw andiüm Teat Cristo.

<sup>12</sup> Quiaj apmajiürüw nisoet cos ngo marangüw leaw lamapiüngüw apmarangüw.

<sup>13</sup> At aton nganandot majüyjüyiw aniüng nipilan, ngo marangüw minajiütüw nejiw. Cos ngome áagan arangüw anch quiaj, ndot mayambüw cuane mandeacndeacüw wüx, masocoj ombeayiw tiül cuajantanej mon-

deac, mandeacüw leaw ngo metam mandeacüw.

<sup>14</sup> Pares sapiüng meáwan monguich montaj lemben omal nandeow minojow nejiw, najneaj sitiül apmengoch owixaw alinomb, majiürüw micualüw nejiw, majawüw wüx aniüngüw nejiw. Quiaj nejingüind ngome apmaxom cuane mandeacndeacüw wüx ombasüw.

<sup>15</sup> Cos almajlüy acas monguich montaj lemben omal lambiüjlawow, lamandüjpiw wüx marangüw leaw andiüm Satanás.

<sup>16</sup> Sitiül aljane tiül minipilan Teat Cristo ajüür micoj nej michiig nej lemben omal najtaj, nej netam mambeol aaga lemben omal quiaj. Ngo majneaj macueat müüch ajcüw noic ajlüy minipilan Teat Cristo mambeolüw. Cos minipilan Teat Cristo netam mambeolüw ajcüwa lemben omal montaj leaw naleaing ngo majiürüw nejingüind.

<sup>17</sup> Ajcüwa montangtang ombas monajiüt tiül noicnoic ajlüy minipilan Teat Cristo leaw arangüw najneaj netam marangüchiw casa, pero netam majntsop wüx marangüchiw casa jane ndoj ombas mandeac wüx y maquiaach Mipoch Teat Dios.

<sup>18</sup> Cos tiül Mipoch Teat Dios apiüng: “Nde meyac minchiüts ombeay a boy wüx arang najiüt acuüüch tiüt trigo maw osaab”, aw. Aton apiüng: “Nop nerang najiüt netam mangüyaran”, aw.

<sup>19</sup> Nde majmel asoet nop natang nenajiüt tiül minipilan Teat Cristo, sitiül ngo majlüy ijpüw arojpw monjaw leawa tarang.

<sup>20</sup> Pero leawa naleaing tanaám arang ngo majneaj, netam mepaj ocueaj niüng ajliýaran, cos atquiaj apmimboloj meáwan mondüüb Teat Cristo.

<sup>21</sup> Sasaj ic wüx minüt Teat Dios, wüx minüt Teat Jesucristo, y wüx ajcüwa nangaj ángeles, netam meyac wüx imeaats merang atnej lanasaj ic quiaj. Nde merang nicuajind sitiül ngo mejaw naleaing nguineay tajlüy; netam merang meáwan atotow.

<sup>22</sup> Nde merang najen meyac iwix wüx omal aljane meaach majiür najiüt tiül minipilan Teat Cristo. Netam mejaw naleaing nguineay arang, nganandot ngo majneaj teamarang, quiaj alndom mapiürang najneajan mejaw leaw arang. At netam mejaw wüx iquiáyan quiaj, merang najneajan.

<sup>23</sup> Alinoic sanasaj ic teat Timoteo, cos xowüy iüniün indeow, ngo majneaj tiül imeaats. Nganüy nde menganeow áagan napac yow; irang misüüg inganeow noic pite win.

<sup>24</sup> Altiül nipilan ranüy ajüiüchay arang ngo majneaj, masey nganaw majaraw wüx ombasüw leaw arangüw. Pero altiül ngo mejüiüchay nganüy, alinoic nüt apmajüic.



<sup>25</sup> Atanquiaj ajlüy aton wüx monrang najneaj, cos altiül nipilan ajüic arang najneaj nganüy, altiül nganaw majüic, condom alinoic nüt apmajüic nguineay arang najneaj.

## 6

<sup>1</sup> Meáwan najon mos najlüyw tiül minipilan Teat Cristo netam marangüw casa neneay nejiw, ngana mitsojoran minüt Teat Dios, tengwüy mitsojoran leaw saquiajchiün icon.

<sup>2</sup> At sitiül neneay nejiw nop minipilan Teat Cristo aton, nde mapiüngüw ngo metam marangüw casa cos nej aton ayar andeac Teat Cristo. Ngwüy, ich majtsopiw wüx arangüw najiüt, cos aaga neneay najiüt quiaj nop minipilan Teat Cristo aton; pares netam mejiür aweaag lasta. Atquiaj netam mequiaach wüx, mesajüw wüx meáwan monyar andeac Teat Dios.

*Xeyay nembeat leawa teamandüjpiiüts*

<sup>3</sup> Sitiül aljane aquiaach pálwüx, ngo matnej aaga najneaj Mipoch Miteatiiüts Jesucristo, tengwüy ngo matnej aquiaachayoots wüx marangaats leaw andiüm Teat Dios;

<sup>4</sup> aag ayaj, arangrangüyan wüx, ngo majaw nicuajind. Lamichach wüx cuajantanej andeac, ayacyácan wüx poch. Aaga poch quiaj witiow wüx mondeacndeac wüx ombasaran, moncüy majaw nop alinop, mondeac ngo maleaing wüx alinop, monteots wüx ngo majneaj,

<sup>5</sup> monyambyamb moncüy cos ayacüw omeajtsüw wüx ngo majneaj, ngo majawüw cuane naleaing. Nejiw apiüngüw alndom maxomüw tomiün wüx leaw andüjpiiüts. Nde mequiüjpüw ajcüwa nipilan quiaj.

<sup>6</sup> Naleaing nembeat xeyay leaw andüjpiiüts, cos aaga atajcaats creer quiaj üüch mapac omeajtsaats, ngo metam xeyay cuajantanej.

<sup>7</sup> Cos wüx wijquiatoots ngo majamiünaats nicuajind wüx aaga iüt cam; at wüx apmandeowaats ngondom majoyiüts nicuajind.

<sup>8</sup> Sitiül ajüiraats ombeat üetiiüts, apixaats, ich mapac omeajtsaats wüx áagan ayaj.

<sup>9</sup> Cos sitiül aljane andiüm majiür xeyay, ajan wüx aag ayaj apmalocooch nej. Quiaj apmandiüm marang cuajantanej ngo majneaj para alndom maxom wüx xeyay. Condom apmbiüjlam wüx mayac omeaats wüx marang meáwan ngo majneaj; quiaj apndrom ombas.

<sup>10</sup> Cos sitiül andiüram xeyay tomiün, wüx aag ayaj witiow arangüch meáwan ngo majneaj. Altiül wüx lamarang aag ayaj lamacueat mandüüw leaw andüjpiiüts. Nejáyan quiaj ayacüy tiül naél, mamongoch ngo majneaj tiül omeaats.

*Tan iriümb irang minajiüt Teat Cristo*

<sup>11</sup> Nganüy ique Timoteo, tan iriümb irang minajiüt Teat Dios, nde mbiüjlamear wüx merang nicuajind aaga ngo majneaj quiaj; indüüb opech leawa najneaj. Cos netam mendüüb leaw andiüm Teat Dios, nde mecueat leaw andüjpiiüts; ijüür lasta nop alinop; iüic wüx meáwan cuajantanej; ich majneaj imeaats mejaw jangantanej.

<sup>12</sup> Iyac imeaats wüx mendüüb Teat Cristo atnej meamb wüx apuesta; isap nandand wüx leaw apmüüch mapacaran meáwan nüt. Cos Teat Dios tarriiüd ic, ndoj tendead manguiyaw xeyay nipilan nguineay lameyar andeac Teat Cristo.

<sup>13</sup> Nganüy sasaj ic wüx minüt Teat Dios, aag teamapaciüch meáwan leaw almajlüy, sasaj ic aton wüx minüt Miteatiiüts Jesucristo, aaga tandead naleaing ngo mimbold wüx taquiüraab mamb niüng ajlüy a gobernador Poncio Pilato.

<sup>14</sup> Wüx minütiw nejiw sasaj ic merang palan leawa lanasaj ic merang, tan iriümb, leaw atüch a nüt mandilil Miteatiiüts Jesucristo. Nde mengowüüch nicuajind, quiaj nejinguid ngondom mayac isoet.

<sup>15</sup> Wüx amatüch a nüt, quiaj Teat Dios, aaga najlüy wüx meáwan leaw almajlüy, apmüüch mandilil Teat Cristo. Néjan Teat Dios alndom marang cuajantanej. Nej najneaj, nej natangüy wüx meáwan montangtang monajiüt.

<sup>16</sup> Néjan Teat Dios ngondom mandeow. Nej acül tiül noic najneajay ran niüng nejinguid ngondom matüch. Nejinguid nipilan ngondom maxom majaw Teat Dios. Néjan netam marangüch casa, cos nej ajlüy wüx meáwan leaw almajlüy, tanaámb meáwan nüt. Amén.

<sup>17</sup> Isajüw leawa monjiür xeyay wüx iüt cam, ngo metam merangrangayej wüx; isajüw ngo mayacüw omeajtsüw wüx leaw almajiürüw, cos aaga ajüürüw quiaj acas nüt ajlüy. Isajüw netam mayacüw omeajtsüw wüx Teat Dios, cos nej almapac, nej üüch icoots meáwan leawa netam para mapac omeajtsaats.

<sup>18</sup> Isajüw ich marangüw najneaj, ich mayacüw omeajtsüw wüx mambeolüw jangantanej, ich müjchiw cuajantanej wüx apmetam, nde marangüw reech.

<sup>19</sup> Pues atquiaj apmüjndiw majiürüw meáwan leaw netam nejiw tiül cielo alinoic nüt, aag ayaj najntsop wüx ajneaj.

*Andondoch tasaj Timoteo*

<sup>20</sup> Teat Timoteo, iyac wüx imeaats irang leawa Teat Dios lamayac tiül iwix merang. Nde meaach nipilan mitsojow imal wüx cuajantanej nanderac, cos ngo membeat nicuajind. Nde meyar nanderac ocueaj nipilan apiüngüw nendüyw, pero monwaich nejiw.

<sup>21</sup> Altiül lamandüjpiw ajcüw ayaj, lango  
mandüjpiw Teat Cristo.  
Tanaám ich mambeolic Teat Dios. Amén.

## Amb iwic nanderac tarang San Pablo müüch Timoteo 2<sup>a</sup> TIMOTEO

*Teat Pablo atepeay teat Timoteo*

<sup>1</sup> Xique Pablo, miapóstol Teat Jesucristo cos Teat Dios tüüch xic narang minajiüt nej, napiüing nguineay Teat Cristo Jesús andiüm müüch nipilan mapac meáwan nüt niüing ajlüy Teat Dios.

<sup>2</sup> Xique sarang aaga nawiig cam nüüch ic, xechiig Timoteo, cos xeyay sandiüm ic. Miteatiiüts Dios at Miteatiiüts Jesucristo tanaám mambeolüw ic xeyay, majiürüw ic lasta, müjchiw ic xeyay monajneaj.

*Andeac wüx leaw arang Teat Cristo*

<sup>3</sup> Xique sayaag tiül ximeaaats sarang minajiüt Teat Dios najneaj, atnej tarangüw xexejchiw. Süüch gracias Teat Dios wüx ique Timoteo. Ngo ndrom ximeaaats ic wüx satün ocueaj Teat Dios masey nüt, masey ongwiiüts.

<sup>4</sup> Xeyay sandiüm najaw ic para mapac ximeaaats, cos meáwan nüt leaaw ximeaaats ic nguineay tejiünts wüx tecueatayor.

<sup>5</sup> At leaaw ximeaaats nguineay lameyar andeac Teat Dios, ngome ipüngan. Cos ombas mimüm vida, müm Loida, at aton mimüm ique, müm Eunice, tayariw andeac Teat Cristo, condom sawaj atquiay ique aton.

<sup>6</sup> Pares sandiüm nasaj ic nde mamong mendiüm aaga najiüt leawa Teat Dios tüüch ic merang wüx tayacas xiwx wüx imal, wüx tatüniüs mambeol ic Teat Dios.

<sup>7</sup> Cos Teat Dios ngo müüch icoots mimbo-laats. Nej ayac icoots mapacaats wüx nej, majiüraats lasta nop alinop, at ngo müüch icoots marangaats leaw andiümaats.

<sup>8</sup> Nde mexing mendeac wüx Teat Cristo; at nde mexing wüx sal tiül manchiüc cos minajiüt nej sarang. Naleaing netam meyac wüx imeaats aaga najneaj nanderac wüx Teat Cristo masey memongoch cuajantanej naél, cos Teat Dios apmüüch ic mefüc wüx cuajantanej.

<sup>9</sup> Teat Dios tawün asoetiiüts, tayamb icoots marangaats leaw andiüm nej. Aag ayaj ngome cos arangaats najneaj, pero cos nej áag andiüm; at cos andiüm majüiquich mimonajneaj nej. Cos wüx nganaw marang a iüt cam, nej lamajaw apmüüch miün Teat Cristo Jesús.

<sup>10</sup> Nganüy lajüic nguineay andiüm marang Teat Dios wüx tüüch miün Miteatiiüts Cristo Jesús mawün asoetiiüts. Nej tandrooch ombas aaga nandewaran quiaj, lamüüch icoots mapacaats meáwan nüt. Aag ayaj ngome apndrom ombas, tajüic

wüx tayariiüts aaga najneaj nanderac wüx Teat Cristo Jesús.

<sup>11</sup> Teat Dios tayac xic narang apóstol, nandeac Nangaj Mipoch Nej, naquiaach monaw palpáwüx iüt wüx aaga jayats nanderac wüx Teat Jesucristo.

<sup>12</sup> Masey wüx aag ayaj teanamongoch cuajantanej, pero ngo naxing, cos sawaj jane sandüüb, at sawaj nej alndom majiür tiül owix nej xenajiüt leawa lanarang, leaw apmajüiquich aaga nüt wüx nej aliüc alinomb.

<sup>13</sup> Tan iriümb iquiaach aaga najneaj poch tenguiay saquiaach. Wüx irang atquiay netam mejüiquich ijiür xeyay lasta, at tan iriümb netam mersapüy nandand wüx Mipoch Teat Dios, áag lamayariiüts cos nóiquian ajlüyüts maquiüjpaats Teat Cristo Jesús.

<sup>14</sup> Iyac wüx imeaats, nde mecueat aaga naleaing poch Teat Dios tüüch ic mequiaach, cos apmambeol ic Nangaj Espiritu ocueaj Teat Dios leaw acül tiül omeajtsaats.

<sup>15</sup> Lamejaw lamacueatiw xic meáwan monaw tiül iüt Asia, altiül Figelo at Hermógenes.

<sup>16</sup> Satün Teat Dios majiür lasta meáwan acualaats teat Onesiforo, cos xeyay tambeol xic. Nej ngo maxing mamb majaw xic, masey sal tiül manchiüc.

<sup>17</sup> Cos nej naleaing wüx tapeay tiül cambaj Roma tayamyamb xic, quiaj taxom xic.

<sup>18</sup> Ique lamejaw nguineay tambeol icor tiül cambaj Efeso aton. Satün Teat Dios mambeol nej, majiür nej lasta xeyay wüx aaga nüt aliüc Teat Cristo.

## 2

*Irang at ic nop najneaj soldado ocueaj Teat Jesucristo*

<sup>1</sup> Ique Timoteo, sayaag jlüy atnej najiür xecual, pares sasaj ic netam mepac wüx Teat Cristo Jesús cos nej teamambeol icoots xeyay.

<sup>2</sup> Aaga poch tenguiay nguineay tandeacas nasajüw xeyay nipilan, atquiay iquiajchiw monxey leaw naleaing lamayariw andeac Teat Dios, cos atquiay nejiw apndom maquiajchiw nop alinop aton.

<sup>3</sup> Ique netam mefüc wüx leaw imongoch wüx indüüb Teat Jesucristo. Irang atnej arang nop najneaj soldado, cos nej aiüc wüx cuajantanej naél.

<sup>4</sup> Nop soldado ngondom marang cuajantanej najiüt tarang nomb, pero netam marang leaw apmapiüing minatang nej.

<sup>5</sup> At aton sitiül nop arang atnej arangüw monpeaxay acuiür, nej ngo müünd nicuajind sitiül ngo matsoj atnej netam.

<sup>6</sup> Aton sitiül nop arang najiüt tiül corrül, nej ombas alndom maxaing omeaats corrül leaw aneay nej.

<sup>7</sup> Iyamb imeaats wüx aaga sasaj ic quiaj, ndoj Teat Dios apmüüch ic mejaw meáwan cuane wüx sasaj ic.

<sup>8</sup> Ich leaam imeaats wüx Teat Cristo Jesús nguineay tapac tiül mondeow. Aton aaga natang nenajiüt tajlüy tanomb, nenüt David, naleaing mixeech nej. Xique mbójan naquiaach wüx aaga najneaj nanderac quiaj.

<sup>9</sup> Cos sandeac aaga najneaj nanderac wüx Teat Cristo, pares taolaranas, teanamongoch ngo majneaj tiül manchiüc cam atnej nop nerang xeyay ngo majneaj. Pero Mipoch Teat Dios niqumias ngondom maelich.

<sup>10</sup> Naleaing xique safüc wüx meáwan aag ayaj, cos atquiaj alndom nambeol leawa lamarriüd nejw Teat Dios manguiayiw nguineay Teat Cristo Jesús lamawün nejw wüx meáwan nisoet, quiaj apmajlüyiw najneaj meáwan nüt.

<sup>11</sup> Aag ayaj naleaing nanderac:

Sitiül landeowaats nóiquian maquiüjpaats Teat Cristo,

quiaj aton apmapacaats maquiüjpaats;

<sup>12</sup> sitiül aiücaats wüx leaw amongochiüts, aton apmaquiüjpaats Teat Cristo wüx arang natang tiül cielo.

Sitiül apmawajchaats mapiüngaats ngo mandüjpiüts,

nej aton apmapiüng ngo majaw jane icoots.

<sup>13</sup> Masey sitiül icoots achiweaats omeajt-saats wüx Teat Dios,

nej tanaám apmarang leawa lamapiüng, cos Teat Dios, ¿nguineay alndom ndrom omeaats leaw lamapiüng apmarang?

#### *Irang najneaj wüx minajiüt Teat Cristo*

<sup>14</sup> Ijchaw leaam omeajtsüw, isajüw wüx minüt Teat Cristo netam macueatiw asajsajayej wüx cuajantanej poch. Cos aag ayaj ngondom mambel nejw nicua-jind. Naleaing awün ngana ocueaj jane teamandüüm manguiay Mipoch Teat Dios.

<sup>15</sup> Irang najneaj leaw alndom merang, quiaj apmajaw Teat Dios temerang minajiüt nej najneaj. Ndoj ngome apmejiür cuane wüx mexing, cos iquiaach áagan leaw Teat Dios lamapiüng naleaing.

<sup>16</sup> Nde mbiüjlamear wüx menguiaynguiay andeacndeacüw nipilan leaw ngo mandüüm Mipoch Teat Dios, cos ngo membeat nicua-jind leaw andeacüw. Wüx aag ayaj witiow arangüw xeyay ngo majneaj.

<sup>17</sup> Aaga poch quiaj apmarang xeyay ngo majneaj atnej noic necoy ngo majaw ndej, andüy quiaj teamatexiich. Cos atquiaj arang leaw aquiajchiw Himeneo y Fileto.

<sup>18</sup> Nejiw lango mandeacüw naleaing, cos apiüngüw landoj apacaran tiül mondeow. Atquiaj lamitsojow omal aljane; altiül lango majawüw nguineay apiüng Mipoch Teat Dios.

<sup>19</sup> Leawa lamapiüng Teat Dios tiül Nangaj Mipoch Nej, aag ayaj apmajlüy meáwan nüt. Nej lamapiüng: “Xique saw jane xicueaj xique”, aw. At aton lamapiüng: “Meáwan mondüüb Teat Cristo netam macueat arang ngo majneaj”, aw.

<sup>20</sup> Tiül nop nadam iüm ngome áagan oro tengwüy plat ajlüy nitajquiaj minajiütaran; altiül narangüch xiül, altiül narangüch iüt. Cos ajlüy acas xeyay netam, at ajlüy alacas nguiajantanej tojlüüm.

<sup>21</sup> Atquiaj icoots ajlüyüts ocueaj Teat Cristo, atnej ajcüwa nitajquiaj minajiütaran quiaj. Cos sitiül macueatiüts meáwan ngo majneaj, quiaj apmajlüyüts atnej ajlüy najneaj nitajquiaj minajiütaran; ndoj Teat Cristo apndom marang meáwan najneaj najiüt leaw nej andüüm marang wüx icoots.

<sup>22</sup> Ique Timoteo, nde mbiüjlamear wüx mendüüb leaw andüüm monench monüx leaw ngo mandüjpiw Teat Cristo. Cos palüyan andüümüw marangüw leaw nejw andüümüw. Pero ique indüüb opech aaga najneaj teamerang quiaj. At indüüb wüx leaw ijaw naleaing, ijiür lasta nop alinop, ich majneaj imeaats mejaw jangantanej, iquiüjpw áagan ajcüw leawa naleaing andüjpiw Teat Cristo.

<sup>23</sup> Nde meyar ombeayiw mondeacndeac cuajantanej ngo metam, cos wüx aag ayaj witiow wüx xeyay moncüy.

<sup>24</sup> Nop nerang minajiüt Teat Cristo ngo metam majmel tiül moncüy; naleaing netam majüquich mimonajneaj nej tiül meáwan nipilan. Netam ndoj ombas maquiaach najneaj, at netam mafüc wüx cuajantanej.

<sup>25</sup> Netam majiür xeyay monajneaj mawüywüy müüch majneaj omeaats jane najcüy majaw nej, ndoj Teat Dios apmüüch nejw leaam omeajtsüw majawüw cuane naleaing.

<sup>26</sup> Quiaj apmawüw teowix nimeech leawa lamasap nejw mayac nejw wüx marangüw andüüm nej.

### 3

#### *Nguineay apmajlüy nipilan wüx laliüc mümb a iüt cam*

<sup>1</sup> At aton Timoteo, netam mejaw aag agüy, cos wüx landüy wüx apmümb aaga iüt cam, quiaj apmajlüy xeyay naél, xeyay ngo majneaj.

<sup>2</sup> Apmajlüy nipilan andüümüy nejáyan quiaj, at apmajlüy mondüümdüüm tomüün,

monlombojchay, monrangrangü, mondeac ngo majneaj wüx Teat Dios. At apmajlüy nipilan ngo mayariw andeac nateataran, nexiül, ngo marangüw casa nicaujind dios.

<sup>3</sup> Altiül nadam omeajtsüw, ngo metam nejiw aljane. Ngondom mawüniw wüx omeajtsüw leaw arang alinop. Andeacüw ngo majneaj wüx ombas alinop. Ngo maiücüw wüx leaw nejiw andiümdümw. Ajcüyiw, ngo majiürüw lasta nejinguid. Itsojayéjan jane nendiüm marang najneaj.

<sup>4</sup> Apmajlüy monwaiich masey ajüic ajneaj aweaag. Apmajlüy monrang leaw andiümw, lango majawüw wüx; ngo marangüw casa nejinguid, lamong wüx alomboochayej. Altiül apmandiümdümw leaw andiümw, ngome leaw andiüm Teat Dios.

<sup>5</sup> Altiül apmapiüngüw arangüw najneaj, apmajüiquiw atnej mondüüb Teat Cristo nejiw pero arangüwan, ngome naleaing.

Nde mequiüjpüw ajcüwa nipilan quiaj.

<sup>6</sup> Cos altiül ajcüwa monquiaach quiaj andiümw majmeliw jangantanej aniüng, maxomüw alngün nechach najtaj mawaijchaw. Ajcüwa montaj quiaj najen apmanguiyaw cos xeyay ajiürüw nisoet, arangüw áagan leawa nejiw andiümw.

<sup>7</sup> Ajcüwa montaj quiaj andiümw manguiyaw leaw aquiaach jangantanej; pero masey nop apmaquiaach nejiw leaw naleaing, ngo mayariw.

<sup>8</sup> Atnej ajcüwa monxey monwüney, nenütiw Janes y Jambres, leawa tandiümw mapalüw a Moisés; atnej nganüy aton ajcüwa nipilan quiaj andiümw mapalpalüw leaw naleaing. Cos nejiw ayacüw wüx omeajtsüw leaw ngo majneaj, pares niqimas ngondom mayariw andeac Teat Cristo.

<sup>9</sup> Pero nejiw ngondom marangüw leaw andiümw, cos meáwan nipilan apmajawüw nguineay michachiw, atnej tajaraw nguineay tarangüw ajcüwa ijpüw monxey tanomb wüx tandiümw mapalüw a Moisés.

*Pablo ndó;wüx asaj Timoteo nguineay netam marang*

<sup>10</sup> Pero ique Timoteo, lamejaw nguineay saquiaach, nguineay sarang. At lamejaw cuane sandiüm narang, ijaw nguineay sandüüb Teat Cristo. Lamejaw nguineay saüc wüx cuajantanej, nguineay sajiür lasta nipilan; at aton ijaw ngo nacueat masey samongoch cuajantanej.

<sup>11</sup> Lamejaw nguineay tamongochiüs tiül ajcüwa cambaj Antioquia, Iconio, Listra, nguineay tamongochiüs ngo majneaj quiaj. Masey, cos Teat Cristo tawün xic tiül meáwan aag ayaj.

<sup>12</sup> Icootsa ajawaats naleaing meáwan leawa nendiüm marang najneaj apmamon-goch xeyay moncüy, cos andüüb Teat Cristo Jesús.

<sup>13</sup> Pero nipilan monrang ngo majneaj, y monwaiich apmarangüw más xeyay ngo majneaj, apmewaijchaw, at apmawaiicharanüw.

<sup>14</sup> Nganüy ique Timoteo, tan iriümb indüüb leawa terquajchay wüx, cos lamejaw aag ayaj naleaing; at ijaw jane taquiaach ic.

<sup>15</sup> Cos nde wüx iliün mepateay terquajchay wüx Nangaj Mipoch Teat Dios. Wüx aag ayaj ijaw nguineay alndom mendüüb Teat Cristo Jesús, y nej apmawün ic wüx meáwan nisoet.

<sup>16</sup> Meáwan Nangaj Mipoch Teat Dios, aag ayaj taw naleaing atnej Teat Dios tandiüm. Apmambeol wüx apmaquiajchich, apmüüch mayaag aljane cuane teamarang, apmambeol marangüch palan, apmatiib oceajich cuane najneaj marangüch.

<sup>17</sup> Atquiaj nopnop nendüüb Teat Dios apmajiür palan leawa netam, quiaj apndom marang meáwan najneaj leawa Teat Dios apmüüch nej marang.

## 4

### *Iquiajchiw Mipoch Teat Dios*

<sup>1</sup> Nganüy Timoteo, sasaj ic wüx minüt Teat Dios y wüx minüt Teat Jesucristo, aag aliüc majaw wüx asoetiw jane almapac y jane landeow. Nej wüx aliüc alinomb apmajlüy natang nenajiüt wüx micambaj nej.

<sup>2</sup> Nganüy netam mendeac aaga najneaj nanderac leaw apiüng tiül Mipoch Teat Dios. Isajüw wüxan andiümw manguiyaw, aton masey ngo mandiümw manguiyaw. Pero naleaing netam meyamb nguineay mesajüw, ipaj oceajiw, isajüw najneajan wüx iquiajchiw.

<sup>3</sup> Cos aliüc miün nüt wüx ngome apmandiümw manguiyaw maquiaacharanüw wüx leawa naleaing, palüyan apmandiümw manguiyaw leawa najneaj manguiyaw. At apmayambüw jane maquiaach nejiw leawa andiümw manguiyaw.

<sup>4</sup> Ngome apmüjchiw olajcüw manguiyaw leawa naleaing; ngwüy, apmandiümw mandüjpiw leawa ngo maleaing.

<sup>5</sup> Pero ique Timoteo, netam meyamb imeaats wüx leaw irang. Netam meüc wüx leaw apmemongoch. Tanaám isajüw nipilan wüx aaga najneaj nanderac nguineay alndom maw nisoet. Irang palan leawa netam marang nop minerang minajiüt Teat Cristo.

<sup>6</sup> Laliüc mambiyaw xic atnej arangüch wüx nichech; laliüc matüch a nüt nacueat icon.

<sup>7</sup> Xique lasatsoj xeyay, lanarang najneaj leaw alndom narang. Lanambich xena-jiüt, tanaám teanayac ximeaats wüx Teat Cristo.

<sup>8</sup> Apmamac ximeaats xeyay, cos wüx aaga nüt aliüc, sanüünd noic corona cos tarangas najneaj. Aag ayaj apmüüch xic Teat Cristo wüx aliüc majaw wüx asoetaran, cos nej najneaj arang. Ngome xíquian quiaj sanüünd, at aton apmüünd meáwan leaw andiümüw Teat Cristo, leaw teamacül nej wüx aliüc alinomb.

*Pablo asaj Timoteo alacas poch*

<sup>9</sup> Irang leaw alndom sitiül mewiün mejaw xic najen.

<sup>10</sup> Teat Demas lamacueat xic, cos nej andiüm atnej andiüm meáwan nipilan. Nganüy laám andüy tiül cambaj Tesalónica. Teat Crescente ngo majlüy, tamb tiül iüt Galacia. Ata teat Tito ngo majlüy, tamb tiül iüt Dalmacia.

<sup>11</sup> Áagan teat Lucas alnaquiüüb. Nganüy iyamb teat Marcos mequiüüb miün wüx iliüc, cos nej aton alndom mambeol xic wüx aaga najiüt sarang.

<sup>12</sup> At teat Tíquico aton lanasaj mamb andüy tiül cambaj Efeso.

<sup>13</sup> Wüx iliüc Timoteo, ijamiün aaga capot tacueatiüs tiül cambaj Troas aniüng teat Carpo. Átan ijamiün xelibros, at xenawiig aton cos xeyay atam xic.

<sup>14</sup> Tamongochiüs xeyay ngo majneaj te-owix Alejandro, aaga nerang manchiüc. Teat Dios apmapalüch ombas leawa tarang wüx ximbas.

<sup>15</sup> Ique aton netam mejaw wüx nej, cos nej nómban ngo mandiüm leaw aquiajchiüüs.

<sup>16</sup> Wüx ombas mayacüw xic tiül jostis napiüng cuane tarangas, nejinguind ngo mambeol xic, meáwan tacueatiw xic. Malüy Teat Dios ngo mayac nej asoetiw wüx aag ayaj.

<sup>17</sup> Pero naleaing Teat Cristo almaquiüüb xic mambeol xic müüch xic nandeaç palan nguineay nej alndom mawün wüx asoet nipilan. Quiaj tanguiyiw meáwan nipilan ngome judío. Tayajcas atnej ajlüy namb teombeay nop león; pero atanquiaj tawas wüx, taton ngo marangüw wüx ximbas nicuajind.

<sup>18</sup> Átan Teat Cristo apmawün xic tiül meáwan ngo majneaj leaw aliüc miün apmajlüy; y sawaw apmaquiüüb xic namb niüng ajlüy nej tiül cielo. Nej najneajay ajlüy meáwan nüt. ¡Amén!

*Ndójwüx atepeay*

<sup>19</sup> Sandiüm metepeay müm Priscila at teat Aquila, aton meáwan leaw alaniüng teat Onesíforo.

<sup>20</sup> Teat Erasto tacülan tiül cambaj Corinto; pero teat Trófimo tacueatiüs tiül cambaj Mileto, cos niün andeow.

<sup>21</sup> Irang nguineay alndom mewiün wüx nganaw maquind. Aton atepeayiw ic meáwan minipilan Teat Cristo monaw ningüy, nop teat Eubulo, alinop teat Pudente, alinop teat Lino, alinop müm Claudia.

<sup>22</sup> Miteatiüüs Jesucristo tanaám maquiüüb ic; at Teat Dios tanaám müüch icon mimonajneaj nej meawarónan. ¡Amén!

## Poch tarang San Pablo müüch

### Tito TITO

#### *Teat Pablo atepeay teat Tito*

<sup>1</sup> Xique Pablo nerangas minajiüt Teat Dios, at miapóstol Teat Jesucristo xic. Xique tñjndiüs niün nasajüw mayariw mipoch Teat Cristo leaw lamarriüüd nejiw Teat Dios; nñjchiw maxomüw omeajtsüw wüx aaga naleaing nanderac leaw andüjpiüts, cos aag ayaj üüch marangüch leaw andiüm Teat Dios.

<sup>2</sup> Xique sarang meáwan aag ayaj para majawüw wüx aaga leawa teamacüliüts, aag ayaj mapacaats meáwan nüt. Cos aag ayaj nde wüx ngranaw majlüw a iüt cam Teat Dios lamapiüng apmüüch; nej ngondom mawai-ich.

<sup>3</sup> Nganüy cos lamatüch a nüt, Teat Dios aaga newün icoots wüx, lamüüch xic nüüch manguaiyaran aaga najneaj nanderac wüx Teat Jesucristo.

<sup>4</sup> Aaga nawiw cam sarang nüüch ic teat Tito, cos sayaag naleaing ique atnej xecual ic, cos ayariür andeac Teat Cristo. Miteatiiüts Dios at Teat Jesucristo newün icoots wüx, mambeol ic, müüch ic xeyay monajneaj, at mejiür monapacüy wüx Mipoch Teat Dios.

#### *Leaw tarang teat Tito tiül Creta*

<sup>5</sup> Ique lamejaw neol tacueatiüs ic tiül aaga iüt tiül ndec nenüt Creta, cos tacueatiüs ic mendondoch leaw ngranaw mümb majlüw, at meyac montangtang ombas monajiüt tiül monyar andeac Teat Cristo tiül meáwan noicnoic cambaj, atnej tasajas ic merang.

<sup>6</sup> Pero naleaing iyac leaw ijaw nerang najneaj, leaw ajiür nop minjtaj nej, at micual nej aton andüjpiw Teat Cristo, ngo manderac wüx ombasüw nejiw mapiürang nejiw arangüw leaw andiümüw, ngo majiürüw nepaj nej ocueajiw.

<sup>7</sup> Jane natang nenajiüt tiül mondüüb Teat Cristo netam marang najneaj, cos minerang minajiüt Teat Dios nej. Ngondom marang andiüman nej, ngome najen ajcüw, ngome nangün, ngome neyambyamb moncüw, ngome newaiich maxomxom tomiün.

<sup>8</sup> Pero nej netam majüiquich naleaing apac omeaats majaw jangantanej wüx apeay majaw nej. At netam majiür monajneaj, nop nexom omeaats, nerang najneaj, neech omeaats marang leaw andiüm Teat Dios, nop nerang leaw ayaag tiül omeaats aag ayaj najneaj, ngome leaw andiüman nej.

<sup>9</sup> Netam nop leaw nendüüb wüx aaga naleaing nanderac leawa taquiaacharan

wüx, para alndom mambeol jangantanej maxom omeaats wüx Mipoch Teat Dios, y müüch mapal ombeay jane nepiüng aag ayaj ngo maleaing.

<sup>10</sup> Cos almajlüy xeyay nipilan ngo mayariw wüx ajpaj ocueajiw, nelomboochayej wüx andeacüw, monwaiich. Leaw najntsop wüx arangüw atquiaj, ajcüw ayaj judíos monpiüng netam aaga circuncisión.

<sup>11</sup> Meáwan ajcüw ayaj netam majpal ombeayiw, cos üjchiw machiweaw omeajtsüw moncül tiül nden niüng ajmeliw. Aquiajchiw leaw ngo maleaing para maxomüw wüx alngün tomiün.

<sup>12</sup> Atnej tanomb tapiüng nop naw tiül nejiw, tandeac wüx ombasüw micual miüt nej. Tapiüng: "Monaw Creta monwaiich nejiw, napatüw, rombüy, aton neanchiw", aw.

<sup>13</sup> Aaga nanderac quiaj naleaing. Pares netam mepaj ocueajiw para marangüw najneaj, majüiquich naleaing ayariw andeac Teat Cristo.

<sup>14</sup> Isajüw nde müjchiw olajcüw manguaiyiw mayariw leaw andeacndeacüw nipilan judío, at leawa nipilan apiüngüw netam marangüch, cos ajcüwa nipilan quiaj ngo mandüjpiw leaw naleaing.

<sup>15</sup> Ajcüwa monyac omeaats wüx leawa najneaj, meáwan cuajantanej leaw almajlüy, najneaj majawüw. Pero jane ngo mayariw andeac Teat Dios, jane monyac omeaats wüx leaw ngo majneaj, nejiw ayajcüw ngo majlüy nicuajind najneaj; cos xeyay ngo majneaj alwüx omeajtsüw nejiw, lango mayajcüw cuane najneaj.

<sup>16</sup> Nejiw apiüngüw andüjpiw Teat Dios, pero naleaing ombeayiw; cos wüx meáwan aaga arangüw quiaj, ajüiquichaw ngome áag teamarangüw. Xowüy micoraje omeajtsüw, ngo marangüw leaw asoiqüw, at ngondom marangüw nicuajind najneaj.

## 2

#### *Najneaj naquiajchich wüx Mipoch Dios*

<sup>1</sup> Nganüy ique teat Tito, netam mequiaach leawa naleaing wüx Mipoch Teat Dios.

<sup>2</sup> Isajüw montang ombas monxey ich mesapayej wüx, nde mamongochiw wüx leaw arangüw, ich marangüw palantüw najneaj. Isajüw mayacüw wüx omeajtsüw mayariw áagan naleaing, majiürüw lasta jangantanej, maiücüw wüx cuajantanej netam mamongochiw.

<sup>3</sup> At montang ombas montaj aton isajüw marangüw áagan najneaj leaw andiüm Teat Dios. Isajüw nde mandeacndeacüw leaw ngo metam. Nde mangüniw. Nejiw netam majüiquichaw nguineay netam marangüch najneaj,

<sup>4</sup> cos atquiaj alndom maquiajchiw monguich montaj nguineay netam majneaj ajlüyiw maquiüjpüw minojow nejiw, at majiürüw lasta micualüw nejiw.

<sup>5</sup> Isajüw mayambüw omeajtsüw wüx leawa netam, nde majüyüjiw. Netam majawüw cuane netam marangüw aniüngüw nejiw. At majüiquichaw ajneaj omeajtsüw marangüw leaw apiüng minojow nejiw, ngana manderac ngo majneaj wüx Mipoch Teat Dios cos nejiw ngo marangüw atnej netam.

<sup>6</sup> At monench aton ipaj ocueajiw marangüw leaw netam marangüw.

<sup>7</sup> Ique teat Tito, ijüiquich majawüw nguineay irang najneaj wüx meáwan cuajantanej. At wüx iquiaach, iquiaach najneaj, nde mertsoj.

<sup>8</sup> Indeac leaw netam, quiaj nejingüind ngondom maxom alngün ngo majneaj wüx iquiaach. Atquiaj apmaxinguiaw ajcüwa moncüy majaw icoots, cos ngome apmaxomüw mandeacüw ngo majneaj wüx ombasaats.

<sup>9</sup> Ipaj ocueajiw ajcüwa najonüw monrang najiüt, marangüw leaw andiüm neneay nejiw. Ich marangüw najneaj, nde mangochiw ombeay.

<sup>10</sup> Isajüw nde menejtiw; netam marangüw najneaj wüx cuajantanej, cos atquiaj apmandeacüw meáwan nipilan xeyay najneaj wüx aaga najneaj nanderac wüx Teat Dios, áag newün icoots wüx.

<sup>11</sup> Nganüy Teat Dios lamajüiquich mimonajneaj nej, cos andiüm mawün wüx asoet meáwan nipilan.

<sup>12</sup> Aag ayaj üich icoots majawaats netam macueatiüts nómban leawa Teat Dios ngo mandiüm, meáwan ngo majneaj leaw andiüm nipilan wüx aaga iüt cam. Netam mayacaats omeajtsaats marangaats najneaj, nde mamongochiüts wüx leaw arangaats; netam majlüyüüts atnej andiüm Teat Dios.

<sup>13</sup> At üich icoots majawaats nguineay mapac omeajtsaats macüliüts aaga najneajay teamandiümaats majawaats. Xeyay najneajay apmajlüy wüx apmandilil Teat Cristo Jesús, cos nej Midiosaats newün icoots wüx.

<sup>14</sup> Nej teyacüy nejáyan quiaj teowixaw monajiüt mandeow ingow andeowaats icootsa, mawün icoots tiül meáwan ngo majneaj. Nej andiüm mambeol icoots majlüyüüts noic najneaj cambaj ocueaj nej, mandiümaats marangaats áagan najneaj.

<sup>15</sup> Meáwan aag ayaj indeac, iquiajchiw wüx, ipaj ocueajiw atnej arang nop nena-jiüt. Nde merang leaw ajüic ngo majneaj, ngana mapiüngüw ngo mertam tiül minajiüt Teat Dios.

### 3

*Leaw netam marangüw mondiüüb Teat Jesús*

<sup>1</sup> Iich leaam omeajtsüw netam marangüw leaw apiüngüw montangtang monajiüt, at chingüy monajiüt tiül cambaj, mandiümüw mambeolüw wüx cuajantanej najneaj najiüt leawa netam.

<sup>2</sup> Isajüw nde mandeacüw ngo majneaj wüx ombas aljane, nde mayambüw moncüy, netam maiündüw wüx cuajantanej, majüiquichaw ajlürüw monajneaj wüx andeacüw maquiüjpüw meáwan nipilan.

<sup>3</sup> Cos icootsa nomb aton tajlüyüüts atnej nop nexiül ngo manguiay nanderac, ngo marangaats leaw andiüm Teat Dios. Ndrotoots tandüjpiüts leaw ngo majneaj, tarangaats leaw andiümaats. Ngo majneaj majawaats alinop nejiür cuajantanej. At tajcüyaran majarawaats, tajcüyüüts majawaats nop alinop.

<sup>4</sup> Pero naleaing wüx Teat Dios, aaga newün icoots wüx, tajlüyüich andiüm icoots at tiüch meáwan nipilan mimonajneaj nej,

<sup>5</sup> Cos tawün icoots wüx asoetiüts. Naleaing aag ayaj ngome ajcan arangaats najneaj, aag ayaj tarang cos xeyay ajür icoots lasta, tawün icoots wüx asoetiüts, majlüyüüts nerixixay. Nganüy ajlüyüüts atnej jayats wijquiamoots, awiquiach icoots Nangaj Espiritu ocueaj Teat Dios.

<sup>6</sup> Pares ngo macueat müch icoots Nangaj Miespiritu nej, cos ambeol icoots Teat Jesu-cristo, aaga newün icoots wüx.

<sup>7</sup> Cos nej lamarang aaga xeyay najneaj quiaj wüx ombasaats, nganüy ajlüyüüts atnej nómban ngo marangaats ngo majneaj. Pares nganüy tenguiac macüliüts leaw Teat Dios apmüch icoots, aag ayaj mapacaats meáwan nüt tiül cielo.

<sup>8</sup> Meáwan aag ayaj naleaing, sandiüm mepac wüx mequiajchiw wüx, cos atquiaj alndom meáwan monyar andeac Teat Dios mayacüw wüx omeajtsüw marangüw najneaj. Cos aag ayaj najneaj, y apmambeol meáwan nipilan.

<sup>9</sup> Naleaing nde mejmel tiül cuajantanej mondeac leaw ngo metam. Nde meyambyamb mendeac wüx leawa tarangüw mixejchiün nde tanomb, nde mejmel tiül moncüy. At nde mendeacndeac mejcüy anaag aljane wüx aaga poch tüünd Moisés, cos aag ayaj ngo mambeol wüx nicuajind, ngo majiür ümb.

<sup>10</sup> Sitiül aljane ayac naél tiül monyar andeac Teat Cristo, netam mepaj ocueaj nomb ijmbüw. Pero naleaing sitiül ngo mayar indeac, icueatiün, nde mequiüjpan.

<sup>11</sup> Cos quiaj lamejaw aaga nipilan quiaj lamitsoj nej omal, lamanot nej marang ngo majneaj, nejáyan quiaj ayacüy tiül naél.



*Teat Pablo asaj teat Tito alacas poch*

<sup>12</sup> Wüx sanüüch mamb niüng ijlüy teat Artemas tengwüy teat Tíquico, iyamb nguineay alndom meamb mejaw xic tiül cambaj Nicópolis, cos lanapiüng quiaj sanamongoch nüt wüx apmaquind.

<sup>13</sup> Iyamb aton nguineay membeol teat Zenas, aaga nendüy wüx nguineay amb apiüng aaga ley. At teat Apolos aton imbeol, meajchiw meáwan leawa netam nejiw tiül tiüü.

<sup>14</sup> Cos atquiaj meáwan monyar andeac Teat Cristo alndom mequiaachayej wüx marangüw cuajantanej najneaj, mambeolüw jangantanej leaw ngo majiür. Atquiaj apmajüiquichaw arangüw najneaj.

*Andondoch atepeay*

<sup>15</sup> Meáwan leawa almajlüyiw ningüy naquiüjpüw atepeayiw ic. Aton sandiüm metepeayiw tam ninguij alacas leaw almajlüyüüts nóiquian wüx minüt Teat Cristo. Teat Dios mambeol icon tamtámban. Amén.

## Poch leawa tarang San Pablo müüch Filemón FILEMN

### *Pablo y Timoteo atepeayiw Filemón*

<sup>1</sup> Xique Pablo, nayacüchiüs tiül manchiüc ajcan sarang minajiüt Teat Jesucristo. Xique sarang aaga poch wüx nawiig cam naquiiüb teat Timoteo, natepeayiün ic teat Filemón, cos noic nej najiüt arangaats.

<sup>2</sup> At satepeayiün meáwan monyar andeac Teat Cristo leaw mbichmeaw canchiüjow iniüng. Átan satepeayiün müm Apia. At teat Arquiipo, áag nerang najneaj soldado wüx minajiüt Teat Jesucristo maquiüjpaats.

<sup>3</sup> Tambtámban ijlüyiün, nejneajünan, at sandiüm mejüüran monapacüy ocueaj Miteatiüts Dios y Miteatiüts Jesucristo.

### *Filemón andüüb Teat Cristo*

<sup>4</sup> Xique wüx sataag orar süüch gracias Teat Dios wüx ique teat Filemón, ngondrom ximeaaats ic.

<sup>5</sup> Cos lananguiay anderac wüx ique nguineay ajüic iyar andeac Teat Jesús, nguineay indiüm meáwan mondüüb Teat Jesús.

<sup>6</sup> Satün ocueaj Teat Dios mambeol meáwan leaw lamembeolüw mayariw andeac Teat Dios, majawüw meáwan aaga najneajay leaw Teat Dios üüch icoots wüx Teat Cristo Jesús.

<sup>7</sup> Teat, xeyay ajneaj nayaag, üüch mapac ximeaaats wüx sanguiay nguineay indiümüw, at lameaach mapac omeajtsüw meáwan mondüüb Teat Cristo.

### *Pablo atün majneaj majaraw a Onésimo*

<sup>8</sup> Masey nop apóstol ocueaj Teat Cristo xic, pares alndom nasaj ic nguineay netam merang,

<sup>9</sup> pero nganüy sandiüm natün icueaj wüx mimonajneaj Teat Dios. Xique Pablo nop xic natang ombas, nganüy sal tiül manchiüc cos sarang minajiüt Teat Jesucristo.

<sup>10</sup> Sandiüm natün icueaj majneaj mejaw teat Onésimo, cos nej ajlüy atnej najiür xecual ningüy tiül manchiüc, cos xique tasajas nej wüx Teat Cristo.

<sup>11</sup> Naleaing nej ninguinüt ngo metam ic; pero nganüy nej xeyay netam icor cos alndom mambeol ic, at alndom mambeol xic aton.

<sup>12</sup> Nganüy sanüüch mamb majaw ic alinomb. Ich mapac imeaaats, ingoch atnej mengoch xic.

<sup>13</sup> Masey tandiümas macül ningüy naquiiüb mambeol xic ingow imbeol xic wüxan sajlüy tiül aaga manchiüc cam, niüng

sandeac wüx aaga najneaj nanderac wüx Teat Cristo.

<sup>14</sup> Pero ngo nandiüm narang nicuajind xiquiáyan quiaj; netam natün icueaj mesaj xic. Cos xique ngo nandiüm meaach Onésimo macül ningüy ajcan sasaj ic; xique sandiüm merang con imeaats, ngome cos netam merang.

<sup>15</sup> Cos, ¿jonde ngwüy naleaingue? teat Onésimo taw niüng ijlüy acásan nüt, nganüy alndom mandilil niüng ijlüy macül quiaj nómban.

<sup>16</sup> Nganüy lango majlüy atnej nop najon nerang najiüt, nej nganüy ajntsop wüx atam, ngo matow nej ambeat nop najon nerang najiüt, cos nej ajlüy atnej nop micoj michiig wüx Teat Cristo. Sitiül xique sandiüm nej, ique alwüx netam mendüüm cos apmambeol ic wüx minajiüt, at aton cos ajlüyüts noic nej wüx minajiüt Teat Dios.

<sup>17</sup> Pares sapiüng sitiül iyaag ajlüyüir amigos, sandiüm mengoch nej atnej mengoch xic.

<sup>18</sup> Sitiül aleaic lamarang wüx imbas, tengwüy aleaic ajüch ic, iyac atnej xique alnajüch ic.

<sup>19</sup> Xique sarang aag agüy naag xiwix napiüng xic sanangüy meáwan. Pero sapiüng ngo metam nüüch leaam imeaats nguineay tambeolas ic, pares ijüch xic aton.

<sup>20</sup> Nganüy xechiig, sandiüm meaach mapac ximeaaats merang leaw sasaj ic quiaj, cos andüjpiüts Teat Cristo.

<sup>21</sup> Xique sayaag apmerang leawa sapiüng, pares tarangas aaga nawiig cam nüüch ic, cos sawaw apmeyac wüx alquiriw leawa satün.

<sup>22</sup> Satün icueaj aton teat, meyamb niüng sanaxood, cos sapiüng Teat Dios apmüüch icon leaw itüniün ocueaj, apmambeol xic namb najaw icon.

### *Andondoch atepeay*

<sup>23</sup> Nganüy atepeay ic teat Epafra, áag saquiiüb ningüy tiül manchiüc, cos arang minajiüt Teat Cristo Jesús aton.

<sup>24</sup> Átan atepeayiw ic teat Marcos, teat Aristarco, teat Demas, at teat Lucas. Nej jiw ajlüyiw ningüy aton, ambeolüw xic wüx aaga najiüt sarang.

<sup>25</sup> Miteatiüts Jesucristo mambeol icon, müüch majlüy tiül imeajtsan mimonajneaj nej, tambtámban. Amén.

**Tarangüch wüx nawiig aaga  
nanderac cam müjndiw  
nipilan judío  
HEBREOS**

*Teat Dios tandeac wüx Teat Cristo*

<sup>1</sup> Teat Dios tanomb tandeac xeyay, tayamb nguineay masaj mondeac andeac nej (profetas) nguineay alndom masajüw mixejchiüts palpálwüx poch leaw andiüm masaj nejiv.

<sup>2</sup> Nganüy wüx aaga nüt cam Teat Dios tüüch miün Micual Nej mandeac masaj icoots. Tüüch Micual Nej marang meáwan ocas, nüt, at a iüt cam; ndoj tacueat teowix nej meáwan leaw almajlüy.

<sup>3</sup> Micual nej ajlüy najneajay, atanej Teat Dios cos Dios nej aton; cuajantanej alndom marang. Wüx áagan andeac nej teamajüür meáwan leaw tarang, ngo ndrom ombas nicuajind. Wüx landoj mawün meáwan asoetiüts, quiaj tamb andüy cawüx tiül cielo chetem amb wüx miác Teat Dios.

*Micual Teat Dios natang, ángeles chingüiyiw*

<sup>4</sup> Micual Teat Dios natang, nganüy meáwan ángeles chingüiyiw, ngo matüchiw. Minüt nej micual Teat Dios nembeat xeyay.

<sup>5</sup> Cos Teat Dios ngo masaj nejinguind ángel:

Ique Xecual ic;  
nganüy lanajüiquich xique miteat, aj.  
At ngo mandeac wüx nejinguind ángel:  
Xique sanajlüy miteat nej,  
nej apmajlüy xecual, aj.

<sup>6</sup> Pero wüx Teat Dios tüüch miün anopüyan Micual nej ningüy wüx a iüt cam, quiaj tasaj meáwan miángeles nej:

<sup>7</sup> Teat Dios tandeac wüx miángeles nej wüx tapiüng:

Tarangasüw majlüyiw atnej nepepep,  
aton tarangas majlüyiw atnej oniw biümb,  
aw.

<sup>8</sup> Pero wüx Teat Dios tandeac wüx Micual Nej, tapiüng:

Ique Dios, apchetemear wüx aaga najneajay chetejeran wüx meáwan nüt;  
apmejlüy wüx meáwan leaw almajlüy.  
Ique najneajay apmewaw wüx cuajantanej wüx apmewar minajüüt.

<sup>9</sup> Ique palüy indium leawa najneaj, ijcüy mejaw meáwan leawa ngo majneaj;

pares Teat Dios, aaga naleaing Midios,  
lamüüch ic mapac imeaats mejlüy natang,  
mejntsop wüx iquiüjpüw, aw.

<sup>10</sup> Aton Teat Dios tasaj Micual Nej:

Teat, ique ombas terang a iüt cam wüx nganaw majlüy nicuajind,

Terang nüt, caaw, at ocas naag iwix.

<sup>11</sup> Meáwan ajcüw ayaj apndrom ombas, pero ique tan ijlüy ngo ndrom imbas.

Ajcüw ayaj apmataxeyiw atnej noic napixeran;

<sup>12</sup> ajcüw ayaj apmembiül melox ninguiün atnej ngarrats napixeran,

apmengowüüch majlüy jayats.

Pero ique tan iriümb meáwan nüt,

mineat ngondom mümb, aj.

<sup>13</sup> Teat Dios ngo masaj nejinguind ángele:

Cheter ningüy wüx xeác,

leaw sanayac meáwan moncüy majaw ic majmiücüw tileaj, maj.

<sup>14</sup> Pero meáwan ángeles mimonrang minajüüt Teat Dios, tündiw miünüw mambeolüw nipilan leaw apmawüw wüx asoetiw nejiv.

**2**

*Aaga leaw tawün icoots wüx, nembeat xeyay*

<sup>1</sup> Pares nganüy netam mayacaats wüx omeajtsaats leawa lamanguiyaiüts, nganandot macueatiüts mandüjpiüts.

<sup>2</sup> Cos sitiül aljane ngo marang aaga nembeat poch leaw nomb Teat Dios tüüch mandeacüw miángeles nej, sitiül jane ayaag ngo metam marangüch palan aaga poch quiaj, nej apmüünd mamongochiw xeyay ngo majneaj.

<sup>3</sup> ¡Cuantemás icoots nganüy apmamongochiüts xeyay ngo majneaj sitiül ngo mayacaats wüx omeajtsaats aaga najneajay leawa tarang Teat Cristo para mawün icoots wüx meáwan asoetiüts! Aag ayaj Teat Jesús ombas mandeac nguineay apmarang, condom ajcüwa leawa tanguiyiw andeac nej tajawüw aag ayaj naleaing, ndoj tasajüw icoots.

<sup>4</sup> Teat Dios aton tajüiquich aag ayaj naleaing, cos tüüch majaraw cuajantanej; tüüch apóstoles ndom ombasüw marangüw xeyay cuajantanej ateócan. Tambeol nejiv Nangaj Espiritu ocueaj Teat Dios cos tüüch ndom marangüw cuajantanej najiüt leaw andiüm nej.

*Jesucristo tajlüy atnej nipilan*

<sup>5</sup> Teat Dios ngome apmayac ángeles majlüyiw wüx a iüt cam alinoic nüt wüx apmarang aaga jayats iüt leawa teamandeaacaats wüx.

<sup>6</sup> Tiül aaga ajlüyay Mipoch Teat Dios aljane tapiüng:

¿Cuane nej nipilan ndom leaam imeaats wüxe?

¿Neol indium membeol micual nipilana?

<sup>7</sup> Ique Teat Dios, acásan nüt teyac nipilan majlüy chingüy, pero teyac ángeles majlüyiw natang.

## 3

Condom teaach nipilan majlüy natang wüx a iüt cam, marangüch casa;

teaach majlüy wüx meáwan leaw lamerang; <sup>8</sup> lango majlüy nicuajind leaw ngo meyac majlüy teoleaj nej, aw.

Teaach nipilan majlüy wüx meáwan leaw almajlüy, nicuajind ngo majlüy leaw ngondom majlüy wüx. Pero nganaw majawaats nipilan majlüyiw wüx meáwan leaw almajlüy.

<sup>9</sup> Pero ajawaats Teat Jesús, acas nüt tajlüy chingüy, wüx ángeles tajlüyiw natang. Condom Teat Jesús tajlüy natang, marangüch casa; cos Teat Dios tandiüm müüch nej mamongoch xeyay ngo majneaj wüx tandeow mawün wüx asoetiw meáwan nipilan.

<sup>10</sup> Cos Teat Dios tarang meáwan leaw almajlüy, nganüy netam marangüch meáwan leaw andiüm nej. Nej andiüm xeyay micual nej mambüw tiül cielo, áag tüüch Teat Jesús mamongoch xeyay ngo majneaj. Nej tarang palan leaw andiüm Teat Dios, cos atquiaj alndom mawün nejw asoetiw.

<sup>11</sup> Teat Jesús tapaj nipilan majlüyiw ocueaj nej, aton ajcüw leawa tajpaj majlüyiw nóiquian, cos nop miteatiw; pares Micual Teat Dios ngo maxing masajüw micojow michijquiaw nej.

<sup>12</sup> Cos nomb tapiüng:

Sanasajüw xecojow xechijquiaw jane ic Teat Dios.

Niüng canchiüjow, quiaj sanataag cantar naneajay wüx ique, aw.

<sup>13</sup> Aton tapiüng:

Xique sanayac ximeaats wüx nej, aw.

Alinomb tapiüng:

Jogüy xic, salnaquiüjpüw meáwan xecualüw leaw Teat Dios lamüüch xic, aw.

<sup>14</sup> Cos nacualaran ajiürüw quiej, ajiürüw cuerpo, Teat Jesús aton tajiür cuerpo, at tajiür quiej cos nipilan newiquiach nej. Nej tandeow para mandrooch ombas aaga minatangüw nimeech nasoic diablo, cos nej neyac mandeowaran tiül nipilan.

<sup>15</sup> Teat Jesús tandeow mawün imbol mandeowüw nipilan, cos meáwan nüt nipilan imbolow mandeowüw.

<sup>16</sup> Aag agüy naleaing, cos Teat Cristo ngome tiün mambeol ángeles, tiün mambeol acualaats Abraham.

<sup>17</sup> Pares Teat Jesús tiün majlüy nipilan nej, mayaag atnej ayaag nipilan, cos atquiaj alndom marang najneaj natang miteaats leaw ajiür lasta nipilan wüx arang leaw Teat Dios tüüch nej marang. Teat Jesús nejay tarang nichech, mawün wüx asoetiw nipilan.

<sup>18</sup> Cos nej tamongoch xeyay ngo majneaj, tayacüch wüx naél. Pares nganüy alndom mambeol leaw teayacüch wüx majiür naél.

*Teat Jesús natang, Moisés chingüy*

<sup>1</sup> Xecojow xechijquiaw, Teat Dios lamawün isoetiün, lamapaj icon mendüjpiün nej; nganüy ich leaam imeajtsan wüx Teat Cristo Jesús, cos Teat Dios tüüch nej miün marang minatang miteaats ocueajiüts.

<sup>2</sup> Nej tarang meáwan palan leawa tüüch nej Teat Dios marang, atnej tarang tanomb teat Moisés wüx tarang minajiüt Teat Dios, cos nej aton tarang palan tiül minipilan Teat Dios.

<sup>3</sup> Nganüy Teat Jesús xeyay netam marangüch casa, ngo matnej teat Moisés, cos atnej nop nerang iüm más netam ajlüy, ngo matnej aaga iüm leawa tarang.

<sup>4</sup> Cos meáwan iüm arang nej nipilan, pero leawa nerang meáwan leaw almajlüy, aag ayaj Teat Dios.

<sup>5</sup> Naleaing teat Moisés tarang najneaj tiül meáwan monrang minajiüt Teat Dios. Meáwan najiüt leaw tarang, aag ayaj apiüng wüx leaw aliüc miün apmanderac alinoic nüt.

<sup>6</sup> Pero Teat Cristo ajlüy wüx minipilan Teat Dios atnej nop natang nacualaran ajlüy wüx aniüng nej. Aaga aniüng nej quiaj apiüng wüx icootsa. Netam tanaamb mandüjpiüts, aton macüliüts nde apac omeajtsaats leawa Teat Dios lamapiüng aliüc miün apmajlüy.

*Wüx axojtúw minipilan Teat Dios*

<sup>7</sup> Pares netam manguyaiüts leaw apiüng Nangaj Espiritu ocueaj Teat Dios, cos apiüng: Nganüy sitiül inguiayim andeac Teat Dios,

<sup>8</sup> nde merangan adam imeajtsan matnej tarangüw tanomb mixejchiün, cos nejw ngo mayariw andeac Teat Dios, tujúchiw majcüw wüx aliw tiül wajchiüc.

<sup>9</sup> Nejiw tujúchiw xic najcüw xeyay, masey tajawüw nguineay tambeolasüw tiül ic miow (40) neat.

<sup>10</sup> Wüx aag ayaj tajcüyüts najawüw ajcüwa nipilan quiaj,

tapiüngas: "Mbójan ndroj omeajtsüw xic, ngo mayacüw wüx omeajtsüw marangüw leaw sandiüm", saw.

<sup>11</sup> Pares tajcüyüts xeyay, tapiüngas: "Langome sanüjchiw majmeliw maxojtúw niüng sajlüy", aw Teat Dios.

<sup>12</sup> Ijawon xecojow xechijquiaw, nde majlüy nejingüind tiül icona mayac wüx omeaats ngo majneaj, mepiüangan ngo meyariün andeac Teat Dios, mecueatiün aaga Teat Dios almapac.

<sup>13</sup> Ipañüw nop alinop meáwan nüt wüxan aliün majlüy nganüy nüt cam, ngana madam omeaats aljane tiül icona mapiüng arang najneaj masey arang ngo majneaj.

<sup>14</sup> Apmajlüyüüts nóiquian maquiüjpaats Teat Cristo sitiül tanaámb apmandüjpiüts atnej tarangaats wüx tayariiüts andeac nej.

<sup>15</sup> Pares apiüing:  
Nganüy sitiül inguiayiün andeac Teat Dios, nde madam imeajts matnej tarangüw tanomb mixejchiün,  
wüx tujchiw majcüy Teat Dios, aw.

<sup>16</sup> ¿Jane nejiw tanguiyiw andeac Teat Dios quiaj, condom ngo mayariw? ¿Ngome ajcüw ayaj meáwan leaw tawüw tiül Egipto, tawün nejiw teat Moisésa?

<sup>17</sup> ¿Jane tajcüy majaw nejiw Teat Dios tiül aaga ic miow (40) neat quiaja? ¿Ngome ajcüw ayaja leaw tarangüw ngo majneaja, condom tandeowüw tiül wajchiüca?

<sup>18</sup> ¿Jane nejiw tasaj nejiw Teat Dios niquimas ngondom majmeliw maxojtúw niüing ajlüy neje? ¿Ngome ajcüw ayaja leaw ngo mayariw andeac Teat Diosa?

<sup>19</sup> Quiaj ajawaats nejiw ngondom majmeliw tiül aaga niüing apmaxojtúw, cos ngo mayariw andeac Teat Dios.

#### 4

<sup>1</sup> Ata nganüy Teat Dios apiüing aliün ndom müch icoots maxojtaats niüing ajlüy nej. Pares netam mejawan wüx leaw irangan, nganandot ngo metüchiün.

<sup>2</sup> Icoots aton nganüy lamasoiquiiüts aaga najneaj nanderac quiaj atnej tasoiquiw mixejchiüts, ndoj ngo mambeol nejiw nicuajind wüx tanguiyiw a poch quiaj, cos tanguiyiwan, ngo mayariw.

<sup>3</sup> Pero icootsa leawa lamayariiüts andeac Teat Dios, tajmeliüts maxojtaats niüing ajlüy Teat Dios. Wüx aag ayaj nej tapiüing:

Wüx tajcüyiüs tapiüingas,  
niquimás lango majmeliw maxojtúw niüing saxood, saw.

Atquiaj tapiüing Teat Dios cos minajiüt nej laümb nde wüx tarang a iüt cam.

<sup>4</sup> Aton tiül Mipoch Teat Dios andeac wüx nej taxood wüx ayaiw nüt, cos apiüing:

Teat Dios taxood wüx ayaiw (7) nüt, wüx landoj marang meáwan minajiüt nej, aw.

<sup>5</sup> Alinoic poch tapiüing:

Lango majmeliw niüing saxood, aw.

<sup>6</sup> Altüül nejiw leaw ombas manguiyiw andeac Teat Dios nganaw majmeliw, cos ngo mandüümüw mandüjpiw Teat Dios. Nganüy aliün ndom aljane majmel tiül niüing axood Teat Dios.

<sup>7</sup> Teat Dios lamayac alinoic nüt, aag ayaj nganüy cam. Cos atquiaj tapiüing Rey David, lamajiür xeyay neat, tapiüing:  
Sitiül nganüy inguiayiün andeac Teat Dios, nde madam imeajtsan, aw.

<sup>8</sup> Ndot teat Josué müch maxojtúw nipilan Israel tiül niüing alndom maxojtúw, quiaj

Teat Dios ngo metam mapiüing alinomb netam maxojtúw.

<sup>9</sup> Cos ngo maxojtúw ninguiün nüt, pares Teat Dios nganüy andiüm müch maxood minipilan nej atnej nej axood.

<sup>10</sup> Meáwan leaw laxood niüing axood Teat Dios, at aton laxood wüx cuajantanej najiüt arang, atnej Teat Dios taxood wüx landoj marang minajiüt nej.

<sup>11</sup> Netam marangaats leaw alndom, maxojtaats niüing axood Teat Dios, ngana marangaats atnej tarangüw leaw nomb ngo mayariw andeac Teat Dios, ndoj ngome tajmeliw niüing apmaxojtúw.

<sup>12</sup> Mipoch Teat Dios almapac, alndom marang cuajantanej. Aaga Mipoch nej alndom majmel tiül omeaatsaran atnej nots espada nexing necamb necamb; alndom matüch tiül omeaats nipilan müch mayajcüw nguineay ajlüy tiül omeaatsaran.

<sup>13</sup> Meáwan leaw Teat Dios tarang, nej teamajaw nguineay ajlüy. Naleaing meáwan leawa almajlüy, ranüy majaw Teat Dios, ngo mexotüy nicuajind. Netam masajaats Teat Dios nguineay tarangaats.

#### *Teat Jesús minatang miteaats*

<sup>14</sup> Icoots ajüüraats nop minatang miteaats, aaga laámb tiül cielo. Aag ayaj Teat Jesús micual Teat Dios. Netam mesapayoots nandand wüx andeac nej leawa lamayariiüts.

<sup>15</sup> Cos aaga minatang miteaats ajüüraats quiaj, ajaw nguineay ayajcaats wüx amongochiiüts naél, cos ajaw nguineay ajlüyüüts. Masey nej aton tamongoch naél atnej amongochiiüts, pero nej ngo marang nicuajind ngo majneaj.

<sup>16</sup> Pares alndom matüchiüts niüing ajlüy Teat Dios, ngo metam mimbolaats, cos nej apmajiür icoots lasta, apmaxomaats mimonajneaj nej; apmambeol icoots wüx amongochiiüts cuajantanej naél.

#### 5

<sup>1</sup> Meáwan natang miteaats narriüjtüch tiül nipilan, tajmel marang minajiüt Teat Dios mambeol nipilan mayac nichech, at mambiy nimal marang nichech mangüy asoeteran.

<sup>2</sup> Cos meáwan natang miteaats nipilan nejiw, amongochiw naél atnej amongochiiüts. Pares alndom majiürüw lasta jane ngo majaw cuane arang, at leaw ajaw arang ngo majneaj.

<sup>3</sup> Cos nipilanan nejiw, netam mayacüw ichechiw mawün nej asoetiw, aton netam mayacüw nichech mawün asoet meáwan nipilan.

<sup>4</sup> Nejingund ngondom mapiüing apmarang natang miteaats, cos áag miün Teat Dios alndom mayac nop natang miteaats atnej tayac Aarón.

<sup>5</sup> Atquiaj Teat Cristo aton ngome nejáyan quiaj tapiüng apmarang natang miteaats, Teat Dios neyac nej, cos tasaj:

Ique Xecual,

nganüy lanüüch ic mejlüy nipilan ic, aj.

<sup>6</sup> Aton Teat Dios tapiüng:

Ique miteaats ic meáwan nüt,

atnej tanomb wüx tarang miteaats Melquisedec, aw.

<sup>7</sup> Teat Cristo wüx tajlüy ningüy wüx iüt tatün xeyay, tajiünts masaj Teat Dios, aaga alndom mambeol nej ngo mandeow. Teat Dios tanguiay nej andeac cos nej tandiüm marang leaw Teat Dios apiüng.

<sup>8</sup> Masey Micual Teat Dios nej, pero netam mamongoch naél, cos atquiaj tajaw nguineay ayajcúw nipilan, at nguineay netam marangüch leaw andiüm Teat Dios.

<sup>9</sup> Cos landoj mamongoch aaga xeyay naél quiaj; quiaj meáwan nüt alndom mawün wüx asoeteran jangantanej nipilan leaw apmayar nej andeac.

<sup>10</sup> Quiaj Teat Dios tayac nej marang minatang miteaats atnej tarang Melquisedec.

*Nde ndrom imeajtsan Mipoch Teat Dios*

<sup>11</sup> Wüx aag ayaj aliün najiür xeyay sandiüm nasaj icon; aag ayaj naél, pero ngondom nasaj icon najen cos icona nequiy menguiayiün.

<sup>12</sup> Cos lamajiür xeyay nüt mendüjpiün Teat Cristo, pares lajneaj merquiajchiün; nganüy icona netam mequiaacharanan wüx leaw ngo maél tiül Mipoch Teat Dios. Ijlüyiün atnej nop lambiniow nine tealeámban achech, nganaw müet nüeteran.

<sup>13</sup> Jangantanej leawa tealeámban achech ajlüy atnej nop nine, cos nganaw majaw nguineay aquiaach aaga poch leaw apiüng cuane najneaj cuane ngo majneaj.

<sup>14</sup> Cos nipilan wüx latang alndom müet cuajantanej nüeteran. Aag ayaj apiüng wüx nipilan leaw ayacüw wüx omeajtsüw marangüw leaw apiüng Teat Dios, cos atquiaj apmajawüw cuane najneaj cuane ngo majneaj.

## 6

<sup>1</sup> Pares lango nasaj icon alinomb leaw landoj mesoiquiün wüx Teat Cristo. Nganüy netam matangaats wüx Mipoch Teat Dios; ngo metam mequiaachayoots wüx nguineay netam macueatiüts marangaats ngo majneaj, nguineay netam mayariüts andeac Teat Dios. Meáwan aag ayaj lanasaj icon xeyay.

<sup>2</sup> Lango nasaj icon alinomb netam meyariün yow, tengwüy nguineay netam mayacüch owixeran wüx omalaran. Aton ngo nasaj icon wüx apacaran tiül mondeow, at wüx Teat Dios apmajaw wüx asoeteran alinoic nüt. Cos meáwan aag ayaj lanaquiaach icon wüx.

<sup>3</sup> Sitiül Teat Dios andiüm, nganüy sanasaj icon nguineay netam matangaats wüx Mipoch Teat Dios.

<sup>4</sup> Meáwan leawa lamajawüw ranüy leaw apiüng tiül Mipoch Teat Dios, lamayariw aag imiün tiül cielo, lamüjndiw Nangaj Espiritu oceueaj Teat Dios,

<sup>5</sup> sitiül tayajcúw najneaj aaga andeac Teat Dios, at lamayariw nguineay apmarang Teat Dios alinoic nüt;

<sup>6</sup> sitiül ajcúw ayaj apmacueatiw mandüjpiw Mipoch Teat Dios, lango ndom leam omeajtsüw mandüjpiw Teat Cristo alinomb, cos aag ayaj atnej ayacüw Teat Cristo wüx cruz alinomb müjchiw mamongoch monxing.

<sup>7</sup> Ajcúw ayaj ajlüyiw atnej nacats iüt niüng ajoet najneaj, cos sitiül aag iüt quiaj apmayac najneaj leaw apiürüch tiül, at monopiür alcuane apmaxaingiw müetiwi, quiaj ajüic Teat Dios tambeol majlüy aag ayaj.

<sup>8</sup> Pero sitiül noic iüt palüy sats ayac, at cualsoj ajlüy tiül, aaga iüt ngo metam nicuajind, ngo majneaj apmaderac wüx. Ndójjwüx apmambeliw leaw altiül.

*Leaw teamacüliüts ambeol icoots mandüjpiüts Teat Cristo*

<sup>9</sup> Xecojow xechijquiaw leaw xeyay sandiüm, masey atquiaj sandeacan, sapiüngan icona atnej aaga iüt terangüy, tanaámb apmerangan najneaj; aag ayaj ajüic leriowan wüx isoetiün.

<sup>10</sup> Cos Teat Dios najneaj arang, ngo ndrom omeaats nguineay teamerangan, nguineay tanaámb membeolan meáwan mondüüb Teat Cristo.

<sup>11</sup> Sandiüman inopnophon tanaámb mepacan wüx mendüjpiün Teat Cristo, cos wüx irangan aag ayaj, quiaj apmeajndiün leawa temecüliün wüx ümb minütiün ningüy.

<sup>12</sup> Nde meranchiün; irangan atnej arangüw ajcúwa mondüüb Teat Cristo con omeajtsüw, cos taiündüw wüx cuajantanej amongochiw, condom ayariw leaw Teat Dios lamapiüng apmüüch nejw.

<sup>13</sup> Wüx Teat Dios tasaj Abraham cuane apmüüch nej alinoic nüt, quiaj nejáyan quiaj tandeac wüx minütan nej, cos ngo majlüy alinop natang atnej.

<sup>14</sup> Quiaj Teat Dios tasaj Abraham: "Xique sanambeol ic xeyay, sanüüch ic mejüür xeyay icualaats", aw.

<sup>15</sup> Atquiaj Abraham, cos tacül, ngo paxiüm oceueaj, quiaj tüünd leawa lamasoic apmüünd.

<sup>16</sup> Naleaing, tiül nipilan apajüw minüt nop más natang wüx ngo meyarayej andeacüw. Cos wüx andeacüw atquiaj, quiaj ajüic andeacüw naleaing, lango metam mandeacüw wüx más.

<sup>17</sup> Wüx Teat Dios tandiüm majüiquich naleaing, nej ngondom mangowüüch leawa lamapiüing apmüüch acualaats Abraham, quiaj tandeac wüx minütan nej majüiquich naleaing apmarang leaw lamapiüing.

<sup>18</sup> Cos Teat Dios tapiüing nguineay apmarang, tandeac wüx minüt nej, pares leaw tandeac ngondom mangowüüch, cos Teat Dios ngondom mawaiüch. Nganüy icootsa leawa lajwanaats wüx asoetiüts, Teat Dios teamambeol icoots ngo paxiüm macüliüts aaga leaw nej lamapiüing apmüüch icoots alinoic nüt.

<sup>19</sup> Nganüy aaga teamacüliüts quiaj, aag ayaj tüch icoots majlüyüts nandand wüx mandjüpiüts Teat Dios, atnej nop müx nandand ajlüy wüx ajüür micang müx masap nej. Wüx aaga leawa teamacüliüts quiaj, alndom majmeliüts necamb aaga cortina tiül nangaj iüm tiül cielo;

<sup>20</sup> niüing tajmel Teat Jesús, ombas nej, marang natang miteaats ocueajüts meáwan nüt atnej tarang Melquisedec.

## 7

### *Teat Jesús natang miteaats atnej tajlüy Melquisedec*

<sup>1</sup> Pues aaga Melquisedec quiaj minatang nenajüüt tiül cambaj Salem, aton miteaats nej ocueaj Teat Dios najlüy tiül cielo. Aaga naxey quiaj taw mangoch Abraham wüx tapeay landoj ajntsoj wüx montangtang monajüüt tiül montsoj. Quiaj aaga Melquisedec tasaj Abraham najneaj tarang, at tasaj Teat Dios mambeol nej.

<sup>2</sup> Condom Abraham tüüch Melquisedec igajpowüw (1/10) awün tiül leaw axom tiül montsoj. Pues aaga minüt Melquisedec quiaj apiüing wüx najneaj natang nenajüüt tiül cambaj Salem; at tajiür alinoic minüt nej, aag ayaj natang nenajüüt nendondoch moncüy.

<sup>3</sup> Aaga Melquisedec quiaj ngo majiür miteat nej, mimüm nej, mixeech nej; ngo majaraw nguineay tajlüy, nguineay tandeow. Nej tajüic atnej Micual Teat Dios nej, apmarang miteaats meáwan nüt.

<sup>4</sup> Nganüy ijawan nguineay tarangüch casa aaga Melquisedec quiaj, cos mixejchiüts Abraham tüüch nej igajpowüw naw tiül leaw taxom wüx tamb tiül montsoj.

<sup>5</sup> Ajawaats meáwan micual Levi leaw monrang miteaats netam mayariw igajpowüw naw tiül leaw axom cambaj, cos atquiaj apiüing tiül aaga poch tüünd Moisés. Naleaing nejw alndom mayariw aag ayaj ocueaj cambaj, masey micual nejw Abraham aton.

<sup>6</sup> Nganüy Melquisedec masey ngome naw tiül nejw, nej tayar igajpowüw naw tiül leaw taxom Abraham, at tatün ocueaj

Teat Dios mambeol nej, marang wüx leaw apiüing apmarang.

<sup>7</sup> Wüx aag ayaj ajüic leaw atün mimonajneaj Teat Dios wüx alinop, nej ajlüy natang; pero aaga leaw neyar monajneaj ajlüy chingüy.

<sup>8</sup> Naleaing nganüy aton miteaats ayariw igajpowüw naw tiül leaw axomüw nipilan, masey nipilan nejw. Pero ninguiün nüt wüx tandeac wüx Melquisedec, apiüing nej almapac ngo mandeow.

<sup>9</sup> Ajawaats ajcüwa miteaats micual Levi aton tangüyw Melquisedec igajpowüw naw tiül leaw taxomüw, cos Abraham mixejchiw nejw tangüy Melquisedec, masey nejw nganaw majlüyw.

<sup>10</sup> Cos wüx Melquisedec tamb mangoch Abraham, naleaing nejw nganaw majlüyw. Masey nganaw majlüyw, tajlüy atnej tangüyw aton, cos apwijquiamoj tiül acualaats Abraham.

<sup>11</sup> Teat Dios tüüch nipilan israel aaga ajlüyay poch müüch majawüw nguineay miteaats netam marangüw wüx ayacüw ichechiw nejw. Pero miteaats micual Levi ngondom mawün asoet nipilan, pares netam majlüy alinop miteaats marang atnej tarang Melquisedec leaw ngome naw tiül micual Aaron.

<sup>12</sup> Cos sitiül miteaats mbiüjlat, pues aaga ajlüyay poch tüünd Moisés aton netam mbiüjlam müünd alinop pálwüx miteaats marang minajüüt Teat Dios.

<sup>13</sup> Aaga landerac wüx quiaj, aag ayaj Teat Cristo. Nej ngome naw tiül micual Levi, nej naw tiül micual Judá. Nejinguind tiül ajcüw ayaj ngondom mayac nichech wüx artül.

<sup>14</sup> Naleaing ajawaats nej Teat Cristo tajlüy naw tiül micual Judá; nganüy Moisés ngo mandeac wüx Judá nicuajind, ngo mapiüing aljane apmaw marang miteaats.

<sup>15</sup> Wüx aag ayaj ranüy majawaats, cos aaga jayats miteaats quiaj, apmajlüy atnej Melquisedec.

<sup>16</sup> Aaga jayats miteaats quiaj tarang miteaats, cos niquimás ngondom ndrom ombas. Nej ngo marang miteaats atnej ajcüwa nipilan leaw tarangüw miteaats cos miteatiw nejw tarangüw miteaats.

<sup>17</sup> Atquiaj aton Teat Dios apiüing tiül Mipoch Nej:

Ique miteaats ic meáwan nüt, atnej tarang Melquisedec, aw.

<sup>18</sup> Quiaj ajüic aaga ajlüyay poch tüünd Moisés lango membeat nganüy, cos ngondom mawün asoet nipilan.

<sup>19</sup> Atquiaj tajlüy, cos wüx aaga ajlüyay poch quiaj, nejinguind ngondom maw wüx asoet nej. Nganüy ajlüy alinoic poch jayats, xeyay najneaj; wüx aag ayaj alndom matüchiüts niüing ajlüy Teat Dios.

<sup>20</sup> Wüx aaga jayats poch quiaj, Teat Dios tandeac wüx minütan nej wüx tayac Teat Cristo marang minatang miteaats.

<sup>21</sup> Cos Teat Dios ngo mandeac wüx minüt nej wüx tayacüchiw ajlüyay miteaats; nganüy wüx Teat Jesús tarang miteaats, quiaj Teat Dios tandeac wüx minüt nej. Aag ayaj apiüng tiül Mipoch Dios:

Teat Dios tandeac wüx minüt nej, pares ngondom mambiülüüch andeac nej. Nej tasaj Teat Cristo: "Ique apmerang miteaats meáwan nüt, atnej tarang Melquisedec", aj.

<sup>22</sup> Pares nganüy ajjüraats noic poch najneaj, cos Teat Jesús, aaga najlüy wüx a poch quiaj, apmajlüy meáwan nüt.

<sup>23</sup> Tajlüyiw xeyay miteaats; nganüy cos landeowüw, áag ngondom marangüw miteaats meáwan nüt.

<sup>24</sup> Nganüy nej Teat Jesús, cos almajlüy meáwan nüt, pares alinop ngondom mayar aaga najiüt ocueaj nej.

<sup>25</sup> Aton Teat Jesús alndom mawün wüx asoet meáwan nipilan leaw mondüüb Teat Dios. Cos nej almapac meáwan nüt, pares alndom matün ocueaj Teat Dios mabeol nejw.

<sup>26</sup> Aaga natang miteaats ocueajjiüts quiaj, xeyay ajneaj, nangaj nej, nejingüind ngondom mayac nej asoet, cos ngo majiür nisoet nicuajind, ngo majlüy matnej meáwan nipilan. Aton tayacüch majlüy natang wüx meáwan najlüy tiül cielo.

<sup>27</sup> Nej ngo metam ombas mambiy nimal mayac ichech nej majüiquich asoet nej, condom mayac ichech nipilan atnej arangüw ajcüw ajlüyay montangtang miteaats. Cos nejw rawrráwan tiüt ombas mambiyaw nimal majüiquich maw asoetiw nejw; condom ambiyaw nimal majüiquich maw asoet nipilan. Nganüy Teat Jesús teyacüy mandeow marang nichech mawün asoet nipilan. Aag ayaj ngocháyan, ngo metam marangüch alinomb.

<sup>28</sup> Tiül aaga poch tüünd Moisés apiüng jane apmarang minatang miteaats; cos ajcüw ayaj nipilánan nejw, ajjürüw nisoet aton. Condom wüx Teat Dios tandeac wüx minüt nej, tayac Micual nej marang minatang miteaats, cos nej apmajlüy palanüy meáwan nüt.

## 8

### *Teat Jesús ajlüy wüx noic jayats poch*

<sup>1</sup> Nganüy leaw xeyay netam mejawan, aag ayaj wüx aaga minatang miteaats landoj nasaj icon wüx. Cos nej alchetem amb wüx miác Teat Dios tiül cielo niüng ajlüy xeyay najneaj.

<sup>2</sup> Aaga minatang miteaats quiaj arang minajiüt nej tiül aaga najneajay nangaj iüm tiül cielo. Aaga nangaj iüm quiaj, ngome nipilan nerang, Teat Dios nerang.

<sup>3</sup> Pero meáwan minatang miteaats ningüy wüx iüt ajmel mayac nichech, mambiy nimal para maw nisoet. Nganüy aaga minatang miteaats tiül cielo quiaj, netam majiür cuane mayac aton.

<sup>4</sup> Nganüy sitiül Teat Cristo majlüy ningüy wüx iüt, niquimas ngondom marang miteaats, cos ajcüwa miteaats najlüyiw ningüy wüx iüt ayacüw ichechiw nejw atnej apiüng tiül aaga poch tüünd Moisés.

<sup>5</sup> Aaga najiüt leaw arangüw ajcüwa miteaats ningüy wüx iüt cam, aag ayaj apiüng wüx leawa najlüy tiül cielo. Cos wüx Moisés tasoic nguineay apmarang aaga nine nangaj iüm tiül wajchiüc miotaag nimal, quiaj tasaj nej Teat Dios: "Irang meáwan atnej tühchiüs ic mejaw wüx tiüc", aj.

<sup>6</sup> Pero minajiüt Teat Cristo tiül cielo najntsoch wüx ajneaj, ngo matnej arangüw ajcüwa miteaats ningüy wüx iüt. Nej ajlüy wüx noic poch najntsoch wüx ajneaj leawa tüünd Moisés, cos aaga poch leaw xeyay najneaj quiaj, apiüng wüx nguineay Teat Dios ajjür lasta nipilan mawün asoetiw nejw.

<sup>7</sup> Sitiül aaga ombas majlüy poch tajlüy najneaj, quiaj lango metam marangüch amb ijquiaw poch.

<sup>8</sup> Pero Teat Dios tajaw ngome palan arangüw ajcüwa nipilan, cos ngo marangüw atnej apiüng tiül aaga poch quiaj. Quiaj tapiüng Teat Dios:

Aliüc miün nüt sanarang noic jayats poch naquiüjpüw nipilan monaw Israel, at nipilan monaw Judá.

<sup>9</sup> Aaga jayats poch quiaj, ngo matnej aaga poch tarangas naquiüjpüw mixejchiw nejw

wüx a nüt tawünasüw imiün Egipto; cos nejw ngo marangüw atnej apiüng tiül a poch tarangas naquiüjpüw; pares ngo nanguaiy andeacüw.

<sup>10</sup> Nganüy aaga jayats poch sanarang naquiüjpüw nipilan israel wüx lamatiuch aaga nüt aliüc miün, apmajlüy atcüy:

Sanüüch macül xepoch teomalüw nejw, sanayac wüx omeajtsüw nejw.

Quiaj xique sanajlüy Midiosüw nejw, nejw apmajlüyiw xenipilan.

<sup>11</sup> Nejingüind ngome apmetam maquiaach alinop;

ngo metam maquiaach micoj nej michiig nej mapiüng: "Netam mendüüb Teat Dios", maw,

cos meáwan nipilan apmajawüw jane xic, masey namix masey natang.

<sup>12</sup> Sanajiürüw lasta masey ngo majneaj tarangüw;

asoetiw nejw lango leam ximeats wüx alinomb, aw Teat Dios.



<sup>13</sup> Wüx Teat Dios andeac wüx aaga jayats poch quiaj, quiaj ajüic aaga ombas majlüy lango metam. Pares leaw lango metam apmamong, apndrom.

## 9

*Niüng arangüch casa Teat Dios ningüy wüx iüt, at tiül cielo*

<sup>1</sup> Naleaing aaga ajlüyay poch tapiüng nguineay marangüch casa Teat Dios, at tandeac wüx nop nangaj iüm ningüy wüx iüt.

<sup>2</sup> Cos aaga nine nangaj iüm taag quiaj, nasoic tabernáculo, tajiür ijquiaw teomeaats. Aaga ombas teomeaats quiaj minüt nej Nangaj. Altiül noic nadam candiler, at nop mes alwüx pan leawa tajmel marangüch casa Teat Dios.

<sup>3</sup> Aaga nine nangaj iüm quiaj ajiür cortin pinawan; necamb aaga cortin quiaj ajiür alinoic teomeaats; aag ayaj minüt nej Xeyay Nangaj.

<sup>4</sup> Tiül aaga Xeyay Nangaj teomeaats quiaj, alquiaj noic artül narangüch oro ambeliw wüx pom. Aton tajlüy quiaj nop mbaw, ombas nej oro. Aaga mbaw quiaj minüt nej Mimbaw Jayats Poch, cos tiül aaga mbaw quiaj ajlüy nop nine xar palüy oro, iqial aaga atnej pan nenüt maná leaw tajmiüc imiün tiül cielo. Aton altiül a mbaw quiaj aaga nangoraad tsatsat, aag ayaj angot Aarón. Átan altiül ajcüwa piedra alwüx gajpowüw poch tarang Teat Dios.

<sup>5</sup> Wüx opech aaga mbaw quiaj alembemoj ijpiw querubines, ajlüyiw atnej ángeles, cos aag ayaj ajüiquichaw Teat Dios ajlüy quiaj. Ajcüw ayaj andeniw naag miölümbiw nejw aaga mbaw quiaj. Aag ayaj nganüy lango matüch nasaj icon wüx palan.

<sup>6</sup> Wüx landoj lajlüy quiaj meáwan tiül aaga nangaj iüm quiaj, quiaj ajcüwa miteaats ajmeliw rawrráwan tiüt tiül aaga mbas teomeaats iüm taag marangüw minajüütüw nejw marangüw casa Teat Dios.

<sup>7</sup> Pero tiül aaga amb ijquiaw teomeaats iüm taag, néjan minatang miteaats alndom majmel nomb oleaj tiül nomb neat. Naleaing nej ngondom majmel sitiül ngo majoy miquiej nimal maripip quiaj, cos ombas netam mayac ichech nej, ndoj alndom mayac ichech nipilan majüiquich asoetiw masey ngo mayajcüw arangüw.

<sup>8</sup> Wüx aag ayaj Dios Nangaj Espiritu üüch icoots majawaats nganaw lejquiam majmeleran tiül aaga Xeyay Nangaj tiül iüm taag, wüxan ajcüw miteaats arangüw minajüütüw nejw tiül aaga ombas palaw teomeaats nangaj iüm quiaj.

<sup>9</sup> Aaga nangaj iüm ningüy wüx iüt cam apiüng wüx nguineay ajlüy tiül cielo niüng ajlüy Teat Dios. Cos aaga leaw tearangüch

tiül aaga nangaj iüm quiaj, wüx ayacüw nichech, ambiyaw nimal majüiquich asoetiw nejw, aag ayaj ngondom müüch nejw mayajcüw laáw asoetiw nejw.

<sup>10</sup> Cos aaga ajlüyay tarangüw quiaj wüx nüeteran, wüx nanganeowaran, wüx cuajantanej najantsüch; ajcüw ayaj najneaj, ocueaj ombasaran. Cos meáwan aag ayaj tetam, tiün ndom wüx Teat Dios tüüch miün Teat Cristo, quiaj mbiüjlat aag ayaj, lango metam.

<sup>11</sup> Pero wüx Teat Cristo tamb marang minatang miteaats tiül cielo, nej tüüch icoots noic tabernáculo leaw xeyay najneajay. Aag ayaj ngome arangüch naag owix nipilan, at ngome ocueaj iüt cam.

<sup>12</sup> Cos wüx Teat Cristo tajmel quiaj tiül aaga Xeyay Nangaj tiül cielo niüng ajlüy Teat Dios, nej ngo majoy miquiej teants, tengwüy miquiej wacüx; nejay tamb mayac miquiej nej marang nichech. Atquiaj lamawün asoetiüts nómban.

<sup>13</sup> Cos nomb jane ngo marang leaw ajlüyay netam marang, netam majwich wüx ombasüw miquiej toro, tengwüy miquiej teants, tengwüy mingweat vaquilla; cos atquiaj alndom majlüyiw najneaj alinomb teombas Teat Dios.

<sup>14</sup> Sitiül aaga leaw arangüw quiaj tüüch nejw majlüyiw najneaj, ¡cuantemas nganüy miquiej Teat Cristo nómban apmüüch icoots majlüyüts najneaj! Cos Teat Cristo masey ngo majiür nisoet nicuajind, nejay teyacüy marang nichech müüch Teat Dios. Tarang aag ayaj cos Nangaj Espiritu ocueaj Teat Dios leaw almajlüy meáwan nüt tambeol nej. Nganüy lango metam marangaats aaga ajlüyay quiaj; alndom marangaats leaw Teat Dios andiüm cos nej almapac.

<sup>15</sup> Teat Cristo ajlüy wüx noic jayats poch. Nganüy meáwan nipilan leawa Teat Dios lamarriüd apmüjndiw leawa nej lamapiüng apmüüch majiürüw meáwan nüt. Cos Teat Cristo tandeow mawün nej asoetiw, masey áag leawa tarangüw wüx aliün majlüyiw tiül aaga poch ombas majlüy.

<sup>16</sup> Wüx ajlüy noic poch apiüng wüx nguineay apmbajcam cuajantanej leaw aneay aljane, quiaj ombas netam majaraw sitiül naleaing landeow leaw neyac aaga poch quiaj,

<sup>17</sup> Cos aaga poch quiaj ngo membeat sitiül nerang nej aliün mapac; nganüy sitiül landeow, quiaj nmembeat.

<sup>18</sup> Atquiaj sitiül ngo majlüy miquiej nop nimal marang nichech, aaga ombas poch ngo membeat aton.

<sup>19</sup> Cos Moisés wüx landoj masaj nipilan meáwan poch leawa tüüch nej Teat Dios, quiaj tayar miquiej nine toro, at miquiej teants, mayac tiül yow; condom tayar nacants milan sap, at mipüüig xiül nasoic

hisopo masoc tiül a quiej, cas tawiichwiich wüx nawiig; at tawiichwiich wüx ombasüw meáwan nipilan.

<sup>20</sup> Wüxan tengual marang aag ayaj Moisés tapiüng: “Aaga quiej cam üüch membeat aaga poch tayac Teat Dios, leaw netam merangan”, aw.

<sup>21</sup> Ngome áagan ayaj, at aton tawiichwiich quiej wüx aaga nangaj iüm taag, y wüx meáwan cuajantanej leawa netam nej-jiw wüx arangüw casa Teat Dios.

<sup>22</sup> Lamí cuajantanej netam mawiichwiich wüx quiej para matajücüh majneaj atnej apiüng tiül aaga poch tüünd Moisés. Átan sitiül nimal ngo mambyaran maw miquiej nej, nejinguind ngondom maw wüx asoet.

*Teat Cristo wüx tandeow tawün asoeteran nómban*

<sup>23</sup> Quiaj ajüic netam majwich quiej wüx cuajantanej najlüy tiül aaga nangaj iüm taag, para matajücüh majneaj atnej apiüng tiül aaga poch tayac Moisés; cos aag ayaj apiüng wüx leaw almajlüy tiül cielo. Nganüy aaga najlüy tiül cielo netam mayacüch noic nichech alwüx ajneaj, alwüx atam, ngome atnej najlüy ningüy wüx iüt.

<sup>24</sup> Cos Teat Cristo ngo majmel tiül aaga Xeyay Nangaj omeaats iüm tiül nangaj iüm leaw almajlüy ningüy wüx iüt; naleaing, tajmel tiül aaga Xeyay Nangaj leawa najlüy tiül cielo. Cos aaga nangaj iüm leawa najlüy ningüy wüx iüt, aag ayaj apiüng wüx nguineay ajlüy tiül cielo. Pares Teat Cristo tajmel quiaj tiül cielo niüng ajlüy Teat Dios matün ocueajüüts.

<sup>25</sup> Nej ngo metam meyacüy marang nichech neatneátan atnej arang minatang miteaats wüx ajmel tiül aaga Xeyay Nangaj majoy mamb miquiej nimal, ngome miquiej nej.

<sup>26</sup> Cos sitiül Teat Cristo netam mayac nichech mangüy asoetiüts neatneátan atnej tetam marangüw minatang miteaats, quiaj apmetam mandeow neatneátan aton, nde wüx tajlüy aaga iüt cam. Nganüy nde wüx tapeay ningüy wüx iüt cam, quiaj nomb teyacüy mandeow mawün asoeteran.

<sup>27</sup> Meáwan nipilan nomb netam mandeow, condom Teat Dios apmajaw wüx asoetiwiw nej.

<sup>28</sup> Atquiaj Teat Cristo aton teyacüy nomb mandeow mawün asoet xeyay nipilan. Nganüy wüx aliüc amb ijmbüw langome apmawün asoet nipilan; nej aliüc mawün wüx nipilan leaw teamacül nej.

## 10

<sup>1</sup> Aaga poch tüünd Moisés ajüiquich wüx leawa najneajay apmajlüy alinoic nüt, ngo mapiüng ranüy nguineay apmajlüy. Pares wüx aaga poch tüünd Moisés, nejinguind

ngondom majwan asoet nej nómban masey mayac nichech, cos neatneátan netam mayacüch nichech.

<sup>2</sup> Sitiül aljane mayac ichech nej maw asoet nej nómban, quiaj ngome apmayaag ajüür nisoet. Nganüy cos asoet nej ngondom maw nómban, pares ngondom macueat mayac nichech.

<sup>3</sup> Pero aaga nichech ajmel neatneátan quiaj, alndom müüch leaam omeajtsüw wüx asoetiwiw nej, áagan alndom marang.

<sup>4</sup> Cos miquiej toro, tengwüy miquiej teants niqimás ngondom mawün asoeteran nómban.

<sup>5</sup> Por aag ayaj wüx tapeay Teat Cristo ningüy wüx iüt, nej tasaj Teat Dios, tapiüng: Ngo mendiüm majmel wüx artül nimal nambyaran, tengwüy cuajantanej nichech,

cos ique teaach xic najlüy nipilan para ndom tandeow narang nichech.

<sup>6</sup> Ngo mind mejaw aaga nichech wüx nimal mandaab wüx artül;

at ngo mind mejaw cuajantanej nichech leaw nayacüch maw nisoet.

<sup>7</sup> Quiaj tapiüngas: “Jogüy xic Teat, lasapeay ningüy narang leawa ique indiüm, atnej larangüch tiül nawiig niüng apiüng wüx xique”, aw.

<sup>8</sup> Wüx aaga landoj mapiüng quiaj, ajawaats Teat Cristo tasaj Teat Dios: “Ique ngo mendiüm, ngome tajneaj mejaw majmel wüx artül nimal nambyaran marang nichech. At ngome tendiüm mejaw cuajantanej nichech leaw andaab wüx artül; at ngome tendiüm mejaw cuajantanej alinoic nichech ocueaj nisoet”, aw. Atquiaj tapiüng Teat Dios, masey meáwan nipilan tayacüw ichechiw nejw atnej apiüng tiül aaga poch tüünd Moisés.

<sup>9</sup> Condom Teat Cristo tapiüng alinomb: “Jogüy xic Teat, lasapeay ningüy narang leaw ique indiüm”, aw. Aag ayaj ajüic Teat Dios lamawün ajcüwa nichech leaw Moisés tayac, condom nejay Teat Cristo teyacüy marang nichech wüx tandeow.

<sup>10</sup> Teat Cristo tarang leaw apiüng Teat Dios, pares nganüy laaw asoetiüts nómban, cos nej tandeow marang nichech nómban mangüy asoetiüts.

<sup>11</sup> Naleaing ajcüwa miteaats tiül nipilan israel arangüw minajüütüw nejw rawráwan, mbójan ayacüw nichech; pero aag ayaj ngondom mawün nisoet nómban.

<sup>12</sup> Nganüy Teat Cristo áagan nomb teyacüy mandeow marang nichech mawün asoet nipilan. Condom quiaj tamb andüy tiül cielo chetem amb wüx miác Teat Dios.

<sup>13</sup> Teamacül wüx Teat Dios apmayac tiüt teoleaj nej meáwan leaw ngo mandüümwüw nej.

<sup>14</sup> Cos Teat Cristo áagan nomb teyacüy mandeow marang nichech. Naleaing nej nómban tawün nisoet ocueaj meáwan nipilan leawa larriüjtüch majlüyiw najneaj, nangaj.

<sup>15</sup> At aaga Nangaj Espiritu ocueaj Teat Dios aton ajüiquich aag ayaj naleaing wüx tapiüng:

<sup>16</sup> Aag agüy jayats poch sanarang naquiüjpüw wüx aaga nüt aliüc miün, atcüy apmajlüy:

Sanüüch macül xepoch tiül omalüw, at wüx omeajtsüw nejiw.

Sanüjchiw majawüw nguineay sandiüm marangüw, aw.

<sup>17</sup> Aton apiüng:

Niquimás ngome apleaam ximeaats wüx asoetiw nejiw, leaw ngo majneaj arangüw.

<sup>18</sup> Pues wüx laáw asoeteran, quiaj lango metam majmel nichech alinomb maw nisoet.

#### *Netam mayambaats Teat Dios*

<sup>19</sup> Pares xecojow xechijquiaw, ngo metam mimbolaats cos alndom majmeliüts tiül aaga Xeyay Nangaj niüng ajlüy Teat Dios, cos Teat Cristo tandeow, taw miquiej nej mangüy asoetiüts.

<sup>20</sup> Nej tarang aaga jayats tiüüd leaw among necamb aaga cortin wüx teyacüy nejáyan quiaj mandeow mangüy asoetiüts. Cos nej tarang atquiaj, nganüy alndom mapacaats meáwan nüt.

<sup>21</sup> Nganüy ajiüraats Teat Cristo, nej minatang miteaats ocueaj meáwan minipilan Teat Dios.

<sup>22</sup> Pares alndom matüchiüts Teat Dios con omeajtsaats cos ajawaats leawa teamandüjpiüts. At ajawaats miquiej Teat Cristo lamawün asoetiüts; quiaj ngo mayajcaats ajiüraats nisoet, cos aag ayaj atnej Teat Dios taxejmbeach icoots naag nrexix yow.

<sup>23</sup> Nganüy netam tanaámb macüliüts aaga xeyay najneaj leaw apmüjndiüts alinoic nüt; ngondom machiweaats omeajtsaats, cos Teat Dios apmüüch icoots leawa lamapiüng apmüüch, nej ngo mawaiüch.

<sup>24</sup> Pares netam mayambaats nguineay alndom mejüürayoots lasta nop alinop, nguineay alndom membeolayoots marangaats más najneaj.

<sup>25</sup> Tanaámb netam canchiümoos nóiquian mequiaachayoots wüx Mipoch Teat Dios; ngondom mecueatayoots matnej arangüw altiül. Tanaámb netam membeolayoots, pero nganüy más netam cos ajawaats laliüc matüch aaga nüt wüx aliüc Teat Cristo.

<sup>26</sup> Nganüy sitiül aljane alwüx omeaats mandium marang ngo majneaj, masey nej lamajaw naleaing leaw apiüng tiül Mipoch

Teat Dios, quiaj lango majlüy nicuajind nichech para ndom mawün asoet nej.

<sup>27</sup> Xeyay apmbayamoj majawüw aaga xeyay ngo majneaj leaw apmajlüy alinoic nüt wüx Teat Dios apmajaw wüx asoeteran, ndoj apmandrooch ombas tiül biümb meáwan leaw ngo mayar nej andeac.

<sup>28</sup> Cos nomb sitiül aljane ngo marang atnej apiüng tiül aaga poch tiünd Moisés, at sitiül ajlüy ijpüw arojüw monjaw leaw arang, aaga nipilan quiaj netam mandeow, niquimás ngondom maw wüx.

<sup>29</sup> ¡Sitiül aag ayaj tetam mandeow, cuan-temas ngo majneaj apmajlüy wüx aljane leaw apiüng ngo metam nej Micual Teat Dios; at leaw tayac atnej ngo membeat miquiej nej; at leaw ngo marang casa Nangaj Espiritu ocueaj Teat Dios, aaga nembeol icoots! Pues miquiej Teat Cristo awün asoet meáwan nipilan leaw ayariw aaga jayats poch leaw üüch nejiw marangüw najneaj.

<sup>30</sup> Cos ajawaats Teat Dios tapiüng: “Xique sanapalüch ombas mangüyiw leawa tarangüw”, aw. Alinoic tapiüng: “Teat Naxey apmajaw wüx asoetiw minipilan nej”, aw.

<sup>31</sup> ¡Xeyay xeyay ngo majneaj apmamon- goch nop nerang ngo majneaj wüx apm- jmiüc teowix Teat Dios almapac!

<sup>32</sup> Pero ich leaam imeajtsan wüx teyariün aaga poch ocueaj Teat Cristo, quiaj temon- gochiün xeyay ngo majneaj. Masey tajcüy majaw icon nipilan, naleaing icona teiücan wüx.

<sup>33</sup> Naleaing nguiaj titsojow icon, tandeacüw ngo majneaj wüx imbasan niüng ajlüy nipilan. Nguiaj tequiüjpan tiül ajcüw leawa tamongochiw ngo majneaj.

<sup>34</sup> Tejiüran lasta leawa tajmeliw tiül manchiüc. At wüx tajnot icueajiün leaw ijiüran ngo mamix imeajtsan, cos tejawan apmeajndiün tiül cielo leaw alwüx ajneaj, leaw nejingund ngondom manood, cos aag ayaj apmejiüran meáwan nüt.

<sup>35</sup> Nde paxiüm icueajiün; ich leaam imeajtsan aaga najneajay leaw apmeajndiün tiül cielo.

<sup>36</sup> Pares icona netam meiündan wüx leaw apmemongochiün wüx irangan leaw andiüm Teat Dios; quiaj apmeajndiün leaw lamapiüng Teat Dios apmüüch.

<sup>37</sup> Tiül Mipoch Teat Dios apiüng:

Najénan aliüc leawa lamapiüng aliüc, ngome apmequiy.

<sup>38</sup> Nganüy leaw lamayar sandeac, tanaámb netam mandüüb xic meáwan nüt.

Pero sitiül aljane achiw omeaats, ngo mandüüb xic, aag ayaj ngo mapac ximeaats najaw, aw.

<sup>39</sup> Pero icootsa ngo majlüyüts matnej ajcüw lapaxiow ocueajiw, lamacueatiw nómban, ndoj apndrom ombasüw tiül aaga xeyay ngo

majneaj. Naleaing ajlüyüüts tiül ajcüw leaw tanaám teamayariw Mipoch Teat Dios, ndoj laawüw wüx, lango mambüw tiül aaga xeyay ngo majneaj.

## 11

*Ajawaats naleaing leawa tea-  
mandüjpiüts*

<sup>1</sup> Wüx lamayariüts andeac Teat Dios, quiaj ajawaats apmajiüraats leawa tea-mandüliüts, masey nganaw maxomaats majawaats aag ayaj.

<sup>2</sup> At wüx nipilan nde tanomb tayaraw andeac Teat Dios, quiaj Teat Dios najneaj majaw nejiw.

<sup>3</sup> Nganüy cos lamayariüts andeac Teat Dios, quiaj ajawaats nej tarang iüt, tarang nüt, tarang caaw, tarang ocas; cos wüx nej tandeac quiaj tajlüy meáwan leaw almajlüy. Pares meáwan leaw axomaats majawaats nganüy, aag ayaj Teat Dios tarang naag leawa ngameaag ajaraw.

<sup>4</sup> Abel tayar andeac Teat Dios, tayac noic nichech leawa Teat Dios tandiüm, ngo mat-nej leawa tayac micoy nej Caín; aag ayaj Teat Dios ngo mandüüm. Quiaj Teat Dios tajüiquich najneaj arang Abel wüx tayar ichech nej. Nganüy masey nej landeow, tanaám anderac wüx nguineay nej tayar andeac Teat Dios.

<sup>5</sup> At Enoc, cos tayar andeac Teat Dios, aleáingan tamb andüy tiül cielo, ngo mandeow. Masey nipilan tamb mayambüw nej, ngo maxomüw, cos Teat Dios lamaquiiüb nej mamb andüy tiül cielo. Wüx nganaw maquiüraab andüy tiül cielo, tajüic nej naleaing tarang palan leawa andiüm Teat Dios.

<sup>6</sup> Nejingüind ngondom marang palan leaw andiüm Teat Dios sitiül ngo mayar andeac nej. Cos leawa nendiüm matüch niüng ajlüy Teat Dios, netam mayaag tiül omeaats, majaw Teat Dios almajlüy. Jangantanej leaw apmayamb nej, Teat Dios apmüüch majaw jane nej.

<sup>7</sup> Aaga Noé nde tanomb tayar andeac Teat Dios, tarang nop nadam müx mawün nejiw wüx, ngo mandeowüw tiül yow mintaj nej, at meáwan micual nej. Atquiaj tarang cos Teat Dios ombas lamasaj nej apmajlüy leaw nganaw majaraw. Quiaj Noé tayar andeac Teat Dios, tarang atnej lamasoic. Wüx nej tarang aag ayaj, quiaj tajüiquich meáwan aldemas nipilan wüx iüt ngo mayariw andeac Teat Dios. Noé tayar andeac Teat Dios, quiaj taw wüx cos Teat Dios tajaw najneaj arang.

<sup>8</sup> Teat Abraham aton, wüx tapaj nej Teat Dios, tayar leawa tasoic; taw tiül miüt nej, tamb andüy tiül alinoic iüt niüng lamapiüng

Teat Dios apmüüch nej. Tamb andüy alinoic iüt masey ngo majaw nguiane andüy apmamb.

<sup>9</sup> Tayar andeac Teat Dios, pares tacül tiül aaga iüt niüng Teat Dios lamapiüng apmüüch. Tacül quiaj atnej napeay miün nipilan tiülan iüm taag maquiüüb micual nej Isaac y Jacob. Atquiaj tarangüw cos Teat Dios lamapiüng nejiw apmüjndiw aaga iüt quiaj.

<sup>10</sup> Atquiaj tarang Abraham cos tea-mandiüm macül tiül aaga najneajay cambaj leaw ngo ndrom ombas cos witiüt wüx leawa nandand. Aaga cambaj quiaj Teat Dios tapiüng nguineay apmajlüy, ndoj tarang.

<sup>11</sup> At nejay müm Sara mintaj Abraham, tayar andeac Teat Dios; pares Teat Dios tüüch nej majiür teomeaats nej micual nej, masey lamong nüt alndom majiür micual nej. Atquiaj tajlüy, cos tayar andeac Teat Dios wüx tasaj nej apmüüch nej micual nej.

<sup>12</sup> Ajan wüx nop naxey tajlüy xeyay nacualaran, masey nej xeyay latang. Ajan wüx micual nej quiaj, tajlüyiw xeyay nipilan atnej ajlüyiw ocas, aton atnej miwüüd nadam ndec, nejingüind ngondom mateow.

<sup>13</sup> Meáwan nejiw tandeowüw wüx nganaw müjndiw leaw Teat Dios lamapiüng apmüüch. Pero nejiw cos lamayariw andeac Teat Dios, áag tapiüngüw naleaing alinoic nüt apmüjndiw aag ayaj. Nejiw apiüngüw ajawüw ajlüyiw ningüy wüx iüt at nejiw napeay miün nipilan.

<sup>14</sup> Cos leaw nepiüng atquiaj ajüic tealeámban mayambüw noic iüt niüng apmacüliw.

<sup>15</sup> Sitiül ndot leaam omeajtsüw miütüw nejiw niüng tawüw, quiaj ngo maél mandilileaw alinomb.

<sup>16</sup> Pero nejiw tayacüw omeajtsüw wüx noic cambaj más najneaj, aag ayaj tiül cielo. Pares Teat Dios apac omeaats masoic nej Midiosüw ajcüwa nipilan quiaj; nej lamarang noic cambaj niüng apmacüliw.

<sup>17</sup> Teat Abraham cos tayar andeac Teat Dios, quiaj tayac Isaac micual nej marang ichech nej, cos Teat Dios tandiüm majaw sitiül naleaing apmarang atnej lamasaj. Quiaj Abraham tamb maquiüüb aag anopüyan micual nej marang ichech nej, masey tilüy quiaj Teat Dios tasaj nej;

<sup>18</sup> "Ajan wüx Isaac apmajlüy xeyay micual", aj.

<sup>19</sup> Cos Abraham tapiüng tiül omeaats, tajaw Teat Dios alndom mapacüch micual nej alinomb. Pero masey Teat Dios ngo müüch Abraham mambiy micual nej, naleaing Abraham tayaag atnej landeow micual nej, ndoj tayaag atnej Teat Dios lamapacüch nej alinomb.

<sup>20</sup> Teat Isaac cos tajaw nguineay apmajlüy alinoic nüt, quiaj tayar andeac Teat Dios, tatün ocueaj Teat Dios mambeol micual nej Jacob at a Esau.

<sup>21</sup> Aton teat Jacob cos tayar andeac Teat Dios, pares wüx laliüc mandeow, quiaj tayar mapeaand tiüt angot nej, ndoj tanguer omal tiüt, tatün ocueaj Teat Dios mambeol nopnop micual José.

<sup>22</sup> Teat José aton tayar andeac Teat Dios, pares wüx laliüc mandeow tapiüng micual Israel apmawüw tiül Egipto alinoic nüt. Aton tasaj nejiw netam macajüw tiüt miolaats nej majoyiw mamb mamiütüw niüng andüyiw quiaj.

<sup>23</sup> Aton miteat Moisés y mimüm nej, cos tayaran andeac Teat Dios, pares wüx wijquiat Moisés taxotiw arej caaw; cos tajawüw nej nop nine najneaj natsüjyay ombas. Ngo mimboloj masey minatang nenajiüt lamapiüng netam mandeow meáwan namix nine monench tiül nipilan israel.

<sup>24</sup> At teat Moisés aton tayar andeac Teat Dios, pares wüx latang ngo mandium masonic micual nej aaga nux micual Faraón.

<sup>25</sup> Pero teat Moisés tarriüd mamongoch ngo majneaj nóiquian maquiüüb minipilan Teat Dios ingow mapac omeats acásan nüt marang leaw ngo majneaj.

<sup>26</sup> Atquiaj tarang cos ajaw más najneaj mamongoch naél wüx aaga Cristo leaw aliüc miün alinoic nüt, ingow ajiür cuajantanej tiül Egipto. Cos nej tajaw Teat Dios apmüüch nej leaw xeyay nembéat alinoic nüt.

<sup>27</sup> Teat Moisés tayar andeac Teat Dios, pares taw tiül Egipto; ngo mimbol masey xeyay apmajcüy natang nenajiüt. Moisés taiüc wüx meáwan cos atnej taxom majaw Teat Dios masey ngondom maxoram maraw.

<sup>28</sup> At cos teat Moisés tayar andeac Teat Dios, pares tapiüng marangüw aaga pascua atnej lamasaj nej Teat Dios. Aton tasaj minipilan nej mawichiw miqueiej sap mbeaymbeay ombiümüw nejiw, cos atquiaj aaga ángel apmamóngan wüx, ngome apmambiy aaga ombas wijquiam nacualaran tiül israel.

<sup>29</sup> Ajcüwa nipilan israel cos ayariw andeac Teat Dios, pares tamongoj tiül aaga Nacants Ndec. Tamongoj cos Teat Dios tambaag a ndec, tüüch nómban mawaag, iütan tiüt. Nganüy wüx monaw Egipto tandiümüw tamongoj aton, quiaj tapal nejiw tiüt tiül ndec, meáwan nejiw tandeowüw.

<sup>30</sup> At aton cos nipilan israel tayaran andeac Teat Dios, pares wüx landoj mayeyiw tiüt a cambaj Jericó ayaíw nüt, quiaj Teat Dios tüüch majmiüc meáwan aaga piedra leaw arangüch otüeng coet neyey tiüt aaga cambaj quiaj.

<sup>31</sup> At aaga Rahab, nop nelomblombüy najtaj leawa ndoj tayar andeac Teat Dios, tambeol ajcüwa monxey monaw Israel, ajcüw leaw tambüw mandacüwiw a iüt. Aaga Rahab ndoj taw wüx, ngo mandeow maquiüüb nipilan tiül Jericó leaw ngo mayariw andeac Teat Dios.

<sup>32</sup> ¿Cuane alinoic sanasaj icon wüx aag ayaja? Naleaing lango matüch nasaj icon wüx Gedeón, wüx Barac, wüx Sansón, wüx Jefe, wüx David, wüx Samuel, at wüx meáwan mondeac andeac Teat Dios.

<sup>33</sup> Pues nejiw tayaran andeac Teat Dios, áag wüx tambüw tiül montsoj tajntsojiw wüx meáwan leaw tajcüy majawüw nejiw tiül palpáwüx iüt. Ndoj tarangüw najneaj wüx a nipilan quiaj. Teat Dios tüüch nejiw leawa lamapiüng apmüüch, at tapal ombeay león, ngo matsamb nejiw.

<sup>34</sup> Aton leaw tayacaranüw tiül biümb, ngo mandajpüw. At wüx aljane andiüm mamby nejiw naag espada, nejiw tawüw wüx. Altiül tambeol nejiw Teat Dios tiül montsoj wüx ngondom ombasüw. Aton altiül ndoj ombasüw majntsojiw wüx leaw ajcüy majaw nejiw tiül montsoj, tüüch meciüürrüw montsoj monaw palpáwüx iüt.

<sup>35</sup> Alacas montaj, cos tayaran andeac Teat Dios, pares Teat Dios tapacüch alinomb acualajtsüw nejiw leawa landeowüw.

Altiül monyar andeac Teat Dios tamongochiw xeyay ngo majneaj; tambiyaranüw cos ngo mandiumüw macueatiw andüjpiw Teat Dios. Nejiw tajawüw apmajlüyw más najneaj wüx apmamacüw alinomb.

<sup>36</sup> Alacas cos ayariw andeac Teat Dios, pares titsojaranüw. Altiül tajwüchiw, altiül taoeleranüw naag galen, altiül tajmeliw tiül manchiüc.

<sup>37</sup> Alacas cos tayaran andeac Teat Dios tandeowüw najlosüw; alacas tandooigaránüw naag sier; alacas tambiyaranüw naag espada. Alacas tajüjyüyw acüliw ninguiün ninguiün, tasoijquiw apixaw nejiw miotaag sap miotaag teants, ngo majiürüw nicuajind; tajcüyaran marawüw, tamongochiw xeyay cuajantanej ngo majneaj.

<sup>38</sup> Alacas cos tayaran andeac Teat Dios netam majüjyüywan. Altiül tacüliw tiül wajchiüc, altiül tacüliw wüx tiüc, at tiül warraj tiüc, tengwüy tiül nadam warraj iüt. Masey tamongochiw meáwan aaga ngo majneaj quiaj, nejiw xeyay nembéatiw majaw nejiw Teat Dios.

<sup>39</sup> Naleaing tajüiquichaw ayariw andeac Teat Dios cos tajüic nguineay tamongochiw aag ayaj. Nganüy Teat Dios tiül aaga nüt quiaj ngo müüch nejiw leaw lamapiüng apmüüch.

<sup>40</sup> Cos Teat Dios tajaw alinoic nüt apmüüch icoots leawa más najneaj, áag ngo

müüch nejiw ombas leaw lamapiüng ap-müüch icoots.

## 12

*Netam mayacaats omeajtsaats wüx Teat Jesús*

<sup>1</sup> Ajawaats tajlüyiw xeyay nipilan leaw taiündüw wüx cuajantanej cos tayariw andeac Teat Dios; ajcüw ayaj atnej oic ayeyiw icoots tiüt nganüy. Sitiül ajlüy cuajantanej leaw alndom mapal icoots ngo marangaats najneaj, tengwüy sitiül nisoet itsoj omalaats, meáwan aag ayaj netam macueatiüts. Netam mandüjpiüts leaw Teat Dios lamayac icoots wüx.

<sup>2</sup> Netam mayacaats omeajtsaats wüx Teat Jesús, cos nej tayac icoots wüx leaw teamandüjpiüts, at teamambeol icoots marangaats palan leaw andiüm Teat Dios. Nej tajaw alinoic nüt xeyay apmapac omeaats, pares tafüc wüx mamongoch xeyay necoy wüx tandeow wüx cruz, ngo mapiüng wüx masey xeyay monxing. Wüx ndoj aag ayaj, nej tamb chetem amb wüx miác Teat Dios wüx aaga najneaj chetejeran wüx tiül cielo.

<sup>3</sup> Ich leaam imeajtsan wüx nguineay tamongoch Teat Jesús; cos xeyay tajcüyiw majawüw nej nipilan monrang ngo majneaj. Pares tanaám indüjpiün, nde paxiüm icueajjün, nde mamix imeajtsan.

<sup>4</sup> Masey itsojon mequiüjpan nisoet, pero nganaw maw miqueijün mendeowan cos iyariün andeac Teat Jesús.

<sup>5</sup> ¡Neol landroj imeajtsan wüx aaga poch tüüch icon Teat Dios atnej asoic wüx nop nacularan! Cos tiül Mipoch Teat Dios atcüy apiüng;

Xecual, nde mepiüng ngo mind menguiay wüx apmapaj icueaj Teat Dios.

Nde paxiüm icueajjün wüx nej apmayac ic wüx naél.

<sup>6</sup> Cos meáwan nipilan leawa Teat Dios andiüm, nej apmapaj ocueaj.

Aton nej alic meáwan leawa lajlüyiw micual nej.

<sup>7</sup> Netam meiücan wüx aaga apaj icueajjün quiaj; cos quiaj ajüic Teat Dios apaj icueajjün atnej nop nateateran apaj ocueaj micual nej. ¿Mbich ajlüy nop nacularan ngo mapaj nej ocueaj miteat neje?

<sup>8</sup> Pero sitiül Teat Dios ngo mapaj icueajjün atnej ajpap ocueaj nacularan, quiaj ajüic icona ngome naleaing necularanan, ijlüyün atanej necularanan wüx lada.

<sup>9</sup> Cos ajüiraats miteatiüts ningüy wüx iüt leaw tapajüw ocueajjüts, ndoj tayariüts ocueajiw. ¡Cuantemas Miteatiüts Dios tiül cielo netam mayariüts ocueaj wüx apaj ocueajjüts, ndoj apmapacaats meáwan nüt!

<sup>10</sup> Naleaing miteatiüts ningüy wüx iüt tapajüw ocueajjüts acas neat cos nejiw

apiüngüw netam; pero Teat Dios meáwan nüt apaj ocueajjüts cos nej ajaw aag ayaj apmambeol icoots marangaats najneaj, majlüyüts najneaj atnej ajlüy nej.

<sup>11</sup> Cos wüx ajpap ocueajjüts, aag ayaj ngo müüch icoots mapac omeajtsaats; üüch icoots mamix omeajtsaats. Pero wüx landoj mamongochiüts aaga apajaran ocueajjüts quiaj, lamajawaats nguineay netam marangaats. Condom quiaj apmajüiraats más najneaj omeajtsaats, at apmarangaats más najneaj.

*Xeyay ngo majneaj apmajlüy jane ngo mind manguiay andeac Teat Dios*

<sup>12</sup> Pares ijchan mapac iwixan ileajjün leaw ngo majiür apac, para alndom meiücan wüx leawa tememongochiün.

<sup>13</sup> Netam meyacan ileajjün wüx mejüyün tiül aaga naleaing tiüd para ndom merangan leaw andiüm Teat Dios, cos atquiaj apmembeolan leaw atnej necoex ngana majmiüc tiül tiüd, ngo mapac wüx mandüüb Teat Cristo.

<sup>14</sup> Átan ipacan wüx mejlüyün najneajan mequiüjpan meáwan nipilan, tanaám netam merangan leaw andiüm Teat Dios. Cos sitiül ngo merangan atquiaj niquimas ngondom mejawan Teat Dios.

<sup>15</sup> Aton ipacan wüx, ngana aljane ngo mayar mimonajneaj Teat Dios. Cos sitiül moncüy majntsop tiül icona, aag ayaj atnej mioxiich nangaag soex leaw apmayac ngo majneaj tiül icona. Cos atquiaj alndom majüy aaga nangaag tiül icona mayac icon wüx majlüy ngo majneaj.

<sup>16</sup> Nde mejiüran minajtajan, minaxeyiün; nde mepiügan ngo membeat leawa Teat Dios ajaw nembeat, cos atquiaj tarang Esaú. Nej tanüüb leaw apmajcueat müünd natang nacularan. Tanüüb aag ayaj cos tandiüm noic nüeteran.

<sup>17</sup> Icona lamejawan alinoic nüt wüx Esaú tandiüm mayar leaw apmajcueat müünd, naleaing ngondom müünd, at ngo maxom nguineay alndom mayar, masey tajiüts xeyay cos andiüm mayar.

<sup>18</sup> Aaga leawa lamayariüts ocueaj Teat Dios nganüy, aag ayaj ngome atnej cuajantanej alndom majaraw masaramb. Ngo matnej wüx nüt mixejchiüts tajawüw aaga tiüc teandaab, ancatitit, at anpojniün wüx, aton ancatearriür wüx atnej napac iünd.

<sup>19</sup> Icona ngo menguiayün ajüüts trompet, taton ngo menguiayün andeac Teat Dios. Nganüy leaw tanguiayiw aaga andeac Teat Dios quiaj, xeyay tatüniw nde mandeac alinoic poch.

<sup>20</sup> Cos ngo mind manguiayiw aaga xeyay naél poch quiaj leaw tapiüng: "Sitiül ndot nop nimal mamong wüx aaga tiüc quiaj, netam majlos tengwüy majengueran", aw.

<sup>21</sup> Xeyay tambolooch nejwü aaga tajawüw quiaj wüx mitiüc Sinaí. Quiaj Moisés tapiüng: “Xeyay ximbol, ambeapmbeap xic”, aw.

<sup>22</sup> Nganüy icona atnej lametüchiün aaga tüc nenüt Sión, tüül micambaj Teat Dios almapac, aaga Jerusalén tüül cielo niüng ajlüy xeyay ángeles ngo matüch mateoraw; teamarangüw casa Teat Dios.

<sup>23</sup> At aton atnej lerpeayiün tüül niüng canchiüjow nacualaranüw ombas, larangüch minütiw nejwü tüül cielo. At atnej lerpeayiün niüng ajlüy Teat Dios, áag apmejaw wüx ombas meáwan nipilan. At atnej lerpeayiün nóiquian mequiüjpan ajcüw espíritus ocueaj monyar andeac Teat Dios leaw tajlüyiw nomb. Nganüy Teat Dios lamüch nejwü majlüyiw palanüy najneajay tüül cielo.

<sup>24</sup> At atnej lerpeayiün niüng ajlüy Teat Jesús, aaga najlüy wüx jayats poch. At niüng ajlüy miquiej nej leaw xeyay nembat, ngome atnej miquiej Abel.

<sup>25</sup> Ijawan wüx, nde mepalan ilajcan, netam menguiayiün leaw asaj icon Teat Dios. Cos sitiül ajcüwa nipilan tajlüyiw tanomb tamongochiw ngo majneaj, cos ngo mayariw leaw tasaj nejwü Moisés ningüy wüx iüt; ¡cuantemas icootsa ngo mawaats wüx asoetiüts sitiül ngo mayariüts leaw lamasaj icoots Teat Dios najlüy tüül cielo!

<sup>26</sup> Wüx Teat Dios tendeac wüx aaga tüc nenüt Sinaí müüch manguiyiw nipilan israel, áag andeac nej nómban alanglang a iüt. Pero nganüy Teat Dios asaj icoots tüül Mipoch nej, apiüng: “Alinomb sanüüch melanglangüy ngome áagan a iüt; apmelanglangüy a nüt, caaw, ocas aton”, aw.

<sup>27</sup> Aaga poch leaw tapiüng quiaj: “Alinomb sanüüch melanglangüy” naw, aag ayaj apiüng wüx leaw apmelanglangüy ngome apmacül meáwan nüt. Nganüy aaga leaw ngondom melanglangüy, aaga cielo niüng acül Teat Dios, aag ayaj apmacül meáwan nüt.

<sup>28</sup> Pares nganüy mäjchiüts gracias Teat Dios, cos lamüch icoots mayariüts aaga najneajay cambaj tüül cielo leaw ngondom melanglangüy. Netam marangaats casa Teat Dios con omeajtsaats atnej andiüm nej.

<sup>29</sup> Pues Midiosaats ajlüy atnej noic biümb leaw alndom mambel cuajantanej.

### 13

*Netam marangaats leaw andiüm Teat Dios*

<sup>1</sup> Tanaámb ijiürayon lasta, netam mejlüyiün atnej nop necual icon.

<sup>2</sup> Aton nde ndrom imeajtsan, netam mapac imeajtsan mejawan napeay miün nipilan, meajchiün leaw netam. Cos atquiaj tarangüw acas monxey tanomb, tüjchiw

maxood aniüngüw nejwü ángeles, ngo ma-teotsüw wüx jane nejwü.

<sup>3</sup> Aton netam leaam imeajtsan wüx leaw altiül manchiüc, meyajcan atnej ilean tüül manchiüc mequiüjpan. Átan leaw teamamongochiw ngo majneaj, netam meyajcan atnej teamemongochiün ngo majneaj nóiquian mequiüjpan.

<sup>4</sup> Leaw langoch owixaw mequiübayej najneaj arangüw, wüx ameayiw nóiquian ngo majiür nicuajind. Pero naleaing naxey ngondom majiür pálwüx najtaj, at najtaj ngondom majiür pálwüx naxey. Meáwan monxey monjiür pálwüx najtaj tengwüy nüx, aton meáwan montaj monjiür pálwüx naxey tengwüy nench, pues Teat Dios apmajaw wüx asoetiw nejwü.

<sup>5</sup> At aton nde meycan imeajtsan wüx mendiümdiüman tomiün. Ich mapac imeajtsan wüx leaw almejiüran nganüy, cos Teat Dios apiüng: “Ngo nacueat nambeol icon”, aw.

<sup>6</sup> Pares ngo machiweaats omeajtsaats, alndom mapiüngaats atnej tanderac nomb:

Teat Dios nembat xic,

ngo nimbol nicuajind leaw alndom marang wüx ximbas aljane.

<sup>7</sup> Ich leaam imeajtsan wüx ajcüw leaw tarangüw natang tüül icona, leaw taquiajchiw icon wüx Mipoch Teat Dios. Iyamban imeajtsan mejawan nguineay tarangüw najneaj wüx almequiüjpan; irangan atnej tarangüw wüx tayariw andeac Teat Cristo.

<sup>8</sup> Teat Jesucristo, áag tambeol nejwü tim quiaj, atanej teamambeol icoots nganüy, aton atanej apmambeol icoots oxep nawiür, ngo majiür ümb.

<sup>9</sup> Nde mendiüpiün wüx sitiül aljane apmaquiaach icon wüx cuajantanej pálwüx, ngo matnej apmameol icoots oxep nawiür, ngo majiür ümb. Ágan Teat Dios alndom müüch icoots mimonajneaj nej cos ajiür icoots lasta. Sitiül mandüjpiüts aaga poch leaw andeac wüx nguineay alndom meteran, aag ayaj ngo mambeol icoots nicuajind.

<sup>10</sup> Nganüy ajiüraats noic nichech más xeyay nembat, ngo matnej tajlüy nomb. Tanomb miteaats tayacüw nimal wüx artül marang nichech tüül nangaj iüm taag, ngondom müetiw.

<sup>11</sup> Cos nomb minatang miteaats ajmel tüül aaga Xeyay Nangaj tüül nangaj iüm ajoyiw miquiej nimal maripip quiaj mangüy asoeteran. Ndoj taquiüjpüw aaga nandeow nimal mambeliw mbeay cambaj.

<sup>12</sup> Pares Teat Jesús aton tandeow mbeay cambaj mangüy asoet meáwan nipilan naag miquiej nej.

<sup>13</sup> Nganüy netam mambaats mbeay cambaj niüng Teat Jesús tandeow, masey mamongochiiüts monxing atnej nej tamon-goch.

<sup>14</sup> Pues ningüy wüx iüt cam ngo majiüraats micambajaats leaw apmajlüy meáwan nüt. Nganüy teamayambaats aaga cambaj leawa aliüc miün niüng apmacüliüts alinoic nüt.

<sup>15</sup> Cos Teat Jesucristo tandeow, pares netam marangaats casa Teat Dios meáwan nüt, cos aag ayaj atnej müjchiiüts ichechiiüts nganüy, y müjchiiüts gracias Teat Dios.

<sup>16</sup> Aton tanaámb netam membeolayoots, mejüarayoots lasta, cos aag ayaj atnej nichech leaw Teat Dios najneaj majaw.

<sup>17</sup> Netam merangan leaw apiüngüw mon-ajiüt tiül minipilan Teat Dios; netam meyaj-can chingüy icona, nganüy nejiw natangüw. Cos aag ayaj minajiütüw nejiw, netam mambeolüw icon wüx minajiüt Teat Dios. Alinoic nüt Teat Dios apmajaw wüx nguineay tarangüw. Pares imbeolüw marangüw najneaj, cos atquiaj apmapac omeajtsüw wüx minajiütüw nejiw, ngome apmamix omeajtsüw. Cos sitiül amix omeajtsüw wüx minajiütüw nejiw, aag ayaj ngo mambeol icon nicuajind.

<sup>18</sup> Itüniün ocueaj Teat Dios mambeol xicon, cos tanaámb sandiüman narangan leaw apiüng Teat Dios, nayajcan najneaj tiül ximeajtsan wüx cuajantanej leaw sarangan.

<sup>19</sup> Alinomb sasaj icon metüniün mambeol xic Teat Dios para ndom namb najaw icon najen.

*Ndójwüx atepeay, teamasaj Teat Dios mambeol nejiw*

<sup>20</sup> Nganüy satün ocueaj Teat Dios, aaga neech icoots majlüyiiüts najneájan, leaw tapacüüch alinomb Miteatiiüts Jesucristo. Nej nganüy nop natang nejiür icoots, atnej nop nejiür sap ajiür misap nej. Nej ajlüy wüx aaga jayats poch leaw apmajlüy meáwan nüt, cos taw miquiej nej tandeow.

<sup>21</sup> Ich mambeol icon Teat Dios merangan palan leaw andiüm nej, müüch icon merangan najneaj, cos Teat Cristo apmambeol icon. Nej netam marangüch casa meáwan nüt. Amén.

<sup>22</sup> Satün icueajiün xecojow xechijquiaw, inguiayiün leaw lanasaj icon tiül aaga nawiig cam, iyacan wüx imeajtsan. Áagan acas poch sarang wüx nawiig cam ngome xeyay najal.

<sup>23</sup> Nganüy sanasaj icon aton, michi-jquiaats Timoteo laáw tiül manchiüc. Sitiül nej mapeay najen, saleamban quiaj najawan icon.

<sup>24</sup> Itepeayiün meáwan natang nenajiüt tiül icona; aton itepeayiün meáwan monyar andeac Teat Cristo. Leaw aliw ningüy monaw Italia atepeayiw icon aton.

<sup>25</sup> Teat Dios tanaámb müüch icon mimon-ajneaj nej, tamtámban. Amén.



## Noic nanderac tarang wüx nawiig SANTIAGO

*Teat Santiago atepeay nipilan israel  
nguijantanej*

<sup>1</sup> Xique nenütiüs Santiago, nerangas minajiüt Teat Dios at minajiüt Teat Jesucristo. Satepeayiw meáwan micual Israel, ajcüwa micual gajpiüp (12) monxey leaw ndajr-riütoj tandüyiw tiül palpáwüx iüt.

*Teat Dios üüch maxoram omeaatsaran*

<sup>2</sup> Xecojow xechijquiaw, ich mapac imeajtsan xeyay, masey imongochiün cuajantanej ngo majneaj.

<sup>3</sup> Cos ijawan wüx imongochiün xeyay ngo majneaj wüx indüjpiün Teat Dios, quiaj apmejawan nguineay üüch icon meüücan wüx, ngo paxiüm icueajiün.

<sup>4</sup> Sitiül apmeüücan wüx meáwan cuajantanej leaw imongochiün, aag ayaj apmajüiquich irangan palan najneaj, lango metam icon nicuajind.

<sup>5</sup> Sitiül aljane icona ngo maxom omeaats nguineay netam marang leaw Teat Dios andiüm, ich matün ocueaj Teat Dios, quiaj apmüünd. Cos nej xeyay üüch meáwan nipilan leaw apmatün nej ocueaj, ngo malic.

<sup>6</sup> Wüx nop apmatün, tiül omeaats netam mapiüng apmüünd, ngondom machiw omeaats, aag jane apmachiw omeaats, aag ayaj ajlüy atnej arang omal yow tiül ndec, aqüüüb nej mamb iünd tengwüy ncherrec nguijantanej.

<sup>7</sup> Leawa nerang atquiaj ngondom mapiüng Teat Dios apmüüch nej leaw atün.

<sup>8</sup> Cos nop nipilan nejiür ijquiaw omeaats, noic nüt andiüm marang atnej andiüm Teat Dios, alinoic nüt andiüm marang andiüm nej. Aaga nipilan quiaj ngondom mandüüb noic nej.

<sup>9</sup> Nop nendüüb Teat Dios masey napateay ajüür, ich mapac omeaats wüx ambeol nej Teat Dios.

<sup>10</sup> Nop nejiür, ich mapac omeaats aton, masey nipilan itsojow nej wüx andüüb Teat Dios. Nej alinoic nüt apmandeow, at leaw almajiür apmamong atnej among ajpoet mbaj.

<sup>11</sup> Cos wüx apmajntsop nüt apmerraar xeyay, quiaj soex apmawaag, ajpoet nej apmajtean, quiaj ümb ajüic atsüjyay ombas. Atquiaj alndom majlüy wüx nop nejiür, masey teamapiüng marang minajiüt nej oxep nawüür, pero tealeámban marang, quiaj andeow.

*Netam maiücaran wüx meáwan naél*

<sup>12</sup> Najneajay apmajlüy jane afüc wüx meáwan naél amongoch, cos wüx landoj mafüc mamongoch meáwan aaga naél quiaj, quiaj apmüünd atnej noic corona leaw apmüüch mapac meáwan nüt, cos aag ayaj Teat Dios lamapiüng apmüüch meáwan mondiüm nej.

<sup>13</sup> Sitiül aljane ayaag tiül omeaats nej andiüm marang ngo majneaj, ngondom mapiüng Teat Dios tüüch nej leaam omeaats aag ayaj, cos nejingüind ngondom mayac wüx Teat Dios marang ngo majneaj, at Teat Dios ngo mayac wüx nejingüind marang ngo majneaj.

<sup>14</sup> Cos jangantanej nejáyan quiaj ayacüy tiül omeaats nej mandiüm marang ngo majneaj, wüx anot nej mandiüm marang leaw axom majaw, quiaj apmeyeracüy tiül naél.

<sup>15</sup> Wüx nop apmapiüng tiül omeaats nej marang ngo majneaj, aaga nisoet wüx landoj lamarang alndom mambiy nej.

<sup>16</sup> Xecojow xechijquiaw, nde mewaiicharanan wüx aag ayaj.

<sup>17</sup> Meáwan leawa najneajay üjndiüts üjndiütsan, aag ayaj palanüy ajüüraats. Meáwan aag ayaj aliüc imiün cawüx niüng ajlüy Teat Dios, aaga nerang nüt, nerang caaw, nerang ocas. Nej ngondom mambiülüüch atnej angowüüch minden cuajantanej.

<sup>18</sup> Cos nej Teat Dios tandiüm müüch icoots wijquiamoots wüx aaga naleaing poch wüx Teat Cristo, para majlüyüüts natang tiül meáwan leawa lamarang.

*Netam marangüch atnej apiüng*

<sup>19</sup> Xecojow xechijquiaw, ich leaam imeajtsan netam mecüliün menguiayiün. Ndoj, wüx lamejawan nguineay ajlüy, quiaj tenceacan. Nde majénan mejcüyiün.

<sup>20</sup> Cos sitiül aljane apmajcüy, quiaj langondom marang najneaj atnej andiüm Teat Dios.

<sup>21</sup> Nganüy netam mecueatiün meáwan ngo majneaj irangan, meáwan ngo majneaj ajlüy tiül imalan at tiül imeajtsan. Iyariün con imeajtsan aaga Nangaj Poch leaw alndom mawün icon wüx nisoet.

<sup>22</sup> Netam merangan atnej apiüng tiül Mipoch Teat Dios, nde menguiayiünan. Cos sitiül apmenguiayiünan, ngo merangan leaw apiüng, quiaj apmejiüiquichan icoyónan quiaj tengual iwaiichayon.

<sup>23</sup> Sitiül aljane anguiáyan Mipoch Teat Dios, ngo marang atnej apiüng, aag ayaj ajlüy atnej nop naxey nejaw mitey nej tiül cheeg nguineay ajlüy.

<sup>24</sup> Cos aaga nerang atquiaj quiaj masey tajaw nguineay ajlüy, condom wüx apmamb, quiaj landroj omeaats nguineay tajaw.

<sup>25</sup> Pero jane tanaám majaw palan aaga poch ocueaj Teat Dios aaga newün icoots wüx, mayax wüx omeaats marang leaw apiüing, quiaj aaga nipilan lango majlüy matnej nop nenguiáyan condom landroj omeaats. Pero nej apmajlüy nop nerang atnej apiüing Teat Dios, condom xeyay apmac omeaats wüx leaw arang.

<sup>26</sup> Sitiül aljane tiül icona apiüing xeyay andüüb Teat Dios, pero naleaing ngo majaw wüx andeac, aag ayaj nejáyan quiaj tengual awajchay, cos masey apiüing andüüb Teat Dios, aag ayaj ngo maleaing.

<sup>27</sup> Sitiül aljane naleaing andüüb Mipoch Teat Dios, ngo matsopoch nej nicuajind nisoet teombas Teat Dios; aag ayaj apmamb majaw mambeol ajcüwa nendeoj monguich, at apmambeol monleben omal montaj wüx amongochiw naél. Atquiaj alndom majlüy nerixixay omeaats, ngo marang atnej arangüw nipilan nganaw mandüjpiw Mipoch Teat Dios.

## 2

### *Ngo metam marrüjtan tiül nipilan*

<sup>1</sup> Xecojow xechijquiaw, cos indüjpiün najneajay Miteatiüts Jesucristo, ngo metam merriüjtan tiül nipilan.

<sup>2</sup> Cos sitiül aljane apmamb niüing canchiüron, nop asooig najneajay apix nej, at iquial owix nej oro; pero alinop apmamb quiaj netiün andüy, ngurich apix nej;

<sup>3</sup> condom icona apmajneaj mejawan aaga xeyay ajneaj asoijquiaw quiaj, apmesajan: “Mac cheter ningüy tiül najneajay chetedaran wüx cam”, merajan. Condom apmesajan aaga netiün andüy quiaj: “Lombóran ninguij, tengwüy tsotóran ningüy tiüt”, merajan.

<sup>4</sup> Wüx irangan atquiaj, ajüic ngo majneaj tengual irriüdayon, cos tengual mejawan nguineay ajlüy wüx ombas nop alinop; aag ayaj ngo majneaj ipiüingän tiül imalan quiaj.

<sup>5</sup> Xecojow xechijquiaw, inguiayiün sanasaj icon: Teat Dios lamarrüüd ajcüwa nipilan ngo majiür xeyay wüx aaga iüt cam mandüjpiw nej; at apmajlüyiw nóiquian maquiüb Teat Cristo tiül micambaj nej tiül cielo. Cos lamapiüing apmüüch aag ayaj meáwan leawa nej andiüm.

<sup>6</sup> Pero icona ngo mind mejawan nipilan leaw ngo majiür, ¿neol, ngome ajcüwa monjiür, nejw xeyay arangüw ngo majneaj wüx imbasana? ¿Neol, ngome nejw asapüw icon mayacüw icon teombas monajiüta?

<sup>7</sup> ¿Neol, ngome ajcüwa monjiür andeacüw ngo majneaj wüx aaga najneajay minüt Teat Jesucristo, áag tengual mendüjpiün nganüye?

<sup>8</sup> Sitiül icona apmerangan atnej Teat Dios apiüing tiül Nangaj Mipoch Nej wüx

apiüing: “Netam mendiüman nop alinop atnej iquiáyan quiaj indüümüy”, aw. Aag ayaj najneaj apmerangan.

<sup>9</sup> Pero sitiül irriüdayon nop alinop, aag ayaj xeyay nisoet ijiüran; aaga poch tayac Teat Dios ajüiquich ngo majneaj irangan.

<sup>10</sup> Sitiül aljane apmapiüing arang palan meáwan aaga poch tayac Teat Dios; pero sitiül nej ngo marang masey noic poch, aag ayaj Teat Dios ajaw atnej ngo marang nicuajind leaw apiüing tiül Mipoch Nej.

<sup>11</sup> Cos nejay Teat Dios leaw tapiüing: “Nop naxey ngondom majiür pálwüx najtaj, nop najtaj ngondom majiür pálwüx naxey”, aton tapiüing: “Nde membiy nejinguind”, aw. Atquiaj Teat Dios apiüing, cos sitiül nop naxey ngo majiür pálwüx najtaj, at najtaj ngo majiür pálwüx naxey, pero sitiül apmambiy nipilan, aag ayaj ngo marang leaw apiüing aaga poch tayac Teat Dios.

<sup>12</sup> Netam merangan najneaj, aton netam mendeacan najneaj atnej apiüing Teat Cristo, cos nej andiüm icon, pero aton apmajaw wüx isoetiün alinoic nüt.

<sup>13</sup> Sitiül aljane ngo majiür lasta alinop, alinoic nüt wüx Teat Cristo apmajaw wüx asoet nej, ngome apmajjür nej lasta nicuajind. Pero sitiül aljane apmajjür lasta alinop, quiaj Teat Cristo apmajjür nej lasta wüx apmajaw wüx asoeteran.

### *Netam mejüiquich nguineay indüüb Teat Dios*

<sup>14</sup> Xecojow xechijquiaw, ¿cuajpar sitiül aljane mapiüing andüüb Teat Cristo sitiül ngo majiür arang leaw apiüing Teat Cristo? Aag ayaj ngo majiüquich laáw asoet nej.

<sup>15</sup> Jondot nop micoj michiüg ngo majiür apix, ngo majiür cuane apmüet,

<sup>16</sup> condom nop icona masaj nej: “Tamtáman ijlüy, quiür iyamb ipix ngana mambiy ic naquind, iyamb it ngana mendeow lop”, maj nej. Pero sitiül ngo müüch nicuajind, ¿nguineay ajüic ambeol neje?

<sup>17</sup> Atquiaj sitiül aljane apiüing ayar andeac Teat Dios; pues aaga apiüing quiaj ngo membeol nicuajind sitiül ngo marang leawa netam marang.

<sup>18</sup> Sitiül apmasaj xic aljane: “Ique ipiüing temeyar andeac Teat Dios, pero xique teanarang leaw apiüing Teat Dios”, maw. Pues iich xic najaw nguineay iyar andeac Teat Dios masey ngo majiür irang najneaj, nganüy xique sanüüch ic mejaw nguineay sayar andeac Teat Dios cos sarang leawa nej andiüm.

<sup>19</sup> Ique ipiüing ijaw áagan nop Dios almajlüy, aag ayaj naleaing ipiüing. At aton nimeech ajawüw nop Teat Dios almajlüy, pero ambeapmbeap nejw, xeyay imboloj mandüyiw.

<sup>20</sup> ¡Ique nerchach! ¿Ngo mejaw sitiül nop apmayar andeac Teat Dios, pero ngo marang leaw apiüing Teat Dios, aag ayaj por ngana miün mapiüing lamayar andeac Teat Dios?

<sup>21</sup> ¿Neol ngo menguiayiüna nguineay tarang mixejchiiüts Abraham wüx tayac nichech müüch Teat Diosa? Cos nej tarang leaw tasaj nej Teat Dios, taquiiüb micual nej Isaac mayac wüx artül marang nichech.

<sup>22</sup> Naleaing ajawaats Abraham tarang aag ayaj cos tayar andeac Teat Dios. Quiaj tajüic nej naleaing ayar andeac Teat Dios, cos tarang leaw tapiüing Teat Dios.

<sup>23</sup> Wüx tarang aag ayaj, quiaj tajüic nej lamarang atnej apiüing tiül Mipoch Teat Dios, cos apiüing: “Abraham tayar leaw tasaj nej Teat Dios, quiaj tajüic Teat Dios lamawün nej asoet nómban”, aw. Ndoj tanderac najneaj wüx Abraham cos nej xeyay ajneaj aweaag Teat Dios.

<sup>24</sup> Nganüy ijawan sitiül naleaing nop ayar andeac Teat Dios, at sitiül arang atnej Teat Dios andiüm, aag ayaj ajüic Teat Dios lamawün nej asoet nómban.

<sup>25</sup> Tanomb aaga najtaj nejiürjiür naxey nenüt Rahab, Teat Dios tawün nej asoet, cos nej tarang leaw Teat Dios andiüm wüx taxot aniüing nej ajcüwa monxey, ndoj tüüch mambüw amb tiül alinots tiüid, ngana ndeajmoj.

<sup>26</sup> Atquiaj ajlüy, cos nop nandeow niplan ngo majiür espíritu; at aton masey nop apiüing lamayar andeac Teat Dios, sitiül ngo marang leaw apiüing Teat Dios, aag ayaj ajlüy atnej nop nandeow.

### 3

#### Oniweran

<sup>1</sup> Xecojow xechijquiaw, ngo metam majlüy tiül icona xeyay leawa apiüingüw alndom ombasüw maquiajchiw, cos ijawan leaw aquiajchiiüts sitiül ngo maquiajchiiüts naleaing atnej apiüing Teat Dios, nej apmayac asoetiüts xeyay.

<sup>2</sup> Naleaing nejingüind ngondom marang palan. Ndot sitiül aljane ngo mandeac nicuajind leaw ngo metam mandeac, aag ayaj arang palan. Aton nej alndom mesapüy wüx marang palanüy leaw netam marang.

<sup>3</sup> Ndot ayacaats freno teombeay nop cawüy, quiaj alndom maleainguijchaats mayacaats tiül tiüid.

<sup>4</sup> At nop nadam müx masey nadam, aaga nejiüyich nej alndom maleainguiich naag nots nine tímón, masey napac iünd mandiüm maquiiüb nej nguiajantanej.

<sup>5</sup> Atquiaj ajlüy wüx oniweran, cos masey nine oniweran, alndom merangrangüy mandeac wüx cuajantanej. ¿Neol ngo

mejawana, noic nine biümb alndom mambel xeyay xiüla?

<sup>6</sup> Atquiaj ajlüy oniweran, cos alndom marang xeyay ngo majneaj atnej biümb alndom marang. Aaga oniweran, nimeech alndom majüyich nej müüch mandeacaats xeyay ngo majneaj. Pares netam leaam omeajtsaats nguineay andeacaats meáwan nüt.

<sup>7</sup> Meáwan nimal masey napatüw, alndom müünd memas, masey quiec, masey ndiüc, masey nimal naw tiül ndec. Meáwan ajcüwa nimal quiaj, nipilan alndom müüch memas.

<sup>8</sup> Pero nejingüind ngondom mapal ombeay müüch memas oniw nej, cos aaga oniweran quiaj ngondom müünd memas. Aag ayaj ajlüy atnej micüy olüic napat ndiüc cos alndom mambiy.

<sup>9</sup> Cos naag ombeayaran alndom mandeacaats najneaj wüx Teat Dios; at alndom mapajjchaats nipilan, aag tarang Teat Dios atnej ajlüy nej.

<sup>10</sup> Cos ombeayaran alndom mandeac najneaj, aton alndom mandeac ngo majneaj. Xecojow xechijquiaw, atquiaj ngo metam marangüch.

<sup>11</sup> ¿Jondot, noic oniiüg yow, mbich nóiquian alndom maw tiül nangan yowa, at nangaag yowa?

<sup>12</sup> Xecojow xechijquiaw, ¿alndom noic owil toc maóng olívas? ¿Ngwüy alndom noic owil uva maóng toca? ¡Aag ayaj ngondom niquimas! Aton noic oniiüg yow ngondom maw tiül najtix yow nóiquian maquiiüb nangan yow.

#### Teat Dios ambeol maxoram omeaatsaran

<sup>13</sup> ¿Jane tiül icona xeyay axom omeaats, at ajaw wüx cuajantaneje? Nej ich majüiquich nguineay axom omeaats marang cuajantanej najneaj, at ngo merangrangüy wüx nicuajind.

<sup>14</sup> Sitiül aljane ayac wüx omeaats ajcüy majaw alinop, at xeyay arang cuajantanej leaw arang melombojcháyán wüx; aag ayaj ngondom merangrangüy wüx mapiüing nej xeyay andüy, cos nop nerang atquiaj ajüiquich tengualich awaich.

<sup>15</sup> Leaw nepiüing atquiaj, aag ayaj ngome ocueaj Teat Dios, aag ayaj ocueaj nipilan ningüy wüx iüt, tengwüy ocueaj nimeech.

<sup>16</sup> Cos sitiül aljane andiümdium ocueaj alinop, tengwüy sitiül alwüx omeaats ajcüy majaw aljane, quiaj apmajlüy xeyay moncüy, aton meáwan palpálwüx ngo majneaj alndom marangüch.

<sup>17</sup> Nganüy sitiül aljane axom omeaats wüx cuajantanej, aaga leawa teamaxom omeaats wüx quiaj imiün cawüx niüng ajlüy Teat Dios. Palanüy najneaj ajlüy, ngo müüch

moncüy, ajiür monajneaj, alndom man-guiay leaw apiüng alinop, ajiür lasta jangan-tanej, arang najneaj mambeol alinop. Ngo marang casa nop, pero alinop ngwüy; at ngo mawaiich nejingüind.

<sup>18</sup> Jane ayamb monajneaj nguiajantanej mamb, apmaxom monajneaj.

## 4

*Mondiümdiüm leaw almajlüy wüx aaga iüt cam*

<sup>1</sup> ¿Cuane wüx ajlüy moncüye, at mondeac-ndeac tiül icona? ¿Ngome aag ayaja naw tiül imeajtsana, merangan leaw icona indümana?

<sup>2</sup> Cos indüman mejiüran cuajantanej leaw ngondom mejiüran, pares tendiüman membiyan leaw nejiür. At aton indüman mejiüran leaw almajlüy alinop, pero ngondom mejiüran, áag teyambyamban moncüy, mejcüyiün mequiüjpan monjiür, para alndom menojtiün leaw almajlüürüw. Niüangan aton ngondom mexoman mejiüran nicuajind, cos ngo meyamban Teat Dios metüniün ocueaj.

<sup>3</sup> At aton masey itüniün, naleaing ngo meajndiün cos Teat Dios ajaw ngo majneaj itüniün. Nej ngo müüch cos itüniün para merlomboochayon wüx.

<sup>4</sup> Icona tepiüangan apmerangan leaw andiüm Teat Dios, ndoj ngo merangan. ¿Neol ngo mejawana sitiül irangan ngo majneaja leaw arangüch ningüy wüx iüta, Teat Dios ngo majneaj majaw icon?

<sup>5</sup> ¿Ngwüy, cuane ipiüngana? ¿Jow, leaw apiüng tiül Mipoch Teat Dios ngo metama? Ngwüy netam, cos apiüng: “Aaga Nangaj Espiritu ocueaj Teat Dios leawa nej tayac tiül omeajtsaats andiüm icoots xeyay; teamajiür icoots, ngo mandüüm marangaats ngo majneaj”, aw.

<sup>6</sup> Teat Dios teamambeol icoots xeyay, ngo metam mandüümaats marangaats ngo majneaj. Atcüy apiüng: “Teat Dios ambeol jane ngo merangrangüy; pero leaw nerangrangüy, nej ngo mambeol”, aw.

<sup>7</sup> Ijchan imeajtsan Teat Dios; nde merangan leaw minatangüw nimeech andiüm. Ndoj quiaj apaxiüm, apmacueat icon.

<sup>8</sup> Sitiül apmeajchiün imeajtsan Teat Dios, nej apmatüch niüng ijlüyiün mambeol icon. ¡lcueatiün irangan ngo majneaj icona monrang nisoet! Iwüniün tiül imeajtsan meáwan ngo majneaj, nde mejiüran ijquiaw imeajtsan. Netam merangan áagan leaw andiüm Teat Dios; ngondom merangan leaw icona indüman.

<sup>9</sup> Netam meyajcan ngo majneaj tiül imeajtsan, mejiüntsana xeyay. Nde mapac imeajtsan wüx aaga ngo majneaj irangan.

<sup>10</sup> Sitiül ngo merangan adam imeajtsan teombas Teat Dios, nej apmajüiquich najneaj irangan.

*Leaw nendeac ngo majneaj wüx ombas alinop*

<sup>11</sup> Xecojow xehijquiaw, nde mendeacan ngo majneaj wüx ombas nop alinop. Cos leaw nendeac ngo majneaj wüx ombas alinop, tengwüy ayac asoet alinop, aag ayaj atnej andeac ngo majneaj wüx aaga poch tayac Teat Dios. Cos atquiaj ajüic ngo metam nej, ngo marang leaw apiüng.

<sup>12</sup> Cos néjan Teat Dios lamayac Mipoch Nej, aton néjan alndom mayac asoet aljane. Nej alndom mawün wüx asoeteran, aton nej alndom mandrooch ombas nipilan tiül aaga xeyay ngo majneaj. ¿Jow nganüy icona, neol teyacan asoet alinopa?

*Ngondom mejaw cuane apmajlüy oxep nawüür*

<sup>13</sup> Sitiül aljane apmasaj icon mapiüng: “Nganüy tengwüy oxep apmambaats marangaats najiüt tiül noic cambaj miünquijaj; apmacüliüts quiaj nomb neat; apmengalayoots apmenüübayoots alndom maxomaats tomiün”, maw; aag ayaj ngo majneaj mapiüurang atquiaj.

<sup>14</sup> Cos ngo mejawan cuane apmexoman oxep nawüür, sitiül alndom mepacan tengwüy mendeowan. Acásan nüt ajlüyiüts niüngüy atnej oic, cos oic alndom majlüy acásan ores condom lamong.

<sup>15</sup> Netam mepiüangan: “Sitiül Teat Dios apiüng aliün mapacaats, quiaj apmarangaats aaga najiüt cam. Pero sitiül Teat Dios ngo mandüüm marangaats aaga najiüt cam, quiaj lango marangaats”, merawan.

<sup>16</sup> Pero naleaing icona ngo mepiüangan atquiaj, cos indeacndeacan, erlomboochayon wüx nguineay apmerangan oxep nawüür. Meáwan ajcüwa monlombojchay quiaj, Teat Dios ngo majneaj majaw nejw.

<sup>17</sup> Cos sitiül nop ajaw nguineay netam marang, ndoj ngo marang, quiaj lamajiür xeyay nisoet.

## 5

*Apaj ocueajiw monjiür*

<sup>1</sup> ¡Inguiayiün icona monyac imeajtsan wüx leaw almejiüran! Sanasaj icon, netam mejiüntsana, merpajan, cos laliüc memongochiün xeyay ngo majneaj.

<sup>2</sup> Cos meáwan leaw almejiüran, aag ayaj atnej pandiün, at meáwan najneaj ipixan almejiüran, aag ayaj ajlüy atnej lamüet nej ndeoo.

<sup>3</sup> At meáwan oro, meáwan plata leaw almejiüran, aag ayaj ajlüy atnej lajtep miüt,

lango majneaj. Ninguiay ajüic icona nerrejchiün wüx leaw almejiüran. Wüx aag ayaj alinoic nüt apmeyajcan xeyay ngo majneaj wüx Teat Dios apmajaw wüx isoetiün; cos apmeyajcan atnej teamambel icon biümb.

<sup>4</sup> Icona tewajjchan ajcüwa nipilan monrang minajiütan, ngo mengüyiün palan, por aag ayaj Teat Dios apmepalüch ombas, cos nej lamanguiyay nguineay teamapiüngüw ajcüwa monrang najiüt quiaj.

<sup>5</sup> Icona najneajay ijlüyiün ningüw wüx aaga iüt cam, lamong wüx ijiüran cuajantanej; temerangan meáwan leaw üüch mapac imeajtsan. Icona at icon nop naxip nimal wüx apmatüch a nüt apmembiyaranan.

<sup>6</sup> Icona lameyacan asoet mandeowüw leawa ngo majiürüw nisoet nicuajind. ¡Nejiw ngondom mewünayej!

*Iiücan wüx cuajantanej leaw imongochiün*

<sup>7</sup> Xecojow xechijquiaw, netam meüücan wüx meáwan ngo majneaj leaw imongochiün, leaw atüch a nüt mandilil Teat Jesús. Cos ijawan nguineay arang nop nepiür, netam mafüc wüx leaw ajot ndoj apmapiür. Condom apmatüch aaga nüt maxaing omeaats corrül.

<sup>8</sup> Atquiaj icona aton netam meüücan wüx leaw almindüjpiün, nde paxiüm icueajüün; cos laliüc mapeay Teat Jesús imiün tiül cielo.

<sup>9</sup> Xecojow xechijquiaw, nde mendeacan ngo majneaj wüx ombas nop alinop, nganandot Teat Dios mayac xeyay isoetiün, cos laliüc matüch a nüt majaw wüx asoeteran.

<sup>10</sup> Xecojow xechijquiaw, netam merangan atnej nomb tarangüw ajcüwa mondeac andeac Teat Dios, cos nejiw taiücw wüx meáwan ngo majneaj leawa tamongochiw.

<sup>11</sup> Ajawaats najneajay tajlüyiw leawa taiücw wüx meáwan ngo majneaj tamongochiw quiaj. Lamenguiayiün nguineay teat Job taiüc wüx meáwan ngo majneaj, at nguineay Teat Dios tambeol nej xeyay wüx landoj mamongoch aag ayaj. Atquiaj arang Teat Dios cos najneaj omeaats, andiüm meáwan nipilan.

<sup>12</sup> Nganüy xecojow xechijquiaw, sasaj icon nde mepajan wüx minüt Teat Dios. Nde mepajan wüx minüt cuajantanej najlüy tiül cielo, tengwüy leaw najlüy wüx iüt. Nde mepajan minüt wüx cuajantanej leaw almajlüy. Ngwüy netam mepiüangan naleaing tajawas, tanguiyiüs; tengwüy ipiüangan naleaing ngo najaw ngo nanguiyay. Cos sitiül apmerangan atquiaj Teat Dios ngome apmayac isoetiün alinoic nüt.

<sup>13</sup> Sitiül aljane icona amongoch ngo majneaj, ich masaj Teat Dios mambeol nej; sitiül aljane apac omeaats, ich mataag cantar himnos wüx minüt Teat Dios.

<sup>14</sup> Sitiül aljane tiül icona niün andeow, ich mapaj montangtang monajiüt tiül icona monyar andeac Teat Cristo, mambüw quiaj matüniw ocueaj Teat Dios mambeol nej. Aton ich matequejchiw wüx ombas nej aceite wüx minüt Teat Jesucristo.

<sup>15</sup> Condom ich matüniw ocueaj Teat Dios, nde machiweaw omeajtsüw. Quiaj aaga niün andeow quiaj apmajneaj, Teat Dios apmawitich nej, y sitiül ajiür nisoet Teat Dios apmawün meáwan asoet nej.

<sup>16</sup> Nganüy sitiül aljane tiül icona arang ngo majneaj, ich macheed masaj icon cuane nisoet ajiür. Condom isajan Teat Dios mambeol nop alinop wüx aag ayaj; quiaj apmamong, apmajneaj iün andeow. Cos sitiül nop naleaing andüüb Teat Dios con omeaats y arang leaw andiüm Teat Dios, wüx apmatün ocueaj Teat Dios, quiaj apmarangüch leaw nej atün.

<sup>17</sup> Aaga teat Elías tajlüy tanomb, aag ayaj nop naxey atnej icootsa. Naleaing wüx nej tatün ocueaj Teat Dios ngo majoet, quiaj ngo majoet aroomb neat pinawan.

<sup>18</sup> Condom tatün alinomb ocueaj Teat Dios, tasaj müüch majoet, quiaj tajoet. Condom tajlüy nüeteran cos terangüy omeaats micorrülüw nejiw.

<sup>19</sup> Xecojow xechijquiaw, sitiül aljane tiül icona lango mandüüb aaga poch naleaing leaw tandeac Teat Dios, nganüy sitiül alinop icona apmambeol nej mandilil alinomb mandüüb Teat Dios,

<sup>20</sup> quiaj aaga nerang ngo majneaj quiaj apmaw wüx asoet nej, lango mandeow tiül nisoet. Aton aaga nembeol nej aldom mayaag najneaj cos lamawün wüx aaga nipilan quiaj, lango majiür nicuajind nisoet.

## **Anoic nanderac arang wüx nawiğ San Pedro 1ª Carta de SAN PEDRO**

### *Atepeay*

<sup>1</sup> Xique nop apóstol ocueaj Teat Jesucristo, nenütiüs Pedro. Nganüy sarang aaga acas poch cam natepeayiw meáwan nipilan israel leawa tajwanüw tiül micambajüw nejiw, leawa nganüy ajlüyiw tiül alinoic iüt, tiül Ponto, tiül Galacia, tiül Capadocia, tiül Asia, tiül Bitinia.

<sup>2</sup> Cos Teat Dios nde tanomb ajaw icona apmendiüpiün nej; pares lamarriüd icon meajchiün imeajtsan merangan leawa Nangaj Espiritu asaj icon. Lamajants icon miquiej Teat Jesucristo para mejlüyiün neresixay. Tamtámban nejneajünan, ich mexeyay tiül icona mimonajneaj Teat Dios.

*Teamacüliüts leaw ngome apndrom ombas*

<sup>3</sup> Najneajay ajlüy Teat Dios, Miteat Miteatiüts Jesucristo, cos tajmiüc omal omeaats majaw leaw amongochiüts. Tüüch icoots wijquiamoots alinomb cos tapac tiül mondeow Teat Jesucristo. Aag ayaj tüüch mapac omeajtsaats xeyay macüliüts aaga nüt wüx icoots apmapacaats alinomb.

<sup>4</sup> Quiaj apmüjndiüts leawa Teat Dios lamapiüng apmüüch icoots ninguiün tiül cielo. Aaga leaw apmüjndiüts quiaj, ngome apndrom ombas, apmajüüraats meáwan nüt. Ngondom matsopoch nej nicuajind; aton ngondom mantsoy mawaag.

<sup>5</sup> Cos ijchan imeajtsan meyariün andeac Teat Dios, nej teamajür icon leaw apmatüch a nüt nómban meriowan wüx isoetiün. Aag ayaj aliüc miün apmajlüy wüx ümb wüx nüt.

<sup>6</sup> Meáwan wüx aag ayaj icona netam mapac imeajtsan xeyay, masey ningüy wüx aaga iüt cam apmemongochiün xeyay naél. Naleaing aag ayaj acásan nüt apmajlüy.

<sup>7</sup> Icona netam meiücan wüx meáwan naél leaw apmemongochiün wüx indüjpiün Mipoch Teat Dios, cos aag ayaj najntsop wüx ambeat, ngo matnej netsüjyay ombas oro. Masey majmel wüx biümb maponcharan majwan misoy nej maw ágan jayats oro. Atquiaj icona sitiül apmejüiquichan nguineay iücan wüx meáwan imongochiün quiaj, najneajay apmapac omeaats Teat Jesucristo majaw icon wüx nej aliüc alinomb.

<sup>8</sup> Cos Teat Jesucristo indiüman, masey ngome nejay tejawan, nganüy tanaámb iyariün mipoch nej. Xeyay apac imeajtsan wüx nej, masey ngo mexoman poch leaw alndom mapiüng wüx nguineay ajneaj ajlüy.

<sup>9</sup> Pues aaga mipoch Teat Jesucristo leawa temeyacan imeajtsan wüx, aag ayaj apmawün icon wüx isoetiün.

<sup>10</sup> Ajcüwa mondeac andeac Teat Dios monlüy tanomb tandiümüw majawüw nguineay ajlüy mimonajneaj Teat Dios leaw apmeajndiün, ijndeánan. Tayambüw teamtéaman majüquichaw nguineay ajlüy aaga awaran wüx asoeteran.

<sup>11</sup> Tayambüw ngün nipilan ngün nüt andeac wüx aaga Nangaj Espiritu ocueaj Teat Cristo leaw almajlüy tiül nejjiw. Cos tandeac wüx meáwan ngo majneaj leaw apmamongoch aaga Cristo, condom tajuiquich nguineay apmajlüy xeyay najneajay.

<sup>12</sup> Condom tüjndiw majawüw aag ayaj ngome apmajlüy tiül minütiw nejjiw; aag ayaj apmajlüy wüx icootsa. Cos meáwan leawa tandeacüw, aag ayaj lajlüy nganüy, lamenguiaiyiün wüx. Pues aaga Nangaj Espiritu niün imiün tiül cielo tambeol nejjiw mandeacüw aag ayaj. Meáwan aaga lajlüy quiaj, ajcüwa ángeles monaw tiül cielo xeyay tandiümüw majawüw nguineay ajlüy.

*Teat Dios tayamb icoots marangaats najneaj*

<sup>13</sup> Nganüy iyacan wüx imeajtsan leaw lamenguiaiyiün, merangan palanüy leawa najneaj. Icüliün meajndiün aaga monajneaj leaw apmeajndiün wüx Teat Cristo aliüc alinomb.

<sup>14</sup> Nganüy irangan atnej arangüw nacualaran leaw arangüw asaj nejjiw miteatiw nejjiw. Nde merangan ngo majneaj atnej terangan nomb wüx nganaw meyariün andeac Teat Cristo.

<sup>15</sup> Cos aaga nepaj icon mendüjpiün nej arang palanüy najneaj; at icona netam merangan ágan najneaj meáwan nüt wüx ijlüyiün wüx aaga iüt cam.

<sup>16</sup> Tiül Mipoch Teat Dios apiüng: “Netam merangan najneaj cos xique nejneaj sarang”, aw Teat Dios.

<sup>17</sup> Sitiül icona ipiüangan Teat Dios miteatiün, pues nej ajaw jane arang najneaj jane ngwüy; nej apmajaw wüx leawa arangaats anopnopoots. Netam mermbolan mendüyiün Teat Dios meáwan nüt wüx almejüyiün wüx aaga iüt cam atnej napeay miün nipilan.

<sup>18</sup> Cos Teat Dios lamawün icon tiül meáwan leaw ngo metam merangan, áag leawa tayacüw icon wüx mixejchiün. Nganüy ijawan aaga tawün icon wüx isoetiün ngome nangüyaran naag oro tengwüy plata leaw alndom ndrom ombas.

<sup>19</sup> Pero tejwanaranan naag xeyay nembeat miquiej Teat Jesucristo wüx tandeow wüx cruz mangüy isoetiün. Cos nej tajlüy

atnej nop quicheech sap najneajay, ngome ndron ombas.

<sup>20</sup> Nej Teat Cristo lajlüy netam mandeow nde wüx nganaw majlüy aaga iüt cam, pero nej tiün mejuiquichay majaraw wüx tatüch a nüt, cos xeyay andiüm icon.

<sup>21</sup> Nganüy icona lamexoman Teat Dios cos nej Teat Cristo tamongoch meáwan aag ayaj. Nejay Teat Dios tapacüüch alinomb Teat Cristo tiül mondeow; tüüch nej majlüy najneajay. Nganüy icona lameyacan imeajtsan wüx Teat Dios.

<sup>22</sup> Nganüy ijlüyüin atnej lerjantsaranan norexix nde wüx Nangaj Espiritu tambeol icon meyariün, mendüjpiün aaga naleaing poch. Nganüy netam mejlüyüin nóiquian atnej nop necual icon, meyacan imeajtsan wüx mendüüman nop alinop.

<sup>23</sup> Nganüy ijlüyüin atnej lawijquiaron alinomb; aag ayaj ngome atnej macual icon miteatiün mimüman, cos nejiw apmandeowüw. Nganüy aaga ijiüran quiaj ngome apndrom ombas, cos aag ayaj Mipoch Teat Dios tanaám apmajlüy meáwan nüt.

<sup>24</sup> Mipoch Teat Dios apiüng: Meáwan nipilan ajlüyiw at nejiw nateaic soex,

nganüy meáwan nalombocharanüw wüx, ajlüy atnej ajpoet soex.

Cos aaga soex quiaj apmawaag, ajpoet nej apmajtean;

<sup>25</sup> Pero Mipoch Teat Dios tanaám apmajlüy meáwan nüt, aw.

Aaga poch cam tenguiayüin wüx tasajüw icon nguineay Teat Cristo alndom mawün isoetiün.

## 2

<sup>1</sup> Nganüy netam mecueatiün meáwan ngo majneaj irangan: monwaiich, mondeacndeac iwüniünan wüx imeajtsan, moncüw majaw alinop leaw nejiür, at meáwan mondeacndeac wüx ombasaran.

<sup>2</sup> Irangan atnej arangüw namix nine les wijquiat cos ayambyambüw machech. Atquiaj icona netam meyamban metangan wüx aaga Nangaj Mipoch Teat Dios leawa temendüjpiün, cos aag ayaj apmewün isoetiün.

<sup>3</sup> Atquiaj apmerangan sitiül naleaing ijawan Teat Dios najneaj arang.

*Teat Cristo atnej noic piedra xeyay netam*

<sup>4</sup> Itüchiün niüng ajlüy Teat Cristo, ijchan imeajtsan, cos nej ajlüy atnej noic piedra almapac. Masey nipilan aloxiw ningüin, apiüngüw ngo metam. Nganüy Teat Dios landoj lamarriüüd majlüy nembear xeyay.

<sup>5</sup> Nganüy icona ijlüyüin atnej xeyay piedras almapac. Teat Cristo apmawitich wüx icona atnej noic templo ocueaj Teat Dios; at apmejlüyüin noic ajlüy miteaats

nangaj ocueaj Teat Dios, meajchiün imeajtsan atnej meyacan noic nichech müüch mapac omeaats Teat Dios.

<sup>6</sup> Lamapiüng tiül Mipoch Teat Dios:

Xique sanayac tiül Jerusalén noic piedra xowüy latam, narriüjtüch, nembear xeyay, apmamb tiül oxing iüm.

Jane apmayar; mandüüb aquiaach nej, ngome apmaxing, mamix omeaats, aw.

<sup>7</sup> Jane tiül icona lameyariün aquiaach Teat Cristo, lamepiüangan nej xeyay nembear. Nganüy jane ngo mayar aquiaach nej, atcüy apiüng wüx nejiw tiül Mipoch Teat Dios:

Aaga piedra leaw monrang iüm ngome tandiümüw;

nganüy lamarang aaga netamüy piedra tiül oxing iüm, aw.

<sup>8</sup> Aton tandear wüx Teat Cristo wüx apiüng: Aaga piedra nelimb oleajaran, aton iüch majmiücaran wüx, aw.

Atquiaj apiüng cos altiül ajtoechiw wüx leawa taquiaach Teat Cristo, ngo mandüümüw marangüw leawa tapiüng, landoj lajwanüw marangüw aaga ngo majneaj quiaj.

<sup>9</sup> Nganüy icona ijlüyüin noic ajlüy nipilan leaw lerrüjtücharanan mejlüyüin noic ajlüy miteaats tiül noic nangaj cambaj ocueaj Teat Dios. Netam mejüiquichan mesajan meáwan nipilan nguineay Teat Dios tapaj icon meriowan tiül pojniün, mendüyüin tiül aaga najneajay ran.

<sup>10</sup> Icona tanomb ngome tejlüyüin minipilan Teat Dios; nganüy lejlüyüin minipilan nej. Tanomb ngome tetüchiün meyariün mimonajneaj Teat Dios; nganüy mbich lametüchiün, lamejiüran.

*Netam merangan atnej andiüm Teat Dios*

<sup>11</sup> Xecojow xechijquiw, inguiayüin leawa sanasaj icon. Icona netam meyajan ijlüyüin at icon napeay miün nipilan tiül aaga iüt cam. Iiücan wüx, nde merangan ngo majneaj leaw indüüman. Cos meáwan aag ayaj tenguiat atsoj wüx müüch ndrom imeajtsan indüjpiün Teat Dios.

<sup>12</sup> Tanaám irangan najneaj para majawüw meáwan nipilan leaw nganaw mayariw andeac Teat Dios. Masey nejiw nganüy andeacndeacüw ngo majneaj wüx imbasan, ayacüw icon monrang xeyay ngo majneaj. Wüx apmatüch a nüt Teat Dios apmajaw wüx asoeteran, nejiw apmajawüw icona terangan najneaj. Quiaj apmapiüngüw Teat Dios najneaj arang.

<sup>13</sup> Cos temendüjpiün Teat Cristo, pares netam meyariün andeacüw meáwan monajiüt leaw ajmeliw marangüw natang wüx aaga iüt cam, masey aaga minatangüy nenajiüt nasoiic rey aton.

<sup>14</sup> At iyariün andeacüw ajcüwa chingüy monajiüt cos najmeliw majawüw wüx nipilan monrang ngo majneaj, müjchiw mangüyiw aaga ngo majneaj arangüw; pero apmandeacüw najneaj wüx ombasüw monrang najneaj.

<sup>15</sup> Aag agüy andiüm Teat Dios: merangan najneaj, cos atquiaj alndom mepalan ombeayiw ajcüwa nipilan leaw ngo majawüw nicuajind, leaw andeacndeacüw ngo majneaj wüx imbasan.

<sup>16</sup> Icona nganüy leriowan wüx isoetiün para merangan leaw apiüng Teat Dios. Naleaing ngondom mepiungan por aaga leriowan wüx quiaj alndom merangan leaw indiüman. Ngwüy, cos icona ijlüyüün mimonrang minajiüt Teat Dios.

<sup>17</sup> Itüniün monapacüy teombasüw meáwan nipilan. Meáwan minipilan Teat Cristo netam mendiüman. Aag miün Teat Dios netam merbolan mendüyiün. At itüniün monapacüy teombas aaga minatang monajiüt.

#### *Leaw tamongoch Teat Cristo*

<sup>18</sup> Nganüy sanasaj icon monrang minajiüt alinop nipilan: iyariün irangan leaw andiüm neneay najiüt, ngome ágan ajcüwa xeyay ajneaj omeajtsüw majawüw icon, at ajcüw leawa xowüy apatüw.

<sup>19</sup> Sitiül icona apmeiücan wüx naél wüx irangan minajiüt alinop, masey imongochiün ngo majneaj leaw ngo metam memongochiün, nde mamix imeajtsan, cos Teat Dios najneaj majaw merangan atquiaj, meücan wüx cuajantanej.

<sup>20</sup> Sitiül icona terangan alngün ngo majneaj, condom apmeajndiün memongochiün naél, ndoj iücan wüx leaw imongochiün, ¿nguineay ajüic irangan najneaja? Pero jondot imongochiün leaw ngo metam memongochiün wüx irangan najneaj, at iücan wüx, aag ayaj najneaj majaw Teat Dios.

<sup>21</sup> Wüx aag ayaj teyambücharanan cos Teat Cristo aton tamongoch meáwan ngo majneaj ingow amongochiüts icootsa. Nej taifünd wüx meáwan aag ayaj para majiüquich nguineay netam mendüjpiün wüx merangan atnej tarang.

<sup>22</sup> Cos Teat Cristo nómban ngome tarang nisoet, nómban ngo mawaiich aljane;

<sup>23</sup> y wüx tasajsajüw nej, ngo mangoch nej ombeayiw; at wüx tujúchiw mamongoch xeyay ngo majneaj, xeyay necoy, nej nómban ngo mapiüng apmapalüch ombas. Leawa tarang, meáwan tayac teowix Teat Dios, cos nej ajaw wüx jane arang najneaj jane ngwüy.

<sup>24</sup> Teat Cristo nejáyan quiaj tayar asoetiüts wüx tamb wüx cruz, cos icootsa tandeawaats nóiquian maquiüjpaats; nganüy

lango metam marangaats nisoet, alndom marangaats najneaj. Cos nej tamongoch xeyay necoy para mawün icoots wüx asoetiüts.

<sup>25</sup> Icona nomb tejlüyüün atnej tigüy ndron sap; nganüy lerndililean niüng ajlüy Teat Cristo aaga najneaj nejüür sap; nej tanaámb teamajiür icon cos ijlüyüün teowix nej.

### 3

#### *Nguineay netam majlüyiw leaw landoj angoch owixaw*

<sup>1</sup> Átan icona müm montaj, netam mejlüyüün nóiquian mequiüjpan minojon, mendiüman merangan leaw nejw andiümw. Cos atquiaj leaw nganaw mandiümw Mipoch Teat Dios alndom mandiümw mandüjpiw masey ngo mesajan wüx, cos nejw apmajawüw nguineay irangan najneaj.

<sup>2</sup> Cos apmajawüw nguineay ijlüyüün ocueajüwan nejw, at majawüw nguineay irangan leaw Teat Dios andiüm.

<sup>3</sup> Ngo metam mejüiquichan ámban wüx imbasan wüx isojquiün noic najneajay napixeran, wüx itajcan majneaj ipeatiün imalan, at wüx meycan najneajay iquial owixan, tengwüy arend olajcan.

<sup>4</sup> Ngwüy netam mejüiquichan nguineay larangüy tiül imeajtsan leawa ngondom ndrom ombas; aag ayaj apmajüquich icon nguineay ajneaj imeajtsan, cos aag ayaj nembeat xeyay teombas Teat Dios.

<sup>5</sup> Atquiaj nde tanomb tejüiquichayej ajcüwa müm montaj leaw tujúchiw omeajtsüw Teat Dios; at tajlüyiw nóiquian marangüw leaw andiümw minojow nejw.

<sup>6</sup> Atquiaj tarang nop müm najtaj nenüt Sara, nej tarang leaw tandiüm minoj nej teat Abraham, at tandeac wüx nej, “xeteat naxey”, aj. Cos naw wüx nej tejlüyüün icona atnej micual nej. Nganüy sitiül atquiaj apmerangan ágan najneaj, quiaj lango metam merbolan wüx nicuajind.

<sup>7</sup> Icona teat nanojaranüw, netam mecüliün nóiquian mequiüjpan mintajan najneajan. Ijchan mayajcüw naleaing indiüman nejw, cos masey nop najtaj ngo matüch apac nop naxey, nejw ajlüyiw tiül nóiquian mequiüjpan leaw Teat Dios tüüch úüchan mapacaran wüx. Nganüy sitiül apmerangan atquiaj, Teat Dios apmangüay wüx apmetüniün ocueaj alcuane.

#### *Najneajay omal omeaats*

<sup>8</sup> Ndójwüx, sapiüng netam mejlüyüün noic nej imeajtsan, mendiüman nop alinop atnej nacojaran nachügueran, mejüiquichan ajneaj imeajtsan. Nde meyajcan nop xeyay netam, alinop ngwüy.

<sup>9</sup> Nde mendiüman mepalüchiün ombas jane arang ngo majneaj wüx imbasan; nde



mengochiün ombeay leaw itsojówan icon. Leaw netam merangan, mendeacan najneaj, metüniün monapacüy teombasüw nej; cos Teat Dios tarriüüd icon merangan atquiaj, at icona aton teyariün mimonapacüy Teat Dios.

<sup>10</sup> Cos atcüy apiürang:  
Jane andiüm majlüy najneájan wüx acül ningüy wüx aaga iüt cam, mapac omeaats meáwan nüt, netam majaw wüx andeac, at ngondom mawaiich.

<sup>11</sup> Iwün ileaj tiül ngo majneaj, irang aaga najneaj leaw netam, iyamb monapacüy, áag indüüb.

<sup>12</sup> Cos Teat Dios tengual ajaw ajcüwa monrang najneaj,  
aton anguiay cuane atüniw;  
pero nej ajüiquich ajcüy majaw monrang ngo majneaj.

<sup>13</sup> Jane alndom marang ngo majneaj wüx imbasan sitiül icona áagan najneaj indüjpiün?

<sup>14</sup> Sitiül aleaic imengochiün wüx irangan najneaj, masey, cos Teat Dios apmambeol icon memengochiün najneájan. Nde mermbolan mendüyiün nejiw leaw arangüw ngo majneaj wüx imbasan; nde paxiüm icueajiün, iücan wüx, nde mejcüyiün.

<sup>15</sup> Iyacan imeajtsan nómban wüx Teat Cristo. Meáwan nüt netam mejiüran tiül imeajtsan cuane alndom mepiügan, nguineay alndom mesajan jangantanej leaw apmatün manguiay icon. Pero naleaing netam mesajan teamtéaman, ijüiquichan xeyay ajneaj imeajtsan wüxan ilean ningüy wüx iüt.

<sup>16</sup> At ijüiquichan nguineay ajneaj imeajtsan para alndom majawüw meáwan leaw mondeacndeac wüx imbasan ngo majneaj. Ndoj apmaxinguiaw wüx meáwan leaw andeacüw quiaj, wüx apmajawüw icona najneaj irangan cos indüjpiün Teat Cristo.

<sup>17</sup> Najneaj sitiül apmemengochiün naél wüx irangan najneaj sitiül Teat Dios atquiaj andiüm memengochiün, ngome wüx irangan ngo majneaj.

<sup>18</sup> Cos Teat Cristo nomb tandeow mawün asoeteran; masey nej ngo majiür nicuajind nisoet, naleaing tandeow ingow andeowüw monrang ngo majneaj, para mambaats niüng ajlüy Teat Dios. Alndom mandeow cos nipilan nej, condom tapac alinomb, apacüüch nej Nangaj Espiritu ocueaj Teat Dios.

<sup>19</sup> Wüx nej tandeow, miespíritu nej tamb tiül mondeow mandeac masaj ajcüw espíritu monlüy atnej ajlüyiw tiül manchiüc,

<sup>20</sup> ajcüwa leawa tanomb ngo mayariw leaw tasoiquiw. Aag ayaj wüx minüt teat Noé, cos Teat Dios tacül nejiw mayambüw

nej wüxan tengualeámban arangüch aaga nadam müx, nasoic arca. Wüx aaga nüt quiaj acásan nipilan tayariw nej andeac; áagan ojpeacüw nipilan tawüw wüx, ngo mandeowüw tiül najal yow wüx ndiliteay meáwan a iüt.

<sup>21</sup> Atnej tawüw wüx, ngo mandeowüw tiül yow, ata nganüy apiüng wüx nguineay alndom mawaats wüx asoetiüts wüx apmayariüts yow. Aaga ayarich yow quiaj ngondom majants meáwan ngo majneaj arangüch. Leawa ajüiquich aag ayaj majiüraran tiül omalaran at tiül omeaatsaran naleaing andiüram arangüch leaw Teat Dios andiüm, cos Teat Jesucristo landoj lapac tiül mondeow.

<sup>22</sup> Teat Cristo wüx tapac alinomb, tandilil andüy tiül cielow. Nganüy ajlüy amb wüx miác Teat Dios. Nej ajlüy wüx meáwan ángeles, at ajlüy wüx meáwan monajiüt.

## 4

*Marangaats minajiüt Teat Dios leawa nej üüch icoots*

<sup>1</sup> Cos Teat Cristo tamongoch xeyay ngo majneaj, xeyay necoy ingow amongochiüts; ata icona aton netam mejlüyüñan masey memengochiün necoy. Nganüy jane lamamongoch necoy cos andüüb Teat Cristo, ajüiquich lamacueat nisoet.

<sup>2</sup> Quiaj nej langondom mandiüm marang andiüman nej, aton ngome apmarang leaw arangüw meáwan nipilan wüx aaga iüt cam. Nej apmarang áagan leaw andiüm Teat Dios.

<sup>3</sup> Cos xeyay nüt terangan atnej arangüw ajcüwa nipilan ngo mandüjpiw Teat Dios. Terangan leaw tendiüman; terangan meáwan ngo majneaj leawa texoman merangan wüx aaga iüt cam: tengüniün, terangan xeyay ngos nüt niüng tembichan meáwan leawa tejiüran, at terangan xeyay ngo majneaj wüx tendüjpiün ajcüwa narangüch dios.

<sup>4</sup> Nganüy leawa nipilan tealeámban marangüw aag ayaj, xeyay amb wüx omeajtsüw neol lango mequüjpan merangan meáwan ngo majneaj atnej terangan nomb. Wüx aag ayaj tengual mandeacndeacüw ngo majneaj wüx imbasan.

<sup>5</sup> Alinoic nüt wüx apmajlüyiw teombas Teat Dios apmapiüngüw meáwan leawa tarangüw; cos nej apmajaw wüx cuane arangüw leaw almapac y leawa landeow.

<sup>6</sup> Cos nejw wüx aliün mapacüw tasoiquiw wüx Mipoch Teat Dios, nguineay alndom mawüw wüx asoetiw mapacüw wüx miespíritu Teat Dios. Masey wüx aaga iüt cam ajaraw cuane tarangüw, atnej meáwan nipilan.

<sup>7</sup> Nganüy cos laliüc mümb minüt meáwan leaw almajlüy ningüy wüx aaga iüt cam;

icona netam merangan meáwan najneaj, tanaám itüniün ocueaj Teat Dios, nde paxiüm icueajiün.

<sup>8</sup> Leawa más netam mejiüran tiül icona, aag ayaj merjiürayon lasta xeyay, cos sitiül xeyay indüman nop alinop alndom mewüniün wüx imeajtsan meáwan nisoet.

<sup>9</sup> Ijchan maxojtúw iniüangan nop alinop, ngo metam mendeacndeacan wüx.

<sup>10</sup> Leawa lameajndiün inopnophon merangan, lamüüch icon Teat Dios, nganüy netam merangan aag ayaj para membeolan nop alinop, cos ijlyüiün noic ajlyü monjiür aaga monajneaj leawa Teat Dios lamüüch.

<sup>11</sup> Sitiül aljane andeac, netam mandeac atnej asaj nej Teat Dios. Sitiül aljane ajiür najiüt mambeol wüx cuajantanej, ich marang atnej Teat Dios üüch nej marang. Cos meáwan narangüch quiaj, tengual ajüiquicharan nguineay ajneaj Teat Dios wüx minüt Teat Jesucristo, cos nej ajlyü wüx meáwan leaw almajlyü; alndom marang cuajantanej nganüy, oxep, nawiür, at meáwan nüt. Amén.

*Leawa meáwan mondüüb Teat Cristo netam mamongochiüts*

<sup>12</sup> Xecojow xehijquiaw, nde mbayameron wüx apmemongochiün cuajantanej leaw aliüc miün, cos apmeyajcan atnej memongon tiül biümb. Nde mepiüangan aag naél quiaj ngondom majlyü wüx icona.

<sup>13</sup> Leaw netam merangan, ich mapac imeajtsan xeyay, cos atquiaj apmejüiquichan atnej almequiüjpan Teat Cristo tiül leaw tamogoch. Atquiaj alndom mapac imeajtsan xeyay wüx nej aliüc alinomb mejüiquichay najneajay ajlyü.

<sup>14</sup> Sitiül andeacüw ngo majneaj wüx imbasan áag indüpiün Teat Cristo, najneajay ijlyüiün, cos ajlyü tiül icona Nangaj Espiritu ocueaj Teat Dios. Naleaing, masey nejw itsojówan minüt Teat Cristo, nganüy icona indeacan najneaj wüx nej.

<sup>15</sup> Malüy nejinguind tiül icona ngo memongochiün matnej amogoch nop nembiy nipolan, matnej nop neneed, matnej nop nerang alinoic ngo majneaj, tengwüy wüx nop apmajmel tiül ocueaj alinop niüng ngo metam majmel.

<sup>16</sup> Pero sitiül aljane aleaic mamogoch cos andüüb Teat Cristo, aag ayaj ngo metam maxing wüx; leaw netam marang, ich mapiüng najneajay arang Teat Dios cos almakiüüb nej.

<sup>17</sup> Nganüy amatüch a nüt mamelich Teat Dios majaw wüx asoeteran naw wüx minipilan nej. Naleaing sitiül apmamelich naw wüx icootsa, ¿nguineaye apmajlyüyiwe ajcüwa leaw nganaw mayariw Mipoch Teat Dios?

<sup>18</sup> Cos sitiül nop nerang najneaj, pero xeyay aél maw wüx asoet nej, ¿nguineay apmajlyüye leaw ngo mayamb Teat Dios, leaw tanaám arang nisoete?

<sup>19</sup> Nganüy sitiül imogochiün xeyay naél wüx irangan leaw andiüm Teat Dios, nde paxiüm icueajiün; iyacan imeajtsan teowix Teat Dios, tanaám irangan áagan najneaj cos nej nerang meáwan leaw almajlyü.

## 5

*Netam mejlyüiün nóiquian*

<sup>1</sup> Sapaj ocueajiw meáwan montangtang monajiüt leaw ajlyü tiül icona. Xique nop xic natang ombas sat nejw. Xique tajawas meáwan nguineay tamogoch ngo majneaj Teat Cristo. Sanajlyü quiaj aton wüx nej apmejüiquichay nguineay ajneajay ajlyü alinoic nüt.

<sup>2</sup> Ijlyüiün wüx, ijawan minipilan Teat Dios leaw almequiüjpan. Aag ayaj ngo metam merangan cos aljane teamasaj icon merangan; ngwüy, irangan cos indüman. At nde mepiüangan aleaic apmexoman wüx; ngwüy, irangan najen nde apac imeajtsan.

<sup>3</sup> Ngondom mepiüangan ineayiün meáwan leaw ijlyüiün wüx. Leaw netam merangan, mejüiquichan nguineay irangan áagan leaw netam, majawwüw meáwan minipilan Teat Cristo.

<sup>4</sup> Cos wüx aliüc alinomb aaga natang najlyü wüx icona, aag ayaj Teat Cristo, quiaj apmejndiün najneajay corona leawa ngondom ndrom ombas.

<sup>5</sup> Sasaj icon monguich, irangan leawa apiüngwüw montangtang monajiüt tiül icona. At tiulan icona iyariün leaw apiüng nop alinop; ijüiquichan ajneaj imeajtsan, cos apiürang:

Teat Dios ajcüy majaw monrang adam omeaats.

Nej üüch mimonajneaj nej leaw najneaj omeaats.

<sup>6</sup> Netam meyajcan nicuajind icon, cos ijlyüiün tiül nangaj owix Teat Dios; naleaing alinoic nüt nej apmantsopiich icon mapiüng najneaj terangan.

<sup>7</sup> Iyacan tiül owix nej meáwan leaw alwüx imeajtsan cos tengual majiür icon.

<sup>8</sup> Netam mejawan cuane temerangan, at tanaám mepacan wüx Mipoch Teat Dios, cos aaga nimeech ajcüy majaw icon, atnej nop natap leon tengual mayeyey icon tiüt mayamb jane masap matsamb.

<sup>9</sup> Netam mendandand wüx aaga leaw iyacan imeajtsan wüx mendüjpiün. At netam mejawan atanquiaj tengual mamongochiw micojon michijquian minipilan Teat Cristo tiül meáwan aaga iüt cam.

<sup>10</sup> Masey lamemongochiün xeyay naél, aag ayaj acásan nüt. Nganüy nej Teat Dios

apmüüch icon mejlüyiün palan, at mandand wüx imeajtsan Mipoch nej, mejüiquichay tiül icona. Cos Teat Dios üüch meáwan leaw netam para mejlüyiün atnej andiüm, cos tayamb icoots wüx minüt Teat Jesucristo majlüyüüts niüng ajlüy nej meáwan nüt.

<sup>11</sup> Néjan quiaj najnejaj ajlüy. Aton nej ajlüy wüx meáwan leaw almajlüy nganüy, oxep, nawüür, at meáwan nüt. Amén.

*Andonoch atepeay*

<sup>12</sup> Süüch teat Silvano majoy mamb aaga acás poch cam müüch icon, cos sawaw nej nop najnej minipilan Teat Cristo. Tarangas nüüch leaam imeajtsan nasaj icon aaga naleaing ocueaj Teat Dios, üüch úüchan leaw nganüy tengual mendüjpiün.

<sup>13</sup> Ajcüwa minipilan Teat Cristo najlüyiw tiül Babilonia, ajcüwa larriüjtücharanüw majlüyiw nóiquian atnej icona, atepeayiw icon. At xecual teat Marcos atepeay icon.

<sup>14</sup> Itepeayüün ninguij nop alinop nde apac imeajtsan, at itüniün monapacüy.

Tamtámban ijlüyiün, at mejnejüünan meáwan icona minipilan Teat Cristo. Amén.

## **Amb iwic nanderac yarang wüx nawiiġ San Pedro 2ª Carta de SAN PEDRO**

### *Atepeay*

<sup>1</sup> Xique Simón Pedro nop apóstol ocueaj Teat Jesucristo, nop nerang minajiüt nej. Nğanüy sarang aaga acas poch cam nüüch icon leawa lamendüjpiün Miteatiüts Dios atnej sarangan. Miteatiüts Dios tarang xeyay najneaj wüx icoots, cos Teat Cristo tawün asoetiüts.

<sup>2</sup> Tambtámban ijlüyiün. Tanaámb mambeol icon Teat Dios, müüch icon mejiüran monajneaj, cos lamejawan nguineay andiüm Teat Dios y Miteatiüts Jesús.

### *Nguineay netam marangüw minipilan Teat Cristo*

<sup>3</sup> Pues Teat Dios lamüüch icoots meáwan leaw netam para alndom mapacaats marangaats leaw andiüm nej, cos tüüch icoots mayariüts andeac Teat Cristo, majlüyüts najneaj nóiquian maquiüjpaats.

<sup>4</sup> At tüüch icoots majawaats nguineay alndom marang meáwan najneajay leaw lamapiüng apmarang. Por aag ayaj nğanüy alndom merangan najneaj, atnej arang Teat Dios, mecueatiün irangan ngo majneaj leaw arangüw meáwan nipilan leaw ngo mayariw andeac Teat Cristo, cos nejiw arangüw leaw nejíwan quiaj andiümüw marangüw.

<sup>5</sup> Nğanüy cos lameyariün andeac Teat Cristo, pares netam mepacan wüx merangan najneaj. Pero ngome áagan ayaj, cos netam mexoman imeajtsan mejawan leawa Teat Dios andiüm merangan.

<sup>6</sup> Wüx ijawan cuane andiüm Teat Dios, quiaj alndom mersapayon wüx, ngo metam merangan leaw indiüman. Netam meücan wüx cuajantanej almajlüy, at aton merangan casa Teat Dios tanaámb.

<sup>7</sup> Netam merjiürayon lasta atnej ijiüran lasta micojon michijquia, mendiüman nop alinop.

<sup>8</sup> Pues wüx irangan meáwan aag ayaj con imeajtsan, quiaj ajüic naleaing irangan najneaj, ngome irangánan iyariün andeac Teat Cristo.

<sup>9</sup> Sitiül aljane lamanguiy meáwan aag ayaj, ndoj ngo marang, aag ayaj landroj omeaats nguineay Teat Dios tawün nej tiül meáwan nisoet leawa tarang nomb; ajlüy atnej nop nesomom oniüg.

<sup>10</sup> Nğanüy xecojow xehijquia, netam mepacan wüx merangan leawa Teat Dios tarriüid icon merangan, cos nej tarriüid

icon merangan áagan najneaj. Sitiül apmeyacan imeajtsan wüx merangan atquiaj, langome apmejmiücan tiül nisoet.

<sup>11</sup> Atquiaj apmejndiün mejmeliün najneajay tiül aaga nangaj cambaj niüng ajlüy Miteatiüts Jesucristo, aaga newün icoots wüx asoetiüts. Quiaj apmecüliün meáwan nüt, ngo majiür ümb.

<sup>12</sup> Wüx aag ayaj, xique ngo nacueat nüüch leam imeajtsan, masey lamejawan, lerndandand wüx aaga naleaing indüjpiün quiaj.

<sup>13</sup> Nğanüy sapiüng najneaj napaj icueajiün wüxan saliiün napac, nüüch leam imeajtsan nguineay netam merangan;

<sup>14</sup> cos Miteatiüts Jesucristo tüüch xic najaw laliüc matüch a nüt nacueat a iüt cam, nandeow.

<sup>15</sup> Pares sandiüm nacueat nüüch icon leaw alndom, cos atquiaj masey lango najlüy ningüy, icona apleeam imeajtsan tanaámb leawa teanasaj icon quiaj.

### *Tajüic nguineay ajneaj ajlüy Teat Cristo*

<sup>16</sup> Meáwan leawa lanasajan icon wüx Miteatiüts Jesucristo, nguineay nej aliüc alinomb xeyay najneajay, pues aag ayaj ngome sapiüngánan, ngome nandeacánan; aag ayaj palüy naleaing.

<sup>17</sup> Cos xicona tajawasan tanguiayasan wüx Teat Dios tendec imiün tiül raan oic, xeyay tarangüch casa Teat Jesús wüx tüüch militlit ombas nej. Condom tasaj: "Ique xecual, naleaing xecual ic, xeyay sajiür ic lasta, apac ximeaats najaw ic", aj nej.

<sup>18</sup> Xicona tanguiayasan aaga nanderac tiün imiün tiül cielo wüx salnaquiüjpan Teat Jesús, saliiün quiaj nóiquian wüx tiüc. Quiaj tanguiayasan andeac Teat Dios masaj Teat Jesús.

<sup>19</sup> Nğanüy ajawaats naleaing aaga poch tandeacüw nomb ajcüwa mondeac andeac Teat Dios. Pares netam mayariüts, cos aaga poch quiaj ajlüy atnej nots najquiol teatitit tiül pojniün pal ongwiiüts, pero wüx lachiüjmbaw lajntsoy aaga nadamüy ocas marraj tiül omeaatsaran.

<sup>20</sup> Netam mexoman imeajtsan wüx aag agüy: nejingüind ngo ndom maquiaach wüx Mipoch Teat Dios, awúnan tiül omal nej; naleaing netam mayaag ambeol nej Nangaj Espiritu ocueaj Teat Dios.

<sup>21</sup> Ajcüwa mondeac andeac Teat Dios, ngo marangüw wüx nawiiġ leawa nejíwan quiaj taxomüw omeajtsüw wüx. Ngwüy, nejíw tarangüw wüx nawiiġ leawa Nangaj Espiritu tüüch nejíw marangüw.

## **2**

*Altüil aquiajchüw leaw ngo maleaing  
(Judas 3-13)*

<sup>1</sup> Nomb tajlÿy tiül nipilan israel acas leawa ngo maleaing mondeac andeac Teat Dios nejiw. Atanej nganÿy apmajlÿy tiül icona leawa ngome naleaing monquiaach Mipoch Teat Dios. Apmamelichaw ámban tiüt, apmandiümÿw maquiajchiw icon leawa ngomeaag, cos andiümÿw mecueatiün mendÿjpiün aaga naleaing. Ngo majiüc naleaing andÿjpiw Teat Jesús leawa tandeow mangÿy asoetiw nejiw. Pues ajcÿwa monquiaach quiaj, najen apndrom ombasÿw.

<sup>2</sup> Pero xeyay nipilan apmandÿjpiw nejiw, apmarangÿw xeyay ngo majneaj atnej arangÿw nejiw. Wÿx aaga arangÿw quiaj, apmanderac wÿx Mipoch Teat Dios ngo maleaing.

<sup>3</sup> Cos andiümdümmÿw tomiün apmexomx-omayej wÿx imbasan, apmaquiajchiw icon leaw ngo maleaing; nganÿy ajcÿwa nipilan quiaj ngome nequiy apndrom ombasÿw, landoj lajwanÿw mambÿw tiül aaga xeyay ngo majneaj.

<sup>4</sup> Teat Dios ngome tawün wÿx omeaats aaga nisoet tarangÿw tegÿy ángeles; áag tajlosÿw tiül niüng amongocharan xeyay ngo majneaj tiül noic pojniün, maoeleranÿw majlÿyiw quiaj leaw apmatüch a nüt Teat Dios apmajaw wÿx asoeteran.

<sup>5</sup> Naleaing Teat Dios ngo mawün wÿx omeaats leaw ngo majneaj tarangÿw nipilan tanomb. Áagan teat Noé tawün wÿx cos tarang at taquiaach wÿx leaw andiüm Teat Dios. Aton Teat Dios tawün wÿx alayaw nipilan acualaats Noé. Condom tüüch majal a yow ndilimeay iüt, quiaj tandeowÿw meáwan nipilan.

<sup>6</sup> At Teat Dios aton nómban tandrooch ombas ajcÿwa nadamdam cambaj Sodoma maquiüüb Gomorra wÿx tandajpÿw, tacülüw ngweátan, cos xeyay ngo majneaj tarangÿw moncül quiaj. Pues atquiaj tarang Teat Dios para majiüquich majawÿw ajcÿwa nipilan monrang ngo majneaj leaw aliüc miün apmajlÿy.

<sup>7</sup> Pero teat Lot taw wÿx cos nej nop neyamb Teat Dios; lapaxiow majaw arangÿw xeyay nisoet ajcÿwa nipilan quiaj.

<sup>8</sup> Cos aaga naxey nerang najneaj quiaj, nütñütan xeyay tamix omeaats majaw, manguiay leawa ngo majneaj arangÿw aaga nipilan quiaj.

<sup>9</sup> Nganÿy aton Teat Dios alndom mambeol, mawün tiül ngo majneaj ajcÿwa monrang leawa nej andiüm. Nganÿy ajcÿwa monrang ngo majneaj landoj lajwanÿw mangÿyiw leaw arangÿw wÿx apmatüch a nüt majaraw wÿx asoeteran.

<sup>10</sup> Teat Dios apmüüch mamongochiw xeyay ngo majneaj ajcÿwa nipilan monrang aaga ngo majneaj leaw andiümÿw, leaw

ngo marangÿw nej casa. Cos nejiw arangÿw adam omeajtsÿw, ngo mimboloj mandeacÿw ngo majneaj wÿx ombas Teat Dios, tengwÿy wÿx ombas monajiüt monlÿy tiül nangaj cielo.

<sup>11</sup> Masey ajcÿw ángeles ocueaj Teat Dios leaw najntsop wÿx atam ajlÿyiw, y alndom marangÿw cuajantanej, nejiw ngo mayacÿw asoet ajcÿwa monwaiich quiaj.

<sup>12</sup> Pero ajcÿwa nipilan monwaiich quiaj, andeacÿw ngo majneaj wÿx cuajantanej leaw ngo majawÿw; ngo majiürÿw fis. At nejiw nimal, cos nimal ajaw áagan leaw teamamongoch ningÿy wÿx iüt; wijquiajow para ndeajmoy mandeowÿw. Atquiaj ajlÿyiw ajcÿwa monwaiich quiaj, cos áagan ayaj apiüngÿw wÿx, leaw axomÿw majawÿw ningÿy wÿx iüt. Itsojow leawa ngo maxomÿw majawÿw. Por aaga ngo majneaj arangÿw quiaj, wÿx apmandeowÿw apmambÿw tiül aaga xeyay ngo majneaj.

<sup>13</sup> Quiaj apmamongochiw xeyay ngo majneaj, apmangÿyiw aaga ngo majneaj arangÿw, cos nejiw arangÿw rawrráwan tiüt leaw alndom müüch mapac nej omeajtsÿw. Pares wÿx itean mequiüjpan, aag ayaj noic monxing icueajiün, cos nejiw ngoyay macueatiw arangÿw ngo majneaj. Xeyay apac omeajtsÿw wÿx aaga ngo majneaj arangÿw quiaj.

<sup>14</sup> Nejiw ngo maiündÿw majawÿw nop najtaj, andiümÿw manajtajÿw; tanaámb arangÿw nisoet. Ayambÿw nguineay maloxiw tiüt jane nganaw mandand wÿx Mipoch Teat Dios. Nejiw áag ajlÿyiw wÿx mawajichaw, ndoj apmambÿw tiül castigo.

<sup>15</sup> Nejiw ngo mandiümÿw marangÿw leaw apiüng Teat Dios, lambójan marangÿw ali-noic, cos arangÿw atnej tarang nop naxey tajlÿy tanomb, micual Beor nenüt Balaam. Aaga naxey quiaj tandiümdium marang ngo majneaj maxom tomiün wÿx.

<sup>16</sup> Pares Teat Dios tapaj nej ocueaj, tüüch mendeac mibÿr nej masaj nej ngo majneaj arang. Atquiaj tarang Teat Dios wÿx ombas a naxey quiaj, ngana marang aaga ngo majneaj teamandiüm marang quiaj.

<sup>17</sup> Ajcÿwa nipilan quiaj ajlÿyiw at nejiw noic lol ngo majlÿy tiül yow. At ajlÿyiw at nejiw oic ajÿyich nej nepepep. Nejiw landoj lajwanÿw mamongochiw xeyay ngo majneaj tiül xeyay pojniün niüng nómban ngome apmaxomÿw majawÿw ran.

<sup>18</sup> Nejiw aquiajchiw ombeay nipilan, pero aaga aquiajchiw quiaj ngo membeat nicuajind, cos asajÿw jayats monyar andeac Teat Dios mandilileaw marangÿw ngo majneaj atnej arangÿw nejiw.

<sup>19</sup> At asajÿw alndom marangÿw leaw andiümÿw, ngo majiür nicuajind. Nganÿy ajcÿwa monwaiich quiaj, masey apiüngÿw andÿjpiw Teat Dios, aag ayaj ngo maleaing

cos arangüw atnej andiümwü; arangüw leaw ataag nejiw mandar nisoet.

<sup>20</sup> Sitiül aljane lamayar andeac Teat Cristo, aaga newün icoots wüx, at lamacueat marang ngo majneaj ningüw wüx iüt cam, ndoj apmandilil marang alinomb aaga nisoet, ndójwüx apmajlüy más xeyay ngo majneaj.

<sup>21</sup> Pues sitiül nop tajaw, tayaag Mipoch Teat Dios aag ayaj naleaing, y tandüüb acas nüt marang atnej apiüng, condom tandilil marang ngo majneaj, quiaj apmajiür xeyay nisoet, cos tajaw aag ayaj naleaing, pero ngo mandium marang atnej apiüng.

<sup>22</sup> Nejiw ajlüyiw atnej apiüng noic nanderac: "Pet andilil müet ajtiür nej, at sow andilil maxeeb ndeor alinomb masey taxejmbeacharan".

### 3

#### *Wüx apmandilil Teat Cristo*

<sup>1</sup> Xecojow xechijquiaw, aag agüy amb ijquiaw nanderac narang wüx nawiig nasaj icon. Tiül aaga ijquiaw nawiig sasaj icon leaam imeajtsan wüx leaw naleaing.

<sup>2</sup> At sandiüm nüüch leaam imeajtsan leawa tandeacüw tanomb ajcüw mondeac andeac Teat Dios, at nüüch leaam imeajtsan nguineay tapiüngüw apóstoles wüx Miteatiüts Teat Cristo, aaga newün icoots wüx asoetiüts.

<sup>3</sup> Netam mejawan, wüx laliüc matüch a nüt mandilil Teat Cristo, xeyay nipilan apmitsojow leaw apiüng Teat Dios, apmarangüw ngo majneaj leaw andiümwü marangüw.

<sup>4</sup> Cos nejiw apmapiüngüw: "¿Wül, ngow apmandilil a Cristo, aaga apiüngüw aliüc alinomba? Cos lamajiür xeyay nüt wüx aliün mapac xeteatiün tapiüngüw aliüc. Nganüy tanaám nüügan ajlüy meáwan cuajantanej, atnej wüx tarangüch a iüt cam", apmawüw.

<sup>5</sup> Pero aaga apmapiüngüw quiaj ngo maleaing, awajchaw, cos nejiw ngo mandiumüw majawüw nguineay Teat Dios tarang a iüt cam tanomb. Cos Teat Dios wüx tapiüng marang nüt, caaw, ocas, iüt; pues quiaj tajlüy iüt imiün tiüt tiül yow, cos atquiaj tapiüng Teat Dios majlüy.

<sup>6</sup> Condom ajcananüyan a yow, Teat Dios tüch ndilimeay iüt, ndrom ombas nipilan.

<sup>7</sup> Nganüy aaga nüt, caaw, ocas, iüt, leaw almajlüy apmandaab, cos atquiaj apiüng Teat Dios apmajlüy. Atquiaj apmajlüy wüx Teat Dios apmajaw wüx asoet nipilan ngo mayar nej andeac. Condom apndrom ombasüw.

<sup>8</sup> Xecojow xechijquiaw, nde ndrom imeajtsan, Teat Cristo ngome nequiy aliüc. Cos gajpowüw acoic miow (1,000) neat Teat Dios

ajaw atnej noic nüt, aton noic nüt ajlüy atnej gajpowüw acoic miow neat.

<sup>9</sup> Xeyay nipilan apiüngüw Teat Cristo nequiy apmapeay, lango miün najen atnej tapiüng. Naleaing Teat Cristo afüc wüx majaw icoots, cos ngo mandium ndrom ombas nejingüind. Nej andiüm meáwan nipilan leaam omeajtsüw wüx asoetiw nejiw, macueatiw.

<sup>10</sup> Wüx aaga nüt aliüc Teat Cristo nejingüind ngo mateots wüx, atnej arang nop need wüx ngo mateotsaran, quiaj apmajmel meneed. Cos aaga nüt quiaj apmetteriür cawüx, apmajlüy noic nadam monbayan. Quiaj apmandrooch ombas meáwan leaw almajlüy cawüx, aton meáwan leaw almajlüy wüx iüt apmandaab.

<sup>11</sup> Sitiül atquiaj apndrom ombas meáwan, ¿jow nganüy icona, nguineay apmerangan? Netam meajchiün imeajtsan Teat Dios merangan palanüy najneaj, merangan leawa nej andiüm.

<sup>12</sup> Tatow tam temecüliün matüch aaga nüt quiaj, irangan minajiüt Teat Dios leaw alndom; cos aaga nüt quiaj apmandaab, apjayam meáwan ocas, at a nüt, at a caaw aton.

<sup>13</sup> Nganüy icootsa, ngome aaga apndrom ombas quiaj teamacüliüts, teamacüliüts majlüy jayats ocas, jayats caaw, jayats nüt, jayats iüt. Cos aag ayaj lamapiüng Teat Dios apmarang. Condom tiül aaga jayats quiaj, apmajlüy najneajay.

<sup>14</sup> Xecojow xechijquiaw, tatow tam teamecüliün meáwan aag ayaj, irangan leaw alndom, irangan najneaj majaw Teat Dios. Nde mejcüyiün mejawan nop alinop, ijlüyiün najneajün, ngo mejiüran nisoet.

<sup>15</sup> At netam mejawan neol ngo miün Teat Cristo najen. Aag ayaj, cos nej ajtiür lasta meáwan nipilan, andiüm mawün nejiw wüx asoetiw. Atquiaj tarang wüx nawiig micoojots teat Pablo, leawa xowüw andiümaats, cos Teat Dios tüüch nej majaw nguineay masaj icon.

<sup>16</sup> Cos meáwan leawa nej tarang tiül noicnoic minawiig nej tandeac andüy wüx aaga nganüy teanasaj icon cam, masey altiül noicnoic naél maxoram cuane amb apiüng. Altiül nipilan leaw naleaing ngo mandiumüw majawüw mayariw leaw apiüng, angowüjchiw andeac teat Pablo. Atanquiaj arangüw wüx meáwan Mipoch Teat Dios. Aag ayaj ayambüw ndrom ombasüw.

<sup>17</sup> Aag agüy lanasaj icon wüx, xecojow xechijquiaw, netam mejawan wüx aag ayaj, nde mawaiich icon ajcüwa monrang ngo majneaj quiaj, nde merangan atnej arangüw nejiw, cos nots quiaj manot icon, mecueatiün irangan najneaj.

<sup>18</sup> Sandiüm tanaám metangan wüx aaga poch tayac Miteatiüts Jesucristo,

aaga newün icoots wüx asoetiüts, para  
marangaats leaw nej andiüm. Marangaats  
casa Teat Cristo nganüy at meáwan nüt.  
Amén.

## Anoic nanderac arang wüx nawiig San Juan 1<sup>a</sup> carta de SAN JUAN

*Aaga poch cam alndom müüch mapacaran*

<sup>1</sup> Sarang aaga acas poch cam nasaj icon wüx aaga leawa lajlüy nde tanomb wüx nganaw majlüy aaga iüt cam. Aag ayaj tanguiayasan andeac, tajawasan nejay, tajawasan guineay arang, aton tarreegasan naag xiwixan. Aaga Nanderac quiaj leaw alndom müüch mapacaran, aag ayaj Teat Cristo.

<sup>2</sup> Nej wijquiat wüx aaga iüt cam. Wüx latang, quiaj xicona tajawasan nejay. Aag nganüy sasajan icon wüx Teat Cristo, aaga alndom müüch icoots mapacaats meáwan nüt. Cos nej tajlüy maquiüüb Teat Dios, condom tiün mejüiquichay najawan.

<sup>3</sup> Nganüy sanasaj icon menguiayiyün wüx aaga leawa tajawasan, tanguiayasan andeac; para alndom majlüyiyüts nóiquian atnej xicona sajlüyiyün nóiquian naquiüjpan Teat Dios y Micual nej Teat Jesucristo.

<sup>4</sup> Aag agüy sarang wüx nawiig menguiayiyün, para müüch mapac imeajtsan xeyay.

*Teat Dios ran nej*

<sup>5</sup> Nganüy sanasaj icon leaw tanguiayasan asaj xicon Teat Cristo. Nej tapiüng: “Xetead Dios ajlüy ran nej, ngo majlüy pojniün wüx nej”, aw.

<sup>6</sup> Sitiül icootsa apiüngaats ajlüyiyüts najneaj nóiquian maquiüjpaats Teat Dios, nganüy naleaing sitiül tenguialeámban ajüyiyüts tiül aaga pojniün quiaj, quiaj ajüiquichaats tenguial awaijchaats, ngo marangaats aaga naleaing leawa Teat Dios lamapiüng.

<sup>7</sup> Nganüy sitiül ajüyiyüts tiül aaga ran quiaj atnej Teat Dios ajlüy ran nej, quiaj alndom majlüyiyüts najneaj nóiquian maquiüjpaats nop alinop. Cos Teat Jesucristo Micual Teat Dios nejants icoots naag miquiej nej mawün meáwan asoetiüts.

<sup>8</sup> Sitiül icootsa apiüngaats ngo majiüraats nisoet, quiaj ajüiquichaats icoyóotsan quiaj awaiichayoots, ngo mandeacaats naleaing.

<sup>9</sup> Pero sitiül apmachejtüts asoetiüts, masajaats Teat Dios cuane ngo majneaj arangaats, quiaj alndom majawaats naleaing nej apmawün icoots wüx asoetiüts; apmüüch icoots majlüyiyüts nerixix teombas nej.

<sup>10</sup> Pero sitiül apiüngaats nómban ngo majiüraats nisoet, wüx aaga poch quiaj ayacaats nej Teat Dios newaiich, y aaga

naleaing poch leawa nej lamapiüng, ngo majlüy wüx omeajtsaats.

## 2

*Teat Cristo nop nemebol icoots*

<sup>1</sup> Xecualüw, nganüy sarang aag agüy nasaj icon nde merangan nisoet; pero sitiül aljane apmarang nisoet, quiaj Teat Jesucristo apmasaj Teat Dios mawün wüx omeaats asoet nej. Cos Teat Cristo arang palan áagan najneaj, tüch atowtow.

<sup>2</sup> Teat Cristo tandeow ingow andeowaats wüx asoetiüts. Naleaing ngome nej tandeow mawün áagan asoetiüts, nej tandeow mawün wüx asoetiüw meáwan nipilan wüx aaga iüt cam.

<sup>3</sup> Sitiül marangaats atnej apiüng Teat Dios, quiaj alndom mayajcaats tiül omeajtsaats áagan nej andüjpiüts.

<sup>4</sup> Pero jane apiüng: “Xique sawaj jane Teat Dios”, maw; naleaing sitiül nej ngo marang atnej apiüng tiül Mipoch Teat Dios, aaga nepiüng atquiaj nop newaiich nej; pues aaga naleaing nanderac ngo majlüy tiül omeaats nej.

<sup>5</sup> Nganüy jane ayac wüx omeaats Mipoch Teat Dios, quiaj ajüic naleaing arang atnej andiüm Teat Dios, at Teat Dios ajlüy tiül omeaats nej. Aag ayaj neech icoots majawaats naleaing ajlüyiyüts nóiquian maquiüjpaats Teat Dios.

<sup>6</sup> Nganüy jane apiüng ajlüy nóiquian maquiüüb Teat Dios, aaga nepiüng quiaj netam marang meáwan najneaj atnej tarang Teat Cristo.

*Jayats poch nepaj ocueajaran*

<sup>7</sup> Xecojow xechijquaw, aaga poch leaw teanarang cam nasaj icon, aag ayaj ngome jayats majlüy, cos aag ayaj ajlüyay poch tejiüran mbas; nganüy aaga ajlüyay poch quiaj, aag ayaj lamenguiayiyün nde wüx teyariün Mipoch Teat Dios.

<sup>8</sup> Pero nganüy sarang noic jayats poch nasaj icon. Aag ayaj ajüic naleaing wüx Teat Cristo, aton teajlüy naleaing wüx icona. Cos aaga pojniün tenguial among; nganüy aaga ran naleaing teamarraj nipilan.

<sup>9</sup> Sitiül jane apiüng ajlüy tiül ran, pero ajcüy majaw alinop nendüüb Teat Cristo, quiaj nej ajüiquich aliün tiül pojniün, nganaw majntsop tiül ran.

<sup>10</sup> Jane andiüm nop alinop, quiaj ajüic ajlüy tiül aaga ran, cos arang atnej andiüm Teat Cristo. Quiaj ngo majlüy nicuajind cuane alndom müüch nej majtoech majmüic tiül ngo majneaj.

<sup>11</sup> Nganüy sitiül jane ajcüy majaw alinop nendüüb Teat Cristo, quiaj ajüic aliün tiül pojniün; tenguial ajüy tiül aaga pojniün quiaj niüng ngo majaw nguiane andüy amb,



cos aaga pojniün quiaj lamüüch nej me-somb.

<sup>12</sup> Xecualüw, nganüy aag agüy sarang menguiayüün, naleaing Teat Dios landoj lamawün isoetiün, cos iyacan wüx imeajtsan mipoch Teat Cristo.

<sup>13</sup> Sarang aag agüy nüüch icon, teat monxey, cos icona lamejawan nej, aaga lajlüy nde tanomb wüx nganaw majlüy aaga iüt cam. Sarang aag agüy nüüch icon monench, cos icona lejntsopiün wüx leaw nimeech andiüm mayac icon wüx.

Sarang aag agüy xecualüw nasaj icon, cos lamejawan jane nej Teat Dios.

<sup>14</sup> Sarang aag agüy nasaj icon teat monxey, cos lamejawan jane aaga lajlüy nde tanomb wüx nganaw majlüy aaga iüt cam. Sarang aag agüy nasaj icon monench, cos ipacan wüx Mipoch Teat Dios. Aaga poch quiaj landoj lajlüy wüx imeajtsan; lejntsopiün wüx leaw nimeech andiüm mayac icon wüx.

<sup>15</sup> Nde mendiüm imeajtsan cuajantanej leaw ajlüy wüx aaga iüt cam. Nde meycan imeajtsan wüx cuajantanej ngo majnej leaw almajlüy ningüy wüx iüt; cos sitiül aljane andiüm marang ngo majnej, quiaj ajüic ngo mandiüm marang leaw apiüng Teat Dios.

<sup>16</sup> Meáwan ngo majnej leaw ajlüy wüx aaga iüt cam, aag ayaj wüx nipilan andiümüw marangüw leaw andiümüwan nejiw, aton meáwan ngo majnej leaw andiüm oniüjcüw nejiw majaw, aton andiümüw majiürüw meáwan cuajantanej leaw alndom merangrangayej wüx. Meáwan aaga ngo majnej quiaj witiünüyan wüx aaga iüt cam, ngome imiün niüng ajlüy Teat Dios.

<sup>17</sup> Pues aaga iüt cam teaúmb teandroy ombas, at meáwan ngo majnej andiüram marangüch apmümb ndrom ombas. Pero jane arang leaw andiüm Teat Dios apmapac meáwan nüt.

*Leaw naleaing, leaw ngo maleaing*

<sup>18</sup> Xecualüw, aaga nüt ajlüyiiüts tiül cam, aag ayaj ndóiwüx nganüy. Icona lamenguiayüün aliüc aljane apmapiüng Cristo nej; aag ayaj apmajcüy majaw Teat Cristo. Nganüy lajüic lajaraw lajlüyiw leaw apiüngüw Cristo nejiw. Wüx lajüic aag ayaj, quiaj ajawaats laliüc mümb aaga nüt cam.

<sup>19</sup> Nejiw nawüwan tiül icootsa, pero ajcüw ayaj ngome aquiüjpaats, cos sitiül nejiw aquiüjpaats, ngo mawüw tiül icootsa. Pero cos tawüw, quiaj tejüiquichay nejiw ngome aquiüjpaats.

<sup>20</sup> Teat Cristo lamüüch icon Nangaj Espiritu ocueaj Teat Dios mambeol icon wüx iyariün mipoch nej, y para alndom mejawan ngün naleaing, ngün ngo maleaing.

<sup>21</sup> Sarang aag agüy nasaj icon, ngome cos icona ngo mejawan cuane naleaing; sawaj ijawan cuane naleaing, at ijawan jane tengual awaiich aag ayaj ngo mandeac leaw naleaing.

<sup>22</sup> ¿Jane aaga newaiiiche? Aag ayaj leaw nepiüng Teat Jesús ngome aaga Cristo lapiürang aliüc. Aag ayaj ngome áagan Teat Cristo ajcüy majaw; ajcüy majaw Teat Dios aton.

<sup>23</sup> Meáwan jane apiüng Teat Cristo ngome Micual nej Teat Dios, aag ayaj ngo majlüy tiül omeaats nej Teat Dios. Nganüy leaw ayar, apiüng Teat Cristo Micual nej Teat Dios, aag ayaj ajlüy tiül omeaats nej Teat Dios.

<sup>24</sup> Leawa lamenguiayüün nde tanomb wüx teyariün Mipoch Teat Dios, aag ayaj ajlüy, acül wüx imeajtsan. Nganüy sitiül meáwan tenguiayüün nde tanomb iyacan wüx imeajtsan, aag ayaj apmüüch icon mejlüyüün nóiquian mequiüjpan Teat Dios y Micual nej Teat Jesucristo.

<sup>25</sup> Nganüy aag ayaj leaw Teat Cristo lamapiüng apmüüch icoots, aag ayaj apmüüch mapacaats meáwan nüt niüng ajlüy Teat Dios.

<sup>26</sup> Sarang aaga nawiig cam nasaj icon nde mawaiich icon ajcüwa monwaiich.

<sup>27</sup> Icona ijiüran Nangaj Espiritu ocueaj Teat Dios; ajlüy nóiquian maquiüüb icon. Aag ayaj tüüch miün Teat Cristo. Nganüy nejinguind alinop pálwüx ngo metam maquiaach icon, cos aaga Nangaj Espiritu aquiaach icon mejawan ngün naleaing, ngün ngo maleaing. Tanaámb netam meyariün mendüjpiün Teat Cristo nóiquian atnej lamaquiaach icon Nangaj Espiritu.

<sup>28</sup> Nganüy xecualüw, nde mecueatiün mendüjpiün wüx leaw taquiaach Teat Cristo, cos atquiaj alndom masap imbasan wüx nej, ngo mermbolan mejawan wüx aaga nüt aliüc, ngome apmexingüün mejawan.

<sup>29</sup> Cos icona ijawan Teat Cristo arang áagan najnej, quiaj alndom mejawan meáwan leaw nerang najnej, aag ayaj micual Teat Dios nej.

### 3

*Jane micual nejw Teat Dios*

<sup>1</sup> Nganüy ich leaam imeajtsan guineay andiüm icoots Teat Dios. Alndom masoiquiüts micual Teat Dios icoots, cos naleaing micual nej icoots nganüy. Masey ajcüwa nipilan wüx aaga iüt cam ngo majawüw jane icoots, cos nganaw majawüw jane Teat Dios.

<sup>2</sup> Nganüy ajlüyiiüts micual icoots Teat Dios, masey nganaw majawaats guineay aliüc miün apmajlüyiiüts alinoic nüt. Pero

ajawaats wüx Teat Cristo aliüc alinomb, quiaj apmajlüyüüts atnej ajlüy nej, cos quiaj apmajawaats nejay nguineay ajlüy.

<sup>3</sup> Nganüy meáwan jane teamacül Teat Cristo wüx aliüc alinomb, nejáyan quiaj üjchay merixixay omeaats, atnej Teat Cristo ajlüy nerixix.

<sup>4</sup> Pero jangantanej arang nisoet, aag ayaj teamarang leaw Mipoch Teat Dios apiüng ngondom; cos wüx apmarangüch nisoet aag ayaj ngo matüch marang leaw apiüng Teat Dios.

<sup>5</sup> Icona ijawan Teat Cristo tiün wijquiam ningüy wüx aaga iüt cam mawün asoetiüts. Nej nómban ngome tajiür nisoet.

<sup>6</sup> Meáwan leaw ajlüy nóiquian maquüüb Teat Cristo, aag ayaj lango mandüy wüx marang nisoet. Jane tanaámb arang nisoet ngo majaw jane nej.

<sup>7</sup> Xecualüw, nde mawaiich icon nejinguind, cos jane arang palan ajüiquich najneaj arang, atnej arang Teat Cristo.

<sup>8</sup> Nganüy jane tanaámb arang nisoet, aag ayaj minipilan nej nimeech, cos nimeech nde wüx tajlüy aaga iüt cam nej tengual arang nisoet. Nganüy Teat Cristo, Mícuál Teat Dios, tiün mandarríich meáwan leawa nimeech lamarang.

<sup>9</sup> Meáwan jane awiquiach nej Teat Dios ngo mandüy marang nisoet, cos Teat Dios lamambiülüüch omeaats nej. Áag ngo mandüüm mandüy wüx marang nisoet, cos micual nej Teat Dios.

<sup>10</sup> Wüx meáwan aag ayaj ajüiquichayej jane micual nejw Teat Dios, at aton jane micual nejw nimeech. Meáwan jane ngo marang palan atnej netam, at ngo mandüüm nop nendüüb Teat Cristo, aag ayaj ngome ocueaj nej Teat Dios.

#### *Netam mandüümaats nop alinop*

<sup>11</sup> Cos aaga nanderac cam landoj lamenguiayiün nde tanomb apiüng: “Netam mandüümaats nop alinop”, aw.

<sup>12</sup> Ngondom marangaats atnej nomb tarang nop minipilan nimeech nenüt Cain, cos tambiy michiig nej. ¿Neola, cuane wüx tambiy? Cos tajaw meáwan leawa nej tarang, aag ayaj ngo majneaj; nganüy michiig nej meáwan leawa tarang, aag ayaj palan leaw andüüm Teat Dios.

<sup>13</sup> Xecojow xechijquiaw, nde mbayameron sitiül majcüy majaw icon jangantanej nipilan.

<sup>14</sup> Icootsa ajawaats atnej laawaats tiül mondeow, tapacaats; cos nganüy andüümaats meáwan mondüüb Teat Cristo. Jane ngo mandüüm nop nendüüb Teat Cristo ajüic tanaámb andeow.

<sup>15</sup> Meáwan jane ajcüy majaw nop nendüüb Teat Cristo, aag ayaj atnej nop nembiy nipilan. Icona ijawan nop nembiy nipilan ngondom mapac meáwan nüt.

<sup>16</sup> Teat Cristo tandeow mawün icoots wüx asoetiüts; quiaj ajawaats nguineay nej xeyay andüüm icoots. Nganüy icoots aton netam mandeowaats ingow andeow alinop nendüüb Teat Cristo.

<sup>17</sup> Nganüy sitiül aljane tiül icoots ajiür cuajantanej wüx aaga iüt cam, condom ajaw alinop nendüüb Teat Cristo netiün andüy, pero aaga nejüür quiaj arang adam omeaats, ngo müüch nicuajind; pues ¿nguineay alndom majüiquich ajlüy tiül omeaats nej mimonajneaj Teat Dios?

<sup>18</sup> Xecualüw, nde majüiquichaats andüümaats nop alinop ombeayiütsan; ngwüy, netam majüiquichaats naleaing tengual arangaats aag ayaj.

#### *Netam masap ombasaats teombas Teat Dios*

<sup>19</sup> Wüx meáwan aag ayaj ajawaats ajlüyüüts tiül ajcüw leaw andüjpiw aaga naleaing nanderac leaw apiüng Teat Dios. Aton ajawaats ajlüyüüts teombas nej najneaj.

<sup>20</sup> Sitiül ayajcaats tiül omeajtsaats ngo marangaats atnej netam, nganüy Teat Dios ajtsop wüx ajaw meáwan cuane alwüx omeajtsaats, cos nej ajaw meáwan cuajantanej.

<sup>21</sup> Xecojow xechijquiaw, sitiül ayajcaats tiül omeajtsaats najneaj teamarangaats, quiaj alndom mayajcaats lasap ombasaats teombas Teat Dios.

<sup>22</sup> Atquiaj cuajantanej leaw apmatüniüts ocueaj nej apmüjndüüts, cos ayacaats wüx omeajtsaats mipoch nej; arangaats leawa nej andüüm.

<sup>23</sup> Aag agüy apiüng marangüch: Maryariüts mandüjpiüts Micual nej Teat Jesucristo; at mandüümaats nop alinop atnej landoj lamapiüng.

<sup>24</sup> Jane apmayac wüx omeaats marang leaw apiüng Teat Dios, nej ajlüy nóiquian maquüüb Teat Dios, y Teat Dios ajlüy nóiquian maquüüb. Cos Teat Dios lamüüch icoots Nangaj Miespíritu nej, ajawaats nej meáwan nüt almaquüüb icoots.

## 4

#### *Nde mendiümdüüman cuajantanej ocueaj a mundo cam*

<sup>1</sup> Xecojow xechijquiaw, nde meyarüün andeacüw meáwan leaw apiüngüw ambeol nejw Nangaj Espiritu ocueaj Teat Dios, pero netam mejawan sitiül naleaing ambeol nejw Nangaj Espiritu, tengwüy ngwüy; cos xeyay monwaiich lajlüyw ningüy wüx aaga mundo cam.

<sup>2</sup> Wüx aag agüy alndom mejawan ngün naleaing ambeol nej Nangaj Espiritu: Meáwan espíritu jane apmapiüng Teat Jesucristo tiün imiün cielo wijquiam ningüy wüx aaga iüt cam, aag ayaj ocueaj nej Teat Dios.

<sup>3</sup> At aton meáwan espíritu jane apmapiüng Teat Cristo ngome tiün imiün niüng ajlüy Teat Dios, aag ayaj ngome ocueaj nej Teat Dios; cos ambeol nej espíritu ocueaj aaga newaiich aaga najcüy majaw Teat Cristo. Aag ayaj icona lamenguiayüün aliüc apmajlüy, nganüy lapeay, lajlüy wüx aaga iüt cam.

<sup>4</sup> Xecualüw, icona ocueaj icon Teat Dios. Cos tejtospüün wüx ombasüw ajcüwa monwaiich quiaj, nganüy ngondom mawaijchaw icon. At aton cos aaga Nangaj Espiritu nembeol icon, aag ayaj ajntsof wüx marang cuajantanej; pero aaga espíritu ocueaj nimeech ngo matüch matnej.

<sup>5</sup> Nganüy ajcüwa monwaiich quiaj, ngome ocueaj nejüw Teat Dios; pares andeacüw leaw ajlüy wüx aaga iüt cam, aton nipilan aag andiümüw manguiayiw.

<sup>6</sup> Pero icootsa micual icoots Teat Dios. Jane ayamb Teat Dios apmüüch olaag manguiay andeacaats; pero jane ngome ocueaj nej Teat Dios ngo mandiüm manguiay leaw andeacaats. Wüx aag ayaj ajawaats jane ambeol nej Nangaj Espiritu ocueaj Teat Dios, at jane nembeol nej espíritu ocueaj aaga newaiich.

#### *Teat Dios xeyay andiüm icoots*

<sup>7</sup> Xecojow xechijquiw, netam mandiümaats nop alinop, cos Teat Dios üüch icoots mimonajneaj nej alndom mandiümaats nop alinop. Meáwan jane ajiür aaga monajneaj quiaj ajüiquich micual nej Teat Dios, at ajaw jane nej Teat Dios.

<sup>8</sup> Pero jane ngo mandiüm nop alinop, aag ayaj nganaw majaw jane nej Teat Dios, cos Teat Dios andiüm meáwan nipilan.

<sup>9</sup> Teat Dios ajüiquich xeyay andiüm icoots, cos tüüch miün anopüyan Micual nej ningüy wüx aaga iüt cam mandeow para macacaats por nej.

<sup>10</sup> Wüx aag agüy ajüic nguineay andiüm icoots Teat Dios: cos ngome icootsa tayambaats mimonajneaj nej; ngwüy, nej tüüchan icoots aaga monajneaj quiaj, wüx tüüch miün Micual nej mandeow para mawaats wüx asoetiüts.

<sup>11</sup> Xecojow xechijquiw, cos sitiül Teat Dios xeyay lamandiüm icoots, atquiaj aton icootsa netam mandiümaats nop alinop.

<sup>12</sup> Nejinguind nganaw maxom majaw Teat Dios, pero sitiül andiümaats nop alinop, quiaj Teat Dios apmajlüy tiül omeajtsaats; aton mimonajneaj nej apmatang tiül omeajtsaats.

<sup>13</sup> Wüx aag agüy ajawaats ajlüyüts tiül nej, aton nej ajlüy tiül icootsa, cos lamüüch icoots Nangaj Espiritu ocueaj nej.

<sup>14</sup> Nganüy xicona cos tajawasan nejaj, aag sandeacan wüx, naleaing Teat Dios tüüch miün Micual nej mawün wüx asoet meáwan cambajüüt.

<sup>15</sup> Sitiül jangantanej apmajüiquich mapiüng Teat Jesús aag ayaj Micual nej Teat Dios, quiaj Teat Dios ajlüy tiül omeaats nej, aton nej ajlüy tiül omeaats Teat Dios.

<sup>16</sup> Icootsa lamajawaats Teat Dios andiüm icoots cos lamayariüts mimonajneaj nej. Cos Teat Dios ajiür xeyay monajneaj, jane ayar aaga monajneaj quiaj, ajlüy tiül omeaats Teat Dios, y Teat Dios ajlüy tiül omeaats nej.

<sup>17</sup> Wüx aag ayaj ajüiquichaats nguineay larangüy tiül omeajtsaats mimonajneaj Teat Dios, cos aaga nüt wüx apmajaraw wüx asoetaran ngo metam mimbolaats. Pues atnej ajlüy Teat Cristo, atquiaj icoots netam majlüyüts wüx aaga iüt cam.

<sup>18</sup> Jane ajiür tiül omeaats nej mimonajneaj Teat Dios ngo mimbol, cos aaga monajneaj quiaj üüch nej ndrom omeaats mbol. Nganüy aaga mbol quiaj ngo müüch masap ombasaran wüx mimonajneaj Teat Dios; alndom malox tiül naél nop. Nganüy jane imbol, aag ayaj nganaw merangüy tiül omeaats nej mimonajneaj Teat Dios.

<sup>19</sup> Icootsa andiümaats Teat Dios cos nej ombas tandiüm icoots.

<sup>20</sup> Sitiül aljane apiüng: "Xique sandiüm Teat Dios", maw; pero aaga nepiüng quiaj ajcüy majaw alinop nendüüb Teat Cristo, aag ayaj newaiich. Cos jane ngo mandiüm nop nendüüb Teat Cristo leaw mbichmeaw majaw nguineay alndom mandiüm Teat Dios leaw ngondom maxom majaw?

<sup>21</sup> Icootsa ajiüraats aaga poch niüng apiüng: jane andiüm Teat Dios, netam mandiüm aton alinop nendüüb Teat Cristo.

## 5

### *Apmajntsopiüts wüx leaw almajlüy wüx a iüt cam*

<sup>1</sup> Meáwan jane apmayar andeac Teat Jesús wüx tapiüng nej aaga Cristo lapiürang aliüc, aaga leaw nepiüng atquiaj ajüiquich awiquiach nej Teat Dios. At meáwan jane andiüm Teat Dios apmandiüm meáwan micual nej aton.

<sup>2</sup> Wüx ayambaats mimonajneaj Teat Dios, y ayacaats wüx omeajtsaats marangaats leawa nej lamapiüng, quiaj ajawaats naleaing andiümaats meáwan micual Teat Dios.

<sup>3</sup> Sitiül arangaats atnej apiüng Teat Dios, quiaj ajüic andiümaats Teat Dios, cos aaga

poch leawa nej tayac, aag ayaj ngome xeyay naél marangaats.

<sup>4</sup> Meáwan leaw awiquiach nej Teat Dios, aag ayaj ngo marang atnej andiüm nipilan ningüy wüx iüt. At leaw andüjpiüts apmantsopiich icoots wüx meáwan ngo majneaj leaw altiül aaga iüt cam.

<sup>5</sup> ¿Jane alndom majntsop wüx leaw ngo majneaj arangüw nipilan? Áagan leaw nendüüb Teat Jesús cos ajaw Micual Teat Dios nej.

*Apiüng wüx jane Micual Teat Dios*

<sup>6</sup> Teat Jesucristo tiün tejüiquichay wüx tayar yow, at wüx tajüñch tiüt miquiej nej. Ngome tejüiquichay áagan wüx tayar yow; ngwüy, nej tiün, tayar yow, y aton tajüñch tiüt miquiej nej. Aaga Nangaj Espiritu ocueaj Teat Dios lamajüiquich nej cos apiüng áagan leaw naleaing, ngondom mawañich.

<sup>7</sup> Cos ajlüy arojptüw leaw ajüiquichayej tiül nangaj cielo. Ajcüw ayaj nop Teat Dios, nop aaga Nanderac, alinop aaga Nangaj Espiritu; miaröjpüéj ajlüyiw nop nej.

<sup>8</sup> At ajlüy miaröjpüéj nejüiquichayej wüx aaga iüt cam. Nop aag ayaj Nangaj Espiritu ocueaj Teat Dios; alinop tejüiquichay wüx tayar yow; y alinop aag ayaj Teat Jesús wüx tandeow tajüñch tiüt miquiej nej. Aaga arojptüw quiaj, noic nej andeacüw.

<sup>9</sup> Sitiül icootsa ayariüts leaw andeacüw nipilan, nganüy najntsop wüx atam leaw apiüng Teat Dios. Cos aaga netam poch leaw apiüng Teat Dios, aag ayaj andeac wüx Micual nej.

<sup>10</sup> Jane ayar andeac Teat Cristo micual Teat Dios, nej aaga neyar quiaj ajüiquich ajlüy tiül omeaats nej Mipoch Teat Dios. Pero jane ngo mayar andeac Teat Dios, aag ayaj nop newaiich, cos ngo mejüiquichay tiül omeaats nej Mipoch Teat Dios leawa landerac wüx Micual nej.

<sup>11</sup> Nganüy aag agüy ajüiquicharan manguiayaran: Teat Dios lamüüch icoots mapacaats meáwan nüt; aaga apacaran quiaj axoram wüx Micual nej.

<sup>12</sup> Jane ajiür tiül omeaats nej Micual Teat Dios, aton lamajiür aaga apacaran quiaj. Nganüy jane ngo majiür Micual Teat Dios tiül omeaats nej, at ngo majiür aaga apacaran quiaj.

*Andondoch, apaj ocueajaran*

<sup>13</sup> Nganüy meáwan aag agüy sarang wüx nawiiig nasaj icon leaw lameyariün mendüjpiün Micual Teat Dios, para alndom mejawan naleaing lamejiüran aaga üüch mapacaran meáwan nüt.

<sup>14</sup> Wüx aag agüy üüch icoots masap ombasaats wüx nej; cos sitiül apmatüniüts cuajantanej leaw andiüm nej, nej apmanguiaiy andeacaats.

<sup>15</sup> Sitiül ajawaats nej anguiaiy andeacaats wüx atüniüts cuajantanej, quiaj aton ajawaats apmüjndiüts meáwan leawa lamatüniüts.

<sup>16</sup> Sitiül aljane ajaw nop nendüüb Mipoch Teat Dios arang nisoet, pero aaga nisoet quiaj ngome indeowüyaran wüx, pues aaga nejaw quiaj netam matün ocueaj Teat Dios mambeol nej macueat aaga nisoet. Aag ayaj leaw ajcüw arangüw nisoet ngondom mindeowüyaran wüx. Cos ajlüy nisoet andeowaran wüx, aag ayaj ngo napiüng majtan ocueaj Teat Dios.

<sup>17</sup> Cos meáwan leaw ngo majneaj arangüch, aag ayaj nisoet. Pero ajlüy nisoet ngo metam mindeowüyaran wüx.

<sup>18</sup> Ajawaats meáwan jane awiquiach nej Teat Dios, ngo mandüy marang nisoet, cos Teat Cristo Micual Teat Dios tengual majiür nej, nde tegüy matüch nej nimeech.

<sup>19</sup> Icootsa nganüy ajawaats micual icoots Teat Dios, masey ajawaats meáwan aaga iüt cam ajlüy teowix nimeech.

<sup>20</sup> Ajawaats Micual Teat Dios tiün ningüy wüx aaga iüt cam; nej tüüch icoots maxomaats omeajtsaats majawaats ngün aaga naleaing Dios nej. Nganüy ajlüyüts ocueaj aaga naleaing Dios quiaj, nóiquian maquiüjpaats Micual nej Teat Jesucristo. Aag ayaj naleaing Dios nej, neech mapacaran meáwan nüt.

<sup>21</sup> Xecualüw, nde mendüjpiün narangüch dioses. Amén.

## **Amb iwic nanderac arang wüx nawiiig San Juan 2<sup>a</sup> Carta de SAN JUAN**

### *Atepeay*

<sup>1</sup> Xique nop teat naxey natang ombas; sarang aaga acas poch cam, müm najtaj, nüüch ic, at nüüch micualüw. Xique xeyay sandiümüw cos andüjpiw aaga naleaing nangaj poch. Ngome áagan xique sapiüing aag ayaj, aton atquiaj apiüingüw meáwan leawa lamayariw mandüjpiw aaga poch leawa naleaing.

<sup>2</sup> Cos aaga naleaing poch nanderac quiaj lajlüy tiül icootsa, at aton ajawaats landoj apmacül tiül icoots meáwan nüt.

<sup>3</sup> Tamtámban ijlüyiün, Miteatiiüts Dios mambeol icon mejiüran monapacüy, at nejneajüñan wüx minüt Teat Jesucristo Micual Teat Dios; cos indüjpiün aaga naleaing nanderac, at ijiüran monajneaj.

### *Tanaámb indüjpiün aquiaach Teat Cristo*

<sup>4</sup> Xeyay tapac ximeaaats wüx taxomas acas micualüw tanaámb andüjpiw aaga naleaing nangaj poch leawa tayariiüts ocueaj Teat Dios.

<sup>5</sup> Nganüy sandiüm nasaj ic müm najtaj, ngome sarang nüüch ic noic jayats poch. Ngwüy, aag ayaj lamajiüraats xeyay neat, nüüing apiüing: Netam mandiümaats nop alinop.

<sup>6</sup> Sitiül ajiüraats mimonajneaj Teat Dios, quiaj apmarangaats leaw apiüing tiül Mipoch Nej. Nganüy leawa netam marangaats: majüyiiüts tiül aaga monajneaj quiaj, mandiümaats nop alinop atnej lamenguiaiyiün lamajiür xeyay nüt.

### *Monwaiich*

<sup>7</sup> Xeyay monwaiich lajlüyiw ningüy wüx aaga iüt cam, ngo mapiüingüw Teat Jesucristo tiün wijquiam marang nipilan. Jane apiüing atquiaj, monwaiich nejiw, y ajcüyiw majawüw Teat Cristo.

<sup>8</sup> Ijawan wüx aag ayaj icoyónan quiaj, ngana ndrom ombas minajitüt Teat Dios leaw icona lamerangan, ndoj ngome apmeajndiün palan leaw Teat Dios andiüm müüch icon.

<sup>9</sup> Sitiül aljane apmapiüing nej ajaw xeyay, pero aag ayaj ngo matnej aquiaach Teat Cristo, nej ngo majiür tiül omeaats nej Teat Dios. Nganüy jane tanaámb ayac wüx omeaats leaw aquiaach Teat Cristo, aag ayaj ajiür tiül omeaats nej Teat Dios, aton ajiür tiül omeaats Micual nej Teat Cristo.

<sup>10</sup> Nganüy sitiül aljane mamb majaw icon, ngo majoy aaga poch aquiaach Teat Cristo,

nde mengochiün iniüangan, aton nde metepeayiün.

<sup>11</sup> Cos jane apmatepeay aaga newaiich quiaj, aton ajüic nej ambeol wüx aaga ngo majneaj leaw aquiaach quiaj.

### *Ndóiwüx atepeay*

<sup>12</sup> Sajiür xeyay leaw netam nasaj icon, pero ngo nandiüm narang wüx aaga nawiiig cam, más najneaj sapiüing sanamb najaw icon, quiaj alndom mejawayoots mendeacaats, y mapac omeajtsaats nóiquian.

<sup>13</sup> At atepeayiw ic micual michiiig najtaj, áag leaw Teat Dios lamarriiüd. Amén.

## **Amb arojmbüw nanderac arang wüx nawiiig San Juan 3ª Carta de SAN JUAN**

### *Atepeay teat Gayo*

<sup>1</sup> Xique nop teat naxey natang ombas tiül mondüüb Teat Cristo; sarang aaga acas poch wüx nawiiig cam nüüch ic teat Gayo, naleaing sandiüm ic xeyay.

<sup>2</sup> Xechiig wüx minüt Teat Cristo, xique meáwan nüt satün mambeol ic Teat Dios memongoch najneaj, mejiür monapacüy. Sajaw tengual itang wüx Mipoch Teat Dios leaw andüjpiüts.

<sup>3</sup> Xeyay tapac ximeaats wüx tapeayiw micoojots michijquiaats wüx minüt Teat Cristo mapiüngüw nguineay ajneaj ijlüy wüx aaga naleaing nanderac leaw andüjpiüts, cos naleaing ique temerang atnej apiüing Teat Dios.

<sup>4</sup> Wüx sanguiaiy meáwan xecualüw wüx Mipoch Teat Dios andüjpiw aaga naleaing poch, ngo majlüy alinoic leaw alndom müüch xic mapac ximeaats xeyay.

<sup>5</sup> Xechiig, xeyay najneaj irang wüx imbeolüw mondüüb Mipoch Teat Dios leaw napeay miün, masey ngo meyaag ombasüw.

<sup>6</sup> Cos ajcüwa teat monxey quiaj, wüx tandilileaw tandeacüw tiül nüing canchiüjow majüquichaw nguineay ajneaj imeaats. Naleaing nganüy sandiüm natün icueaj imbeolüw alinomb; ijchaw leaw netam nejiw tiül tiüüd wüx apmambüw masajüw nipilan tiül alinoic cambaj, cos arangüw minajiüt Teat Dios.

<sup>7</sup> Nejiw tambüw marangüw minajiüt Teat Cristo, naleaing ngo mayariw nicuajind ocueaj nipilan leaw nganaw mayambüw Teat Dios.

<sup>8</sup> Aag ayaj netam marangaats, mambeolaats ajcüw mondeac Mipoch Teat Dios quiaj, marangaats najiüt nöiquian maquiüjpaats.

### *Ngo majneaj tarang teat Diótrefes*

<sup>9</sup> Ninguiün nüt xique tarangas acas poch wüx nawiiig nüüch mondüüb Mipoch Teat Dios; pero naleaing Diótrefes ngo mayar leaw tapiüngas cos nej tanaámb andiüm marang natang tiül icona.

<sup>10</sup> Sitiül sanamb najaw icon, quiaj sanandeac nasajüw meáwan icona nguineay arang, cos andeac ngo majneaj wüx ximbasan, awaiich. Ngome áagan ayaj, at ngo mandüüm müüch maxojtüw aniüing nej mondüüb Mipoch Teat Dios monaw alinoic cambaj. Átan andeac nüing canchiüjow, asaj nejiw nde müjchiw maxojtüw aniüingüw nejiw mondüüb Mipoch Teat Dios. Nganüy

sitiül aljane apmarang aag ayaj, nej apmawün nejiw tiül moncanchiün.

<sup>11</sup> Xechiig, nde mendüüb wüx merang ngo majneaj, tanaámb irang najneaj. Cos jane nerang najneaj, ajneaj majaw nej Teat Dios; pero jane nerang ngo majneaj, aag ayaj nganaw majaw leaw andiüm Teat Dios.

### *Najneaj tarang Demetrio*

<sup>12</sup> Meáwan nipilan andeacüw najneaj wüx ombas teat Demetrio, cos meáwan nüt ajüiquich nguineay ajneaj arang. At xicona aton alndom nandeacan nguineay ajneaj arang. Ique ijaw xicona ngo nawaijchan, sandeacan naleaing.

### *Ndójwüx atepeay*

<sup>13</sup> Aliün najiür xeyay nasaj ic, pero naleaing ngo nandiüm narang wüx nawiiig.

<sup>14</sup> Sapiüing alndom mejawayor najen, quiaj apmendeacar.

<sup>15</sup> Nganüy satepeay ic tamtámban, at atepeayiw ic meáwan leaw ajawüw jane ic. At sandiüm metepeay anopnopo j leaw lama-jawüw jane xic.

## Noic nanderac arang wüx nawiig San Judas SAN JUDAS

*Teat Judas atepeay meáwan leaw Teat Dios lamapaj*

<sup>1</sup> Xique nenütius Judas michiig Teat Jacobo (Santiago), nerangas minajiüt Teat Jesucristo. Nganüy xique sarang acas poch wüx aaga nawiig cam nüüch meáwan leawa landoj lajwanüw majlüyiw micual Teat Dios, lajlüyiw nóiquian mandüjpiw Teat Jesucristo cos nej teamajiür nejiw.

<sup>2</sup> Tamtámban ijlüyüün, mejiüran monapacüy, nejneajiünan, mexeyay tiül icona mimonajneaj Teat Dios.

*Monquiaach leaw ngo maleaig  
(2 Pedro 2:1-7)*

<sup>3</sup> Xecojow xechijquiw, xeyay tandiümas narang acas poch nüüch icon, nasaj icon nguineay laawaats wüx asoetiüts. Pero nganüy lango nasaj icon wüx aag ayaj, cos netam napaj icueajiün mersapayon wüx, at mepacan wüx leawa lameyariün nde wüx indüjpiün Mipoch Teat Dios, áag leawa lamajndiw meáwan mondüüb Teat Dios.

<sup>4</sup> Nganüy cos ajlüy acas nipilan lajmeliw axotayéjan almequiüjpan. Ajcüw ayaj lamapiüng wüx nejiw tiül Mipoch Teat Dios lamajiür xeyay neat. Cos nejiw landoj lajwanüw mambüw tiül castigo alinoic nüt. Nejiw arangüw meáwan ngo majneaj; awüyayej wüx apiüngüw Teat Dios xeyay afüc wüx cuajantanej, ngome apmayac nejiw tiül aaga xeyay ngo majneaj masey arangüw leaw andiümüw. Apiüngüw Teat Dios ngome néjan quiaj ajlüy natang; átan apiüngüw Miteatiüts Jesucristo ngome natang nej.

<sup>5</sup> Nganüy sandiüm nüüch leaam imeajtsan wüx nipilan israel, masey icona lamejawan nguineay Teat Dios tawün nejiw wüx naél tiül iüt Egipto; condom tandrooch ombas jane ngo mayar andeac nej.

<sup>6</sup> At ajcüwa ángeles, leaw ngo marangüw atnej netam wüx minajiütüw nejiw cos tawüw tiül cielo niüng netam macüliw. Ndoj tasap nejiw Teat Dios matsaag nejiw tiül noic pojniün, niüng apmacüliw meáwan nüt leaw apmatüch aaga nadam nüt majaraw wüx asoeteran.

<sup>7</sup> Atquiaj tajlüy tiül ajcüwa cambaj Sodoma y Gomorra, aton alacas cambaj monlüy quiajan. Nejiw tarangüw xeyay ngo majneaj ngomeaag wijquiajow marangüw. Cos monxey tandiümüw marangüw montaj, monjtaj tandiümüw marangüw monxey. Atquiaj tajlüy ndom majawüw meáwan nipilan leaw ngo mayariw andeac Teat

Dios nguineay apmamongochiw tiül biümüb alinoic nüt.

<sup>8</sup> Masey nejiw tamongochiw aaga naél quiaj, atanquiaj aton alndom mamongochiw ajcüwa monümeay quiaj. Cos nejeyéjan quiaj tengual androochayej ombasüw wüx ngo mandiümüw mayariw leaw apiüng Teat Dios. At itsojayéjan meáwan monlüy tiül nangaj cielo.

<sup>9</sup> Wüx aaga minatangüy ángel nenüt Miguel tajcüy aweaag minatangüy nimeech, tandeacndeacüw nguineay apmarangüw wüx micuerpo Moisés. Aaga ángel Miguel ngo ndom malic minatangüy nimeech. Tasaj atcüy: "Teat Dios mapaj icueaj", aj.

<sup>10</sup> Nganüy ajcüwa nipilan monwaiich quiaj itsojayéjan leaw ngo majawüw cuane amb apiüng. Nejiw arangüw leaw awüniwan tiül omalüw, at nejiw nop nimal ngo majiür omal omeaats, cos ngo majawüw cuane arangüw.

<sup>11</sup> ¡Pobre nejiw! ¿Neol tajlüyiw atquiaja? Cos tandüjpiw mitiüd Caín, aton tambüw wüx tomiün atnej tarang Balaam. ¿Neol tajcüyiw majawüw Teat Dios? ¿Ngo majawüwa, nej alndom mandrooch ombasüw atnej tarang wüx Coré?

<sup>12</sup> Ajcüwa monwaiich quiaj tengual manchom icon wüx iquiüjpan tiül niüng iran-gan noic monet ocueaj hermanos. Nejiw üetiw, anganeowüw, apac omeajtsüw, ngo mapiüngüw wüx. At nejiw oic ngo majoy yow, altiulich nejiw iünd nguiajantanej andüy. At nejiw noic owil xiül ngo mayac aóng wüx atüch a tü meóng, cos landeow lasojndiow tiüt mioxiich nej.

<sup>13</sup> Nejiw napatüw, at nejiw wüx arang napac ndec, ayac apop, atepich cuajantanej nequiachquiach. Aag arangüw quiaj üüchayéjan monxing. At nejiw najüyjüyan ocas, cos landoj lajwanüw majlüyiw tiül pojniün meáwan nüt niüng nómban ngondom maxomüw majawüw ran.

<sup>14</sup> Wüx meáwan ajcüw ayaj tandeac nop nendeac andeac Teat Dios nenüt Enoc; cos aaga Enoc quiaj, amb ayaiw nipilan naw wüx teat Adán. Tapiüng: "Tajawas Teat Dios lapeay, aqüiüb miün xeyayiw nangaj miángeles nej,

<sup>15</sup> majaw wüx meáwan asoeteran tiül meáwan nipilan. Apmajaw wüx meáwan monrang ngo majneaj, meáwan ngo majneaj lamandeacüw arangüw wüx omeajtsüw; at meáwan cuajantanej ngo majneaj andeacüw wüx ombas Teat Dios", aw.

<sup>16</sup> Ajcüw ayaj ndeac mbeay nejiw, cos arangüw leaw üüch nejiw majneaj omeajtsüw; at ombeayiw nejiw andeac cuajantanej axom mandeac ndom marangrangayej wüx; at andeacüw najneaj

wüx ombasüw nipilan ndom maxomxomayej wüx.

*Asaj nejiw, ajpaj ocueajiw*

<sup>17</sup> Nganüy icona xecojow xechijquiaw, ich leam imeajtsan wüx aaga poch tandeacüw miapóstoles Miteatiiüts Jesucristo.

<sup>18</sup> Cos nejiw tapiüngüw aliüc miün nüt apmajlüy nipilan apmitsojówan leaw apiüng Teat Dios, at apmarangüw xeyay ngo majneaj leaw nejiw andiümüw marangüw.

<sup>19</sup> Ajcüw ayaj ambajcüw mawüniw pälwüx mondüüb Mípoch Teat Dios. Arangüw leaw awüniwan tiül omalüw nejiw, cos ngo majjürüw Nangaj Espíritu ocueaj Teat Dios.

<sup>20</sup> Nganüy icona xecojow xechijquiaw, ijchan matang wüx imeajtsan aaga nangaj poch leaw indüjpiün. At itüniün ocueaj Nangaj Espíritu mambeol icon, matiib icueajiün leawa nej andiüm.

<sup>21</sup> Iyacan wüx imeajtsan aaga mimonajneaj Teat Dios. At icülfünan matüch aaga nüt wüx aliüc alinomb Miteatiiüts Jesucristo. Quiaj apmüüch icoots mapacaats meáwan nüt niüng ajlüy nej.

<sup>22</sup> Sitiül aljane nganaw ram ocueaj leaw indüjpiün, teamteáman imbeolan maxom omeaats wüx.

<sup>23</sup> Átan iwüniün tiül ngo majneaj leawa lajmiücüw, ixainguiün mawüw tiül biümb macueatiw arangüw nisoet. Nganüy alacas iteowan imeajtsan mejawan wüx isajan; naleaing ijawan nde tegüy manchom icon apixaw nejiw cos nejiw lamanchomüw wüx meáwan ngo majneaj arangüw, nde manot icon tiül merangan leaw nejiw teamarangüw.

*Andondoch andeac*

<sup>24</sup> Teat Dios nej nadam ajlüy, alndom majjür icon ngondom mejmiücan tiül nisoet. Nej apmajüiquich icon alinoic nüt nerixixay imeajtsan, at xeyay apmapac imeajtsan teombas nej.

<sup>25</sup> Nej anopüyan Dios nejaw meáwan cuajantanej leaw almajlüy. Nej newün icoots wüx asoetiiüts wüx tandeow Teat Jesucristo. Cos nej najneajay ajlüy, ajlüy wüx meáwan leaw almajlüy tiül cielo, átan leaw almajlüy wüx aaga iüt cam. Nej tanaámb alndom marang cuajantanej nganüy, oxep, at meáwan nüt. Amén.



## San Juan tüünd majaw cuane apmajlüy alinoic nüt APOCALIPSIS

*Teat Jesucristo tapiüing wüx nguineay apmajlüy*

<sup>1</sup> Tiül aaga nawiiig cam ajüiquich cuane apmajlüy alinoic nüt. Cos Teat Dios tüüch Jesucristo mapiüing masaj monrang minajiüt nej cuane laliüc majlüy. Ndoj Teat Cristo tüüch miün nop miängel nej masaj nop nerang minajiüt nej nenüt Juan, cuane apmajlüy.

<sup>2</sup> Aaga Juan tapiüing naleaing meáwan leawa tajaw, leawa tanguiay; tapiüing meáwan leawa tasaj nej Teat Dios, meáwan leaw Teat Jesucristo tüüch nej majaw.

<sup>3</sup> Najneajay xeyay apmapac omeaats jane apmateow manguiyaran nguineay lamapiüing Teat Dios tiül aaga nawiiig cam. At xeyay apmapac omeajtsüw sitiül wüx apmanguiyayiw aag agüy apmayacüw wüx omeajtsüw; cos laliüc miün nüt apmajlüy leaw lamapiüing tiül aaga nawiiig cam.

*Atepeay ayaíw ajlüy mondüüb Teat Cristo*

<sup>4</sup> Xique Juan sarang aaga nawiiig cam nüüch ayaíw noicnoic ajlüy monyar andeac Teat Cristo monlüy tiül iüt Asia. Satepeay icon, tamtámban ijlüyiüna. Teat Dios mambeol icon, müüch icon monajneaj. Nej almajlüy nganüy, nej najlüy tanomb, at aliüc miün alinomb. At atepeayiw icon ajcüw ayaíw espíritu najlüyiw niüing ajlüy aaga najneajay trono chetey wüx Teat Dios.

<sup>5</sup> Aton atepeay icon Teat Jesucristo, aaga nendeac naleaing. Nej ombas mapac alinomb imiün tiül mondeow; nej ajlüy wüx meáwan montangtang monajiüt wüx iüt. Nej andiüm icoots xeyay, lamawün asoetiüts wüx tajants icoots naag miquiej nej wüx tandeow wüx cruz.

<sup>6</sup> Nej lamayac icoots marangaats montangtang monajiüt; at lamayac icoots marangaats noic ajlüy miteaats marangaats minajiüt Teat Dios, miteat nej. Néjan quiaj meáwan nüt netam marangüch casa; néjan quiaj meáwan nüt netam majlüy wüx meáwan leaw almajlüy. Amén.

<sup>7</sup> ¡Jawan, Teat Cristo aliüc amb tiül oic! Quiaj apmajawüw nej meáwan nipilan wüx iüt. Masey ajcüw tatileaw tambiyaw nej apmajawüw nej aton. Quiaj meáwan cambaj wüx iüt apmajüüntsüw wüx apmajawüw, cos apleaam omeajtsüw nguineay tambiyaran. At quiaj apmajlüy. ¡Amén!

<sup>8</sup> Teat Dios apiüing: “Xique ombas xic, salnajlüy atnej letra A; at sajlüy úmbwüx atnej letra Z. Salnajlüy nganüy, salnajlüy nde tanomb, at xique saliüc alinomb. Xique aldom narang meáwan cuajantanej”, aw.

*Juan atnej taüm majaw najneajay ajlüy Teat Cristo*

<sup>9</sup> Xique, micojon Juan, xique aton samongoch atnej tenguiál memongochiün. Naleaing netam maiücaats wüx cuajantanej. Nóiquian teamacüliüts aaga nüt wüx aliüc Teat Cristo majlüy wüx meáwan iüt, meáwan cambaj. Xique sal tiül pres, ayacüw xic ningüy wüx noic nine iüt tindec nenüt Patmos, ajcan tandeacas Mipoch Teat Dios, at tandeacas leaw tarang Teat Jesucristo.

<sup>10</sup> Wüx noic nüt domingo, aaga Nangaj Espíritu ocueaj Teat Dios tüüch xic najaw atnej saüm. Quiaj tanguiayiw imiün wan xipech noic nanderac napac, atnej ajüünts trompet.

<sup>11</sup> Aag ayaj apiüing:

—Xique ombas xic salnajlüy atnej letra A; aton sajlüy úmbwüx atnej letra Z. Nganüy irang wüx nawiiig leawa tenguiál mejaw. Ndoj iich mamb niüing ajlüyiw ajcüw ayaíw ajlüy monyar andeac Teat Cristo leaw ajlüy tiül iüt Asia. Ajcüw ayaj noic ajlüy tiül cambaj Efeso, alinoic tiül Esmirna, alinoic tiül Pérgamo, alinoic tiül Tiatira, alinoic tiül Sardis, alinoic tiül Filadelfia, alinoic tiül Laodicea —aw.

<sup>12</sup> Condom quiaj wantsatos najaw aaga nendeac masaj xic quiaj. Wüx wantsatos, quiaj tajawas ayaíw candeleros narangüch oro.

<sup>13</sup> Alpinawan aag ayaíw candeleros quiaj, ajlüy nop atnej Teat Naxey, asooig noic apix nej najal, atüch nic oleaj. Aton alats mal miüünd nej nots cinta de oro.

<sup>14</sup> At omal nej, at miöndeats omal nej xowüy larraw atnej raan lan, tengwüy raan atnej nieve. At oniüig nej atnej oniü biümb.

<sup>15</sup> At oleaj nej xeyay nelitlit atnej bronce wüx landoj jayaw tiül biümb landoj asoetich. At andeac nej atnej atearriür napac ndec.

<sup>16</sup> At miác owix nej almasap ayaíw ocas. At imiün teombeay nej tenguiál aw nots espada nexing necamb necamb. Teombas nej atnej nüt xowüy larraj.

<sup>17</sup> Wüx tajawas, quiaj tajmiücas teoleaj nej atnej lasandeow. Quiaj tayac wüx ximbas miác owix nej, tasaj xic:

—Nde mbayamear. Xique mbas xic salnajlüy, at sajlüy úmbwüx.

<sup>18</sup> Xique salnapac, masey tandeowas nomb, nganüy salnapac meáwan nüt. Xique aldom napiüing ngow apmandeow jangantanej nipilan, at nguiane apmamb wüx apmandeow.

<sup>19</sup> Irang wüx nawiiig leawa landoj mejaw, leaw apmejaw nguineay ajlüy nganüy, at leaw aliüc miün apmajlüy alinoic nüt.

<sup>20</sup> Nganüy sanasaj ic wüx leaw nganaw majüic cuane, leaw apiüing wüx aaga ayaíw ocas tejaw tiül miác xiüw, aton aaga ayaíw

candeleros de oro tejaw: ajcūw ayaíw ocas quiaj apiüng wūx ajcūwa ángeles najlüyw wūx ajcūw ayaíw ajlüy monyar sandeac. Aton ajcūw ayaíw candeleros tejaw, ajcūw ayaj apiüngūw wūx ajcūw ayaíw ajlüy monyar sandeac, ajcūw iglesias xicueaj.

## 2

*Leawa tasaj ayaíw ajlüy iglesias: Ich manguaiyw monlüy tiül Efeso*

<sup>1</sup> Irang noic nawiig, iich aaga ángel ocueaj monyar andeac Teat Cristo monlüy tiül cambaj Efeso. Isaj masaj nejiw aaga nejiür ayaíw ocas tiül miác owix nej, leaw ajlüy pinawan ayaíw candeleros de oro, atcüy apiüng:

<sup>2</sup> “Xique sawaw nguineay teamerangan; sawaw irangan xeyay najiüt, ngo paxiüm. At sawaw ngome iüündan mejawan majlüy monrang ngo majneaj tiül icona. Sawaw icona tejawan wūx ajcūwa nipilan monpiüangan apostoles nejiw, ndoj tejawan ngo maleaing, tejawan monwaiich nejiw.

<sup>3</sup> At sawaw naleaing iüücan wūx cuajan-tanej, masey lamemongochiün xeyay wūx xenüt, ngo paxiüm icueajiün.

<sup>4</sup> Naleaing sanasaj icon nganüy wūx noic ngo majneaj sawaw wūx icona. Aag ayaj cos lango mendüüman xic atnej tendiüman xic nomb.

<sup>5</sup> Ich leaam imeajtsan nguineay terangan najneajay nomb wūx jayats mendüjpiün xic. Nganüy lango merangan najneaj atnej terangan nomb. Ich leaam imeajtsan mendüyiün wūx merangan atnej terangan nomb. Sitiül ngo mendüyiün wūx merangan atnej terangan nomb, quiaj sanamb niüng ijlüyiün najen. Sanawün micandeleriün niüng almajlüy nganüy, sitiül ngo leaam imeajtsan meyamban xic alinomb.

<sup>6</sup> Masey ngo majneaj terangan, pero altiül noic najneaj irangan, cos ngo mind mejawan aaga ngo majneaj teamarangūw qjcūwa nicolaitas, cos xique aton ngo mind najaw leaw teamarangūw.

<sup>7</sup> Leaw nendiüm manguaiy, ich manguaiy leaw apiüng Nangaj Espíritu, masaj noicnoic ajlüy monyar andeac Teat Cristo. Cos apiüng: Jane apmajntsop wūx meáwan moncüy majaw nej, ngo majmiüc tiül ngo majneaj, xique sanüüch müet aóng aaga xiül neech mapacaran, aaga najlüy tiül najneajay cambaj niüng acül Teat Dios”, aw.

*Aaga poch cam ich manguaiyw monlüy tiül Esmirna*

<sup>8</sup> Irang alinoic nawiig, iich aaga ángel ocueaj mondüüb Teat Cristo monlüy tiül cambaj Esmirna. Isaj masaj monyar andeac Teat Cristo, áaga mbas majlüy, at ajlüy úmbwūx, aaga tandeow ndoj tapac. Nej atcüy apiüng:

<sup>9</sup> “Xique sawaw nguineay teamerangan, nguineay imongochiün naél. Sawaw ngo mejiüran xeyay ningüy wūx iüt cam, pero naleaing Teat Dios ajaw atnej xeyay ijiüran, cos nej teamambeol icon mejiüran leaw netam. Sawaw nguineay andeacūw xeyay ngo majneaj wūx imbasan ajcūwa nipilan israel monpiüangan nejiw minipilan Teat Dios. Ngwüy, ngo maleaing cos minipilan nejiw minatangūw nimeech nasoic Satanás.

<sup>10</sup> Nde mermbolan wūx leaw apmemongochiün, cos minatangūw nimeech apmüüch majmel tiül manchiüc acas icona majaw wūx icon, majiüc sitiül apmeiücan wūx leawa teamendüjpiün. Apmemongochiün xeyay ngo majneaj tiül gajpowūw nüt. Nganüy sitiül tanaámb indüjpiün xic leaw indeowan, quiaj sanüüch icon noic corona tiül cielo niüng apmepacan mejlüyiün najneajay meáwan nüt.

<sup>11</sup> Leaw nendiüm manguaiy, ich manguaiy leaw apiüng Nangaj Espíritu masaj noicnoic ajlüy monyar andeac Teat Cristo. Cos atcüy apiüng: Leaw apmaiüc wūx, ngo majmiüc tiül ngo majneaj, langome apmandeow alinomb”, aw.

*Aaga poch cam ich manguaiyw monlüy tiül Pérgamo*

<sup>12</sup> Aton irang alinoic nawiig, iich aaga ángel ocueaj monyar andeac Teat Cristo monlüy tiül cambaj Pérgamo. Isaj masaj nejiw: Aaga nejiür espada nexing necamb necamb, atcüy apiüng:

<sup>13</sup> “Xique sawaw nguineay teamerangan. Sawaw icüülin niüng ajlüy mitrono minatangūw nimeech nenüt Satanás, majaw wūx minajiüt nej. Sawaw tealeámban temeyariün xenüt. At sawaw ngo mecueatiün xic masey wūx nüt tambiyaw teat Antipas tiül icona ajan ngo mimbol mandeac wūx xique tiül micambajan niüng acül Satanás.

<sup>14</sup> Pero nganüy netam napiüng wūx acas ngo majneaj leaw irangan: Cos ajlüy tiül icona acas nipilan andüjpiw leaw nomb taquiaach Balaam, aaga nequiaach Balac mayac wūx marangūw ngo majneaj nipilan israel. Balaam tawaiich nipilan israel, cos tasaj nejiw najneaj matsambūw mionij nimal nambiýeran marang nichech najmel teombas narangüch dios. At tayac nejiw wūx majiürūw palpálwūx najtaj, palpálwūx naxey.

<sup>15</sup> At ajlüy tiül icona acas nipilan andüjpiw leaw aquiajchiw ajcūwa nicolaitas. Aaga aquiajchiw quiaj sajcüy nanguaiy.

<sup>16</sup> Nganüy ich leaam imeajtsan nguineay teamerangan, iwüniün tiül icona. Sitiül ngwüy, najénan saleamb quiaj nembiyayon naquüjpiw naag xaespada naw tiül ximbeay.

<sup>17</sup> Leaw nendiüm manguaiy ich manguaiy leaw apiüng Nangaj Espiritu masaj noicnoic ajlüy monyar andeac Teat Cristo. Atcüy apiüng: Jane apmajtsop wüx, ngo majmiüc tiül ngo majneaj, xique sanüüch müet namix nine pan naxoraad, nasoic maná. At sanüüch anopnop noic nine raan piedra. Wüx aaga nine piedra quiaj tarangüch wüx noic jayats minüteran leaw nejingüind alinop ngo majaw", aw.

*Aag poch cam ich manguaiyiw monlüy tiül Tiatira*

<sup>18</sup> 'Aton irang alinoic nawüig, iich aaga ángel ocueaj monyar andeac Teat Cristo monlüy tiül cambaj Tiatira. Isaj masaj meáwan mondüüb Teat Cristo aaga poch cam leaw ayac Mical Teat Dios, aaga nejiür atnej oniw biümb onüüg nej, oleaj nej atnej nelitit bronze. Atcüy apiüng:

<sup>19</sup> "Xique sawaw nguineay teamerangan; sawaw nguineay erjiürayon lasta; sawaw nguineay iyariün andeac Teat Dios; sawaw nguineay ermbeolayon; sawaw nguineay iücan wüx imongochiün cuajantanej naél; at sawaw nganüy xeyay najneaj irangan, ngome atnej terangan nomb.

<sup>20</sup> Pero nganüy netam nasaj icon wüx acas ngo majneaj leawa temerangan. Aag ayaj cos teameiücan wüx nop najtaj leaw teamarango ngo majneaj atnej tarang aaga Jezabel nomb. Nej apiüng nop nej nendeac andeac Teat Dios, cos andiüm mawüywüy monrang xenajiüt majiürwüw palpáwüx montaj, palpáwüx monxey. Aton nej neyac nejiw wüx matsambüw mionij nimal nambiyeran marang nichech najmel teombas nangüch dioses.

<sup>21</sup> Xique lanafüc wüx arang a najtaj quiaj, nguineay alndom leaam omeaats macueat arang ngo majneaj, pero ngo mandüüm macueat.

<sup>22</sup> Nganüy sanüüch miün andeow aaga najtaj quiaj. At meáwan leaw lamarangüw ngo majneaj maquiüjpüw, sanüüch mamongochiw xeyay ngo majneaj, sitiül ngo leaam omeajtsüw cuane ngo majneaj teamarangüw, macueatiw meáwan aaga ngo majneaj quiaj.

<sup>23</sup> At sanambiy minipilan nej leaw arang aweaag ngo majneaj. Meáwan noicnoic ajlüy monyar andeac Teat Cristo apmajawwüw naleaing xique sawaw nguineay apiüngwüw, nguineay omeajtsüw nejiw. At apmajawwüw nguineay xique sanüüch inopnopon atnej terangan.

<sup>24</sup> Nganüy sandiüm nasaj icon monlüy tiül Tiatira, icona leaw ngo meyariün andeac aaga najtaj quiaj, icona leaw ngo mendüjpiün wüx merangan aaga nexotüy

leaw arang minatangüw nimeech nasoic Satanás; xique ngo nandiüm nayac icon wüx alinoic cuane apmerangan.

<sup>25</sup> Netam mesapan nandand wüx aaga najneaj leaw lamenguiayüün, iyacan wüx imeajtsan merangan aag ayaj leaw sapeay.

<sup>26</sup> Cos jane apmafüc wüx, ngo majmel tiül aaga ngo majneaj quiaj, leaw arang atnej sandiüm marang leaw sapeay; aag ayaj sanüüch majlüy wüx meáwan nipilan tiül meáwan iüt.

<sup>27</sup> Naag napac owix nej apmüüch marangüw leawa nej apiüng. Nganüy leaw ngo mandüüm, aag ayaj apndrom ombas atnej ndrom ombas nop xor najwüch naag nangoraad manchiüc. Cos Xeteat tüüch xic narang aag ayaj.

<sup>28</sup> At jane apmafüc wüx, xique sanüüch aaga ocas najtsop chiüjmbaw.

<sup>29</sup> Leawa nendiüm manguaiy, ich manguaiy leaw apiüng Nangaj Espiritu masaj meáwan noicnoic ajlüy monyar andeac Teat Cristo tiül meáwan cambaj", aw.

### 3

*Aaga poch cam ich manguaiyiw monlüy tiül Sardis*

<sup>1</sup> 'At irang alinoic nawüig, iich aaga ángel ocueaj monyar andeac Teat Cristo monlüy tiül cambaj Sardis: "Aaga nejiür ayaíw Espiritu ocueaj Teat Dios, at ayaíw ocas, atcüy apiüng: Xique sawaw nguineay temerangan, masey nipilan apiüngwüw icona almepacan, aag ayaj ngo maleaing cos sawaw atnej lerndeowan.

<sup>2</sup> jNganüy netam mepacan mejawan nguineay temerangan! Irangan con imalan imeajtsan mejawan sitiül alndom mepacan wüx leaw andiüm Teat Dios. Cos lanajaw ngo merangan palan, laliüc mecueatiün nómban.

<sup>3</sup> Ich leaam imeajtsan wüx leaw tenguiayüün, at wüx leaw tesoiqüiün. Ich macül wüx imeajtsan merangan najneaj. Cos sitiül ngo mepacan wüx merangan najneaj, quiaj sanamb wüx nüt ngo meteotsan, atnej wüx ajmel nop need.

<sup>4</sup> Sawaw tiül micambajan aliün majlüy acas nipilan tiül monyar andeac Teat Cristo ngo marangüw aaga ngo majneaj quiaj. Nejiw apmaquiüjpüw xic, apmasoiqüiw apixaw nejiw rajnüy cos ngo majiürwüw nicuajind nisoet.

<sup>5</sup> Leaw apmafüc wüx, ngo majmel tiül marang ngo majneaj, aag ayaj apmamb niüng sajlüy, teamasoog rajnüy apix nej. Xique lango nandarrich minüt nej tiül aaga nawüig niüng ajlüy minüteran jane lamüjndiw mapacüw meáwan nüt naquiüjpüw. At niüng ajlüy Xeteat maquiüüb miángeloes nej, sanapiüng xenipilan nejiw.

<sup>6</sup> Leawa nendiüm manguaiy, ich manguaiy leaw apiüng Nangaj Espiritu masaj meáwan noicnoic ajlüy monyar andeac Teat Cristo tiül meáwan cambaj”, aw.

*Aag poch cam ich manguaiyiw monlüy tiül Filadelfia*

<sup>7</sup> Irang alinoic nawii, iich aaga ángel ocueaj monyar andeac Teat Cristo monlüy tiül cambaj Filadelfia. Isaj: “Aag agüy apiüng aaga Nangaj, aaga Nendeac Naleaing, leawa nejiür aaga llave ocueaj Rey David, alndom maleaaig majmel jangantanej niüng ajlüy nej; at wüx apmapal nejingüind ngo ndom maleaaig matüch niüng ajlüy nej, cos nej atcüy apiüng:

<sup>8</sup> Xique sawaw nguineay temerangan. Nganüy lanayac icon mendeacan xepoch, nejingüind ngondom mapal icon. Masey ngome xeyay mepacan wüx xenajiüt, naleaing ngo mepiüangan ngo metam xepoch, aton ngo mecueatiün xic nómban.

<sup>9</sup> Nganüy ijawan sanasaj icon wüx ajcüwa monwaiich monpiüng nipilan israel nejiw. Cos nejiw minipilan minatang nimeech nasoic Satanás. Nejiw sanüjchiw miünüw niüng ijlüyüin maquiejliw micosüw timbasan, majawüw icona naleaing xenipilan, lanajiür icon lasta.

<sup>10</sup> Naleaing terangan atnej tasajas icon, teiücan wüx meáwan naél leaw temongochiün; áag xique aton ngo nacueat icon. Sanambeol icon, sanawün icon wüx a nüt apmajlüy xeyay naél tiül meáwan iüt, wüx apmatajcüchiw porbar meáwan nipilan wüx iüt.

<sup>11</sup> Xique saliüc najénan, tanaám isapan nandand wüx leaw ijawan naleaing; quiaj nejingüind ngondom manood icueajiün aaga corona leaw apmeajndiün.

<sup>12</sup> Leaw apmafüc wüx, ngo majmiüc tiül aaga naél quiaj, nej sanüüch majlüy natang tiül cielo niüng ajlüy Teat Dios; lango maw quiaj. Sanayac wüx ombas nej minüt Xeteat Dios, at minüt micambaj Xeteat Dios; aag ayaj jayats Jerusalén, áag aliüc miün imiün cielo niüng ajlüy Teat Dios. Wüx ombas nej aton apmajüic jayats xenüt.

<sup>13</sup> Leaw nendiüm manguaiy, ich manguaiy leaw apiüng Nangaj Espiritu masaj meáwan noicnoic ajlüy monyar andeac Teat Cristo tiül meáwan cambaj”, aw.

*Aaga poch cam ich manguaiyiw monlüy tiül Laodicea*

<sup>14</sup> 'Aton irang alinoic nawii, iich aaga ángel ocueaj monyar andeac Teat Cristo monlüy tiül cambaj Laodicea. Isaj: “Aaga nasoic Amén, aaga nendeac meáwan naleaing, aaga najlüy wüx meáwan leawa tarang Teat Dios, atcüy apiüng:

<sup>15</sup> Xique sawaw nguineay teamerangan, cos sawaw icona ngo mecueatiün xic nómban,

at ngo mapac imeajtsan mendüjpiün xic. ¡Malüy mecueatiün nómban tengwüy mepacan wüx merangan leawa sapiüng!

<sup>16</sup> Nganüy cos ntsan miün ijlüyüin, ngome naquind tengwüy ngome nerraar, sanajtiür nawün icon maw tiül ximbeay, cos ngo mind najaw leaw irangan.

<sup>17</sup> Masey ipiüangan icona naleaing temendüjpiün Teat Dios, imongochiün najneaj, irangan meáwan palan, pero ngo meyajcan icona ngo mertaman, ngo meyajcan ngo mejiüran nicuajind, ijlüyüin atnej nop nesomb, atnej miotáagan aton.

<sup>18</sup> Nganüy sanasaj icon, najneaj meyariün sandeac naag imeajtsan; cos aag ayaj atnej mengalan oro jayam tiül biümb, para mejiüran meáwan leaw netam. Cos sitiül iyariün sandeac, quiaj ngome apmajlüy cuane wüx mexingüian, cos apmejiüran ipixan rajnüy. At apmejiüran misüüg oniüügaran para alndom mexoman mejawan.

<sup>19</sup> Xique mbójan napaj ocueaj, at salic jane sajiür lasta. Nganüy ich leam imeajtsan nguineay teamerangan, cos netam mecueatiün merangan leaw ngo majneaj.

<sup>20</sup> Xique salemben teombeay nden, teanapaj natepeay icon. Sitiül aljane apmanguaiy sandeac, apmaleaaig mbeay nden, quiaj sanajmel tiül nden naquiiüb, ndoj sanüet anaag.

<sup>21</sup> Leawa apmafüc wüx, ngome apmajmiüc tiül ngo majneaj, xique sanüüch chetem nóiquian maquiiüb xic niüng chetejos wüx xetrono najaw wüx meáwan leaw almajlüy. Aag ayaj cos tajntsopiüs wüx meáwan leaw tajcüyiw majawüw xic. Nganüy chetejos naquiiüb Xeteat wüx najneajay mitrono nej.

<sup>22</sup> Leaw nendiüm manguaiy, ich manguaiy leaw apiüng Nangaj Espiritu masaj meáwan noicnoic ajlüy monyar andeac Teat Cristo tiül meáwan cambaj”—aw.

## 4

*Anderac najneaj wüx Teat Dios tiül cielo*

<sup>1</sup> Landoj aag ayaj, quiaj tajawas tiül cielo noic ombeay nden lejquian. Aaga ombas nendeac tanguaiyüis andeac, tandeac najneajay atnej ajiünts trompet, atcüy tasaj xic:

—Mac ningüy cawüx niüng sajlüy. Sanüüch ic mejaw nguineay apmajlüy alinoic nüt —aw.

<sup>2</sup> Ndoj quiaj taquiiüb xic mamb Nangaj Espiritu andüy tiül cielo. Quiaj tajawas noic najneajay trono altiül cielo; Teat Dios alchetem wüx.

<sup>3</sup> Aaga alchetem quiaj xeyay najneajay ajlüy, atnej ajlüy noic najneaj nacants piedra xeyay nelitlit nenüt jaspe, tengwüy

## 5

alinoic najneajay piedra nenüt cornalina. Aton ayey nej tiüt aaga najneajay trono quiaj, atnej ndequiamb poj ajlüy nateaic, atnej piedra esmeralda.

<sup>4</sup> Aaga najneajay trono niüng alchetem Teat Dios, ayey nej tiüt nimiow apiquiw (24) tronos xeyay najneajay. Alchetemoj wüx nimiow apiquiw monxey montangtang ombas monajiüt, xowüy larraw apixaw nej-jiw; alwüx omalüw nejijw noicnoic corona narangüch oro.

<sup>5</sup> Imiün wüx aaga najneajay trono chetejeran wüx quiaj, niüng alchetem Teat Dios, tajawas teajlipip tiüt; at tanguiayüis teatearriür tiüt xeyay napac, tajüic atnej aljane teandeac. Niüng ajlüy aaga najneajay trono quiaj, teandaab ayaíw najquiol. Aag ayaj apiüng wüx ayaíw Espiritu ocueaj Teat Dios.

<sup>6</sup> Niüng ajlüy aaga najneajay trono leaw alchetem wüx Teat Dios, alquiaj aton atnej ndec neririj atnej vidrio.

Aaga najneajay trono quiaj, ayey nej tiüt aton apiquiw atnej nimal almapacüw, ajjiürüw oniücüw nejijw xeyay, amb teombas, aton amb teopech.

<sup>7</sup> Aaga ombas nej nimal quiaj ajüic atnej nop león; nganüy aaga amb ijpüw nimal ajüic atnej nop toro; at amb arojpw nimal ajjiür teombas nej atnej teombas nop naxey; at amb apiquiw ajüic atnej noic águila teajlül.

<sup>8</sup> Ajcüw apiquiw atnej nimal quiaj almapacüw, nopnopo ajjiürüw anaíw miolümbiw nejijw, chipchipiow ombasüw nejijw ajjiürüw xeyay oniücüw nejijw amb teombas miolümbiw nejijw, at amb teopech. Neijw ngo ndijchiümoj, nüt ongwiiüts teamapiüngüw: Nangaj ic Teat Dios, nangaj ic Teat Dios, nangaj ic Teat Dios.

Teat, ique cuajantanej alndom merang.

Ique almejlüy tanomb, ique almejlüy nganüy, ique iliüc alinomb.

<sup>9</sup> Neijw a nimal quiaj andeacüw najneajay wüx Teat Dios, aag almapac meáwan nüt. Üjchiw gracias aaga alchetem wüx aaga najneajay trono quiaj.

<sup>10</sup> Quiaj ajcüwa nimiow apiquiw (24) montangtang ombas monajiüt aquiejliw micosüw nejijw teombas aaga cheten quiaj, marangüw casa aag almapac meáwan nüt. Quiaj awüniw micoronajüw nejijw mayacüw niüng ajlüy aag alchetem quiaj, teamapiüngüw:

<sup>11</sup> Teat Dios, ique Xeteatiün Dios.

Ique xeyay netam ijlüy, xeyay netam merangüch casa.

Ique ijlüy wüx meáwan leaw almajlüy, terang meáwan cuajantanej.

Cos ique tendiüm majlüy, pares terang meáwan leaw almajlüy.

*Apiüng wüx noic nawiiig, at wüx Quicheech Sap*

<sup>1</sup> Quiaj tajawas aaga alchetem tiül najneajay trono, almandeand noic nawiiig tiül miác owix nej. Aaga nawiiig quiaj nembiiül, alwüx poch amb teombas amb teopech, naquiand naag ayaíw sello.

<sup>2</sup> Quiaj tajawas nop ángel xowüy lapac, tandeac napac, tatün manguiay:

—Jane nembeata, alndom macheed ajcüwa sello quiaja, mateaaig a nawiiigue? —aw.

<sup>3</sup> Nejingüind ngo majlüy macheed a sello; ngo majlüy aljane alndom majaw cuane alwüx aaga nawiiig quiaj, ngome tiül cielo, ngome wüx iüt, ngome tiüt tiül iüt.

<sup>4</sup> Xique quiaj tajiüntsas xeyay cos ngo maxoram nejingüind nembeat alndom mateaaig a nawiiig majaw cuane alndom.

<sup>5</sup> Quiaj nop tiül ajcüwa monxey nangtang ombas tasaj xic:

—Nde mejünts, jogüy nop naxey naw tiül Judá, naw tiül acualaats aaga Rey David. Aag ayaj nasoiç nop león, cos nej lajntop wüx meáwan moncüy majaw nej. Nej alndom macheed mawün aaga ayaíw sello quiaj, mateaaig a nawiiig —aw.

<sup>6</sup> Quiaj tajawas niüng ajlüy aaga najneajay trono, alembem nop Quicheech Sap amb pinawan ajcüw apiquiw nimal, at pinawan ajcüw montangtang ombas quiaj. Aaga Quicheech Sap quiaj tajüic atnej landoj ambiyeran. Nej almajiür ayaíw miweac nej, aton ayaíw oniüg nej. Ajcüw ayaíw oniüg nej quiaj, apiüng wüx ayaíw espíritu ocueaj Teat Dios leaw Nej üüch mamb meáwan wüx iüt.

<sup>7</sup> Quiaj tamb aaga atnej Sap quiaj mayar a nawiiig tiül miác owix Teat Dios niüng alchetem.

<sup>8</sup> Wüx tayar aaga nawiiig quiaj, ajcüw apiquiw nimal, at ajcüwa nimiow apiquiw (24) montangtang ombas taquiejliw micosüw nejijw teombas aaga Quicheech Sap quiaj. Alteowixaw nejijw noicnoic arpa, aton alteowixaw nejijw noicnoic nitomb palüy oro, chipchipiow pom. Aaga pom quiaj apiüng wüx leaw atüniw mondüüb Teat Dios.

<sup>9</sup> Quiaj tatajcw cantar noic jayats canto, tapiüngüw:

Ique xeyay netam ijlüy, pares alndom meyar aaga nawiiig quiaj, mewün misello nej, cos ique tembiyeran, tendeow.

Wüx miquiej tewün xicon wüx sasoetiün ndom najlüyiün nóiquian naquiüjpan Teat Dios.

Xicona monaw meáwan noicnoic ajlüy nipilan; monaw tiül nipilan leaw

andeacüw palpálwüx ombeayaran; meáwan tiül meáwan cambaj, meáwan nación wüx iüt.

<sup>10</sup> Ique teach xicon najlüyüin noic ajlüy miteaats oceaej Teat Dios; sanarangan montangtang monajiüt wüx iüt, awüw.

<sup>11</sup> Quiaj tajawas xeyay ángeles, tanguiayüus andeacüw. Nejiw ayeyiw tiüt aaga najneajay trono niüng ajlüyiw ajcüw apiquiw nimal almapactüw; niüng ajlüyiw ajcüwa montangtang ombas aton. Ajcüwa ángeles ajlüyiw xeyayiw, ngondom mateoraw.

<sup>12</sup> Teandeacüw napac, teamapiüngüw: Aaga Quicheech Sap tambiyaran xeyay netam,

nej netam majlüy wüx meáwan leaw almajlüy, alndom mayar meáwan nem-beatnbeat,

nej nendüy wüx meáwan leaw almajlüy; néjan alndom ombas marang cuajantanej,

netam marangüch casa nguiajantanej, masoic najneajay ajlüy, awüw.

<sup>13</sup> Aton tanguiayüus andeacüw meáwan leaw aliw tiül cielo, at leaw aliw wüx iüt, at leaw aliw tiüt iüt, at leaw aliw tiül ndec. Meáwan leaw almajlüy tanguiayüus andeacüw, tapiüngüw:

Aaga alchetem wüx aaga najneajay trono quiaj, at aaga Quicheech Sap quiaj, netam masoiquiw najneajay ajlüyiw.

Netam marangüchiw casa, manderac najneajay wüx nejiw,

cos meáwan nüt ndoj ombasüw marangüw cuajantanej.

<sup>14</sup> Condom ajcüw apiquiw nimal tapiüngüw:

—¡Amen, aag ayaj naleaing! —awüw.

At ajcüwa nimiow apiquiw (24) montangtang ombas taquiejliw micosüw nejiw tiüt marangüw casa Teat Dios, aton marangüw casa aaga Quicheech Sap quiaj, ajcüw almapacüw meáwan nüt.

## 6

### *Ayaíw sello*

<sup>1</sup> Condom quiaj tajawas wüx aaga Quicheech Sap tacheed noic sello naw tiül aaga ayaíw quiaj. Quiaj tanguiayüus nop naw tiül ajcüw apiquiw nimal quiaj tendec napac atnej atearriür, tapiüng:

—¡Mac, ijaw! —aw.

<sup>2</sup> Quiaj tajawas nop raan cawüy. Aaga nejtep cawüy quiaj alteowix nej mimüm jeng. Condom tayacüch wüx omal nej noic corona, tamb tiül montsoj, tajntsop wüx meáwan.

<sup>3</sup> Condom wüx aaga Quicheech Sap quiaj tacheed amb ijquiw sello, quiaj

tanguiayüus andeac amb ijpw aaga nimal naw tiül ajcüw apiquiw quiaj, tapiüng:

—¡Mac, ijaw! —aw.

<sup>4</sup> Condom quiaj taw alinop cawüy xowüy lacants. Aaga nejtep cawüy tüünd ndom müch majlüy moncüy ningüy wüx iüt, at müch membiyajej nipilan. Tüünd nots nadam espada aton.

<sup>5</sup> Wüx aaga Quicheech Sap tacheed amb arej sello, quiaj tanguiayüus andeac amb arojpw nimal, tapiüng:

—¡Mac, ijaw! —aw.

Quiaj tajawas alinop cawüy nambeor. Aaga nejtep cawüy quiaj alteowix nej noic nipeaxay.

<sup>6</sup> Quiaj tanguiayüus andeac nop nendeac pinawan ajcüw apiquiw nimal quiaj, tapiüng:

—Noic kilo trigo ambeat noic denario, aton arej kilo cebada ambeat noic denario. Nganüy nde mendrooch ombas aaga aceite, at nde mendrooch ombas aaga vin —aw.

<sup>7</sup> Wüx aaga Quicheech Sap tacheed amb apiquiw sello, quiaj tanguiayüus andeac amb apiquiw nimal, tapiüng:

—¡Mac, ijaw! —aw.

<sup>8</sup> Quiaj tajawas nop cawüy lastien. Aaga nejtep cawüy quiaj minüt nej Nandeow. Aton almandüüb nej alinop nenüt Hades. Nejiw tündiw mambiyaw pinawan pinawan aaga nipilan wüx iüt; müjchiw membiyajej naag espada ajcüwa nipilan quiaj, at majlüy lop, aton majlüy xeyay monandeow, tengwüy majlüy napat nimal mambiy nipilan.

<sup>9</sup> Wüx aaga Quicheech Sap tacheed amb acoquiaw sello, quiaj tajawas alteoleaj artül miespíritu nipilan, aag tambiyaranüw wüx andeacüw Mipoch Teat Dios masajüw nipilan.

<sup>10</sup> Nejiw tendecüw napac, tapiüngüw:

—Teat Dios, ique nangaj, ique mbójan merang leaw lamepiüng apmerang. Nganüy ¿ngow apmejaw wüx asoetiw nipilan wüx iüta? ¿Ngow apmepalüch ombas wüx ombasüw monbiy xicona? —awüw.

<sup>11</sup> Quiaj tündiw apixaw nejiw raan, tasoiquiw:

—Iüündanan alquiriw, cos nganaw palameron mequiüjpan monrang minajiüt Teat Cristo leaw netam mambiyaranüw atnej icona tembiyeranan —ajowiw.

<sup>12</sup> Camüm tajawas aaga Quicheech Sap tacheed amb anaíw sello. Quiaj tajlang noic nadam ateam, nüt pojniüt nómban atnej nambeor jael. At a caaw tacants atnej quiej.

<sup>13</sup> At ajcüwa ocas najlüy tiül cielo tajmücüw wüx iüt atnej ajtean naliw aóng toc wüx ataad nej tiüt napac iünd.

<sup>14</sup> Quiaj aaga cielo niüng ajlüy nüt, caaw, ocas, ndrot atnej mambiülaran noic nawiig.

Aton tumb mambiüljchiw meáwan tiüc; at leaw iüt nacül indecambiüljchiw.

<sup>15</sup> Quiaj tecuiürrüw mexotayej tiül warraj tiüc, at teombas piedra ajcüwa montangtang monajiüt wüx iüt, ajcüwa montangtang ombas, ajcüwa monjiür xeyay, ajcüwa minatangüw soldado, ajcüwa ngo mimboloj tiül montsoj, ajcüwa monrang najon mos, at ajcüw leaw ngome aag arang najon mos;

<sup>16</sup> tepajüw masajüw a tiüc, at nadamdam piedra:

—Ichar xicon tiüt, ixot xicon ngana majaw xicon Teat Dios, áag cheten tiül najneajay trono, ngana marang ngo majneaj wüx ximbasan aaga Quicheech Sap leaw ajcüw majaw xicon;

<sup>17</sup> cos lamatüch aaga netam nüt wüx ajcüw majaw icoots Teat Dios. ¿Jane alndom maüic wüx ayaj? —awüw.

## 7

*Lajmeliw sello monaw tiül nipilan israel*

<sup>1</sup> Wüx landoj meáwan aag ayaj, quiaj tajawas apiquiw ángel alembemoj wüx piquiw oxing iüt. Nejiw tengual mapalüw aaga piquiw nepepep wüx iüt, cos atquiaj ngondom mapac wüx iüt, at ngome tiül ndec, at ngome wüx alngün xiül.

<sup>2</sup> Quiaj tajawas alinop ángel tajtsoj imiün nonüt. Nej almajoy misello Teat Dios almapac. Quiaj tendeac napac masaj ajcüw apiquiw ángeles leaw lamayariw poch mandrojchiw ombas leaw najlüy wüx iüt, leaw najlüy tiül ndec. Tasaj nejiw:

<sup>3</sup> —Nde mendrojchiün ombas leaw najlüy wüx iüt, leaw najlüy tiül ndec, at nde meloxiün tiüt xiül; icüliün leaw sayacan sello teombas omalüw ajcüw monrang minajiüt Miteatiüts Dios —aj nejiw.

<sup>4</sup> Condom quiaj tanguaiyüs nguitow ajlüyiw ajcüwa leaw lajmeliw sello. Nejiw ajlüyiw coic miow ic miow apiquiw mil (144,000) naw tiül meáwan micual micual Israel.

<sup>5</sup> Naw tiül micual acualaats Judá tajmeliw sello agajpiüp mil (12,000) nipilan. Naw tiül micual acualaats Rubén tajmeliw sello agajpiüp mil. Naw tiül micual acualaats Gad tajmeliw sello agajpiüp mil.

<sup>6</sup> Naw tiül micual acualaats Aser tajmeliw sello agajpiüp mil. Naw tiül micual acualaats Neftalí tajmeliw sello agajpiüp mil. Naw tiül micual acualaats Manasés tajmeliw sello agajpiüp mil.

<sup>7</sup> Naw tiül micual acualaats Simeón tajmeliw sello agajpiüp mil. Naw tiül micual acualaats Levi tajmeliw sello agajpiüp mil. Naw tiül micual acualaats Isacar tajmeliw sello agajpiüp mil.

<sup>8</sup> Naw tiül micual acualaats Zabulón tajmeliw sello agajpiüp mil. Naw tiül micual

acualaats José tajmeliw sello agajpiüp mil. Naw tiül micual acualaats Benjamín tajmeliw sello agajpiüp mil.

*Noic ajlüy xeyay nipilan palüyan raan asojquiw*

<sup>9</sup> Wüx landoj aag ayaj, quiaj tajawas xeyay nipilan, nejingund ngondom mambich mateow. Cos nejiw nawúwan tiül meáwan nación wüx iüt; nawúwan tiül meáwan noicnoic ajlüy nipilan; nawúwan tiül noic noic cambaj niüng tajlüyiw. At nawúwan tiül meáwan nipilan leaw andeacüw palpálwüx ombeayaran. Nejiw alembemoj quiaj niüng ajlüy aaga najneajay trono, niüng ajlüy aaga Quicheech Sap. Nejiw almasojquiw apixaw nejiw palüyan raan, alteowixaw nejiw op nit.

<sup>10</sup> Nejiw tendeacüw napac, tapiüngüw: Miteatiüts Dios cheten tiül aaga najneajay trono quiaj,

at aaga Quicheech Sap quiaj; nejiw lamawüniw icoots wüx asoetiüts.

<sup>11</sup> Condom meáwan ángeles leaw alembemoj ayeyiw tiüt najneajay trono chetej wüx Teat Dios, aton ayeyiw tiüt ajcüwa montangtang ombas, at ayeyiw tiüt ajcüw apiquiw nimal almapacüw, taquiejliw tiüt micosüw nejiw, nómban mejquiejow tiüt marangüw casa Teat Dios.

<sup>12</sup> Nejiw tapiüngüw:

¡Amén! Teat Dios najneajay arang, nej netam marangüch casa, netam masoic nej nendüy wüx meáwan leaw almajlüy.

Nej netam müjchiiüts gracias; netam marangüch casa cos nej alndom marang cuajantanej leaw andiüm.

Atquiaj netam majlüy meáwan nüt. Amén.

<sup>13</sup> Quiaj nop natang ombas tattün manguiay xic:

—¿Jane nejiwe monsooig raan quiaja, nguiane nawüwa? —aw.

<sup>14</sup> Quiaj xique tasajas:

—Teat, ique ijaw nguiane nawüw —saj.

Quiaj tasaj xic:

—Ajcüw ayaj leaw laawüw tiül xeyay ngo majneaj wüx iüt. Nganüy nejiw ajlüyiw najneaj, cos tajantsüw apixaw nejiw rajnüy tiül miquiej aaga Quicheech Sap.

<sup>15</sup> Por aag ayaj ajlüyiw teombas aaga trono niüng chetej Teat Dios. Nüt ongwiiüts nejiw teamarangüw minajiüt nej tiül aaga nangaj templo tiül cielo. Aaga alchetem tiül aaga najneajay trono quiaj, nej apmajiür nejiw cos apmaquiüw nejiw.

<sup>16</sup> Nejiw langome apmaiündüw lop, at ngome apmaiündüw yow. Nüt langome apmambel nejiw, at langome apmayajcüw nerraar.

<sup>17</sup> Aaga Quicheech Sap najlüy niüng ajlüy najneajay chetej wüx Teat Dios apmajiür nejiw, apmayac nejiw niüng ajlüy xeyay oniiüg yow leawa neech mapacaran. Teat Dios apmajend miyow oniüjcw nejiw —aj xic.

## 8

### *Amb ayaíw sello*

<sup>1</sup> Wüx aaga Quicheech Sap tacheed amb ayaíw sello, tanaámb ndijchiow tiül cielo maseyme pinawan ores.

<sup>2</sup> Quiaj tajawas ayaíw ángeles alembemoj niüng ajlüy Teat Dios. Nejiw tündiw ayaíw trompet.

<sup>3</sup> Ndoj quiaj tajngot alinop ángel, lembet amb teombas artül, andeaand noic nitomb narangüch oro. Quiaj tündiw xeyay pom mambel wüx aaga artül narangüch oro najlüy niüng ajlüy mitrono Teat Dios, wüxan atajcw orar meáwan mondüüb Teat Cristo.

<sup>4</sup> Minasop aaga pom quiaj, tajndoc niüng ajlüy Teat Dios imiün tiül owix aaga ángel quiaj, nóiquian maquiüüb leaw atajcw orar ajcwäwa mondüüb Teat Cristo quiaj.

<sup>5</sup> Condom aaga ángel quiaj, tayar noic nitomb machipich olüic biümb naw wüx artül. Condom tawich andüy wüx iüt. Quiaj teatearriür, aneerror xeyay, xeyay tajlipip tiüt, at xeyay tajlanglang ateam.

### *Ajcwäwa trompeta*

<sup>6</sup> Condom ajcwäwa ayaíw ángeles quiaj, monjiür ayaíw trompet, laliüc meindeaw.

<sup>7</sup> Ndoj aaga ombas nej ángel taínd trompet, quiaj tajoet hielo wüx iüt. At tajmiüc biümb aqiiüüb tiül quiej. Quiaj tandaab noic naw tiül arej ajlüy a iüt maquiüüb noic arej ajlüy a xiül. Tandaab meáwan nateaic soex aton.

<sup>8</sup> Wüx taínd trompet amb ijpüw ángel, quiaj tajlos tiül nadam ndec atnej ajlüy noic nadam tiüc teandaab. Quiaj iwear a nadam ndec tangowüch marang quiej.

<sup>9</sup> Quiaj tandeowüw iwear (1/3) nimal najlüy tiül ndec. At iwear barco najlüy tiül ndec ndrot ombasüw.

<sup>10</sup> Wüx taínd trompet amb arojpw ángel, quiaj tajmiüc imiün tiül cielo noic nadam ocas tengual andaab atnej andaab nots najquiol. Aag ayaj tajmiüc tiül iwear meáwan lam, tiül iwear oniiüg yow aton.

<sup>11</sup> Minüt aaga ocas quiaj, Ajenjo. Condom iwear a yow tangaag. Quiaj xeyay nipilan tandeowüw, cos tanganeowüw aaga nangaag yow quiaj.

<sup>12</sup> Wüx taínd trompet amb ipeic ángel, quiaj ndrot ombas iwear ajlüy a nüt, iwear ajlüy a caaw, iwear ajlüy a ocas; ajcwäw ayaj pojniüt iwear. Quiaj ngo ram wüx iüt iwear, at nüt, at ongwüüs.

<sup>13</sup> Quiaj tajawas nop ángel tengual ajlüel tiül cielo atnej águila. Aag ayaj tendec napa, tapiüng:

—Jaa, pobre nejiw moncül wüx iüt wüx apmajiünts alacas trompet, áag apmaindeaw alarojpw ángel! —aw.

## 9

<sup>1</sup> Condom wüx taínd trompet amb acoquiaw ángel, quiaj tajawas atnej noic ocas lajmiüc wüx iüt imiün tiül cielo. Nej tündiw nots llave maleaaig aaga nequiliüt lol najlüy tiüt, ngo majiür ümb.

<sup>2</sup> Quiaj taleaaig aaga nequiliüt lol najlüy tiüt; taw nasop imiün tiül aaga lol quiaj, atnej minasop xeyay biümb. Aaga xeyay nasop naw tiül a lol quiaj taponiich a nüt.

<sup>3</sup> Naw tiül aaga nasop quiaj tawüw xeyay nchiül andüy wüx iüt. Ajcwäw ayaj tündiw ndom mendalüw atnej andal napüp najlüy wüx iüt.

<sup>4</sup> Tasoiquiw ngondom müetiw soex wüx iüt, at cuajantanej nateaic, at owil xiül, aag miün nipilan alndom mandalüw leawa ngo majiür misello Teat Dios teombas omal nej.

<sup>5</sup> Nejiw tündiw ndom mandalüw nipilan áagan acoquiaw caaw. Naleaing ngondom mambiyaw nipilan nómban, áaga andalüwan. Cos wüx andalüw, quiaj nipilan apmayajcw xeyay necoy atnej wüx andal nejiw napüp.

<sup>6</sup> Wüx aaga nüt quiaj, nipilan apmandiümüw mandeowüw nómban, pero naleaing ngondom mandeowüw.

<sup>7</sup> Ajcwäwa nchiül quiaj, ajüic at nejiw cawüy apmambüw tiül montsoj. Alwüx omalüw nejiw ajüic atnej corona narangüch oro; nganüy teombasüw nejiw atnej teombas nipilan.

<sup>8</sup> Aton ajiürüw miondeats omalüw atnej miondeats omal montaj; olüiquiw nejiw atnej olüic león.

<sup>9</sup> Opangüw nejiw lil atnej manchiüc; ajiünts miölümbiw nejiw atnej atearriür oleaj xeyay carret anot nej cawüy wüx acuiür tiül montsoj.

<sup>10</sup> Ajiürüw miwiülüw nejiw atnej miwiül napüp, andalüw atnej andal napüp. Ajcwäw ayaj tündiw ndom mandalüw nipilan naag miwiülüw nejiw meáwan acoquiaw caaw.

<sup>11</sup> Ajiürüw minatängüw nejiw aton, aaga ángel najlüy wüx aaga nequiliüt lol najlüy tiüt. Minüt nej wüx hebreo Abadón, at wüx griego Apolión.

<sup>12</sup> Nganüy lamong aaga mbas xeyay ngo majneaj tamongochiw nipilan wüx iüt; aliün majlüy alijquiw xeyay ngo majneaj apmamongochiw nipilan.

<sup>13</sup> Condom wüx taínd trompet amb anaíw ángel, quiaj tanguiayüis noic nanderac imiün tiül ajcwäw apiquiw miweac aaga artül narangüch oro najlüy teombas Teat Dios.

<sup>14</sup> Aaga nanderac quiaj tasaj amb anaíw ángel nejür trompet:



—Ichejtiün ajcüw apiquiw ángeles naoelaranüw niüng ajlüy nadam lam Eufrates —aj.

<sup>15</sup> Quiaj tacheedaranüw ajcüw apiquiw ngo majneaj ángeles. Nejiw ayaj teamacülüw ngünantanej ores, ngünantanej nüt, ngünantanej caaw, ngünantanej neat mambiyaw iwear a nipilan leaw almajlüy wüx iüt.

<sup>16</sup> Xique tanguyaiüüs nguitow ajlüyiw ajcüwa soldados montep cawüy, ajlüyiw ijquiwaw acoiw miow millones (200,000,000).

<sup>17</sup> Condom tünditüs najaw atnej saüm xeyay cawüy alwüx montep. Ajcüwa montep cawüy quiaj asojquiw mal miüündüw nejiw manchiüc nacants, azul, maril. Aton omalüw cawüy atnej omal león; aw teombeayiw nejiw biümb, nasop, azufre.

<sup>18</sup> Ndoj quiaj tandeowüw iwear (1/3) a nipilan wüx iüt; ambiy nejiw ajcüw arej ngo majneaj naw teombeayiw cawüy; aag ayaj biümb, nasop, azufre.

<sup>19</sup> Ajcüwa cawüy quiaj naag ombeayiw nejiw, at naag miwiülüw nejiw alndom marangüw ngo majneaj. Miwiülüw nejiw atnej omal ndiüc, alndom matsambüw nipi-lan.

<sup>20</sup> Meáwan nipilan leaw ngo mandeowüw tiül aaga xeyay ngo majneaj quiaj, ngo leam omeajtsüw macueatiw arangüw casa leaw owixaw nejiw tarangüw. Ngo macueatiw marangüw casa nimeech, tengwüy aaga dios narangüch oro, plata, bronce, piedra, xiül. Ajcüwa narangüch dios quiaj, ngondom majawüw, ngondom manguaiyiw, ngondom majüyiw.

<sup>21</sup> At aton ajcüwa nipilan quiaj, ngo leam omeajtsüw macueatiw ambiyaw nipilan, ngo leam omeajtsüw macueatiw arangüw nesomüy, ngo macueatiw ajtürüw pálwüx najtaj, pálwüx naxey; at aton ngo macueatiw anejtiw.

**10**

*Nop ángel alteowix nej noic nine nawüig*

<sup>1</sup> Quiaj tajawas alinop ángel xowüy lapac, imiün tiül cielo. Nej awinchay tiül oic, alwüx omal nej ndequiamb poj. Teombas nej xowüy lachech atnej nüt, oleaj nej atnej oniw biümb.

<sup>2</sup> Almandeaand noic nine nawüig tejquian. Nej tacuüüch miác oleaj nej tiül nadam ndec, miquiamb oleaj nej wüx iüt.

<sup>3</sup> Quiaj tendeac napac atnej apaj nop león. Wüx landoj andeac, quiaj tetearriür ayaíw napac anendeoog andeac nej.

<sup>4</sup> Wüx landoj atearriür ayaíw andeac nej, xique lasamb sanarang wüx nawüig aag ayaj, quiaj tanguyaiüüs nop nendeac tiül cielo masaj xic:

—Ipálan tiül imeaats leawa apiüngüw ajcüwa ayaíw netearriür quiaj, nde merang wüx nawüig —aj xic.

<sup>5</sup> Aaga ángel sawaw necuüüch oleaj tiül nadam ndec, aton wüx iüt, nej taxaing miác owix nej andüy tiül cielo.

<sup>6</sup> Quiaj tandeac wüx minüt Teat Dios, aaga almapac meáwan nüt, aaga nerang cielo at leawa almajlüy quiaj, aaga nerang iüt at leawa almajlüy wüx iüt, aaga nerang nadam ndec at leawa almajlüy tiül ndec. Quiaj tapiüng:

—Nganüy apmajlüy leaw apmajlüy, lango mequiy;

<sup>7</sup> wüx aaga nüt apmaínd trompet aaga amb ayaíw ángel, quiaj apmajlüy atnej tapiüngüw mondeac andeac Teat Dios, leaw tasaj nejiw Teat Dios —aw.

<sup>8</sup> Condom aaga landoj nanguaiy andeac imiün cielo, tendeac alinomb masaj xic, tapiüng:

—Quiür, iyar aaga nine nawüig tejquian najlüy teowix aaga ángel necuüüch oleaj tiül nadam ndec at wüx iüt —aj xic.

<sup>9</sup> Quiaj tambas natüch aaga ángel, tasajas: —Chiün najaw aaga nine nawüig quiaj —saj.

Nej tasaj xic:

—Iyar, it, aag ayaj apmangan tiül im-beay atnej angan cün, pero apmangaag tiül imeaats —aj xic.

<sup>10</sup> Quiaj tayariüs aaga nine nawüig teowix aaga ángel, tüetiüs. Quiaj tangan tiül xim-beay atnej angan cün, pero wüx landoj nüet, quiaj tangaag tiül ximeaats.

<sup>11</sup> Condom quiaj tasoiquiüs:

—Netam mepiüng alinomb leaw lamasaj ic Teat Dios, nguineay apmamongochiw palpáwüx cambaj, palpáwüx iüt; nguineay apmamongochiw nipilan leaw andeacüw ombeayaran, at nguineay apmamongochiw montangtang monajiüt —sajow.

**11**

*Ijpüw monjaw*

<sup>1</sup> Quiaj tünditüs nots najchow nepeaxay. Quiaj tasoiquiüs:

—Lemben, quiür, ipeax aaga nadam nangaj iüm oceaj Teat Dios, aton ipeax aaga artül leaw alquiaj. Aton iteow meáwan mon-rang casa Teat Dios tiül aaga nangaj iüm quiaj.

<sup>2</sup> Nganüy amb wüx opech nangaj iüm, ich majlüy nde mepeax, cos Teat Dios lamüüch pálwüx nipilan ngome israel. Cos ajcüwa nipilan quiaj apmacuüüchcuüjchiw tiüt aaga nangaj cambaj quiaj meáwan ic miow ijquiwaw (42) caaw.

<sup>3</sup> Condom sanüüch mamb ajcüw ijpüwa monjaw aag tajlüy. Nejiw apmasojquiw nambeor apixaw nejiw majüic xeyay amix

omeajtsüw. At apmüjndiw ndom mandeacüw andeac Teat Dios meáwan noic mil ijquiw acoic miow er miow (1,260) nüt —aj xic.

<sup>4</sup> Ajcüwa ijpüw monjaw leaw tajlüy quiaj, ajcüw ayaj at nejiw ijquiw owil olivo, aton at nejiw ijquiw candiler najlüy niüng ajlüy Teat Dios nejaw wüx meáwan iüt.

<sup>5</sup> Sitiül aljane aleaic mandüüm marang wüx ombasüw nejiw, quiaj apmaw biümb teombeayiw nejiw, apmandrojchiw ombas moncüy majaw nejiw quiaj. Atquiaj sitiül aljane aleaic mandüüm marang wüx ombasüw nejiw, quiaj apmandeow aton.

<sup>6</sup> Ajcüw ayaj alndom mapalüw a cielo lango majoet meáwan nüt wüx apmandeacüw andeac Teat Dios. At alndom mangowüjchiw yow marang quiej. At alndom müjchiw majlüy cuajantanej ngo majneaj wüx iüt, leawa nejiw andiümw mayacüw.

<sup>7</sup> Wüx landoj marangüw minajiütüw nejiw, quiaj aaga napat nimal imiün tüüt tiül nequiliüt lol leaw ngo majiür ümb, apmatsojow maquiüjpüw, apmantsop wüx, apmambyiw nejiw.

<sup>8</sup> Condom niüngan andeowüw, apmacüliwan quiaj tiül calle tiül aaga nadam cambaj niüng tajmel wüx cruz Teat Cristo Midiosüw nejiw. Cos aaga nadam cambaj quiaj atnej Sodoma, tengwüy atnej Egipto.

<sup>9</sup> Condom meáwan er nüt alwüx pinawan, apmacüliw tiül calle majaraw. Meáwan nipilan monaw tiül namix cambaj, meáwan noicnoic ajlüy nipilan, meáwan mondeac palpáwüw ombeayaran, at meáwan nipilan monaw tiül palpáwüw iüt apmajawjawüw ajcüwa mondeow quiaj. Nejiw langome apmüjchiw mamiürajtüw.

<sup>10</sup> Condom quiaj meáwan nipilan wüx iüt apmpac omeajtsüw, cos landeowüw ajcüwa monxey quiaj. Quiaj apmarangüw nangs nüt, apmüjndiw cuajantanej nop alinop, cos ajcüw ijpüw mondeac andeac Teat Dios quiaj, langome apndom müjchiw mamongoch ngo majneaj alinomb.

<sup>11</sup> Pero wüx laümb er nüt alwüx pinawan, quiaj Teat Dios tapacüüch nejiw alinomb. Quiaj witiütöj lembemoj. Ndoj xeyay mbayatoj meáwan nipilan majawüw nejiw.

<sup>12</sup> Quiaj ajcüwa ijpüw monjaw quiaj tanguiayiw noic nanderac napac imiün tiül cielo, apiüng:

—Macaron —ajowiw.

Quiaj tambüw andüyiw cawüx tiül cielo, ambüw tiül oic, teamajawüw nejiw ambüw ajcüwa monbyiw nejiw.

<sup>13</sup> Quiajan tajlang noic nadam ateam; tandrooch ombas igajpowüw (1/10) iüm tiül a cambaj quiaj. Wüx tajlang aaga ateam quiaj, tandeowüw ayaíw mil nipilan. Quiaj meáwan nipilan leaw ngo mande-

owüw xeyay mbayatoj, tarangüw casa Teat Dios tiül cielo.

<sup>14</sup> Aaga amb ijquiw ngo majneaj quiaj, lamong. Condom amb arej ngo majneaj apmajlüy najénan.

*Amb ayaíw trompet*

<sup>15</sup> Wüx taínd a trompet amb ayaíw ángel, quiaj tajlüy xeyay mondeac tiül cielo, tapiüngüw napac:

Nganüy Miteatiüts Dios, at Teat Cristo micual nej apmajlüyiw wüx palpáwüx iüt;

condom Teat Cristo apmajlüy wüx meáwan leaw almajlüy meáwan nüt.

<sup>16</sup> Quiaj ajcüwa nimioiw apiquiw (24) montangtang ombas moncheten tiül mitronojüw niüng ajlüy Teat Dios, taquejliw micosüw nejiw, nómban mejquiejow tiüt marangüw casa Teat Dios.

<sup>17</sup> Teamapiüngüw:

Süjchiün ic gracias Xeteatiün Dios, ique alndom merang meáwan cuajantanej, ique almejliw nganüy, ique tejliw nde tanomb, at iliiüc miün alinomb.

Nganüy lamejüiquich ndoj imbas merang cuajantanej;

lamesap minajiüt merang natang wüx meáwan iüt.

<sup>18</sup> Meáwan palpáwüx nación wüx iüt tajcüyiw majawüw ic, pero nganüy amatüch a nüt mejcüy mejawüw.

At amatüch a nüt mejaw wüx asoetiw mondeow,

at aton apmeajchiw leaw apmüjndiw monrang minajiüt, ajcüw ayaj mondeac indeac.

Apmeajchiw leaw apmüjndiw meáwan micambajiüt, meáwan monyar indeac, masey natang, masey chingüy.

At aton amatüch a nüt mendrooch ombasüw ajcüw leawa teamandrojchiw ombas iüt.

<sup>19</sup> Quiaj aaga nadam nangaj iüm ocueaj Teat Dios tiül cielo lejquiat. Quiaj tajüic aaga nangaj cüx altiül. Condom quiaj tajliplip tiüt, aneerror quiaj, tetearriür tiüt, tajlang noic ateam, y tajmiüc xeyay hielo.

## 12

*Nop najtaj y nop nadam nimal atnej jüm.*

<sup>1</sup> Quiaj tajüic noic nadam majaraw tiül cielo. Aag ayaj nop najtaj, apix nej xowüy lachech atnej nüt, at a caaw altiüt teoleaj nej. Alwüx omal nej noic corona alwüx gajpic (12) ocas.

<sup>2</sup> Aaga najtaj quiaj, alteomeaats micual nej, teajiünts wüx acoy omeaats cos laliüc wijquiam micual nej.

<sup>3</sup> Condom quiaj tajüic alinoic majaraw tiül cielo. Aag ayaj nop nadam nimal atnej

jüm, nacants ombas, ajiür ayaíw omal nej y gajpowiw (10) miweac nej; ajiür noicnoic corona wüx omal nej.

<sup>4</sup> Naag miwüül nej tajimb tüüt iwear (1/3) ocas najlüy tüül cielo, talox nejw tüüt wüx iüt. Aaga nimal atnej jüm quiaj, tamb mo-jcom niüng ajlüy a najtaj laliüc wijquiam micual nej, cos andiüm matsamb micual nej wüxan apwijquiam.

<sup>5</sup> Aaga najtaj quiaj, wijquiat micual nej, nop nench. Aaga nench quiaj, apmajlüy wüx meáwan cambaj wüx iüt; nejin-guind ngome apndom marang leawa nej ngo mandium. Naleaing quiaj tajnot a nine ocueaj aaga najtaj quiaj, taquiüraab andüy cawüx niüng ajlüy Teat Dios, at niüng ajlüy najneajay mitrono nej.

<sup>6</sup> Condom aaga najtaj quiaj tecuiür andüy tüül wajchiüc niüng Teat Dios tasaj nej mamb macül. Quiaj tüünd meáwan leaw apmetam nej noic mil ijquiw acoc miow er miow (1,260) nüt.

<sup>7</sup> Condom quiaj tajlüy noic nadam montsoj tüül cielo; aaga natang ángel nenüt Miguel aquiüb miángeles nej, tatsojow maquiüjpüw aaga nimal atnej nadam jüm, aquiüb miángeles nej.

<sup>8</sup> Ndoj aaga nimal atnej nadam jüm ngo majntsopiw wüx; quiaj ngondom macülüw tüül cielo.

<sup>9</sup> Quiaj tajlos tüüt wüx iüt aaga nadam nimal atnej jüm quiaj. Cos nejay aaga ndiüc najlüy nde tanomb nenüt diablo, aag ayaj minatang nimeech, nenüt Satanás aton. Aaga newaiich nipilan wüx iüt tajlos tüüt wüx iüt maquiüüb meáwan miángeles nej.

<sup>10</sup> Quiaj tanguiyiüs andeac nop nendeac tüül cielo; tandeac napac, tapiüng:

—Canüy Teat Dios lajntsop wüx meáwan ngo majneaj. Teat Dios lamajüiquich nejay alndom majlüy wüx meáwan leaw almajlüy. Teat Cristo, aag micual nej, lamajüiquich nej aton ajlüy wüx meáwan leaw almajlüy; cos aaga neyac asoet nüt ongwiiüts wüx ombasüw mondüüb Teat Cristo niüng ajlüy Miteatiüts Dios, nej lajlos tüüt wüx iüt.

<sup>11</sup> Nejiw ajcüwa mondüüb Teat Cristo quiaj, tajntsopiw wüx minatang nimeech, cos tandeow aaga Quicheech Sap, tajüñch tüüt miqueij nej para mawün nejw wüx. At cos ngo mimboloj mandeacüw wüx Teat Cristo masey tajawüw apmambiyaranüw.

<sup>12</sup> Nganüy ich mapac imeajtsan meáwan monlüy tüül cielo. Pero nganüy xeyay ngo majneaj apmajlüyiw moncül wüx iüt, at moncül wüx iüt leaw ajlüy tüül ndec, cos minatangüw nimeech lapeay niüng ijlüyiün. Nej xeyay ajcüy, cos ajaw ngome xeyay nüt aliün majiür ndom marang leaw andiüm —aw.

<sup>13</sup> Condom aaga nadam nimal atnej jüm quiaj, wüx tayaag lajlos tüüt wüx iüt, quiaj

tapeax acuiür aaga najtaj newiquiach nine nench.

<sup>14</sup> Quiaj tüünd ijquiw miolümb nej aaga najtaj quiaj, atnej miolümb noic nadam águila, para majlüel andüy tüül wajchiüc niüng apmüünd meáwan leaw netam. Aag ayaj apmajlüy aroomb neat alwüx pinawan, tüül niüng ngondom matüch nej aaga nadam nimal atnej jüm quiaj.

<sup>15</sup> Condom aaga nadam nimal atnej jüm quiaj, tawün teombeay nej atnej nots lam amb teopech a najtaj. Aag ayaj tarang para macuarreech nej lam.

<sup>16</sup> Nganüy aaga iüt tambeol aaga najtaj quiaj, cos lejquiat, tümb xiüm a lam naw teombeay aaga nimal atnej jüm quiaj.

<sup>17</sup> Condom aaga nimal atnej jüm quiaj, masey xeyay tajcüy majaw aaga najtaj quiaj, ngondom marang nicuajind. Ndoj quiaj tamb matsoj maquiüjpüw aldemas micual aaga najtaj quiaj. Cos ajcüw ayaj ayariw aaga poch leaw lamayac Teat Dios; at ngo mimboloj mandeacüw wüx leaw lamarang Teat Jesucristo.

## 13

### *Ijpiüw napat nimal*

<sup>1</sup> Xique lembetos mbeay nadam ndec. Quiaj tajawas tüül ndec nop ngo majneaj nimal almajiür ayaíw omal nej, gajpowiw miweac nej. Wüx notsnots miweac nej ajiür noic corona; at wüx noicnoic omal nej ajlüy wüx noic minüteran xeyay ngo majneaj, cos andeac atnej dios nej.

<sup>2</sup> Aaga alinop nimal sajaw quiaj, ajlüy atnej nop lüw, oleaj nej atnej oleaj oso, ombeay nej atnej ombeay león. Condom aaga alinop nimal atnej jüm tüüch nej ndom marang cuajantanej; aton tüüch nej niüng tsoj majlüy wüx meáwan cuajantanej.

<sup>3</sup> Quiaj tajawas noic omal nej atnej tajcoch, ajüic atnej apmandeow; pero aaga ajiür aaga tajcoch quiaj tajneaj. Meáwan nipilan wüx iüt mbyatoy majawüw nguineay tarang aaga nimal quiaj, ndoj tandüjpiw nej.

<sup>4</sup> Condom quiaj meáwan nipilan tarangüw casa aaga nimal atnej jüm quiaj, cos nej tüüch marang natangüy aaga nimal atnej lüw quiaj. At tarangüw casa aaga nimal atnej lüw quiaj, tapiüngüw:

—¿Jane alndom marang cuajantanej atnej arang aaga nimal quiaja? ¿Jane alndom matsoj aweaag majntsop wüxe? —awüw.

<sup>5</sup> Quiaj aaga ngo majneaj nimal atnej lüw quiaj telombüy nejáyan quiaj. At tüünd mandeac xeyay ngo majneaj wüx ombas Teat Dios; at tüünd marang leawa nej andiüm meáwan ic miow ijquiw (42) caaw.

<sup>6</sup> Quiaj tandeac xeyay ngo majneaj wüx ombas Teat Dios. Tapaich minüt Teat

Dios, tapiich niüng acül Teat Dios, tapiich meáwan monlüy tiül cielo.

<sup>7</sup> At tüünd matsoj aweaag mondüüb Teat Cristo majntsop wüx nejiw. At tüünd majlüy wüx meáwan nipilan monaw cuajantanej iüt, meáwan monaw tiül namix cambaj, meáwan mondeac palpálwüx ombeayaran, at meáwan nipilan monaw tiül palpálwüx nación.

<sup>8</sup> Quiaj tarangüw casa aaga nimal atnej lüw quiaj meáwan nipilan monlüy wüx iüt leaw ngo marangüch minütiw nejiw tiül aaga nawiiig najlüy nde wüx nghanaw majlüy a iüt cam. Cos aag miün leaw lamüünd mapac meáwan nüt ajlüy minüt nej tiül aaga nawiiig quiaj. Aag ayaj ocueaj aaga Quicheech Sap tambiyaran.

<sup>9</sup> Nganüy leaw nendiüm manguiaj, ich manguiaj.

<sup>10</sup> Sitiül aljane apmayac alinop tiül manchiüc, nej aton apmamb tiül manchiüc. Aton sitiül aljane apmambiy alinop naag espada, nej aton naag espada apmindeowüy. Pares mondüüb Teat Cristo netam maiücüw wüx leaw apmamongochiw, tanaám ngo macueatiw Teat Dios.

<sup>11</sup> Ndoj quiaj tajawas alinop ngo majneaj nimal teaáw imiün tiüt tiül iüt. Aag ayaj ajiür ijtsüw miweac nej atnej miweac sap; nganüy andeac nej atnej andeac aaga nimal atnej jüm.

<sup>12</sup> Aaga nimal nejiür ijtsüw weac quiaj, tüünd majlüy wüx cuajantanej atnej arang aaga nimal atnej lüw quiaj. Nganüy aaga nimal atnej lüw quiaj ajlüy wüx aaga nimal nejiür ijtsüw weac. Quiaj tapiüing meáwan nipilan monlüy wüx iüt netam marangüw casa aaga ombas wüx nimal atnej lüw, aaga leaw tajneaj minecoy nej.

<sup>13</sup> Aton tarang nadam atéocan, cos tüüch majmiüc biümb imiün tiül cielo andüy wüx iüt, teamajawüw nipilan.

<sup>14</sup> Quiaj tawaiich meáwan nipilan monlüy wüx iüt naag aaga atéocan leawa tüüch nej marang aaga nimal atnej lüw quiaj. Aton tasaj meáwan nipilan monlüy wüx iüt netam marangüw nop narangüch dios majüic atnej aaga nimal atnej lüw quiaj, aaga tacoocharan naag espada ndoj tajneaj alinomb.

<sup>15</sup> Quiaj aaga nimal nejiür ijtsüw miweac nej tüünd mapacüüch aaga narangüch dios ajüic atnej lüw quiaj, tüüch mendeac. Aton tüüch mambiy meáwan leawa ngo marang casa aaga narangüch dios atnej lüw quiaj.

<sup>16</sup> At aton tapiüing netam majmel sello wüx miác owixaw, tengwüy teombas omalüw meáwan nipilan nde namix, nde natang; masey nejiür xeyay, masey ngo majiür nicuajind; masey najon mos, masey ngwüy.

<sup>17</sup> Quiaj nejingüind ngondom mangalüw tengwüy manüjpiw nicuajind sitiül ngo ma-

jiürüw aaga sello najlüy wüx minüt aaga nimal, tengwüy aaga número apiüing wüx minüt nej.

<sup>18</sup> Aag agüy naél maxoram omeaatsaran wüx nguineay apiüing aaga número alwüx sello. Leaw alndom maxom omeaats wüx, ich majaw cuane apiüing minúmero minüt aaga nimal quiaj, cos aaga número quiaj apiüing wüx minüt nop naxey. Aaga número quiaj, aag ayaj anaíw acoic miow er miow anaíw (666).

## 14

### *Atajcüw cantar 144,000 nipilan*

<sup>1</sup> Ndoj quiaj tajawas aaga Quicheech Sap, almbem wüx mitiüc Sión almaquiüüb coic miow ic miow apiquiw mil (144,000) nipilan. Nejiw almajiürüw minüt Teat Cristo, at minüt Miteat nej narangüch teombas omalüw.

<sup>2</sup> Quiaj tanguiaiyüs noic nanderac imiün tiül cielo atnej atearriür nadam lam, atnej noic napac netearriür wüx ajüy monteoc. At aaga nanderac quiaj, atnej wüx teatsündiw xeyay montsünd arpa.

<sup>3</sup> Quiaj ajcüwa coic miow ic miow apiquiw mil nipilan tatajüc cantar noic jayats himno niüng ajlüy najneajay alchetem wüx Teat Dios, at niüng ajlüy ajcüw apiquiw nimal almapac monlüy quiaj, at niüng ajlüy ajcüwa montangtang ombas monajiüt. Nejingüind ngondom masap mataag cantar aaga canto quiaj, áagan ajcüw acoic miow ic miow apiquiw mil nipilan. Ajcüw ayaj leaw tajwanüw naw tiül meáwan nipilan monlüy wüx iüt.

<sup>4</sup> Nejiw ngo marangüw nisoet maquiüjpw montaj. Nejiw ayaj almandüjpiw aaga Quicheech Sap nguiajantanej mamb, ombas majwanüw naw tiül meáwan nipilan majlüyiw atnej najneaj nichech müünd Teat Dios y aaga Quicheech Sap.

<sup>5</sup> Nejiw nómban ngo mawajichaw; at ngo majiürüw nisoet teombas Teat Dios niüng chetej tiül cielo. Tiül ombeayiw nejiw ngo maxoram awaiich, aaga nisoet ngo mat-sopoch nejiw.

### *Leawa tapiüing arojpiw ángeles*

<sup>6</sup> Quiaj tajawas alinop ángel tengual ajlüel cawüx tiül cielo. Nej teandeac masaj meáwan nipilan wüx iüt nguineay alndom mawüw wüx meáwan asoetiw nejiw. Teamasaj meáwan monlüy wüx a iüt cam, ajcüw ayaj monaw tiül meáwan nación, meáwan noicnoic ajlüy nipilan, monaw tiül mondeac palpálwüx ombeayaran, at monaw tiül meáwan namix cambaj wüx iüt.

<sup>7</sup> Nej tendeac napac, tapiüing:

—Netam mermbolan mendüyiün Teat Dios, netam meyajcan mejawan Teat Dios

najneaj arang. Cos lamatüch a ores majaw wüx asoet nipilan. Irangan casa aaga nerang cielo, nerang iüt, nerang ndec, nerang meáwan oniüüg yow —aw.

<sup>8</sup> Alinop ángel tapiüüg:

—Landroj ombas aaga nadam cambaj Babilonia cos aaga cambaj quiaj tüüch meáwan nación wüx iüt mangüniw; tayac nejiw wüx manganeowüw aaga vino leaw apiüüg wüx tandüjpiw palpáwüx dioses —aw.

<sup>9</sup> Andüüban aaga amb arojpiw ángel tandeac napac, tapiüüg:

—Sitiül aljane apmarang casa aaga ngo majneaj nimal atnej lüw quiaj, tengwüy aaga narangüch dios atnej lüw quiaj; aton sitiül apmayar misello nej teombas omal nej, tengwüy wüx owix nej,

<sup>10</sup> aaga leaw apmarang atquiaj apmajcüy majaw nej Teat Dios. Apmayac nej tiül xeyay ngo majneaj, tiül biümb maquiiüb azufre niüüg apmamogoch xeyay necoy; teamajawüw nej nangaj ángeles y aaga Quicheech Sap aton.

<sup>11</sup> Minasop aaga biümb niüüg apmamongochiw necoy apmajndoc meáwan nüt. Nejiw nüt ongwüüts ngondom maxojtüw, cos tarangüw casa aaga nimal atnej lüw, at aaga narangüch dios quiaj. Aton tayaranw sello alwüx minüt aaga nimal quiaj.

<sup>12</sup> Pares meáwan mondüüb Teat Cristo, ajcüwa leawa lamayacüw wüx omeajtsüw aaga poch tayac Teat Dios; nejiw netam maiücw wüx cuajantanej leaw apmamongochiw ningüy wüx iüt —aw.

<sup>13</sup> Quiaj tanguiaiyüs andeac nop nendeac imiün tiül cielo, tasaj xic:

—Irang wüx nawiüg atcüy: “Najneajay apmapac omeajtsüw nde nganüy at meáwan nüt jane lamayar andeac Teat Cristo masey ndoj tandeowüw”, aj xic. Aton aaga Nangaj Espiritu tapiüüg naleaing apmaxojtüw, lango metam marangüw najiüt; apmüjndiw leaw Teat Dios apmüch nejiw cos tarangüw najneaj.

*Taxaingeran cosecha wüx iüt*

<sup>14</sup> Condom tajawas, alcawüx noic raan oic. Wüx aaga oic quiaj alchetem nop atnej Teat Naxey. Alwüx omal nej noic corona narangüch oro; alteowix nots machat nexing.

<sup>15</sup> Ndoj quiaj taw alinop ángel imiün tiül nadam nangaj iüm, tengüal andeac napac masaj aaga alchetem wüx oic:

—Imelich icooch, cos lamatüch a nüt netam mecooch. Aaga cosecha najlüy wüx iüt latang —aj.

<sup>16</sup> Quiaj aaga cheten wüx oic tapots macooch maxaing a cosecha najlüy wüx iüt.

<sup>17</sup> Quiaj taw alinop ángel imiün tiül nadam nangaj iüm najlüy tiül cielo, alteowix nots machat nexing.

<sup>18</sup> Quiaj taw alinop ángel imiün niüüg ajlüy artül. Nej najlüy wüx aaga biümb wüx artül. Tandeac napac, tasaj aaga alteowix aaga nexing machat quiaj:

—Imelich icooch, ixaing ajcüwa tsongol uvas najlüy wüx iüt, cos lajün —aj.

<sup>19</sup> Condom quiaj aaga ángel temelich macooch maxaing aaga uvas najlüy wüx a iüt cam. Tayac tiül noic nadam iquial niüüg apmapatsüch miyow nej. Aag ayaj apiüüg lajcüy majaw nejiw Teat Dios.

<sup>20</sup> Aaga iquial uvas tajlüy mbeay cambaj; ndoj tapatsüch a uvas maw miyow nej quiaj. Quiaj tawün xeyay miyow nej atnej quiej, tajal, atüch niüüg ajlüy freno teombeay cawüy, atüch arej acoic miow (300) kilómetros adam ajal tiüt.

## 15

*Ajcüwa ángeles tayacüw ümb wüx ayaíw ngo majneaj wüx iüt*

<sup>1</sup> Condom quiaj tajawas alinoic nadam ateočan mbayamaran majaraw tiül cielo, xeyay mbayajos najaw: Ayaíw ángeles üjndiw mayacüw wüx iüt ayaíw ngo majneaj ndójwüx. Wüx aag ayaj apmamong ajcüy Teat Dios.

<sup>2</sup> Tajawas aton atnej nots ndec nerijrij atnej vidrio xowüy lachech, nacants atnej olüic biümb. At tajawas ajcüwa leaw tajntsojiw wüx maquiiüjpüw aaga nimal atnej lüw, cos ngo marangüw casa aaga narangüch dios, at ngo mayariw misello nej, tengwüy mayariw minüero minüt nej. Nejiw alembemoj mbeay aaga ndec atnej vidrio, almandeajndiw arpa leaw tüüch nejiw Teat Dios.

<sup>3</sup> Nejiw tengüal atajcüw cantar aaga canto ocueaj teat Moisés, aaga nerang minajiüt Teat Dios, at aaga canto ocueaj Quicheech Sap, leaw apiüüg atcüy:

Ique meáwan leawa lamerang xeyay najneajay, teat, cos ique cuajantanej alndom merang, Teat Dios;

ique mbójan najneaj irang, at naleaing irang aton,

cos ique minatang Rey wüx meáwan iüt.

<sup>4</sup> Meáwan nipilan apmimbol majawüw ic, Teat Dios.

Apmandeacüw najneaj wüx minüt,

cos ique nangaj ic.

Meáwan nipilan wüx iüt apmambüw niüüg ijlüy marangüw ic casa,

cos ajawüw najneaj teamerang wüx ijaw wüx asoeteran.

<sup>5</sup> Wüx landoj aag ayaj, quiaj tajawas tiül cielo lejquiat aaga xowüy langaj tabernáculo, aaga najlüy tiül nadam nangaj iüm.

<sup>6</sup> Quiaj tawüw ayaíw ángeles imiünüw tiül aaga nangaj iüm quiaj. Nejiw tüjndiw mayacüw alayaíw ngo majneaj wüx iüt. Nejiw asojquiw apixaw nejiw najneaj, nerixix, nelitlit. Anopnopo alatsüw mal miündüw nejiw notsnots cinta narangüch oro.

<sup>7</sup> Quiaj nop tiül nejiw ajcüw apiquiw nimal tüüch nejiw noic tas oro anopnopo ajcüw ayaíw ángeles quiaj, chipchipoaw aaga ngo majneaj; apmatongoj wüx iüt. Aaga leaw apmatongoj quiaj, apiüng wüx aag ayaj ajcüy Teat Dios, aaga almapac meáwan nüt.

<sup>8</sup> Condom aaga nangaj iüm quiaj chipiüt tiül nasop. Aag ayaj ajüiquich Teat Dios najneajay ajlüy, at aldom marang leawa nej andiüm. Nejingüind ngo ndom majmel tiül aaga nangaj iüm quiaj, leaw ajcüw ayaíw ángeles landoj mayacüw aaga ayaíw xeyay ngo majneaj wüx iüt.

## 16

*Aaga tas apiüng wüx apmamongocharan xeyay ngo majneaj*

<sup>1</sup> Quiaj tanguiaiüis noic nanderac napac imiün tiül aaga nangaj iüm quiaj, tasaj ajcüw ayaíw ángeles:

—Quiüran itongon wüx iüt naw tiül aaga ayaíw tas quiaj, cos ajcüw ayaj apiüng wüx Teat Dios lajcüy —aj nejiw.

<sup>2</sup> Quiaj tamb aaga mbáswüx ángel matong andüy wüx iüt naw tiül mitas nej. Quiaj taxom nejiw najloc atiümtiümbüüchan ajcüwa nipilan leawa almajiürüw misello aaga nimal atnej lüw, leawa tarangüw casa midios nej.

<sup>3</sup> Condom amb ijpüw ángel tatong andüy tiül nadam ndec naw tiül mitas nej. Quiaj aaga ndec tangowüüch marang quiej atnej miquiej tandeowüw meáwan cüet, meáwan nimal najlüy tiül nadam ndec.

<sup>4</sup> Ndoj quiaj amb arojpwüw ángel tatong andüy tiül lam, at andüy tiül meáwan oniiüg yow naw tiül mitas nej. Quiaj tangowüüch marang quiej meáwan yow.

<sup>5</sup> Quiaj tanguiaiüis andeac aaga ángel najlüy wüx meáwan yow, tapiüng:

—Teat Dios, ique nangaj, ique tejlüy nde tanomb, at almejlüy meáwan nüt. Ique najneaj irang wüx apmejaw wüx asoet nipilan.

<sup>6</sup> Atquiaj irang cos nipilan tambiyaw monyar andeac Teat Cristo, at tambiyaw mondeac indeac, taw miquiejijw nejiw. Condom ique aton lameeach quiej manganeowüw, cos atquiaj netam nejiw —aw.

<sup>7</sup> Quiaj tanguiaiüis alinoic nanderac imiün wüx artül, tapiüng:

—Naleaing Teat Dios, ique aldom merang cuajantanej. Ique irang naleaing, ique najneaj ijaw wüx asoet nipilan —aw.

<sup>8</sup> Ndoj quiaj amb apiquiw ángel, tatong wüx nüt naw tiül mitas nej. Quiaj a nüt tüünd merraar xeyay, tayac biümb mambel nipilan.

<sup>9</sup> Tandajpwüw nipilan cos xeyay arraar. Quiaj tapajchaw Teat Dios, aag neech majlüy aaga xeyay ngo majneaj wüx iüt. Naleaing nejiw ngo leam omeajtsüw macueatiw meáwan ngo majneaj leaw teamarangüw; ngo marangüw casa Teat Dios.

<sup>10</sup> Ndoj quiaj aaga amb acoquiaw ángel tatong naw tiül mitas nej andüy wüx aaga najneajay trono niüng tsojoj aaga nimal atnej lüw. Quiaj pojniüt meáwan niüng ajlüy wüx aaga nimal atnej lüw quiaj. Quiaj nipilan atsamsambüw oniweaw nejiw cos ayajcüw xeyay necoy, xeyay ngo majneaj.

<sup>11</sup> Xeyay tapajchaw Teat Dios najlüy tiül cielo cos xeyay necoy, xeyay ngo majneaj ayajcüw, xeyay najloc axom nejiw. Masey amongochiw aag ayaj, ngo leam omeajtsüw macueatiw leawa ngo majneaj teamarangüw.

<sup>12</sup> Ndoj quiaj aaga amb anaíw ángel tatong naw tiül mitas nej andüy tiül aaga nadam lam nenüt Eufrates. Quiaj tawaaga a yow tiül aaga lam quiaj, para mamongoj ajcüwa montangtang monajiüt monaw nonüt.

<sup>13</sup> Quiaj tajawas aaga nimal atnej jüm, aaga alinop nimal atnej lüw, aton aaga newaich nepiüng nej nendeac andeac Teat Dios. Quiaj tajawas taw teombeayiw nejiw nopnop nimeech atnej chiyam.

<sup>14</sup> Ajcüw arojpwüw nimeech quiaj, arangüw atecan. Nejiw apmambüw masojnongoj meáwan montangtang monajiüt wüx iüt wüx aaga netam nüt, matsojow maquiiüjpüw Teat Dios, aaga nerang cuajantanej.

<sup>15</sup> Quiaj tendeac Teat Cristo, tapiüng: “Saliüc wüx ngo mateotsaran, atnej arang nop need. Najneajay apmajlüy leaw almapac teamacül xic, tanaám ngo masoond apix nej atnej wüx alnameay; quiaj ngome apmajlüy miotáagan, lango maxing wüx nüt saliüc”, aw.

<sup>16</sup> Quiaj tasojnongoj meáwan montangtang monajiüt niüng nasoic Armagedón wüx aaga ombeayaran hebreo.

<sup>17</sup> Condom aaga amb ayaíw ángel tatong naw tiül mitas nej tiulan nepep. Quiaj tanguiaiüis noic nanderac napac imiün tiül aaga nadam nangaj iüm tiül cielo niüng ajlüy aaga najneajay trono niüng chetej Teat Dios, tapiüng:

—[Canüy landoj! —aw.

<sup>18</sup> Quiaj xeyay tajliplip tiüt, xeyay anerror, xeyay teteariür. At tajlang noic nadamüy ateam, ngomeaag ajlüy tatow ajlüy nipilan wüx a iüt cam.

<sup>19</sup> Quiaj aaga nadam cambaj Babilonia mbajcat arej ajlüy. Aton meáwan cambaj tiül meáwan palpálwüx nación tumb ndrom ombas. Atquiaj tarang Teat Dios wüx leaad omeaats nguineay tarang aaga nadam cambaj Babilonia, cos xeyay lajcüy majaw.

<sup>20</sup> At meáwan iüt pinawan ndec, at meáwan tiüc tumb ndrom.

<sup>21</sup> Quiaj tajmiüc wüx ombasüw nipilan xeyay nadamdand hielö imiün tiül cielo, noicnoic aüm maseyme ic miow (40) kilos. Quiaj nipilan tanaámb xeyay tapajchaw Teat Dios cos nej tüüch miün aaga hielö najmiüc wüx ombasüw nejijw, cos aag ayaj xeyay necoy, xeyay ngo majneaj.

## 17

*Wüx Teat Dios apmajaw wüx aaga najtaj nejijürjür naxey*

<sup>1</sup> Quiaj tiün majaw xic nop imiün tiül ajcüwa ayaíw ángeles monjür ayaíw tas. Nej tendecac masaj xic:

—Mac ningüy, sanüüch ic mejaw nguineay Teat Dios apmajaw wüx aaga minatang nelomblombüy najtaj, aaga altsotom wüx xeyay yow.

<sup>2</sup> Cos nej aaga nelomblombüy najtaj quiaj tawüywüy meáwan montangtang monajiüt wüx iüt marangüw nisoet maquiüjpüw. At meáwan nipilan wüx iüt angüniw wüx aaga vino leaw apiüng wüx arangüw nisoet maquiüjpüw —aw.

<sup>3</sup> Quiaj Nangaj Espiritu tüüch xic najaw atnej saüm. Quiaj tayajcas atnej aaga ángel taquiüüb xic mamb andüy tiül noic wajüüch. Quiaj tajawas nop najtaj almajtep nop nimal nacants ombas. Alwüx ombas aaga nimal quiaj xeyay minüt ngo majneaj. At aaga nimal quiaj ajür ayaíw omal nej y gajpowüw miweac nej.

<sup>4</sup> Aaga najtaj quiaj almasooig apix nej morada, at nacants. Ayac arend olaag, ayac andiig, ayac iqial owix. Altiül oro, altiül natsüjyay ombas piedra, altiül perlas. Almandeaand noic tas narangüch oro, chipiow tiül xeyay ngo majneaj. Aaga altiül a tas quiaj, apiüng wüx cuajantanej ngo majneaj narangüch, at wüx aaga nisoet nej tarang.

<sup>5</sup> Alteombas omal nej noic minüt nej ngo majüic cuane wüx apiüng. Aag ayaj apiüng: “Babilonia nej natang, nej mimüm meáwan monlombombüy montaj, nej neyac meáwan ngo majneaj najlüy wüx iüt”, aw.

<sup>6</sup> Quiaj tajawas aaga najtaj quiaj langün, cos tanganeow miqüiej monyar andeac Teat Cristo. At tanganeow miqüiej ajcüwa tambiyaranüw cos tandüjpiw Teat Cristo. Wüx tajawas, quiaj mbayatos xeyay.

<sup>7</sup> Condom quiaj aaga ángel tasaj xic:

—¿Neol mbayatear? Xique sanasaj ic cuane wüx apiüng aaga najtaj quiaj. Aton sanasaj ic cuane apiüng wüx aaga nimal nejijür ayaíw omal, at gajpowüw miweac nej, aaga almajtep a najtaj quiaj.

<sup>8</sup> Aaga nimal landoj mejaw quiaj, tanomb tajlüy, nganüy lango majlüy. Naleaing laliüc maw tiül nequiliüt lol leaw ngo majjür ümb, ndoj apmamb andüy tiül biümb. Quiaj ajcüwa nipilan moncül wüx iüt, leawa ngo marangüch minütiw nejijw tiül aaga nawüig najlüy nde wüx nganaw majlüy iüt, leaw ajjür minütiw tiül aaga nawüig leaw apiüng wüx apmacacüw meáwan nüt; nejijw apmbayamoj majawüw aaga nimal tajlüy tanomb, nganüy lango majlüy, ndoj apmajlüy alinomb.

<sup>9</sup> Leaw nexom omeaats alndom majaw cuane wüx andeac leaw sanapiüng nganüy: Ajcüw ayaíw omal nej quiaj, apiüng wüx ayaíw tiüc altsotom wüx aaga najtaj.

<sup>10</sup> Aton aaga ayaíw omal apiüng wüx ayaíw montangtang monajiüt. Acoquiaw nejijw lango majlüyiw, nop aliün mapac nganüy, alinop nganaw majlüy. Naleaing wüx nej apmapeay apmajlüy áagan acas nüt.

<sup>11</sup> Aaga nimal leaw nomb almapac nganüy lango majlüy, nej amb ojpeacüw natangtang nenajiüt, naleaing nej ajlüy tiül aaga ayaíw, condom apmamb tiül biümb.

<sup>12</sup> Aaga gajpowüw (10) weac tejaw, aag ayaj apiüng wüx gajpowüw montangtang monajiüt. Nejijw nganaw müjndiw niüng apmajlüyiw wüx. Naleaing apmüjndiw ndom marangüw natang monajiüt noic ores nóiquian maquiüjpüw aaga nimal quiaj.

<sup>13</sup> Ajcüw ayaj apmajlüyiw nóiquian, noic omeajtsüw maquiüjpüw aaga nimal atnej lüw quiaj. Nejijw apmüjchiw aaga nimal quiaj marang minajiütüw nejijw.

<sup>14</sup> Nejijw apmatsojow maquiüjpüw aaga Quicheech Sap. Naleaing nej apmajntsop wüx nejijw, cos nej Teat Naxey ajlüy natang wüx meáwan montangtang monxey; nej minatang nenajiüt wüx meáwan montangtang monajiüt. Ajcüwa almaquiüjpüw, ajcüw ayaj najpajüw, narriüjtüchiw; at ajcüw ayaj leaw ngo macueatiw mandüjpiw Teat Cristo, masey wüx tajlüy xeyay moncüy —aj xic.

<sup>15</sup> Aton aaga ángel tasaj xic:

—Aaga nelomblombüy najtaj tejaw altsotom wüx xeyay yow, aaga yow quiaj apiüng wüx xeyay cambaj, xeyay nipilan, xeyay nación, xeyay palpálwüx ombeayaran.

<sup>16</sup> Ajcüwa gajpowüw weac tejaw wüx omal aaga nimal, aag ayaj apiüng wüx gajpowüw montangtang monajiüt. Ajcüw ayaj aquiüjpüw aaga nimal, apmajcüyiw majawüw aaga nelomblombüy najtaj, apmayariw meáwan leaw almajjür, apmüjchiw majlüy miotáagan, apmatsambüw mionij nej y apmambeliw nej tiül biümb.

<sup>17</sup> Atquiaj apmajlüy, cos Teat Dios apmayac tiül omeajtsüw nejiw marangüw leawa nej andiüm. Cos nej tandiüm majlüyiw nóiquian, müjchiw aaga nimal marang aag ayaj. Atquiaj apmajlüy cos atquiaj alndom majlüy meáwan leawa Teat Dios lamapiüng netam majlüy.

<sup>18</sup> Aaga najtaj tejaw, aag ayaj apiüng wüx aaga nadam cambaj najlüy wüx meáwan montangtang monajüt wüx iüt —aj xic.

## 18

### *Ndrot ombas aaga cambaj Babilonia*

<sup>1</sup> Wüx landoj aag ayaj, quiaj tajawas alinop ángel imiün tiül cielo, áaga nejür nadam najiüt. Nej nómban anmarraj wüx iüt cos xeyay alitlit ombas nej.

<sup>2</sup> Quiaj tendead napac, tapiüng:

—[Landroj ombas, landroj ombas aaga cambaj Babilonia! Nganüy aaga cambaj lamarang niüng acüliw nimeech, at meáwan ngo majneaj espíritu. Aton alquiaj ombiüm meáwan ngo majneaj quiec leaw ngo mandüram.

<sup>3</sup> Aaga cambaj quiaj ndrot ombas cos nej tüüch meáwan nación manganeow aaga vino apiüng wüx aaga xeyay nadam nisoet tayac nejiw wüx; at cos meáwan montangtang monajüt tarangüw ngo majneaj nisoet maquiüjpüw. At tüüch mongalüy at monüjpeay wüx meáwan iüt majiürüw xeyay cuajantanej wüx nejiw tarangüw xeyay ngo majneaj maquiüüb —aw.

<sup>4</sup> Quiaj tanguyaiüs alinoic nanderac tiül cielo, tapiüng:

—Xenipilanüw, iriowan tiül aaga cambaj quiaj; nde mejlüyüün nóiquian mequiüjpan wüx aaga nisoet arangüch quiaj, ngana memongochiün aaga ngo majneaj leaw apmamongochiw quiaj.

<sup>5</sup> Cos asoetiw nejiw lajüic tiül cielo. Teat Dios leaad omeaats wüx aaga xeyay ngo majneaj leawa narangüch quiaj.

<sup>6</sup> Irangan wüx ombas nej atnej lamarang wüx imbasan; ijchan alinoic más ngo majneaj leaw nej tarang. Tiül aaga tas niüng nej tayac ngo majneaj nanganeowaran müüch nipilan, quiaj iyacan alinoic atonej ngo majneaj.

<sup>7</sup> Cos nej xeyay talombojchay, tarang meáwan cuajantanej leaw axom omeaats marang. Nganüy netam mejchiün mamongoch xeyay necoy atnej temongochiün, ijchan atonej tejiüntsán cos xeyay amix imeajtsán. Cos nej tiül omeaats nej apiüng: “Xique salcheten at xic nop natang nena-jiüt, xique ngome nop lemben omal, xique ngo metam najiünts, ngo mamix ximeaats nicuajind”, aw.

<sup>8</sup> Por aag ayaj, wüx noic nüt nej apmamongoch meáwan aaga ngo majneaj quiaj.

Apmajlüy xeyay mondeow; apmajlüy xeyay amix omeaatsaran, xeyay monjiünts; apmajlüy xeyay montiün andüy. Condom nej apmandaab tiül biümb, cos Teat Dios leaw nejaw wüx asoet nej alndom marang cuajantanej —aw.

<sup>9</sup> Condom meáwan montangtang monajüt wüx iüt leawa tarangüw ngo majneaj maquiüüb, leaw tarangüw aaga axom omeajtsüw marangüw, apmajiüntsüw, xeyay apmamix omeajtsüw wüx ombas nej, wüx apmajawüw minasop nej cos teandaab.

<sup>10</sup> Nejiw aplombomoj miünquiaj cos imboloj matüchiw, ngana maxom nejiw atnej. Apmapiüngüw:

—[Jaa, ique nadam cambaj Babilonia! Ique terang leaw tendiüm merang, nganüy noic ores landroj imbas —apmawüw.

<sup>11</sup> Quiaj meáwan monüjpeay y mongalüy wüx iüt apmajiüntsüw, xeyay apmamix omeajtsüw wüx aaga cambaj quiaj; cos nejingüind lango majlüy tiül aaga cambaj para mangal leawa nejiw ajiürüw.

<sup>12</sup> Cos nejiw ajiürüw oro, ajiürüw plata, ajiürüw natsüjyay ombas piedras, ajiürüw perlas. Aton ajiürüw najneajay jael nenüt lino, ajiürüw morada jael, at jael narangüch seda, at nacants jael. Aton ajiürüw cuajantanej najmboc angan xiül, aton cuajantanej narangüch marfil, aton cuajantanej narangüch najneaj xiül, ajcüw narangüch bronce, at leawa narangüch manchiüc, meáwan narangüch piedra nenüt mármol.

<sup>13</sup> Ajiürüw canela aton, y cuajantanej najmboc angan soex, pom, aaga soex nenüt mirra, aaga xeyay nembear perfume nenüt olíbano, vino, aceite, najneaj harina, at trigo. Ajiürüw boy, sap, cawüy, carret, aton ajiürüw najon nipilan marang mos.

<sup>14</sup> Quiaj ajcüwa monüjpeay at mongalüy apmasajüw aaga cambaj quiaj:

—Nganüy meáwan leaw xowüy tendiüm mejüür, aag ayaj langondom mejüür. Meáwan cuajantanej aóng xiül xowüy lambeat, cuajantanej xowüy lajneaj langondom mejüür, ngondom mexom alinomb —awüw.

<sup>15</sup> Quiaj ajcüwa monüjpeay at mongalüy leawa taxomüw xeyay tiül aaga cambaj quiaj, aplombomoj miünquiajan, apmajiüntsüw napac, cos xeyay amix omeajtsüw, imboloj matüchiw niüng ajlüy, ngana maxom nejiw aaga xeyay ngo majneaj maquiüjpüw.

<sup>16</sup> Aton apmapiüngüw:

—[Jaa, pobre ique nadam cambaj! Minipilan ajlüyiw atnej nop najtaj asooig najneaj jael nenüt lino, asooig morada y nacants jael. Asooig cuajantanej oro, asooig natsüjyay ombas piedras, y perlas;



<sup>17</sup> pero nganüy noic ores landroj ombas xeyay cuajantanej nembatmbeat —apmawüw.

Aton meáwan capitán tiül barco, meáwan monjüy ambüw tiül barco, meáwan marineros, at meáwan monjüy tiül ndec menüjpeay y mengalüy, nejiw aton lombotoj miünquiájan majawüw,

<sup>18</sup> y wüx tajawüw minasop aaga nadam cambaj quiaj wüx tandaab, quiaj tapiüngüw:

—¿wül alinoic cambaj matnej aaga nadam cambaj quiaja? —awüw.

<sup>19</sup> Quiaj tawijchaw iüt teomalüw nejiw majüiquichaw xeyay amix omeajtsüw. Tajiüntsüw, tepajüw napac:

—¡Jaa! ¡Pobre nadam cambaj! Cos meáwan leawa monjiür barco lamaxomüw xeyay tiül a cambaj quiaj. ¡Nganüy noic ores landroj ombas!

<sup>20</sup> 'Nganüy ich mapac imeajtsan icona monlüy tiül cielo, icona apóstoles, icona mondeac andeac Teat Dios, meáwan icona minipilan Teat Dios. Ich mapac imeajtsan, cos Teat Dios lamapalüch ombas leaw aaga cambaj tarang wüx imbasan —awüw.

<sup>21</sup> Quiaj nop ángel xowüy lapac tayar noic nadam piedra atnej mipiedra molino, talox tiül nadam ndec, tapiüng:

—Atnej aaga piedra ngo maxoram maraw alinomb, atquiaj aton aaga nadam cambaj Babilonia apmajlos tiüt majmiüc napac, nómban langome apmaxoram maraw.

<sup>22</sup> Tiül aaga cambaj quiaj, langome apmanguiyaran ajiünts arpa, langome apmajiünts ind, langome apmajiünts flauta, langome apmajiünts trompeta. Aton nejin-guind mondüy monrang cuajantanej najiüt langome apmajlüy quiaj. At langome apmanguiyaran teanchiülaran quiaj.

<sup>23</sup> Lámpara nómban langome apmarraj quiaj, at langome apmanguiyaran nangs nüt wüx angoch owixaran. Masey mongalüy at monüjpeay tiül aaga cambaj quiaj, alombaranüw meáwan wüx iüt, y aton monsüet quiaj tawajchaw meáwan nación, pero lango majlüyiw.

<sup>24</sup> At aton tiül aaga cambaj quiaj taxoram miqüiej ajcüwa mondeac andeac Teat Dios, at miqüiej meáwan mondüüb Teat Cristo leaw tambiyaranüw wüx meáwan iüt —aw.

## 19

### *Anderac najneaj wüx Teat Dios*

<sup>1</sup> Wüx landoj aag ayaj, quiaj tanguiyaiüs andeacüw xeyay nipilan tiül cielo, apiüngüw napac:

¡Aleluya! ¡Üjchiiuts gracias Miteatiiüts Dios!

Nej tawün icoots wüx asoetiüts, nej netam marangüch casa, cuajantanej alndom marang.

<sup>2</sup> Naleaing nej ajaw wüx asoet nipilan atnej netam nejiw.

Cos nej lamajaw wüx, lamayac asoet aaga natang nelomblobbüy najtaj, aaga tüüch marang nisoet meáwan nipilan wüx iüt.

Nganüy Teat Dios lamapalüch ombas, cos aaga najtaj quiaj tambiy monrang minajiüt Teat Dios, awüw.

<sup>3</sup> Ndoj quiaj tapiüngüw alinomb:

—¡Aleluya! Üjchiiüts gracias Teat Dios, cos minasop aaga biümb niüng teandaab aaga nelomblobbüy najtaj apmajndocndoc cawüx meáwan nüt —awüw.

<sup>4</sup> Quiaj ajcüwa ic miow apiquiw (24) montangtang ombas monxey, aton ajcüw apiquiw atnej nimal leaw almapac taquiejliw micosüw nejiw mejquiejow tiüt marangüw casa Teat Dios, aaga alcheten tiül najneajay trono, tapiüngüw:

—¡Amén, aleluya! —awüw.

<sup>5</sup> Condom quiaj tanguiyaran noic nanderac imiün niüng ajlüy aaga najneajay trono niüng chetejeran quiaj, tapiüng: Irangan casa Miteatiiüts Dios, meáwan icona monrang minajiüt nej, masey chingüy masey natang, irangan nej casa, irangan leaw apiüng —aw.

*Nangos nüt wüx apmengoch owix Quicheech Sap*

<sup>6</sup> Condom tanguiyaiüs atnej xeyay nipilan andeacüw, atnej atearriür lam, atnej atearriür tiüt ajüy monteoc. Nejiw tapiüngüw:

¡Aleluya! Miteatiiüts Dios lajlüy wüx meáwan cambaj, nej ndoj ombas marang cuajantanej leaw andiüm.

<sup>7</sup> Ich mapac omeajtsaats, mayajcaats xeyay najneajay, marangaats casa Teat Dios;

lamatüch a ores mengoch owix a Quicheech Sap.

Minüx nej latajquiay majneaj maquiiüb minench nej.

<sup>8</sup> Nej tüünd apix nej, masooig najneaj jael nenüt lino, nerixix, nelitlit —awüw.

Pues aaga najneaj jael nenüt lino quiaj, apiüng wüx nguineay mondüüb Teat Cristo tarangüw najneaj atnej andiüm Teat Dios.

<sup>9</sup> Quiaj nop ángel tasaj xic:

—Irang wüx nawüig, ipiüng: “Najneajay ich mapac omeajtsüw leawa tajpajüw metiw wüx tengoch owix a Quicheech Sap” —aw.

Ndoj tasaj xic:

—Aaga poch ocueaj Teat Dios quiaj, naleaing —aj xic.

<sup>10</sup> Quiaj xique taquiejliüs xecos tiüt narang casa aaga ángel quiaj. Ndoj tasaj xic:

—Ngwüy, nde merang xic casa, cos xique nerangas minajiüt Teat Dios atnej ique irang, atnej arangüw meáwan mondüüb Teat Cristo, meáwan monyar andeac nej. Néjan Teat Dios irang casa. Cos aaga naleaing leawa taquiaach Teat Jesús, áag miün tandeacüw nomb ajcüwa mondeac andeac Teat Dios —aj xic.

*Nop nejtep raan cawüy*

<sup>11</sup> Condom tajawas lejquiaw a cielo. Quiaj tajntsoj nop raan cawüy alwüx nejtep nej. Aaga nejtep cawüy quiaj minüt nej Nerang Leaw Apiüng Apmarang, at Naleaing alinoic minüt nej. Nej najneaj arang wüx ajaw wüx asoeteran, at wüx amb tiül montsoj.

<sup>12</sup> Oniüüg nej atnej oniw biümb; alwüx omal nej xeyay corona. Aton almajiür noic minüt nej narangüch teombas nej; naleaing nejninguind ngo majaw cuane apiüng, néjan ajaw.

<sup>13</sup> Almasooig noic apix nej nesong tiül quiej. Minüt nej Nanderac Ocueaj Teat Dios.

<sup>14</sup> Meáwan monlüy tiül cielo tandüjpiw nej, ajteptepiw raan cawüy. Asoijquiw apixaw nejw xowüy lajneaj jael nenüt lino, rajnüy, nerixix.

<sup>15</sup> Ajüic imiün teombeay nej nots espada nexing. Naag aag ayaj apmandrooch ombas meáwan nación. Condom nej apmasap nejw, müüch marangüw leawa nej apmapiüng. Nej apmarang wüx ombasüw nejw atnej arangüch wüx uvas wüx ayacüch tiül noic nadam iquial niüng apmappsüch miyow nej. Aag ayaj ajüiquich xeyay ajcüy majaw nejw Teat Dios, y nej alndom marang cuajantanej.

<sup>16</sup> Aton wüx aaga najal apix nej, at wüx mitsac nej narangüch minüt nej, apiüng: “Minatang Rey wüx meáwan Reyes, Natangüw wüx meáwan montangtang”, aw.

<sup>17</sup> Quiaj tajawas nop ángel alembem wüx nüt, tendeac napac masaj meáwan quiec nalüel cawüx, tapiüng:

—Macaron, canchiüron, cos Teat Dios apmayac noic nadam nüeteran.

<sup>18</sup> Cos apmetsamban mionij montangtang monajiüt, mionij minatangüw soldados, mionij aag xowüy lapat, mionij micawüy soldados, mionij soldados montep cawüy, mionij meáwan nipilan masey ngomeaag arangüw mos, masey mionij nipilan arangüw najon mos, mionij chingüy nipilan, mionij natang nipilan —aw.

<sup>19</sup> Quiaj tajawas aaga nimal atnej lüw almaquiüüb meáwan montangtang monajiüt wüx iüt at misoldadojüw nejw. Nejw sonongotoj matsojow maquiüjpiw aaga nejtep cawüy quiaj, at misoldados nej leawa almaquiüüb.

<sup>20</sup> Quiaj aaga nimal atnej lüw quiaj, ndeaad maquiüüb aaga nerang ateócan,

aaga newaiich nepiüng nej nop nendeac andeac Teat Dios. Nej tawaiich nipilan leawa tajiürüw misello aaga nimal atnej lüw quiaj, leaw tarangüw casa aaga narangüch dios. Ndoj ajcüwa ijpüw quiaj, tan apacüw tajlosüw tiül biümb niüng teandaab azufre.

<sup>21</sup> Condom aldemas nipilan leaw taquiüjpiw aaga nimal atnej lüw quiaj tambiyaranüw naag aaga espada naw teombeay aaga nejtep cawüy quiaj. Ndoj meáwan quiec paxiüt üetiw matsambüw mionijeaw nejw.

## 20

*Apiüng wüx noic mil neat*

<sup>1</sup> Ndoj quiaj tajawas nop ángel imiün tiül cielo almajoy millave aaga nequiliüt lol leaw ngo majiür ümb; alteowix nej nots nadam galen.

<sup>2</sup> Quiaj tasap aaga nimal atnej jüm, aag ayaj aaga ndiüc najlüy de tanomb, minatangüw nimeech nenüt diablo, aton minüt nej Satanás. Aag ayaj ndeaad matsajcüch naag galen, macül noic mil neat.

<sup>3</sup> Quiaj talox tiül aaga nequiliüt lol najlüy tiüt, condom tapal, tayac wüx noic sello. Quiaj ngondom maw mawaiich nipilan tiül palpälwüx nación leawa among noic mil neat. Condom wüx landoj aaga mil neat, quiaj netam tsüjmbiüm alacas nüt.

<sup>4</sup> Quiaj tajawas tigüy najneajay tronos chetejeran wüx, alchetemoj wüx ajcüwa tündiw majawüw wüx asoet nipilan. At tajawas ajcüwa nipilan leawa tambiyaranüw tandoogaran oniquiaw wüx andeacüw wüx Teat Jesús y wüx Mipoch Teat Dios. Aton cos nejw ngo marangüw casa aaga nimal atnej lüw quiaj; at ngo marangüw casa aaga narangüch dios. At ngo mayariw sello teombas omalüw nejw, tengwüy wüx owixaw nejw. Ajcüw ayaj tapacüw alinomb marangüw montangtang monajiüt wüx meáwan iüt maquiüjpiw Teat Cristo aaga noic mil neat.

<sup>5</sup> Ajcüw ayaj leaw ombas mapacüw. Nganüy aldemas mondeow ngo mapacüücharanüw alinomb leaw landoj noic mil neat.

<sup>6</sup> Xeyay apmapac omeajtsüw, at nangaj apmajlüyiw meáwan leaw ombas mapacüw alinomb. Nejw ngome apmambüw tiül biümb, aag ayaj nasoic amb ijbüw andeowaran. Nejw apmarangüw miteaats ocueaj Teat Dios at ocueaj Teat Cristo. Nejw apmajlüyiw wüx meáwan iüt maquiüjpiw Teat Cristo wüx nej apmayar marang minajiüt nej noic mil neat.

<sup>7</sup> Wüx lamong aaga noic mil neat, quiaj aptsüjmbiüm alinomb minatangüw nimeech nenüt Satanás naw tiül manchiüc.

<sup>8</sup> Quiaj apmamb tiül palpálwüx nación mawaiich meáwan nipilan wüx iüt. Apmasojnong nipilan tiül Gog at Magog matsojow maquiüypüw minipilan Teat Dios. Ajcüw ayaj apmajlüyiw xeyay nipilan atnej miwiüd nadam ndec.

<sup>9</sup> Quiaj ajcüwa nipilan tambüw, ambüwan wüx iüt. Condom tayeyiw tiüt niüng acüliw mondüüb Teat Dios, at tayeyiw tiüt aaga cambaj leaw Teat Dios xeyay andiüm. Quiaj Teat Dios tüüch majmiüc biümb imiün tiül cielo wüx ombasüw, tumb mandajpüw.

<sup>10</sup> Quiaj aaga minatangüw nimeech newaiich nejiw, ndeaad. Condom tajlos tiül niüng ajlüy xeyay biümb niüng teandaab azufre, niüng almajlüyiw aaga nimal atnej lüw, aton niüng ajlüy aaga newaiich nepiüng nej nop ndeac andeac Teat Dios. Quiaj apmamongochiw xeyay ngo majneaj nüt ongwüüts meáwan nüt.

### *Apmajaraw wüx asoeteran*

<sup>11</sup> Quiaj tajawas nop alchetem wüx aaga nadam trono, rajnüy. Quiaj tawüw niüng ajlüy nej iüt, nüt, caaw, ocas; nómban langome apmaxoram majaraw alinomb.

<sup>12</sup> Quiaj tajawas meáwan mondeow, natang at chingüy, alebemoj niüng ajlüy aaga najneajay trono. Condom lejquiat acas nawiiig. Ndoj lejquiat alinoic nawiiig, altiül minütiw nejiw leaw apmapacüw meáwan nüt. Condom quiaj tajawaranüw wüx ombasüw mondeow atnej larangüch tiül ajcüwa nawiiig, nguineay tarangüw anopnopo.

<sup>13</sup> Quiaj tawüw imiün tiül nadam ndec meáwan mondeow leawa tandeowüw tiül ndec. At tawüw imiün tiül niüng acüliw mondeow, nenüt Hades, meáwan mondeow leawa alquiaj. Quiaj tajawaranüw wüx ombasüw nejiw anopnopo nguineay tarangüw wüx almapacüw.

<sup>14</sup> Condom quiaj ajcüw leaw acüliw niüng ajlüy mondeow, at leaw altiül aaga Hades, tajlos tiül biümb. Aag ayaj apiüng wüx amb ijmbüw andeowaran.

<sup>15</sup> Ninguiaj ajüic leawa ngo maxoram minüt nej tiül aaga nawiiig niüng ajlüy minütiw leaw apmapacüw meáwan nüt, ajcüw ayaj tajlosüw tiül biümb.

## 21

### *Jayats iüt, jayats cielo*

<sup>1</sup> Ndoj quiaj tajawas larangüch noic jayats iüt, nüt, caaw, ocas; cos meáwan leaw mbas majlüy lango majlüy. At nadam ndec lango majlüy.

<sup>2</sup> Condom xique Juan, aton tajawas aaga nangaj cambaj, aag ayaj jayats Jerusalén aliüc imiün tiül cielo niüng ajlüy Teat Dios. Aaga cambaj quiaj ajlüy najneajay atnej

nop nüx lasoijquiay apmengoch owiw maquiüüb minench nej.

<sup>3</sup> Quiaj tanguiayüis noic nanderac napac imiün tiül cielo, tapiüng:

—Jogüy, Teat Dios lapeay niüng ajlüy nipilan. Nejiw apmajlüyiw minipilan nej, nejay Teat Dios apmacül maquiüüb nejiw, apmajlüy Midiosüw nejiw.

<sup>4</sup> Teat Dios apmajend miyow oniügaran. Langome apmajlüy andeowaran; langome apmajlüy amix omeaatsaran, langome apmajlüy monjiünts, langome apmajlüy necoy, cos meáwan leawa tajlüy nomb lango majlüy —aw.

<sup>5</sup> Condom aaga cheten tiül aaga najneajay trono quiaj, tapiüng:

—Nganüy xique sarang jayats meáwan cuajantanej —aw.

Quiaj tasaj xic aton:

—Irang wüx nawiiig, cos aaga poch cam naleaing, alndom meyar meyac wüx imeaats —aj xic.

<sup>6</sup> Quiaj tasaj xic alinomb:

—Canüy landoj. Xique ombas salnajlüy, atnej letra A; at sajlüy ümbwüx, atnej letra Z. Leawa nind anganeow yow xique sanüüch, süüchan aaga yow neech mapacaran naw tiül oniüig yow ajlüyay pacaw.

<sup>7</sup> Sitiül aljane apmaiüc wüx meáwan ngo majneaj, nej sanüüch maneay meáwan aaga jayats leaw apmajlüy. Xique sanajlüy Midios nej, nej apmajlüy xecual.

<sup>8</sup> Nganüy meáwan leaw imbol mandüüb Teat Cristo, meáwan leawa ngo mayar andeac nej, meáwan monrang xeyay ngo majneaj, meáwan monbiw nipilan, meáwan monjiür palpálwüx najtaj palpálwüx naxey, meáwan monsüet monwüneya marang ngo majneaj, meáwan monrang casa narangüch dios, meáwan monwaiich, meáwan ajcüw ayaj apmambüw tiül xeyay biümb niüng teandaab azufre. Meáwan leawa apmambüw tiül aaga biümb quiaj, aag ayaj nasoic amb ijmbüw andeowaran —aj xic.

### *Jayats Jerusalén*

<sup>9</sup> Quiaj tiün majaw xic nop ángel naw tiül aaga ayaüw ángeles, ajcüw tajiürüw ayaüw tas chipchipiow leaw xeyay ngo majneaj tatongoj wüx a iüt cam. Nej tendec masaj xic, tapiüng:

—Mac ningüy, sanüüch ic mejaw aaga nüx, minüx aaga Quicheech Sap —aj xic.

<sup>10</sup> Condom quiaj aaga Nangaj Espiritu ocueaj Teat Dios tüüch xic najaw atnej saüm. Tayajcas atnej taquiüüb xic mamb aaga ángel andüy wüx nop najal oleaj tiüc. Quiaj tüüch xic najaw aaga nangaj cambaj Jerusalén aliüc imiün tiül cielo niüng ajlüy Teat Dios.

<sup>11</sup> Aaga cambaj quiaj, xeyay najneajay atnej ajlüy Teat Dios. Xowüy lalitlit atnej noic

natsüjyay ombas piedra, atnej noic piedra nenüt jaspe, nerijrij atnej vidrio.

<sup>12</sup> Aaga cambaj quiaj, ayey nej tiüt noic nadam muro atnej otüeng coet najal oleaj. Ajiür gajpic (12) ombeay niüng ajmeleran, y nopnop ángel niüng ajmeleran. Narangüch wüx noicnoic niüng ajmeleran noic minüteran. Aag ayaj minütiw gajpiüp (12) monxey micual Israel.

<sup>13</sup> Aaga cambaj quiaj amb nonüt ajiür arej niüng ajmeleran; amb calüy ajiür arej niüng ajmeleran; amb cawac ajiür arej; amb noleat ajiür arej.

<sup>14</sup> Aaga muro ayey nej tiüt aaga cambaj quiaj, ajiür gajpic (12) nadam piedra witiow wüx a muro. Noicnoic piedra alwüx minüt nop apóstol, ajcüwa gajpiüp (12) apóstoles ocueaj aaga Quicheech Sap.

<sup>15</sup> Aaga ángel tengual andeac masaj xic quiaj, alteowix nej nots nipeaxay narangüch oro para mapeax aaga cambaj, mapeax meáwan puerta, at apmapeax aaga nadam muro ayey tiüt a cambaj.

<sup>16</sup> Aaga cambaj quiaj atowtow ajlüy mepiquiw. Quiaj tapeax aaga cambaj naag a ipeaxay quiaj. Tatüch ijquiw mil ijquiw acoic miow (2,200) kilómetros andüy wüx ajal, atonej andüy wüx oxet, atonej andüy wüx ajal oleaj.

<sup>17</sup> Condom tapeax aaga muro atnej otüeng coet quiaj, atüch er miow acoquiaw (65) metro ajal oleaj. Aaga ipeaxay a ángel quiaj, aag ayaj atow nej apeaxiw owix nipilan.

<sup>18</sup> Aaga muro quiaj, narangüch naag xeyay natsüjyay ombas piedra nenüt jaspe. Nganüy aaga cambaj quiaj narangüch palüyan oro nerijrij atnej vidrio.

<sup>19</sup> Ajcüwa gajpic (12) nadamdám piedra witiow wüx aaga muro neyey tiüt cambaj, ajmel wüx mimhaj nej palüyan natsüjyay ombas piedra. Aaga mbáswüx piedra nenüt jaspe, amb ijquiw piedra nenüt zafiro, amb arej nenüt ágata, amb apiquiw nenüt esmeralda.

<sup>20</sup> Aton amb acoquiaw nenüt ónice, amb anaíw nenüt cornalina, amb ayáiw nenüt crisólito, amb ojpeacüw nenüt berilo, amb ojquiej nenüt topacio, amb gajpowüw nenüt crisopraso, amb gajpanoic nenüt jacinto, amb gajpic nenüt amatista.

<sup>21</sup> Nganüy ajcüwa gajpic puerta ajlüy gajpic nadamdám perla, noicnoic puerta ajlüy noic nadam perla. Aaga calle tiül aaga cambaj quiaj palüyan oro, nerijrij atnej vidrio.

<sup>22</sup> Tiül aaga cambaj quiaj, ngo naxom najaw noic templo; ngo majlüy, cos Teat Dios leaw alndom marang cuajantanej, at aaga Quicheech Sap ajlüyiw ingow ajlüy nangaj iüm.

<sup>23</sup> Aaga cambaj quiaj ngo metám nej nüt, ngo metám nej caaw marraj quiaj, cos Teat

Dios leaw xeyay najneajay ajlüy, xowüy arraj meáwan tiül a cambaj quiaj. At aaga Quicheech Sap arraj atnej lámpara.

<sup>24</sup> Meáwan nipilan naw tiül palpálwüx nación leawa tawüw wüx asoetiw nejw apmajüyw tiül aaga ran tiül aaga cambaj quiaj. Meáwan montangtang monajiüt najlüyiw wüx iüt apmambüw tiül aaga najneajay cambaj quiaj, majoyiw mamb leawa xeyay najneajay ajiürüw mäjchiw Teat Dios, marangüw nej casa.

<sup>25</sup> Meáwan puerta niüng ajmeleran ocueaj aaga cambaj quiaj aplejquiam meáwan nüt, ngo palam cos ngo majlüy ongwiiüts quiaj.

<sup>26</sup> Apmajoyaran mamb meáwan leaw xeyay najneajay müünd Teat Dios marangüch casa.

<sup>27</sup> Tiül aaga cambaj quiaj, ngondom majmel nicuajind ngo majneaj, at nejin-guind nerang ngo majneaj, at monwaiich; naleaing apmajmeliw ajcüwan leawa apmactüw meáwan nüt, cos larangüch minütiw nejw tiül aaga nawiig ocueaj Quicheech Sap.

## 22

<sup>1</sup> Wüx landoj aag ayaj, quiaj aaga ángel tiüch xic najaw nots lam nerixixay, nerijrij atnej vidrio; aaga yow quiaj neech mapacaran. Aag ayaj imiün niüng ajlüy najneajay trono chetej wüx Teat Dios, at niüng ajlüy aaga Quicheech Sap.

<sup>2</sup> Aaga lam quiaj among amb pinawan aaga calle tiül a cambaj quiaj. Mbeaymbeay aaga lam quiaj, ajlüy xiül neech mapacaran meáwan nüt. Aaga xiül quiaj, apmeóng gajpic (12) aóng tiül nomb neat; aag ayaj aóng noicnoic caaw. Aton naag aóp aaga xiül quiaj alndom mamongoch iün andeow meáwan nación.

<sup>3</sup> Tiül aaga cambaj quiaj lango majlüy nicuajind ngo majneaj. Naleaing aaga najneajay trono niüng chetej Teat Dios, at a trono niüng chetej aaga Quicheech Sap apmajlüy tiül aaga cambaj quiaj. Quiaj meáwan monrang minajiüt nej apmarangüw nej casa.

<sup>4</sup> Apmajawüw mitey nej, aton minüt nej apmajlüy teombas omalüw nejw.

<sup>5</sup> Quiaj langome apmajlüy ongwiiüts, ngome apmetám lámpara marraj; ngome apmetám atil nüt, cos Teat Dios apmarraj meáwan leaw almajlüy quiaj. Nejw apmajlüyiw montangtang meáwan nüt, meáwan neat.

*Teat Cristo apmandilil najen*

<sup>6</sup> Quiaj aaga ángel tasaj xic:

—Aaga poch cam naleaing, ngo mawai-ich, alndom meyar leaw apiüng. Aaga Nangaj Espíritu ocueaj Teat Dios, aag neech marangüw wüx nawiig leaw andeac nej

ajcūw mondeac andeac nej, nej tūūch miün miáŋgel nej majiūquich leawa laliūc majlūy, majawūw aag ayaj monrang minajiūt nej —aw.

<sup>7</sup> —¡Xique saliiūc najéŋan! ¡Najneajay, ich mapac omeajtsūw leawa apmayac wūx omeaats andeac Teat Dios atnej apiūng tiūl aaga nawiig cam, cos nej lamapiūng nguineay apmajlūy alinoic nūt! —aw Teat Cristo.

<sup>8</sup> Xique, Juan, tanguiaiūy, tajawas meáwan aag ayaj. Wūx landoj nanguiay, najaw aag ayaj, quiaj taquiejliūs xecos teoleaj aaga ángel narang casa, cos nej neech xic najaw aag ayaj.

<sup>9</sup> Quiaj tasaj xic:

—Ngwūy, nde merang xic casa, cos xique aton sarang minajiūt Teat Dios at ic, atnej tarangūw mondeac andeac Teat Dios, atnej arangūw leawa ayac wūx omeaats aaga poch najlūy tiūl aaga nawiig cam. Néjan Teat Dios netam merang casa —aj xic.

<sup>10</sup> Ndoj tasaj xic:

—Nde mexot aaga poch najlūy tiūl aaga nawiig cam, aag apiūng wūx nguineay apmajlūy alinoic nūt, cos laliūc majlūy aaga lamapiūng quiaj.

<sup>11</sup> Leawa nerang ngo majneaj, tanaámb ich marang ngo majneaj, at leawa nerang nisoet ich marang tanaámb. Nganūy leawa nerang najneaj, tanaámb ich marang najneaj. At leawa nerang andiūm Teat Dios, tanaámb ich marang leaw andiūm Teat Dios —aj xic.

<sup>12</sup> Quiaj Teat Jesús tapiūng:

—Naleaing xique saliiūc najéŋan, sanajamiün leaw sanūūch nopnopoŋ leaw tarang.

<sup>13</sup> Xique mbas salnajlūy atnej letra A, at sajlūy ūmbwūx atnej letra Z —aw.

<sup>14</sup> Najneajay apac omeajtsūw leawa tajwan asoetiw nejw, cos aag ayaj atnej lajantsūch apixaw nejw, majmeliw ambūw tiūl aaga puerta ocueaj aaga najneajay cambaj, at matūchiw aaga xiūl neech mapacaran meáwan nūt.

<sup>15</sup> Nganūy ajcūwa leawa ngo mūjndiw majmeliw tiūl aaga cambaj nipiaj, ajcūw ayaj atnej ngo majneaj nimal leaw mbójan arang ngo majneaj. Ajcūw ayaj monsiet; ajcūw ayaj monjiūr pálwūx minajtaj pálwūx minaxey; ajcūw ayaj monbiy nipilan; ajcūw ayaj monrang casa narangūch dios; at meáwan mondiūm leaw ngo maleaing, tengwūy monwaiich.

<sup>16</sup> —Xique Teat Jesús tūjchiūs miün xeáŋgel mapiūng aaga poch lajlūy tiūl aaga nawiig cam, manguiaiwiw meáwan mondūūb xic tiūl palpálwūx cambaj. Xique nawas tiūl acualaats aaga Rey David tajlūy nomb. At xique sajlūy natang atnej aaga nadam ocas najntsop chíūjmbaw —aw.

<sup>17</sup> Aaga Nangaj Espiritu ocueaj Teat Dios, y meáwan mondūūb Teat Cristo, nejw ajlūyiw atnej minūx nej, apiūngūw:

—Mac —awūw.

At leaw anguiay, ich mapiūng aton:

—Mac —ich maw.

Aton jane nind anganeow, ich miün manganeow; meáwan leawa andiūmūw manganeowūw, ich manganeowūw aaga yow neech mapacaran meáwan nūt, aag ayaj ūjndiwan.

<sup>18</sup> Xique Juan, sasaj meáwan leawa apmanguaiy andeac Teat Dios tiūl aaga nawiig cam: Sitiūl aljane apmayac wūx, quiaj Teat Dios apmūūch majlūy wūx ombas nej meáwan ngo majneaj atnej lamapiūng tiūl aaga nawiig cam.

<sup>19</sup> Aton sitiūl aljane apmawūn quirirw naw tiūl aaga nawiig cam niūng Teat Dios apiūng nguineay apmajlūy alinoic nūt, quiaj Teat Dios langome apmūūch nicuajind leaw lamapiūng apmūūch minipilan nej tiūl aaga nangaj cambaj; ngome apmayar aaga najneaj atnej apiūng tiūl aaga nawiig cam.

<sup>20</sup> Aaga nepiūng meáwan aag agūy, apiūng:

—Naleaing xique saliiūc najéŋan —aw.

Amén. ¡Atquiaj apmajlūy! ¡Mac Teat Jesús!

<sup>21</sup> Sandiūm Miteatiiūs Jesucristo mūūch icon meáwan mimonajneaj nej. Amén.